


Juziñamui Ñuera
Uai



New Testament in Huitoto, Minica

Juziñamui Ñuera Uai

New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files dated 29 Jan 2022
740f11a2-2e26-57f5-a3a7-5deb2d20bd24

Contents

SAN MATEO	1
SAN MARCOS	69
SAN LUCAS	111
SAN JUAN	182
LOS HECHOS	230
ROMANOS	292
1 CORINTIOS	324
2 CORINTIOS	353
GALATAS	372
EFESIOS	383
FILIPENSES	394
COLOSENSES	402
1 TESALONICENSES	410
2 TESALONICENSES	416
1 TIMOTEO	420
2 TIMOTEO	429
TITO	436
FILEMÓN	440
HEBREOS	442
SANTIAGO	469
1 PEDRO	476
2 PEDRO	485
1 JUAN	490
2 JUAN	497
3 JUAN	498
JUDAS	499
APOCALIPSIS	502

JUZÍÑAMUI ÑUEFUE SAN MATEO LLOGAFUE El Santo Evangelio Según San Mateo

*Jesucristo nánoramaci
(Lc 3.23-38)*

¹ Benomo cuega mámečiai Juzíñamui Jító Jesucristo nánoramaci. Jesucristo jaijai illaíma David náiraímona comuídimie. Daje izóí afémie David nánoramie Abraham náiraímona comuídimie.

² Afe Abraham Isaac moo, íemo jíái Isaac Jacob moo. Iemo Jacob Judá ie ámatiairi íaiói moo.

³ Iemo Judá Fares Zara díga íaillinoi moo. Afe íaillinoi ei Tamar. Iemo Fares Esrom moo. Iemo Esrom Aram moo.

⁴ Iemo Aram Aminadab moo. Iemo jíái Aminadab Naasón moo. Iemo Naasón Salmón moo.

⁵ Iemo Salmón Booz moo. Afe Booz ei Rahab. Iemo Booz Obed moo. Afe Obed ei Rut. Iemo Obed Isaí moo.

⁶ Iemo Isaí illaíma David moo. Iemo illaíma David, Urías tilla mei Urías ai ote. Iemo David íaillinoi jító Salomón.

⁷ Iemo Salomón Roboam moo. Iemo Roboam Abías moo. Iemo Abías Asa moo.

⁸ Iemo Asa Josofat moo. Iemo Josofat Joram moo. Iemo Joram Uzías moo.

⁹ Iemo Uzías Jotam moo. Iemo Jotam Acáz moo. Iemo Acáz Ezequías moo.

¹⁰ Iemo Ezequías Manasés moo. Iemo Manasés Amón moo. Iemo Amón Josías moo.

¹¹ Iemo Josías Jeconías naa ie ámatiairi moo. Aféruillaído Israel nairai Babilonia éniemo lláviano uigáiaíoi.

¹² Afe mei Jeconías Salatiel moo. Iemo Salatiel Zorobabel moo.

¹³ Iemo Zorobabel Abiud moo. Iemo Abiud Eliaquim moo. Iemo Eliaquim Azor moo.

¹⁴ Iemo Azor Sadoc moo. Iemo Sadoc Aquim moo. Iemo Aquim Eliud moo.

¹⁵ Iemo Eliud Eleazar moo. Iemo Eleazar Matán moo. Iemo Matán Jacob moo.

¹⁶ Iemo Jacob José moo. Afe José, María ini. Aféngomona comuide Jesús. Afémie jíáiçi Cristo.

¹⁷ Be daíí Abrahámona Davidmo itígima catorce méidígimaíai. Daje izóí David illágimamona Israel nairai lláviano Babilonia éniemo uillágimamo catorce méidígimaíai. Iemo jíái afénomona catorce jíáigima Cristo comuíllanomo.

*Jesucristo comuíllafue
(Lc 2.1-7)*

¹⁸ Jesucristo jocoina bie izóí joide. Ie ei María ja jicánogango Josemo iníreillena. Nai José díga íñena llezica, María Juzíñamui Ñuera Joreño riinodo, ja úruereacade.

¹⁹ Ie ini José ñue jaícina itímie, mei íadi uáfodo comini eróicana Maríana oni dotáacañede. Mei jíáífodo báinino buna onóñeno aféngona oni fiéacade.

²⁰ Biemo comécilla llezica, ie ínia anado ángel dainámie, Juzíñamui abi ímie íemo cíocaide. Iena daide:

—José, David izíe ímie, meáiruiñeno o iri. María o aiza o oíri, mei afengo jocolle jító Juzíñamui Ñuera Joréñodo comuídeza.

²¹ Afengo jító jócoite; ie mei Jesuna ie mámecei jítaítio. Afémie daíí mámeceireite, mei ie comínina íaioi fiénidifueмона jílloíteza, —daide.

²² Nana bie íficaide, jaiái Juzíñamui uai jino llóraíma dáinana ñue ícoímo fúitallena. Afe uai llóraíma bie izóí daide:

²³ Nai ínínide jitaíngo úruereacade; íemona jító cómuíte.

Afémie mámecei Emanuel daíílle.

Afeci daííacade, Juzíñamui cai diga íte.

²⁴ José nicáírillamona cazíllano Juzíñamui abi ímie íemo ocuilla izóí finode. Maríana íe ai izóí ote.

²⁵ Mei íadi María jító jócuano, afe íaillinoi ua íni izóí íñédaíillinoi. Jócuano Jesuna íe mámecei jítade.

2

Magos daínámaci ucúduaido ráfueña baitáдино Jesuna méíñuaíbitiaioi

¹ Jesús Belén jófueмо jococa. Afe Belén Judea éniemo íte. Aféruillaído Herodes aféniemo ílláimana íte. Íemo dáamaci jítoma billáfene imaci Jerusalemo dúcídíaioi. Afémaci ucúduaido ráfueña baitáдино.

² Dúcíllano jicánotiaioi:

—Ñinomo íte jococa Judíuai ílláima? Mei jítoma billáfenemo íe íllano onótate ucúduna cíóídicaíza. Afémie cáimadollena benomo bitícaí, —daídíaioi.

³ Bífueña Herodes fídiamona, afémie comecei lícídide. Daje izóí jíái nana Jerusalemon comíni áfemo comecei lícíoídíaioi.

⁴ Íemona Herodes nana lletáíraini íllaini, íemo ocuica uailai llófuetino diga dáanomo jíírillano jicánote. ¿Mei nie jófueмо afe Cristo jécille?

⁵ Jira íena daídíaioi:

—Afémie Belén jófueмо jécille, mei jaiái Juzíñamui uai llóraini bie izóí daídeza:

⁶ Belén jofue Judá éniemo íte.

Afe éniemo íte jamánomoide jófueмона afe Belén díno dúéñeíte;

mei afénoмо cue nairai Ísrael úíñoíte ílláima cómuíteza, —daíí daídíaioi.

⁷ Afe mei Herodes ucúduaido ráfueña baitádinona báinino uáídote. Uáíduano íaíoimo jicánote: “¿Nííe monado afe ucúduna cíóídiomoí?”

⁸ Íaioi llua méífomo, Belemo íaíoína orede. Oriano íaíoína daide:

—Afénoмо omoí jai. Jaillano afézana ñue jaícina omoí jicánori. Afeza omoí báíadi, cuemo lluaíbiri, mei afézana cáimaduaiacadícue, —daide.

⁹ Afe ílláima daíí íaíoína dáina mei, ucúduaido ráfueña baitáдино jáídíaioi. Íe mei jítoma billa díbénemona íaioi cíona ucudu, meine abido íaíoína ífóícaide. Ífóícaíllano afe úrue íllánomo mózizaide.

¹⁰ Baitáдино afe ucudu mózizaíllana cíóíllano, íere cáimacaidíaioi.

¹¹ Íemo afeco eromo jaillano, afézana íe ei María diga cíóídíaioi. Íemona afézamo cañici ana dújuíllano, íena cáimadotiaioi. Afe mei íaioi atica raa túíñuano, afézamo fecáídíaioi. Ua oro, íemo uguci, íemo “mirra” dáina ráífide ziórede raa, afézamo fecáídíaioi.

¹² Afe méífomo, Juzíñamui nicáírillado íaíoimo llote; Herodes íllánomo íaioi jáíñeíllena íaíoína daide. Afemona oni jíáiie íodo íaioi éniemo jáídíaioi.

Jesús moo íaíllinoi Egíptomo bótaja

13 Ucúduaido baitádino meine jailla méifomo, Juzíñamui abi ímie (ángel dainámie) nicai anado Josemo cíocaide. Cíocaillano íena daide:

—¡Náidacai! Náidacaillano úrue ie ei diga Egipto éniemo omoi bota. Afénomo cue daílle dinó omoi iri. Mei Herodes bie úrue fállena jénoiteza, —daide.

14 Mei jira José náidacaillano, úrue naa ie éioiri naio Egiptomoto botádiaioi.

15 Afénomo ua Herodes tílle dinó itíaiioi. Bie izói íficaide, Juzíñamui uai llóraima jaiái daina uai ñue ícoimo fuitállena. Afe uai be ñue: “Egiptomona cue Jitó uáidotícue.”

Herodes nana úruiaína fazítate

16 Iemo Herodes ucúduaido baitádino afémie jifánodoiana fidíillano, afémie jamánomo rícaide. Iemona nana Belemo ite mena fimona fuitade úruiaína fazítate. Afe jofue áinodo ite úruiaína daje izói fazítate. Naui ucúduaido baitádino úrue jocóinana Heródesmo llua izói, mena fimona fuitade úruiaína fazítate.

17 Bie izói jaiái Juzíñamui uai llóraima Jeremías lloga uai fuite. Be ñúuai:

18 Rama jófuego zúurede uai cácacaite; cáillicaiilli eia uai cácacaite.

Nairái uzuma Jacob ai Raquel báifene jica ia cómuitaga úruiaíri éhena.

Aféngomona jica ia úruiaí cómuitatino eia jaca buna fíranide, mei afengo úruiaí fazílliaíza, daí Jeremías daide.

19 Mei afe Herodes tilla méifodo Juzíñamui abi ímie nicai anado batí Egiptomoto Josemo cíocaide. Cíocaillano íena daide:

20 —¡Náidacai! Náidacaillano úrue naa ie éioiri abido Israel éniemo omoi jairi, mei naui baie fáiacadino nana ja tíidiaioi, —daide.

21 Afemona José afe úrue naa ie éioiri abido Israel éniemo jáidiaioi.

22 Mei íadi Arquelao ie moo Herodes ífomo illáimana illana fidíillano, José afe Judea éniemo jáillana jacíruite. Iemo Juzíñamui nicai anado aféniemo llúamona, afémie afénomo jáíñeno Galilea éniemo jaide.

23 Afe Galiléamo dúcia méifodo, Nazaret jófuego fiébizaide. Bífue bie izói joide, jaiái Juzíñamui uai llóraima daina uai ñue ícoimo fuitállena. Be ñúuai: “Jesús Nazaret ímie daíirena.”

3

Juan Bautista táizicimo rafue jino llote (Mr 1.1-8; Lc 3.1-9, 15-17; Jn 1.19-28)

1 Aféruido Juan Bautista Judea éniemo ite táizicimo lletámaizaibite.

2 Daide:

—Omoi comeci ífuiái mai méidori, mei monamo ite Juzíñamui illáimana illarui ja íanori íteza, —daide.

3 Bie Juan jaiái Juzíñamui uai llóraima Isaias llogámie. Afémie jica ia bie izói Juuado cuete:

Fícore úritímie uai táizicimo cácacaide.

Afémie daide: “Juzíñamui bille io ñue fínua izói, omoi comeci ñue omoi finori.

Aféniemo io jaícina dénuu izói,

Omoi comeci íaífuiái omoi féitari”, —daide.

4 Aféruillaído Juan jitáoi garoi camello itíraiaí nínaroi. Ie ciraigi ife rille igoi finoína. Afémie jaca fíuái rífirede. Daje izóí cíiji jírofirede.

5 Jerusalén comini afémie úrillamo cacáreizaibítiaíoi, daje izóí nana Judea énie imaci, iemo jíái Jordán imani abi comini ie úrillamo cacáreizaibítiaíoi.

6 Íaioimo ite fiénidífuiaí jino íaioi llua méifomo afe Juan Jordamo íaioína báutizade.

7 Mei íadi fariséuaimona, jíái saducéuaimona aillo comini Juan diné ie báutizajano bitíaiói. Afémaci bíllana Juan cíoilano, íaioína daide:

—¡Títade jaióniaimona comúidino izóidíomoi! Ja ánozide duere ze-
fuillífuemona omoi botállena ¿bu omoi llua?

8 Omoi comeci ifue méidoi acanana ñúefuedo uáfodo jino ácatari.

9 Dani ómoimona “Abrahámona comúidinodicai cai íllamona Juzíñamui íena iticai,” afe izóí daíñeno iri, mei tánoza. Mei bie noficiaimona, Juzíñamui jitíadi Abraham comínina comúitaredeza, daí ómoína daídícue.

10 Fiénide amena tiéllena jata jícaida jóonia izóí, fiénidino duere finoille jae ñue mameca. Nana figo llizíñede amena tíano iraimo zocana uillano jobaica. (Tíéfirega zena izóidíomoi.)

11 Uáfúena bimaci comeci ifue íaioi méidua jira, jáinoido íaioína báutizadícue. Mei jíáifodo cue méifodo bíitímie, comínina Ñuera Joreño úicaitaite. Daje izóí iraimo raa ñue zia izóí afémie comínina íánino ñue fínoite. Afémie iere cue baimo ríinorede, cue bie jamámiedícuéza afémiena dama ñue jacírúiredícue.

12 Afe cue méifodo bíitímie arroz bíájídímie izóí ja ie llocofe llíicabite. Afémie arroz bíamona ícuai oni eneno ua izóí, ñúemacimona fiénidínona oni eneno óite. Ñúemacimona íe íllánomo ñue ráiruíte, mei jíáifodo fiénidícuai izóidínona jaca dúíñeite iraimo jóbaite, —dínori Juan úrite.

Jesús báutizaina

(Mr 1.9-11; Lc 3.21-22)

13 Jesús Galiléamona imani Jordamo Juan íllánomo bite, afe Juan ie báutizallena.

14 Jesús bítemo Juan íena báutizaacañede. Jira Jesuna daide:

—Cue bie odo báutizaregacue. ¿Nibái mei cue dínená bitío? —daide.

15 Jira Jesús íena daide:

—Dama daíñtadeza, biruí cue dáina izóí fino, mei nana Juzíñamui jítaina izóí finóredicocozá. Afe coco finolle cócomo ñue jóbide, —daide.

Iemona Juan ja fairíote.

16 Afemona Juan Jesús báutizade. Báutiza mei Jesús jáinoimona jino bite. Afe llezica mona raíre tújicaide. Afe dáaruído Jesús Ñuera Joreño fíiciri ana bílla izóí bíllana cíode. Afémiemo ráinazaíbite.

17 Mei íemona monámoma daa úrilla uai cácaide. Afe úrilla daide:

—Bie iere cue izírúiga Jító. Afémiemo jamánomo íóbíoidícue, —daide.

4

Taife Jesús facátate

(Mr 1.12-13; Lc 4.1-13)

1 Afe mei Ñuera Joreño Jesús táizicímio uite, afénomo Taife afémie fiéní facátallena.

2 Afénomo Jesús cuarenta dígaruí güíñeno ite. Mona naio díga afénomo güíñeno ite. Afe mei afémie iere jamánomo júfinaite.

³ Ie jufínailla llezica, Taife Jesús facátallena áinozide. Iena daide:

—Ua Juzíñamui Jitona o íadi, mai bie nofíciái paana mei fino, —daide.

⁴ Jira Jesús uai ote:

—Jaiái Juzíñamui Cuegáuai daide: “Fia güilledo come ínide, mei jiáifodo nana Juzíñamui lloga uaido írede,” —daide.

⁵ Iemo Taife Jesuna ñuera Jerusalén jófuego uite. Afénomo ite gairíraco emódomo caifo jica Jesuna uite.

⁶ Uillano íena daide:

—Ua Juzíñamui Jitona o íadi, benómona ana batí mai ticai, mei Juzíñamui Cuegáuai bie izóí dáideza:

Juzíñamui ie abi imácina ona uíñotaite.

Iaioi ónoído ona mozíñoitiaioi, o éiba nofíciaimo íziñeillena, —daide.

⁷ Jira Jesús uai ote:

—Jaiái Juzíñamui Cuegáuai nane daide: “O ocuide Juzíñamui mai facátañeno,” —daide.

⁸ Nane dáanomo Taife iere caifónedumo Jesuna uite. Afénomona Taife nana éniemo ite náiraina ie ácatate, naa íaioimo ite ebíredífuiaíri.

⁹ Iemo nane íena daide:

—Cañícido cue anamo dújuano cuemo o caimátaiadi, nana bie omo íiticue, —daide.

¹⁰ Mei jira Jesús daide:

—Taife, mai oni jai, mei Juzíñamui Cuegáuai dáideza: “Dama ocuide Juzíñamui o caimátairena. Dama afémie ocuífíregamiéna o iri,” —daide.

¹¹ Afemona Taife Jesús fáicanocaillano oni jaide. Afe mei dáarie Juzíñamui abi ímiái Jesuna cánuaíbite.

*Jesús Galilea éniemo como fueñe táijizaide
(Mr 1.14-15; Lc 4.14-15)*

¹² Jesús Juan Bautista llavénana fidíillano, oni Galilea éniemo jaide.

¹³ Mei íadi Nazaremo fiébiñeno, Capernaum jófuego jaide. Afe jofue Galilea jorai fuédamo ite. Iemo afe jofue Zabulón éniemo ite. Daje izóí Naftalí énie áinomo ite.

¹⁴ Jaiái Juzíñamui uai llóraíma Isaías lloga uai ñue fuitállena, bie izóí íficaide. Afe uai daide:

¹⁵ Zabulón énie, Naftalí énie diga áillue jóraimo jóide io áinori ite.

Afénie Jordán ruicáfellemo ite.

Afénie judíoñedinomo dúide Galilea daina énie.

¹⁶ Aféniaímo ite comini jítinomo itino izóí Juzíñamuina onóñediaioi.

Mei íadi ja birui afémaci como aillo egáiñotena ciódino izóí, Juzíñamuina uáfodo onódiaioi.

Iemo jiái afe tíide izóí Juzíñamuina ónoñedino jae egáiñogaiaioi, Juzíñamui ziiñona illífuenta íaioi maiñóllena.

¹⁷ Afe mei Jesús jino cominimo ie llófuelle uai fueñe tainede. Daide:

—Omoi comeci ífuiaí méidori, mei monamo ite Juzíñamui illáimana illíruui áinozideza, —daide.

*Jesús cuatro dígamie facófiredino uáidote
(Mr 1.16-20; Lc 5.1-11)*

¹⁸ Jesús Galilea jorai fuédado macádemo, mena ama íaillinoína baite. Dámie mámece Simón, afémie jiáifodo mameina Pedro. Jiáie baigámie mámece Andrés. Afe íaillinoi facóraíni. Afe llezica llóiji jóraimo dotáiaillinoi.

¹⁹ Iemo Jesús íaillinoína daide:

—Mai cuedo bi, comini llófuellena íaioi jénoitimiena ómicoína jóneiticue, — daide.

²⁰ Iaillinoi llóiji fiénocaillano afémiedo jáidiaillinoi.

²¹ Nane afe báifenemo Jesús mena jáie ama íaillinoína cíozaide. Afe íaillinoi Zebedeo jító Santiago Juan diga. Afe íaillinoi áillue nocaemo ie moo diga íaioi llóiji ñue finódiaioi. Jesús íaillinoi uáidote.

²² Afe llezica, áillue nocaemo íaillinoi moo fiénocaillano, Jesudo jáidiaillinoi.

Jesús nágagobiaimo aillo comini llófuete

(Lc 6.17-19)

²³ Afe mei Jesús Galilea éniedo nágafenedo jaide. Nana Juzíñamui uai llófuerriracuaimo llófuerte. Afémie Juzíñamui illáimana illirui ñúefuedo jino llócaide. Daje llezica nana jáífodorie irárede comini jíllotate.

²⁴ Nana Siria éniemo Jesús finoca ñúefuiai jalleide. Iemona Jesumo jáíforiede dúcuaimo duere zefuídino atídiaioi. Iemo jáíforie izi cácadino, íemo fiénide jóríai uícaigamací, íemo chémemo raamo jíridino, íemo tízitaitino, nana bie izóidino Jesumo atídiaioi. Iemo nana afémacina Jesús jíllotate.

²⁵ Iemona diga jáínuiaimona bitíaioi Jesudo jáillena. Galilea éniemona bitíaioi, íemo Decapólis jófuiaimona bitíaioi, íemo Jerusalén naa Judea éniemona bitíaioi. Daje izói imaní Jordán ruicáfellemona Jesudo bitíaioi.

5

Caifónedumona Jesús lloga are uai

¹ Jesús afe aillo iedo jáidínona cíoillano, caifónedumo ráinazaide. Iemona ie llófuegamaci afémie abido ofídiaioi.

² Afe mei Jesús bie izói como íaioína llófuete:

Caimare ióbidino

(Lc 6.20-23)

³ “Comecí dinena dúeredicai” daíífredino ióbidiaioi, mei monamo ite Juzíñamui illáimana illarui afémacimo dúideza.

⁴ Comécina zúuredino caimare itíaioi, mei Juzíñamui íaioi fíraiteza.

⁵ Comécina mánaidino caimare ióbidiaioi, mei Juzíñamui jica ía íaioiena mameca énie máíñoitiaioiza.

⁶ Júbiena méinegamie iere güacana izói, Juzíñamui comece jítaina izói iere íacadino caimare ióbidiaioi, mei Juzíñamui afe íaioi íacanana izói íaioi illena afémacina cánoiteza.

⁷ Jáímacimo dúecaífredino caimare ióbidiaioi, mei Juzíñamui íaioimo dúecaiteza.

⁸ Comécina íainidino caimare ióbidiaioi, mei Juzíñamuina cíoitiaioiza.

⁹ Ícirafuena oni orédino caimare ióbidiaioi, mei Juzíñamui afémacina “Cue jítódiomoi” daíiteza.

¹⁰ Juzíñamui jítaina íaioi fínuari duere zefuídino caimare ióbidiaioi, mei monamo ite Juzíñamui illáimana illarui íaioimo dúideza.

¹¹ Comini omoi báíñua, omoi duere íaioi fínua caimare ióbidiomoi. Daje izói cue ícoina taino uailai ómoimo íaioi nitáadi caimare ióbidiomoi.

¹² Afena náfueñoeno ióbicana caimare omoi iri, mei monamo ite áillue ebíredífue jíridoitioimoiza. Mei jaiai nai omoi íñena llezica ite Juzíñamui uai llóraini daíí duere finóllena racácaiaioi.

Sal ñue ñnuua izói, afe izói comini ñue ñnóðinona itíomoi; daje izói bínie egáíñotinodiomoi

(Mr 9.50; Lc 14.34-35)

13 Omoi, sal izói, bínie comini ñue ñnóðinona itíomoi. Mei íadi sal ie ríino ññenia güíllena caimáretañede. Afe ríinonide sal çminícado meine ríiretade? Jaca meine ríiretaninamona jaca ráifñede. Comini zaizíllena macáranomo dotárega.

14 Omoi ñnoca ññuefuiái ñnuuamona, bínie comini ñue íllena egáíñote raa izóidiomoi. Iemona caifónedumo ite uáfori cíocaide jofue jaca retáidonina izói itíomoi.

15 Uneca mechera nogo eromo retáidollena unéñediomoi. Mei jiáifodo caifo uáfori cíoidinomo uneda ráinañrediomoi, jofo eromo itínomo ñue egáíñollena.

16 Afe izói ómoimo Juzíñamui comútaga omoi ñnóðifrega ññuefuiái jino comini eróicana ñnócaña omoi uiri. Daiñ omoi ñue ñnócafuiáiña ñue íaiói cíoillega. Uáfori íaioimo cíotari, monamo ite omoi Moomo ññuefuiái íaioi jónellena.

Jesús Moisés ocuica uai dibéñedo llófue

17 “Moisés ocuica uai cáitajaibite,” daiñ cuemo omoi comécíñeno iri. Daje izói jaiái Juzíñamui uai llóraima llófuia féitajaibiñedicue. Jaca afe uaillai féitajaibiñedicue, mei jiáifodo afe uaillai ñue ícoimo fúitaibiticue.

18 Uáfuena ómoína dáititicue, mona naa énie diga nai fúíñeille ðino bie ocuica uáillaimona daa uai oni ónide. Nana áfemo lloga ífcaitifuiái nai zuíñena llezica, afe uaillai jaca íite.

19 Ie jira afe ocuica uáillaimona daa uai iere duere íadi dáamie náñueñenia, monamo ite Juzíñamui illáimana illáruimo afémie jamáimiena jáite. Daje izói afémie náñueñena izói jiáimacina “Cai náñueñeilli” daiñadi, iere jamáimiena jáite. Mei jiáifodo aféuaillai náñuetinona íemo jiáimaci afe uaina náñuetadinona, “Bimaci Juzíñamui illáimana illáruimo jamánomoidinona,” daiñille.

20 Mei birui ómoína dáititicue: Juzíñamui jitáinana ñue ícoimo fuitállena, ocuica uai llófuetino, fariséuai diga iere áfena nícidotiaioi. Mei íadi íaioi nícidoga baimo omoi ññoñenia, monamo ite Juzíñamui illáimana illáruimo dúciñeitiomoi.

Jesús comini icírilla dibéñedo llófue

(Lc 12.57-59)

21 Omoi jaiáidigimaci dáinana cacáidiomoi. Afe ðaina be ññie: “Jiáimana titáñeno iri, mei jiáima titáðimie jicánuano duere ñnolle.”

22 Mei íadi afe emódomo nane dáititicue. Nínó dáamie ie aino come diga icírria, afémie áferi jicánuano duere ñnolle. Daje izói ie ámana íaire ðaiðimie Jamánomo Ríillaini afémiemo jicánuano duere ñnolle. Iemo jiái ie ámana “O abina onóñedimiedio,” daiñadi afémie áferi jaca ñinomo dúññede iraimo orérede.

23 Iemona Juzíñamuimo o úriacana llezica, daje izói afémiemo fia fecáacaga raa o izájiacana llezica, o aino come diga o icírillamo o uibíoiacaiadi,

24 afe o izájiacaga raana izáiñeno iri. Fueñe afémie diga ñue o ñnori, caimare uái ómicoi íllena. Afe ñue ómicoi ñnuua méifomo, o izájiacaga raana fecáredio. Ja Juzíñamuimo úriredio.

²⁵ Iemo jiáifue mo omoi cacai. Iafue omo mamédímie diga raire o úrizairi, afe íafue záilleza. Jicánoracomo nai ona uíñena llezica, mai jino io anamo ñue ómicoi záitari, jicánoraimamo o ie úíñeilleza. Daií o fínoñenia, afe jicánoraima fiénidino llaitáfiredinomo ona izájite. Iemo afémaci ona llavéracomo íbaitiaioi.

²⁶ Uafue ona dáitucue, o llavétatímie jicaca úcube ie jícaja dieze o íbañenia, afécomona jaca jino bíñeitio, –daidicue.

Jesús comini finoca jiruifue dibénedo llófuete

²⁷ Jaiai daináuai cacádiomoiza. Afe be ñie uai. Jiáie ringo diga jiruídoñeno o iri.

²⁸ Mei íadi ómoína daidicue: Omoimona dáamie ringomo eróicana fiene comeci facáadi, afémie jae afengo diga ie comécido jiruifue finode.

²⁹ Mei o ciona raamo o éroillamona fiénidifue mo ona baiítaia afemo eróíñeno o iri. Ua, o uíji nabeji o fitajamona o eróinino o illa izóí, afe izóí o fiéniruitate raamo eróíñeno o iri. Afe uíji júbene o fitañenia izóí, fiénide raamo éroillano o fáicanocaiñenia o abina nana iraimo dotátaite. Ie jira o abímona daa íeizi íñena izóí, nana o abi táinocaille baímo iere ñuera.

³⁰ Daje izóí o finócanafuiai fiénidifue mo ona baiítaia, aféfuiai finóñeno o iri. O onoi nabezi o jáitajamona aféfuiai o finónino o illa izóí, afe o fiéniruitate ráfuiaína o fáicanocairi. O jáitañenia izóí, o fáicanocaiñenia, o abina nana iraimo dotátaite. Ie jira o abímona daa onoi íñenia izóí, nana o abi táinocaille baímo iere ñue ite.

*Come ai dótafirena dibénedo Jesús llófuete
(Mt 19.9; Mr 10.11-12; Lc 16.18)*

³¹ Daje izóí jiáie jaiai daina uai bie izóí joide: “Ninó daa come ie ai dotáadi, afe bie ringona benómona óñeitucue dainabe aféngomo írena.”

³² Mei íadi birui ómoína daidicue: Dáamie ie ai dotáadi, afémie aféngona jiruíretaita. Mei íadi daa ráfuedo dotárede. Afefue be ñie: Afengo inírede ía jiáie íma diga íadi afengo dotárede. Daje izóí dotácango aina otímie afe úamona afémie afengo diga jiruifue finode, mei Juzíñamui eróicana, afengo nai fueñeidímie ai.

Jesús táinona uafue daiíllena Juzíñamui mámece llinuado llófuete

³³ Daje izóí omoi jaiáidigimamona cacádiomoí. Afe be ñie uai: “Juzíñamui eróicana íe mámece o llinuano o dainana ñue ícoímo záitari.”

³⁴ Mei íadi birui ómoína daidicue: Uafue daiíllena jaca mona mámece llinonidíomoí. Mona Moo Juzíñamui illánoza, áfedo iere uafue daiíñeno iri.

³⁵ Daje izóí énie íbogido uafue daiíñeno iri, mei aféniena Juzíñamuimo jaináideza; ía íe ídai jóonera izóideza. Daje izóí o llógana uafue daiíllena Jerusalén mámece llinóñeno iri, mei afe jofue Nahíllaimamo, ua Juzíñamuimo dúideza.

³⁶ Daje izóí dama o ífócido uafue daiíñeno iri, mei o ífótirai úzetiraina méidonidíomoíza, daje izóí jítitiraina orénidíomoíza.

³⁷ Iemona jiáie uaina nabáiñeno “Jíí fínoítucue” daiíri. Mei jiáifodo “Jíí fínoíñeitucue” daiírena. Uafue daiíllena bie izóí o daina baímo jiáie uaina o nabáiadi afe uai Taífémona bite.

*Jiáimamo íba úado Jesús llófuete
(Lc 6.29-30)*

³⁸ Daje izói jiáie jaiai nanómona dáinana cacádiomoi. Afe daina be ñie uai: “Dáamie jiáimie ui fitáadi afe ibana afémie ui fitárega. Daje izói dáamie jiáimie ízido ditáadi afe ibana afémie ízido ditárega.”

³⁹ Mei íadi birui ómoína daidicue: Dáamie fienu omoi finóadi, ibana afémiemo riire úriñeno o iri. Mei jiáifodo dáamie o uieco putáadi daje llezica enéfene putari íena o daíri.

⁴⁰ Dáamie taino omo jítajano, o caifóferoi bairóadi, afe llezica o jinófenemo jítararoi caifóferoi diga naga afémiemo o fecari.

⁴¹ Daje izói dáamie mei policia izóidimie méere de raana daa kilómetro rífuedo o abítaiadi, afe baimo mena kilómetros icírriñeno o uíri.

⁴² Nane dáamie raa ómoimo jícaadi, afe íemo o fecari. Jiáimie “Nano íanori cuemo fia feca” daíadi, afémiemona oni jíjicaiñeno o iri.

*Cai icírillamacina izíruedicai
(Lc 6.27-28, 32-36)*

⁴³ Daje izói jaiai nanómona daina uaina cacádiomoi. Afe be ñie uai: “Omo caimare úrifrenamiéna izírui, íemo o icírillamiéna éoiri.”

⁴⁴ Mei íadi birui ómoína daidicue: Omoi icírillamiéna omoi izírui. Omoi faidódimiéna caimare íemo omoi finori. Ómoína éoidinona ñue omoi finori. Omoi báifotino, íemo jíai ómoína fienu finóacadiño diga afémaci íena Juzíñamuimo omoi jícarí.

⁴⁵ Daí omoi íllemona monamo ite omoi Moo Juzíñamui jítiéina jíitiomoi. Mei afémie ñuemaci íe jítiémana egáifnotadeza, daje izói jiáie fiénidimaci íena egáifnotadeza. Íemo, comécina jáicina jóidinomo afémie nocina bíitate, daje izói comécina jáicina jóifinedino íena nocina bíitate.

⁴⁶ Mei dani ómoína izíruiñona omoi izíruiadi, ¿áfemona minica jíridoitiomoi? Jaca jíridoñeitiomoi. Omoi jámairuiga gobierno raíñoca úcube llínofiredino da afémaci izíruiñona izíruiñoi. Afémaci baimo izíruiñediomoi.

⁴⁷ Dama omoi ámatiai caimare omoi uáidoadi, ¿ñie ñuefue finódiomoi? Juzíñamuina onóñedino bie izói illa. Afémaci baimo nana comini caimare uáidorediomoi.

⁴⁸ Monamo ite omoi Moo Juzíñamui íaifuenide comécina figomiéna illa izói, afe izói omoi iri.

6

Jesús cai finófirega ñuefuiái dibéno llófue

¹ Jesús nai úrite; daide: Omoi finófirega ñuefuiái comini eróicana afémaci ómoimo cáimacaillena omoi finóñeno iri. Daí omoi finóadi monamo ite omoi Moo Juzíñamui ómoína minicana jíridotañeite.

² Íe jira dúeredino o cánua llezica nana comini lloñeno, uái daí omoi canori. Jino omoi macáramo, daje izói Juzíñamui uai llófueriraco eromo diga táinona abi ínotino bífirediaíoi. Afémaci comeci figóñedimaci illa llezica jino finócafuiamona ñuemacina eróidiaíoi. Íaíoi finua izói finóñeno omoi iri. Afémaci daí finofirediaíoi jíaimaci íaíoiño ñue úrillena. Mei uafue ómoína daíitcúe: Comini íaíoiño caimare úrillado, íaíoi jíridoacaga raana jae íaíoi jíridoga.

³ Mei jiáifodo dúeredinomo daa raa o fecalle llezica o izíruiaga aino cómemo lloñeno uái daí o fecari.

4 O fínofirega ñúefue báinino o finori. Iemona o Moo Juzíñamui o báinino finoca raana cíoi teza. Afemona óiena mameca raana o jirídotaitaiza.

*Jesús Juzíñamuimo úrillado llófuete
(Lc 11.2-4)*

5 Juzíñamuimo omoi úrilla llezica, abi diné ñue cíoidimaci fínua izóí finóñeno omoi iri. Afémaci Juzíñamui uai lloraco eromo caifo naidáillano ficírede uaido Juzíñamuimo úrilla izóí finódiaioi. Iemo jofue cígimo ite aillo comini ofíranomo daje izóí finófirediaioi, comini íaioina cíoilena. Uáfueña ómoína dáititue, afe bie comini íaioido ñue úrillado, íaioi jirídoacaga raana jae jirídotiaioi.

6 Mei jíáfodo Juzíñamuimo o úrilla llezica, o jofe eromo jaillano o naze ibairi; íemo afénomo o diga ite Moo Juzíñamuimo o úriri. Afemona o Moo Juzíñamui o báinino úrilla uaina cacáillano, óiena mameca raana o jirídotaita.

7 Juzíñamuimo o úrilla llezica, Juzíñamuina onóñedino fínua izóí, taino uailai diga icaíño lloñeno o iri. Afémaci bie izóí comécidiaoioi: “Are cue úrillado Juzíñamui ñibai cuemo cacáreite,” daídiaoioi.

8 Afémaci izóí iñeno o iri, mei nai o jitaille raa o jicáñena llezica o Moo Juzíñamui uícodo onódeza.

9 Ie jira bie izóí afémiemo omoi úrifireiri:
Cai Moo Juzíñamui, monamo itio; o mámedido ñúefue nitácaza.

10 O illáimana illirui raire bíteza.

Dinomo monamo o comeci jitáillafue íaioi fínua izóí, afe izóí bie éniemo finótaibiteza.

11 Cai nágarui jitaiga gülleniai, birui caimo fecari.

12 Cai finoca fiénidifue iba caimo oñeno iri, mei afe izóí jíáimaci fiene caimo finódiaioi íadi, afémacimo ibana onédica.

13 Íaifue mo cai baíñellena caina uññori.
Iemo afe llezica nana fiénidifuiamona caina jíllotari.
Mei bínie comini jaca o illáimana illa anamo itíaoioi.

Afémaci illáimaillena ríino jaca omo ite.

Daje izóí jamánomo ñue ébifue jaca omo ite.

Ja daítadeza.

14 Mei uafue, ómoimo fiene finódino finoca fiénidifueña omoi féitaia, afe izóí monamo ite o Moo o finoca fiénidifueña féitaite.

15 Mei íadi aféfuiaí omoi féitañenia, omoi Moo omoi fiénidifuiaina féitañeite.

Jesús comini fímairilla díbenedo llófuete

16 Iemo nane Jesús daide: Dama Juzíñamuimo izire omoi comeci facállena güllena güñeno omoi fímairilla llezica, omoi uíecona zuure finóñeno omoi iri. Jínofene ñue cíoina mei íadi comécina íáiredino daí finódiaioi. Íaioi fímairilla llezica abina iere zuure finódiaioi, comini íaioina cíoilano “Baie fímairitino,” íaioi daíllena. Uafue ona dáititue, afe izoide comini íaioina dánado íaioi jirídoacaga raana jae jirídotiaioi.

17 Mei jíáfodo güñeno o fímairilla llezica o uíeco ñue jocori; o ífo ñue júiri,

18 ona comini “Baie fímairitimie” dáíñeillena. Iemona o diga ite báinidena cíofirede Juzíñamui, áfena dama cíoille, íemona afémie áfena ona jirídotaita.

*Monamo cai jirídollena ofítaredicai
(Lc 12.33-34)*

19 Iemo nane Jesús daide: Biniemo aillo ráaniaina ofitañeno o iri, mei biniemo diga raa ícuai güfiregaza, íemo jíáie raana ráataifredeza, íemo jíái merírifiredino merífiredeza.

20 Mei jíáifodo Moo Juzíñamui jítainana o finófireiri; caifo monamo ie illánomo ñúfeuiái o ofítari, mei afénomo ite raana ícuai güíñédeza, íemo jíái afeno raa zabíñede, íemo afénomo merírifiredino merínidiaioi.

21 Mei uáfueza, o gaiga raa ofítajanomo dáanomo dajé izói o comeci íteza.

*Cai illafue ñue egáñote raa
(Lc 11.34-36)*

22 Ñúfeumo o comeciilla omo ñue egáñote raa izoide. Jira bobaie egáioinamona o uído ciónana o íobitaja izói, afe izói ñúfeuiái o jítaígana o comeci ífuena caimare ítaítaite.

23 Mei íadi ñúfeumo o comeciñenia, fiénidifuedo mácaja izói itío. Nana o comeci ífue zuure íteza. Mei Juzíñamui omo jónega ñuera comécido dama fiénidifueo o comeciia níi jamánomo jíitífono o illa izoide. ¡Ñíi jamánomo jíitirena!

*Juzíñamuimo cai jainaina llezica úcubemo jaináinidicai
(Lc 16.13)*

24 Daje llezica mena ocuídime anamo buna ínide, mei ménamiède anamo o íadi dáamie éoitio, íemo jíáimie izíruitio. Daje izói dáamiemo ñue tájítio, mei íadi jíáimiena jámairuitio. Afe izói Juzíñamuina abí o náamataja llezica úcubemo abina náamataniديو.

*Juzíñamui ie úruaiña jáidinona ñue úíñote
(Lc 12.22-31)*

25 Jira ómoína dáitícue, nágarui omoi jítaiga güille naa jirole diga afemo comeci faiñeno omoi iri. Daje izói daa o jíalle ínícuiromo comeci faiñeno omoi iri. Cai ñue illafue güille baímo ráifide. Daje izói cai caana abí iníroi baímo ráifide.

26 Mai monamo feede ofocuizaimo omoi comeciiri. Afémaci güíllenaiña riñediaioi. Daje izói llíziena jofa oñediaioi, íemo jíái güille ñue finóranomo ofitañediaioi. Mei íadi monamo ite omoi Moo afémacina ecáfirede. Omoi bie ofocuizai baímo iere ráifina.

27 Omoimona, comeci iere fáiamona ¿mei bu ie zairilla caifomo medio metro zairirena? Buna jaca daí ínide. Dama Juzíñamui ona dínorí o zairitaja. Afe izói o güíllena ócuite, jira afemo comeci faiñeno omoi iri.

28 Iemo jíái ¿nibái mei ínícuiromo iere comeci fáifrediomoi? Jazícimo ite záfiemo omoi comeciiri. Raamo tájjiñediaioi, daje izói iníroina niñediaioi. Mei íadi iere ebire cíoidiaioi.

29 Iemona ómoína dáitícue jaiái illaíma Salomón iere ráarede íadi, bie záfia ebírena izói, ebírediroina jítañede.

30 Mei Juzíñamui ráitiamo ebire cíoitaiadi, afémie ómoímo jeruíñeno iníroina jítaite, mei afe ráitai íanori ebire eróideza. Iemo afe jíáiruido ja jobáicaza.

31 Iemona nana jíáie raamo comeci faiñeno omoi iri. “Cai güille íñédeza, ¿minica güíticai?” daíñeno omoi iri. Daje izói jíái “¿Minica jíroiticai?” daíñeno omoi iri. Iemo jíái, “Ínóinidicaiza, ¿minica jítaíticai?” daíñeno omoi iri.

32 Mei uafue, biniemo ite Juzíñamuimo ínóñede comini bífuiamo iere comeciidaioi; mei íadi omoi Moo monamo ite. Afémie bie izoide raana omoi jítaíllana onode. Jira ómoímo íñede raamo comeci fáinidíomoi.

33 Mei íemona Juzíñamui illáimana illáruimo duide raamo raire uícodo járítáífireiri. Daje izói jíáie ie ocuícáfue raire uícodo omo fínofireiri. Afe mei nana bie omoi jitaiga raana óitiomoi.

34 Uire jiti cómuitífue mo comeci fañeno omoi iri, mei uire aferui dama ie comeci uille ráfueniaí átiíte. Nágaruillaído comuide comeci faílle ráfuiáí ja figo báiteza, baímo nabáinide.

7

Jiáima jánana fienu úriñeno o iri (Lc 6.37-38, 41-42)

1 Juzíñamui ómoímo izire jícanoñellena, mai jíáima jánana fienu úriñeno o iri.

2 Mei jíáima jánana riire o úrilla izói, afe izói Juzíñamui riire ómoímo jícanoíte. Jáímamo raana fácano omoi feca izói, afe izói afémie ómoímo fácano fécaíte.

3 ¿Mei ñie izói o ama uimo ite jéenide ráaruaina cíodio, mei íadi afe dáaruído dama o uimo jéerie rarúnguái íllana náfuéñedio? (Afená dáíacade: Aillo fiénidífue omo illa llezica, ¿ñie izói due jiza oni ñibéfodo baíídimie jánana úrinedio? Urinidío.)

4 Iemo afe jéerie rarúnguái dama o uimo íadi o ámana ¿ñie izói daííredio: “O uimo ite jéenide ráaruái cuena otátari”? Daíínidío.

5 ¡Abi dine ñue cíode comécina íáiredimiedio! Fueñe dama o uimo ite jéerie rarúnguái oíri. Afe o ua meí, afe o ama uimo ite jéenide ráaruaina jino óredioza.

6 Juzíñamui ñue finoca raa, Juzíñamuina íairuitinomo fecáñeno iri; fecadíomoiniadi áfena jámairuillano afémaci ómoína títaitaíoi. Daje izói perla izoide ráífidífuiaí meróniaí izoide íaífuiaíredinomo lloñeno iri; llotíomoiniadi meróniaí ríiríifirena izói bimaci ómoína uáitaitaíoi. Afe izoide ñúefuiaí fienu íacadinomo llónide.

Juzíñamuimo caí jícalie bie izói jóide (Lc 11.9-13; 6.31)

7 Mai omoi jícarí, íemona Juzíñamui ómoímo fécaíte. Mai omoi jenorí; baítimoíza. Nazémoma caímare omoi uáídorí; ómoímo tuízábiteza.

8 Mei jícadímie llánoteza. Daje izói jenódímie báiteza; íemo jíái nazémoma caímare uáídotimie mo túgaza.

9 Mei ómoímona dáamie ie jító pan jícaja llezica ¿meita nofícina írede? ¡Jaca ínide!

10 Iemo afémie chamu jícaja llezica ¿meita jaíona írede? ¡Inide!

11 Mei fiénidinodicaí íadi, ñuera raa caí úruiaímo fécajana onódicaí. Mei íadi afe baímo monamo ite omoi Moo, afémiemo jícadinomo jamánomo ñuera raa fécajana onode.

12 Mei íemona omoi jitailla jíáimaci íaíoi ómoímo fínua dieze, dájeze afémacimo finórediomoi. Mei Moisés ocuica uai bie izói jóideza. Daje izói jaiaí Juzíñamui uai lloraini cueda uai afe izói jóideza.

Ríllrede monamo duide io rafue (Lc 13.24)

13 Mei afe ríllrede monamo duide iodo omoi jai. Niné táinocaitaitinomo jóide io iere áilloo. Daje izói áfeo boilla jamánomo áillue. Afeodo aillo comini jailla.

14 Mei jíáfodo zíñona caí cáaininomo jóide io jaícina jóide íadi ríllrede. Daje izói áfeo boilla ríllrede. Afeodo jáidino dúemaci.

*Naga amena ie llizíledo onórede**(Lc 6.43-44)*

15 Diga comini “Juzíñamui dibénedo úriticai” daidíai, íadi taino llotíai. Afe izoide cominimona abí omoi rairuiri. Afe bimaci ebire jifédino izóí ómoimo bitíai. Uáfueza, illáinide ovéjaiaí izóí ómoimo bitíai, mei íadi comeci dne illárede jánallari izóidino.

16 Afémaci finócafuaido íaioina uáfodo ónoitiomoi. Mei jírede ñecínamona jíricue óñegaza. Daje izóí jírede monáigimona jíficolliai óñegaza.

17 Mei daí nana ñuera amena ñue llizide. Daje izóí nana fiénide amena fiénidijaiina llizide.

18 Ñuera aménamo fiénide ráajiai llizínide. Daje izóí fiénide aménamo ñuera ráajiai llizínide.

19 Nana ñuera ráajiaina llizíñede amena tíano iraimo jobaica.

20 Bie izóí baie ómoimo bitínona íaiói finócaigafuedo uáfodo ónoitiomoi.

*Nana comini monamo ite Juzíñamui illáimana illíruimo jáíñeitiaí**(Lc 13.25-27)*

21 Nana cuena “Ocuíraima” daífiredino monamo ite Juzíñamui illáimana illánomo jofo jáíñeite. Dani monamo ite cue Moo comeci jítaillana finódino jofo jáirena.

22 Aféruillaimo dúcia llezica, diga comini cuena dáitíai, “Ocuíraima, Ocuíraima, o mámecido úrifiredicai. Daje izóí o mámecido fiénide jóriaina jino orédicai. Daje izóí o mámecido cíórainina raana uaido comúaticai.”

23 Mei íadi afémacina dáitícue: “Jaca ómoína onóñedicue. Diga íaifuiái comúidíomoiza, cúemona oni ii,” dáitícue.

*Ménade jofo nillino rafue**(Lc 6.47-49; Mr 1.22)*

24 Mei afe bie izóí joide. Cuena cacádimie íemo cue ocuícana finódimie jofo nílana baitádimie izoide. Afémie maírdinomo ie jofo nite.

25 Riire noci biide, íemo ille riire renaide, íemo riírede jairifo afécomo jáíñode; mei íadi afeco jáíñode, mei maíride éniemo nígaza.

26 Mei jáífodo cuena cacádimie mei íadi cue ocuícana finóñedimie jofo nílana figo baitáñedimie izoide. Afémie ídiaidinomo ie jofo nite.

27 Afe mei riire noci biide, íemo ille riire renaide, íemo riírede jairifo jáíñode. Iemona afécona jáíñode. Nana ana baiíllano due fiébiñeno niné táinocaide. Jesús dinori úrite.

28 Jesús urilla méfomo, nana comini ie llófueमारillari caimare fáigacaidiaíoi,

29 mei ríinoredimie izóí íaioina llófuefteza. Jaiái ocuica uai llófuefiredino ríinonide llófuia izóí afémie llófueñede.

8*Jesús chíñaitimie jíllotate**(Mr 1.40-45; Lc 5.12-16)*

1 Jesús caifónedumona ana billa llezica, diga comini afémiedo jáidiaíoi.

2 Iemo irárede chíñaitimie Jesumo ánozide. Afémie Jesús anamo dújuillano daide:

—Ocuíraima, o jítaíadi bie dúiconca cúemona oréredio. Cúemona oreri, —daide.

3 Iemona Jesús ie ónoído afémiena jétano daide:

—Jii, ona jíllotaiacadícue. Benómona ja íainitioza, —daide.

Daí daina llezica ie iráretade chiie jacáibicaide.

⁴ Iemo Jesús íena daide:

—Cácarei, bifue bumo lloñeno iri. Dama lletáriraimamo o abi o ácatairi. Afe llezica Moisés ocuica o abi ja íainide daítate raa afénomo mai o fecari. Afemona nana comini o chiie ja jacáillana ónoitiaoí, —daide.

Romano illaíma ocuífíregamiéna Jesús jíllotate

(Lc 7.1-10)

⁵ Capernaum jófuemo Jesús jailla llezica, Romano illaíma Jesumo billano izire jícade:

⁶ —Ocuíraíma, cue ócuífírega jítócome iere irárede. Batí jofomo bíide. Afémie tíziri iere jamánomo izi cácade, —daide.

⁷ Jira Jesús íena daide:

—O jofomo jaillano afémiena jíllotaitícue, —daide.

⁸ Jira illaíma Jesús uai ote:

—Ocuíraíma, cue jofomo o jáillena, cue iere jamáimiedícue. Jicana o uaido o ocuiri, afémie jílloillega.

⁹ Mei dama cue jíáillaíma uai anamo itícue. Daje izóí cue anamo cue úíñoga fuírairai ite. Dáamiena “Bi” cue daía, afémie bírede. Jáámiena “Jai” cue daía afémie jaide. Daje izóí cue ocuífíregamiéna “Bie fino” cue daía, afémie áfena finode, —daide.

¹⁰ Jesús áfena cacáillano, caimare fáigacaillano afémiedo jáidinona daide:

—Uáfúena ómoína daidícue: Nana Israel náiraímo bie izóí íñnote come jaca baiñédícue.

¹¹ Omoina daidícue, nágafeniaímona aillo oni jícnemaci bíitiaoí. Afémaci monamo ite Juzíñamui illáimana illánomo jofó ráinazaillano, daane Abraham, Isaac, Jacob díga güítiaoí.

¹² Mei íadi fueñe jáiredino, jino jítinomo dotálliaoí. Afénomo afémaci iere éenaicana murímurítiaoí, —daide.

¹³ Iemona afe illáimana daide:

—Mai o jofomo jai. O ínuaze íteza, —daide.

Daí daina llezica afe irárede jítócome jíllode.

Jesús Pedro jífaiño jíllotate

(Mr 1.29-31; Lc 4.38-39)

¹⁴ Afe mei Jesús Pedro jofomo jaide. Afénomo Pedro jífaiño abi cuaríllari irare bíinana cíóizaide.

¹⁵ Iemo Jesús afengo onoi llínua llezica ie abi cuarilla llícaide. Afemona afengo náidacaillano afémaci jítailla bai atide.

Jesús aillo iráredínuaí jíllotate

(Mr 1.32-34; Lc 4.40-41)

¹⁶ Aferuí jítona jímaicaidemo díga fiénide joríaí ogano Jesumo atídiaoí. Iemona daade uaido afe fiénide joríaí jino orede. Daje izóí nane nana dúicotaídnuaí afémie jíllotate.

¹⁷ Nana bie izóí zúide, jaiái uai lloraíma Isaías lloga uai fuitállena. Be afe uai: “Cai íraníaí afémie uite. Daje izóí cai dúicuaí afémie oni orede.” Daí Isaías llote.

Jesudo jáiacadino bie izóí trédiaoí

(Lc 9.57-62)

Afe mei jorai fuédamo illa llezica,

¹⁸ diga comini Jesús abido nágafene gairillana cóoillano, afémie “Mai jorai ruicáfenemo cai jai,” daide.

¹⁹ Temo ocuica uai llófueraíma Jesumo billano daide:

—Llófueraíma, nana o jáiacana diné odo jáiacadicue, —daide.

²⁰ Jira Jesús ie uai ote:

—Nana jazici rílleníai uái ífireillino ite. Daje izói caifodo féedinuíai uái íaioi ráiillino ite. Mei íadi Nanoide fima Jitódicueza, dáanori uái cue illino íñede, —daide.

²¹ Temo jíáie ie llófuegamacimona dáamie íena daide:

—Odo jáiacadicue, mei íadi fueñe cue ore cue moo túlle dinó cue ílleza, íemo íena ráiicadicue; afe méifomo odo jáitícue, —daide.

²² Jira Jesús ie uai ote:

—Mai cuedo bi. Juziñamui náfueñedino tíide izóidimaci; mai mei jadíe ua tíitímie afémaci ráilleza. O cuedo bi, —daide.

Jesús jairifo naa jorai bagua diga llúcaitate

(Mr 4.35-41; Lc 8.22-25)

²³ Te mei Jesús naa ie llófuegamaci diga áillue nocaedo jáidiaíoi.

²⁴ Afe mei jorai ruicáfenemo jáidiaíoi, daa jamánomo rírede jairifo náidacailla. Afe jairíomona jorai bagua afecae acónillaina íbáiácade izoide. Mei íadi afe llezica Jesús inide.

²⁵ Temona ie llófuegamaci ie cazítatíai. Cazítajano íena daidíai:

—¡Ocuíraíma, cai jíllota! ¡Ja buízaidícaíza! —daidíai.

²⁶ Jira afémie uai ote:

—¿Nibái mei íere jacínaitíomoi? ¡Omoi nai figo íñoñediomoi! —daide.

Temona afémie náidacaillano jairifo naa jorai diga lletade. Daí ie daina llezica jorai bagóñeno uái ite.

²⁷ Temona afécaemo itímíai caimare fáigacaidíai. Fáigacaillano daidíai:

—Bie mei, ¿níie come? ¡Bímie daina uaina jairifo naa jorai diga ínote! —daidíai.

Gerasa éniemo ite fiénide joríaí úicaiga íaillinoí rafue

(Mr 5.1-20; Lc 8.26-39)

²⁸ Afe mei Jesús jorai enéfenemo Gerasa éniemo dúcidemo, mena íma raíáfuaímona Jesús diné bite. Afe íaillinoí fiénide joríaí úicaiga. Afe íaillinoí jamánomo jacire illáirede. Afedo jóide iodo buna jáinide.

²⁹ Jesús afe íaillinoí lleta llezica caillíoidiaillinoí:

—Jesús, Juziñamui Jitódíozza. ¿Nibái mei cócomo jíricaidí? ¿Nai aferui dúcíñedemo benó coco duere ínuai bitio? —daidíaillinoí.

³⁰ Afe llezica afe ánori tóica meróníai güitíai.

³¹ Jira afe fiénide joríaí Jesumo izire jicádiaíoi:

—Bie come íaillinoímona jino cai o oréadi, táinomo oréñeno baie meróníaimo cai oreri, —daidíai.

³² Jira Jesús íaioina daide:

—Mai afénomo omoi jai, —daide.

Afe fiénide joríaí afe íaillinoímona jino billano meróníaimo jaide. Afe mei afe meróníai jorai arimo ite íconido jabida jóraimo cocídiaíoi. Afénomo coróbaizidiaíoi.

³³ Iemona afe meróniai úiñotino jacínaillano botádiaioi. Jófuemo dúciillano nana aféfuiai llotíai. Daje izói fiénide jóríai ucaiga íaillinoimo finócafue llotíai.

³⁴ Iemona nana afe jofue comíni Jesús illánomo jáidiaioi. Afémiena cíoillano, afe íaiói éniemona oni jáillena izire jicádiaioi.

9

Jesús tízitaitimie jíllotate (Mr 2.1-12; Lc 5.17-26)

¹ Afe mei Jesús áillue nocaemo ana jaillano jorai enéferaimo ruica jaide. Iemo dama ie jófuemo dúcide.

² Afénomomo tízitaitimie Jesumo atídiaioi, naa ie bírallu diga. Afémaci ínuana Jesús cíoillano, iráredimiena daide:

—Cue izíruigamie, mai caimare ii, mei omo ite fiénidífuiai jae dógaza, —daide.

³ Jira ocuica uai llófuetinomona dáarie comeci anado daidíaiói: “Bímie baie jáimie fiénidífuiai dóina dánado Juziñamuina icíritade.”

⁴ Jesús afémaci comécido dánana onóllano daide:

—¿Níbái mei fieni omoi comeci facádiomoi?

⁵ Mei daí daina ménade uáimona ¿niie uai iere llotáinina? Afe ménade uai be niie: O fiénidífuie muiñócaza. Iemo jíáie uai bie izói daina: Náidacaillano, maca. (Íraie uai jamánomo llotáirede, mei omoi eróicana íficaideza.)

⁶ Ie jira Nanoide fima Jitódicueza, bíniemo cue illa llezica, comínimo ite fiénidífuie cue muiñolle ríno jino ómoimo cíotaitícue, —daide.

Afemona afe tízitaitimiena Jesús daide:

—Mai náidacai, náidacaillano o bírallu llínota o jofomo jai, —daide.

⁷ Afemona tízitaitimie náidacaillano, ie jofomo jaide.

⁸ Nana comíni áfena cíoillano iere jacínaitiaioi. Afemona Juziñamuimo ñúefuena nitádiaioi: “Mei Juziñamui áillue ríno bie cómemo fecádeza,” daidíaiói.

Jesús Mateo uáidote (Mr 2.13-17; Lc 5.27-32)

⁹ Jesús afénomona oni jaide. Jaillano Mateo dainámiena cide. Afémie gobierno íbataga úcube llínoraíma. Ie jira afe úcube oránomo ráide. Jesús íena daide:

—Mai cuedo bi, —daide.

Ie jira afe Mateo náidacaillano iedo jaide.

¹⁰ Afe jíáiruido Jesús naa ie llófuegamaciri jofo eromo íaiói güilla llezica, aillo jíáie úcube llínofiredino naa jíáie fiénidíno dánomo güitíaiói.

¹¹ Mei íadi Fariséuai áfena cíoillano afémie llófueganomo jicánotiaioi:

—¿Níbái mei omoi llófuetimie úcube llínofiredino diga naa fiénidínori güite? —jicánotiaioi.

¹² Afena Jesús cacáillano, íaioina daide:

—Jociredino iránidino daje izói manóriraimana jítaíñediaioi, mei jíáfodo iráredino manóriraimana jitailla.

¹³ Bie jaiai Juziñamui Cuegáuai dánana omoi onóizairi. Afe be níuui: “Conímama omoi duéruillena daje izói cuena omoi duéruillena jítaídícue. Mei íadi omoi fatá cuemo fia fecaca rílleníai jítaíñedícue,” daide. Ie jira dani

ñüemacina abi mamédinona uáiduabiñedicue, mei jiáifodo fiénidino íaioi comeci ifue méidollena biticue, —daide Jesús.

*Íaioi fímairillena Jesumo jicánotiaioi
(Mr 2.18-22; Lc 5.33-39)*

14 Afe mei Juan Bautístado jáidino Jesumo dúciillano jicánotiaioi:

—Mei cai bie fariséuai diga ¿nibái fímairitagacai, mei íadi o llófuegamaci fímairiñediaioi? —daidiaioi.

15 Jira Jesús uai ote:

—¿Airena rafue llezica áfemo uáidogano, meita zúurenari güinidiaioi? Daií ñédeza; ringo otímie íaioi cígimo illa llezica caimare güitíaioi. Mei íadi ringo otímie íaioimona báiruaibillirui dúciite. Aféruedo comeci zúurenari güíñeitíaioi. Ringo otímie izói birui cuedo jáicadino cígiri itícueza, —daide.

16 Jesús nane jiáie onótatífue lloste:

—Jaca ninomo dáamie tífoñegaroimona jaitada jácaie inícuirromo nitáñediaioi. Daií nitáadi afe cómoroi jácaroína fiéni finode; mei nai jócoñega cómoroi jofó jainánuamona jácaroimo ite cúaidinona aillo oni cuatácana jaide.

17 Daje izói comue vino jácara igorai finoina iciru izoide raamo totánide.

Dámie daií totáadi afe comue vino afe jácara icíruna eroide raana cúataite. Afemona afe iciru naa vino diga táinomo fáifite. Iemona comue vino comue igorai finoina icíruna eróidemo jóonefírega. Iemona afe naga ñue éenoga. (Afe bie dáinado Jesús ie comue llófueinafue, íemo íaioi jaiái llófuegafue dáanomo íinonide, dáanomo náfuenide, íaioimo llófuete.)

*Jairo jiza íemo jiáingo Jesús iniroi jétaibitíngo Jesús jillostae
(Mr 5.21-43; Lc 8.40-56)*

18 Jesús bífuiaido úrilla llezica, judío illaíma Jesumo dúcide. Dúciillano, afémie anamo fueco dine bíjicaillano daide:

—Cue jiza ja tíide, mei íadi o bíllaza, mei aféngomo o onoi bítaibiri afengo jíllolleza, —daide.

19 Afe jira, Jesús náidacaillano afémie diné jaide naa ie llófuegamaciri.

20 Afémie iodo jailla llezica, jiáie iráredíngo afémiemo bite. Afengo afe irárenamona doce diga fimona dícotaite. Jesús comini cígido rillire jailla llezica, afengo Jesús jinófene dinena ie iniroi fueda jétaibite.

21 Mei afengo comécido daide: “Daa ie iniroi cue jetáadi jíllotícue,” daide.

22 Iemona Jesús meine abido gírecaillano aféngona cíoillano daide:

—Ízruigango, caimare o iri. O ínuamona ja jíllodioza, —daide.

Daií dáina llezica afengo jíllode. Afemona afengo ja íocirede.

23 Jesús illaíma jofomo dúcia llezica, aillo comini come tíillari cáillicailli éediaioi. Afe llezica jiáimaci toticai zuure fúudiaioi.

24 Jesús áfena cíoillano daide:

—Benómona oni omoi jai. Afeza tííñedeza fia inide, —daide.

Afémie dáinari comini íemo zadáidiaioi.

25 Mei íadi Jesús afémacina jino orede. Oriano jofó jaide. Jofó jaillano afe tíidíngo ónoído líínote. Líínua llezica afengo caífo náidacaide.

26 Iemona Jesús finócafue nana afe éniemo itígobiaido jica jalleide.

Jesús mena uínidímie jíllotae

²⁷ Afénomona Jesús jáidemo, mena uínidimie ie óodana caillícana bite. Daidíallinoi:

—Davidmona comuídímie Juzíñamui oreca Mesía ímie, mai cócomo dúecai, —daidíallinoi.

²⁸ Afe mei Jesús jofo eromo jáidemo, afe íaillinoi Jesumo dúcide. Iemo Jesús íaillinoína daide:

—Cuemo ómicoi jicácafueña finóredicueza ¿meita ínotiomicoi? —daide.

Jira afe íaillinoi daide:

—Ocuíraima, jii ínoticoco, —daidíallinoi.

²⁹ Iemona Jesús íaillinoi ui jetánota daide:

—Ómicoi ínua dieze, ómicoimo cómuiteza, —daide.

³⁰ Daií ie daina llezica, íaillinoi ui ñue cíoide. Afe mei Jesús íaillinoína riire daide: “Bie ómicoimo cue finócafue bumo lloñeno ómicoi iri,” daide.

³¹ Afena afémie rairuide íadi, afe íaillinoi jino billano, nana afénomo Jesús ui mánuana llócadiallinoi.

Jesús uáinidímie jíllotate

³² Afe mei Jesús afénomona jáidemo, fiénide jóríai úicaiga uáinidímie, Jesumo atídíaiói.

³³ Iemona Jesús afe fiénide jóríai jino orede. Afemona uáinidímie ja úrite. Aferi comíni caimare fáigacaillano daidíaiói:

—Bie izóidífueña jaca Israel nairai cígímo cíóñedicaí, —daidíaiói.

³⁴ Mei íadi fariséuai daidíaiói:

—Jesús dama fiénide jóríai illaíma ríinodo afe úicaigamie fiénide jóríaina jino orede, —daidíaiói.

Jesús comínimo dúecaide

³⁵ Afe mei Jesús nana aféniemo ite jófuiáimo naa onífedo itícuaído llófuiáide. Afénuiaímo ite Juzíñamui uai llófueriracuaído llófuete. Afémie Juzíñamui illáimana illarui ñuera rafue llocana uite. Iemo nana jíáiforiedemo izi cácade iráredínona jíllotate.

³⁶ Meita nana daií itínona cíoillano, afémacimo Jesús dúecaide, mei úiñoñegano izóidiaíoi. Ie jira oni ráiide ovéjaíai izóidiaíoiiza. Afémaci duere finócaíaiói, daje izóí duere zefuide buna ráiruiñegano izóí itíaiói.

³⁷ Afemona Jesús ie llófuegamacina daide:

—Uáfueza, jacáfaimo ite raa ailla llezica jofo óitino íñena izóí, birui Juzíñamui illáimana illánomo jofo órega comíni aillo ite. Mei íadi afémaci jofo óitino figo íñede. (Afe jofo óitino jíáimacimo ñúefue llóitino.)

³⁸ Ie jira jacafai Naama izóidímie mo jíáie ñúefue llóitimacina omói jicari, afémaci afémie oréllena.

10

Jesús doce dígamie ie oni oréllino nizede (Mr 3.13-19; Lc 6.12-16)

¹ Afe mei Jesús doce dígade ie llófuegamaci uáidote. Uáiduano fiénide jóríai comínimona oni orelle ríino íaíoi mo fecade. Daje izóí nana jíáiforiede duico ogano jíllotalle ríino afémacimo fecade.

² Be afe doce dígadimaci oni oréllino mámeaciai: Nánoramie Simón, dáamiena Pedro daína, íemo ie ama Andrés, íemo Zebedeo jító íaillinoi Santiago Juan díga,

³ íemo Felipe, íemo Bartolomé, íemo Tomás, íemo gobierno íbátaga úcube llínoraima Mateo, íemo Alfeo jító Santiago, íemo Lebeo dáamie mámecei Tadeo,

⁴ íemo íere Járídotimacimo jaináidímie Simón, íemo uire Jesús fécaitimie Judas Iscariote.

*Jesús ie llófuegamaci jíáigobiaimo llófuellena orede
(Mr 6.7-13; Lc 9.1-6)*

⁵ Jesús bie doce dígamiena ie oréacana llezica íaioi táijille izói llote. Daide: —Judíoñedino éniemo omoi jáiñeno iri. Daje izói Samaria éniemo ite jófuiáimo jáiñeno iri.

⁶ Mei jíáfodo Israel náiraimo ovejai féiraila izói féiraitinomo omoi jairi.

⁷ Monamo ite Juzíñamui illáimana illirui áinozillana llocana omoi uiri.

⁸ Íraredínuiái omoi jíllotairi. Tíidínuiái meine abido omoi cáatari. Daje izói íaire chíñaitímiaína ñue omoi finori. Daje izói comínimo ite fiénide jóriái jino oreri. Bie izói omoi táijille ríinona raíñóñeno ómoimo fecádicue, íemona áfedo jíáimacina raíñóñeno omoi canori.

⁹ Jabe omoi jaille llezica úcubena uíñeno iri.

¹⁰ Omoi cirítico uíñeno iri. Jaca daa o abimo jíidiroi díga jairi. Daje izói ídaí icona uíñeno iri, íemo jíái macara jigüida uíñeno iri. Mei jíáimacina omoi cánua jira, áfemo tájiraima jaca raíñóñeno écafiregaza.

¹¹ Omoi jáillinomo ite comíni jófuego omoi dúcia llezica, ñue ínofiregamie illano omoi jeno. Afénomo nai oni omoi jáiñeille dino uái omoi iri.

¹² Jofo jaillano, afémaci ñue daí uáidori. “Caimare uái omoi iri,” afémacina daíri.

¹³ Afe jofo comíni caimare omoi llíinoiadi, omoi afémaci ie ñue mameca uai afémacimo fiébiteza. Mei íadi omoi daína uaina afémaci náfueñenia, afémacimo omoi mameca ñue uai abido ómoimo bíteza.

¹⁴ Mei íadi afémaci ómoína llíinoacañenia, daje izói omoi llógamo cacáreacañenia, afe jofómona, daje izói afe jófuemona oni omoi jai. Omoi jailla llezica omoi éibamo ite íaie afémacimo teténocairi. Afedo íaioi comécimo ite íaifue nai íaioimo íllana ónoítiaioi.

¹⁵ Mei ua ómoína daíitucue, íraícaíño riire jicánolliruimo dúcina llezica, bie ómoína ruifíruite comíni, Sodoma Gomorra díga jofue comíni duere zefuilla baímo, íere duere finólliaioi.

Cristo ícoínia duere cai zefuillifue

¹⁶ Omoi cacai. Ovejai illárede jazici jico cígimo ória izói ómoína orédicue. Jaio abi rairuilla onona izói abi omoi onoiri. Mei íadi afe llezica fíiciri illáienina izói omoi iri.

¹⁷ Ñue abi omoi rairuiri, mei comíni jabóidillainimo ómoína fécaítiaioiza. Juzíñamui uai lloraco eromo omoi fáitíaoiza.

¹⁸ Iemo ríillainimo, daje izói jamánomo ocuídillainimo cue ícoínia ómoína uítíaoiza. Iemo afe omoi íaioi úlledo afe illáinimo cuedo úritiomoi. Daje izói afe judíoñedínomo cuedo úritiomoi.

19 Mei íadi illáicomínimo omoi íaiói uille llezica, “¿Ñíie izóí úriticái?” dáinamo comeci faiñeno iri; daje izóí “¿Ñíie uaillai llóiticái?” daiñeno iri. Mei omoi úrille llezica, Juzíñamui ómoína úritaiteza.

20 Afe llezica dani omoi comeci izóí úríñeitiomoi. Moo Juzíñamui Ñuera Joreño ómoido úrilleza.

21 Afe llezica comíni dani íaiói nahí ámana Crístomo ínotímiena illa jira, jíamacimo íena fállena fécaítiaíoi. Daje izóí móotiai dani íaiói Crístomo ínote jítótiai fállena fécaítiaíoi. Iemo jíai jítótiai dani íaiói móotiaído éoicana eróítiaíoi, íemo íaióina titátaitiaíoi.

22 Nana comíni cue ícoínia ómoido éoicana eróítiaíoi. Mei íadi fuillínomo fáicanocaiñeno ñue ínoicaitímie dama jíllote.

23 Daa jofue comíni omoi duere finóadi, jíaie jófuego omoi jairi. Mei ua ómoína dáíticue, nana Israel jófuaído nai omoi jíañenia úcodo raíre dúcíticueza; mei Nanoide fima Jitó Crístodicue.

24 Llófuegamacimona llófuetímie baimo jamánomoidímie íñede. Daje izóí ocuífiegamie ie ocuídímie baimo ocuínide.

25 Llófuegamie ie llófuetímie illa izóí írede. Daje izóí ocuífiegamie ie ocuídímie illa izóí írede. Jofu naama izóidicueza, Beelzebú daina Taífe mámecei cuemo íaiói jítaadi, jofu ero úruíai mámeceina dájena jítaítiaíoi. Iemo afe úruíaina cue baimo fieni úritiaíoiza.

¿Ñímiena jacírui redicái? (Lc 12.2-7)

26 Ie jira comínina jacíruiñeno iri. Mei nana báinino daina uaillai jino uáfodo cóozite. Daje izóí nana báinino itífuaína jino uáfodo onuille.

27 Birui jítifomo úrilla izóí báinino ómoímo cue llógana, uire uáfodo monari comínimo omoi lloiri. Daje izóí ómoína báinino cue dáina uai, comíni dáanomo uáidota ficíre lloiri.

28 Omoi íeizi titáitinona jacíruiñeno iri; mei omoi joréñona titánidiaíoiza. Mei jíáífo boode iraimo cai íeizi naa cai joreño duere finótaitímiena omoi jacírui.

29 Onódiomoíza mena duera ófocuízaí duera úcubedo íbárega. Mei daí íaiói ráííñede íadi, afémacimona omoi Moo Juzíñamui daíñenia dácuíño tíide izóí ana báííñeite.

30 Mei uafue, omoi ífócímo ífótiraíai illa dígatiraí facádoga.

31 Mei daíñteza jacíruiñeno omoi iri. Omoi, aillo ófocuíñuaí baimo ráífidíomoi.

Comíni eróicana Jesuna jíeruitíno (Lc 12.8-9)

32 Comíni eróicana nana cuena jíeruitínona monamo ite cue Moo eróicana jíeruiticue.

33 Mei íadi comíni eróicana cuena jáanotínona, afe izóí monamo ite cue Moo uíecori afémacina jáanoíticue.

Comíni conímána ruífruitatallena biticue (Lc 12.51-53; 14.26-27)

34 Comíni dájena uái illífue bíniemo lluaíbiticueza daíñeno iri. Mei jíáfodo dájena uái illífue lluaíbíñeno, fuírilla izoide lluaíbiticue.

³⁵ Cuemo ínuamona dáamie ie moo dinena íena ruifruicaite. Afe daíí cue billamona dájena uái íñeitiaillinoi. Daje izóí ei cuemo ínua jira afengo jiza dinena ruifruibicaite. Afe daíí cue billamona dájena uái íñeitiainguai, íemo jíái cuemo ínuamona mio ie jifaiño dinena ruifruibicaite. Afe daíí cue billamona dájena uái íñeitiainguai.

³⁶ Iemona illa dígamie dama ie jofe ero comíni dinena éoigamiena mámeitiaíoi.

³⁷ Ninó daa come ie moo, ie eina cue baímo izíruiá, afémie cuemo dúinide. Daje izóí ninó daa come ie jítone, níbai ie jízana cue baímo ie izíruiá, afémie cuemo dúinide.

³⁸ Iemo jíái, comíni dama afémie titácanamo náfuiano cuedo jáiacañedímie afémie cuemo dúinide.

³⁹ Te jira ie cáanano rairuíacadímie áfena táinomo fáifitaite. Mei jíáífodo cue ícoinia ie cáanano táinomo fáifitímie afe fáifidena baímo ziiño illínona máíñoite.

Jirídua izóidífuiai
(Mr 9.41)

⁴⁰ Iemo Jesús nai úrillano daíde: Omoína caímare uáidotino, daje izóí cuena caímare uáidote. Iemo cuena caímare uáidotino daje izóí cuena orédimiena caímare uáidote.

⁴¹ Juzíñamui uai jino llóraima Juzíñamui díbenedo bíllado afémiena caímare uáidotímie, dájeze afémie jirídua izóí jirídoite. Daje izóí ñuemiena caímare uáidotímie afe jíáímie ñue íllado, afémie jirídua izóí jirídoite.

⁴² Daje izóí ninó daa come cue llófuegamacimona jabóidimíemo daa due jiza mánaide jáinoina jirótaadi, afémie cuedo jailla jira, afe jirótatímie uáfuenta íeiena mameca raana jirídoite, —dínori Jesús ie oréllimacimo llófue.

11

Juan Bautista orécano
(Lc 7.18-35)

¹ Jesús ie doce dígade llófuegamaci íaíoi táijille izóí llófuiana fuilla méfomo, Jesús oni afe éniemo ite jófuiaímo jaide, afénomo ite comíni llófuellena.

² Aféruido Juan Bautista llavéracomo illa llezica afémie Jesús finócafuiaina fidide. Ie jira iedo jáidinomona dáarie Jesumo jícanuaitate.

³ Jesumo dúcállano jícanotiaíoi:

—¿Meita o bíite Cristo daínámiedo? ¿Níbai nai jíáie bíitímie úíñoredica? —daídíaíoi.

⁴ Jira Jesús afémacina daíde:

—Omoí ciona, omoí cacana izóí Juaamo omoí llujáiri.

⁵ Bífuiai afémíemo llujáiri: Uínidino ñue cíódiaíoi, macáñedino macádiaíoi, íaire chíñaitino íaíoi chíiemona ñue jacáitagaiaíoi. Iemo jefona cacáñedino ñue cacádiaíoi, íemo dáarie tíidino meine abído cáadinona jáidiaíoi. Daje izóí dúeredino jíllona uaina llogáiaíoi.

⁶ Cuemo íñoñeilli uaina baíñedímie íóbite.

⁷ Juan orécano meine abído jailla méfomo, Jesús Juaado comínimo úrite; daíde:

—Mei táizicimo ¿mínícana cíóizaidíomoi? Níbai dáamie ie daina uaina méidofiredimiena cíóizafiredíomoi.

8 Afe izóidimiena omoi cíozaiñenia, ¿mei nie izóidena cíozaidiomoí? ¿Meita nıbai ñue cíoide ráifide iniroi jítáoidimie cíozaidiomoí? Onódiomoıza ráifide ñúecuiroi jítáoıfiredino jaça illaini jofomo ifrediaıoi.

9 Mei ııraınomo ¿minıcana cíozaidiomoí? ¿Nıbai Juzıñamui uai jino llórainmana cíozaidiomoí? Jıı. Uáfueza. Juzıñamui uai llórainma baimo jamánomoidimiena cíozaidiomoı.

10 Juan baie Cuegáuai dainámie. Jaiıai uıcodıo nai cue biñena llezıca, aféuaimo Juzıñamui, afémie dibénedo cuena daıde:

O bille io ñue finóllena izóı, comını ıaıoi comécıdo ñue omo jıeruıllena, cue llıúajitimie o uıcodıo orédıcue.

11 Uáfena ómoına dáııtıcue, nana comınımona ite Juzıñamui uai llórainmona Juan Bautista baimo jamánomoidimiena iñede. Mei jııáfodo Juzıñamui illáimana illánomona jabóidimie Juan baimo jamánomoıde.

12 Mei ıadı Juan Bautista bıllamona ua biruımo aıllıo comını rııfuedo raa báırıua izóı, monamo ite Juzıñamui illáimana illánomo iere izire jıfo jáıacadiaıoi. Afe rııfuedo afénomo jıfo jáıacadıno bie izóı comécıdiaıoi: “Afe illánona anáfenuano jıfo jáıtıcai,” daıı comeci facádiaıoi.

13 Nana Juan uıcomo ite Juzıñamui uai llórainı naa Moısés lloga ocuıca uai diga Juzıñamui illáimana illáruıdo úritiaıoi. Iaıoi úrilla méıfodo Juan bite.

14 Iemo jııáfıue ómoımo llóıtıcue. Omoi ıınoıacaniadı, bıfıuena ıınoredıomoı. Nauı lloga bııte Elıas be nıımie Juan; mei Juan Elıas dainámiena bıteza.

15 Maı cacáreacadıno, omoi cacai.

16 Iemo Jesús nai úrillano daıde: Biruıllııdo itınona, ¿nııe izóı ıaıoına mámeıtıcue?

17 Jıfue cigı ıbırımo jıfánote úrue izóıdiaıoi. Afémacı conımamo ebırede rúado caımáıacadiaıoi, mei ıadı afena fairıoñediaıoi. Daje izóı conımana zúurede rúado fıraacadıaıoi, mei ıadı daje izóı afemo cacáreıacañediaıoi.

18 Afe bie izóı ómoımo ite. Mei Juan Bautista bılla llezıca afémie fımarıllano fıgo güıñede, daje izóı rııji jıróñede. Ie jıra “Fıénıde jórııaı úıcaıgamedıo” ıena daıdıomoı.

19 Afe mei cue, afe Nanoıde fıma Jıtó dainámıedicue bııtıcue. Bıllano, jııımacı izóı güıtıcue, ıemo jıróđıcue. Afemona nane bie izóı cuena daıdıomoı: “Bımie iere güılláredımie, jéırie jırofıredımie. Fıénıdıno nabáıdımie. Daje izóı goberno ıbátaga úcube llıınorainı nabáıfıredımie.” Daıı cuedo úritıomoı. Comını Juzıñamui orécanona bie izóı fıeni daıdıaıoi ıadı, Juzıñamui bııtácafue dama ie fınocafııııdo jino cíozıte, —dınorı Jesús daıde.

*Jófuıaımona dáarıe Jesús uaina cacáreacañediaıoi
(Lc 10.13-15)*

20 Iemona Jesús jıııe jófuıaı comını ıaıoi ıınoñena jıra fueñe lletade. Mei afémie uaidıo daina comııde cíórainına ráamona nabene afémacı cigımo fınođeza. Mei ıadı afeno comını ıaıoi comeci fıfuena nai méıdoñediaıoi. Afémie daıde:

21 —ıCorazın jıfue comını nıı dúırenea! ıDaje izóı Betsaıda jıfue comını nıı duere zefuılla! Mei ıaıoi cigıri cue fınoça cíórainına raa, afena Tıro comını daje izóı Sidón comını cigımo nauı fınođıcuena, nıbai rııre jaiıai uıcodıo ıaıoi comeci fıfuena méıdotiaıoi. Uafue ıaıoi comeci fıfuena méıduamona, ja diga fımona

jaide. Afe llezica zúunaia jitáfíregá jítiroi jitáacadiaioi. Daje izói aféruimo íaioi zúunailla jino ácatallena jízefo ífomo jutáacadiaioi.

²² Mei jíáifodo ómoína dáitícue, íraicaíño riire jicánolliruimo Tiro Sidón diga duere finóbina baimo Corazín íemo Betsaida comini duere finólliaioi, —daíí daide.

²³ Iemo Capernaum jofue comini Jesús lletade. Afémaci dibénedo daide:

—¿Meita íaioi íinoga jofue monamo úirede? ¿Daíí comeci facádiaioi, ero ua? Mei jíáifodo íaioina daidícue, tíidino illánomo ana dotaca izói niné táinocaitalliaioi. Mei íaioi cígimo cue finoca cíorainina raa nauí Sodoma jófue mo finódicuenia, afe jofue nai biruimo nia ite.

²⁴ Mei íadi jíáifodo Capernaum comínina dáitícue, íraicaíño riire jicánolliruimo Sodoma comini baimo jicánolliaioi, —aquíe izói Jesús íaioina lletade.

*Cuomo billano omoi ocózinairi
(Lc 10.21-22)*

²⁵ Aféruillaído Jesús daide:

—Mona Ocuiraíma Moo Juzíñamui, omo ñúefue jóoneitícue, mei Juzíñamui dibénedo onóigafuiai úrue izoide, comécina níifuenide jamai comínimo jino cíotatioza; mei íadi bínie ráfuena baitádinomona aféfuiai o retáidoga.

²⁶ Jíi, Moo, mei o daíí jitáidízoa.

²⁷ Jesús nai úriode: Cue Moo, nana uafue onóigafuiai ja cuemo llotio. Moo Juzíñamui, o Jitódicue, mei íadi buna uáfodo cuena ñue onóñena. O cue Móodioza, dama o ñue cuena onódio. Daje izói buna uáfodo ona ñue onóñena. Cue, o Jitódicueza, dama ona ñue onódicue. Iemo jíái daje izói o Jitó onótaacagano ñue ona ónoítiaioi.

²⁸ Iemo comínina daide: Omoi ñúefuiai finóacanamona zefuínaitino cue diné omoi bí; íemo jíái ñénidífue ábiana méeruitino daje izói cue diné omoi bí. Omoína ocózinaitaiticueza.

²⁹ Mai cue diga táijífírena izói ñúefuíaína finóllena omoi onoiri; mei omoi diga táijífíredicueza. Afe dájena táijínana cúemona omoi onoiri. Mei comécina járidoñedicueza. Daje izói comécina mánaidicueza. Afemona omoi comeci uái ocózinailinona báitíomoíza.

³⁰ Omoi diga cue táijínana féinide. Daje izói ómoímo cue ocuállafue jaca ómoína zéfuitañeite, —dinori úrite Jesús.

12

Jesús llófuegamaci ocózinairuimo trigo ímoíai dícoiano otá güitíai
(Mr 2.23-28; Lc 6.1-5)

¹ Aféruido Jesús naa ie llófuegamaciri ocózinairuimo trigo ritino jacafai cígido macade. Afe llezica ie llófuegamaci iere jufínailano, trigo ímoíai otá güitíai.

² Afena fariséuai cíoillano Jesuna daidíai:

—Ero, o llófuegamaci ocózinairuimo rairuírede táijínamo táijidiaioi.

³ Mei íadi Jesús íaioina daide:

—¿Omoi ico jaíai illaíma David finócafue cúegana facádoñediomoi? Afémie naa ie nabáñiairi iere jufínaitiaioi.

4 Afe llezica Juziñamuimo gairíracomo jofu jaillano rairuica panes otá güitíai. Mei íadi afe páaniai afémiemona rairuírede, daje izói ie nabáñiaimona rairuírede. Afe pan dama lletáriraini güírede.

5 ¿Mei nane jíaié Moisés ocuica uai cúegana facadoñediomoi? Afénomo daina: Juziñamui gairíracomo táijide lletáriraini, ocózinallaruiimo ocózinaiñediai, mei daí íai: illa fiénidifueñede.

6 Mei ómoína dáitícue, birui benomo afe gairíracu baímo jamánomoidímie ite.

7 Bie jíaié Juziñamui Cuegáuai llógana nai onóñediomoi. Afe be níuui: “Fatá fia fecaca rille baímo cuena izíruillena jitáidícue.” Bíuaina omoi onóadi nífuena finóñedinona “Duere cai finótalli” dáiiñeitiomoiza.

8 Mei uáfueza, ocózinallarui Nanoide fima Jitó Cristo dainámie ocuilla uai anamo ite.

*Onoína llirídímie rafue
(Mr 3.1-6; Lc 6.6-11)*

9 Afe mei Jesús afénomona jaide. Jaillano Juziñamui uai llorácomo jofu jaide.

10 Afeco eromo ónoína llirídímie ite. Afe comini Jesumo fiénidifue jitállena jenódiai. Iemona afémiena jicánodoidiai:

—¿Meita iráredímie ocózinallaruiimo jíllotarede? —daídaíai.

11 Jira Jesús afémaci uai ote:

—Omoimona daa cómemo oveja íadi, afe oveja ocózinallaruiimo ífomo baíadi ¿meita caífo óñega?

12 Mei uafue, daa come oveja baímo jamánomo ráífide. Afemona ñúefue fínuana ocózinallaruiimo rairuíñega.

13 Iemona Jesús afe iráredimiena daide:

—O onoi jino zúita, —daide.

Jira ie onoi zúitamona, enéfene izói ñuera.

14 Iemona fariséuai jino jaillano, Jesús fállena mamérizaidiaí.

Jaíai uai llóraíma Jesudo daina uai como zuilla

15 Aféfuena Jesús fidiillano, afénomona oni jaide. Ie jailla llezica aillo comini afémiedo jaide. Iemo Jesús nana iráredino jíllotate.

16 Afe llezica afémie íaioina llotátañede: “Cue bie izói íllana bumo lloñeno iri,” íaioina daide.

17 Bie izói zuide jaíai uai llóraíma Isaías lloga uai ñue ícoímo fuitállena. Afe uai be ñie:

18 Bímie nizada cue oga ocuífregamie.

Afémiena iere izíruitícue, íemo afémieri iere íóbidícue.

Cue Ñuera Joréñona afémie úicaitaítícue.

Afémie cue mameca jaícina jóidífuiaína náiraímo jino llóite.

19 Afémie ríifuedo llóñeite.

Daje izói cáillicaiilli úríñeite.

Iemo jíai jofue cigi macáraodo ie uaina cácaíñeille.

20 Comécina náinidinona ruifiruiñede. Afémie íaioi comécina náiretaite.

Daje izói dúiacade uillide mechera meine abido omoi boota izói, afe izói jabo ínote comini afémie fáicanocaiñeite. Fáicanocaiñeno ñue íaioina ínotaite.

Afe ícoímo nana duéredinona fáicanocaiñeitemo afémie jaícina illáimana illíruimo dúciite.

21 Iemona nana náiraii afémiemo ocúritiaioi.

*Taife ríino Jesumo illa afémiemo jitádiaioi
(Mr 3.19-30; Lc 11.14-23; 12.10)*

22 Afe mei únidimie Jesús diné atídiaioi. Afémie fiénide jóríai uícaiga úrinidimie. Afémiena Jesús jillotata. Iemona afémie ja ciode, daje izói ñue úrite.

23 Te jira nana comini áferi caimare fáigacaillano daidíaiioi:

—¿Meita afe be níimie jaiai illaíma Davidmona comuítagamie? —daidíaiioi.

24 Fariséuai áfena cacáillano daidíaiioi:

—Bímie fiénide jóríai illaíma Belzebú daináma ríinodo afémacina jino oréfírede, —daidíaiioi.

25 Jesús daíi íaiioi comécido dáinana onóillano íaioina daide:

—Ninó daje náiraina ite comini conima diga fuiríadi, afe nairai ráidoizillano niné táinocaite. Daje izói daje jofue comini eneno ráidoiziadi, afe jofue are íñeite. Iemo jíai daaco ero comini eneno ráidoiziadi, afémaci are íñeite.

26 Iemo daje izói, mei Satanás dama íemo jaináidino jino oréadi, dani Satanás mairídino oni énenorie jáitiaioi. Mei íemona afémie ocuille ríino íñeite.

27 Omoi cuena: “Belzebumo ite ríinodo fiénide jóríai jino orédío,” daidíomoi. Afe omoi daina uáfuedenia, jíáfue ómoimo jicánoitcúe. ¿Mei bu ómoído jáidino fiénide jóríai jino orelle ríino iga? Te jira dani afémaci ñue onóñeno taino omoi llua jino cíotatiaioi.

28 Mei jíáfodo Juzíñamui Ñuera Joréñodo afe fiénide jóríaina jino orédicúe. Iemo bifue bie izói daííacana: Juzíñamui illáimana illarui ja ómoimo dúcide.

29 Mei uáfueza, ríiredimiena fueñe o máíñenia, ¿ñie izói dáamie ie jofomo jaillano ie jofu ero ráaiena bairóredio? Bairónidio. Nano fueñe afémie máírede. Te mei ie ráaiena bairórede. (Afe daíi Cristo Taifena jaca anáfenorede.)

30 Cue dibénemo íacañedimie cuena uáitate. Cue diga dájena tájíñedimie, cue raana oni jutádimie izoide, mei afémie jíáimaci cuena ínotañedeza.

31 Te jira ómoína daíticúe, naga come ie finoca fiénidífue, Juzíñamuimo jicáadi dórede; daje izói nana ie úrilla fiénidífue dórede. Mei íadi ninó dáamie Juzíñamui Ñuera Joréñona íaire dáiiadi, afe uai jaca dónide.

32 Iemo jíai ninó dáamie Nanoide fima Jitó Crístona íaire dáiiadi, afe afémiemo ie lloia dórede. Mei íadi Juzíñamui Ñuera Joreño jánana fiéni úritimie afe ie úrilla íaífue birui dónide. Daje izói uire jaca ninomo dónide.

*Naga amena ie llizíllajido onórena izói, daje izói naga come ie úrillafuíaído
ónorede*

(Lc 6.43-45)

33 Ñuera aménamona ñuera ráajina llizide. Daje izói fiénide amena jaca fiéni llizide. Mei uáfueza naga amena ie llizíllado ónorede.

34 Jáio izóidinodíomoi. Ja fiénidinodíomoiza ¿ñie izói ñue úrredíomoi? Mei uáfueza, cai fue cai comécimo jebuide raado úrite.

35 Ñuera come ñúfuedo úrite, mei ie comécimo ñúfue íllaza. Daje izói fiénidimie fiéni úrite, mei ie comécimo fiénidífue íllaza.

36 Iemo nane ómoína daíticúe, íraícaíño Juzíñamui caimo ríire jicánolliruimo, nana ráiruiñega fiéni cai úrilla uai, daje izói abi cai ráiruiñena úrilla uai diga, jáanoñeno “jíi” daííredicai.

³⁷ Mei uafue, o úrilla dieze Juzíñamui omo izire jicánoiteza. Jiáimiena “O níífuenidimiedio” dáite; ie mei jiáimiena “Dama o ícoinia daí ítio,” dáite.

Fiénide comini ciórainina raa finóllena Jesumo jicádiao
(Mr 8.12; Lc 11.29-32)

³⁸ Afe mei fariséuaimona dáamierie Jesuna daídiao, daje izói Ocuica Uai llófuefiredino diga:

—Llófueraima, ciórainina raa o finuana cióacadicaí, —daídiao.

³⁹ Jira Jesús afémaci uai ote:

—Bigima fiénidino botade jiruiredingo izoide ja Juzíñamuina zóofetiaí. Iemo ciórainina raa cuemo jicádiao. Mei íadi nauí Juzíñamui uai llóraima Jonás onótagafue baimo jiáífueña llóñeilliao.

⁴⁰ Mei Jonás daaruiámani íemo daámani naio afe áillue chamu eromo illa izói, afe izói Nanoide íima Jitó Cristo énie anamo daaruiámani íite, daje izói daámani naio.

⁴¹ Jaiái Nínive jófueño ite comini bigima comínimo riire jicánolliruimo bimácimo fiénidifue jítaitiao. Mei Nínivemo ite comini Jonás Juzíñamui uai íaioimo llua llezica íaioí comeci ífueña méidotiaoiza. Mei íadi birui benomo Jonás baimo jamánomoidimie ite.

⁴² Daje izói sur dibénemo jica ite nairai illaingo, bigima comínimo riire jicánolliruimo, bimácimo fiénidifue jítaite, mei afengo jica énie fuédamona Salomón comeci onóigafueño cacáreizaíbiteza. Mei íadi birui benomo Salomón baimo jamánomo baitádimie illa.

Jino oreca fiénide joríaí meine dáamiemo bite
(Lc 11.24-26)

⁴³ Jesús nai llícaíñeno úrite: Fiénide joríaí cómemona jino jáíadi, táiziciaído ie uái illino jenócana uite. Ie uái illino baiñenamona bie izói comeci facade:

⁴⁴ “Meine abido cue billa cómemo jáitícue,” daíde. Afe joríaí meine afe cómemo bítemo, jofo taico izoide baizábite. Daje izói rafode ñue finócaco izói baizábite.

⁴⁵ Iemona afémie siete diga jamánomo afémie baimo fiénide joríaí uájide. Afémaci nana afe cómemo jofo jáidiaí. Afemona afe come nauí ie fiénina baimo birui jamánomo fiénide. Afémiemo illa izói, afe izói ómoimo íficaite, mei bigima fiénidigimaza.

Jesús ei naa ie ámatiaíri
(Mr 3.31-35; Lc 8.19-21)

⁴⁶ Jesús nai comínimo úritemo, ie ei naa ie ámatiaíri dúcide. Afémaci jofo jinófecomo itíaoí. Afémie diga úriacadiaí.

⁴⁷ Afe llezica dáamie Jesuna daíde:

—O ei, o ámatiaíri jino benomo itíaoí. Afémaci o diga úriacadiaí, —daíde.

⁴⁸ Mei íadi Jesús afe lluáíbitimiena daíde:

—¿Mei bu cue eina? Daje izói ¿mei bu cue ámatiaína? —daíde.

⁴⁹ Daí daínamona afémie llófuegamacina fueño uidánote. Uidánuano daíde:

—Bimaci cue eina, daje izói bimaci cue ámatiaína.

⁵⁰ Mei ninó dáamie monamo ite cue Moo comeci jitailla izói finódimie bie come cue ámana, daje izói cue miríngona, daje izói cue eina, —daí Jesús afémacina daíde.

13

*Afémaci onótate ríjifredimie rafue
(Mr 4.1-9; Lc 8.4-8)*

¹ Afe monado Jesús jofómona jino jaillano, jorai fuédamo ráinazaide.

² Iemo afémie illánomo aillo comini ofilla jira, afémie bai nocaemo ráizaide. Afe llezica nana comini fuédamo fiébidiaioi.

³ Mei afémona diga ráfuiaina afémaci llófuete. Afémaci onoiga izóidedo afémie íaioi llófuete. Daide:

—Jacáfaimo rífredimie rizájilla.

⁴ Ricana ie uilla llezica, afe júdaica íjiaimona dáarie iomo baiide. Baiilla mei ófocuiñuai güizáibitiaioi.

⁵ Ie mei jíáijiai énie figo iñena noñciaimo baiide. Aféjiai raire zicode, mei afe énie llíaideza.

⁶ Iemo jáinaonideza jitoma egáñuamona, zafénaillano tíidiaioi.

⁷ Ie mei nane jíáijiai éegiai cígiri cocídino. Afe éegiai mónaillamona aféjiai íracotaillano tíidiaioi.

⁸ Mei íadi jíáijiai ñuera éniemo baiide. Aféjiai ñue ailla. Dáaride cien diga llizíllajiai comúitate. Jáiri sesenta diga llizíllajiai comúitate. Iemo jíáirimo treinta dígaji comuide.

⁹ Bíemo cacáiacadino mai cacai.

*Nibái mei bie comini onoiga izóidedo úrilla, Jesús jino lote
(Mr 4.10-12; Lc 8.9-10)*

¹⁰ Iemona ie llófuegamaci billano Jesumo jicánotiaioi:

—¿Nibái mei cominimo íaioi onoiga izóidedo úritio? —daidiaioi.

¹¹ Jira Jesús uai ote:

—Monamo Juzíñamui illáimana illirui uáfodo ónoñega ráfuiaina, afémie ómoina onótate. Mei íadi baie comini áfeniaina ónotanidiaioi.

¹² Mei ua, Juzíñamuina iere onócadimie mo ie báitaja baimo jíáiena írede. Iemona afémiemo aillo íite. Mei íadi Juzíñamui dibénedo onócañedimie mona íemo ite due jiza onónana bairórede.

¹³ Ie jira afémacimo íaioi onoiga izóidedo úriticue. Mei afémaci ñúefuena cíodiaioi, mei íadi nai cíoiñedino izói itíaiioiza. Daje izói cacádiaioi, mei íadi nai cacáñedino izói itíaiioi.

¹⁴ Mei afémona Juzíñamui uai llóraima Isaías afémacina jicana daína uai ñue ícoimo fuilla. Be ñuiai:

Omoi uáfodo cácaitiomoi mei íadi afe dánana ónoñeitiomoi.

¹⁵ Mei bimaci comeci ríredinona abido jaide.

Daje izói afémaci figo cacácañediaioi.

Afémaci ui ibaica izói ite. Daí itíaiioi íaioi uído cíoiñeillena, íemo jíái íaioi jefodo cácaiñeillena; daje izói íaioi comécido ñúefuiái ónoñeillena.

Iemona íaioi cue jíllotalena abido cuemo bínidiaioi, daí Isaías daide.

¹⁶ Mei íadi dani omoi uído omoi cíónamona, daje izói dani omoi jefodo omoi cacánamona íobidinodiomoi.

¹⁷ Uáfuena ómoina dáititue, diga Juzíñamui uai llóraini bie omoi cíónana cíocadiaioi, naa aillo jíáie ñue comíniri. Mei íadi áfena cíóñediaioi. Daje izói bie omoi cacánana cacácadiaioi, mei íadi cacáñediaioi.

*Jesús ríjifredimie rigáijiai rafue ñue jino lote
(Mr 4.13-20; Lc 8.11-15)*

18 Jira bíemo omoi cacáreiri. Rírfiredimie rafue bie izói jino daide.

19 Monamo ite Juzíñamui illáimana illarui uaina dámie cacáadi, mei íadi afémie áfena íinoñeniadi, afémie comeci afe bie io izoide. Jii, afe rigájiai iomo baídino izoide. Afe izói comécido jabo ie onoiga ñuera uaina Taife báruaíbite.

20 Afe rigájiai nii afe nofíciái emódomo cocídino jana, ñúefuiaina raire cacáillano caimare otino coméciai.

21 Mei íadi afémaci raire zicode raa riire jaináñena izói, Juzíñamuimo afémaci figo jaináñenamona are inédiaioi. Mei íadi ñuera uai ícoinia jacire facátafuiai, íemo duere finóllena rácafuiái afémacimo comuíadi, ñúefuena fáicanocaitiaioi.

22 Afe éegiai illano jana Juzíñamui ñúefuena cacádiaioi ia, bínie ráaniaimo comécina fáifiredino. Iere ráanaiacana afémacina jífujete. Nana aféfuiai Juzíñamui ñúefuena íracotailla izói ínotañede. Iemona afe uai afémiemo ñue áide izói inede.

23 Mei íadi afe rigájiai nii afe ñuera éniemo baídino jana bie izói ite. Bimaci Juzíñamui ñúefuena cacáillano afe uaina jeire otiaioi, mei áfena ñue onódiaioiza. Uamona iere aite rigájiai izói afémaci aillo ñúefuiai finófirediaioi. Afémacimona dáarie jamánomo aillo ñúefue finódiaioi, Iemo jíámaci aillo ñúefue finódiaioi. Iemo nane jíáie fia jabo aillo ñúefue finódiaioi.

Riga trigo cígimo fiénide raróciái zícua rafue

24 Iemo nane Jesús bie íaioi onoiga izóidifue llote:

—Monamo ite Juzíñamui illáimana illarui bie izoide. Dáamie ñuera íjiai ie jacáfaimo rite. (Aferuillaido comíni diga ráaniai daane riñeno énenorie ritíai.) Bímie ie jacáfaimo jíáiena jaicuñeno daa trigo rite.

25 Mei íadi naama ínia mei ie diga ícírítimie trigo cígimo fiénide raróciái rizáíbite. Rillano oni jaide.

26 Afe trigo móonaillamona ímoiaí comuilla llezica riga fiénide raróciái cóozite.

27 Afemona tájítafiregano jacafai náamamo llujáide: “Ocuíraíma, o ritátaga cai ríganíai nibai ñuera. Mei afe cígimo fiénide ráitíai ¿ninómona comuide?”

28 Jira afefai naama daide: “Níbai ninó cue diga ícírítimie bie rizáíbiga.” Mei jira afe tájítafiregamaci íena daide: “¿Afe fiénide ráitíai cai áiruailleza meita airótatio?”

29 Mei afémie íaioina daide: “Dama íteza, aiñóñeno iri, mei afe fiénide ráitíai aiñódiomoinia naa trigo diga aiñódiomoiza.

30 Dama trigo diga daane móonaiteza, aíñoñegania ñuera. Afe mei jofu ollíruimo, cue tájítafiregano óreitícue fueñe afe fiénide ráitíai óllena. Afe uano afe ráitíai jobaille eneno ícútuaina maítátaitícue. Afe mei cue trígona éenoracomo éenotaitícue.”

Mostaza dáina riga raa íjiai rafue

(Mr 4.30-32; Lc 13.18-19)

31 Iemo nane Jesús bie jíáie onótaitífue llote:

—Monamo ite Juzíñamui illáimana illarui mostaza dáina riga raa íjiai izoide. Dáamie afe íjiai ie jacáfaimo rite.

32 Uáfueza, afe íjiai nana jíáie rífiregajiai jofomo jéenide. Mei íadi móonailla llezica nana juzítíofiai caifomo are zairide. Afe llezica caifo amena dínorí aillo zairide. Afemona áfena ícairuaimo feede ófocuíñuai jillaina nizáíbítiaioi,

—daide. (Afe izói Juzíñamuimo ñinotino dúemaci íadi, jamánomo aállomacina jébuioicaitiaioi.)

Levadura daina pan fáitara rafue
(Lc 13.20-21)

³³ Iemo nane Jesús bie jiáie onoiga izóidifue llote:

—Monamo ite Juzíñamui illáimana illarui pan aillo fáitate levadura izoide. Daa ringo daámani julleco harínana oruítajano, áfemo due jiza levadúrana tamede. Iemona nana afe iféllana mullétano oni aillo fáitate, —daide. (Afe izói diga jiáimaci Jesumo ñnuamona, Juzíñamuimo jaináidino aillo jébuítiaioi.)

Jaii daináuai fuitállena Jesús íaioi onoiga izóidifuiaido comínimo úrite
(Mr 4.33-34)

³⁴ Nana bifuiái Jesús íaioi onoiga izóidifuiaido comínimo llote. Onótaitifue afémie llónenia comínina ñie izói daiñede.

³⁵ Jaii Juzíñamui uai llórama daina uai ñue ícoimo fuitállena, afémie daií llófuete. Afe be ñúuái:
Onótatífuiaido jino úriticue.

Juzíñamui énie finua llezícama ñoñoñegafuiái jino llóiticue.

Trigo cígimo comuide fiénide ráitíai ifue Jesús jino llote

³⁶ Afe mei Jesús nana comíni jino fíano jofo eromo jaide. Afécomo Jesús llófuegamaci afémiemo jicánuaibítiaioi:

—Jacáfaimo comuide fiénide ráitíai rafue caimo jino ñue llóiri, —daiíaiioi.

³⁷ Jira Jesús íaioina daide:

—Afe ñuera íjai ritímie jana Nanoide íma Jitó Cristo.

³⁸ Afe jacafái jana bie énie. Afe ñuera rigájai jana Juzíñamui illáimana illáruimo jaináidino. Afe fiénide ráitíai jana Taifemo jaináidino.

³⁹ Afe fiénide ráitíai rizáibítímie dama Taife. Afe llizíllajai jofo otá éenua jana énie fuillíruí. Iemo afe llizíllajai jofo otino jana Juzíñamui abi ímaci.

⁴⁰ Ie mei afe fiénide ráitíai jobáillena oni eneno jóonia izói, afe izói énie fuillíruimo fiénidinomo zúite.

⁴¹ Aféruimo Nanoide íma Jitó Cristo ie abi ímaci óreite, jiáimana fiénidifue finótatino eneno óllena, naa fiénidifue finódinori.

⁴² Afémacina iraimo dótaite. Afénomo iere éenaitiaioi; iere izi cácaillamona murímurítiaioi.

⁴³ Ie mei Juzíñamui jitailla izói finóidino íaioi Moo illáimana illíruimo jítoma uíeco meáire egáiñua izói íaioi maíñoa Juzíñamui ebíredifueña jino cíotaitiaioi. Omoi cacáacania, cacai.

Retáidoga ráifide raa jino onótaitifue

⁴⁴ Monamo ite Juzíñamui illáimaitagamacina íacadino bie izói fínoítiaioi. Énie anamo ónonino retáidoga ráifide raa jénua izói fínoítiaioi. Ñie monado daa come afe retáidoga ráifide raa baite. Bailla mei, abido dáanomo áfena retáidote. Afe mei jofomo íóbicana jaillano nana íemo ite raa fécajide. Raa fécajano oga úcubedo afe retáidua énie íbajide.

Perla daina iere ráifide zírji jino onótaitifue

⁴⁵ Nane daje izói monamo ite Juzíñamui illáimaitagamacina íacadino perla jenoda fécafíredímie izói fínoítiaioi. Afémie jicado jenode.

⁴⁶ Iere ráifide perla daa ie baía, nana íemo ite ráaniai fécajano, ie ciona ráifidiji íbajide.

Chamu ora llóiji onótaitfue

⁴⁷ Daje izói nane monamo ite Juzíñamui illáimana illarui, jóraimo dótafirega chamu ora llóiji izoide. Afe llóiji nana jáíforiede chámuna ote.

⁴⁸ Afe llóiji oruilla llezica, facódino oni fuédamo jainácana uite. Afénomo raináillano, ñuera chamu diga nizédiaioi. Fiénidino oni dótano ñuera chamu íaioi cirígaimo iráidiaioi.

⁴⁹ Afe izói énie fuillíruimo comínimo íite. Juzíñamui abi imaci billano ñúemaci fiénidimacimona oni eneno ofítaite.

⁵⁰ Iemo fiénidimona iraimo óreite. Afénomo iere éenaitiaioi. Izi cácanamona murímuritiaioi.

Comue ráifide raa naa jácaie diga

⁵¹ Afe mei Jesús íaioina jicánote:

—¿Meita omoi nana bífuiaina onódiomoi? —daide.

Jira afémaci daidiaioi:

—Jíi, Ocuíraima onódicai, —daidiaioi.

⁵² Iemona Jesús íaioina daide:

—Cue ocuica uaina ñue llófuefiredimie, monamo ite Juzíñamui illáimana illirui dibénedo llófuia llezica bie izói íficaide. Aillue jofo naama ie éenoga ráamona comue raa jino úana onode. Iemo jáíruido jácara raa mei íadi nai ñuera raa, jino úana onode. Afe izói afe ñue llófuefiredimie nana ie onógafuiaimona cue cómfue naa jaiái lloga jácafue diga jino llúana onode, —daide.

Jesús Nazaret jófuego jaide

(Mr 6.1-6; Lc 4.16-30)

⁵³ Jesús nana bie jino ñue onótatifuiaí llua méifomo dama ie éniemo jaide.

⁵⁴ Dúcizaillano afénomo ite Juzíñamui uai llorácomo llófue. Aferi comíni caimare fáigacaidiaioi. Daidiaioi:

—Bímie ¿ninómoma diga ráfuiaina onode? Bie cíorainina raa ¿nie izói finode?

⁵⁵ Bímie baie rabícaimmo tájifiredimie jító. Ie ei María. Daje izói afémie ámatiaí Santiago, José, Simón, Judas benomo cairi ite.

⁵⁶ Daje izói ie miríngotiaí cai cígimo itíaioi. ¿Mei ninómoma nana bífuena onode? —daidiaioi.

⁵⁷ Iemona afémie llógamo náfueacañediaioi. Mei jira Jesús íaioina daide:

—Nana jáíimaciaí Juzíñamui uai llóraimana jíeruitiaioi, mei íadi dama ie comuállano comíni íena jámairuitiaioi, daje izói naa ie jofo ero comíniri, —daide.

⁵⁸ Ie jira afénomo cíorainina raana aillo finóñede, mei afémaci afémiemo íinoñediaioiza.

14

Juan Bautista tiilla

(Mr 6.14-29; Lc 9.7-9)

¹ Aféruillaído Galilea énie ocuídillaíma Herodes, Jesús jalléimana fidide.

² Fídiano ie diga itínona daide:

—Bímie tíllamona meine abido cáadimie Juan Bautista. Iemona afémiemo cíorainina raa finolle ríino ite, —daide.

³ Mei jaiái nano Herodes Juaana maitá llavéracomo uitátate. Mei nauí Herodes ie ama Felipe aí Herodías dainango aina ote. Ua mei, Juan Heródesna riire lletádeza. Ie lleta jira iena llavétate.

⁴ Juan daina uai be ñie:

—O bie ringo o aí izói uícaínidío, —daide.

⁵ Daií daina jira Herodes Juaana fáiacade. Mei íadí comínina jacíruite, mei “Afe Juan Juziñamui dibénedo úrifiredeza,” daidíaiói.

⁶ Afe méifodo, Herodes ie jocóinamona jíáie fimona fuilláruimo dúcide. Aféruído ie cumpleaños rafue finua llezica, iráizillena llogano eróicana Herodías jiza bai zaizájide. Afengo záillana Herodes iere ebíruite.

⁷ Afena iere gáinamona Herodes riírede uaido daide:

—Ninó o jicáacanana rairuñeno íredicue, —daide.

⁸ Iemona afengo ei uícodo llua izói Heródena daide:

—Juan Bautista ifoci plátomo jóoneta cuemo ati, —daide.

⁹ Aferi ocuídillaíma Herodes zúucaide. Mei íadí uícodo riírede uaido dainana nana iráizillena llogano cacadíaiói. Jira jíáfodo méidoñeno nano fueñe ie daina izói ocuide.

¹⁰ Iemona llavéracomo llaveca Juan ifócina jaitátate.

¹¹ Afe mei jáitano plátomo jóoniano aféngomo izájidiaíoi. Afe méifodo afengo afe ifócina ie eimo ite, afengo Juan ua tíllana onóillena.

¹² Afe mei afe Juan diga jáicadino uillano ie abi raíajidiaíoi. Afe mei Jesumo llúajidiaíoi.

*Jesús cinco mil comini ecade
(Mr 6.30-44; Lc 9.10-17; Jn 6.1-14)*

¹³ Jesús Juan fáajana fidíillano dama ruica táinomo nocaedo jaide. Mei íadí comini ie jáillana fidíillano naga jófuiaimona ie illánomo arido jáidiaíoi.

¹⁴ Iemo Jesús afe nocáemona arí jailla llezica, diga comini ofillana ciode. Cíoillano íaioimo dúecaide. Afémiemo atica iráredinuiaína jíllotote.

¹⁵ Ja nauízaiilla llezica ie llófuegamaci afémiena daízaibitiaíoi:

—Ja nauide. Benomo buna íñede. Nana comínina mai jófueмо oreri, afe áinori ite dúegobiaímo íaíoi güille íaíoi íbajillena, —daidíaiói.

¹⁶ Jira Jesús afemacina daide:

—Afémaci nai jáinidiaíoi. Afémaci dani omoi eca, —daide.

¹⁷ Jira afémaci uai otíaíoi:

—Cinco diga páaniai, íemo mena chamu afe baimo jíáiena caimo íñede, —daidíaiói.

¹⁸ Jira Jesús íaioína daide:

—Mai áfena cuemo ati, —daide.

¹⁹ Afe mei nana comínina daide: “Ráitiai emódomo ana omoi ráii,” daide. Afe llezica Jesús cinco diga páaniai mena chamu diga líñnota, monamo érocaillano Juziñamuina “Figora” daide. Daií daina méifodo Jesús afe pan ditada ie llófuegamacimo ite, afémaci nana comínimo fecállena.

²⁰ Afe güillano nana comini ñue jeírediaíoi. Iaíoi güilla mei, güiga állana ie llófuegamaci doce cirigai oruítatiaíoi.

²¹ Afe güitino cinco mil diga íñiaí. Iemo afe baimo ringóniaí naa úruiaíri fácadoñega.

*Jesús jainoi emódodo macade**(Mr 6.45-52; Jn 6.16-21)*

²² Afe mei Jesús ie llófuegamacina daide: “Mai ifódino ruica enéferaimo nocaedo omoi jairi. Afe llezica bie comini ráinoiticueza,” daide.

²³ Comini ráinua mei Jesús caifónedumo dama Juzíñamuimo úrizaide. Nauízailla llezica Jesús afénomo dama ite.

²⁴ Afe llezica íaioi jailla nocáe bai dáaferaimo ite. Mei íadi jorai bagua meine íaioina ñuitáñuitade. Afe llezica jairifo meine íaioina fúuoidé.

²⁵ Como monáioicaidemo Jesús jainoi emódodo afémaci diné macácana jaide.

²⁶ Afe jainoi emódodo jáillana cíollano, caillíoidiaioi. “Janaba billa,” dainano iere jacínaitiaioi.

²⁷ Mei íadi Jesús íaioina daide:

—Cueza, jacínaiñeno omoi iri. Abí omoi mame, —daide.

²⁸ Jira Pedro afémiena daide:

—Ocuíraima, mei ónia, o illánomo mai jainoi emódodo cue mácata, —daide.

²⁹ Jira Jesús íena daide:

—Mai mei bi, —daide.

Iemona Pedro nocáemona ana jaillano jainoi emódodo Jesús diné macácana jaide.

³⁰ Mei íadi jairifo riire jáiñua cacáillano abi jácidote. Afe llezica afémie ja anábaiacade. Anábaiocaila llezica afémie caillide:

—¡Ocuíraima, íñédicueza, cue llíino! —daide.

³¹ Daí daina llezica, Jesús ónoído llínota daide:

—Ñi o due ínua! ¿Ñibái mei o ínogafuena fáicanocaidio? —daide.

³² Nocaemo caifo íaillinoi jailla llezica, afe jairifo llícaide.

³³ Iemona afécaemo itino, Jesús anamo dújuillano íena daide:

—Uáfuenta, Juzíñamui Jitódioza, —daidíaioi.

*Jesús Genesaret éniemo ite iráredino jílolate**(Mr 6.53-56)*

³⁴ Jorai ruica jáitajano Genesaret éniemo dúcidiaioi. (Afe énie jíáfodo mameina Galilea.)

³⁵ Iemo afeno comini ñue afémiena onónamona, nana afénomo itígobiaimo conímana fidítatiaioi. Afemona afénomo ite iráredinuiaina Jesumo atídíaioi.

³⁶ Daa afémie inícuero fueda jetánollena izire jicádíaioi. Iemona nana ie inícuero fueda jetádino jíllodiaioi.

15*Cómena íaire fínoda raa**(Mr 7.1-23)*

¹ Afe mei dáarie Jerusalémona bite fariséuai naa ocuica uai llófuefiredinori Jesumo jicánuaibítiaioi:

² —¿Ñibái mei o llófuegamaci cai uzútaí daina uaina oni caitáfirediaioi? Mei afémaci fiénidifue múiñua jana, nai güiñena llezica onoi jócuana finóñediaioiza, —daidíaioi.

³ Mei afe íbana Jesús íaioimo jicánote:

—¿Mei ñibái omoi Juzíñamui riire ocuica uai oni caitáfirediomoí dani omoi jaiái daina uaimo náfuellena?

4 Mei Juzíñamui caina daide: “O moo o ei diga caimare omoi uícairi. Dámie ie moona ie ei diga íaire dáia, afémie títeza,” daide.

5 Mei jíáfodo daífirediomoí. Dámie ie moona ie ei diga bie izói daífrena daífirediomoí: “Moo, ona canónidicue, mei nana cuemo ite raa Juzíñamui mo fecállena cue mamécaza.”

6 Iemo ninó dáamie daí dáiaí, ie moo ie ei diga canolle afémiemo dúñede, daí daífirediomoí. Daí omoi dánamona Juzíñamui ocuica uai jámairuitadiomoí, daní omoi jaiaí daína uáillaimo náfuellena.

7 ¡Comeci diné ráatailla mei, abina ñue cíoidinodiomoí! Jaiaí Juzíñamui uai llóraima Isaiás ie ciegánicomo omoi dibénedo uáfodo úrite. Be afe uai:

8 Bie cominí fia fueo cuemo ñúefue mamédiaioí, mei íadi íaioí comeци diné íáiredeza, cuemo jaináñede.

9 Diga ebírede ráfuiaido cuemo caimátaidiaioí íadi, afe caimátailla ráifiñede, mei afémaci jíámaci llófuia jamaí come ocuica uáillaiza.

Isaiás Juzíñamui daínauai bie izói cuete.

10 Afe mei cominí uáidota Jesús íaioína daide:

—Cacáillano ñue omoi onóiri.

11 Come fueo jofo jaide raa afémiena íáiretañede. Mei jíáfodo come fuémona bite uai, afémiena íáiretate, —daide.

12 Afe jira ie llófuegamaci Jesuna daízaibitiaioí:

—¿Meita onódioza, o daina uáillaina cacáillano fariséuai íciritiaioí? — daidiaioí.

13 Mei íadi Jesús jíáfodo uai ote:

—Naga Juzíñamui uáfueña jaináñedimie monamo ite cue Moo ríñega raa izóidiaioí. Afémaci come gáñega riga raa naa jáinaori aiñólle izói táinocaitalliaioí.

14 Afe baie fariséuai dama daítadiaioíza; áfemo lloñeno. Mei afémaci uínidino izóidino. Iemo afe llezica jíáie uínidino ífódiaioí. Uínidimie jíáie uínidimie ífóadi, nágaillinoí dáafomo báítiaillinoí, —daide.

15 Jira Pedro Jesuna daide:

—Bie uai jino caimo féinino llone, —daide.

16 Jira Jesús jíánote:

—¿Omoi jíái nai onóñediomoí?

17 ¿Onóñediomoíza, fueo jofo jaide raa jébegeoimo jaide; afe mei abímona jino faiga?

18 Mei íadi come fuémona jino bite uailai ana comécimona comuide. Afe bie uailai dama afémiena íáiruitade.

19 Mei diga íaifuiai come comécimona comuide. Fieni comeци fácafuiai comuide. Daje izói daje comécimona jíáima fáiacanafuai comuide. Iemo jíáima ai diga íacanafue come comécimona comuide, naa jíáie iere jíruírenafuaiari. Iemo jíái merírillafuiai come comécimona comuide. Daje izói táinona úrilla uailai, naa jíáimana íaire daínauailairi come comécimona comuide.

20 Afe bífuiai cómena iere íáiruitanona orede. Mei íadi fiénidifue múiñua jana onóí jócuana finóñeno dáamie güíadi, áfena cómena íaífueredimiena oréñede, —daide.

Jicánemaci ringo Jesuna ínote

(Mr 7.24-30)

21 Afénomona Jesús oni jíáie éniemo jaide. Afénomo Tiro jofue Sidón jofue diga ite.

22 Afénomo Canaán énie ingo Jesús diné caillícana bite:

—Cai ocuífiredede jaiai illaïma David comuítagamie, cuemo dúecai. Cue jiza fiénide joríaï uícaigaza, iere duere zefuide, —daide.

23 Mei íadi Jesús aféngona ñie izói daíñede. Mei jira ie llófuegamaci íemo izire jícaibitiaoï:

—Mai ie uai fáirio, mei cai méifodo duere caillícana bíteza, —daidíaoï.

24 Jira Jesús daide:

—Juzíñamui dani Israel náiraimona oni féiraité ovejai izóidino mameda cuena orede, mei afémaci Juzíñamui lloga uaillai jeire oñédiaoïza, —daide.

25 Mei íadi afengo Jesús diné billano afémie anamo dújude. Dújuillano afémiemo jicade:

—¡Ocuíraïma, mai cue cano! —daide.

26 Jira Jesús aféngona daide:

—Uruiai izoide Judíuai ónoïmona pan bairoda jicóniai izoide jicánemacimo illa fiénide, —daide.

27 Mei afengo jaca nai daide:

—Cai Ocuíraïma, jíi uáfueza, mei íadi jicóniai naama güigamona ana baiide íruaina güífirediaoï, —daide.

28 Mei jira Jesús aféngona daide:

—O ico iere íinotioza. Cuemo o jícaze, daí íteza, —daide.

Daí daina llezica afengo jiza jíllode.

Jesús aillo iráredinuai jíllotate

29 Afénomona Jesús oni jaillano Galilea jorai fuédado jaide. Afe mei caifónedu ícoïmo ráiizaide.

30 Iemo afémie illánomo aillo comini gairilla. Afe jáidino diga jíáiforie iráredino uitíaoï. Afémiemo ídaïnídino atídiaoï, íemo uínidinuai, íemo uáïnídino, íemo ónoïnidinuai, íemo diga jíáie iráredino afémiemo atídiaoï. Dieze átiano Jesús anamo jóonetiaoï. Iemona afémie nana afémacina jíllotate.

31 Afe afémie fínuari comini caïmare fáigacaidiaoï, mei eróidiaoïmo uáïnídino úritiaoïza. Iemo ónoïnídino ñue jíllodiaoïza. Iemo ídaïnídino ñue macáidiaoïza. Iemo uínídino ñue cióidiaoïza. Iemona Israel nairai Juzíñamuïmo ñúefue nitáidiaoï.

Jesús cuatro mil dígade comini ecade

(Mr 8.1-10)

32 Afe llezica Jesús ie llófuegamaci uáiduano daide:

—Bie comínimo dúecaidicue. Ja daruíamani benó cue diga itíaoïza. Iemo íaoï güíllena ja íñede. Afémacina íaoï jofomo ecáñeno oréacañedicue, io anamo íaoï zafénaiza daí, —daide.

33 Iemo ie llófuegamaci íena daidíaoï:

—Mei benomo comini jofue íñédeza, bie aillo comini ecállena ¿ninómona óitícai? —daidíaoï.

34 Jira Jesús afémacimo jicánote:

—¿Omoïmo ñiga páaniai ite? —daide.

Jira afémaci daidíaoï:

—Siete diga pan ite íemo due chámuna ite, —daidíaoï.

35 Afe mei nana comínina: “Ana omoï rái,” daide.

³⁶ Daií daina méifomo siete dígade panes naa chamu díga llínota, Juziñamuina “Iere figura” daide. Afe mei ditada, ie llófuegamacimo ite, afémaci nana comínido fecállena.

³⁷ Afena nana güitíaiói. Iaiói güilla mei nana ñue jeírediaíói. Afe mei íaiói güiga állana siete díga cirigai oruitatíaiói.

³⁸ Afe güitino cuatro mil dígadímaci. Afe baimo ringóniaí naa úruiaíri fácañoega.

³⁹ Afe mei Jesús afe gairide comini rainode. Ráinua mei ana nocaemo jaillano oni Magdala éniemo jaide.

16

*Fariséuai naa saducéuai díga ciórainina raa finóllena jicádíaiói
(Mr 8.11-13; Lc 12.54-56)*

¹ Fariséuai naa saducéuai díga Jesumo erózaidiaíói. Iemo afémie fiendi facátallena monámona comuide ciórainina raana finótaacadiaíói.

² Mei íadi afe llezica afémie jíáifodo uai ote:

—Nauíacana llezica mona jíairenia uire jiti ñue mónaite daiífrediomi.

³ Iemo jítiramo dibénemo mona jíáire nairíadi, bie mona fiénite, daiífrediomi. ¡Comeci íairena mei, jino abi diné ñue cíoidinodiomi! Uire jítiramo ñue mona monaille lloste raana ñue onódiomi. Mei íadi birui omoi cígimo cue finoca onótatífuiaina onóñediomi.

⁴ Biruido ite íinoñede fiénidino ciórainina raana finóllena jicáfirediaíói. Mei íadi naui Juziñamui uai llórama Jonásmo zúidífue íaiói onótatífue. Afefue baimo jíáifuena llóñeilliaíói, —daide.

Daií daina mei, afémacina fáicanocaillano Jesús oni jíáinomo jaide.

*Fariséuai taino llófirenafue levadura daina pan aillo fáitate raa izoide
(Mr 8.14-21)*

⁵ Jesús llófuegamaci jorai ruícafenemo jailla llezica, pan féideza uinédiaíói.

⁶ Afe mei Jesús íaíoína daide:

—Ero, fariséuai naa saducéuaimo ite levadura daina pan aillo fáitate raa izóidemona abí omoi rairuiri, —daide.

⁷ Mei jira llófuegamaci dani conímana daidíaiói:

—Ñibai pan cai atíñena jira afémie daií daide, —daidíaiói.

⁸ Jesús áfena comécido onóillano daide:

—¿Ñibái mei páanidicai daidíomi? ¡Omoi ico nai figo íinoñediomi!

⁹ ¿Naui cinco páaniaí ditada cinco mil comini cue écamo jaca uíbicañediomi? ¿Nai áfena ñue onóñediomi? Aféruido fiébidinona ¿niga cirigai oruitatíomi?

¹⁰ Iemo daje izói siete dígade páaniaí cuatro mil comínimo cue feca mei ¿niga cirigai fiébidinona iráidiomi? ¿Afemo jíái daje izói uíbicañediomi?

¹¹ ¿Minícamo jizídiomi levadúrado cue úrillana nai onóñena? Naui fariséuai, naa saducéuaimo ite levadúramona abí omoi rairuiri cue daina uaina jamai paando úriñedicue; jíáífue lloticue.

¹² Afemona ie llófuegamaci ie dáinana ñue onódiaíói. Pan aillo fáitate levadúramona abi rairuillana lloñeídeza. Mei jíáifodo fariséuai naa saducéuai jino lloga taino llófuiamona abí rairuíreídeza.

Pedro Jesús Crístona jino jaícina llote

(Mr 8.27-30; Lc 9.18-21)

¹³ Afe mei Filipomo dúide Cesarea éniemo Jesús dúcina llezica, ie llófuegamacimo jicánote:

—Cue Nanoide Hima Jitódicueza. Afe dibénena ¿niie izói comini daidíaioi? —daide.

¹⁴ Jira afémaci daidíaioi:

—Dáamierie “Bie Juan Bautista” daidíaioi, jáimaci “Bie Elías” daidíaioi, íemo nai jáimaci “Nibai Jeremías, nibai jáie Juzíñamui uai llóraima,” —daidíaioi.

¹⁵ Mei jira Jesús daide:

—Omoi ¿mei niie izói cuena daidíomoi? —daide.

¹⁶ Jira Simón Pedro uai ote:

—Juzíñamui nizeca Cristo daínámiedio. Daje izói caade Juzíñamui Jitódio, —daide.

¹⁷ Jira Jesús afémie uai ote:

—Jonás jitó Simón, o iere ióbidio. Mei ailli o daina uai cómemona omo llónegaza. Mei jáífodo monamo ite cue Moo Juzíñamui omo lloga.

¹⁸ Ona Pédrodio daíticue. Mei jae cuena o daina uai riírede oni dotánide nofici izóideza. Iemona afe bie riírede nofici izóide uáitanide dánamo cuemo ñnotinona comuítaiticue. Iemona titáfiredre riino cuemo ñnotinona anáfenoteite.

¹⁹ Iemo jái monamo ite Juzíñamui illáimana illano naze zuitáfiredre llave izoide raa omo íticue. Iemona biniemo o rairuícafueña, daje izói monamo ráiruiteza. Afe izói biniemo o ráiruínegafueña monamo ráiruíñelle, —dinori Jesús daide.

²⁰ Afe mei Jesús ie llófuegamacina Crístona ie íllana bumó jino llotáñede.

Jesús ie tñille llote

(Mr 8.31-9.1; Lc 9.22-27)

²¹ Aféruimona Jesús Jerusalemo ie jáizaillena ie llófuegamacimo jino uáfodo llote. Iaioina daide: “Jerusalemo cue dúcille mei ocuífiredre éicomini, naa lletáiraini illáiniri, íemo jái ocuica uai llófuefiredinori nana iere cuena duere fñoitíaioi. Omoimo llotícueza cuena titaitíaioi, mei íadi daruíamani íllemona meine abido cáadimiena íticue,” daide.

²² Afe jira Pedro Jesús bai uillano iena lletade. Daide:

—Ocuíraima cacai, Juzíñamui afe izói gáñede. ¡Aféfuiai jaca omo zúñeitezal —daide.

²³ Mei jira Jesús oni gírecaillano afémiena daide:

—Satanás uícaigoaza. Cúemona oni jai; cue llótáidotioza. Juzíñamui comeci faca izói o comécina facáñedio. Jamai come comeci faca izói o comécina facáido, —daide.

²⁴ Afe jira Jesús ie llófuegamacina daide:

—Ninó dáamie cuedo jáiacania dama ie comeci jitáíllana féitaredre. Féitano cuedo jáirede. Afémie cuedo jailla ícoinia tíidena, afémie áfena izire ónide.

²⁵ Mei ninó dáamie ie cáananona rairuíacadimie áfena táinomo fáífitáite. Mei jáífodo cue ícoinia ie cáananona táinomo fáífitímie afe fáífidena abido máíñoite, jaca ninomo zíñona ie íllena.

²⁶ Mei daa come nana binié ráaniai aillo náamataadi, íemo afe llezica dama ie comeci afémie táinocaitiadi, nana ie maíñoica ráaniai afémiena jíllotañeite. Mei daa come ie comécina ¿nieze íbarede?

27 Mei uáfueza, Nanoide fima Jitódicueza. Cue Momo ite ebíredinuaii naa ie abi imáciri uire bíiticue. Iemona illa dígamie íaiói finócaza fécaiticue.

28 Uáfueña ómoina dáititue, benó cue diga itínomona dáarie nai tíñeitiaíomimo illáimana cue bíllana cíotiaíoi, —daide.

17

Jesús abi jíáifo méidoficaide
(Mr 9.2-13; Lc 9.28-36)

1 Seis dígarui jailla mei, Jesús Pedro, Santiago, Juan diga uite. Dígamie dani eneno iere caifónedumo uite.

2 Afénomo íaiói eróicana ie abi jíáifo méidoficaide. Ie uíeco jitoma izói queníreficaide. Daje llezica ie inícuiro jamánomo úzereficaide. Luz egáifua izói úzere.

3 Afe llezica, Moisés, Elías, Jesús diga úrillana cíodiaíoi.

4 Jira Pedro Jesuna daide:

—Cai Ocuíraima, nii cai benó caimare cai illa. O jitáiaíi daámani jofóchupi benó cai nilli; daa óochupi, jíáie Moisés ie, íemo jíáie Elías ichupi, —daí daide.

5 Daí Pedro úrioina llezica, iere quenírede mona ero uíllie, íaiói ferínocaide. Afe uílliemona da uai cácaide. Afe uai daide:

—Bie iere cue izíruiга Jitó. Afémiemo omoi cacáreiri, —daide.

6 Afe uaina cacáillano ie llófuegamaci éniemo fueco diné bíjicaidiaíoi. Afémaci iere jacínaitiaíoi.

7 Afe méifomo Jesús íaioina jetánota daide:

—Jacíruiñeno caifo omoi náidacai, —daide.

8 Afemona érocaidiaíomimo, ja buna cíóñena. Dama Jesús cíodiaíoi.

9 Afe íduaimona fei íaiói billa llezica, Jesús afémaci ocuide:

—Bie omoi ciona rafue bummo lloñeno iri. Nanoide fima Jitódicueza, tíllamona nai meine abido cue cáñeille dinó lloñeno omoi iri, —daide.

10 Iemona ie llófuegamaci Jesumo jícánotiaíoi:

—¿Níbái mei ocuilla uai llófueraini Elías raire uícode bírena, daíífrediaíoi? —jícánotiaíoi.

11 Jira Jesús uai ote:

—Uáfueña Elías fueñe bille. Billano naga ráaniaina ñue fínoite.

12 Mei íadi: “Elías ja bite” ómoina daidicue. Mei bimaci afémiena onóñediaíoi. Afémiena onóñenamona afémaci comeci óiacana izói afémiena finódiaíoi. Iemo birui Nanoide fima Jitódicueza, afe izói cuena duere zefuítaitiaíoi, —daide.

13 Iemona ie llófuegamaci, Jesús Juan Bautístado íaioimimo úrite, comécido daidiaíoi.

Jesús fiénide jóríai uícaiga jitócomena jíllotate
(Mr 9.14-29; Lc 9.37-43)

14 Idumona ana comini illánomo bitiaíomimo, dámie Jesús anamo dújuzaibite. Dújuzaibillano daide:

15 —Cai Ocuíraima, mai cue jitomo dúecai. Fiénide jóríai íena naíllitafirede. Aferi afémie iere duere zefuide. Afémie diga ícaíño iraimo baíífirede; jíáiruido illemo baíífirede.

16 Benomo o llófuegamacimo cue atica, mei íadi afémaci afémiena jíllotanidiaíoi, —daide.

17 Jira Jesús uai ote:

—¡Aiii! ¡Nñena jamánomo ñnofinidiomoi! Ñúefuena jámairuitiomoi. Omoi ñue cue rairuillena, ¿ñie dinó omoi cígimo íredicue? Afe jitócome cuemo ati, —daide.

¹⁸ Atia mei, Jesús afémiemo ite fiénide jóríai izire rairuide. Rairuillano jino orede. Afe daí daina llezica, afe jitócome jíllobicaide.

¹⁹ Afe mei Jesús llófuegamaci bai eneno Jesús diga úrite; jicánotiaioi:

—¿Mei nibái cai afe fiénide jóríai orénidicaí? —daidiaioi.

²⁰ Jira Jesús íaioina daide:

—Omoi nai figo ñnoñediomoiza, afe fiénide jóríai nai jino orénidiomoiza. Uáfueña ómoína dáitícue, ua due omoi ñnoiadi iere Juárezifuena finórediomoi. Omoi ñnogafue mostaza iji jamánomo dúena izoide íadi, áfedo iere Juárezifuena ñnoitiomoi. Bie áillue caifóneduna “Oni jai” o daíadi, afedu oni jíainomo jáite. Uáfueña omoi ñnoiadi, jánaideza finónide raa ómoimo ññeite.

²¹ Mei íadi bie izoide fiénide jóríai dama cai güíllena güíñeno fímairillado íemo jíai Juzíñamuimo cai úrillado jino orérede.

Jesús nane ie talle dánomo jino llote

(Mr 9.30-32; Lc 9.43-45)

²² Galilea éniedo íaioi macácailla llezica, Jesús ie llófuegamacimo ie táillifuena íaioimo llote; daide:

—Nanoide fima Jitódicueza, nairai duere finóllena uillícue.

²³ Afe mei cuena títaitaioi. Mei íadi daruíamani íllamona meine abido cáadimiena íitícue, —daide. Aféfuena cacáillano iere zúucaidiaioi.

Juzíñamuimo gairíracomo dúide úcube Jesús ibade

²⁴ Jesús naa ie llófuegamaciri Capernaum jófuemo dúcidiaioi. Dúcina llezica, Juzíñamuimo gairíracomo dúide úcube jicáfiredino Pédro mo jicánuaidiaioi:

—¿Omoi llófueraíma afe raiñoca úcubena íbaiñete? —jicánotiaioi.

²⁵ Jira Pedro:

—Jíi, íbaite, —daide. Afe mei Pedro jofo jailla llezica, Jesús fueñe Pédrona daide:

—Simón, ¿ómona ññie izoíi cóide? Bínie illaini ¿ññie comínimo úcube jicáfirediaioi? ¿Meita dani ie comínimo? ¿Mei jíaífodo jicánemacimo? ¿Ññie comínimo? —daide.

²⁶ Jira Pedro:

—Jicánemacimo, —daide.

Iemo Jesús íena daide:

—Ie jira dani ie comíni íbánidiaioi. Iemona afe ailli omo íaioi jicaca raiñoca úcube íbánidicue, ¿ero ua? Jíi, íbánidicue.

²⁷ Mei íadi bu cai íciñeillena, áfena íbaitícue. Ie jira jóraimo jaillano fácuai. Fueñe riáibite chamu o oíri. Otá ie fue eromo daa úcubetuni báitioza. Afe úcubetuni cócomo jicaca úcube záitaiteza. Afétuni uano afémacimo o ibari, —daide.

18

¿Ññie come iere jamánomoina?

(Mr 9.33-37; Lc 9.46-48)

¹ Aféruido ie llófuegamaci dánomo gairíllano Jesumo jicánotiaioi:

—Monamo ite Juzíñamui illáimana illáruimo ¿ñie come iere jamánomoina? —daídaíoi.

² Afemona Jesús daa júza uáiduano íaioi cígiri naidánete.

³ Daíí ñiano daide:

—Uáfueña ómoina daidícue, omoi illafue jamai comécina mánairede úrue illa izói méidorediomoí. Afe izói omoi íñenia jaca monamo ite Juzíñamui illáimana illánomo jofó jáíñeitiomoí.

⁴ Mei íadi bie úrue izoide dama ie abi jacire maméñedimie monamo ite Juzíñamui illáimana illáruimo jamánomoidimie. Iemo daje izói bie nífuenide úrue illáfueña dama ie illáfueña méidotimie, afémie jamánomoina.

⁵ Daa come cue mámedido bie izoide dúeza llínoiadi afémie ja dáaruido cuena llínote.

*Fiénidifuego come baiílla iere jacírede
(Mr 9.42-48; Lc 17.1-2)*

⁶ Ñie come daa bie izoide cuemo ínote dúeza fiénidifuego baiítaiadi, afémie jamánomo duere finórede. Monáillaji iere afóredinomo ie cimoi mo áillue nofici cuinada dotalle baimo ñuera.

⁷ Jáie comínina fiene finótaicaidino ¡ñi dúerena! Oni nibéfodo fiénidifuego baiítifuiái jaca ífirede; mei íadi afémie afémaci fiénidifuego baiíta ícoinia afémie ¡ñi dúerena!

⁸ Iemona, o finócafuedo oni nibéfodo fiénidifuego o baiíadi, dama o onoi jáitaja izói, afefue ínuana fáicanocairi. Daje izói ninó o jáillado fiénidifuego o baiíadi, dama o ídai jáitaja izói, afénomo jáillana fáicanocairi. Mei júbene onoi diga daje izói júbene ídai diga izói o íllana zíñona illínomo o jáiadi iere ñuera, mei íadi nágafezi diga, comini duere finólliraimo o baiíadi iere figóñede.

⁹ Daje izói minícamo o eróillamona fiénidifuego o baiíadi, dama o uíji cuerónota oni jica dota izói, áfeniáimo eróillana fáicanocairi. Mei júbene uina fíidimie zíñona illínomo o jáiadi jamánomo ñuera. Mei íadi mena ui diga comini duere finólliraimo o dotábiadi iere figóñede.

*Oveja oni féiraila izoide rafue
(Lc 15.3-7)*

¹⁰ Bie úruiaimona daaza jámaíruíñeno omoi iri. Mei ómoina daidícueza, afémacimo uíñote Juzíñamui abi imaci, monamo ite cue Moo uícomo jaca ífrediaioiza.

¹¹ Mei Nanoide íma Jitódícueza, oni nibéfodo féiraitino jíllotaibiticue.

¹² Omoimona ¿ñie izói comeci facádiomoí? Daa cómemo cien diga ovéjaiaí ía, íemo afémacimona daa oveja féiraiadi, afémie afe noventa y nueve diga ovéjaiaí íe cirínoracomo fiénocaité, afe féiraité oveja jénuaillena.

¹³ Afe féiraité oveja baiílla llezica, áferi afémie jamánomo íóbide. Ua nana jáie noventa y nueve diga féiraiñede ovéjaiaí baimo, afe baiga féiraitimieri jamánomo íóbide.

¹⁴ Afe izói monamo ite Moo Juzíñamui bie dúezaiaimona jaca daa féiraitacañede.

*Cai ámatiaimona dámie omo fiene íadi, afémiéna caimare uáidorediomoí
(Lc 17.3)*

15 O ama omo fiendi úriadi, uái daí jaillano dama afémiemo úrizairi; afémie fiendi illa afémiemo ñue lloiri. Afémie áfena náfueiadi, ja afémiena ñue cáimacaitadio. Afémie diga ñue nabáiritio.

16 Mei íadi afémie áfena náfueñiadi o uai nábitena mena come járiri. Afe mei afémiemo úrizairi, mei afémiemo nana nitácafuiá mena come nibai daámáni come uai nabáífirenado záitarede.

17 Mei íadi afémie afémacimo cácareacañenia, Juzíñamuina ínote aillo dáanomo gairídinomo lloiri. Iemo afémie afémacina nai náfueñenia mai afémie Juzíñamuimo íñoñedimiena omoi mameri. Daje izói gobierno raiñoa úcube íairede jicáfiredinona omoi jámairuia izói afémiena omoi jámairuigamienna mameri.

18 Uáfueña ómoína dáititue, bíniemo nana omoi féitañega jáímaci fiénidifuiái, daje izói monamo féitañega. Iemo jáífodo bíniemo omoi féitaga jáímaci fiénidifuiái, afe izói monamo féitaga.

19 Nane dáanomo ómoína dáititue, ómoimona ménamie bie éniemo dájena mameda Juzíñamuimo jicáadi, monamo ite cue Moo ómicoi jica izói fínoiteza.

20 Mei mena come, nibai daámáni come cue mámeçido dáanomo gairíadi, afénomo afémaci cígimo iticue, —daide.

21 Iemo Pedro Jesumo jicánote:

—Cai Ocuíraíma, cue ama cuemo fiendi ítena ¿négacaiño caimare íena uáidoredicue? ¿Meita siete dígacaiño caimare íena uáidoredicue? —daide.

22 Jira Jesús uai ote:

—Siete dígacaiño daíñedicue. Mei jáífodo jamánomo aillo dígacaiño íena caimare uáidoredio. Uafue jaca ninomo o ámana caimare uáidoredio, —daide.

Caímare uáidoiacañede táijitafiregamie izoide rafue

23 Jesús nai úrioiacide; daide:

—Íe jira monamo ite Juzíñamui illáimana illírui bíniemo ite illaíma finócafue izoide. Aféllaíma nana íe táijitafiregano íemo íbáacaga raana záitaiacade.

24 Afe záitalle táinia mei daa táijitafiregamie illáimamo atídiaoí. Afémiemo jamánomo aillo íballe íte.

25 Mei íadi afémie úcubenide. Íe jira íe ocuídímie daide: “Mai bímie, íe ai naa íe úruiaí riire ocuífirellinona fecá, cuemo dúide íe íbárega raa záitalleza,” —daide.

26 Iemona afe táijitafiregamie íe ocuífiredímie anamo dújullano íemo izire jicade: “Cue Ocuídímie, cuemo járitaño. Fíaicana nana omo íbaiticue,” daide.

27 Iemo afe ocuídímie afémiemo dúecaide. Dúecaillano afémie íbárega raa íbatañede. Afe llezica ja afémiena rairuíño macátate.

28 Mei íadi afe táijitafiregamie oni jailla llezica, jáie afémie izói táijitafiregamie baizájide. Afe táijitafiregamiemo fueñedimíemo íbállena due íte. Íe jira íe cimoi llinota íena títaite izói finode. Afe llezica daide: “Mai cuemo íbárega raa íba,” daide.

29 Iemona íe llaitádimie anamo dújullano íemo izire jicade: “Cuemo raire járitaño. Fíaicana nana omo íbaiticue,” daide.

30 Mei íadi afémie áfena náfueño llavéracomo íena llavétate, íe íbárega íbañelle dino.

³¹ Jiáie táijitagano áfena cíoillano, iere zúucaidiaioi. Iemona nana afe llezica íficaillafuena íaiOí ocuídimiemo llujáidiaioi.

³² Iemona ocuídime nanóidimiema jíiridade. Jírillano íena daide: “Iere fienu táijitafiregamiedio. Mei izire cuemo jicádiaza, nana cuemo o íbárega raana dinó fáicanocaidicue.

³³ Omo cue dúecailla izóí, daje izóí o nabaimo dúecairedio,” daide.

³⁴ Afe jira afe ocuídime iere ríicaide. Ríicaillano ie nabaimo dúecaíñedimiema riire duere finótate, nana ie íbárega íbañelle dino.

³⁵ Bie izóí dánado Jesús ie úrillana záitate. Daide:

—Hla dígamie comécido ñue ie ámana uáidoñenia monamo ite cue Moo afe izóí ómoína duere fínoite, —daide.

19

Fima ie ai dótajado Jesús lletade

(Mr 10.1-12)

¹ Jesús bie uaido úrilla méifomo Galilea éniemona jaide. Jaillano Jordán imani ruícafellemo ite Judea éniemo dúcide.

² Díga comini Jesudo jailla, íemo afénomo aillo iráredinuiaina jíllotate.

³ Afe mei fariséuaimona dámierie Jesús zanóllena facátaíbitiaioi. Afémiemo jicánotiaioi:

—¿Meita daa come ie áina fia come comeci dánamona dotárede? Afe izoide ¿meita rairuírede? —daidiaioi.

⁴ Jira Jesús uai ote:

—¿Jaiái Juzíñamui Cuegáuaina facádoñediomoi? Afénicomo bie izóí llote. Fueñe comini comuítatimie ringo iima díga finode.

⁵ Nane dánomomo daide: “Bie izóidemona dáamie ie moo ie ei díga fáicanocaite, afe ie ai díga dájena íaillinoi íllena. Iemona afe íaillinoi daade come izóí íite.”

⁶ Afemona ménañedeza, daade come izoide. Ie jira jae Juzíñamui daade come finócaza, comini oni eneno dotánide, —daide.

⁷ Mei jira jicánotiaioi:

—¿Iemo nibái mei Moisés lloga uaimo áina dotárede daide? Dótaitimie ie dotaca aimo cuegábena írena. Afébena aféngomo íllano, afémie aféngona dotárede, —daide.

⁸ Jira Jesús íaioína daide:

—Mei afe omoi comeci ínoacañenamona Moisés omoi ai dotállena rairuíñede. Mei íadi nanómoma daíí mámeñega.

⁹ Cue ómoína dáiticue, daa come ai jiruíreiñeniadi dotáadi, jiáie ringo óiadi afémie fiénide jiruífue finode. Daje izóí oni dotácango ótimie jiruífue finode, —daide.

¹⁰ Iemona ie llófuegamaci íena daidiaioi:

—Mei o lloga ringo iima nabaina jaca íadi, ua ráfueza, ¿meita áireiñeno fia cai jáicaille iere baimo ñuera? —daidiaioi.

¹¹ Jira Jesús íaioína daide:

—Nana comini bífuena ónonidiaioi. Dama Juzíñamui onótallino bífuena ónoite.

¹² Híñiaimona dámierie áina ónidiaioi. Dáarie fienu jocóinamona áina ónidiaioi. Jiámíiai cominimona finócari áina ónidiaioi. Iemo jiámíiai

Juziñamui illáimana uai llócaillena jaca áina oñédiaioi. Bie uai jeire óredimie jeire óiteza, —dinori Jesús úrite.

*Jesús úruiai ñue illena finode
(Mr 10.13-16; Lc 18.15-17)*

13 Afe mei úruiai Jesumo atídiaioi, ie onoi afézaímo bíitano afémie Juziñamuimo afémacido úrillena. Mei íadi ie llófuegamaci úruiai atídino rairuide.

14 Mei jiáifodo Jesús daide:

—Dama úruiai cue ñine bíteza; afémaci rairuíñeno omoi iri. Mei monamo ite Juziñamui illáimana illáruimo jáitino bie úruiai izóidiaioi, —daide.

15 Jesús afe úruiaimo onoi bíitano íaioina ézicite. Eziciano oni jiáigobemo jaide.

*Ráarede jitócome Jesús diga úrilla
(Mr 10.17-31; Lc 18.18-30)*

16 Iemo jiáiruido daa jitócome Jesumo úrizabite. Dúciillano íemo jicánote:

—Ñuera Llófueraima, ziiñona cue illino cue maíñóllena ¿nie ñúfue finoitice? —daide.

17 Jesús íena daide:

—¿Ñibái mei cuena ñúemiedio daidío? Dama Juziñamui ñuena. Abi ñine jiáie ñúemiena íñede. Mei jiáifodo ziiñona illínomo o jáiacania, Juziñamui cai ocuilla uai jeire o oíri, —daide.

18 Jira afe jitócome íena daide:

—¿Nee mei aféuai? —daide.

Jira Jesús afémiena daide:

—Jiáimana titáñeno iri. Jiruíreñeno iri. Meríriñeno iri. Jiáie cómemo taino lloñeno iri.

19 O moo o ei diga caimare jacíruiri. O abina o izíruilla izóí, o jiáie cómena o izíruiri, —daide.

20 Jira afe jitócome íena daide:

—Nana bífuaiña jíizananomona jeire oticue. ¿Afe baimo ñifue nai cuemo fiébilla? —daide.

21 Jira Jesús íena daide:

—Ñifuenino comécina jaícina jóidimie o íacania, mai jaillano omo ite ráaniai o fecari. Fécano afe iba úcube dúeredinodo fecari. Afemona monamo ite ziiñona ráifide raa óiena íteza. Afe nana o fecalle mei, mai cuedo bí, —daide.

22 Mei íadi afe jitócome Jesús daí dáinana cacáillano abido zuure jaide, mei afémie íere ráaredeza.

23 Iemona Jesús ie llófuegamacina daide:

—Uáfueña ómoína dáitícue, íere aillo ráaredimie mei íadi ie ráaniaina cue baimo afémie izíruiaí, íere féirede Juziñamui illáimana illíruimo jáillena.

24 Nane dánomo dáitícue, caméllona mameide áillue rille edo úfodo enéfemo jailla juánide, mei jiáifodo aillo ráaredimie Juziñamui illáimana illíruimo jaille íere juárede, mei ie ráaniai cue baimo afémie izíruiteza, —daide.

25 Ie llófuegamaci áfena cacáillano íere fáigacaidiaioi. Iemo dani jofó conímaiaimo jicánotiaioi:

—Iemona ¿ñímie jíllorede? —daidiaioi.

26 Jesús íaioimo eróicana daide:

—Comínimona bie izóidifue finónide, mei íadi Juziñamuimona nana finórede.

27 Iemona Pedro íena daide:

—Cai Ocuíraima, caimo ite raana nana fiénocaillano odo ja jáidicai. Iemona mei ¿minica máíñoiticaí? —daide.

²⁸ Jesús íaioina daide:

—Uáfueña dáititue, uire jáíruido naga ráfuiái cómfuuiaina jáite. Aféruimo Nanoide fima Jitódicueza ebírede illaíma ráírano mo ráititue. Afe llezica omoi cue díga jáicana jira, doce dígade illaíma ráírano mo ráititomoí. Afénamona doce dígade Israel náiraiái ñue jáícina jicánoititomoí.

²⁹ Iemo cue ícoínia naga jofona fiénocaidimie, daje izói ámatiai naa ie móotiaiíri fiénocaidimie, daje izói naa úruiaiíri fiénocaidimie, iemo jáí ie illano zófenocaidimie, afémaci cien dígacaiño íbálliaioí. Daje llezica afémaci ziiñoña íllínona máíñoitiaioí.

³⁰ Mei íadi birui aillo uícoficaidino aféruimo ódaficaite. Daje izói birui aillo ódaficaidino uícoficaitiaioí.

20

Jírícuremo oreca táijiraini izoide rafue

¹ Monamo ite Juzíñamui illáimana illirui jírícure naama finoca izoide. Afémie jítiramo raire ie táijiramaci jénuaide, ie jírícue óllena.

² Afémie ie táijiramaci íballena afémacimo jáícina llote: “Daarui táijina íba dieze úcube illa dígamie mo íbaititue,” daide. Daií dainano ie jacáfaimo táijillena orede.

³ Afe mei jítoma nuévemo ítemo oni gairíranomo jáíie táijitino jénuaide. Afe gairíranomo dáarie táijíñeno itino baite.

⁴ Íaioina daide: “Mai batí cue jacáfaimo táijizairi. Nauife dibénemo ómoímo ñue íbaititue,” daide. Iemo afémaci dinomo táijizaidiaioí.

⁵ Afe jacafai naama jítoma jáíciri ítemo meine nane jáíie táijitino jénuaide. Daje izói nane nauife dibénemo jénuaide.

⁶ Iemo nane ja nauízaidemo ocuídime gairíranomo jáíie táijitino jénuaide. Dinomo jáíie táijíñedino baizájide. Íaioina daide: “¿Ñibái mei omoi nágarui táijíñeno benó ífrediomoí?” daide.

⁷ Jira afémaci íena daidíaioí: “Mei bu caina táijitañede,” daidíaioí. Iemona afémie íaioina daide: “Omoi daje izói cue jacáfaimo táijizairi. Iemona ómoímo dúide dieze ñue íbaititue,” daide.

⁸ Ja nauídimo, jacafai naama táijitagano úíñotimiena daide: “Mai táijidino dáanomo uáiduano íba. Íirainomo jáidino fueñe íbari, íemo nano fueñe jáidino méifodo íbari,” daide.

⁹ Iemona nauízaicademo jáidino dúcidiaioí. Afémacimona illa dígamie ñue íaioí táijina íba llínotiaioí. Daa denario daína úcube illa dígamie llínotiaioí.

¹⁰ Afe mei nano fueñe táijizaidino ducina llezica, “Jáíimaci baímo aillo úcubena llínoiticaí,” daií comécido facádiaioí. Mei íadi nana illa dígamie dájerize daarui táijina íba dieze úcube llínotiaioí.

¹¹ Úcube llínua llezica, ocuídime mo rícaidiaioí.

¹² Iena daidíaioí: “Bie írainomo dúcidino daa hora táijidiaioí. Mei íadi daa cai o íbaze íaioina íbáido. Cai náamonaze uzíredemo táijidicai,” daidíaioí.

¹³ Mei íadi afe ocuídime íaioina daide: “Omoi cacai. Omoímo fienu íñédicue. Fueñe cai úrilla llezica ¿ómoímo dáaruina táijina íba dieze úcube

íbaiticue daifñedicue? Jii, daidicue. ¿Afe llezica áfena jieruifñediomoi? Uáfueza, jieruitiomoi.

¹⁴ O táijina iba llínota, mai jai. Bie írainomo dúcidinona daa o cue íbaze íbáacadicue.

¹⁵ ¿Meita cue úcube cue dotáacana dieze dotánidicue? ¿Meita jíaimie cue dúecaillano aillo cue fécarí úradoidio?" dinori ocuúdimie úrite.

¹⁶ Afe izói fuéñeidino óodaficaitiaioi, íemo jíái óodaidino úcificaitiaioi. Mei uafue, jíirigano aillo ite, mei íadi nizécano dúemaci, —dinori Jesús daide.

*Jesús nane dáanomo ie táille llote
(Mr 10.32-34; Lc 18.31-34)*

¹⁷ Jerusalén iodo Jesús jailla llezica, doce dígade ie llófuegamaci bai eneno uillano daide:

¹⁸ —Birui omoi ciona izói Jerusalemo jáidicai. Daje izói Nanoide íima Jitódicueza onódiomoi. Afénomo lletáriraini illaíma, naa ocuica uai llófueraíni cue titállena mámeitiaioi.

¹⁹ Mámiano onínemacimo cuena fécaítiaioi, cue íaioi jífánodoíllena. Daje izói ráziaido cuena fáítiaioi. Afe mei cuena cruzmo córaítiaioi. Mei íadi daruíamani íllemona meine abído cáadimiena jáiticue, —daide.

*Santiago Juan diga íaillinoi ei Jesús diné daa rafue jíacánuaibite
(Mr 10.35-45)*

²⁰ Afe mei Santiago Juan diga íaillinoi ei Jesuna daízaibite. “Mai cuemo dúecari,” daide. Bíaillinoi moo Zebedeo. Afengo naa afe íaillinoiri Jesús anamo dújuzaibitiaioi.

²¹ Jira afémie aféngona jícanote:

—¿Minica óiacadio? —daide.

Jira afengo daide:

—Ílláimana o illíruimo dúcille llezica, cue jító íaillinoimona dáamie o nabézimo rainari, íemo jíaimie o jarífezimo rainari, —daide.

²² Jira Jesús íaioina daide:

—Omoi cuemo jíaca raana nai figo onóñediomoi. ¿Meita duere cue zefuille izói zefuñrediomicoi? Cue duere íaioi finolle izói ¿meita ocuñrediomicoi? —daide.

Jira afe íaillinoi: —Jii, —daide.

²³ Iemona íaillinoina daide:

—Íere uáfueza. Duere cue zefuilla izói duere zéfuitiomicoi. Daje izói cue duere íaioi fínua izói afe izói duere finólliomicoi. Mei íadi cue nabezi, cue jarífezimo ómicoi ráinaille cue daíñidicue. Dama cue Moo úcodo mamécamié ráirena, —daide.

²⁴ Jáie diez dígade ie llófuegamaci afe jícanuana cacáillano, afe íaillinoimo ríicaidiaioi.

²⁵ Iemona Jesús dáanomo nana íaioi uáiduano daide:

—Onódiomoiiza náiraíai illaini íaioi úíñoganona ocuóifrediaioi. Iemo íaioimona íere ocuúíllaini afémacimo ite ríinodo íere jacire ocuúifrediaioi.

²⁶ Mei íadi omoi cígiri daí íñeite. Mei jíáfodo ómoimona jamánomoidimiena íacadimie, omoi anamo táijidimie izói írede.

²⁷ Daje izói ómoimona úcificadimie omoi riire ocuícamié izói írede.

²⁸ Afe izói Nanoide fima Jitó omoi cígimo ite. Mei jii, jiáimaci cuena canóllena biñédicue, mei jiáifodo nana comini cánuai biticue. Uafue aillo comini íaioimo ite fiénidifuiái oni dóllena tízaibiticue, —dinori Jesús úrite.

Jesús mena únidimie jllotate
(Mr 10.46-52; Lc 18.35-43)

²⁹ Jesús naa ie llófuegamaciri Jericó jófue mona jino jailla llezica, diga comini afémiedo jáidiaioi.

³⁰ Jáidiaioimo afe io abimo mena únidimie ráidiaillinoi. Ja Jesús afe íaillinoi abido jáizaillana cacádiaillinoi; cacáillano riire daidiaillinoi:

—Ocuíraima, jaiaí illaíma Davidmona comuítagamie mai cócomo dúecai, —daidiaillinoi.

³¹ Jira comini íaillinoína rairuíaiaioi. Afe íaillinoína, “Uriñeno, llícaí,” daidiaioi. Mei íadi afe íaillinoi llícaíñeno jamánomo caillíoidiaillinoi:

—Ocuíraima, jaiaí illaíma Davidmona comuítagamie, mai cócomo dúecai, —daidiaillinoi.

³² Jira Jesús mózide. Mózillano afe íaillinoi jírillano jicánote:

—¿Nie izói jitáidiomicoi afe izói ómicoi cue finóllena? —daide.

³³ Jira afe íaillinoi uai ote:

—Ocuíraima, cióacadicoco, —daidiaillinoi.

³⁴ Jira Jesús afe íaillinoimo dúecaillano, íaillinoi ui jetade. Jeta llezica ñue ciódiaillinoi. Afe mei Jesúsoiri jáidiaillinoi.

21

Jesús Jerusalem jofo jaide
(Mr 11.1-11; Lc 19.28-40; Jn 12.12-19)

¹ Ja Jerusalem ánozidiaioimo, Betfagé duera jófueмо dúcidiaioi. Afe jofue Olivo daina idu áinori ite. Afénomona Jesús ie llófuegamacimona ménamie orede.

² Oriano íaillinoína daide:

—Baie ómicoi úcomo ite duera jófueмо ómicoi jai. Afénomо cuinaca búrrana cíotiomicoi, naa ie úrue diga. Afe zuitada cuemo atiri.

³ Afénomо comini jiáifodo dáíadi, “Cai Ocuíraima jitáillano jicácaza; bie búrrana raire abido omo óreite,” daíri, —Jesús daide.

⁴ Bífuiái íficaide jaiaí Juziñamui uai llóraini cueba uai ñue ícoimo fuitállena. Afe uai daide:

⁵ Jerusalem mameide jofue comínina daíri:

“Ero, o illaíma comécina mánaidimie izói billa.

Burra emódomo ráijcabite.

Afe méereде raa abífirede burra úrue emódodo bite,” —daide.

⁶ Afe mei ie llófuega íaillinoi jaillano Jesús íaillinoi ocuilla izói finódiaillinoi.

⁷ Afe burra naa ie úrue atidiaillinoi. Atiano íaioi inícuirona afe búrrana jobédaioi. Afe mei Jesús afe emódomo ráinazaide.

⁸ Afe llezica aillo comini Jesús jáillao inícuirona jobédaioi. Jiáimaci rafóruai jáitajano íemo jobédaioi.

⁹ Dáarie Jesús úcodo jáidiaioi; jiáimaci ódana jáidiaioi. Nana daje izói riire úritiaioi:

—Jaiaí illaíma Davidmona comuítagamiemo ñúfue mai cai daíilli. Juziñamui mámecido bitímie caimare íiteza. Juziñamuimo ebíredifue cai mamelli, —daidiaioi.

¹⁰ Jesús Jerusalemo jofo jailla llezica afe jofue comini diga rafue júfidotiaioi. Diga comini afémie dibénedo jicánotiaioi:

—¿Bie bu? —daizitiaioi.

¹¹ Jira jáimaci daidiaioi:

—Bímie Galiléamo ite Nazaret jofue ímie. Afémie Jesús, Juzíñamui uai jino llóraima, —daidiaioi.

*Jesús Juzíñamuimo gairíraco ráfua izói ñue ñnode
(Mr 11.15-19; Lc 19.45-48; Jn 2.13-22)*

¹² Afe mei Jesús Juzíñamuimo gairíracomo jofo jaillano, afeco eromo ite ráaniai fecádino naa ibároidinori jino jiude. Afénomo ite úcube méidofiredino táijnabani Jesús oni cáicoide. Daje izói fíicirillai fecádino íaioi ráiracuai Jesús oni cáicoide.

¹³ Afémacina daide:

—Juzíñamui Cuegáuai daide: “Cue jofo daa cuemo úrifireracona íite.” Mei íadi bicona merírifiredino jofo izói finódiomoi, —daide.

¹⁴ Afe Juzíñamuimo gairíracomo Jesús illa llezica dáarie uínidimíai, naa ídainidino Jesumo bitíaioi. Afémie afémacina jillotae.

¹⁵ Mei íadi lletáriraini illaini, naa ocuica uai llófuetinori Jesús uaido dainamona comúdena cíoilano ríicaidiaioi. Daje izói afe gairíraco eromo ite úruiai Juzíñamuimo caimátailla uai cacáillano bimaci iere ríicaidiaioi. Mei afe úruiai daidiaioi: “Jaiai illaíma Davidmona comútagamie iere ebíredeza,” daidiaioiza.

¹⁶ Jira bimaci ríicaillano Jesuna daidiaioi:

—¿Baie úruiai úrillana cacáñedio? —daidiaioi.

Jira Jesús íaioi uai ote:

—Cacádicue. ¿Bie rafue úrilla cúeina uaina facadóñediomoi? Afe jaiai David dáina uai Juzíñamuina bie izói daide:

Úruiai ebire ñúefuena óiena jae rotátatio, —afe

daí Jesús íaioimo llote.

¹⁷ Afe mei ie jicánotinona fáicanocaillano Jesús oni Jerusalémona Betania jófuego iniaide.

*Jesús llizíñede higuera dáina amena faidode
(Mr 11.12-14, 20-26)*

¹⁸ Afe jítiramo Jesús meine Jerusalemo bítemo iere júfñaite.

¹⁹ Afe io abíri higuera dáina aménana ciode. Jesús afénomo áinozide, afena llizilla riéllena. Mei íadi llizíllajaina iñédeza, daa ie íbiaina ciode. Mei jira Jesús afe higuérana daide:

—Jaca benómona llizíñeítio, —daide.

Daí dáina llezica afe higuera dúide.

²⁰ Ie llófuegamaci áfena cíoilano fáigacaidiaioi. Iemo Jesumo jicánotiaioi:

—¿Ñie izói ite bie higuera amena raire dúilla? —daidiaioi.

²¹ Jesús íaioi uai ote:

—Uáfueña ómoina daidicue, ua o íñoiadi daa bie aménamo cue fínua izói finórediomoi, íemo jái afe baimo aillo finórediomoi. Bie caifóneduna “Caífo áijicaillano oni monáillaimo báizai” o dáíadi, afe bie caifónedu o uai jeire uano, oni dínomo baízaitae.

²² Juzíñamuimo omoi úrilla llezica, ua o íñoia nana omoi jicácana ñue llínoitiomoi, —daide.

*Illáicomini Jesús ocufirena ríino jicánotiaioi
(Mr 11.27-33; Lc 20.1-8)*

²³ Afe mei Jesús Juziñamuimo gairíracomo jofo jaide. Jaillano afénomo llófuemarite. Afe llezica lletáriraini illaini naa judíuai eicomíniri Jesumo jicánuaidiaioi:

—¿Nié ríinodo o raana finófiredio? ¿Afe ríino bu mei omo fecaca? —
daidíaiói.

²⁴ Jira Jesús íaioi uai ote:

—Cuemo omoi jicánua izóí, ómoimo daafue jicánoitícue. Cue jicánolle uai ñue omoi óadi, bie raa cue finua ríino ómoimo llóitícue.

²⁵ Mei Juan ¿bu comini báutizallena ocuica? ¿Meita Juziñamui ocuica? ¿Mei ñibai comini ocuica? —daide.

Mei íadi uai oñeno, áfena dani conímamo júfidotiaioi; daidíaiói:

—Juziñamui ocuica cai daííadi, Jesús caina daíte: “¿Ñibái mei afémiena ñnoñediomoi?”

²⁶ Mei jiáifodo, comini ocuica, cai daííadi, comínina jacíruticai; mei nana comini “Juan Juziñamui dibénedo úrifirede” daidíaióiza.

²⁷ Temona bie izóí Jesuna daidíaiói:

—O jicánoga jaca onóñedicaí, —daidíaiói.

Jira Jesús íaioina daide:

—Daje izóí bie raa cue finua ríino ómoimo llóñeiticue, —daide.

Mena jitó íaillinoi illa izoide rafue

²⁸ Daíí daina mei, Jesús íaioina daide:

—Bíena ¿nie izóí daidíomoi? Daa iima mena jitórede. Iaillinoi moo dámienna daide: “Cue jitó, mai cue jíricore illánomo táijizairi,” daide.

²⁹ Afe jitó uai ote: “Jáiacañedicue.” Mei íadi afe mei ie comeci jiáifodo fácano, afénomo táijizaide.

³⁰ Afe mei afe moo jiáie jitomo úrizaide. Daje izóí íena daide. Iemo bie jiáito íena daide: “Jíí, táijizaitícue.” Mei íadi afémie táijizaíñede.

³¹ Meita bie ménaiillinoimona ¿ñie jitó ie moo jitáinana finua? —daide.

Jira íena daidíaiói:

—Nanóidimie, —daidíaiói.

Jira Jesús íaioina daide:

—Uáfueña daítícue, gobierno jicátáfirega úcube llínotino, naa ímamo jiruífrefrede ringóniari naa jiáie afe izoide fiénidino Juziñamui illáimana illánomo raire omoi úcodo jáitiaioi.

³² Mei nauí Juan Bautista ñue omoi íllena llófuiaibite, mei íadi áfena ñnoñediomoi. Mei jiáifodo afe úcube llínoraini naa jiruédíngotíari ie dáinana ñnotiaioi. Mei íadi omoi baimaci comeci ífue méiduana ciódiomoi íadi, afémie mo ñnollena omoi comeci ítífuiaina méidoñediomoi, —daide.

*Fiénde táijinamaci izoide rafue
(Mr 12.1-12; Lc 20.9-19)*

³³ Mai bie jiáie ráfue mo omoi cácarei. Jacafai naama jíricojiai éroide úvaiai rillino finode. Finuano afeno nágafene cirínote. Cirínuano afe úvaiai zaizíllico finode. Afe llezica caifo jica tígicaco nite nana afe rigániaimo ñue rairuállena.

Afe mei afémie afécaie ie úíñotimacimo fecade, ie biñena dino. Afe dígamona íemo íbádiaioi. Daíí fécano afémie jiáie éniemo jaide.

34 Afe mei úvaiai llizille llezica, ie ocuífíregano orede, náamamo dúide dibene jicállena.

35 Mei íadi afe táijidino jacafai naama orécano llaitádiaioi. Lláitano dáamienna rázido fatíai. Jiáimienna titádiaioi, íemo jiáimienna nófienna níjidiaioi.

36 Ie mei jacafai naama nane jiáie ocuífíregano orede. Nano fueñe ória baimo orede. Mei íadi afénomo táijidino daje izói nane nana afémacina fienni finódiaioi.

37 Iirainomo afe jacafai naama ie jitó orede. “Afémiena níbai caimare náfueitiaioi,” daide.

38 Mei íadi naama jitó bíllana cíollano afe táijidino conímana daidíai: “Bímie bie énie uire máíñoitimie. Mai cai falli. Afe mei bie énie dani cáieiteza,” daidíai.

39 Afe mei afe jitó llaitádiaioi. Lláitano jacafai baimo uillano íena titádiaioi.

40 Mei jira Jesús jicánote:

—Afe jacafai naama billa llezica, afénomo táijidinona ¿níie izói níbaite? — daide.

41 Jira íena daidíai:

—Afémie afe táijitatinomo dúecaiñeno íaioina títaite. Afe mei jiáie ñue táijidinomo ie énie nano íanori fécaite, mei náamamo dúina dieze llizíllají raire afémiemo izájífíreitiaioiza, —daidíai.

42 Jira Jesús daide:

—¿Cue dibénedo Juzíñamui Cuegáuaina jaca facádoñediomo? Aféuai bie izói daide:

Jofo níraíni jámairuillano oni fádoica jiáillirai ja ñuera jiáillirai izóidena jaide.

(Bie daíacade comíni jámairuillano ruífíruigamíe ja ñuera jica jalleide illáimana jaide.)

Bie cai Moo Juzíñamui finoca.

Afefue íere caimo ebire cacaide.

43 Mei íadi ómoína dáitícue, Juzíñamui illáimana ómoimona oni bairolle. Afe mei Juzíñamuimo duide dibene ízaífíredinomo ie illáimana fécaite.

44 Iemo afe nofici daínámiemo éicitáitimie níne tibérotáite. Iemo afe nofici jiáimiemo baíadi jízefo izói afémiena fínoite, —daide.

45 Lletáriraini illáini naa fariséuairi Jesús afe izoide ráfuiái llúana cacáillano daidíai, “Afémie ico caido úrite,” daidíai.

46 Iemona afe Jesuna llaitácadiaioi, mei íadi comíniña jacíruillano llaitáñediaioi. Mei nana comíni, “Jesús Juzíñamui dibénedo úrite,” daidíai.

22

Airena llezica finoca ráfue mo mameca uai

1 Jesús nane dáanomo úrizaide. Afémie jiáífue mo mameca uaido úrizaide. Íaioina daide:

2 —Monamo ite Juzíñamui illáimana illirui bie izoide. Illáima ie jitó áirena llezica rafue finua izoide.

3 Ie ocuífíregano orede, nauí uícodo llogano jírrillena. Mei íadi afe uáidogano bíacañediaioi.

4 Ie jira afémie jiáie ocuífíregano dáanomo orede. Uáidogana bie izói daíri daide: “Íráiziñi güille ja nana ñue uédeza. Farede juráreto fatícueza. Ja nana ñue finócaza. Airena ráfue mo mai nana omoi biri.”

5 Mei íadi áfemo iráizillena llogano náfueñediaioi. Afémacimona dáamie ie jacáfaimo jáizaide. Jáimie ie ráaie oni fécajide.

6 Jáimaci illaíma oreca jírízaidino llaitádiaioi. Lláitano íaioina duere finoda titádiaioi.

7 Jira afe illaíma iere ráicaide. Ráicaillano ie úiñote fuiríraini orede, ie orécano fatino titállena; afe llezica afémaci jofue jobáillena.

8 Afe mei nane jáaie ie ocuífreganona daide: “Airenafue nana ñue finoca. Mei íadi fueñe uáidogano fiñi itíaiñoiza bínidiaioi.

9 Iemona jofue cígido macáraomo omoi jai. Afénomo nana o cíoiillimacina irázizaibiri o daíri,” daide.

10 Iemona afe ocuífregano jino macáraomo jáidiaioi. Jaillano nana íaioi ciónamacina: “Frázizaibiri,” daidiaioi. Fiénidino naa ñuemaciri nana dáanomo íaioina gairítate. Afemona irázillico ja comínina oruide.

11 Afe mei afe illaíma ie jíriganona onóillena jofo jaide. Iaioimo eroilla llezica daa áirena ráfuemo jitáfregaroi jitáoiñedimiena ciode.

12 Jira íena daide: “O áirena ráfuemo jitáfregaroina jitáñeno ¿o nie izói jofo bitio?” daide. Mei íadi afémie uai ollíuai íñede.

13 Ie jira illaíma güirábanimo tájídínona daide: “Bímie riire omoi maíri; maíano afémie jino jitífomo dotari. Afénomo afémie duere éheiteza, daje izói izírenari murímuriteza,” daí afe illaíma ocuide.

14 Iemo Jesús nai úrillano daide: Uáidogamací iere aillo ite, mei íadi eneno nizécano dúemaci, —daide.

Gobierno ibátaga úcube rafue

(Mr 12.13-17; Lc 20.20-26)

15 Iemona fariséuai Jesús úrilla uai féitaiacadiaioi. Féitajano fiénidifue afémiemo jóneacadiaioi. Afe izói finóllena dáanomo maméritiaioi.

16 Iemona afémacimo jaináidino, daje izói naa Heródesmo jaináidinori Jesuna daíllena orédiaioi:

—Llófueraíma, onódicaiza ua rafue daífiredio. Daje izói Juzíñamui diné cai jáillio uáfuea llófufiredio. Afe llezica comíni daínauaimo náfueñidíio. Iemo jino cíoidífuiaína comínimo riire jicánoñedio.

17 Ie jira o comeci daínafue jino caimo lloiri: ¿Romano jamánomoidillaíma ibátaga úcube ibádicainia ñuera? ¿Nibai fiénide? —daidiaioi.

18 Mei íadi Jesús afémaci facátamarillana onode. Jira íaioina daide:

—Comecí íáirena mei abina ñue cíoidinodíomoi. ¿Nibái mei cuena jíitaiacadiomoi?

19 Afe ibátafirega úcubetuni cuemo ácata, —daide.

Iemona daa denario daína úcubetuni atídiaioi.

20 Afena cíoiillano Jesús íaioimo jicánote:

—Afétunimo ¿bu uíeco jana illa? Iemo afétunimo ¿nie come mámece cúeina? —daide.

21 Ie uai otíaioi:

—Romano jamánomoidillaíma mámece illa, —daidiaioi.

Jira Jesús íaioina daide:

—Jamánomoidillaímamo dúide diga mai íemo fecari. Daje izói Juzíñamuimo dúide diga Juzíñamuimo fecari, —daide.

22 Afena afémaci cacáillano iere fáigacaidiaioi. Iena zóofiano oni jáidiaioi.

Tiide comini meine abido cáailena jicánotiaioi
(Mr 12.18-27; Lc 20.27-40)

²³ Aféruido saducéuaimona dáarie Jesumo úrizaidiaioi. Saducéuai: “Tiidino meine abido cáaiñeite,” daiífirediaioi. Afe daií Jesumo jicánuaibitiaioi:

²⁴ —Llófueraima, Moisés caimo cuetá fiécabemo daide: “Daa come tíia, afémie ama ie fecíngona órede, afémie úruiai ie tiide ama méifomo comuillena.”

²⁵ Mei nauí cai cigímo siete diga ámaredimíaina ite. Nanóidimie áireillano nai úruenidemo tiide. Tíillano ie méifoide ama afe fecíngo ote.

²⁶ Iemo daje izói afémieri íficaide. Afe mei nane jiáimie daango ote. Afémie mo daje izói íficaide. Daií fiébiñeno nana fuitiaioi.

²⁷ Afémaci nana tilla méifomo afengo nane tiide.

²⁸ Iemona tíidino meine abido cáailíruimo, mei siete dígamie daango óteza, ¿afe mo nie iima aina mámeite? —daidiaioi.

²⁹ Jira Jesús íaioi uai ote:

—Juzíñamui Cuegáuai naa afémie mo ite ríinori omoi onóñenamona fieni úriti omoi.

³⁰ Tiidino meine abido cáailano áinítiaioi. Daje izói jiáinomo íaioi jízaníai iníreitañeítiaioi. Mei jiáifodo monamo ite Juzíñamui abi ímaci ízoítiaioi.

³¹ Mei íadi tíidino meine abido caana dibénedo ¿afe Juzíñamui ómoímo Cuegáuaina facádoñedi omoi? Afémie bie izói daide:

³² “Dáaruido Abraham Juzíñamuidicue, naa Isaac, Jacob diga,” mei afémaci Juzíñamui illánomo cáadiaoiza. Mei uáfueza, Juzíñamui tíidino íeñede mei jiáifodo cáadino ie, —daide.

³³ Daií Jesús dánana cacáillano comini ie llófuemarillari fáigacaidiaioi.

Iere jamánomo íinorega caimo ocuina uai
(Mr 12.28-34)

³⁴ Fariséuai Jesús saducéuai llícaitajana cacáillano, dáanomo gairídiaioi.

³⁵ Afémacimona daa ocuica uai llófueraima Jesús facátaiacade. Jira íemo jicánote:

³⁶ —Llófueraima, nana ocuica uáillaímona ¿níu uai jamánomoina? —daide.

³⁷ Jira Jesús daide:

—“O Juzíñamui nana o comécido izírui, naa o joréñori, íemo o ifoci úrillado.”

³⁸ Aquíe uai nana ocuica uáillaímona jamánomoina. Afe uai raire uícodo íinorede.

³⁹ Afe méifoide uai daje izoide. Aféuai daide: “Dama o abina o izíruiilla izói, afe izói o jiáie cómena izírui.”

⁴⁰ Bie ménade ocuilla uai nana Moisés ocuilla uailíai jillaci. Daje izói Juzíñamui uai jino llóraini llócaiga uai bíemona comuide, —daide.

¿Mei bu jító Cristo?
(Mr 12.35-37; Lc 20.41-44)

⁴¹ Afe fariséuai nai dáanomo itíai oímo,

⁴² Jesús íaioímo jicánote:

—¿Cristo mo nie izói comécido daidí oímo? Afémie nano ie comuítatimie ¿mei bu? —daide.

Jira íena daidiaioi:

—Afémie Davidmona comuítagamie, —daidiaioi.

⁴³ Iemona Jesús íaioina daide:

—Mei çnie izói David, Juzíñamui Ñuera Joreño llúado afémie jítone “Cue Ocuíraima” daírede? David daí daina uai cúeina:

⁴⁴ Monamo ite cai Moo Juzíñamui cue Ocuíraimana daide:

“Bené cue nabézimo o ráiri, o éoigamací cue anáfenolle dño.”

⁴⁵ Mei David afémiena “Cue Ocuíraima” daíadi, çnie izói Cristo Davidmona comúidimiena mamérede? —daide.

⁴⁶ Daí daina uai buna ónide. Iemo aféruimona jíáie facátalle jícanua uai maméñediaoi.

23

*Jesús fariséuaimo naa ocuica uai llófuetinori íaioi fiénidifue llote
(Mr 12.38-40; Lc 11.37-54; 20.45-47)*

¹ Afe jira Jesús nana comínina naa ie llófuegamaciri daide:

² —Ocuica uai llófuefiredino naa fariséuairi Moisés ocuica uai jino llóllena mamécaiaoi.

³ Afemona afémaci llógana jeire omoi oíri. Daje izói nana afémaci ómoina daínana náfucri. Mei íadi afémaci illa izói iñeno iri. Mei comínimo íaioi úrilla izói iñediaoiza.

⁴ Afémaci comínina iere riire ocuide. Afe íaioi ocuica uaina comini finónide. Mei íadi dani afémaci afe ocuica uaina due jiza jetáacañediaoi.

⁵ Ñüemaci daíllena nana íaioi finócafuiái comini erócana taino finófirediaoi. Daje izói ñüemaci daíllena Juzíñamui uai cúeina ozócimo jítajana gáidiaoi. Afe izói afe uai jíamaci ie ónoimo maitá úcaillena gáidiaoi. Iemo jíai íaioi jítafírega árocri fuemo ite ebire cíoilena jíamaci baímo finófrédiaoi.

⁶ Iemo ráfueimo íaioi güizájíadi afémaci ñuera ráíillinuái jenófirediaoi. Daje izói Juzíñamui uai llorácomo íaioi jáiadi illaini ráíiranuái jenódiaoi.

⁷ Afe izói jino jofue cígimo ite macáraodo íaioi jáiadi, comini caímare íaioi uáiduana gáidiaoi. Daje izói “Cai Llófueraimadio” daínana gáidiaoi.

⁸ Mei íadi “Cai Llófueraimadio” daí daítañeno iri. Mei nana omoi ámatiai; íemo jíai omoi Llófueraima jaca daade; afémie Cristo.

⁹ Afe izói bie éniemo buna cue Móodio daíñeno iri. Mei omoi Moo dáadeza. Afémie monamo ite.

¹⁰ Daje izói jíamácina “O cai Illáimadio” daítañeno iri. Mei o Ocuídimie dáadeza. Afémie Cristo.

¹¹ Omoimona jamánomoidimiena jíaimana canófredimie.

¹² Mei uáfueza, jamánomo abí jacire mamédimie jamáimiena jáite. Mei jíáfodo abí iñoñeno jiba cómedicue daídime jamánomoidimiena jáite.

¹³ Ocuica uai llófuetino naa fariséuairi, comécina íáirena mei abina ñue cíoidiomoiza, jñi omoi dúerena! Mei comini jofo jáíñeillena, monamo ite Juzíñamui illáimana illano nazena íbáífrediomoí. Mei díga Juzíñamui ñue ocuicafuiái lluano, aféfuaiaina abido náfueñediomoiza, dani o illafue ñue jáícina jóíñena jira. O lloga iodo uáfueña jáíñedioza. Afe llezica afénomo jofo omoi jáiacañediomoí. Daje izói afénomo jofo jáiacadino rairuídimoí.

¹⁴ Ocuica uai llófuetino naa fariséuairi, comécina íáirena mei abina ñue cíoidiomoiza, jñi omoi dúerena! Fecíngotiai jofóniai bairófirediomoí. Afe llezica ñüemaci daíllena comini erócana Juzíñamuimo are úrifredimoí. Ie jira omoi jíamáci duere zefuille baímo duere finóllimoí.

¹⁵ Ocuica uai llófuetino naa fariséuairi, comécina íáirena mei abina ñue cíoidiomoiza, jñi omoi dúerena! Nágagobiaido jáidiomoí daa come omoi iñoga

uai dibénemo omoi itátallena. Itata mei, afe come omoi baimo fiénidimiena orédiomoi. Iemona omoi afémieoiri, comini duere finolle iraimo zíifona duere zefuállena mamécaomoi.

16 Uina cóiñede io ifódino izóidiomoi^{za}, ¡nii omoi dúerena! Comínina bie izói daiífirediomoi: “Daa come iere uafue daiállena, Juzíñamui ico mámece llínoiadi afefue ráañede. Mei íadi afémie afécomo nitaca oro mámece llínoiadi ie daina uai jeire órede,” daiíomoi.

17 ¡Abina onóñede uínidino izóidiomoi! ¿Ñie mei jamánomoina? ¿Meita afe jamai oro? Ieñedeza. Mei afe oro Juzíñamui ico jóniamona ñuera raana jáideza.

18 Nane jáífue daiífirediomoi: “Daa come iere uafue daiállena, altar daina Juzíñamui íena rille fecárabani mámece llínoiadi afefue ráañede. Mei íadi afémie afénomo fecaca raa mámece llínoiadi ie daina uai jeire órede,” daiíomoi.

19 ¡Abina onóñede uínidino izóidiomoi! ¿Ñie mei jamánomoina? ¿Meita afe fecaca rille? Ieñede. Afe Juzíñamuimo fecárabani afénomo fecaca raana ñue finode.

20 Mei jii, Juzíñamui íena rille fecárabani mámece llínotimie daa afe ibani llínoñede, mei jáífodo nana afébanimo fecaca raana llínote.

21 Daje izói Juzíñamuimo gairíraco mámece llínotimie daa afe gairíraco llínoñede, mei jáífodo afeco ite Juzíñamui mámece llínote.

22 Nane daje izói iere uafue daiállena mona mámece llínotimie, Juzíñamui illáimana ráirano mámece llínote. Daií llínua llezica Juzíñamui mámece llínote, mei afe Juzíñamui afénomo ráiideza.

23 Ocuica uai llófuetino naa fariséuairi, comécina nai íairena mei abina ñue cóidiomoi^{za}, ¡nii omoi dúerena! Nana omoi ríganiamona jamánomo jéenide rábiaina Juzíñamui íena oni jónefirediomoi. Menta daina jéenide rábiai, naa anis daina dúebiai diga, íemo jáí comino daina rábiai facádoti oni eneno jónetiomoi. Mei íadi ocuica uáimona jamánomo jítáiredifuiaina náfuñediomoi. Afe jítáirediui be ñie: come comece jáicina jóinana, íemo jáímaci dúecaifirena, íemo Juzíñamuimo ínofirena. Nai afe jáífuiai omoi zóofeña llezica, afe bífuiai raire fueñe jeire órediomoi.

24 Táino omoi llúamona uina cóiñedino io ifódino izóidiomoi. Ráañede uáillaimo iere izire nícodifirediomoi, mei íadi jamánomoide ñuera uaimo náfuñediomoi.

25 Ocuica uai llófuetino naa fariséuairi comécina nai íairena mei abina ñue cóidiomoi^{za}, ¡nii omoi dúerena! Mei jiróraco naa plato diga jinófene ñue jocódiomoi, mei íadi afe ero dinena íairede. Daje izói comini cóicana abi ñue finódiomoi, mei íadi omoi comece dine merírilla, naa jáíe comini raa báruamona ógana oruide.

26 Uina cóiñede fariseo ímie: Mai jiróraco naa plato diga ero jócuia izói omoi illafue ñue méidori. Iemona omoi comece ñuefuiaina oruíbicaite. Afemona afe jiróraco jinófene íainina izói, afe izói omoi jinófene íainiteza.

27 Ocuica uai llófuetino naa fariséuairi, comécina nai íairena mei abina ñue cóidiomoi^{za}, ¡nii omoi dúerena! Uzeredena biga ñue cóide tíidino ráillena nigaco izóidiomoi. Jinófene ebire cóide mei íadi ero dine tíidino ícuruaina oruide, nana jáífoide íáredinuii diga.

28 Omoï comeci dine afe izóidiomoi. Comini eróicana jinófenena ñue cíoidinodiomoi. Mei íadi comeci dine jáíamacina fiēni jífuefirenana oruide, íemo jáíe fiēnide uáillaina oruide.

29 Ocuica uai llófuetino naa fariséuairi, comécina nai íáirena mei abina ñue cíoidiomoi, ññi omoï dúerena! Mei jaiai Juzíñamui uai jino llóraini raiafo ebire finófrediomoi. Daje izóí jaiai ñue itino emódomo jónega noñibicina ebire finódomoi.

30 Daií finuano daiírediomoi: “Cai jáiaigima illáruillaido itícainia, afe Juzíñamui uai jino llórainina fatátañedicaí,” daiírediomoi.

31 Daií dáinado afe Juzíñamui uai jino llóraini fatino erófene igímadicaí daidiomoi, —daide. Jira Jesús afémaci diga icírillano bie izóí daina:

32 —¡Omoï jáiaigima taineca fiēnidifue ñue ícoimo omoï fuitari! —daide.

33 Jesús nai afémacimo úrite:

—¡jaióniai izóidiomoi! ¡Omoï nairai titade jaizai izoide! ¿Mei ññe izóí duere finóbile iráimona jíllóitiomoi?

34 Afe jira Juzíñamui uai llóraini, íemo iere baitáдино naa llófuefiredinori ómoimo óreiticue. Mei íadi afémacimona dámiērie titaitiomoi. Daje izóí jáíamacina córaitiomoi. Iemo jáíamacina Juzíñamui uai lloraco eromo rázido fáitiomoi. Iemo jáíamacina naga jófuiaido rácaitiomoi.

35 Daií omoï íllamona nana jaiai ññemaci titáfírena ícoiniadi ómoimo daií íficaite. Uáfueza, jaiai Abel fáinamona benomo Berequías jító Zacarías omoï faja llezica, nana afémaci ícoinia duere zéfuitiomoi. Juzíñamuimo gairíraco íemo Juzíñamuimo rille fecárabani dáafenedo afe Zacaríana fatiomoi.

36 Uáfueña ómoina dáititue, nana bie fagano ícoinia birui itino duere zéfuitiaoi.

Jerusalén jófueri Jesús eede (Lc 13.34-35)

37 Jerusalén comínimo dúecaidicue. Juzíñamui uai llórainina fáfírediaioi. Daje izóí Juzíñamui orécánona nófiēna níjidiaioi. Diga icaíño átava ie úruiai íaícona bícua izóí íaioina ríidoiacadicue. Mei íadi íaioi cue ríiduana gáíñediaioi.

38 Cacaí, Juzíñamui ómoina zóofeiteza.

39 Mei ómoina daidicue, meine abido cuena cíóñeitiomoi. “Juzíñamui mámecido bitímie ñue finóbillēza,” omoï daiílle dino cuena cíóñeitiomoi, —dino Jesús úrite.

24

Juzíñamuimo gairíraco júdaizille Jesús llote (Mr 13.1-2; Lc 21.5-6)

1 Daií daina mei Jesús Juzíñamuimo gairíracomona jino jaide. Jino jailla llezica ie llófuegamaci: “Bie ebire finoca gairíracomo éroi,” Jesuna daidíaioi.

2 Mei íadi Jesús íaioi uai ote:

—¿Bie nana cíóidiomoi? Uáfueña ómoimo llóititue. Bie niroca nófiē daa fiēbiñeno nana niné jújicaite. Afeno jofue nana niné tánoacaite, —daide.

Enie fúiacana cai onoille rafue (Mr 13.3-23; Lc 21.7-24; 17.22-24)

3 Iemona Olivo daina ídumo jáidiaioi. Afénomo Jesús ráinana mei ie llófuegamaci báinino íemo jícanotiaioi:

—O daina jofue niné táinocaillifue, ¿ñiiruído daií zúite? Afena cai llone. O meine billena cai onótaite raa, ¿nie izói eroide? Daje izói énie fúillena ¿nie izói onóiticaí? —daiíaiíoi.

⁴ Jira Jesús íaioina daide:

—Comini omoi jífueiza abí rairuri.

⁵ Mei díga comini cue mámedido billano “Cristodicue” dáitíaiíoi. Afémaci aillo comínina jífueitiaíoi.

⁶ Aillo jobáirillana fíditiíoi. Dáarie áinori cácaitiíoi, íemo jíáiena jica cácaitiíoi. Mei íadi áferi jacínaiñeno omoi iri, mei daií ífcairedeza. Mei íadi énie fuillíruíñede.

⁷ Mei jíi daa nairai jíáie nairai díga fúirite. Iemo daa énie jíáie énie comini díga jobáiritiaíoi. Afe llezica aillo náiraiai júbietaitiaíoi, íemo aillo dúicuai íite, íemo ñuizaiñgo díga ígobaiina ñúite.

⁸ Comini duere zefuüllemona nana bífuiíai como tainéinafue.

⁹ Afe llezica ómoína duere finóllena fécaitiaíoi. Duere finoda ómoína titaitiaíoi. Cue ícoína nana comini ómoína éoitiaíoi.

¹⁰ Aféruillaido aillo comini Juzíñamuimo ínuana féitaitiaíoi. Dani conímana éoitiaíoi. Daje izói conímana fállena fécaitiaíoi.

¹¹ Afe llezica taino llotino iere íite. Afémaci: “Cai bie Juzíñamui dibénedo úriticaí,” dáitíaiíoi. Afémaci aillo comínina jífuecana uite.

¹² Aféruimo díga fiénidífuíai comuállamona, aillo comini conímana izíruillana féitaitiaíoi.

¹³ Mei íadi fuitállinomo ñue nífuenino íitimie jíllóite.

¹⁴ Iemo afe bie Juzíñamui illáimana illano ñuera rafue nágagobaiído llóitiaíoi, nana náiraiíai afena onóillena. Afe mei énie fuillíruimo dúciite.

¹⁵ Jaiíai Juzíñamui uai jino llóraima Daniel, íraíruimo biite íaire fínuaiíbitímiedo úrite. Afe bíitimie díga ráaniaina táinocaitaite. Afe fieni fínuaiíbitímie Juzíñamui gairíraco eromo ite rairuírede ñúenomo jáillana o cíoadi, jica botáredíoi. Bíuai facádotímie afe uaina ñue onoiri. Onóillano abi rairuri.

¹⁶ Afemona Judea éniemo itino oni caifóneduaimo botárede.

¹⁷ Daje izói daa come ie jofu caifófebanimo íadi, ie jofu eromo ite raana jofu jaillano bairóñeno afénomona bótaiteza.

¹⁸ Daje izói jacáfaimo íitimie abído ie jofomo ite ínícuiruaina uáibiñeite.

¹⁹ Aféruillaido namócingotiaína, ¡ñií dúerena! Daje izói monoi jirode úrue llíidíngotiaína, ¡ñií dúerena!

²⁰ Nocíruillaido jino o bótañeillena, Juzíñamuimo jicari. Daje izói ocózinaillaruimo o bótañeillena o jicari.

²¹ Mei aféruimo iere aillo duere zefuillífuíai íiteza. Enie comuállanomona bené afe izóidena íñede. Iemo jíái afe méífomo afe izói íñeite.

²² Mei jíi, aféruillai Juzíñamui afe mozíñoñedenia buna jíllóite. Mei íadi ie nizécanona izíruillano, aféruillana afémie nano íanori mozíñoite.

²³ Iemona dáamie ómoína: “Be Cristo,” daiíadi, daje izói: “Cristo batí ite,” daiíadi afémieimo ínoñeno omoi iri.

²⁴ Mei Crístono abi mamede jífueridino bíteza. Daje izói afémaci: “Cai bie Juzíñamui dibénedo úriticaí,” dáitíaiíoi. Afémaci uaido dáinamona áillue comuídena fínoitiaíoi, naa fáiíacaitade ráaniairi. Afedo comínina

jífueiacadiaioi. Dama Juzíñamui nizécanona jífuefillena facátaitaioi, mei íadi jífuetañeitiaioi.

²⁵ Ja nana bífuiai uícodo ómoimo llotícueza.

²⁶ Ie jira: “Ero bai batí táizicimo Cristo ite,” afémaci daííadi afénomo jáiñeno omoi iri. Daje izói: “Ero, bico eromo Cristo ite,” daííadi afémiemo ñnoñeno omoi iri.

²⁷ Mei ameo fuiri llairilla llezica jica afáifene ícoimo cíocailla izói, afe izói cue billirui jica cíocaizaibite; Nanoide ñima Jitódicueza.

²⁸ Iemo inóniai gairízaifirenmona rille rifáillanona ñue omoi onona izói, afe izói abido cue cíocaillemona raire ómoína duere finóllena uáfuenta ónoitiomoi.

*Nanoide ñima Jitó Cristo billirui ñie izoite
(Mr 13.24-37; Lc 21.25-33; 17.26-30, 34-36)*

²⁹ Afe duere zefuillirui záailla méfomo, jitoma dúite. Daje izói fiui égaiñoñeite, íemo jáí ucúduai monámona ana cóciitiaioi. Afe llezica nana monamo itínuiai riire mozíloide ráaniai niráricaite.

³⁰ Afe mei Nanoide ñima Jitó Cristo bille jana monamo cíocaite. Afena cíóillana nana énie nairai éenaitaioi. Nanoide ñima Jitó Cristo ana bíllana cíoitiaioi. Afémie mona ero uílliedo bite, naa íemo ite riino naa ebíredino díga.

³¹ Afe mei ie abi imaci óreite, afémaci riire bainada fúullemona nana Juzíñamui eneno nizécano nágafeniamona dáanomo jíirillena. Iemona jica énie fuédaiaimona, íemo énie enéfeniaimona bíitiaioi.

³² Higuera daina aménamo mamécafuena omoi onoiri. Ie onócairo como fueñe zícua llezica, ja ñimona ánozide, daidíomoi. Daje izói afe amena rábiai jino firuilla llezica, ja ñimona ánozide daíífiredíomoi.

³³ Afe izói jitoma dúilla, íemo afémonado nana jáíe zuide raa omoi cíoiadi, íairirui ánozillana ónoitiomoi. “Ja dúciacade,” daíredíomoi.

³⁴ Uáfuenta ómoimo lloticue, bigíma nai tíñeille llezica nana bie raa jino zúite.

³⁵ Mona énie díga fuite, mei íadi cue uailai jaca fúíñeite. Cue lloga raa nana zúite.

³⁶ Mei íadi cue billirui óñoñega. Daje izói cue bille hora buna onóñena. Juzíñamui abi imaci onóñediaioi. Daje izói Juzíñamui Jitó áfena onóñede. Dama Moo Juzíñamui ónoiga.

³⁷ Noé illágimamo comini fiene illa izói, afe izói Nanoide ñima Jitó billíruimo comini daí íitiaioi.

³⁸ Aféruillaído aillo noci nai bíñena uícodo, comini Noé llogáuaimo náfueñeno daa güilla llotiaioi. Güillano jírófirediaioi. Afe llezica íaioi fiene illafue meídoñeno, áireoidiaioi, íemo íaioi jízanai ínreitaoidiaioi. Jaca daí ítiaioi abina Noé áillue nocáe eromo jaide.

³⁹ Íaioi duere zefuíllemo due jiza coméñediaioimo áillue noci íaioimo bíide; áferi coróbaizidiaioi. Nanoide ñima Jitó billirui afe izói íite.

⁴⁰ Aféruimo mena íima jacáfaimo illa llezica, afe íaillinoimona dáamie Juzíñamui ñnotimie caifo monamo uille, ie mei jáíamie fiébricaite.

⁴¹ Daje izói mena ringo trigo lláia llezica, daango caifo uiga, jáíango fiébricaite.

⁴² Caade izói abí omoi onoiri, mei cai Ocuíraima billirui óñoñegaza.

43 Mei íadi bífuenta onódiomoiza; jofu naama merízaiibitímie bíllana onóadi, afémie ie jofu rairuúllano iníñeno cáate. Daií afémie merízaiibitímie ie jofona tuíñotañeite ie raa meríllena.

44 Ie jira jica ía abí ñue omoi finori. Mei due jiza comeci fácañeitiomoimo, Nanoide íima Jitó bíteza.

*Ínofírede ocuífíregamie naa ínofínidímie diga
(Lc 12.41-48)*

45 Ínofírede ocuífíregamiemo omoi coméciiri. Afémie ñúefue baitádímie. Ie ocuídímie nana jofu ero comínina uíñotaite. Güille hóramo dúcia llezica afémie afémacina écaite.

46 Naga íe naama ocuícana ñue finófiredímie afémie billíruimo caimare ite, mei ie ocuica ñue finuana cíozaiabiteza.

47 Uáfuenta ómoina dáíticue. Afemona jofu naama nana ie jofu eromo ite ráaniaina afémiena uíñotaite.

48 Mei íadi ocuífíregamie fíenidímiena jáiadi, íemo afe llezica: “Cue ocuídímie are bíñeite,” comécido dáíiadi, afe ocuífíregamie jaca ínofínide.

49 Daií daína mei afémie jáíie ócuifíregano duere fínoite. Afe llezica afémie jífáidino diga güizájite.

50 Iemo ie ocuídímie billíruimo afémie coméciñeitemo, ie naama dúciite. Daje izói ocuífíregamie ónoñega hóramo dúciite.

51 Dúciillano afémiena jamánomo duere fínoite. Afe mei comeci diné nai íáirena mei abína ñue cíoidino iere duere zefuilla izói, afe izói afémiena duere zefuítate. Afemona afémie iere éite. Eiano izírenari murímurite, —dinori Jesús úrite.

25

Diez dígade jítáingomo mamécafue

1 Jesús nane jáífue llote:

—Monamo ite Juzíñamui illáimana illirui diez dígade jitaingo izoide. Aféngotiai iníreille ráfueño jáidiaioi. Jailla llezica íaioi mechéraiai uitíaiioi. Ríngo otímie íaioi uáidollena afénomo jáidiaioi.

2 Afénguai mona cinco dígango finóbiñeno ebena jaide. Iemo jáíie cinco dígango ñue finóbillano jáidiaioi.

3 Afe finóbiñeno ebena jáidingotiai íaioi mechéraiai fuilla mei méidolle íjina uíñédiaioi.

4 Mei jááfodo afe ñue finóbidingotiai íaioi méidolle íjina botéllado uitíaiioi jáíi íaioi mechéraiairi.

5 Mei afe ríngo otímie are bíñenamona, nana jítáingotiai ja iníacadiaioi. Iemona ua iníaidiaioi.

6 Afe mei dáiferui llezica riire uáidua uai cácaaide: “Ríngo otímie ja bíteza. Raire afémie omoi uáiduairi,” daide.

7 Afemona nana afe jítáingotiai náidacaillano íaioi mechéraiai unédiaioi.

8 Afe llezica afe cinco diga finóbiñeno ebena bitínguai, jáíie cinco diga ñue finóbidingotiaina daide: “Cai mechéraiai ja bóoñedeza. Omoimo ite eneno atica íjimona cai ine,” daidiaioi.

9 Mei íadi afe ñue finóbidingotiai finóbiñedingotiaina daide: “Omoimo fecánidicai. Mei ómoimo fecádicainia caimo fiébiñede. Afe izói ómoimo

fiébiñede. Batí fecáriracomo daní jénuaidiomoinia ñuera.” Jira aféngotiai jáidiaioi.

10 Mei íadi finóbiñedingotiai oni aceite íbajilla lezica, ringo otímie dúcide. Afe ñue finóbiñedingotiai afémie diga áirena ráfuego jofa jáidiaioi. Afe mei afémie naze ibaide.

11 Ibailla mei aceite íbajidingotiai dúcideaioi. Dúciillano daideaioi: “Ocuíraima, naze caimo tuiño,” daideaioi.

12 Mei íadi afémie jofona uai ote: “Uáfueña ómoína onóñedicue,” daide.

13 Iemo Jesús nai úrillano daide: Nanoide íma Jitó Cristo billirui ónonideza, iniñeno abí omoi rairuiri. Ie bille mona ónonideza. Daje izóí ie dúciille hora buna ónoñega, —daide.

Talenta daína ráifide úcubemo mamécáfue

14 Jesús nane jáífue llote:

—Monamo ite Juzíñamui illáimana illarui bie izoide. Daa ocuífiredimie oni jáígobemo jáiacana lezica, ie ocuífirregano uáidota íemo ite úcubemo afémacina úíñotade.

15 Ocuídímie afémacimona daa cómemo cinco mil úcubetuni fecade. Iemo jáímiemo mena mil dígatuni fecade. Iemo nane jáímiemo daa milna fecade. Afémacimona illa dígamie ie ifoci onona dieze fecade. Daí fécajano oni jáíe éniemo jaide.

16 Cinco mil dígatuni igámie, afe úcubena afémie níciduamona, afe baimo cinco mil áfemo bai nabaide.

17 Daje izóí mena mil dígatuni igámie afe baimo jáíe mena mil áfemo bai nabaide.

18 Mei íadi daa milna igámie ie ocuídímie úcubemo oni énie ifomo retáidote.

19 Afe mei, are íllamona afe ocuídímie ocuífirregamíai diné meine bite. Billano íaiói úíñoga úcubemo onóíllena afémacimono jicánote.

20 Cinco milna igámie fueñe billa. Billano afe baimo ie nabaica jáíe cinco mil ie ocuídímie izáíbite. Izájillano daide: “Cue Ocuídímie, o cuemo iga cinco milna baimo jáíe cinco milna nabáidicueza. Be o diez mil dígatuni,” daide.

21 Jira ie ocuídímie íena daide: “Cue ocuícana íere íñofiredio. Cue ñuera ocuícamiedio. Due omo cue fecácana ñue íñotio. Afemona afe baimo jáíena ona úíñotaiticue. Cue illáimana illánomo mai caimare coco jai,” daide.

22 Afe mei nane mena milna iga ocuífirregamie dúcide. Afémie daide: “Cue Ocuídímie, mena milna cue itio. Afe bai nane jáíe mena milna nabáidicue. Be o cuatro mil dígatuni,” daide.

23 Jira ie ocuídímie íena daide: “Cue ocuícana íere íñofiredio. Cue ñuera ocuícamiedio. Due omo cue fecácana ñue íñotio. Afemona afe baimo jáíena ona úíñotaiticue. Cue illáimana illánomo mai caimare coco jai,” daide.

24 Mei íadi afe mei, daa mil dígatuni iga ocuífirregamie dúciillano ie ocuídímie daide: “Cue Ocuídímie, o íere rímiénana onódicueza. O ríñeganomona jaca ófiredio. Daje izóí trigo tuiránomo táíjiñeno afénomona trigo ófiredio.

25 Ie jira ona jacíruillano o cuemo iga úcubemo éniemo cue retáidoga. Mei íadi o úcubemo meine cue atícaza. Be ñue,” daide.

26 Iemona ocuídímie íena daide: “Fíenide ocuífirregamiedio. Daje izóí ráiraierede ocuífirregamiedio. Cue rírenana onódio ía, ¿ñibái mei bie izóí itio?

Cue ríñeganomona cue óñrenana onódio. Daje izóí trigo tuiránomo táijiñeno, afénomona cue óñrenana onódio.

²⁷ Afemona cue úcubé jóneranomo fecáredio. Iemo meine cue bíllemo afe úcubena naa jiáie baimo nabáicatuni diga lliñoredicue,” daide.

²⁸ Iemona ocuúdimie afénomo itínona daide: “Bímiemo ite mil dígatuni otá, afe diez mil dígatuni ofítatimiemo ine.

²⁹ Igámie nane baimo írega. Afemona afémiemo baimo aillo íite. Mei íadi íñegamiemo due íemo ite meine baírórega.

³⁰ Iemo bie ráífiñede ocuúfíregamie jino jítifomo dota. Afénomo éeheiteza. Afe llezica izírenari murímuriteza,” daide. Daíí daide Jesús.

Nana náiraiaimo izire jicánollirui

³¹ Jesús nai úrroid: Mei Nanoide íima Jitó Crístodícueza, illáimana ana cue bille llezica, nana cue abi imáiciai diga bíticue. Billano ebire finoca illaima ráiiranomo ráiizaibiticue.

³² Nana nairai comini cue uícomo gairítalliaioi. Afe íaioi bille llezica, ovejai úíñoraíma chívuaimona ovéjaiaína oni eneno nízia izóí, afe izóí Nahí Illáimana cue íllemona nana náiraiaína oni enénorie jóoneiticue.

³³ Cue nabézimo ovejai izóidino jóoneiticue. Iemo chívuai izóidino cue jarífizimo jóoneiticue.

³⁴ Afe mei cue nabézimo itínona dáititicue: “Cue Moo ñue finócamaci, mai omoi bi. Juzíñamui énie comúftaja llezica ómoiena mameca illáimana illínomo jofo jai.

³⁵ Mei cue jufíruilla llezica, cuena ecádio. Daje izóí cue jiróacana llezica cuena jirótatio. Iemo jiáí jífocinino cue mácaja llezica cuena jofo inítatiomoi.

³⁶ Iemo cue incuíronina llezica cue itíomoi. Daje izóí cue dúicotailla llezica cuena uáidotiomoi. Daje izóí llavéramo cue illa llezica, cuena méñuaibitíomoi,” daide.

³⁷ Iemona cue nabézimo ite níñuenidino cuena dáitíiaioi: “Caí Ocuíraíma, ¿mei nñrui o jufíruillana cióillana ona ecádicai? Daje izóí ¿mei nñruído o jiróacana llezica ona jirótaticai?

³⁸ Iemo jiáí, ¿mei nñruído o jífocinino o mácaja llezica ona inítaticai? Iemo jiáí ¿nñruído o incuíronina llezica o iticai?

³⁹ Iemo jiáie ¿nñruído o dúicotailla llezica o méñuaidicai? Daje izóí llavéramo o illa llezica ¿nñruído o méñuaidicai?” daidíiaioi.

⁴⁰ Jira Illaíma cue íllamona uai óitícue: “Uáfúena ona dáitícue, nana afe bie comécina mánaide cue ámatiaímo omoi finócafuiaí, aféfuiaí ja cuemo finódiomoi,” dáitícue.

⁴¹ Afe mei cue Illáimana cue ráiirano íe jarífizimo itínona dáitícue: “Cúemona oni omoi jai. Omoi fiene faidócanodiomoíza. Comini ziiñona duere finolle iraimo omoi jai. Afe irai Taife, nana íe abi imaci diga íena finoca.

⁴² Mei cue jufíruilla llezica cuena ecáñediomoi. Cue jiróacana llezica cuena jirotáñediomoi.

⁴³ Afe izóí jífocinino cue jáicana llezica cuena jofo inítañediomoi. Cue incuíro íñena llezica cuena íñediomoi. Duico cue ua llezica, daje izóí llavéramo cue illa llezica cuena uáiduaibifinidiomoi,” daide.

⁴⁴ Jira afémaci cuena dáitíiaioi: “Caí Ocuíraíma, mei nñruí o jufíruillana ciódicai, daje izóí o jiróacanana, íemo jífocinino o macácana, íemo o incuíro

iñénana, íemo o irárenana, íemo llavéracomo o íllana, ¿mei nñuruído daíi o íllana ciódicai ía, ona canóñedicai?” daíitiaioi.

⁴⁵ Iemona afe llezica íaioina daíiticue: “Uáfueña ómoína daíiticue, bie comécina mánaide cuemo jaináidinomona dáamiemo omoi fínoñegafuíaína, aféfuiaína ja cuemo finóñediomoi,” daíiticue.

⁴⁶ Afe mei afémaci zíñona duere finolle iraimo jáitiaioi. Iemo Juzíñamui jónega comécina níffuenidino, caimare zíñona cáallinomo jáitiaioi, —dinori Jesús úrite.

26

Jesús llaitállena maméritiaioi
(Mr 14.1-2; Lc 22.1-2; Jn 11.45-53)

¹ Jesús nana bífuiaí llua méfodo, ie llófuegamacina daide:

² —Onódiomoiza benómona ménarui íllamona pascua rafue íteza. Aféruído Nanoide íima Jító Crístodicueza cruzmo coráíllena cuena fécaítiaioi, —daide.

³ Afe llezica lletáriraini íllaini, daje izói ocuica uai llófueraíni, naa judíuái eicomíniri dáanomo gairídiaioi. Lletáriraini caifóidíllaima Caifás ñúeco íbírímo gairídiaioi.

⁴ Afénomo Jesús jífuiano llaitállena maméritiaioi. Afe llezica afémie titállena maméritiaioi.

⁵ Mei íadi afémaci daidíaioi:

—Nana comíni áferi fáíllifaíllíñañeíllena, rafue ana íena lláitañeíticai, —daidíaioi.

Ringo zióredijina Jesús ífo jillaide
(Mr 14.3-9; Jn 12.1-8)

⁶ Jesús Betania jófueño íte. Afémie, chíñaitimíena maméidímie Simón jófomo íte.

⁷ Afe llezica, afénomo daa ringo alabastro daína nofíci finoina ícítirudo zióredíji uite. Afejí íere ráífade. Jesús güírabanimo ráína llezica, afengo afe ziórede cáiredíji Jesús ífomo totade.

⁸ Íe llófuegamaci áfena cióíllano ríicaidiaioi. Dani comímana daidíaioi:

—¿Nibái mei áfejí táinomo fáífitaga?

⁹ Afejí aillo úcube óllena fecárede. Afedo oga úcube, dúeredinomo írede, —daidíaioi.

¹⁰ Jesús daíi íaioi úrillana cacáíllano íaioína daide:

—¿Nibái mei bie ringo jífánodoidiomoi? Bie ringo cuemo finoca raa íere ñuera.

¹¹ Omoi cígímo dúeredino jaca ífírede, mei íadi omoi cígímo are íñeíticue.

¹² Bie ringo cue abímo totaca ziórede cáiredíjina, cue raíllinomo dúide. Afedo afengo ñue cuena finode.

¹³ Uáfueña ómoína daíiticue, náganomo bie éniemo bie jíllóille uai jino llóíadi, bie ringo cuemo finócana jino llóítiaioiza, afémaci aféngomo úbicaífireíllena, —daide.

Judas Jesuna íe éoidínoño fecade
(Mr 14.10-11; Lc 22.3-6)

¹⁴ Afe mei doce dígade llófuegamacimona Judas Iscariote lletáriraini ílláimamo úrizaide.

¹⁵ Afémacina daide:

—Jesús ómoimo cue fecálleza, ¿nieze cuemo íbaitiomoi? —daide.

Jira “cuatro fiui táijina iba dieze, omo íbaiticai” dainano, treinta diga ráifide úcubetunillai afémiemo fecádiaioi.

¹⁶ Iemo áfemona afe Judas Jesús íaioimo ñue fecállino jenode.

Jesús páscuamo íraicaiño güillafue

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Afe rafue nanódiruimo fáitañega pan güífirediaioi. Afe llezica Jesús llófuegamaci billano jicánotiaioi:

—¿Pascua rafue llezica güillena, uícodo ninomo cai fínuaille? —daidiaioi.

¹⁸ Afémié íaioina daide:

—Batí jófue mo jaillano, cue dainámie jofomo jai. Afémiena daiíri: “Cai Llófueraima ona daide: Cúeiena mamécaruimo ja dúciizaideza. Pascua rafue güífrenana o jofomo cue llófuegamaciri güíticue,” —daide.

¹⁹ Iemona ie llófuegamaci ie ocuilla izói pascua ráfue mo güillena fínuaidiaioi.

²⁰ Ja nauilla llezica, Jesús ie doce dígade llófuegamaciri afénomo güizájidiaioi.

²¹ Afénomo íaioi güilla llezica Jesús daide:

—Uáfue na dáíticueza, ómoimona dáamie cuena fécaite, —daide.

²² Iemona afémaci iere zúucaidiaioi. Zúucaillano illa dígamierie Jesumo jicánotiaioi:

—Cai Ocuíraima, ¿meita cue? —daidiaioi.

²³ Jesús íaioi uai ote:

—Birui cue diga daje plátomona güítimie, ñii cue fécaitimie.

²⁴ Nanoide Hima Jító Crístodicue; jaijai Juzíñamui Cuegáuaimo lloga iodo jáitícue. Mei íadi cue fecádimie ¡ñii dúerena! Afémié nanómoma jaca jéiciñegania figura, —daide.

²⁵ Iemona afe fécaitimie Judas Jesuna daide:

—Llófueraima ¿meita cue? —daide.

Jira Jesús uai ote:

—Jii, o. O cue fecalle.

²⁶ Ie güilla llezica, Jesús pan llínota, Juzíñamuina “Iere figura” daide. Daina mei díxada, ie llófuegamacimo fecade. Fécajano daide:

—Bie güi. Bie cue abiza, —daide.

²⁷ Afe mei jiróraco llínota, Juzíñamuina “Iere figura” daide. Dainano ie llófuegamacimo fecade. Feca mei íaioina daide:

—Nana bicúrimona omoi jirori.

²⁸ Mei bie cue díeza. Cue die, dájemo Juzíñamui llínoga comue uai uáfue na daiítate. Aillo comini íaifue muiñóllena cue die totale.

²⁹ Mei íadi dáanomo bie uva íjina meine jiroñeíticue. Cue Moo illáimana illirui nai dúciñeille dño aféjina jiroñeíticue. Afe bille llezica cómojina omoi diga jiroíticue, —daide.

Pedro Jesús jáanollena Jesús uícodo lloste

(Mr 14.26-31; Lc 22.31-34; Jn 13.36-38)

³⁰ Juzíñamuimo íaioi rua fuilla mei, jino Olivo daina ídumo jáidiaioi.

³¹ Afénomo Jesús íaioina daide:

—Bie ñaio cueri méaicallano nana omoi cuena féitiomoi. Mei jaijai Juzíñamui Cuegáuaimo omoi díbénedo bie izói daide: “Ovejai úíñoraima cue fáitícue, íemona afe ovéjaijai rainólliaioi,” daide.

³² Jesús nai úrite: Mei íadi meine abido cue cáaille mei omoi uícodo Galiléamo jáitícue, —daide.

³³ Jira Pedro uai ote:

—Nana comini ona fáicanocaitiaioi ia, cue ona fáicanocaiñeiticue, —daide.

³⁴ Jira Jesús afémiena daide:

—Uáfuenta ona dáitícueza. Bie naio átava nai úriñenia, daámani dígacaíño cuena jáanoitioza, —daide.

³⁵ Pedro íena daide:

—O diga cue tiillena iere jítárede ia, ona jáanoñeiticue, —daide.

Afe llezica nana llófuegamaci Pedro daina izói daidíaiói.

Getsemanímo Jesús Juzíñamuimo úrite

(Mr 14.32-42; Lc 22.39-46)

³⁶ Afe mei Jesús naa ie llófuegamaciri Getsemaní mámeçiredinomo dúcide. Afénomo íaioina daide:

—Bai batí Juzíñamuimo cue úrizaille llezica benomo omoi ráiiri, —daide.

³⁷ Daí daina mei Pedro, naa Zebedeo jító íaillinoiri Jesús bai uite. Afe llezica Jesús iere zúucaide. Zúucailla llezica comécimo duere zefuilla izói cácaicaide.

³⁸ Iemona íaioina daide:

—Cue comeci iere zúurede. Afe zuufue cuena titade izói finode. Benó omoi fiébiri. Iníñeno cue omoi úñori, —daide.

³⁹ Daí daina mei afe baímo íanori jaide. Afénomo éniemo fueco dine bíjicaillano Juzíñamuimo úrite; daide:

—Cue Moo, o finórenia bie duere finóllinomona cue jíllotari. Mei íadi cue comeci jítaina izói finóñeno iri. O comeci jítaina izói finori, —daide.

⁴⁰ Afe mei daámani ie llófuegamaci illánomo meine bite. Inídiáioina cíozaibite. Iemo Pédrona daide:

—¿Nano íanori omoi cue diga iníñeno cáadino izói inídiomoi?

⁴¹ Fiénidífueco omoi báiiñelleza, iníñeno abí omoi rairuiri. Daje izói Juzíñamuimo comécido omoi úriri. Uáfuenta omoi joreño jíéredeza, mei íadi omoi abí náinide, —daide.

⁴² Afe mei nane Jesús Juzíñamuimo úrizaide. Bie izói daide:

—Cue Moo, bie duere cue íaioi facátallemona cue o jíllotareñenia o comeci jítaina izói fino, —daide.

⁴³ Afe mei nane meine bite. Bítemo ie llófuegamaci inídena cíozaibite, mei íaioi uimo iníe iere illaza.

⁴⁴ Iemona nane afémacina fiénocaillano bai Juzíñamuimo úrizaide. Ja daámani dígacaíño úrizaide. Ie mei nane daje uaido úrite.

⁴⁵ Afe mei nane ie llófuegamaci illánomo jaide. Afémacina daide:

—¿Nai inídiomoi? ¿Nai ocózinaidiomoi? ¡Cacai! Nanoide fima Jitódicueza, ja cuena fiénidinomo fecalle hórano dúcidez.

⁴⁶ Omoi náidacai; jáiticaíza. Cue fécaitimie ja dúcidez, —daide.

Jesús ja llaitada uitíaiói

(Mr 14.43-50; Lc 22.47-53; Jn 18.2-11)

⁴⁷ Daí Jesús nai úrioina llezica Judas dúcide. Afémie doce dígade llófuegamacimona dáamie. Afémie aillo comini diga bite. Lloéfaillai naa bigínaiiri atídiáioi. Afémaci lletáriraini illaini orécaiaioi. Daje izói judíuai éicomini orécaiaioi.

⁴⁸ Fécaitimie Judas Jesús íaioi onóillena llaitalle uai uícodo íaioimo llote:

—Níimie cacai ñítaiticueza; afémie llaitada omoi uiri, —daide.

⁴⁹ Afemona Jesumo áinozillano daide:

—Llófueraíma, caimare itio, —daide.

Afe emódomo Jesuna ñitade.

⁵⁰ Jira Jesús ie uai ote:

—Cue nabai, ¿minícamo bitio? —daide.

Daí daina mei, comini billano Jesús llaitádiaioi. Llaitada llavéllena uitíaioi.

⁵¹ Afe llezica Jesús nabáñiaimona dáamie ie lloefai otá, lletáriraini illaíma ocúfiregamie jefo cotade.

⁵² Jira Jesús íena daide:

—Jadí o lloefai oni joone. Mei nana lloéfaido fuirídino, afe lloéfaido títiaioi.

⁵³ ¿Onóñedioza cue Móomona doce dígazie ríduai bitinona jicáredicue? Daí jicádicuena afémie biruimo raire cuemo orérede. ¿Afena onóñedio?

⁵⁴ Mei íadi birui afémaci cue llaitáñediaioinia, ¿nie izói Juzíñamui Cuegáuai daina ñue ícoimo zúite? Aféuai bie ífcaidifuiaí ie zuílle llofe, —daide.

⁵⁵ Afe mei Jesús comínina daide:

—¿Níbái mei merírfiredimie izói cue llaita bitio moí? Mei lloéfaillari íemo bigíñiairi cuemo bitíomoi. Nágaruillaido Juzíñamuimo gairíracomo ráicana ómoína llófuefredicue. Afénomo jaca cuena llaitáñediomoi.

⁵⁶ Mei íadi nana bie ífcaide, jaiaí Juzíñamui uai jino llóraini lloga ñue ícoimo fuitállena, —daide.

Afe llezica nana Jesús llófuegamaci afémie fáicanocaillano botádiaioi.

Jesús jamánomoidillaini úcomo uitíaioi

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Afe Jesús llaitada oni uitino Caifás úcomo uitíaioi. Afémie lletáriraini caifóidillaíma. Afénomo ocuica uai llófuefredino naa eicomíniri dáanomo ofidiaioi.

⁵⁸ Mei íadi afe llezica Pedro Jesús uilla óodana caifóidillaíma jofo ibírimo jaide. Afénomo dúciillano jofo jaide. Jaillano afeco úñotino diga ráide. Afémie dinomo ráide Jesús llaitaja ñue ícoimo fúillana cíollena.

⁵⁹ Lletáriraini naa eicomíniri, íemo nana jamánomoidillainiri Jesumo fieni jónellifue jenódiaioi. Uafue jónellifue íaioi báñenia “Táñofue nítaiticai,” daidíaioi, “áfedo afémie cai titátalleza.” Afe llezica aillo comini billano taino uailai afémiemo jónetiaioi.

⁶⁰ Mei íadi afémiemo íaioi jónellena bañédiaioi. Afe mei írainomo ménamie taino llófiredino íaillinoi dúcide.

⁶¹ Afe íaillinoi daide:

—Baie Jesús bie izói daífirede: “Juzíñamuimo gairíracona júdairedicue. Afe mei daaruíamani íllamona meine caífo níredicue,” —daidíallinoi.

⁶² Jira lletáriraini caifóidillaíma náidacaillano Jesuna daide:

—¿Níbái mei uai oñedio? Bie omo íaioi jóonegafue ¿nie izoide? —daide.

⁶³ Mei íadi afe llezica Jesús jaca uaina oñede. Ie jira lletáriraini illaíma íena daide:

—Caade Juzíñamui mámeccido o úritadicueza, uri. Uáfueña daíllena riire o ocúdicue. O, Juzíñamui Jitó Crístona o illa caimo lloiri, —daide.

⁶⁴ Jira Jesús daide:

—Ji, o daina izói nímiedicue. Nane ómoina dáiticue, Nanoide Hima Jitó Crístodicueza, ríinorede Juzíñamui nabézimo cue ráillana cíoitio moi. Afe llezica mona uílliedo ana monámona cue bíllana cíoitio moi, —daí daide.

⁶⁵ Afena cacáillano lletáriraini caifóidillaíma jamánomo rícaide. Daí rícaillana ácatallena ie jitáoi garoi cuatade. Afe mei daide:

—Bie ima ie daina uáillaido Juzíñamuina íaire úrite. ¿Nibái mei nai jáie uai nábito jitáidicai? Omoi daní ie fiénide dáinana cacádio moi.

⁶⁶ ¿Mínica afémiemo dúina? —daide.

Jira afémaci daidíai oi:

—Dama ie ícoína tírede, —daidíai oi.

⁶⁷ Afe mei ie uiecona tuádíai oi. Rázido íena fatíai oi. Jáimaci ie uieco púcoidíai oi.

⁶⁸ Daí ñiano íena daidíai oi:

—Mei Crístodioza, ¿nímie o faja? Jino llone, —daidíai oi.

Pedro Jesús onode íadi jáanote

(Mr 14.66-72; Lc 22.56-62; Jn 18.15-18, 25-27)

⁶⁹ Afe llezica Pedro jinófeco ibírimo ráide. Afénomo ie illa llezica ocúfiréngango afémiemo bíllano daide:

—O daje izói Galilea ímie Jesús diga macáfiredio, —daide.

⁷⁰ Mei íadi Pedro comini eróicana afémiena jáanote; daide:

—O dáinana onóñedicue. ¿Mínica llotio? —daide.

⁷¹ Afe mei Pedro jofo nazemo jáidemo jáíngo íena ciode. Cíoillano afénomo itínona daide:

—Bímie daje izói Nazaret ímie Jesús diga macáfiredio, —daide.

⁷² Afengo daí daina llezica, Pedro nane íena jáanote. Rírede uaido daide:

—Afe ímana jaca onóñedicue, —daide.

⁷³ Afe mei íanori íllamona afénomo itino Pédro mo ánozillano daidíai oi:

—Uáfueza, afémaci ímiedio, mei dama o úrillado onódicaíza, —daidíai oi.

⁷⁴ Afe jira Pedro uafue daíllena Juzíñamui mámece llínota ríire daide:

—Afe báimiena jaca onóñedicue, —daide.

Daí ie daina llezica ítava úrite.

⁷⁵ Afemona Pedro Jesús uícodo íena dáinamo úbicaide. Afe be níuui: “Atava nai úríñena llezica, daámami dígacaiño cuena jáanoitioza.” Afemo úbicaillano Pedro jino iere zuure éecana jáide.

27

Pilátomo Jesús izájidíai oi

(Mr 15.1; Lc 23.1-2; Jn 18.28-32)

¹ Mona monáizailla llezica, nana lletáriraini illaini, naa judíuui eicomíniri, dáanomo gairíllano Jesús titállena nana daje izói maméritíai oi.

² Afe mei Jesús maíano, afe énie úíñote illaíma Poncio Pilátomo izájidíai oi.

Judas tíllafue

³ Judas, Jesús fecádimie, Jesuna íai oi coráiaillana cíoillano comeci ífue méidote. Iemona treinta diga úcubetuni meine lletáriraini illáinimo izájide, ocuide eicomínimo diga.

⁴ Izájillano daide:

—Iere fiénidifue finódicue; nífuenidimie titállena fecádícueza, —daide.

Jira afémaci uai otíaiói:

—¿Afeue caimo mei nibái? Dama ófue, —daidíaiói.

⁵ Ie jira Judas afe úcube gairíracomo ana jutade. Afe mei afémie jaillano dama cimoi cúinajano aménamo ágüicaide. Daií afémie tiide.

⁶ Lletáriraini illaini, afe jutaca úcube iráiano daidíaiói:

—Juzíñamuimo fia iga úcube jóoneracomo bie úcube jóonenidicai, mei come titaja úcubeza, —daidíaiói.

⁷ Afe mei afémaci afe úcubedo énie ibállena dájena comécidíaiói. Iaiói ibaca énie mámecei Nógora Orano. Afébiri ibádiaiói jicánemaci tíadi afénomo ráillena.

⁸ Afe jira nai biruimo afébiri Diébirina daiífirina.

⁹ Daií íaiói fínuamona jaijai uai llóraima Jeremías lloga uai ñue ícoimo fuite. Be níuui: “Israel nairai cue íaiói fécaja úcube abido llínotiaíói.

¹⁰ Llínuano Nógora Orano ibádiaiói. Daií Juzíñamui cue ocuide.”

Jesús Pilato uíecomo jóonetiaíói

(Mr 15.2-5; Lc 23.3-5; Jn 18.33-38)

¹¹ Afe mei énie úiñotillaima uícomo Jesús uitíaiói. Afénomo afémie Jesumo jicánote:

—¿O meita judíuui illaima? —daide.

Jira Jesús daide:

—O daina izói nímiedicue, —daide.

¹² Iemo lletáriraini illaini naa ocuide eicomíniri Jesumo fiénide uaillai jóonia llezica, afémie jaca uai oñede.

¹³ Jira Pilato íena daide:

—¿Aquíe omo íaiói jóonegafuiai cacáñedio? —daide.

¹⁴ Mei íadi Jesús jaca afe llezica uai oñede. Iemona uai ie oñénari énie úiñotillaima fáigacaide. Ie daiille uai onóñede.

Jesús titállena mameca

(Mr 15.6-20; Lc 23.13-25; Jn 18.38-19.16)

¹⁵ Aféruillaído afe rafue ana, llaveca fiénidinomona dáamie Pilato zuitáfirede. Afémie comini uaido zuitácamie.

¹⁶ Mei afénomo ite mámeceina jica jalleide fiénide maigámie. Afémie mámecei Barrabás.

¹⁷ Illáicomini dáanomo gairilla llezica Pilato afémacimo jicánote:

—Bíaiillinoimona ¿nímie ómoimo jino zúitaiticue? ¿Barrabás, mei nibai Cristo daina Jesús? —daide.

¹⁸ Mei Pilato, comini úradoillamona Cristo íaiói fécajana ñue onode.

¹⁹ Pilato, riire jicánofredimie ráiiranomo ráina llezica, Pilato ai uai orede. Afe be níuui: “Afe jadímie nífuenidimieza afémiemo jíricaiñeno iri. Mei ja naio afémiena cue nicáirilla llezica iere duere zefuídícue,” daide.

²⁰ Mei íadi lletáriraini illaini naa ocuide eicomíniri, nana jíaié comini Pilátona daiílluai riire llotíaiói. Barrabás zuitállena Pilátomo jicátatiaíói. Daje llezica Jesús titállena jicátatiaíói.

²¹ Afe énie úiñotillaima nane dáanomo jicánote:

—Bíaiillinoimona ¿nímiéna cue zuitátatiomoi? —daide.

Jira: —Barrabás zuita, —daidíaiói.

²² Iemo Pilato íaióimo jicánote:

—Iemona bie Crístona mámeciredimie Jesús ¿nie izói níbaíticue? —daide.

Jira nana uai otíaioi:

—¡Cruzmo corai! —daidíaioi.

²³ Iemona Pilato íaioina daide:

—¿Níbaí mei? ¿Nie fiénidífue afémie finode? —daide.

Mei íadi comini dáanomo riire daidíaioi:

—Cruzmo corai, —daidíaioi.

²⁴ Pilato ie uaina íaioi íinoñenana ciode. Daje izói nana comini aféfuiairi jamánomo cáilliana cacade. Ie jírari “Onoi cue jocólleza jainoi ati” daide. Jócua llezica daide:

—Afe bie nífuenidimie tiille cuemo jíñede. Dani ómoifueza, —daide.

²⁵ Iemona nana comini uai otíaioi:

—Afémie tiille caimo jíite, daje izói cai úruiaimo, —daidíaioi.

²⁶ Afe jira Pilato Barrabás zuitade. Afe mei Pilato Jesús rázido fatátate. Fatata mei Jesuna afémacina coráitate.

²⁷ Afe mei énie úiñotillaíma fuiríraini áillue gairíracomo Jesús uitíaioi. Afénomo nana jíaie fuirírainiaí afémie onífenego gairídiaioi.

²⁸ Afe mei ie iniroi dúñuano, illaíma jítaírega jáicuro afémiemo jítaídiaioi.

²⁹ Afe llezica ifo icuifoí eegi nínacuífoina afémiemo jítaídiaioi. Iemo jíaí illaíma lláifirega bigina íena lláinotadiaioi. Daí ñiano afémie anamo dújudiaioi. Dújuillano jífánodoiano íena daidíaioi:

—Judúuai Illaíma are íitioza, —daidíaioi.

³⁰ Afe llezica afémaci ie túallaitiaioi. Afe dáanomo ie lláiga bigi báiruano, ie ifoci púcoidiaioi.

³¹ Daí ie íaioi jífánodoia mei, afémiemo íaioi jítaca jáicuro dúñuano, dama ie iníroina jítaídiaioi. Afe mei afémie coráiaidiaioi.

*Jesús cruzmo coráidiaioi
(Mr 15.21-32; Lc 23.26-43; Jn 19.17-27)*

³² Jofue jinomo íaioi coráiailla llezica, Cirene énie ímie baitíaioi. Baillano Jesús uiga cruzna rocátatiaioi.

³³ Daí Gólgata mámeciredinomo dúcidiaioi. Gólgata daina “come ífócorai illano.”

³⁴ Afénomo eríredena jaicuica vínona Jesús jírótatiaioi. Mei íadi Jesús áfena due fácano, jíróacañede.

³⁵ Jesús ja íaioi coraía méifodo, fuiríraini Jesús iniroi illa dígamie íaioi máíñuana onoíllena, onótaraji dotádiaioi. Daí jaiái uai llóraini lloga uai ñue ícoimo fuite. Afe be níuái: “Onótaraji dótajano, cue iniroi conímaíaimo fecádiaioi.”

³⁶ Afe mei afémiedo éroíllena afénomo ráíediaioi.

³⁷ Ie ífo acónimo cuezábici netádiaioi. Afébicimo nífue ícoínia duere finoca daina cúeina. Afébicimo cuezga bie izói daide: “Bie Jesús, Judúuai illaíma.”

³⁸ Afe llezica afénomo mena merírífiredimie coráidiaioi. Dáamie Jesús nabézimo coráidiaioi. Jáíamie ie jarífezimo coráidiaioi.

³⁹ Afe llezica áfeodo jaide comini Jesuna íaire úritiaioi. Uaido iere riire íena táigoidiaioi.

⁴⁰ Daí fieni ie táigoiano íena daidíaioi:

—Juziñamuimo gairíraco júdaiano daaruiámani ille mei meine níticue daiífredioza; mai, o abi jállota. Daje izói Juziñamui Jitona o íadi, jadíe cruzmona ana bi, —daiđiaíoi.

41 Daje izói lletáriraini illaini, íemo ocuica uai llófuetino, íemo fariséuai naa ocuífired eicomíniri íena áfედუano conímána daiđiaíoi:

42 —Diga jiáimaciaína afémie jíllotafírede, mei íadi dama ie abina jíllotanide. “Uafue Israel Illaíma o ía, jadíe crúzmona ana bii, áfemona omo cai íinolleza,” íena daiđiaíoi.

43 Nai ie áfედუano íena úritiaíoi:

—Mei afémie Juziñamuimo íinoteza, mai mei birui Juziñamui ie jíllota, Juziñamui ie jíllotaíacania. Afémie caína “Juziñamui Jitódicue” daide, —daiđiaíoi.

44 Daje izói ie diga coraíca merirífired e íaillinoi íena íaire úritiaillinoi.

Jesús tilla

(Mr 15.33-41; Lc 23.44-49; Jn 19.28-30)

45 Afe llezica nániena jítreficaide. Jitoma jaíciri íllamona batí ana ítemo jítreficaide.

46 Ja jíitoma arífemona ana ítemo Jesús riire caillide:

—Elí, Elí, ¿lama sabactani? —daide. Afe uai daiíacana: “Cue Juziñamui, cue Juziñamui, ¿nibái mei cue zóofetio?”

47 Afénomo itínomona dáarie áfena cacáillano daiđiaíoi:

—Bímie jaiái Juziñamui uai llóraíma Elías jíirite, —daiđiaíoi.

48 Daií daina llezica afémacimona dáamie aizida esponja daina fiillicide raa uájide. Erírede vínomo riáitano Jesús jíróllena caífo rázido ñuitádiaíoi.

49 Mei íadi jiáimaci daiđiaíoi:

—Dama íteza. Jetáñeno, Elías ie jíllotaíbiadi, cai cíoillega, —daiđiaíoi.

50 Afe mei Jesús dáanomo riire caillide. Daií cáillia méifodo ja tíide.

51 Ie tilla llezica Juziñamui gairíraco eromo fetácaroi caifona ana eróicana atóroido oni cúajicaide. Afe llezica énie docaide, íemo jíái jéerie noñiciai bócoizite.

52 Iemo daje llezica, comini raiáfuai túicoizite. Afe llezica aillo tíide Juziñamuimo ínotinuiai meine abído cáadimacina jáidiaíoi.

53 Afe bimaci íaíoi raiáfuaímona jino bitiaíoi. Iemo Jesús abído caana mei, ñuera Jerusalén jófuego jáidiaíoi. Afénomo aillo comini bie como meine abído cáadimacina cíodiaíoi.

54 Iemona fuiríraini illaíma naa afémie diga Jesús úíñotinori, énie docailla, naa jíáie comuídifuaína cíoilano, íere jacínaitiaíoi. Jacínaillano daiđiaíoi:

—Uáfueza bie Juziñamui Jitó, —daiđiaíoi.

55 Afénomo diga ringóniai jícana eróediaíoi. Aféngotiai Galiléamona Jesudo jáidiaíoi. Aféngotiai Jesuna canófirediaíoi.

56 Aféngotiai cígimo, Magdalena énie ingo María ite. Iemo jíáie María, Santiago José íaillinoi ei ite. Iemo jíái Zebedeo ai ite. Afengo mena jítórede.

Jesús raitiaíoi

(Mr 15.42-47; Lc 23.50-56; Jn 19.38-42)

57 Ja nauilla llezica Arimatea énie ímie José bite. Afémie ráaredimie, íemo jíái afémie Jesudo jáicaífirede.

58 Afe jira Pilátomo Jesús abi jícajide. Iemona Pilato Josemo afémiena ite.

59 Iemo José Jesús abi ana uano ñuera áílloroina junide.

⁶⁰ Juníllano dama ie comue raiáfomo jónete. Afe raiáfo nofícimo finoca. Raia mei áillue nofícina naze íbáillano jaide.

⁶¹ Afénomo Magdalena énie ingo María naa jíáie María diga raiáfo uícori ráidiainguai.

Jesús raiáfo uíñoitinona jónetiaioi

⁶² Afe jáíruido, ocózinaillarumo jitaica raa fínua mei, lletáriraini illaini, naa fariséuairi Pilátomo úrizaidiaioi:

⁶³ —Ocuídímie, afe taino llóraima Jesús dáinamo úbicaidicai. Afémie caana llezica, “Daruíamani ille mei, tíllanomona meine abido cáaiticue,” daífiredé.

⁶⁴ Ie jira afe raiáfo daruíamani fidi riire o finori, ie llófuegamaci ie abi naio mériaibiñelleza. Mériano comínina “Ja Cristo tíide meine abido caade,” daítiaioi. Ie llófuegamaci daí finóadi, íaioi íirainomo lloga táinofue, fueñe lloga táinofuaí baimo fiénite, —daí daidiaioi.

⁶⁵ Jira Pilato daide:

—Batí omoi úíñote fuíríraini ite. Afémacido afe raiáfo omoi onona izói riire omoi finori, —daide.

⁶⁶ Iemona raiáfomo jaillano, afénona riire finódiaioi. Afe mei afe raiáfo emodo íbailla nofícimo túíñoñeillena jana finódiaioi. Afe mei jóoneoide fuíríraini afénomo fíano oni jáidiaioi.

28

Jesús tíllanomona meine abido cáadimiena jaide

(Mr 16.1-8; Lc 24.1-12; Jn 20.1-10)

¹ Ocozinaillarui jáíruido, semana fueñediruimo mona monáiacana llezica, Magdalena énie ingo María, jíáie María diga raiáfo méíñuaidiainguai.

² Afe llezica énie riire docáiricaide. Juzíñamui abi ímie ángel dainámie monámoma ana billa énie níraídua. Afémie Jesús raiáfomo dúcúillano afe íbailla nofici oni tuiñode. Tuiñuano afébicimo ráide.

³ Afémie abi mona borilla izói quenire cioide. Iemo afémie iniroi jaíllici izói iere úzerede.

⁴ Afémiena cíóillano, jónete fuíríraini iere jacínaitiaioi. Cuidíridiaioi. Afe llezica tíidino izói jáidiaioi.

⁵ Afe mei Juzíñamui abi ímie afénomo jaide ringóniaína daide:

—Jacínaiñeno. Onódicueza, coraica Jesús jénuaibitíomoi.

⁶ Afémie ja benó íñede. Omoina ie daina izói, ja meine abido caade. Ie íaioi raiano eróizaíbi.

⁷ Afe mei ie llófuegamacimo omoi llujáiri. Bie izói lloiri: “Ja afémie tíide íadi meine abido cáadimiena jáideza. Afémie ja omoi uícomo Galiléamo jaide. Afénomo íena cíoitíomoi.” Be ómoímo cue llóiacagafue, —daí daide.

⁸ Iemona ringóniaí afe raiáfomona raire abido jáidiaioi. Aféngotiaí iere íóbicaidiaioi íadi, nai jacíruidímaci.

⁹ Iodo íaioi jailla llezica Jesús íaioímo cíocaide. Cíocaillano íaioína uáidote. Aféngotiaí íemo ánozillano íemo cáimadotiaioi. Ie ídaí meníñotiaioi.

¹⁰ Jira íaioína daide:

—Omoi jacíruiñeno. Cue ámatiaímo llujáiri, Galiléamo raire íaioi jáilleza. Dínomo cuena cíoitiaioi, —daide.

Raiáfona úíñotaga fuíríraini llogafue

11 Ringóniai jailla llezica, raiafo jónete fuirírainimona dáarie jófuego jáidiaioi. Afénomo dúciillano lletáriraini illáinimo nana íaioi ciónana llotíaioi.

12 Aféllaini ocuide eicomínimo ñue íaioi onóillena llujáidiaioi. Ie jira aillo úcubena afe fuirírainimo itíaioi.

13 Illano íaioina daide:

—Bie izói omoi daíri: “Naio cai ínia llezica ie llófuegamaci mériano ie abina uitíaioi.”

14 Iemo énie úñotillaima aféfuena fidiadi, omoi ñue llena dani cai afémiemo úrizaiticai. Afemona afémie ómoina duere fínoñeite, —daí daidiaioi.

15 Iemona afe fuiríraini úcubé llínotiaioi. Llínota íaioina daina izói fínuaidiaioi. Iemona judíuai nai biruimo Jesús meine abido cáanana uáitadiaioi; uáitano bie izói daífirediaioi.

Jesús ie orécamacimo jónega uai

(Mr 16.14-18; Lc 24.36-49; Jn 20.19-23)

16 Afemona Jesús once dígade llófuegamaci Galiléamo jáidiaioi. Uícodo Jesús íaioimo lloga ídumo jáidiaioi.

17 Afénomo Jesuna íaioi cíollano, afémiemo cámadotiaioi. Mei íadi dáamierie nai figo íñoñede.

18 Jira Jesús afémacimo ánozillano daide:

—Nana monamo ite ocuilla ríino, naa éniemo ite ríino diga ja cuemo fecaca.

19 Ie jira nana éniemo ite comínimo omoi jairi. Afémacina cue llófuegamacina oreri. Afe mei Moo Juzíñamui mámecido, daje izói ie Jitó mámecido, naa ie Ñuera Joreño mámecido íaioina báutizari.

20 Nana omoi cue ocuilla uáillaina afémaci jeire omoi otátari. Afe llezica bíena omoi onoiri, cue nágarui omoi diga íífireiticeza. Jaca omoi diga íiticuemo énie fuillíruimo dúciite. Daítadeza; ja ñie.

JUZÍÑAMUI ÑUEFUE SAN MARCOS LLOGAFUE El Santo Evangelio Según San Marcos

Juan Bautista táizicimo lluáibite
(Mt 3.1-12; Lc 3.1-9, 15-17; Jn 1.19-28)

¹ Juzíñamui Jitó Jesucristo lloga ñuefue bie izói tainede.

² Jaiai uícodo Juzíñamui uai jino llóraima Isaías cuete:

Mai cacai, o uiecodo cue rafue llotímie orédicue, o jáille io ñue ifóllena.

³ Táizicimo caillidímie uai ñue cacaide; daide:

Mai omoi Ocuíraima jáille io ñue finori; ie macalle io jáicina tuiñori, —daide.

⁴ Afe izói bautizaraima Juan táizicimo cíocaizaibite. Dinomo comini jitárede bautizaillena afémie ñue lluáibite. Iaioina daide:

—Omoi comeci ifue ñuefuena méidorediomoi. Ie mei bautizarediomoi. Iemona Juzíñamui omoi comeci fiénidifuiái dóite, —daide.

⁵ Iemona nana Judea énie imaci, Jerusalem comini diga, Juan llógamo cacáreizaidiaioi. Cacáillano íaioi comécimo ite fiénidifuiái uáfodo jino llotiaioi. Daíí íaioi llua méifomo imani Jordámo Juan bautizagaiaioi.

⁶ Juan jitaca iniroi camello itíraiai finoina. Ie ciraigi llaitáinafe igorai finoina. Fíuai rite; jazici ie cíji jirófiredo.

⁷ Comínimo llócaillano daide:

—Fuí cue méifodo bíitímie, iere cue baímo riire ocuífireitímie. Iemona ie idai ico igai zuitánidicue, mei jofófene jamáimedicueza.

⁸ Jae jáinoído ómoína bautizadicue, ñuera iodo omoi jáiacana jino llóllena; mei íadi afe bíitímie Ñuera Joréñodo ómoína uícaitaite, ñuera iodo éicitaiñeno ñue omoi jáillena, —daí daide Juan.

Jesús bautizainafue
(Mt 3.13-17; Lc 3.21-22)

⁹ Aféruillaído Jesús Nazarétmona bite. Afe Nazaret jofue Galilea éniemo ite. Billano Juan illánomo dúcide. Afénomo Juan íena Jordámo bautizade.

¹⁰ Jáinoimona jino billa llezica Jesús mona tújicaillana ciode. Daje llezica Ñuera Joreño fíiciri izói Jesumo ana bíllana Jesús ciode.

¹¹ Afe llezica monámona uai cácaide; daide:

—O iere cue izíruiga Jitódio. Ori iere caimare iticue, —daide.

Taife Jesús facátate
(Mt 4.1-11; Lc 4.1-13)

¹² Afe méifodo raire Ñuera Joreño Jesuna táizicimo orede.

¹³ Dinomo tóíñega rílleniai cígimo Jesús cuarenta dígarui ite. Afénomo Satanás (Taife jááfodo mámeciredímie) Jesús facátate. Aféruillaído Juzíñamui abí imaci ángeles daínámaci Jesús cánuabitiaioi.

Jesús Galiléamo llófuiafue táiniaide
(Mt 4.12-17; Lc 4.14-15)

¹⁴ Te mei illaíma Herodes Bautizaraima Juan llavétate. Juan llavébilla mei, Jesús Galilea éniemo jaide. Jáillano Jesús, Juzíñamui ñuera rafue lluájide.

¹⁵ Jesús bie izói daide:

—Ja aféruimo dúcide. Ianori íllamona Juzíñamui nana íemo jaináidimaci dáaziena caimare íllena gairítaibiteza. Iemona jíllonafue omoi ínuano, omoi comeci ífuiái méidori afémacimo dájena omoi jaináíllena, —daide.

Jesús cuatro dígamie facóramaci uáidote

(Mt 4.18-22; Lc 5.1-11)

¹⁶ Jesús Galilea jorai fuédado mácajide. Jaillano Simona ciode ie ama Andrés diga. Facóraima íaillinoi. Llóiji jóraimo dotáfírediaillinoi.

¹⁷ Jesús íaillinoína daide:

—Mai cuedo ómicoi bi. Chámuniaí ómicoi jenófirena izói, afe izói comini jenórainina ómicoína jóneiticue, —daide.

¹⁸ Raire íemona íaillinoi llóiji fíianona, afémiedo jáidiaillinoi.

¹⁹ Ie mei Jesús bai jabo jaillano Zebedeo jító, Santiágoni ciode, ie ama Juan diga. Íaioi llóiji cúaidino, nocáe ero ráicana niródiaillinoi.

²⁰ Jesús íaillinoi jíríte. Íaillinoi moo Zebedeo nocaemo fiénocaillano ie canóramaci diga, Jesudo jáidiaillinoi.

Capernaumo fiénide jóriairedimie Jesús jíllotaga

(Lc 4.31-37)

²¹ Ja Capernaumo dúcidiaioi. Ie mei ocózinailaruimo Jesús Juzíñamui uai llófueracomo jofó llófuiaide.

²² Afémie llogáfueri fáigacaidiaioi. Ua nibai riímie izói ñue llófullofuede. Ocuícafue llófueraíni afe daíi llófueñediaioi.

²³ Afe llezica Juzíñamui uai llófuera como fiénidena jóriairedimie ite.

²⁴ Afémie ja Jesumo caillide; daide:

—Nazaret ímie, Jesús, ¿ñifue cócomo illa? ¿Cai fatátaibitío? Ona onódicue. Juzíñamui íaifuenidimiedio; afémie rafue ñue lluaíbitimiedio, —daide.

²⁵ Iemo Jesús fiénide jóriaimo riire úrite; daide:

—¡Llícai! Bímie fáicanocaillano oni jai, —daide.

²⁶ Iemo fiénide jóriai afémiena izire docáitate. Ie mei jamánomo caillídemo afémiemona oni jaide.

²⁷ Ie jira nana nairai jacínaitiaioi. Jira conímamo jicánotiaioi:

—¿Bie mínica? ¿Mínica bie como llófueinafue? Bie Jesumo riire ocuíllafue ite, fiénide jóriai oréllena. Afe fiénide jóriai afémiena ínofírediaioi, —daidiaioi.

²⁸ Ie jira Jesús mámece nana Galilea énie fuédado raire jica jalleide.

Jesús Simón Pedro jifaiño jíllotate

(Mt 8.14-15; Lc 4.38-39)

²⁹ Juzíñamui uai llófuera comona jino billano, Jesús, Simón ie ama Andrés íaillinoi ícomo jaide, Santiago, Juan diga.

³⁰ Dínomo Simón jifaiño abi cuaríllamona íniranomo bíide. Afengo irárenana Jesumo llotíaioi.

³¹ Iemona aféngomo ánozillano, Jesús afengo onoi llíinota, íena caífo naidánete. Afe llezica afengo abi cuarilla aféngomona llíicaide. Daje llezica jarire íaioi jitailla güille afengo bai íaioimo atide.

Jesús aillo iráredino jíllotate

(Mt 8.16-17; Lc 4.40-41)

³² Aféruido, jítoma ana zójicaídimo, ja nauíocailla llezica, nana afénomo ite iráredino, fiénidena jóriairedino diga, Jesumo atídiaioi.

³³ Nana dino jofue nairai afeco naze fue ibírimo gairízitiaioi.

³⁴ Jesús aillo íaioimo ite diga ie duico jíllotate. Afe llezica aillo fiénide jóriaiai Jesús jino comínimona orede, mei íadi Jesús afe jóriai úriñeillena íaioimona rairuide, mei afémiena onódiaioiza.

Jesús Galiléamo llujáide

(Lc 4.42-44)

³⁵ Ja monáioicaidemo, nai jítireoidemo, Jesús cazíllano jino jófuemona oni tí daidínomo jaide, dinomo Juzíñamuimo úrillena.

³⁶ Afe mei Simón ie nabáíñiairi Jesús jénuaidiaioi.

³⁷ Baillánona íena daidíaioi:

—Nana o jenódiaioi, —daidíaioi.

³⁸ Iemo Jesús íaioina daide:

—Ainori itícuaimo mai cai jai, dinomo daje izói ñúfue cai llujáillena; mei afe jira jino bitícueza, —daide.

³⁹ Daí Jesús nana Galiléado macade. Naga illánuaímo Juzíñamui uai llófuera como llócaide. Afe llezica comínimona fiénide jóriai jino orede.

Chínaite izóidímie Jesús jíllotate

(Mt 8.1-4; Lc 5.12-16)

⁴⁰ Jesumo chínaite izóidímie áinozide. Ana dújuano daide:

—Cue o jíllotaiacaniadi cuena jíllotaredio, —daide.

⁴¹ Ie jira Jesús afémiemo dúecaide. Jira ónoído jétano daide:

—Jíi, ona jíllotaiacadícue. Mai o abí jácaiteza, —daide.

⁴² Daí daínamona afe duico iráredímie mona cíbicaíñena. Jae ñúemie.

⁴³ Iemo Jesús afémie orede. Daje llezica riire ocuállano daide:

⁴⁴ —¡Cacai! Bumo lloñeno iri. Dama lletáriraima sacerdote dainámie mo jaillano, o abí ácatari. Dáaruído Moisés jaii ocuica abí duafue ráana, mai afémiemo izájiri. Iemona comíni o abí jíllotana fídítiaioi, —daide.

⁴⁵ Mei íadi afémie jaillano nana comínimo afe ie jíllonafue llujáide. Iemo aillo comíni Jesumo izire gairíoidiaioi. Ie jira ja Jesús bu jófue mo uáfodo jáinide; mei íadi jino jofue íñenanomo mácajide. Mei íadi nágagobiaimona bizájidiaioi afémiena cíoillena.

2

Jesús tízitaitímie jíllotate

(Mt 9.1-8; Lc 5.17-26)

¹ Ie méifodo nano nígarui íllamona Jesús meine abído Capernaumo jaide. Afémie jofomo íllana ja fídídíaioi.

² Iemo aillo nairai ie jofomo gairídiaioi. Jofo comínina oruíllamona iere ríllírede; ja naze fuemo íaioi íllino íñede. Íaioimo Juzíñamui úrillafue Jesús jino llote.

³ Iemo cuatro dígamie tízitaitímie atídíaioi.

⁴ Iere comíni íllaza, Jesús íllánomo dúcinide. Ie jira jofo emódomo caífo jaillano, Jesús ílla llezícamo jofo emodo íbáicano cúcoidiaioi. Cúcoianona aféfodo tízitaitímie ana agúñetiaioi, naa afémie bírrallu diga.

⁵ Afémaci comeci ínuana cíoillano, Jesús tízitaitímiena daide:

—Jító, o fiénidífue jae ñue dófide, —daide.

⁶ Dáarie ocuícáfue llófueraíni, dinomo ráidíno, íaioi comeci facáoidiaioi:

7 “¿Nibái mei bímie daí úrite? Juzíñamuina fieni úrite. Dama Juzíñamui fiénidifuena dua. Abi dine bu Juzíñamui izói fiénidifuena doñena.”

8 Mei íadi dama Jesús ie comécido afémaci comeci úrillafuena onode. Jira daide:

—¿Nibái mei omoi comeci daí facádiomoi?

9 ¿Ñie iere júanina iráredimiena daíllena: “O fiénidifue dófite,” nibái jiáfodo daina: “Náidacai, o bíra llínota ui, mai maca”? ¿Ñie iere júanina?

10 Ie jira jiáfueña ómoimo fidítaiticue. Bíníemo comíni fiénidifuiaína oni muiñólle ríno cuemo ite. Nanoide Hima Jitódicueza, —daide. Iemo tízitaitimiena juare daínafuena daide:

11 —Ona daidicue: Caifo náidacai. O bírallu llínota mai o jofomo jairi, —daide.

12 Ja iráredimie raire náidacaillano ie bírallu llínote. Llínvano dinómona jino jaide. Ie jáillana nana comíni ciódiaioi. Jira áferi fáigacaidiaioi. Daje llezica Juzíñamuina cáimadotiaioi. Daidíaioi:

—Jaca daítadifuena ciórainidicai, Juzíñamui o iere jamánomoidimiedio. Mai Juzíñamuimo cai ióbilli, —daidíaioi.

Jesús Leví uáidote

(Mt 9.9-13; Lc 5.27-32)

13 Ie mei Jesús meine abido jorai fuédamo jaide. Nana comíni íemo áinozidiaoimo, afémie íaioina llófuate.

14 Jesús mácajilla llezica, Levína ciede. Leví Alfeo jító. Afémie gobierno íbátaga úcube llínoranomo ráide afe úcube llínollena. Iemo Jesús íena daide: —Cueto bi, —daide. Jira Leví náidacaillano afémiedo jaide.

15 Afe méifomo Jesús Leví jofomo güzájide. Dinomo aillo jíáie gobierno íbátaga úcube llínoraímaci Jesús dáanomo güirábanimo ráiiediaioi naa fiénidimaciri. Mei iere áillomaci afe izóidino afémiedo jáidino. Afe dáanomo Jesús llófuegamaci ráiidiaioi.

16 Mei íadi dáarie ocuícáfue llófueraíni fariséuai diga, Jesús nana afe fiénidimaci diga naa íáiruiga íbátaga úcube llínoraímaciri dáanomo güillana ciódiaioi. Iemoná Jesús llófuegamacina daidíaioi:

—¿Nibái mei omoi llófueraíma afe íáiruiga íbátaga úcube llínoraímaci diga güífiredé, jiróífiredé? Daje izói, ¿nibái mei jíáie fiénidino diga güífiredé? —daidíaioi.

17 Aféfuena Jesús cacáillanona duera ráfuedo íaioina daide, nie ícoínia mei íáiruigamací diga ie güífrenana íaioi onóillena. Be níifue:

—Íranídimaci manóriraimana jítaíñediaioi; dani dúicotaídino da manóriraimana jítaina. Mei ñúemacimo cue uáiduaíbiñedicue. Fiénidino uáiduaíbiticue afémaci jíllollena, —daide.

Daa mona güllena fímaírilla Jesús jicánotiaioi

(Mt 9.14-17; Lc 5.33-39)

18 Jiáruído Bántizaraima Juaado jáidino fariséuáido jáidino diga nana güíñeno fímaíritiaioi. Aféruimo dámierie Jesús jicánuaíbitiaioi:

—¿Nibái mei Juaado jáidino fariséuáido jáidino diga nana güíñeno fímaíritiaioi, mei íadi o llófuegamaci fímaíriñediaioi? —daidíaioi.

19 Jesús uai uano ráfueño máimiano íaioi llófuate, afémiedo jáidino finócana jíáimaci féimino onótallena. Daide:

—Airenafuemo uáidogamaci ringo otímie íaioimo illa llezica ¿meita fimairirediaioi? ¿Nibái fimairinidiaioi? Ringo otímie íaioimo illa llezica jaca fimainidiaioi.

²⁰ Mei íadi ringo otímie íaioimona bairóbicailliruimo dúciite; aféruimo uáfueña fimairitiaioi.

²¹ Iemo daje izói ñue onótallena jáíie ráfueño mámano íaioi llófue; daide:

—Buna jáíacuiro inícuero cúaidinomo comue jofo gájicaiñede iniroi nitácapu dájemo jofo jillíñede, mei comue gájicaiñede nitácapu afe jáíacuirona onífenodo nane ráataitade. Iemona cúaidino jae iere aillóite.

²² Daje izói comue vino jácara igorai ie finoina botéllamo jóonenide. Jácara botéllamo comue vino jóoneadi, afétella bójicaide. Iemo nana vino táinomo tójicaide. Daje izói afe igorai finoina botella bójicaillano meine finónide. Ie jira comue vino comue igorai finoina botéllamo jóonerede, —daide.

Jesús llófuegamaci ocózinairuimo trigo llizíllaticiai tícoidiaioi
(Mt 12.1-8; Lc 6.1-5)

²³ Daa mona ocózinairuimo Jesús ríganíai cígido mácajide ie llófuegamaci diga. Afénodo jaillano ie llófuegamaci arrozna eroide trigo llizíllaticiai ja tícoidiaioi.

²⁴ Iemo fariséuai íena daidiaioi:

—¡Erocai! ¿Nibái mei o llófuegamaci rairuúrede jetádiaioi? Afena ocózinairuimo rairuúrede, —daidiaioi.

²⁵⁻²⁶ Mei íadi afémie íaioina daide:

—¿Jaca nibái David finócana facádoñediomoi? Afémie naa ie nabáiñiairi güille íñena llezica, júbietaillano Juzíñamui jofomo jaide. Ua Abiatar lletáriraini illáimana illáruído, David jofo jaide. Afe jofo eromo Juzíñamuimo eneno mameca rairuúrede panes ite. Dani Juzíñamui lletáriraini áfena güirena; jáíamacimona afe rairuúrede. Afe panes David uánona güite; ie mei ie nabáiñiaimo fecade.

²⁷ Iemo nane Jesús íaioina daide:

—Íima ocózinairui íena finoñega, mei íadi ocózinairui iima íena mameca.

²⁸ Jira Nanoide íima Jitona cue íllamona, ocózinairuina ocúredicue. Aferui Náamadícue, —daide.

3

Jesús ónoina llirídimie jíllotaci
(Mt 12.9-14; Lc 6.6-11)

¹ Jesús dáanomo Juzíñamui uai llófueriracomo jofo jaide. Afénomo ónoina llirídimie ite.

² Afénomo itínomona Jesumo iere eróioidiaioi, ocózinairuimo Jesús bímiena jíllotajana onóillena, áfedo Jesumo fiénidífue jíttallena.

³ Ie jira ónoina llirídimiena Jesús daide:

—Náidacai; jofo bené cígimo bi, —daide.

⁴ Dáanomo jáíamacimo jícanote:

—¿Mínicana ocózinairuimo ómoiri finóredicue? ¿Nibái fiénidífue fínoitícue, nibái ñúfue fínoitícue? ¿Nibái omoi jíllotaitícue, nibái omoi títtaitícue? —daide Jesús.

Mei íadi afémaci ja uai oñédiaioi.

⁵ Jira Jesús íaioiri ríicaide. Daje izói zuure íaioimo eroide, mei íaioi onóiacañena jira. Iemo afe íimana daide:

—Mai, o onoi zúitacai, —daide.

Ie jira ie onoi zuitácaide. Iemona ja ie onoi ñuera.

⁶ Afe mei fariséuai, naa Herodes imaci diga jino jaillano, Jesús fallifue raire mamédaioi.

Aillo nairai jorai fuédamo gairídiaioi

⁷ Jesús ie llófuegamaci diga, jorai fuédamo jaide. Iemo aillo nairai Galilea imaci, íedo jáidiaioi.

⁸ Mei áillue ráfuena, afémie finócafuaiaina, fidíllano aillo Judea énie imaci bite, Jerusalen imaci diga. Daje izói Idumea énie imaci bite; Jordán imani ruicáfelle imaci bite; Tiro, Sidón diga áinori ítímaci bite. Nana dáanomo bitíaioi; Jesús eróizaibitiaioi.

⁹ Ie jira Jesús ie llófuegamaci ocuide nocáe atíllena, aillo nairai iere rillire íemo íñeillena.

¹⁰ Mei iere aillo nairai jíllotata. Iemona nana jáíe iráredino rillire afémiemo gairídiaioi, ie jetánollena.

¹¹ Iemo afénoimo ítinomona dáarie fiene joríairediaioi. Afémiema cióllanona, aféme uícomo ana dújudiaioi. Dújuillano caillíoicaidiaioi:

—O Juzíñamui Jitódio, —daide.

¹² Mei íadi Jesús fiénide joríaina izire rairuide; daide:

—Juzíñamui Jitona cue íllana daiñeno iri, —daide.

Jesús doce dígamie nizede, oni íaioi óriano afémaci ie ñúefue llujíllena
(Mt 10.1-4; Lc 6.12-16)

¹³ Ie mei Jesús ídumo caifo jaide. Dinomo jaillano Jesús comeci óiacagamie dígamie nizede. Afémiemo bitíaioi.

¹⁴ Doce dígamie Jesús níziano ote. Afémaci ie oréllimacina Jesús mamede. Ua íaioina ote ie abímo íllena, ie uai llóitínona jáillena.

¹⁵ Dáanomo ríinona igáiaioi iráredino jíllotallena, íemo jáíe fiénide joría jino oréllena.

¹⁶ Afe nizécamacaci doce dígamie. Afémaci mámeciai: Simón, nímíemo Jesús jáíe mámecina jitaca, Pedro;

¹⁷ Ie mei Zebedeo jító íaillinoi Santiago ie ama Juan diga. Afe íaillinoimo Jesús jáíe mámecaci jítade, Boanerges. Afe mámecaci daína: Iocímie íaillinoi.

¹⁸ Ie emódomo jáíe nizécamacaci mámeciai: Andrés, Felipe, Bartolomé, Mateo, Tomás, Alfeo jító Jacobo, Tadeo, íemo íere Járídotímacimo jaináidímie Simón,

¹⁹ Ie mei Judas Iscariote. Aféme méifodo Jesús ie éoidínoimo fécaítmie.

Fiénide joríaí ríino Jesumo ite táinona daiñírediaioi
(Mt 12.22-32; Lc 11.14-23; 12.10)

Afe méifomo Jesús ie llófuegamaci diga jofomo jofo jaide.

²⁰ Nane dáanomo aillo nairai gairízitiaioi. Iemona Cristo ie nizécano diga ja gúindiaioi.

²¹ Afefue fidíllano ie onóiga nabáíñiai bitíaioi ie oni uíllena, mei afémie uáírtaide daidiaioi.

²² Daje llezica Jerusalémone bite ocuífufue llófueraini, bie izói íeri úritiaioi; daidiaioi:

—Bímie Beelzebumo jaináidímie. Afe Beelzebú fiénide jóríai illaíma, (jáici ie mámecei Taife). Afe Beelzebú ríinodo fiénide jóríai afémie jino juude, —daídíai.

²³ Ie jira Jesús íaiói jíirite. Jíirilla mei, onoiga ráfuiai íaioimo llote:

—¿Nie izói afe Taifedo Taife jíurede? jíiúnide!

²⁴ Daa nairai énenorie jáíziena oni bójicaillano are íñeitíai, mei nágazie coníma díga fuírífiredíai.

²⁵ Daje izói eneno daní jofóredino íaiói bójicaíadi, are íñeitíai.

²⁶ Mei jira Taife dama ie díga fuíríadi, íemona dama ie bójicaíadi, afémie are íñeite. Ua áfedo fúbicaite.

²⁷ ‘Máirimie jofomo, buna jofo jáinide, ie ráaie bairóllena. Dama afémie máia méifomo jofo jaillano bairórega.

²⁸ ‘Uáfueña ómoimo llotícue. Comíní fiénidífuiai nana dórede, daje izói nana íaiói fue borefue díga dórede.

²⁹ Mei íadi Juzíñamui Ñuera Joréñomo fiéní úritímie ie fiénidífuiai jaca ua oni dónide. Dama ie ícoíníia jaca íemo jíite, —daide.

³⁰ Daíí daide, mei afémie fiénidena jóríairede daídíai.

Jesús ei ie ámatíai díga Jesuna uáiduaíbitíai
(Mt 12.46-50; Lc 8.19-21)

³¹ Iemo Jesús ei ie ámatíai díga dúcidíai, mei íadi jino fiébidíai. Dínoímona jofo gairídínona daídíai:

—Maí ie jíirizai, —daídíai.

³² Jesús abído ráíiedino íena daídíai:

—O ei, o ámatíai díga jino íte. O jénuaiíbitíai, —daídíai.

³³ Mei afémie daide:

—¿Buoí cue eina? ¿Buoí cue ámatíaina? —daide.

³⁴ Afe mei ie abído ráíiedínomo eróíllano daide:

—Be mei cue éítíai. Be mei cue ámatíai.

³⁵ Mei Juzíñamui ocuífueña jeire otínona bie cue ama, bie cue míringo, bie cue ei, —daide.

4

Ríjiraíma ie ífue

(Mt 13.1-9; Lc 8.4-8)

¹ Meine dáanomo jorai fuédamo Jesús llófue. Ie illánomo aillo nairai gairídíai. Jamánomo aillo comíní illa jira, Jesús jóríamo íte nocaemo ráízai. Nana comíní guamáemo fiébicaidíai.

² Iemo díga ráfuiai íaioimo llófue. Ua íaiói onóigafuíaido llote. Ie llogáuai daide:

³ —Bíemo cácarei: Ríjiraíma ríjizaide.

⁴ Ricana jailla llezica dáarie rillájíai íodo cocíde. Iemo ófocuízai áfena gūízáíbitíai.

⁵ Jáíe rillájíai nóficiaímo énie íñénaímo cocíde. Afe rigájíai raíre zocade, mei afe énie figo íñédeza.

⁶ Mei íadi jíitoma bílla llezica uzídíai. Jáinao íñénaímo dúdíai.

⁷ Jáíe rillájíai éegíai cígímo cocíde. Afe éegíai zoca anamo itábicaídíai. Meíta jaca llízíñeídíai.

⁸ Mei íadi jíáie rillájíai ñuera éniemo baiíde. Zocádiaioi; ie mei ñue comúdiaioi. Mei ñue llizídiaioi. Daji rígamona zocano aillo llizide; jíáijíai afe baimo llizide; jíáijíai ie baimo ua aillo jamánomo llizide.

⁹ Ie mei íaioina daide:

—Omoimona cacáacadino cacai, —daide.

Afémie nibai íaioi onóigafuíai cígido llófuefirede

(Mt 13.10-17; Lc 8.9-10)

¹⁰ Afe mei Jesús dama fiébilla llezica, afémie áinori itino ie doce llófuegamaci diga íemo jíacánotiaioi:

—Bie onóigafue ¿nie izóí daiíacade? —daidíaioi.

¹¹ Jira íaioina daide:

—Juzíñamui ie uáfodo onóñega illáimana illirui rafue ómoimo llóiacade. Afedo ja lollíomoi. Mei íadi jino ite íemo jaináñedino jaca íaioi onóigafuíaido llogáiaioi.

¹² Daií cue llófuegaiaioi, íaioi cióillano nai uina cióñedimaci izóí íaioi fiébicaillena. Afe izóí cácaítiaioi íadi ónoñeitiaioi. Daií llófuegaiaioi íaioi comeci ífue méidoñeillena; íemo jíái íaioi comeci fiénidifuíai dóficaiñeillena.

Jesús afe ríjiraima onóigafue ja ua jino llote

(Mt 13.18-23; Lc 8.11-15)

¹³ Dáanomo Jesús jíacánote:

—¿Omoi bie onóigafue onóñediomoi? ¿Nie izóí daií mei jíáiena ónoitiomoi?

¹⁴ Afe riraima Juzíñamui ñuefue lloraima izóidimie.

¹⁵ Dáarie comini afe iodo cocide rigájíai izóidiaioi. Afémaci afe cue llogáfueмо cacáreidiaioi. Mei íadi áfena cacáillanona, Taife íaioi comécimo lloga ráfuena raire báruaíbite.

¹⁶ Jíáie comini afe noficiaimo énie iñénanomo cocide rigájíai izóidiaioi. Afe cue lloga uaina cacáillano raire caimare llínnotiaioi.

¹⁷ Mei íadi figo jáinaonide rigájíai izóidiaioiza, dama íanori íllado ñue itíaioi. Afe mei lloga uai ícoinia facátafuíai bíadi, nibai duere íaioi zefuíadi, íaioi íinoñenamona íaioimo lloga uaina raire meine abido zóofetiaioi.

¹⁸ Jíáie comini afe éegíai cígiri cocide rigájíai izóidiaioi. Lloga uaina cacádiaioi,

¹⁹ mei íadi bie éniemo ite raamo comécillano aféfuaíaimo iere járitaitiaioi. Bínie raa íaioina jífuete. Iemona jamánomo aillo ráaniaina óiacadiaioi. Nana bie jofo comeci óiacaigafue íaioimo lloga uaina niné féitate. Ja mei féitagaza; ja ie comécimo llizilla izóí íñede.

²⁰ Mei íadi dámierie lloga uaina cacáillano áfena ñue jeire otíaioi. Afémaci ñuera éniemo cocide rigájíai izóidiaioi. Afe izóí íaioi íllamona, ñúfueiaíña ñue aite izóí finódiaioi. Afémacimona dáarie afe daji rígamona zocano aillo llizilla izóidiaioi. Íaioimona jíáimaci afe baimo llizilla izóidiaioi. Jíáimaci afe ie baimo aillo jamánomo llizilla izóidiaioi.

Mechera iedo cai onóigafue

(Lc 8.16-18)

²¹ Jesús nai úrite; íaioina daide:

—¿Nogo anamo jóonellena mechera meita atíca? ¡Atiñega! ¿Daje izóí inírabani anamo rainállena mechera atícaza? ¡Atiñega! Naga mechera caífo jica raináñefrega, ñue egáíñollena.

²² Mei ja nana báinino ite raa jino uáfodo cíocaitade. Daje izói nana jáanoga rafue ñue onóigafuena jáite.

²³ Omoimona cacáacadino cácarei.

²⁴ Afe emódomo íaioina daide:

—Omoi cacánafuena ñue omoi onoiri. Naga raa omoi faca izói, afe izói Juzíñamui ibana ómoimo fácaiteza. Ie mei afe baimo afémie jamánomo aillo ómoimo íite, mei ñue cacádiomoiiza.

²⁵ Mei iéredimiemo jáiena ille; mei íadi iénidimiemona, íemo due ite raa meine bairolle.

Eniemo rigáji zócajamo mameca rafue

²⁶ Nane dáanomo daide Jesús:

—Juzíñamui illáimana illirui bie izoide. Daa iima éniemo rigájiai júdaia izoide.

²⁷ Rillano afémie abina íniaide. Ie mei cazide. Náiio mona díga jaide. Afe llezica rigájiai zocade; zócano ñue zairide, mei íadi nie izói comuídeza afémie onóñede.

²⁸ Mei ñuera éniemo rigájiai énie zocátaga. Nano fueñe ie ina jino billa, ie mei llizíllachecoí comuíde, ie mei afe llizíllachecoí íjiaina oruide.

²⁹ Ja ie jeia llezica, riraíma afe llizíllajiaina uájide. Mei afe jofo uáruimo ja dúcídeza.

Mostaza llizíllaji iedo onoiga rafue

(Mt 13.31-32; Lc 13.18-19)

³⁰ Jesús nane daide:

—Juzíñamui illáimana illarui, ¿nié izoide? ¿Ñiie onóigafuedo daje izói fácaitaicái?

³¹ Juzíñamui illáimana illarui mostaza llizíllajiai rilla izoide. Afe íjiai nana énie llizíllajiaimona da jaca iere jéjinide.

³² Mei íadi rígamona, nana raróciai ie baimo áillo nana jaide. Ie ícairuai áarie. Iemona féedino ófocuizai ie ícairuaimo ránazaidiaioi. Afe jánamo uái ráiiediaioi, —daí Jesús daide.

Jesús jaca onoiga ráfuiamo mámano llófuefrede

(Mt 13.34-35)

³³ Daí Jesús ie jino llóiacagafuiai aillo bie izói onóigafuiaido jóonecana uite. Iaiio onóillinomo daí llócaide.

³⁴ Onóigafue llóñeniadi, afémacina llófueñede. Mei íadi Jesús ie llófuegamaci díga oni eneno dani íaioi illa llezica nana áfena jino íaioimo lloste.

Jesús jairifo naa jorai bagua díga llícaitade

(Mt 8.23-27; Lc 8.22-25)

³⁵ Aferui nauídemo Jesús ie llófuegamacina daide:

—Jorai ruícafenemo mai cai jai, —daide.

³⁶ Te mei comíni fíano, Jesús uitíai. Afémie illácaedo jáidiaioi. Daje llezica jáícaeiaido afémiedo jáidiaioi.

³⁷ Iemo iere rírede jairifo náidacaide. Iemona jorai bagua nocáe eromo cocide. Uafue, nocáe jáinoina oruíbicaide.

³⁸ Afe llezica Jesús moifecaemo ífo jobéracdamo bíicana inide. Afémie cazítajano íena daidiaioi:

—¡Llófueraíma! ¿O caina ráiruifñedio? ¡Buízaidicái! —daidiaioi.

³⁹ Iemo Jesús náidacaillano jairifo lletade. Llétajano jóraina daide:

—¿Lléicai! ¡Uái ii! —daide. Iemona jairifo lléicaide. Nana ñue jáfuericaide.

⁴⁰ Ie mei ie llófuegamacina daide:

—¿Ñibái mei iere jacíruiiomoi? ¿Ñibai nai Juziñamuimo íñoñediomoi? —daide.

⁴¹ Iadi jairifo ie lléicaitari iere jacínaitiaioi. Dani conímamo úritiaioi:

—¿Bie ñímie? ¡Jairifo jorai diga, afémie uaina jeire ote! —daidiaioi.

*Gerasa éniemo fiénidena jóriairedimie Jesús jllotote
(Mt 8.28-34; Lc 8.26-39)*

5

¹ Jae jorai ruicáfellemo ite Gadara éniemo dúcidiaioi.

² Jesús nocáemona jino jáidemo, raiáfuai illánomo ífirede fiénidena jóriairedimie Jesumo bite.

³ Afémie raiáfuai illánomo ífirede. Aféruillaído afémie jaca buna llójeodo cuinánide.

⁴ Diga ícaiño llójeodo idai onoi diga íena cuinádiaioi, mei íadi afémie afe llójeona titada jaca jéenino titúbite. Jaca buna afémiena anáfenonide.

⁵ Mona naio diga afémie afénomo macáfiredé. Iduaido caillicana jaide naa raiáfuaído. Daje llezica nofciaído ie abi bofécade.

⁶ Iadi Jesuna jicana code; cóillano, aizícana bite. Billano Jesús anamo afémie ie caiñícido ana dújude.

⁷ Jesumo riire lléjeicaide:

—¿Ñibái cuemo jíricaidio? O Jesúsio; jamánomo caifoide Juziñamui Jitódio. Juziñamui mámecido omo jicádícue duere cue zéfuiñellena, —daide.

⁸ Daií lléjeicaide, mei nano fueñe Jesús íena dáideza:

—¿Fiénide jóriai, bie ímmona oni jai! —daide.

⁹ Jesús íemo jicánote:

—¿O mei búdio? —daide. Uai ote:

—Cue mámece Aillo Dáanomo Íraicano, mei áillomacídicaiza, —daide.

¹⁰ Iemo fiénide jóriai Jesumo izire jicade, afe éniemona jica íaioina oni óreiñellena.

¹¹ Afe íduai áinomo aillo tóica meróniai güífiredé.

¹² Ie jira fiénide jóriai Jesumo jicade:

—Afe meróniaimo cai oreri, dinomo cai ílleza, —daidiaioi.

¹³ Ie mei Jesús fairíote. Iemo fiénide jóriai ímmona jino meróniaimo jáidiaioi. Mena mil tóinai ite. Nana afe tóinai jorai ígodado aizida cocidiaioi. Iemona jóramo coróbaitiaioi.

¹⁴ Ie jira meróniai úiñoraimaci jacínaillano botádiaioi. Afe rafue íaioi jófue mo lluájidiaioi naa jínoidimaci diga. Ie jira afe finócafue mo comini eróizaibítiaioi.

¹⁵ Jesús illánomo dúcillano nauí fiénidena jóriairedimiena ciódiaioi. Mei íadi ja birui afémie ñue uái ráiide. Ja inícuirona jitáuide. Ja ñue abina onode. Nana comini jacíruiítiaioi.

¹⁶ Ie mei ciódino nauí fiénidena jóriairedimiemo finócafue na lluájidiaioi. Daje izói meróniaimo finócafue llotíaioi.

¹⁷ Ie mei Jesumo izire jicajidiaioi íaioi éniemona afémie oni jáillena.

¹⁸ Jesús meine nocáe eromo jailla llezica, nauí fiénidena jóriaina ogámie Jesús diga íllena izire jicade.

¹⁹ Mei íadi Jesús fairíofede. Afémiena daide:

—Mai o jofomo jai. O comínimo nana omo cue finócafue o lluájiri. O Ocuíraimadicueza. Omo cue dúecaillafue lluájiri, —daide Jesús.

²⁰ Te jira afémie jaillano nana Jesús afémiemo finócafue lluájide. Uafue nana Decápolis éniemo lluájide. Nana comini aféfuerei fáigacaidiaioi.

*Jairo jiza jíllotafue
(Mt 9.18-26; Lc 8.40-56)*

²¹ Jesús meine jorai ruícafenemo nocaedo jáidemo, aillo comini Jesús illánomo gairízaibitiaioi. Afémie dino jorai fuédamo fiévide.

²² Iemo Juzíñamui uai llófueriraco illáinimona dámie dúcide. Afémie mámecei Jairo. Jesuna cióillano ie ídaimo bíjicaide.

²³ Daje llezica izire jicade:

—Cue jiza tíiacade. O onoi cue jízamo bítaibi, ie jíllolleza, ie tíñelleza, —daide.

²⁴ Iemona Jesús afémie diga jaide. Ie llezica aillo comini afémiedo rillire jáidiaioi.

²⁵ Afémaci cígimo daa ringo iráredingo ite. Doce diga fimona dícotaite.

²⁶ Aillo manórirainimona duere zéfuide. Afe manórirainimo afengo úcube nana fuite. Iadi jaca íñoñede, mei íadi jamánomo irárede. Ua iere ana jaide.

²⁷ Naui jáímacei Jesudo úrillafuena cacáillano, afe ringo óodana comini cígido Jesumo áinozide. Iemo afémie inícuero jetánauide.

²⁸ Afe úicori afengo comeci anado daide; “Ie inícuero cue jetáadi jíllotitue,” daide.

²⁹ Te mei inícuero jetaa llezica afengo die tótaja llícaide. Afe llezica ie irárena jílluamona afengo abi ñue cacaiide.

³⁰ Te mei Jesús onóbicaide. Uafue, ie ríinodo da come jíllotaga afémie raire fidide. Ie jira comini cígido jino éroicaillano jicánote:

—¿Mei bu cue inícuero jetaca? —daide.

³¹ Iemo ie llófuegamaci afémiena daide:

—¿Aillo comini rillire fínuana cióñedio? ¿Ñibái mei bu o inícuero jetaa jicánotio? —daidiaioi.

³² Mei íadi Jesús nágafene erórifide afémie inícuero jetádingona cióillena.

³³ Ie mei afengo jágieri cuidirite. Aféngomo finócafue onóillano, Jesús uíecomo ana bíjicaizaibite. Afengo rafue nana afémiemo uáfuea jino llote.

³⁴ Jira Jesús daide:

—Eicango, o comécido ñue ínotio, jira jíllodio. Mai jai. Jaillano uái o iri. O irárenamona ja jíllodioza, —daide.

³⁵ Jesús nai úritemo, dáarie comini illaíma Jairo jofómoma bitíaioi. Dúengo moomo lluáibitiaioi:

—O jiza ja tíide. ¿Ñibái mei are llófueraima ifoci daidódio? —daidiaioi.

³⁶ Mei íadi Jesús íaioi uai jeire oñeno, llófueriraco illaíma Jáirona daide:

—Jacíruiñeno iri. Dama o comécido ínori, —daide.

³⁷ Iemo Jesús nana comini íedo jáíñellena rairuide. Dama Pedro, Santiago, ie ama Juan diga uite.

³⁸ Llófueriraco illaíma jofomo dúciillano, Jesús aillo comini faillíñainana cacade; nana cáillicailli énaillana cacade.

³⁹ Jofo jaillano Jesús daide:

—¿Ñibái mei iere faillíñaidiomoi? ¿Ñibái mei iere éediomoi? Afeza tííñedeza; fia inide, —daide.

⁴⁰ Iemona afémieri tadáidiaioi. Ie mei Jesús nana íaioi jino orede. Dama jiza moo, afengo ei, íedo bitímaci diga jofo uite. Jiza illácomo jofo jáidiaioi.

⁴¹ Jiza onoi llánuano daide:

—Talita, cumi—. Aféuai dobáicana llote: “Jiza, ona daidicue, náidacai.”

⁴² Daí dái namona afengo raire náidacaide. Náidacaillano macade; mei afengo doce diga fimona íteza. Aferi comini iere fágacaidiaioi.

⁴³ Mei íadi Jesús:

—Afe fue bumo lloñoeno iri, —daide. Daí ocuide. Afe llezica afe ringoza ecállena íaioina ocuide.

6

Jesús Nazaremo jailla

(Mt 13.53-58; Lc 4.16-30)

¹ Dinómona Jesús ie éniemo jaide. Ie llófuegamaci íedo jáidiaioi.

² Ocozinaillarui mo dúcillanona Juzíñamui uai llófueriracomo llófuiaide. Aillo comini éna cacáreidiaioi. Iemona éna jacíruicana fáigacaidiaioi. Daidíaioi:

—¿Ninómona bímie nana bie ráfuiái onode? ¿Mínica bie onónafue íemo ite? ¿Nie izói afémie bie aillo uaido dái namona comuítaga raa comuítarede?

³ Mei bímie afe aménado tájiraíma, zero ua? Afémie María jitoza onódicai, zero ua? Daje izói afémie ámatiaí Santiago, José, Judas, Simón dígadeza onódicai. Iemo ie miríngotiai nai cai cigímo íllana onódicai, —daidiaioi.

Iemona afémaci Jesús uaina náfueacañediaioi.

⁴ Iemo Jesús íaioina daide:

—Nana jíáie comini, Juzíñamui uai jino llóraímana ñue jíeruitiaioi. Mei íadi afe llóraíma énie imaci, íezie imaci diga, figo éna jíeruiñediaioi. Daje izói ie jofo imaci éna jíeruiñediaioi, —daide.

⁵ Ie jira afénomo jamánomo aillo fia uaido dái namona comuítaga ráfuiaina comuitanide. Due iráredinomo ie onoi bítanona jíllotate.

⁶ Mei íadi nabémaci íñoñenari afémie fáigacaide. Ie mei Jesús áinori ite jófuedo llófuecana uite.

Jesús ie doce dígamie oni jíáinomo óriano llotátate

(Mt 10.5-15; Lc 9.1-6)

⁷ Jesús ie doce dígade llófuegamaci uáidote. Uáiduano ménamierie íaioi orede. Afe llezica Jesús afe íaioimo ie riino iga, fiénide jóriai jino oréllena.

⁸ Ie llófuegamacina ocuide:

—Omoi jaille íodo ráíñuai jíáie mínicana uiñoeno iri. Daa omoi jigüida diga jairi. Tura uiñoeno iri. Pan úcube diga uiñoeno iri.

⁹ Omoi ídai íco jíitada jairi. Mena caifófocuiro uiñoeno iri, dama o jítaoigacuiro uiri, —daide.

¹⁰ Iemo nane íaioina daide:

—Nícomo o jáiadi, dinó o fiébiri; ua afe éniemona jíáinomo o jáiacana llezica dinó o fiébiri.

¹¹ Jáícomo omoi jáiadi, ómoína íaioi llíñoñeniadi, afénomona jairi. Daje izói o uai cacáacañenomona jairi. Jaillano, o ídai ícomo ite eníchoma jino íaioimo teténori, daí íaioi finócafue mo o jíeruiñenana jino llóitio. Uáfue na omoi lloticue: Uire duere finóbillirui mo dúcia llezica, ómoína llíñoñedíno

jamánomo duere finóbitiaioi. Mei íadi Sodoma comini Gomorra comini diga figo duere finóbiñeitiaioi, —daide.

¹² Temo ie llófuegamaci jino jáidiaioi. Jaillano comini llotíaioi:

—Mai omoi comeci ifue meídori, —daidiaioi.

¹³ Daje llezica aillo fiénide jóriai jino orédiaioi. Iráredinomo cáredijina due jónetiaioi; íemona jillodiaioi.

Juan Bautista tíllafue

(Mt 14.1-12; Lc 9.7-9)

¹⁴ Illaíma Herodes aféfuiaína como fidide. Mei nana comini Jesús jalléinana onódiaioiza. Dáarie daidiaioi:

—Juan Bautista tíde íadi meine abido cáadimiena jaide. Iemona bie ríino afémiemo ite, —daidiaioi.

¹⁵ Jáimaci daidiaioi:

—Bie Juzíñamui uai llóraíma Elías, —daidiaioi.

Nane jáimaci daidiaioi:

—Jaiái Juzíñamui uai jino llóraíni izoide bímie jáie Juzíñamui uai llóraíma, —daidiaioi.

¹⁶ Herodes áfena cacáillano daide:

—Bímie ifona cue jaitátagamie Juan. Ja birui tíllanomona meine abido caade, —daide.

¹⁷ Herodes ama Felipe; ie ofaiño Herodías, mei íadi Herodes afengo ie aina ote. Afe Herodías ícoínia Herodes Juan jae llavétate. Afe llezica íena llavéracomo maitátate.

¹⁸ Mei nauí Juan Heródemo llógaza:

—O ofaiño o aina ónido; áfena rairuírede, —daide.

¹⁹ Ie jira Herodías Juamo éoicana eroide. Iena fáiacade, íadi íena fánide.

²⁰ Herodes afémie comécina jaícina ñue jóidimienana onode; iere ñüemienana onode. Nñefuedo íena jacíruite. Ie jira afengo íena fiéni finótañede. Herodes Juan llogafue nai figo onóñede, íadi caimare íemo cacáreide.

²¹ Mei íadi Herodías jáíifuemo uíbicaide. Herodes jocóinamona jáie fimona fuilláruimo dúcide. Jira aféruído Herodes cumpleaños rafue finode. Nana ie illaíni, jabóllaiíni, Galilea ocúraíni diga afénomo gairídiaioi, mei Herodes uáidogaíaoiza.

²² Dinomo Herodías jiza jofu jaillano zaite. Afengo záillari Herodes íóbide; daje izóí nana ie diga güízáibitino íóbidiaioi. Iemona illaíma Herodes aféngona daide:

—O jícaacaíga raa cuemo jica. Omo ííticue, —daide.

²³ Ríírede uaido nana afengo jícalte raa ie fecállena íaíoi uíécomo llote: “Nana cuemo jainaide éniemona júbene o jitailla díeze omo llóíticue,” daide.

²⁴ Afengo jaillano ie eina daide:

—¿Mínica jícaíticue? —daide.

Afengo daide:

—Mai, Juan Bautista ífoci jica, —daide.

²⁵ Afe ríngoza jarire illaíma illánomo jofu jaide; íena daide:

—Raíre plato eromo Juan Bautista ífoci jóoneta cuemo íne, —daide.

²⁶ Iemona illaíma iere zúureficaide. Mei ja ríírede uaido llógaza afengo jícaána afémie jáanoiacañede. Daje llezica nana ie uáidogamaci cacádiaioi. Ie jira jáanoiacañede.

27 Ie jira afe llezica ie abi úiñoraima raire llavéiracomo orede, Juan ifoci atállena.

28 Afe abi úiñoraima llavéiracomo jaillano, Juan ifoci jáitano plátomo jóoneta atide. Afémie aféngomo izáibite. Iemo ie eimo afengo izájide.

29 Juaado jáidino, fidíllano, ie abi uájidiaioi, ráillena.

Jesús cinco mil dígade iññai ecade
(Mt 14.13-21; Lc 9.10-17; Jn 6.1-14)

30 Afe mei Jesús naui oni jino orécamaci meine Jesumo gairíllano, nana íaioi finócafue afémiemo llotíaioi. Afe íaioi llogafue llotíaioi.

31 Iemona Jesús íaioina daide:

—Mai bi, oni báinino cai ocózinailli, —daide.

Aillo comíni dúcioidiaioi, jáioidiaioi; ie jira Jesús ie imaci diga, güñidiaioi.

32 Ie mei Jesús ie imaci diga nocaedo oni eneno tíi daidínomo jáidiaioi.

33 Mei íadi aillo nairai íaioi jáillana ciode. Jesuna onóillano nana jófuemona batínomo aizícana jáidiaioi. Uafue, Jesús ie imaci diga uícomo dúcidiaioi.

34 Jesús dúcia mei nocáemona jino jaillano aillo comínina ciode. Cióillano afémacimo dúecaide. Íaioina izírute nibai úiñoraimanide ovéjaiai izóí itíaioi. Ie jira diga ráfuiaina íaioimo llotie.

35 Ja nauídemo ie llófuegamaci afémiena daiízaíbitiaioi:

—Ja nauízai. Afe benomo comíni jofona iñede.

36 Mai comíni oni ore áinori itícuaímo jáíe jofue diga, dínomo íaioi güille íbajillena. Mei íaioi güillena benomo iñédeza, —daidiaioi.

37 Jira Jesús uai ote:

—Mai omoi íaioi eca, —daide.

Afémiena daidiaioi:

—¿Cai meita jaillano íbáredícai, doscientos dígabe fidi pan bimaci ecállena? —daidiaioi.

38 Jira Jesús daide:

—¿Niga pan ómoimo ite? Eroizai, —daide.

Afe fidíllano daidiaioi:

—Jubécuiro diga panes ite, mena chamu diga, —daidiaioi.

39 Ie jira mócorede raitíremo Jesús comíni énenorie dázierie raizítate.

40 Iemona cincuenta íemo jáí cien dígamierie raizídaitiaioi.

41 Iemona Jesús afe jubeba panes mena chamu diga líinote. Líinuano caifo monamo érocaillano:

—Iere figura, —daide. Daií dainano afe pan ditade. Dítajano ie llófuegamacimo fecade. Llófuegamaci ja comínimo oni fecádiaioi. Daje izóí mena chamu nana comínido fecádiaioi.

42 Nana comíni güítiaioi. Ua ñue jeírediaioi.

43 Güilla mei panes chamu diga fiébidínona doce dígagai cirigai oruítatiaioi.

44 Afe Jesús fecaca panes güítimaci cinco mil dígamíai.

Jesús jainoi emódodo macade
(Mt 14.22-27; Jn 6.16-21)

45 Raire méifodo Jesús ie llófuegamaci nocaedo jorai ruícafenemo orede. Afe llezica íaioina ie uícomo Betsáídamo orede. Dínomo íaioi jailla. Daií ñeta llezica mei Jesús nana comíni diga rainode.

46 Íaioi ráinua méifodo Jesús idu emódomo Juzíñamuímo úrizai.

47 Ja naiomo nocáe jorai cígimo ite. Jesús dama éniemo fiébicaide.

48 Jesús íaiói taino jáiana ciode. Taino jaitíaiói, mei jairifo meine íaiói fúuoiodeza. Iemo ja monázaidemo Jesús íaióimo ánozide. Jainoi emódodo macade. Ánozide, íadi jicado fíaiide izóí macade.

49 Ie jainoi emódodo mácajana íaiói cióillano comeci jacíruióicana facádiaiói: “¡Níbái janaba!” daidíaiói. Jira caillóidiaiói.

50 Nana áfena cióillano iere jacínaitíaiói. Mei íadi Jesús raire íaióimo úrite; daíde:

—¡Abi omoi mame! ¡Cueza! ¡Jacíruiñeno omoi iri! —daíde.

51 Íaióimo itácaemo jofo jaide. Jofo jáidemo jairifo llícaide. Iemo jacíruióicana áferi iere fáigacaidíaiói.

52 Ua afe daí fáigacaidíaiói, mei afe duera pan fia uáimona jamánomo aillo comútatena comécido onóñediaiói; íaiói comeci nai ríirena jira.

*Genesaret éniemo ite iráredino Jesús jíllotate
(Mt 14.34-36)*

53 Jorai ruicáfellemo jáitanona Genesaret éniemo dúcidiaiói. Zíjillano nocáe arí cuinádíaiói.

54 Nocáemona jino jailla llezica, afénomo ite comíni raire Jesuna onódiaiói.

55 Iemona afémaci nana afe éniemo raire aizícana llujídiaiói. Iemona Jesús illánona fidíillano, afe dinomo iráredimaci duera inírabanido atídiaiói.

56 Nágagobiaido ie jáiacana izóí afe jofue cígimo ite ocózinairanomo iráredino jónefredíaiói. Aillue jofue diné ie jáiadi, dúera jofue diné ie jáiadi, fia jofo inénallegoíde ie jáiadi, daje izóí iráredino iomo jónetíaiói. Afe llezica Jesús inícuíro fueda íaiói jetánollena daa bie dáarie izire íemo jicádiaiói. Nana áfena jetánotino jíllobicaídiaiói.

7

*¿Minica caina íaire finode?
(Mt 15.1-20)*

1 Iemo fariséuai Jesumo ánozidiaiói, dáarie ocuícáfue llófueraíni diga. Afe llófueraíni Jerusalémona bitíaiói.

2 Nana bimaci Jesús llófuegamacimona dámerie ciódíaiói. Afe llófuegamaci onói jocóñeno güitíaiói, fariséuai afémacina daí daíde, mei bimaci onói jócua ocuica níciduafuemo dúcítaiñediaiói. Afe ícoínia íaiói jánana úritíaiói.

3 Daí daidíaiói mei fariséuai nana judíuai diga íaiói jáiáigima uai nai uícadiaiói. Aféfuai daíde, comíni nai bie izóí íaiói onói diga ícaíño jócoñenia güíndíaiói.

4 Daje izóí güille fecáracomona meine billano, onói jócua ocuica níciduafue nai fuitáñenia güíndíaiói. Nai aillo ite afémaci jíáie uícaigafuíai. Uafue, íaiói jíróracuai diga ícaíño jocófredíaiói. Daje izóí íaiói ícírui, cadéruai, jamánomo diga ícaíño jocódíaiói íaiói inírabanillai diga.

5 Iemona fariséuai, ocuícáfue llófueraíni diga Jesumo jicánotíaiói:

—¿Níbái mei o llófuegamaci cai jáiáigima daínáfuíai uícaíñediaiói? Daí onói íáirededo güitíaiói, —daidíaiói.

6 Jesús uai ote:

—Juzíñamui uai lloraíma Isaiás ñue llote. Nana omoi abína ñúemaci, íadi comécina íáiredíomoi. Ie cuia llezica ómoímo llote:

Bie comini fueo ñúefue cuemo jitádiaioi.

Mei íadi íaioi comeci cuemo jaináñíede.

⁷ Cue ñúefuedo úrilla cuemo gairífirediaioi, mei íadi íaioi úrillafue ráifiñede.

Íaioi lófuega Juzíñamui daináuai, fia jamai comini ocuífuaia.

Juzíñamui uáñíede, daí íaioi daina íadi, daide.

⁸ Mei Juzíñamui ocuífufue féitatioi, fia comini daináfuaia jeire omoi óllena. Aféfuia daide: icíruai jocóllena, jiróracuai jocóllena, aillo jíáie afe izóidífuaia omoi finóllena.

⁹ Iemo afe emódomo bie izóí zanoda íaioina daide:

—Juzíñamui ocuífuaia iere ebire oni eneno omoi fáicanocaiga, dani omoi daináfuaia uícaillena.

¹⁰ Mei Moisés daide: “Ñue jacíruioicana o moo canori, o ei diga. Ie ei ie moo diga fiénina úritimie uáfuea titáredeza,” daide.

¹¹ Mei íadi jíáifodo daidíomoi:

—Dámie ie moo íaillinona bie daíñíede, “Ona canónidíue, mei nana cuemo ite ráaie jae ‘Corbán’ itíaioiza”. (Afe uai dobáicana daina Juzíñamui íena mamécaza.)

¹² Damie daí daííadi, ja mei ie ei ie moo diga canónide náfuetioi.

¹³ Afe ícoina Juzíñamui ocuica uaina jámairitioi. Uafue, comini llocana jaide llogafue ínota ñúefuena jámairitioi. Aillo afe izóidífuaia finóñíredioi.

¹⁴ Nane dánomo Jesús comini jíñrite; jíñrillano íaioina daide:

—Nana omoi cácarei, comeci onóiri.

¹⁵ Nana güillemo comécina íairenafue íñede. Mei íadi comécimona jino bitífue come comeci íáiretate.

¹⁶ Omoimona cacáreiacadino cacai, —daide.

¹⁷ Jesús comini fíano jofomo jaide. Dinomo ie lófuegamaci afe onóigafuedo íemo jícanotiaioi.

¹⁸⁻¹⁹ Iemo íaioina daide:

—¿Daí jaca óñoñíetioi? Nana jinona güiga raa comécimo jáñíede. Jébegimo jaide. Ie jira cómena íáiruitañede. Jébegimo jailla mei, abímona oni dotácaza. ¿Aféfuena fidíñedíomoi?

Afedo Jesús daííacade nana güille ñuera.

²⁰ Nane daide:

—Íma comécimona jino bitífue dama afémiena íáiruitade.

²¹ Mei afémie erómona, ua ie comécimona jino fiéni uibíllafue bite; íemo jiruénafue bite, naa jíáie jiruífuaia diga; íemo jíáima méniáfue bite,

²² meríillafue diga; íemo jíáima raa baírócanafue bite, jíáie fiénidífuaia diga; íe mei jíáima jífuaifue bite, nana íáiredífuaia diga. Iemo úradoillafue bite, naa táinona úrillafue diga. Iemo táinona abí ínuafue bite, naa abina onóñenafue diga.

²³ Nana bie figóñedífuaia come erómona bite; billano cómena íaire finode.

Jíázie ingo Jesumo ínote

(Mt 15.21-28)

²⁴ Dinómona Jesús Tiro éniemo jaide, Sidón énie diga. Daa jofomo jaide. Buna óñoñíllena báinino jaide. Mei íadi afémie retáirinide.

²⁵ Iemo fiénidena jóriaredíngo ei, íe íllana raire fidíde. Billano Jesús anamo dújude.

²⁶ Afengo judío ingóñede; jiáizie ingo. Afengo énie mámece Sirofenicia. Afengo jízamo ite fiénide jóríai óllena Jesumo jicade.

²⁷ Mei íadi Jesús daide:

—Juziñamui úruiai raire nano fueñe güilleza. Juziñamui úruiai güille bairoda tóica jico izoide comínimo ígadenia figóñede.

²⁸ Afengo uai ote:

—Uafue Ocuíraima; mei íadi úruiai güillamona, ana cocídijiai, güirábani anamo ite jicótiruai güífirediaíoi, —daide.

²⁹ Je mei Jesús daide:

—Ua llotio. Iemona ja jáiredio, o jízamo ite fiénide jóríai jae oni jáideza, —daide.

³⁰ Afengo jofomo dúcina llezica, iníramo bíide jízana ciode. Fiénide jóríai ja ua aféngomona ñue oni jaide.

Jefona cacáñede gogódimie Jesús jíllote

³¹ Nano íanori íllano Jesús ja Tiro éniemona billano, Sidón énie dibénedo jaide. Afe mei Decápolis éniemo ite jófuijai dínedo jaide. Aféniedo jaillano, meine abído Galilea jóraimo dúcide.

³² Afénomo jefona cacáñede uaina jino figo baiññedimie Jesumo atídíaioi. Iemo izire jicádíaioi Jesús afémiemo onoi bitállena.

³³ Je jira Jesús náiraímona oni báinino íena uite. Dinomo Jesús dama ie onocai jefona cacáñedimie jefomo dutade. Je mei Jesús dama ie onócaimo tuánuano afe úriññedimie iife jetánote.

³⁴ Afe mei Jesús monamo érocaillanona comece zúurenamona zegóricade. Zegóricailano íena daide:

—¡Efata! —daide. Afe uai jino dobáiñuano daína: tújicaie.

³⁵ Afe llezica jefona cacáñedimie jefo tújicaide; ie iife ñue jíllode. Iemona afémie ja ñue úrite.

³⁶ Iemona Jesús íaioina rairuide:

—Jíaimacimo lloñeno iri, —daide. Jesús afe daí dígacaiño íaioina rairuide. Mei íadi Jesús iere rairuide íadi, áfena náfueñeno aféfuena baimo jino llócaidíaioi.

³⁷ Iemo nana comini iere jamánomo fáigacaidíaioi. Daidíaioi:

—Nana ñue finode. Afémie jefona cacáñedimie cacáitate; uaina jino figo baiññedimiena ñue úritade, —daidíaioi.

8

Jesús cuatro mil díga comini ecade (Mt 15.32-39)

¹ Aféruillaido aillo comini meine dáanommo gairídíaioi. Íaioi güille íñede. Je jira Jesús ie llófuegamaci jírrita, íaioina daide:

² —Bie náiraíri dúecaidicue. Ja daruíamani benó cue díga itíaioi. Íaioi güille jae íñede.

³ Güiñeno íaioi jofomo orédicuenia, iodo báicana jáitíaioi. Dáarie jicana bitíaiouza, —daide Jesús.

⁴ Je llófuegamaci uai otíaioi:

—Benó bu íñénañoza ¿minícana íaioi ecáredicai?

⁵ Jesús íaioimo jicánote:

—¿Níga panes ómoimo ite? —daide.

Jira afémaci daidíai*oi*:

—Siete panes caimo ite, —daidíai*oi*.

⁶ Ie jira nana comini ana éniemo ráiitate. Iemo Jesús afe siete panes líinuano, Juziñamuina “Figora” daide. Daina mei, afe panes ditade. Daií ñeta, ie llófuegamacimo ite. Afe mei llófuegamaci comínido oni fecadíai*oi*.

⁷ Afémacimo due jiza chamu ite. Jesús Juziñamuina “Figora” dainano afe chamu fecátate.

⁸ Nana güitíai*oi*. Iemona ñue jeíredia*oi*. Ie mei güillamona fiébidino siete diga cirigai iráidíai*oi*.

⁹ Afe güitino cuatro milmo áinoziacade. Afe mei Jesús nana íai*oi* rainode.

¹⁰ Ráinua mei afémie raire ie llófuegamaci diga nocaemo jofo jaide. Iemo Dalmanuta éniemo jaide.

*Fariséuai uai dáinamona comuide onótate raa jicadíai*oi**
(Mt 16.1-4; Lc 12.54-56)

¹¹ Iemona fariséuai Jesumo júfiduaibitia*oi*. Ie facátaiacadia*oi*. Iemona: “Monámona uaido comuide onótate raa caimo ácatari,” daidíai*oi*.

¹² Iemo Jesús comeci zúurenamona izire zegóricailano daide:

—¿Nibái mei bie nairai uáimona comuide onótate raa jicadíai*oi*? Uáfuenta ómoimo lloticue, jaca onótate raana bu ómoimo finoñeite, —daide.

¹³ Jira Jesús íai*oi* fiiano meine nocaemo jaide. Iemo jorai enéfenemo jaide.

Fariséuaimo ite pan aillo fáitate raa izóidifuedo Jesús llote
(Mt 16.5-12)

¹⁴ Jesús ie llófuegamaci diga íai*oi* jailla llezica, íai*oi* ráiñuai féitatia*oi*. Dinó nocaemo fia daa pan íai*oi*mo ite.

¹⁵ Iemo Jesús íai*oi* ocuide:

—Omoi cacai. Fariséuaimo ite pan aillo fáitate raa izóidifuemona abí omoi rairuri. Daje izóí Heródesmo ite pan fáitate raa izóidifuemona abí omoi rairuri, —daide.

¹⁶ Iemo llófuegamaci dani conímamo llotíai*oi*:

—Nibai cai pan iñena jírari, Jesús caina daií riire daide, —daidíai*oi*.

¹⁷ Jesús dani íai*oi* úrillana onóillano daide:

—¿Nibái mei, “caimo pan iñede” dani jofo conímamo daiífriediomi? ¿Nai fidíñediomi? ¿Nai omoi comécimo déiñede? ¿Omoi comeci nai iere riirede?

¹⁸ ¿Omoi uído cióñediomi? ¿Omoi jefodo cacáñediomi? ¿Nai cue finócafuenta onóñediomi?

¹⁹ Naui cinco mil íñia*oi* dígamiedemo afe cinco panes cue fecácamo, ¿niga cirigai fiébidinona iráidiomi? —daide.

Iemo daidíai*oi*:

—Doce dígagai cirigai, —daidíai*oi*.

²⁰ Jesús nane daide:

—Daje izóí cuatro mil íñia*oi* dígamiedemo afe siete panes cue fecácamo, ¿niga oruide cirigai iráidiomi? —daide.

Iemo daidíai*oi*:

—Siete dígagai cirigai, —daidíai*oi*.

²¹ Iemo íaioina daide:

—¿Nai omoi comécimo jaca déiñede? —daide.

Betsaida jófuego ite uina cióñedimie Jesús jllotate

²² Ja Betsaida jófuego dúcidiaioi. Iemo uina cióñedimie Jesumo comini atídiaioi. Iena jetánollena izire jicádiaioi.

²³ Uina cióñedimie ónoido llínnota, jofue jinomo Jesús ie uite. Iemo fue fáicido ie uimo bitade. Afe llezica afémie mo onoi bitade. Afe mei íemo jicánote: —¿Ja baca o ui cioide? —daide.

²⁴ Jira uina cióñedimie érocaillano daide:

—Jii, comini mácana ciódicue, mei íadi uáfodo íaioina cióñedicue. Afémaci aménaiai izói cióidiaioi, —daide.

²⁵ Ie jira Jesús nane dáanomo ie uimo ie onoi jóonete. Afe mei afémie riire eroide. Iemo ie ui ja jillode; ja afémie naga raana uáfodo ñue cioide.

²⁶ Ie mei Jesús ie jofomo ie orede. Iena daide:

—Jófuego jáiñeno iri. Afénomo ite comínimo, buna lloñeno iri, —daide.

Pedro Jesús Crístona maméinafue jino ñue llote

(Mt 16.13-20; Lc 9.18-21)

²⁷ Afe mei Jesús ie llófuegamaci diga, Cesarea Filipino éniemo jaide. Afénomo ite jéenide jófuiái dinedo jáidiaioi. Afe iodo íaioi jáillanomo, Jesús ie llófuegamacimo jicánote:

—Comini cuena ¿nie izói daidiaioi? —daide.

²⁸ Afémaci uai otíaioi:

—Dáamierie Juan Bautístadio daide. Jáíimíiai Elíasdio daidiaioi. Ie jáíimíiai jíáie uai llorámadio daidiaioi, —daí uai otíaioi.

²⁹ Iemo íaioina jicánote:

—Omoimona, ¿cuena bu daidíomoi? —daide.

Ie jira Pedro íena daide:

—O Crístodio, —daide.

³⁰ Iemo Jesús íaioina ocuide, aféfuena bumo llóñeillena.

Jesús ie tíllifue fíditate

(Mt 16.21-28; Lc 9.22-27)

³¹ Iemo Jesús dama ie duere finóllifue como fueñe íaioimo llote. Lluano daide:

—Nanoide hima Jitódicueza íadi iere duere zefuítallicue. Eicomini cuena ruifruitiaioi. Daje izói lletáriraini illaini, ocuífue llófueraíni diga cuena ruifruitiaioi. Omoína daidicue, afémaci cuena méineitiaioi. Mei íadi daruíámami íllamona tíllanomona meine abido caífo náidacaiticue.

³² Afefue íaioimo ñue jino llote. Ie jira Pedro eneno oni Jesuna uite. Uillano Pedro Jesús íena lletade.

³³ Mei íadi Jesús meine gírecaillano ie llófuegamacimo eroide. Jesús Pedro llétano daide:

—¡Mai cúemona oni jai! Satanás izóidimiedioza. O comeci Juzíñamí mamécana óñoñede. Dama bie éniemo dúidino úrilla izói úritio, —daide.

³⁴ Dáanomo nane Jesús ie llófuegamaci jírite, nana jíáie comini diga. Íaioina daide:

—Cuedo jáiacadimie mai dama ie comeci jítaina féitari. Féitano cuedo biri. Daí cuedo bíllamona níbai afémie tíiadi afemo comeci fáinide; cuedo bírede.

³⁵ Jaca ninomo íllena, dama ie abí rairuíacadimie dinó jaca raire llícaite. Mei íadi cue ícoínia abí rairuíacañedimie meine jilluano llícaíñeite; daje izói, cue lloga ñúefue ícoínia abí rairuíacañedimie zííñona íite.

36 Mei jiáifodo nana éniemo ite raa cai óiadi, mei íadi afe llezica cai ziiñona illífue niné féiadi, ¿nieze canócacai? ¿Canóñegacai!

37 ¿Níeze ibárede da come ie ziiñona illafue abido óllena? Íbánde.

38 Mei jii, dáamie cuena meáiruadi, abido afémiena meáruiticue. Daje izói bie minícana inoñede fiénidimaci uiécomo cue lloga uaina meáruitimie, íena meáruiticue. Mei Nanoide íma Jitódicueza. Uire cue Moo aillo ñue máiriedo bíticue. Nana ie ñuera abi imaci díga bíticue. Aféruimo bie éniemo ite cuena meáruitinona, daje izói íaioina meáruiticue.

9

¹ Nane Jesús íaioina daide:

—Uáfueña ómoimo lloticue. Benomo itímacimona dáarie nai íaioi tíñenia Juziñamui aillo ie rinodo ie illáimana íllana cíotiaioi, —daide.

Jesús abi jiáifodo méidoficaide
(Mt 17.1-13; Lc 9.28-36)

² Seis dígarui íllamona, Jesús Pedro, Santiago, Juan díga uite. Dani dígamie eneno caifónedumo afémie uite. Ja dinomo íaioi erócana afémie abi jiáifodo méidoficaide.

³ Ie inícuro quénicuirona jaide, ua iere úzerede jaíllici izói. Bie éniemo finódino iníroina afe izói úzeretanidiaioi.

⁴ Afe llezica Elías, Moisés díga Jesumo úrillana cíodiaioi.

⁵ Jira Pedro Jesuna daide:

—Llófueraíma, nii cai benomo ñue illa. Daámami jofóchupi ómoiena cai finolli, daa óchupi, jiáie Moisés ichupi, jiáie Elías ichupi, —daide.

⁶ Afe dáanomo ie llófuegamaci iere jacínaificaidiaioi; jacínaillano Pedro nie izói dánana onóñenano daí daide.

⁷ Afe llezica íaioimo mona uíllie ana bite. Billano afémacina ferínote. Afe mona uílliemona daa uaina cacádiaioi. Llote:

—Bie cue izíruiğa Jitó. Afémiemo cácarei, —daide.

⁸ Afe llezica, nágafene eróroidiaioi íadi íaioi díga buna cíóñena, dama Jesús.

⁹ Idumona ana bitíaoimo Jesús afe íaioimo cíónafue jíáimacimo llúana rairuide. Íaioina daide:

—Nanoide íma Jitódicue. Uire cue tíllinomona meine abido cáadimiena cue illíruimo afe omoi cíónafueña llóreitiomoi, —daide.

¹⁰ Ie jira aféfuemo dani comécidiaioi. Mei íadi afémie tíllinomona abido cáadimiena illífueña jícánofirediaioi:

—¿Minícana íite? —conímana dani daídíaioi.

¹¹ Ie mei Jesumo jícanotiaioi:

—¿Níbái mei ocuífue llófueraíni daífirediaioi, caina illáimate Mesías daínámie uícodo Elías raire bíite? —jícanotiaioi.

¹² Afémie uai ote:

—Iere uafue Elías raire cue uícodo bite. Ua billano nana meine ñue jaícina ínuabite. Iemo, mei Nanoide íma Jitódicueza, cue billáfuedo ¿nie izói Juziñamui Cuegáuai daide? Aféuai bie izói daide: “duere zéfuiticue” daide. Daje izói “comíni cuena jámairuitiaioi” daide.

¹³ Mei íadi ómoina daidicue, Elías ja bite. Dani afémaci óiacana izói afémiemo finódiaioi. Mei Cuegáuai uícodo daína izói, afe izói ja afémiemo zuíde, —daide.

*Jesús fiénidena jóriarede dúemie jíllotate**(Mt 17.14-21; Lc 9.37-43)*

14 **Ie mei ja jáie llófuegamaci illánomo Jesús daámani caifónedumo uigámaci diga meine bitíaiói. Billano aillo comini íaióimo gairíllana ciódiaíói. Ocuica uai llófueraíni daánono ite. Afe llezica afémaci Jesús llófuegamacimo júfidotiaíói.**

15 **Ie mei Jesuna cióillano iere fáigacaidiaíói. Afémiemo aizícana uáiduaidiaíói.**

16 **Ie jira Jesús ie llófuegamacimo jicánote:**

—¿Minica afe ocuica uai llófueraíniemo júfidotiómoi? —daide.

17 **Afénono itímacimona daa uai ote:**

—Llófueraíma, benó omo cue jitó atídícue. Fiénide jóriai afémie uáinino finode.

18 **Náganomo ie jáiadi afe jóriai ie uánona ana dotáfirede. Ja dinomo fuedo mulléfirede; afe llezica ízie mutúricaide. Iemona ie abi iere naillíbicaide. O llófuegamacimo fiénide jóriai jino óllena jicádícue, íadi afémaci ónidiaíói, —daide.**

19 **Jira Jesús uai ote:**

—¡Aíí, Juzíñamuimo íñoñedimaci! ¿Nie dínó ómoíri íítícue? ¿Nie dínó ómoína mozóitícue? Benó dúemie ati, —daide.

20 **Jira atídiaíói. Afe jóriai Jesuna cióillano, afe dúemie abi meine cuidítate. Cúdiamaona afémie éniemo baide. Dinomo jabíoicaide. Fuedo mulléoiide.**

21 **Jira Jesús ie moomo jicánote:**

—¿Ja níe dino daí ite? —daide.

Jira moo daide:

—Jaca ie dúenamona.

22 **Diga ícaíño fiénide jóriai afémie iraimo dotáfirede. Daje izóí illemo dotade ie titállena. Minícana cairi o finórenia, mai cairi fino. Cairi dúecairi. Cai cano, —daide.**

23 **Jesús íena daide:**

—¿Nibái mei “O finóreniadi cai cano” cuena daidíoi? Daí daíñeno iri, mei Juzíñamuimo ínotimiemo naga raa finóredeza, —daide.

24 **Ie jira afe úrue moo caillíoicaide:**

—¡ínotícue! Cue cano jamánomo cue ínolleza, —daide.

25 **Jesús aillo comini ofíllana cióillano, fiénide jóriai riire lletade. Daide:**

—Uáínitade jóriai, cacáitañede jóriai, o jino jáillena ja ocuídícueza, ¡jai! ¡Bie úrue fáinocai! Meine abído íena oñeno iri, —daide.

26 **Iemona jóriai caillide; cáilliano dúemie meine nane riire cuidítate. Cuidítajano oni jaide, íadi afe dúemiema tíide izóí finode. Jira aillo comini:**

—Ja tíide, —daidíaíói.

27 **Mei íadi Jesús ónoído llíñota caífo dúemiema naidánete. Iemona afémie ñue jílloda náidacaide.**

28 **Ie mei Jesús daa jofomo jofo jaide. Afe mei ie llófuegamaci eneno íemo jicánotiaíói:**

—¿Nibái mei fiénide jóriaina ónidicaí? —daidíaíói.

29 **Jira Jesús daide:**

—Bie izóí jóriai dama Juzíñamuimo úrillado, íemo fímaírrillado jino orérede, —daide.

*Jesús ie tíillíue meine fidítate**(Mt 17.22-23; Lc 9.43-45)*

30 Afénomona íaioi jaillano Galilea éniedo jáidiaioi. Jesús báinino jáiacade bu ónoñeillena.

31 Mei aféruillaido Jesús ie llófuegamacimo llófullofuedeza. Afémiemo zúillifue íaioimo llote. Lluano íaioina daide:

—Nanoide íima Jitódicueza íadi uire náiraímo izájillicueza, cue íaioi fállena. Mei íadi daruíámani cue tíllanomona meíne abído cáadimiéna íticue, —daide.

32 Mei íadi afémaci ie dáinana onóñediaioi. Daje izói íemo jíacánuana jacíruiítaioi.

¿Bu íere jamánomo áillomiéna?

(Mt 18.1-5; Lc 9.46-48)

33 Íemo afémaci Capernaumo dúcidiaioi. Jofomo íaioi illa llezica, Jesús íaioimo jíacánote:

—¿Mínícafue íomo júfidotiómoi? —daide.

34 Mei íadi jaca uaina onéidiaioi. Mei jae íodo júfidotiaioi, ¿bu cáimona jamánomo áillomiéna illa?

35 Íe jira Jesús ana ráinaillano, íe doce diga llófuegamaci júrite; daide:

—Dámie raíre uíecodo áillomiéna jáiacaniadi, nano fueñe íere jamáimiéna írede; daje izói nana comíni canóraimána írede, —daide.

36 Íemona Jesús daa úrue llíinuano íaioi cígímo jóonete. Íe mei íe ónoído íena llirínuano comínina daide:

37 —Bie úrue cue mámecido llíinotímie dájena cuéna llíinote. Daje izói cuéna llíinotímie dama cue llíinoñede, mei íadi cue orédimiéna cue abído llíinote, —daide.

Caina éoñedímie cai dibénemo íte

(Mt 10.42; Lc 9.49-50)

38 Íemo Juan Jesuna daide:

—Llófueraíma, dámie cíódicai o mámecido fiénide jóraí jino orede. Mei íadi caído jáíñena jira íena rairuídícaí.

39 Mei Jesús daide:

—Rairuíñeno íri. Mei daí cue mámecido cíórainína raa finódímie ñúemíe. Daí finódímie afe finua méifomo raíre cuédo fiéni úrinide.

40 Mei caina éoñedímie ua cai dibéfodo ítímie.

41 Jáíe come cue mámecido omoi jírótaadi, mei Crístomo omoi jainaina jira, afe jírótatímie uáfúena íe jírídolle raa llíinoite, —daide.

Fiénidífúemo baíllena íere jacírede

(Mt 18.6-9; Lc 17.1-2)

42 Jáíe come, bie cuéna ínote dúemíe fiénidífúemo baítaíadi, afe come fiénide. Baítatímíemona figora, címoímo áillue noñícina cúinano monáillaimo dotárede.

43 Dama o onoi fiénidífúemo o baítaíadi, afe o jaitari. Júbezi onoi diga ziiño ñue illafue Juzíñamuimona o maíñóadi, íere ñuera. Mei nágafezi onoi íadi “comíni duere finolle iraimo” o dotábicaíadi, íere figóñede. Afénomo íte írai dúitanide.

44 Afénomo íte aigíroíai tíñediaioi; afe aigíroi, afeno ítímacína zííñona duere fínoítiaioi. Afe írai jaca dúíñede.

45 Daje izói o ídai fiénidífúemo o baítaíadi, áfena jaita. Júbene ídainide o illa llezica ziiño ñue illafue Juzíñamuimona o maíñóadi, jamánomo ñuera.

Mei jiáifodo iraimo o dotábicaiaidi ñue mena ídairedimie o íadi, iere figóñede. Afénomo ite irai dúitanide.

⁴⁶ Afénomo ite aigíroiái tíñediaioi; afe aigíroi, afeno itímacina zíñona duere fínoitiaioi. Afe irai jaca dúíñeiteza.

⁴⁷ Daje izói o uiji ona íáidaitaiadi, mai afeji cuerónori. Ua júbene fíidimie Juziñamui illáimana illánomo o jáiadi, jamánomo ñuera. Mei íadi nágaillinoi ujíredimie o illa llezica, iraimo o dotábicaiaidi iere figóñede.

⁴⁸ Afénomo ite aigíroiái tíñeitiaioi; afe aigíroi afeno itímacina zíñona duere fínoitiaioi. Afe irai jaca dúíñede.

⁴⁹ Mei nana fia fecaca Juziñamui íobitalle jobaica ríllenaiamo salna jónefirediaioi, afe fecaca rille ñue íllena. Daje izói nana raamo cai jírinafuiaido ñue íredicai. Aféfuiaí irai come uzilla izírena izói caina izi cácataite, Juziñamui anamo ñue cai íllena.

⁵⁰ Sal ñuera; mei íadi afe sal ie cáimana féiadi, çminícado afe sal meine abido cáimacaitarede? Mai dani conímaiaina caimátaillafue dibénemo omoi iri. Afe llezica comeci caimare uái illáfue mo dani conímaiaina ífireiri.

10

*Jesús, naga come ie aina oni dótana rairuide
(Mt 19.1-12; Lc 16.18)*

¹ Jesús ja Capernaúmona oni Judea éniemo jaide. Ua Jordán ruicáfellemo ite éniemo jaide. Iemo aillo comini ie illano dinó meine abido gairízaiibitiaioi. Iemona Jesús ie ífirena izói íaioina llófuete.

² Iemo fariséuaímona dáarie Jesuna fieni facátaibitiaioi. Jesumo jicánotiaioi: —¿Mei nibai dáamie ie aina oni dótajana rairuírede, nibai ráiruíñega? — daidíaiioi.

³ Iemona Jesús uai ote:

—¿Ñie izói Moisés ómoina ocuide? — daide.

⁴ Jira iena daidíaiioi:

—Moisés llote, dáamie ie aina oni dotáacanamona, afémie dinena aféngona “jae ai oni dotaina rabe” cúere de. Ie mei daí oni dotárede, — daidíaiioi.

⁵ Iemo Jesús íaioina daide:

—Moisés afe uaina ómoimo llote, mei omoi comeci ifue iere riíredeza.

⁶ Mei íadi nano fueñe, Juziñamui nana ráaniaina comútaja llezica, “afémie íima ringo diga íaillinoina comútate.”

⁷ “Ie jira naga íima, ie ai úamona, ie moo ei diga fiénocallano, oni dáanomo íitiaillinoi.

⁸ Daí íe ai onónamona afe íaillinoi daa come izóidena jáitiaillinoi.” Ja mena cómeñediaillinoi, dama daa cómedeza.

⁹ Ie jira Juziñamui dáanomo jónegaiaillinoi, comini oni dotánide, — dinori Jesús daide.

¹⁰ Ja jofomo Jesús naa ie llófuegamaciri dúcinamo, ie llófuegamaci aféfuena Jesumo meine abido jicánotiaioi.

¹¹ Jesús íaioina daide:

—Afe ai oni dotádimie jiáie ai óllena, dotaca ringo dibénemo afémie jiruifue fínode.

¹² Daje izói ini oni dotádingo jiáimie mo iníreillena, afengo jiruifue fínode.

*Jesús úruiaí ñue íllena fínode
(Mt 19.13-15; Lc 18.15-17)*

13 **Ie mei Jesumo úruiai atídiaioi, íaioimo ie onoi bitállena. Mei íadi llófuegamaci atídinona rairuide, íaioi átiñeillena.**

14 **Jesús áfena cióillano ríicaide; jira íaioina daide:**

—Rairuñeno iri. Fáinocai úruiai cuemo bílleza. Íaioina llótaidoñeno iri. Juzíñamuimo jaináidino ua afe bie úruiai izói itíaioiza.

15 **Uáfena ómoína daidícue, Juzíñamui illáimana illana jíeruiredícai. Uruiai áfena jíeruilla izói jíeruiredícai. Mei íadi nana afe izói jíeruifedínona Juzíñamui ie caimare illínomo jofo óreñeite.**

16 **Iemo úruiaína llirínvano, ie onoi íaioimo bítano íaioina ñue finode.**

*Ráarede jítócome Jesús diga úrizabite
(Mt 19.16-30; Lc 18.18-30)*

17 **Jesús meine abido jáizaidemo, dáamie aizícana Jesús anamo dújuzaibite. Dújuillano jicánote:**

—Ñue Llófueráima, ¿nie izói íitícue zíiñona cue illino cue óllena? —daide.

18 **Jira Jesús daide:**

—¿Ñibái mei cuena fígomie daidío? Íimamona buna fígomíena iñede. Dama Juzíñamui fígomie.

19 **Ocuícafuiaína onódío:**

“Jíáima ai diga iñeno iri;

come fañeno iri;

meríriñeno iri;

bumo taino lloñeno iri;

jíáima jífueñeno iri;

o moo, o ei diga ñue cacáreiri,” —Jesús daide.

20 **Afémie uai ote:**

—Llófueráima, nana aféfuiaína cue jítócomenamona jeire ófiredícue.

21 **Jesús afémiemo éroicaillano íena izíruite; daide:**

—O dafue nai jeire oñédío. Mai nana omo ite raa fécajiri. Fécajano afe iba dúeredímacimo ine. Iemona jamánomo jirídolle izoide raa monamo omo iite. Daí o finolle mei, cuedo bii. Mei cuedo o bíllamona o tíadi, áfena náfueñeno benó biri. Coco jai, —daide.

22 **Mei íadi áfena cacáillano, afe iima zúucaide. Ua zuure oni jaide, aillo ie ráaniai illa jira.**

23 **Ie mei Jesús abido comínimo éroicaillano, ie llófuegamacina daide:**

—Ñi féirena ráaredímie Juzíñamui illáimana illáruimo jofo jáillena! —daide.

24 **Jira llófuegamaci aféuairi iere fáigacaidiaioi. Jesús meine nane daide:**

—¿Uruiai, ñi féirena úcubena ínotino Juzíñamui illáimana illáruimo jofo jáillena!

25 **Camello eedo uífodo jailla jamánomo juánide, mei íadi ráaredímie Juzíñamui illáimana illáruimo jailla iere Juárezede, —daide.**

26 **Afena cacáillano, jacínaifacaidiaioi. Dani comímamo jicánotiaioi:**

—¿Mei bu jíllóille? —daidíaioi.

27 **Jesús íaioimo eróillano daide:**

—Afena comínimo finónide; mei íadi Juzíñamuimo finórede. Juzíñamuimo finónide raana iñede, —daide.

28 **Jira Pedro íena daide:**

—Ocuíraima, nana caimo ite raana fiénocaidícai o diga cai jáillena, —daide.

29-30 Jira Jesús uai ote:

—Uáfueña ómoina dáitícue, naga come cue ícoinia íemo cue lloga jíllonafue ícoinia diga, ie jofo, ie ámatiai, ie mirínguai, ie moo, ie ei, ie jítoítiai, ie jacáfaiai dieze afémie fiénocaiadi, uáfueña meine llínoite. Ja bie éniemo cien dígacaño afe baimo jofue, ámatiai, mirínguai, étiai, jítoítiai, jacáfaiai llínoite. Uafue, dieze llínoite duere zefuúllafue diga íadi. Ie mei monamo zifíona illino llínoite.

³¹ Aillo biruúllaido nánoraimaci uire ódaidimacina jáitiaoí. Daje izói aillo biruúllaido ódaidimaci uire nánoraimacina jáitiaoí, —daide.

Dáanomo Jesús ie tíllifue lloite
(Mt 20.17-19; Lc 18.31-34)

³² Ja Jerusalén iodo jáizaidiaoí. Jesús ie llófuegamaci uícodo jaide. Comeci iere facábicaidiaoí. Jiáie íedo jáidino jacíruiocana afémiedo jáidiaoí. Jira Jesús doce diga llófuegamaci eneno uáidote. Ianori íllamona íemo finóllifueña abido íaíoimo lloite.

³³ Daide:

—Mai omói cacai. Nanoide fima Jitódicueza. Jerusalemo jáizaidicai. Mei íadi dínomo lletáriraini ílláiniaino izájillicue. Daje llezica ocuica uai llófuerainimo izájillicue. Iemo afémaci cue titállena ócuitiaoí. Onínemacimo cuena izájitiaoí.

³⁴ Cueri jífánodoítiaoí. Cuena tícoítiaoí. Cue túallaitiaoí. Cue títaítiaoí. Mei íadi daruíamani íllamona tíllanomona meine abido cáadimiena íitícue, —daide.

Santiago Juan diga uire uícoinafue Jesumo jícadiaillinoí
(Mt 20.20-28)

³⁵ Afe mei Zebedeo jíto íaillinoí Santiago Juan diga, Jesumo jícajidiaillinoí; daidíaillinoí:

—Llófueraima, coco jicalle jítaigafueña cócomo lloiri, —daidíaillinoí.

³⁶ Temona Jesús íaillinoína daide:

—¿Mínica mei ómicoimo cue finóllena jítaídiomícoí? —daide.

³⁷ Iemo íena daidíaillinoí:

—Uire o ebírede ílláimana íllíruido, cócomona dáamie o nabézimo, jíáimie o jarífezimo cócona o ránatari, —daidíaillinoí.

³⁸ Temona Jesús íaillinoína daide:

—Daí jícadíomícoí íadi abina onóñediomícoí. Cue duere zefuúllifue izói, ua erírede jírolle jírua izói, ¿zéfuiREDíomícoí? Daje izói cue izire tízaillífue izói, ¿tízaiREDíomícoí? —daide.

³⁹ Iemo uai oíaillinoí:

—¡Ie mei! Afena ocuíREDíomícoí, —daidíaillinoí.

Jira Jesús íaillinoína daide:

—Uáfueña dáitícue, cue duere zefuúllifue izói, duere zéfuitíomícoí. Cue izire tílle izói, títíomícoí.

⁴⁰ Mei íadi cue nabéfenemo, cue jarífenemo ómicoí ráinallena, cúemona llónide. Afe ráinallino dama Juzíñamui maméinamacimo dúide, —daide.

⁴¹ Jiáie diez diga llófuegamaci afefue cacáillano, Santiago Juan dígamo ícírítiaoí.

⁴² Iemo Jesús íaíoína jírrillano, íaíoína daide:

—Onódiomoi za, náiraiamo illáimaifiredino riire ocuídillaini dani jáidiaioi, comínina náamatallena. Aféllaini cígiri ite ríimaci, íaioi ríinona izire comínimo cácatatíaoi.

⁴³ Mei íadi omoi cígiri afe daí íñeitiomoi. Mei jáífodo omoi dibénemo illáimana íacadímie, omoi canófiredimiena jáirede.

⁴⁴ Daje izóí ómoimona ocuíacadímiena íacadímie, nana jáíimaci anamo íaioi tájítagamiena írede.

⁴⁵ Mei jii, Juzíñamui oreca Nanoide fima Jitódicueza. Mei íadi jáíimaci cuena canóllena biñédicue. Mei jáífodo nana comínina cánuabiticue. Uafue áillomaci íaioi fiénidífueмона zuitalle izóí, íaioina cue jíllotallena tízaibiticue, —dinori Jesús llote.

Jesús uínidímie Bartimeo jíllotate
(Mt 20.29-34; Lc 18.35-43)

⁴⁶ Jae Jericomo dúcidíaoi. Afe jófueмона Jesús jino jáidemo ie llófuegamaci diga, naa aillo comíniri, uínidímie io fueмо ráide. Afémie Timeo jíto, Bartimeo. Dino afémie úcube jicáfirede.

⁴⁷ Nazaret ímie Jesús áinozillano fidíillano, uínidímie jíriioicaide:
—¡Jesús, jaiaí illaima David Jító, cuemo dúecai! —daide.

⁴⁸ Aillo comíni íena rairuídiaioi ie líicaillena; íadi jaca nai jamánomo jíriioide:

—¡David Jító, cuemo dúecai! —daide.

⁴⁹ Ie jira Jesús uái náidaillano daide:

—Afémie uaido, —daide.

Jira uínidímie uáiduano íena daidíaoi:

—Abi mame. Náidacai. O uáidoteza, —daidíaoi.

⁵⁰ Jira ie emódoiroi duíñuano iere riire náidacaillano Jesumo bite.

⁵¹ Jira Jesús íemo jicánote:

—¿Minica omo cue finóllena jítdíio? —daide.

Jira uínidímie uai ote:

—Llófueraíma, cue úreacadicue, cue eróillena, —daide.

⁵² Jesús íena daide:

—Mai o jairi. O ínuamona jae jíllodioza, —daide.

Afe llezica uínidímie ciode. Iemona Jesús jáillado afémie jaide.

11

Jesús illáimana Jerusalemo jofo jaide
(Mt 21.1-11; Lc 19.28-40; Jn 12.12-19)

¹ Jerusalemo áinozillamona, Jesús mena llófuega íaillinoi úcomo orede. Jae Betfagé jofue, íemo jáí Betania jofue diga áinomo itíaoi. Dáanori Olivo daina ídumo itíaoi. Íaillinoi óriano daide:

² —Úcomo ite duera jófueмо ómicoi jai. Omicoi dúcille llezica cuinaca duera búrrona cíoitíomicoi. Nai áfedo buna ráiñena. Zúitajano cuemo ati.

³ Bu ómicoimo jícanoiaíi ¿níbái ómicoi zuitaca? íena dáitio: “Ocuíraíma Jesús jítailla jira. Ie mei riire meine omo atille,” —daide.

⁴ Afe íaillinoi jaillano jino naze fue iori cuinaca búrrona baizájidiaillinoi. Afe zuitádiaillinoi.

⁵ Dáamie dino itínomona íaillinoina daide:

—¿Minica ñetiomicoi? ¿Níbái burro zuitádiomicoi? —daide.

6 Jira uai otiaillinoi Jesús íaillinoína daina izói. Ie jira:

—Jii, mai ui, —daídíaiói.

7 Iemona búrrona Jesumo izájidiaillinoi. Izájillano íaiói inícuirona burro emodo jobédíaiói. Ie mei dinomo Jesús caifo ráinade.

8 Aillo comini íaiói iníroi iomo jobédíaiói. Jiáimaci íbiairede amena rábaillai otá iomo jónetíaiói.

9 Uícoídimaci ódaídimaci diga júrioicaídíaiói:

—¡Ebírede! ¡Juzíñamui mámeçido bitímie caimáreficairi!

10 ¡Como íacade illáimana illino ñue móonairi! ¡Ua cai jaiáigima comuídmie David illáimana illino ñue móonairi! ¡Juzíñamui ebírede rafue daírri! —daídíaiói.

11 Ja daíí Jesús Jerusalemo jofo jaide. Jaillano Juzíñamuimo gairíracomo jaide. Nágafenemo eróirioicaillano jino Betániamo jaide, naa ie doce diga llófuegamaciri, mei ja nauídeza.

Jesús llizíñede higuera daina amena faidode

(Mt 21.18-19)

12 Afe jáíruido Betániamona jino abído billano, Jesús juffruite.

13 Macádaíaoímo ñue íbiairede higuera aménana Jesús jicana ciode. Iemona dinomo jaide afénamona nibai ie llizíllajiaína óllena. Mei íadi Jesús dúciillano, hígojiaína baiñede. Afe amena táinona fia íbiairede, mei aféruimo hígonino nai dúciñedeza.

14 Iemo Jesús afe aménana fáiduano daíde:

—Jaca benómona buna bie amena llizíñenamona ie llizíllajiaína ríeñeiteza, —daíde.

Daíí ie daínana ie llófuegamaci cacádaíaiói.

Juzíñamui gairíraco Jesús duano ñue finode

(Mt 21.12-17; Lc 19.45-48; Jn 2.13-22)

15 Ie mei Jerusalemo meine dúcídíaiói. Juzíñamui gairíracomo Jesús jofo jaillánona, dinomo ráaie fecáðino íbárioidino diga jino júaide. Ucube méidoraini ibani Jesús caitade, fíicirillaí fecáðino ráiraniaí diga.

16 Afe gairíracomo buna minícana úiñellena afémie rairuide.

17 Íaiói llófuete:

—Juzíñamui Cuegáuai daíde: “Cue jofo ua nana náiraimo Juzíñamuimo úrille illácona mameide,” mei íadi merítino illano jae afénona finóðimoi, —daíde.

18 Lletáriraini illaini, ocuífafue llófueraini diga afe ie finócafueña fidídíaiói. Iemona afémie fállena jenódaíaiói. Iena jacíruitíaiói, afémie llófueinafuerei nana nairai iere fáigacaideza.

19 Ja nauízaidemo Jesús afe jófuemona jino jaide, naa ie llófuegamaciri.

Nauí ciona higuera amena jae zaférede dúraína jaide

(Mt 21.20-22)

20 Afe jáíruido, jítiramo meine abído Jerusalemo íaiói billano, nauí ciona hígúerana abído cíódíaiói, mei íadi birui afe amena nana ie jáinauairi zaférede dúraína ja jaide.

21 Iemo Pedro comeci uíbicaillano, Jesuna daíde:

—¡Llófueraima, erói! O faidoca hígúerana ja dúraína zaféreficaide, —daíde.

22 Jesús íaióimo uai ote:

—Juzíñamuimo mai omói ínofireiri.

²³ Uáfueña ómoína dáaiticue, dáamie jizíñeno nana ie comécido ínuuamona, bie caifóneduna ocuícana daíadi, “Benómona oni ii; jóraimo dotábicaíri,” afe ie daínana ua zúite; afémie jeire ua llezica, afefue daí afémiemo ífcaite.

²⁴ Ie jira ómoína dáaiticue, Juzíñamuimo omoi úrillano jicaca raa, ja nibai o llínoga, áfena mai o ínofireiri. Iemona afe jicaca raa óitiomoi.

²⁵ Nágaruido Juzíñamuimo o úriadi, jáimiena o éoiadi, mai íemo o comécimo ite íaifue féitari. Daí o finori, monamo ite omoi Moo Juzíñamui ómoimo ite íaifuiái dóllena.

²⁶ Iadi o abí ímie iba omoi óiadi, monamo ite omoi Moo Juzíñamui, ómoimo ite íaifuiaina dóñeite.

*Jesumo ocuille uai ite
(Mt 21.23-27; Lc 20.1-8)*

²⁷ Iemo Jerusalemo abido bitíaiói. Jesús gairíracomo maca llezica, lletáriraini illaini íemo ánozidiaíói. Afe llezica ocuica uai llófuetino afémiemo garírdiaíói, éicomini diga.

²⁸ Nana íemo jicánotiaíói:

—¿Bífuiaí ínuana, bu o ocuilla? ¿Bu ríinodo bie raa finódio? —daí daidiaíói.

²⁹ Jesús íaíói uai ote:

—Omoimo daa rafue jicánoiticue. Cuemo uafue omoi llóiaí, bífuiaí cue finoca ríino ómoimo llóiticue.

³⁰ ¿Bu mei ocuica báutizallena Juan? ¿Juzíñamui nibai ocuica, nibai comini? Mai fáirio, —daide Jesús.

³¹ Ie mei afémaci dani júfidotiaíói; daidiaíói:

—Juzíñamui ocuica cai daíadi, Jesús caina fairíoite: “Iemona ¿nibái mei íemo íinoñediomoi?”

³² Mei íadi comini ocuica, daíñidicai, —daidiaíói.

Comínina jacíruillano daí úritiaíói. Ja onódiaíóiza, nana comini Juamo ñue coméidiaíói: “Ua Juzíñamui uaido Juan úrite,” daidiaíói.

³³ Iemona Jesuna daidiaíói:

—Onóñedicaí, —daidiaíói.

Ie mei Jesús íaíoína daide:

—Nie ríinodo bie raa finódicue, daje izói ómoimo llóñeiticue, —daide.

12

*Comini fáfirede tájidino jáífueña caina onótate
(Mt 21.33-46; Lc 20.9-19)*

¹ Iemona Jesús íaíói onóigafuiaido íaíoimo úrizaide; íaíoína daide:

—Nauí dáamie jíriconai izoide raa rizájide. (Afe jírícue izoide raa rínano viñédona mameína.) Afémie afe rillano ie abí cirínora finode. Ie mei afe jíricono eroide úvaíai zaizíraco finode, afe llizilla íj íaíói óllena. Nane are caífo jacafai cigí úíñoraco afémie nite, afe rigano ñue úíñollena.

‘Ie mei afe énie naama dáarie tájítaganomo ie rigano fecade, áfena íaíói úíñollena. Afémie daí fécano oni jica jáíe éniemo jaide.

² Jíriconino llezica, ritímie íe ocuicamie afe tájítagamacimo orede, íeiena mameide llizíllajiai dieze óllena.

³ Mei íadi afe uáibitímiena llaitádiaíói; lláitano íaíói faga. Daí ñeta ria íemo fecáñeno oni íena orédiaíói.

4 Ie jira afe naama nane jiáie ocuícamié orede. Mei íadi afe orécamiéna nófiedo níjidiaioi. Níjiano ie ifona íaioi bofeca. Iemo fiéni íena úritiaioi.

5 Daje izóí nane jiáimie orede. Afémie íaioi titaca tíide. Afe mei diga icaiño aillo jiáie ocuícamiéiá dinomo oréoié. Afe orécamacimona dámiéie fia faga; jiáimaci tícoizítiaioi.

6 ‘Nai dáamié naama díbéne mo ite. Daa afe naama jítone fiébite; iere ie izíruigamié. Iiraicaiño ie jító orede. Comeci facade: “Afémaci ñue íemo comécillano íena ñue ínoítiaioi; ie dáina uaina jeire óítiaioi,” daide.

7 Mei íadi táijitagano dani afémaci úritiaioi: “Bímie níbai ie moo feci raa máíñoítimie. Mai ie cai faa, ie mei cai náamatallena.”

8 Ie jira íaioi llaitaca; íaioi titaca tíide. Ie mei ie abi raiñoeno afénomona oni dotaca.

9 Ie mei Jesús jicánote:

—¿Nie izóí bie énie naama afe fiénidinona íñoite? Billano afe táijitaganona títaite. Ie mei afe jíricore izóidino jiáie úíñoraimacimo fécaite.

10 ‘¿Jaiá Cuegáuaina nai facádoñediomoi? Afe uai bie izóí daide:

Jofó níraíni oni fáoiéa nófie, ja ñuera jíálliraina jaide.

11 Bie cai Ocuíraima finoca.

Iere jamánomo ebire caimo cíoié.

Dinori Jesús úrite.

12 Iemona Jesuna llaitáacadiaioi, llavéllena. Mei ja onódiaoiéa, Jesús bie onóigafuedo íaioina uáitate. Mei íadi comínina jacíruillano, Jesús jetáñoeno íena fiédiaioi. Fíiano oni jíáinomo jíidiaioi.

Gobierno ibátaga úcube cai ibállena Jesús llote

(Mt 22.15-22; Lc 20.20-26)

13 Afe mei fariseo illáicomini afémacimona dáarie Jesumo orédiaioi. Daje izóí Heróde mo jaináidinomona orédiaioi, Jesuna úritallena, afe ie uaido táino iera níttállena.

14 Bimaci billano íena daidíaioi:

—Llófueraíma, onódicaíza jiáimaci ie lloga uai íñoñoeno, o jaca uáfueña úrifredio. Comini jínofene ciona izóí riire jicánoñedio. Mei jíáifodo Juzíñamui lloga cai ñue illafue jífueñoeno jino llófuetio. ¿Mei iere rífredillaíma ocuica úcube íemo fecáredicai, níbai fecánidicai? ¿Afe cai fecállifue figura, níbai figóñede? —daidíaioi.

15 Mei íadi Jesús íaioi uáfodo úríñenafueña onode. Ie jira íaioina daide:

—¿Níbai mei cue jánari táinona úritiomoi, cue llaitállena? Daa úcubetuni cuemo ati, cue eróillena, —daide.

16 Afétuni atídiaioi. Afe eróillano Jesús íaioimo jicánote:

—Bie uíéco jana, ¿bu íe? Benomo cuega mámecei ¿bu íe? —daide.

Afémaci fairíotiaioi:

—Rífredillaíma íe, —daidíaioi.

17 Iemo Jesús íaioina daide:

—Ríillaíma íe raa íemo abido íne. Daje izóí Juzíñamui íe raa íemo abido íne, —daide.

Afémacina íe dáinari iere comecei jíáifoficaidiaioi.

Tíidino meine abido cáadena íllena jicánotiaioi

(Mt 22.23-33; Lc 20.27-40)

18 Ie mei saduceo imaci dáarie Jesumo úrizaidiaioi. Bimaci tíidino meine abido cáailena lloñediaioi. Ie jira bie taino lloga rafue Jesumo jicánotiaioi. Nai jicáñoñenia fueñe daidíaioi:

19 —Llófueraima, Moisés jaiáimona caimo cuegáuai daide: Daa iima áiredimie ie úrue nai iñena llezica tíadi, ie ama afe ofaiño óite. Aféngomona daa jitó comuírede ie ama tídimie iena. Daií daina mei jicánotiaioi:

20 ‘Mei nauí siete dígade ámatiai cai cígimo ite. Nanóidimie árede. Afémie jitónino tíide.

21 Nanóidimie emodo ímie ie ama fecingo ote. Daje izói jitónino tíide. Daje izói nanóidiaillinoi emodo ímie afe fecingo uano jitónino tíide.

22 Nana afe siete dígamiai nanóidimie fecingo otíaioi. Afémacimona daa jítóna comuíñede. Afe ícoimo afe fecingo tíide.

23 Ie jira meine abido cáailiruimo ¿bumo afengo dúide? Mei siete dígamie daango otíaiioiza, —daidíaioi.

24 Mei jira Jesús fairíote:

—Omoi onóñeno fieni comeci facádotiomoi, mei Juzíñamui Cuegáuaina onóñediomoiza. Daje izói ie ríinona onóñediomoiza.

25 Mei tíidino meine abido cáaille llezica aina óñeitiaioi. Afe izói íaioi jízaniaina iníretatañeitiaioi, mei monamo ite Juzíñamui abi imáciai izóitiaioiza.

26 Mei íadi tíidino meine abido cáailífue dibénedo llogáfuena ¿nai facádoñediomoi? Afefue Moisés cuegánicomo ite. Aféruimo Juzíñamui Moise moode raroci cígido úrite. Bie izói iena daide: “Dáonomo Abraham íinoga Juzíñamuidicue, Isaac, Jacob diga, mei birui afémaci cue illánomo cue diga cáadiaioiza,” daií Juzíñamui daide.

27 Iemo Jesús nai daiíode: Mei ua iñédino Juzíñamuiñedeza; mei íadi jíáfodo cáadimaci ie Juzíñamui. Daií bífuena omoi baitáñenia iere féiraitiomoi, —Jesús ja dínomo daide.

Iere jamánomo íinorede caimo ocuica uai

(Mt 22.34-40)

28 Afe dáaruido ocuica uai llófueraimona dáamie Jesumo dúcide. Jesumo garidino nana Jesús diga úrilla uaina afémie cacade. Daje izói Jesús ñue íaioi uaina fairíuana afémie cacade. Afe uai fairíuana fidíillano Jesumo jicánote:

—Nana ocuica uáimona, ¿nie iere jamánomo íinorena? —daide.

29 Jesús ie uai ote:

—Nana ocuica uáimona bie iere íinorede nánora uai: “Israel, mai omoi cácarei. Cai Ocuíraima Juzíñamui jaca daade.

30 Mei jira nana o comécido o Ocuíraima Juzíñamuina izírui. Daje izói o comécimo ite joreño diga izírui. Daje izói nana o ifo úrilla uaido iena izírui. Daje izói nana omo ite ríinodo iena izírui.” Be ñie nánora ocuica uai.

31 Afe méifoide ocuica uai daje izói jóide. Afe uai daide: “Dama o abi o izíruiella izói, afe izói o aino ímiena mai izírui.” Jíáie ocuica uai izoide bie baímo iñede, —daide.

32 Iemona Ocuica uai llófueraima daide:

—¡Ie mei! Llófueraima, ñue daidio. O daina uafue. Uáfuenta Juzíñamui daade. Afémie baímo jíáimiena iñede.

³³ Daje izói afémiena nana cai comécido izíruillena ñuera. Ie llezica nana cai ifoci úrilla uaido íena izíruillena ñuera. Ie llezica nana cai comécimo itífuaído íena izíruilla ñuera. Ie llezica nana caimo ite rínodo íena izíruillena ñuera. Daje izói cai abi ímiena dani cai abi izíruilla izói, afe izói íena izíruilla jitáirede. Bie izói cai izíruilla, aillo ráifide. Ua, nana fatá Juzíñamuimo fia fecaca rílleniai baimo ráifide, nana Juzíñamui íóbitallena jobaica rílleniai diga, —daide.

³⁴ Iemona baitádimie izói afémie ie fairúa uaina cacáillano, Jesús íena daide: —Juzíñamuimo dúillena ímiena íanori itio, —daide.

Afe mei jacíruillano buna jíáfúena Jesumo jicánoñediaioi.

*¿Bu jitó Cristo? Jesús dama jicánote
(Mt 22.41-46; Lc 20.41-44)*

³⁵ Jesús gairíracomo llófullofúena llezica, comínimo jicánote: —Onódiomoiza ocuica uai llófueraíni “Cristo David jitó” daífirediaioi. ¿Nie izói daífiredi?

³⁶ Mei dama David Juzíñamui Joréñodo úrite; daide: —Monamo ite cai Moo Juzíñamui cue Ocuíraimana daide: “Cue nabézimo rainai, o éoigamacina cue anáfenolliruimo,” dai David daide.

³⁷ David Cristona “cue Ocuíraima” daííadi, ¿nie izói afe llezica Cristo ie jítone írede? —daide Jesús. (David emodo imácimona Cristo cómuide.)

Aféruido aillo comini, caimare Jesús úrilla cacáreizaíbitiaioi.

*Ocuica uai llófueraíni feni illafue Jesús jino comínimo llote
(Mt 23.1-36; Lc 11.37-54; 20.45-47)*

³⁸ Jesús llófullofúena llezica íaioina daide:

—Ocuica uai llófueraínimona abí omoi rairuiri. Afémaci ápera ñuera ínícuro jítano comini uíecomo mácafírenana gáidiaioi. Afe llezica íaioi anamo comini fecáracuaimo ñue jacíruioicana íaioi uáiduana gáidiaioi. (Daje izói comini íaioi daináuai jéruillena gáidiaioi.)

³⁹ Afémaci Juzíñamui uai llófueraicomo ite ñuera ráíiranona raire jíáimaci uíecodo jenófirediaioi. Afe izói comini iráziracomo iráiziadi, afémaci iere ñuera ráírano uíecodo maíñófirediaioi.

⁴⁰ Afémaci fecínguai jofue naa íaioi raari bairófirediaioi; mei íadi comínimo jíáfodo afémiai cíoilena, are Juzíñamuimo úrioidiaioi, comini éroilla llezica. Afémaci iere jamánomo duere finócamacina jáitiaioi, —daide Jesús.

*Dúrede fecingo fecaca úcube jamánomo ñuera
(Lc 21.1-4)*

⁴¹ Iemo Jesús Juzíñamuimo gairíracomo ráicana eroide. Ucube dotáranu uícómo ráíide. Comini afénomo úcube dótajillamo eroide. Iere ráaredino aillo úcubena dotádiaioi.

⁴² Bie llezica fecíngo dúredíngo mena úcubetuni dótaibite. Bituni íaínguai ‘cobre’ ie; iere due ráifide centavo izoide.

⁴³ Ie mei Jesús ie llófuegamaci jííruillano íaioina daide:

—Uáfúena ómoimo lloticue. Bie dúrede fecíngo úcube jóoneracojimo dotaca úcube, iere jamánomo jíáimaci afénomo dotaca úcube baimo jaide.

⁴⁴ Nana jíáimaci úcube fiévide államona dotádiaioi, mei íadi afengo duéredíngo íadi, nana aféngomo ite úcube ie iga. Afengo güille óllena úcubena nana afengo ja dotaca, —Jesús daide.

13

Gairiraco uire júdailena Jesús ie llófuegamacimo llote

(Mt 24.1-2; Lc 21.5-6)

¹ Jesús gairiracomona jino billa llezica, ie llófuegamacimona dáamie íena daide:

—Llófueraíma, ¡bie iere ñuera nófiemo eroi! ¡Daje izóí bie jofo áilluemo eroi! —daide.

² Iemo Jesús uai ote:

—Mai bie áillue jófuemo ñue omoí eroi. Benomo daje emódomo nófiena fiebiñeite. Nana oni júdaille, —daide.

Iirairui uícodo úitífuiái

(Mt 24.3-28; Lc 21.7-24; 17.22-24)

³ Afe mei Olivona mameide ídumo jáidiaioi. Gairiraco uíeco dibénemo ite. Afénomo Jesús ráidemo, Pedro, Jacobo, Juan, íemo Andrés báinino íena daidiaioi:

⁴ —Nana bífuiái o daina júdaille zuíllaruina onóiacadicaí. Mai caímo llone. Nana bífuiái fúiacana ¿nie izóí caína onótaite? —daidiaioi.

⁵ Jesús uai ote:

—Bu omoí ¡ífueñeillena, ñue abí omoí rairuiri.

⁶ Aillo cue mámedido imaci abí jítano bítiaioi. “Cristodícue” daínano bítiaioi. Afémaci aillo comínina ¡ífueitiaioi.

⁷ Mei íadi aillo áinori ite fuiríllafuena, íemo jica ite fuiríllafue diga omoí fidíadi, omoí jacínaiñeno iri, mei afe daí íredeza. Mei íadi nai íirairuíñedeza.

⁸ Mei aféruimo daa nairai jái náiraímo fuirizaite. Afe llezica dáazie jáiziemo jobáirizaite. Aféruillaído diga illánomo énie riire dócaite. Dáaruído aillo júbie diga éniiaído iite. Be aféfuiaí comíni duere zefuille táinia raa.

⁹ Mei jira abí ñue omoí rairuiri, mei riire ocuídímaci gairíllanomo omoí uítiaioíza; Juzíñamui uai llófueriracomo ómoína fázítiaioi. Cue ícoínia ríllaini uícomo ómoína óreitiaioi, jamánomo riiredillaini diga. Afe daí cue dibénedo íaioímo úritíomoi.

¹⁰ Mei íirairui nai dúciñena llezica, cai jíllonafue uai nana náiraímo jino llóredeza.

¹¹ Riiredillainimo omoí oreille llezica, omoí úrillífuemo raire uícomo comécido facáñeno omoí iri. Daje izóí omoí comécíillífuemo raire uícomo uibíñoñeno iri. Aféruimo Juzíñamui omoí ífomo úrilla izóí, mai omoí daíri, mei dani omoí úriñeítíomoi; omoí comécimona Juzíñamui ie Ñuera Joreño úrite.

¹² Afe llezica dáamie nahí ie ámamo fiénidífue nítano jáámiena ie fatátaite. Daje izóí móotiai nahí ie jítótiana fiénidífuedo izájitaitiaioi, íaioi titállena. Afe íbana íaioi jítótiai, nahí ie móotiaímo fiénidífue nítano íaioi fáite titállena.

¹³ Cue ícoínia, nana comíni ómoína éoíllano iere íáiruítiaioi. Mei íadi íirairuimo jaícina Juzíñamuimo iere féítañeno ínotímie jíllobicaite.

¹⁴ ¡aiái Juzíñamui uai jino llóraíma Daniel daa iere íáiruiga raa dibénedo cuete. Afe íáiruítiaite raa nabene jofue júdaitaite. Afe fiénidífueña oruide raa Juzíñamuimo gairiracomo íte jeruícacomo jóonia llezica, Judea éniemo itino, áraa íduaimo botárediaioi. (Bibe facádimie mai ñue onoiri.)

¹⁵ Aféruimo o jofo jinófene ídamo omoí íadi, jofo eromo íte ráaniaína omoí uájíñeno iri; raire botari.

¹⁶ Jacáfaimo tájijidímie abido jofomo bíñeno iri, ie inícuiruai óllena.

17 Aféruimo ite ringóniai namóciredino iere duere zéfuitiaioi, aizínidiaioiza. Daje izói monoi jirode duera úrue lláidingotiai duere zéfuitiaioi.

18 Ie jira Juziñamuimo omoi jicari, “Nóci illáruillaído caina botátañeno iri.”

19 Bie izói duere zefuilliruina jaca jaiái ífinide. Ua, Juziñamui bínie fínuamona benomo afe izóidena íñede. Aféruillai méifomo afe izói íñeite.

20 Juziñamui afe zúuredírui are jóoneadi buna jilloñeille. Mei íadi afémie nizécanona izíruillano íanori afe zúuredíruiña afémie jóoneite. Are íñeite.

21 ‘Iemona aféruimo dámie ómoína daííadi: “¡Erocai, benomo ite Cristo!” áemo íñoñeno iri. Daje izói jiámie daííadi: “Eroi, batínomo ite Cristo,” áfena íñoñeno iri.

22 Mei uafue, aféruído aillo jífueritino bíitiaoí. “Cristodicue” dáitiaoí. Daje izói “Juziñamui dibénedo úriticaí” dainano comínina jífueitiaoí. Afémaci cíorainina ráaniai fínoitiaoí, jiáie jacíredífuiaí díga, comíni jífuellena. Uafue, daje izói dama Juziñamui nizécanona jífueacadiaoí, afémaci daí jífuetareniadi.

23 Mei íadi mai ñue omoi começi facáoiri; mei nana bífuiaína jae uícodo ómoímo llotícueza.

*Monámona bite Nanoide ñima Jitó, Cristo meine bíllena Jesús llote
(Mt 24.29-35, 42-44; Lc 21.25-36)*

24 ‘Ie mei aféruillaído, zúuredíruiillai méifomo, jitoma duíbicaite. Fiui égaiñoñeite.

25 Monamo ite úcuai cócítiaoí. Afe llezica mona eromo ite ríino mozídino, mairíñeno jaillano dócaítiaoí.

26 Iemo nauí monámona bite Nanoide ñima Jitó Cristo meine abído cíocaite. Uíllie cigído biite; aillo ríino díga. Jamánomo ebírenafuedo biite.

27 Afe mei ie abí imácina óreite, nana ie nizécamaci nana mona fuédamona gairítallena. Ua jamánomo jica ite ígobíai imácimona nizécano nana dáanomo atille. Daje izói énie fueda imácimona nizécano nana dáanomo atílliaoí.

Nai ie llófuegamacimo llófuiano, íaíoína daide:

28 ‘Mai bie higuera amena rafue omoi onoiri. Afe higuera íbiai firuilla llezica fimona ánozillana onódiomoiza.

29 Daje izói nana bie zúuredíruiillai zuíllana omoi cíoiadi, íirairuí ánozillana onótiomoi. Jae iere íanori ite.

30 Uáfueña ómoína dáitícue, afe illáruído itino comíni nai tííñenia, nana bifue zúite.

31 Nana mona énie díga fúite, mei íadi cue dáina uai jaca nínomo méidonide. Cue llua izói zúite.

32 ‘Mei íadi afe illíruina buna onóñena. Daje izói Juziñamui abí imaci onóñediaioí. Ua afe izói Juziñamui Jitó aféruína onóñede. Dama cai Moo Juziñamui onoga.

33 ‘Ie jira, aferuí dúcinana onóñediomoiza, mai ñue figo abina omoi onoiri. Afe llezica mai ñue omoi uíñori. Daje izói Juziñamuimo úrifreiri.

34 Cue meine billífue dámie jica jailla izoide. Afémie nai jáíñenia íemo táíjidinona ie jofo úíñotade. Illa dígamie dáarie táíjillena igáiaoí. Iemo naze uíñoraíma jóoniano, íena riire ocuide, jofo uíñollena.

³⁵ Afe izói mai omoi abi onóicana uññori, mei jofu naama billirui ónoñegaza. Nibai nauíoilla llezica biite, nibai dáaferuimo, ónoñega. Nibai atava úrilla llezica, nibai jítiramo afémie biite; ónoñega.

³⁶ Mai abi omoi onoiri, afémie raire bíadi, omoi iníllena ie cíoñeillena.

³⁷ Omoina cue daina izói nana comínina daidicue:

—Cue bíllemo abi omoi onoiri, —daide Jesús.

14

Comini Jesús llaitállena maméritiaioi
(Mt 26.1-5; Lc 22.1-2; Jn 11.45-53)

¹ Nai ménarui ite pascua ráfue. Afe rafue llezica afénomo ite comini íaioi pan fáitara jóoneñeno güífrediaioi, mei aféruillai fáitañega pan güífrenafue. Lletáriraini illaini ocuícáfue llóraini diga Jesús jífuiado llaitállena jenódiaioi, ie titállena.

² Iadi daidíaioi:

—Íráizie ana íena llaitánide; áfemo comini ficire júfidoñeilleza, —daidíaioi.

Ringo zióredijido Jesús ifona jillaide
(Mt 26.6-13; Jn 12.1-8)

³ Jesús Betániamo ite. Simón jofomo ite. Afe Simón chínitimiena mameide. Güírácomo íaioi ráiina llezica, daa ringo jamánomo ráifide ziórediji Jesumo jilláizaibite. Afe ziórediji duera alabastro daina nofici finoina icítirumo ite. Afe ziórediji mámece nardo. Afeji jíáiena fáíñega. Afengo afe icítiru llaillano, Jesús ifomo áfeji totade.

⁴ Afénomo itinomona dámerie áferi ríicaidiaioi. Dani conímana riire daidíaioi:

—¿Nibái mei bie ziórediji táinomo dotade?

⁵ Afeji trescientos romano úcubetuni baimo fecárede, duéredimacina canóllena, —daidíaioi. Aféngomo ríicaillano íáiruitiaioi.

⁶ Mei íemo Jesús daide:

—Mai aféngona fáicanocai. ¿Nibái mei aféngona áifedodiomoi? Bie cuemo afengo finócafue ñuera.

⁷ Mei jíi, duéredino jaca omoi cígimo íitiaioi. Omoi jítíadi afémacina canórediomoi. Mei íadi cue omoi cígimo are íñeiticue.

⁸ Afengo ñue cuemo finórede raa cuemo finuaibite. Jíáimaci cue raiájiñenia cue abimo zióredijina afengo cuemo jóoniaibite.

⁹ Uáfueña ómoina dáititue, náganomo bie éniemo comini jílluille uai jino llóidi, bie ringo cuemo finócafue jino llóitiaioiza, áfemona aféngomo úbicaifireillena.

Judas Jesús íena éoidimacimo izájide
(Mt 26.14-16; Lc 22.3-6)

¹⁰ Ie mei Judas Iscariote lletáriraini illaini dine úrizaide, Jesús afémacimo izájillena. Afe Judas, doce díganie Jesús llófuega ímie.

¹¹ Afe illaini Judas dáinana cacáillano, íóbidaioi. Afe jira íena daidíaioi: “Jesús caimo o atíadi, úcubena omo íbaiticai.” Iemona Judas nie izói Jesús íaioimo fecállena jenode.

Jesús úraifuena güillafue
(Mt 26.17-29; Lc 22.7-23; Jn 13.21-30; 1 Co 11.23-26)

12 Fáitañega pan rafue nanóidiruimo oveja jiza fáfirediaioi, pascua ráfue mo ríllena. Aféruimo jae dúcide. Aféruido Jesús llófuegamaci íemo jicánotiaioi:

—¿Ninomo pascua rafue uícodo cai finuaillena óiacadio, afénomo pascua ráfue mo mameide güille cai güillena? —daidíaiioi.

13 Te jira ie llófuegamacimona ménaillinoi óriano daide:

—Jófuemo jai. Dinomo jainoi icírudo útimiena báitomicoi. Iedo jairi.

14 Afémie jofo jáillanomo, afeco náamana daiíri: “Llófueraima daide, ¿Ninomo ite cue güillino cue llófuegamaci diga? Dinomo pascua rafue llezica güíticai daide.”

15 Jira afécona ómicoimo ácatajite, áillico. Caifóidicomo ite. Ja fuífide. Dinomo cáiena finori, —daide.

16 Jira llófuega íaillinoi oni jaillano jófuemo dúcidiaillinoi. Dúciillano uícodo Jesús íaillinoina daina izói baizájidiaillinoi. Pascua rafue ja finódiaillinoi.

17 Nauízaiilla llezica, Jesús doce diga ie llófuegamaciri dúcidiaioi.

18 Güirábanimo güítíaiioimo Jesús íaioina daide:

—Uáfuena ómoina dáitícue, daa ómoimona, cue diga güítinomona cuena fécaite, —daide.

19 Jira afémaci zúucaidiaioi. Afe llezica dáamierie Jesumo jicánotiaioi:

—¿Níbai cue? —daide.

Jíaimie daje izói daide:

—¿Níbai cue? —daide.

20 Jira Jesús uai ote:

—Afémie daa ómoimona, bie doce dígamiedemona; ua cue birui diga dáajemona güítimacimona.

21 Nanoide íima Jitódicueza Cuegáuai lloga iodo jáidicue; ua cue tíillinomo jáidicue. Mei íadi cue fecádimie, jñii iere dúerena! Afe íima jócoñegana baimo ñue jaide, íadi jae comuide, —daide.

22 Güítíaiioimo, Jesús pan llínota daide:

—Iere figura, —daide. Daina mei ditade. Ditada íaioimo fécajano daide:

—Mai omoi güi. Bie cue abi, —daide.

23 Iemo Jesús jiróracuri llínote. Afécurei vónona oruítaga. Ie mei:

—Iere figura, —dainano íaioimo ite. Nana afécureimona áfeji jiródiaioi.

24 Iemo daide:

—Bie cue die; áfedo comue dájemo llínoga uai uáfuena daiíllena. Aillo nairai jíllollena cue die tóite.

25 Uáfuena ómoina daidicue, ja biruímona afe uva rao llizilla iji jíroñeitícue. Ua nágaruillaído Juzíñamui illáimana illirui nai biñena llezica jíroñeitícue. Aféruimo comóicana áfeji nane meine dáanomo jíroiticue, —daide.

*Pedro Jesuna jáanuana Jesús uícodo llote
(Mt 26.30-35; Lc 22.31-34; Jn 13.36-38)*

26 Juzíñamui rua íaioi rua mei, jino Olivo dainádumo jáidiaioi.

27 Iemo Jesús daide:

—Bie naio, iomo come éicitaiilla izói, méaicallamona nana omoi cuena zóofeitíomoi. Cuegáuai daide: “Ovejai úiñoraimana fáitícue; fállemona ovejai oni ráijicaitiaioi.”

28 Mei íadi cáadimiena meine abido cue ille méifodo, omoi uiécomo Galiléamo jáitícue, —daide.

29 Jira Pedro daide:

—Nana ona fáicanocaitiaioimo, jaca o fáicanocaiñeiticue, —daide.

³⁰ Iemo Jesús uai ote:

—Uáfuenta dáititicue, bie naio atava ménacaiño nai úriñeniadi dacaiñoámani cuena jáanoitio, —daide.

³¹ Mei íadi afémie iere afe íeñede úricana daide:

—O diga cue tállena jitáidi, nai ona jáanoñeiticue, —daide.

Nana daje izói daidíaioi.

Jesús Getsemanimo Juzíñamuimo úrizaide
(Mt 26.36-46; Lc 22.39-46)

³² Iemo güirácomona jino billano Getsemaní ibirimo dúcidiaioi. Dinomo Jesús ie llófuegamacina daide:

—Bai bené Juzíñamuimo cue úrizaiilla llezica, benó omoi ráñiri, —daide.

³³ Iemo Pedro, Santiago, Juan diga uite. Jesús ja zuure cácaide; afémie aillo jaci cácade.

³⁴ Jira daide:

—Cue joreño iere zúureficaide; afe zuufue tálliza izói cue orede. Benó omoi fiebi. Abí omoi onoiri, —daide.

³⁵ Iemo Jesús jabo baife jaide. Dinomo éniemo bíjicaillano Juzíñamuimo jicade:

—Nana bie cuemo jíriacade raa cúemona oni o oréreadi, mai oni oreri, —daide.

³⁶ Nai Juzíñamuimo úrioicana daide:

—Cue Moo, ómona nana finórede. Bie iere zuure facállinomona cue zuitari. Mei íadi cue oiacana izói finóñeno iri, mei jíañfodo o oiacana izói finori, —daide.

³⁷ Iemo daámani llófuegamaci diné jaide. Inídiaioimo dúcide. Pédrone daide:

—Simón, ¿ja o inídio? ¿Jaca due jiza abí onóoicana uíñonidio?

³⁸ Abí omoi uíñori. Juzíñamuimo úriri, fiénidifuemo omoi báñiñeilla. Uáfuenta o joreño iere jíerede, mei íadi o abi náñide, —daide.

³⁹ Iemona dáanomona nane, Juzíñamuimo úrizaide. Daje uáillana daide.

⁴⁰ Ie mei nane bitemo, ie llófuegamaci meine dáanomona inídiaioi. Daí afémaci íniamo, Jesús íaioina ciozaibite, mei íaioi uíñi ínie ibáicaza. Iaioi uai ollino íñede.

⁴¹ Ja dacaiñoámani Juzíñamuimo úrillano bite. Billano íaioina daide:

—¿Mei nai birui inídiomoi? ¿Nai ocózinaidiomoi? Jae mai. Nanoide ñima jitódicueza, mei íadi fiénidimacimo cue itábicaillaruimo ja dúcide.

⁴² Náidacai. Mai cai jai. Cue fecádimie ja bite.

Jesús llaitádiaioi
(Mt 26.47-56; Lc 22.47-53; Jn 18.2-11)

⁴³ Ie llezica Jesús nai úritemo Judas dúcizaibite. Afémie doce dígadimacimona. Afémieoiri aillo comini bitíaioi. Lloefai bigíñiai diga bitíaioi. Lletáriraini illáinimona bitíaioi. Dáarie bie comini ocuífue llófuerainimona éicomini diga bitíaioi.

⁴⁴ Fecádimie Judas bimácimo ónoitara nauí lloga. Daide:

—Cue ñitállimie níñmieite. Ie llaitari. Ñue maiano, ui, —daide.

⁴⁵ Iemo Judas billano, Jesumo ánozillano uáidote:

—¡Llófueraima! ¡Llófueraima!

Daí ñainano ñitade.

⁴⁶ Iemo Jesús llaitada, maiano, bitino íena uitíaioi.

47 Afe llezica dinomo itinomona dáamie lloefai otá daa bitímie jefo ñetade. Afe jefona ñetácamié lletáriraini illaíma jaiénci.

48 Iemo Jesús comínina daide:

—¿Meita meríriraimadicue izói lloéfaillairi bigíniai diga cuena lláitaibitiomoi maiano cue uíllena?

49 Nágarui ómoiri Juziñamuimo gairíracomo llófuecana iticue; íadi jaca cuena llaitáñediomoi. Mei íadi bifue íficaide Cuegáuailai fuitállena, —daide.

50 Iemona nana llófuegamaci íena fáicanocaillano botádiaíoi.

Da Jesudo jáicaide jitócome botade

51 Mei íadi da jitócome dama áillue iniroi jitada nai Jesús óodana jáicaide. Ie mei bitino íena llaitádiaíoi.

52 Mei íadi afémie jarire duíñuano aferoi íaioimo fainóicaide. Daí ñeta emuíroma jarire botade.

Jesús jicánodoillinomo uiga

(Mt 26.57-68; Lc 22.54-55, 63-71; Jn 18.12-14, 19-24)

53 Iemo judíuai lletáriraini caifóidillaímamo Jesús uitíaioi. Afe llezica nana lletáriraini illaini, iemo éicomini, iemo ocuica uai llófueraini diga, dáanomo gairídiaíoi.

54 Pedro, afe jamánomoidillaíma jofo abi íbírímo, óodana jicado jaide. Dinomo llaizíriraini diga ráiide; irai fuemo agaide abi uzíreillena.

55 Nana lletáriraini illaini jamánomo ocuídímaci diga Jesumo fieni íaioi facátallena uai nabáidino jenódiaíoi, áfedo íena titállena. Mei íadi áfena baiñédiaíoi.

56 Aillo íemo taino llotíaioi. Iadi íaioi táinofuíai jáicina jóobiñede.

57 Iemo dáarie caifo náidacaillano, afémiemo taino fiénidífue nitádiaíoi. Daidíaioi:

58 —Afémie dánana cacádicaí: “Bie comini finoca gairíraco júdaiticue, íemo daruíámami íllemona jáí gairíraco comini finóñegaco abído níiticue,” daide, —daidíaioi.

59 Mei íadi nane íaioi lloga uai nabáíllafuíai jáicina jóobiñede.

60 Iemo lletáriraini illaíma íaioi cígimona jino náidacaillano Jesumo jicánote:

—¿O uai óñeitio? ¿Mínica bie omo nitádiaíoi? —daide.

61 Mei íadi daa uai oñede. Iemona lletáriraini illaíma nane dáanomo jicánote:

—¿O Cristodio? ¿Afe cai ñúefuena nitaca Juziñamui Jitódioza? —daide.

62 Jira Jesús daide:

—Jí, ie mei. Nanoide fima Jitódicue. Uire uáfueña cuena cíoiomoi. Ua rírede Juziñamui nabézimo dinomo cue ráinaillana cíoiomoi. Aféruillaido mona ero uílliedo cue bíllana cíoiomoi, —daide.

63 Lletáriraini illaíma jamánomo rícaillano icírrillamona ie iniroi cúatajano daide:

—¿Ñibái mei jáíe uai nabáiraíma jítaiticaí?

64 Ja Jesús ie uáíllaido Juziñamui dibénemo fieni úrillana cacádiomoi. ¿Omoi, ñie izói íena daidíomoi? —daide.

Iemona nana íena titállena daidíaioi.

65 Iemo dámierie afémiemo túllaitiaíoi. Afe llezica ie uíeco ínroina íbáíllano, íena fatíaíoi. Fájano daidíaioi:

—¡Mai bai! ¿Bu o faja? —daidíaioi.

Iemo llaitáidino ie uíeco túcoídiaíoi.

Pedro Jesús jáanote

(Mt 26.69-75; Lc 22.56-62; Jn 18.15-18, 25-29)

⁶⁶ Pedro ana jofu ibírimo ite. Iemo daa lletáriraini illaíma canóraingo afénomo dúcide.

⁶⁷ Pedro irai fue agáillana cióillano, afengo afémiemo riire eroide. Iemona daide:

—O daje izói Nazarena ímie Jesús diga macáfiredio, —daide.

⁶⁸ Mei íadi Pedro jáanuano daide:

—Aféfuena fidíñedicue. Minícado úrtio onóñedicue, —daide. Daina mei afémie naze fuemo jino jaide. Iemo ítava úrite.

⁶⁹ Iemona canóraingo íena nane cióillano afénomo itínona daide:

—Afe iima Jesudo jáidimacimona, —daide.

⁷⁰ Mei íadi Pedro meine jáanote. Ja baído afénomo itino Pédróna nane daidíaiói:

—Uáfuena. O Jesús imaci iéidio. Galilea ímiedio. O úrilla afémaci úrilla izói jóoide, —daidíaiói.

⁷¹ Ie jira Pedro: “Uáfuena cue llóñenia Juzíñamui cue fáidoiteza,” daide. Dáanomo Pedro ie daina uai nabáillena Juzíñamui mámedido riire mámano daide:

—Afe omói úrillamiena onóñedicue, —daide.

⁷² Daí daina llezica atava dáanomo nane úrite. Iemona Jesús íena daínafuemo Pedro uíbicaide. Nano uícomo íena daide Jesús: “Atava ménacaiño nai úriñenia dacaiñoámami cuena jáanoitio.” Afemo comeci fácajano éeiaide.

15

Jesús onínellaíma Pilátomo uitíaiói

(Mt 27.1-2, 11-14; Lc 23.1-5; Jn 18.28-38)

¹ Afe jítiramo lletáriraini illaini íemo eicomíniri gairízaidiaíói, ocuica uai llófueraíni diga; ie emódomo naa jíáie jamánomoidillainiri. Gairíllano Jesumo íaiói finóllifueri dani úrtiaíói. Maiga Jesús Pilátomo izájidiaíói.

² Jira Pilato jicánote:

—¿O meita judío illáimadio? —daide.

Iemo Jesús uai ote:

—¡Ie mei! Daí jaca o daina izói, —daide.

³ Iemo lletáriraini illaini aillo fiénidifuaí afémiemo nitade.

⁴ Jira Pilato dáanomo jicánuano daide:

—¿O uai onéidio? ¡Cacai! Diga fiénidíuái omo nitádiaíói, —daide.

⁵ Mei íadi Jesús uaina oñede. Afémie uai oñenamona Pilato fágacaide.

Jesús íe tállena uáfodo maméritiaíói

(Mt 27.15-31; Lc 23.13-25; Jn 18.38-19.16)

⁶ Afe rafue ana naga fimónado comínimona llogámie llaítacamiena Pilato zuitáfrede.

⁷ Come fatímie Barrabás jae llavéracomo ite, jíáie come fatímaci diga. Nano jíáiruido illaíma dotátaruimo comíni fatíaiói.

⁸ Ja biruí comíni Pilátomo jícaíbitiaíói. Billano Pilato íaíoi mo finófirena izói íe finóllena jicádiaíói.

⁹ Pilato uai ote:

—¿Judíuái illaíma ómoímo cue zuitállena jítáidiomói? —daide.

¹⁰ Pilato ja lletáriraini illaini Jesús úradoillafuedo fécajana fidide.

11 Mei íadi lletáriraini illaini nana comini jeire otímaci. Iaiói úamona iere caillídimaci. Iaióina llófuetaíoi:

—Jesús ifomo mai Barrabás caimo zuitállena izire omoi jicari, —daidíaiói.

12 Jira Pilato jicánote:

—¿Nie izói oíacadiomoi omoi mamécámie Judío Illaíma cue finóllena? —daide.

13 Iemo caillíocana uai otíaiói:

—¡Cruzmo íena corai! —daidíaiói.

14 Jira Pilato daide:

—¿Nibái mei? ¿Afémie nie fiénidífue finode? —daide.

Nane dáanomo baimo caillíocana daidíaiói:

—¡Cruzmo íena corai! —daidíaiói.

15 Iemona Pilato nairai uíécomo ñue íacanamona, Barrabás zuitada orede. Iemo Jesús zechétajano llaizíritinomo izájide íena coráillena.

16 Te mei afe onínellaíma áilloco jofo ibírimo íena uitíaiói. Afénomo nana fuíríraini gairítatíaiói.

17 Iemo ñue jáirede inícuiro, illaíma íena, afémiemo jitádiaíoi. Aferoi uállaiíma jítafiregaroi. Afe llezica ifo icuífoi eegi nínacuifoína íemo jitádiaíoi.

18 Jítajano janónaioicana riire íena uáidotíaiói; daidíaiói:

—¡Figo o iri, Judíuai Illaíma! —daidíaiói.

19 Iemo rázido diga icaíño ie ifo butíaiói. Ie túallaitíaiói. Afémiemo caiñici ana dújullano jífánodoicana íena ebíruitíaiói.

20 Daí íe íaiói áifedua méifodo, afe illaíma jítaícaroi íemona duiñódiaíoi. Dúíñuano dama íeicuirona ie jítaídiaíoi. Ie mei afénomona jino íaiói uiga íena coráiaillena.

Jesús coráina

(Mt 27.32-44; Lc 23.26-43; Jn 19.17-27)

21 Jesuna coráiaidiaíoi mo Cirene ímie Simón jinona jófuemo bite. Afémie Alejandro Rufo íaillínoí moo. Bítemo Jesús coráillibicina rocátatíaiói.

22 Iemo Jesús Gólgota maméidinomo uitíaiói. Afe Gólgota jíáimaci uaido ífócorai Illánona mameíde.

23 Afénomo vino eriredíji diga jóonegana Jesús jirótatíaiói. Mei íadi áfena afémie jiróñede.

24 Afe mei ja Jesuna coráidiaíoi. Iemo fuíríraini onótaraji dotádiaíoi, Jesús inícuiro íaiói máíñuana onóillena. Iemona dájerize illa dígamie ie inícuiro uite.

25 Jae jítoma caífo illa llezica Jesús coráidiaíoi.

26 Jesús coráigabicimo jíáie uai llotíbicina netádiaíoi. Afébicimo nie íaífue ie fínua jira coraíca, daí íaiói cuega. Bibícimo cuetíaiói: “Bímie Judíuai Illaíma.”

27 Afémie diga mena meríriraíma íaillínoí coráidiaíoi, dámie ie nabénemo, jíámie ie jarífenemo.

28 Jaíai Cuegáuai daí fúbicaide. Aféuai daide: “Afémie fiénidímacimo jaináitaga.”

29 Afe íodo jáidino Jesumo fiéni úritíaiói. Fuena iere riire íena zanódiaíoi. Daidíaiói:

—Mai, cacai. O Juzíñamui gairíraco ana júdaitímiedioza. Daje izói daruíámani íllado abído afeco nítímiedioza.

30 ¡Mai dama o abí jíllota! ¡Crúzmona ana bi! —daidíaiói.

31 Daií daje izóí lletáriraini illaini, ocuica uai llófueraini diga, Jesuna janónaitiaioi. Dani conímana daidíaioi:

—Afémie jiámaci jíllotate, íadi afémie dama ie abina jíllotanide.

32 Mei birui Cristo, Israel Illaíma ana crúzmona bíadi, áfena cai cíónamona afémie uaina ja uáfueña ñnoíticai, —daidíaioi.

Daje izóí afémie diga coráicaiaillinoi fieni Jesumo úritiaioi.

Jesús tilla

(Mt 27.45-56; Lc 23.44-49; Jn 19.28-30)

33 Jaíciri illa llezica nana énie jítfereficaide. Dahoraámani fidi monáíñede.

34 Afe llezica Jesús riire cáilliano daide:

—Eloí, Eloí, ¿lama sabachtani? —afe uai dobáíñuana daide: ¡Cue Moo Juzíñamui, Cue Moo Juzíñamui! ¿Nibái cue zóofetio? —daide.

35 Dámierie afénomo itínomona áfena cacáillano daide:

—Cacarei, afémie Juzíñamui uai jino llóraíma Elías jíirite, —daidíaioi.

36 Iemona afémacimona dámie aizida fiillicide raa uájide. Erírede vínona riáitano, áfena ragúizi ícoímo jóonete, áfedo Jesús jírtallena. Daií ñeta, íemo ñuitade. Afe llezica jiámaci íena daide:

—Ína jabe. Maí cai éroi, neca afémie Elías ana ólleza, —daide.

37 Ie mei Jesús riire caillida tíide.

38 Afe llezica Juzíñamui gairíracomo zebica jédaciede iniroi, dáfenedo caifófenemona ana cuájicaide.

39 Jesús anamo romano jabóidillaíma uíeco dibénemo naidaide. Ie cáilliana cacade. Ie tilla izóidena ciode. Cúano daide:

—Uafue, bie íima Juzíñamui Jitó, —daide.

40 Dáanomo dáarie ringóniai jicana eróiediaioi. Iaiói cígimo ite Magdalena jofue ingo María, íemo Salomé, íemo jíaie María. Afengo Santiago José ei. Afe Santiago jofófene ímiena mameide.

41 Bie ringóniai Jesudo jáicadino. Naui Galiléamo ie illa llezica, afémaci íena canódiaioi. Mei íadi bimaci baímo aillo jíáingotiaína, Galilea ingóniai afémiedo Jerusalemo bitiaioi.

Jesús abi raíáfomo jóoniaidiaioi

(Mt 27.57-61; Lc 23.50-56; Jn 19.38-42)

42 Ja nauizaide. Mei aferui ocózinaillarui uícodirui íllaza, comini íaioi jitaille raa finófrediaioi.

43 Jira José Pilátomo Jesús abi jíicajide. Afe bie José Arimatea jofue ímie. Afémie caifóidillaímaíaimo iere jaináideza, ie mámeçi jica jalleide. Afémie Juzíñamui illáimana illíruina ñue uíñote. Afémie abi mámano jáicaiñeno Pilato illánomo jaide. Dinomo Pilátomona Jesús abi jíicade.

44 Pilato ja ie raire tíllari fáigacaide. Jira jabóidillaíma uáidote íemo jícanollena meita uafue daíllena.

45 Jabóidillaíma “jíi” dánamona Pilato fairíote Jesús abi José uíllena.

46 Jira José iere ñuera iniroi ibade. Iemo Jesús abi ana uáno, aféroido junide. Iemona idu ana nofici ero raigácomo ite raíáfomo íena jóoniaide. Jóoniano raigaco áillue nofícina ibaide.

47 Magdalena ingo María, José ei María diga, afe raíanona cíódiainguai.

16

*Jesús tíidemona meine abido cáadimiena jaide
(Mt 28.1-10; Lc 24.1-12; Jn 20.1-10)*

1 Ocózinallarui méifomo Magdalena énie ingo María, Santiago ei María, Salomé diga zíoji ibádiaioi, Jesús abi recuillena.

2 Jira semana nanóidírui jítiramo raiáfomo jáidiaioi. Afe llezica jitoma ja ciode.

3 Iemo ringóniai dúcillano conímana daidiaioi:

—¿Bu mei raiáfo uiéco ibaina nofici cairi oni ñuitalle? mei afeci iere áillueza, —daidiaioi.

4 Mei íadi érocaillano raiáfo uiéco ibaina áillue nofici oni jóoniana ciódiaioi.

5 Iemo raiáfo ico eromo íaioi jáillanomo jítócome nabézimo ráiinana ciódiaioi. Afémie árecuero úzerói jítáoi. Ieri iere jacínaitiaioi.

6 Jira ringóniaina daide:

—Omoi jacínaiñoeno iri. Omoi Jesús, Nazaret ímie nauí coráicamie jenódiomoi. Mei íadi ja tíidemona meine abido cáadimiena jaide. Benomo íñede. Afémie íaioi jóoniano omoi eroi.

7 Ie mei Pédro mo naa jíáie llófuegamaciri llujáiri. Afe bifue daíri: “Omoi uícomo Galiléamo jaide. Dinomo ie daina izói éna cióitiomoi,” —daide.

8 Jira ringóniai raiáfomona botádiaioi. Fáigacaillano cuidírítiaioi. Iere íaioi jacíruillamona humo lloñédiaioi.

*Magdalena énie ingo Maríamo Jesús cíocailla
(Jn 20.11-18)*

9 Semana nanóidírui monáiacana llezica, Jesús meine abido cáadimiena jaide. Afe mei fueñe Magdalena énie ingo Maríamo afémie cíocai. Nauí afémie aféngomona siete diga fiénide jóriai oni orede.

10 Iena ciona mei, afengo Jesús diga nauí jáicadinomo llujáide; afémaci nai zuure éenaitiaioi.

11 Afe Jesús meine caade íllana María íaioimo llote, mei íadi aféfuena cacáillano, áfena nai íñoñediaioi. Daje izói afengo “Iena ciódicue” daina uaina íñoñediaioi.

*Jesús llófuegamacimona ménailinoimo afémie cíocailla
(Lc 24.13-35)*

12 Bie mei, Jesús llófuegamacimona ménailinoi jofue onimo mácajdiaillinoi. Mácajilla llezica Jesús jíáifodo íaillinomo cíocai.

13 Afe íaillinói jíáie llófuegamacimo abido llujáidiaillinoi, mei íadi daje izói íaillinoina íñoñediaioi.

*Jesús ie uai oni llólleña orécamacimo ie uai jóonenocai
(Mt 28.16-20; Lc 24.36-49; Jn 20.19-23)*

14 Afe jíáiruido once diga llófuegamaci íaioi güiránomo ráidiaioimo Jesús cíocai. Íaioi comeci ríirena jira, íaioina lletade. Dáanomo íaioi íñoñena jira, íaioina lletade, mei afe éna ciódino íaioimo llógana íñoñediaioiza.

15 Ie mei íaioina daide:

—Mai nágaboiáido bie jíllóille uai nana comínimo jino omoi llujáiri.

16 Afe uaina íñoitímie íemo báutizagamie jíllóbicaite. Mei íadi afe uaina íñoñeitímie jíllóñeno duere finócamiena jáite.

¹⁷ Cuemo ínoitino bie onótarafuiai fínoitiaioi, afe lloga uai uafue daiíllena. Cue mámecido fiénide jóriaredimie ite fiénide jóriai oni óreitiaioi. Uícodo ónoñega jiáie uáillaido úritiaioi.

¹⁸ Daje izói titade jaio íaioi llaítada íaioina ainíadi, tíñeitiaioi. Jucúrediji íaioi jiróadi, iránitañeite. Afe emódomo, iráredimacimo íaioi onoi bitáadi, afe iráredino jílloitiaioi.

Jesús monamo jailla
(Lc 24.50-53)

¹⁹ Afémacimo úrilla mei, cai Ocuíraima Jesús fíaicana caifo monamo uiga. Iemo Juzíñamui nabézimo ráinazaide.

²⁰ Ie mei ie llófuegamaci nágagobiaimo comini jílloa uai llocana uitíaioi. Afe dáamie, cai Ocuíraima, íaioina canode. Afe llezica afémie íaioi lloga uaina cíofinina íaioi finócafuiaido uáfuenta daiítate; daje izói diga onótatífuiaido uáfuenta daiítate. Jae nñe.

JUZÍÑAMUI ÑUEFUE SAN LUCAS LLOGAFUE El Santo Evangelio Según San Lucas

Rafue uiećodo llogáuai

¹ Cue ama izóidimie Teófilomo cueticue. Diga comini caimo comuide ráfuiái ñue jaícina cúellena facádiaioi.

² Afe comuídifuiái táiniamona, áfena ciódino caimo llua izói, cuetíaioi. Afeniaina ciódino ñuefuiái jino llóllena canódiaioi.

³ Afe izói nana bífuiaina ñue jicánofiredicue. Uáfueza, bífuiái táiniana iere jicánofiredicue. Ie jira omo cueticue. Iemona bífuiái jaícina omo cue cúellena cuedo ñue jaide, mei ñuefuiáiredimie Teófilodioza.

⁴ Bífuiái omo cúeiacadicue, afémaci omo llogafue uáfueza o onóillena.

Juzíñamui abi ímie Juan Bautista jocoille llotte

⁵ Herodes Judea éniemo illáimana illa llezica, afénomo Zacaríasna mámeciredimie ite. Afémie Juzíñamuimo comini dibénedo úriraima. Afe Zacarías jaiái ímie Aarón jító, Abías iziémo dúidimie. Ie ai mámeći Elisabet. Afengo daje izói Aarón iziémona comuídingo. Afe Aarón nánora Juzíñamuimo úriraima.

⁶ Afe íaillinoi Juzíñamui eróicana ñue jaícina itíaiillinoi. Juzíñamui ocuica uai jeire ófirediaillinoi. Ie jira afe íaillinoimo buna fiénidena jítánidiaioi.

⁷ Mei íadi úruenidiaillinoi, mei Elisabet úruenidade. Iemo jíái jae iere jónaitiaillinoi.

⁸ Iemo daarui Abías izié tájinaruillaimo dúcina llezica, Zacarías Juzíñamuimo úriraimana íllena afémiemo dúcide.

⁹ Iemo afémaci fínofirena izói, íaioi níziamona, uguci uillítallena Zacaríasmo baite. Ie jira afémie Juzíñamuimo gairíraco rairuiredinomo jofo jaide, afénomo uguci uillítallena.

¹⁰ Afémie uillítata llezica, nana comini jinófenemo Juzíñamuimo úritiaioi.

¹¹ Iemo Juzíñamui abi ímie, ángel dainámie Zacaríasmo cíocaide. Afémie uillítarano nabéfenemo cíocaide.

¹² Juzíñamui abi ímie cíoillano Zacarías iere jacínaillano ie finóacaigana onóñede.

¹³ Iemo Juzíñamui abi ímie íena daide:

—Zacarías, jacíruiñeno iri, mei Juzíñamuimo o jícafrenana afémie cacádeza. O ai Elisabet jítóreite. Afémie mámeći Juaana o jítalle.

¹⁴ O íóbitio, daje izói aillo comini o úrue jocólleri íóbitimaciza,

¹⁵ mei o jító Juzíñamui uiećomo iere uai ínotimiena mámeiteza. O jító comini jifáitaraji vino diga jaca jiroñeite. Afémie nai jócoñenia Juzíñamui Ñuera Joreño úcaite.

¹⁶ Afémie Israel náraimona diga comini comeci ífuiái méidotaite, afémaci ócuifrede Juzíñamui uaimo meine ñue íaioi jíeruillena.

¹⁷ Bie Juan Ocuíraima Cristo uiećodo biite. Afémie jaiái Juzíñamui uai lloraima Elías coméćifirena izói coméćite. Daje izói Elías riire ocuilla izói riire ócuite, ie uaido móotiai íaioi úruiai diga caimare íaioi itátallena. Daje

izói uaina náfuēñedino afémie afe uaina jeire otátaite. Bie izói afémie comini ñúemacina íaioi fínoite, Ocuíraima Jesús ñue llínollena.

18 Juzíñamui abi ímie úrilla llícailla mei Zacarías jicánote:

—¿Ñie izói bífuena uáfuenta onóredicue? mei ja iere jionaiticue, cue aí diga.

19 Juzíñamui abi ímie uai ote:

—Gabriéldicue. Juzíñamui ócuifiregamiedicue. Ie orécamedicue omo úrilla, bie ñúefuiai omo llóllena.

20 Mei íadi birui omo cue dánana o ñinoñenamona uáinitio. Benómona úriñeítio o jító jocóllinomo. Bie Juzíñamui mamécaramo zúite.

21 Afe llezica comini jino itíaiói; Zacarías úiñotiaioi. Afémie are jino gairíracomona biñena jira jacínaioidiaioi.

22 Iemo Zacarías jino bítemo ja úrinide. Afemona afémie gairíraco eromo rairuicanomo nicáirilla izói ñibai ciode daidíaioi. Afémie onoi níraídua izói afémacimo úrite, mei afémie úrinideza.

23 Juzíñamui gairíracomo Zacarías tájinaruillaí fúillamona, ie jofomo jaide.

24 Bie mei ie aí Elisabet ja úruereacade. Afengo jofómona cinco diga fiui uáfori jino cióñede. Afengo comécido daide:

25 “Juzíñamui ja bie izói cuena úrueretade, íemona comini cuena jámairuiñeítiaioi,” daide.

Juzíñamui abi ímie Jesús jocoille llote

26 Ja seis diga fiui Juan comuillamona, Juzíñamui ie abi ímie Gabriel, Galilea éniemo ite Nazaret mámeçirede jófuego orede, daa ringo méiñollena.

27 Afengo nai inínde jitaingo. Ie mámeçi María. Afengo ja jicánogango Josemo inírellena. Afe José illáima David izíemona comuídimie.

28 Juzíñamui abi ímie afengo illánomo jofo jaillano daide:

—¡Ona uáidotícue, Juzíñamui ñue finóçangodio! Ocuifrede Juzíñamui o diga ite. Nana ringóniaí baímo Juzíñamui çaimare omo eroide, —daide.

29 Mei íadi afengo Juzíñamui abi ímie cióillano, afe ie uáimona iere fáigacaide. Iemo afengo comeci anado jicánote, “¿Ñibái cuena daí uáidote?”

30 Ie jira Juzíñamui abi ímie íena daide:

—María, jacíruíñeno, mei Juzíñamui çaimare omo eroide.

31 Benómona úruereítio, íemona o jító jócoítio. Afémie mámeçi Jesuna jítaitio.

32 Afémie ñúefuena iere jálleite. Afémie caífo monamo ite Juzíñamui Jítóite. Naui Juzíñamui bínie jaiáidigima David illáimana ória izói, bie Jesuna Juzíñamui illáimana óreite,

33 jaca ñinomo Israel náiraímo illáimana íllena. Ie illáimana íllana jaca ñinomo fúíñeite, —daide.

34 Ie jira María Juzíñamui abi ímiemo jicánote:

—¿Ñie izói bie mei ite, mei cue íima diga íñédicueza? —daide.

35 Juzíñamui abi ímie uai ote:

—Juzíñamui Ñuera Joreño omo itábicaite. Iemo caífo monamo ite Juzíñamui ie ríinodo ona ráiruite. Ie jira o jocolle jító jaca Juzíñamui mamécamiēna ite. Iemona comini íena Juzíñamui Jító daíitiaioi.

36 Iemo jíai o onógango Elisabet úruereite, jamánomo ei ringo íadi. Ie jira úruenitíngo íaioi daínango íadi, seis diga fiui íllamona ja úruereacade.

37 Juzíñamuijona jaca finónide raana íñede, —daide.

38 Ie jira María daide:

—Juziñamui ócuifiregangodicue. Mai mei Juziñamui cuena ie daina izói cuemo fínoiteza, —daide.

Afemona Juziñamui abi ímie oni jaide.

María ie onógango Elisabet uáiduaide

³⁹ Aféruillaído María Judea íduai cígiri ite jófuego raíre jaide.

⁴⁰ Dúciillano Zacarías jofomo jaide. Daií ñeta Elisabet uáidote.

⁴¹ Elisabet daií uáidua cacáillano eromo ite úrue niráiricaide. Afe llezica afengo Juziñamui Ñuera Joréñodo úcaitaga.

⁴² Ie jira iere ficírede uaido úrite:

—Nana jiáingotiai baimo Juziñamui iere caimare omo eroide, ñúefue omo finóllena. Daje izói o jítomo iere caimare eroide.

⁴³ Iere jamáingodicue, mei íadi cue Ocuíraima ei cue eróizaibite.

⁴⁴ Mei ua, o cue uáidua cacáillano cue eromo ite jító iere ióbillano niráiricaide.

⁴⁵ Juziñamui ona daina o ínuado iere ióbinangodio, mei Juziñamui ona daina ñue zúiteza.

⁴⁶ Ie jira María daide:

—Cue joréñodo cai Ocuíraimamo ñúefue lloticue.

⁴⁷ Cue Jíllotaraíma Juziñamuimo cue comeci ióbicaide.

⁴⁸ Mei Juziñamui ie dúerede ocuicaingona uibóicaideza.

Biruimona nana uire íite comini “Iere Juziñamui ióbitagangodio” cuena dáitíai.

⁴⁹ Mei jamánomo ríinorede Juziñamui iere ñúefuiai cuemo finódeza.

Afémie mámece ñúefuiaído jacíruieregaci.

⁵⁰ Nana íena ñue jacíruitinona afémie jaca dúecaite.

⁵¹ Finónide ráfuiái afémie finode.

Fiénidena abi ínotinona afémie jae anáfenode.

⁵² Ríillainina jamáimacina Juziñamui finode.

Mei jiáífodo comécina mánaidino illáinina orede.

⁵³ Jufíruitinona afémie ñúefuiaído imaci jeírítade.

Mei jiáífodo ráaredinona fia duere imácina orede.

⁵⁴ Ie ócuifiregamaci Israel nairai afémie canode.

Iaioina duéruillena féitañede.

⁵⁵ Nauí cai móotiana daina izói jaca duérufireite.

Ua, Abrahana ie daina izói, íemo ie náiraina daina izói afémie jaca caina duéruite.

Bie izói María úrilla fuite.

⁵⁶ María daámami diga fiui Elisabet diga ite. Afe mei meine ie jofomo jaide.

Juan Bautista jocóinafue

⁵⁷ Afe mei Elisabet úrue jocólliruimo dúcinamo, jító jocode.

⁵⁸ Juziñamui ñue aféngomo érocaillano fidíillano, afengo abi imaci naa onógamaciri afengo uáiduaidiaioi.

⁵⁹ Ocho dígaru íllamona, judíuai finofirena izói, gairíracomo jáidiaioi úrue bacano ícoi quetállena. Afe llezica ie moo mámece Zacarías jítácadiaioi.

⁶⁰ Mei íadi ie ei daide:

—Ieñeite. Afémie mámece Juaana jítalle, —daide.

⁶¹ Aféngona daidiaioi:

—¿Ñibái mei? O comínimo afe bie mámece iñede, —daidíai.

62 Ie jira onoi níraiduado úrue moomo jicánotiai, nie izói mámece jóneacade.

63 Ie jira afémie daa cuerábici jicade áfemo cúellena. Líinuano cuete: “Ie mámece Juan.” Aferi nana comini jacínaitiai.

64 Afe cuja llezica Zacarías meine nane úrrede. Jira raire Juziñamuimo ñúfuiai lote.

65 Bieri nana abi imaci jacínaioidiai. Iemo nana Judea íduai éniemo bifue llócadiai.

66 Nana áfena fidídino áfemo iere coméidiai. Dani íaii nabáitai jicánotiai.

—¿Bie úrue minícamiena jáite? Mei uafue, Juziñamui afémiemo iere caimare eróideza, —daidíai.

Zacarías ñue llocana dainafue

67 Iemo ie moo Zacarías Juziñamui Ñuera Joreño úcaillamona úrite; Juziñamui íemo lloga uaido afémie daide:

68 Israel nairai cai ócuifirede Juziñamuimo ñúfue nitárede, mei afémie caimo éroizaibiteza.

Ja ie comínidicai, íemo afémie ja cai jíllotai biteza.

69 Jaiai ie ocuifiregamie David izíemona, daa rínorede cai Jíllotaraima caimo orede.

70 Jaiai ñúfuiairede ie uai llórainido úcodo ie daina izói afémie cai Jíllotaraima orede.

71 Afémie cai fairíconimona caina jíllotaite. Daje izói cai éoidimacimona cai jíllotaite.

72 Cai nánoramacina duéruite, afe izói ie íaioina ñúfuiairede daina uai féitañede.

73 Jaiai cai uzuma Abrahana úcodo daina uai Juziñamui uáfuenta daina. Afe uai bie izói daide:

74 Juziñamui cai fairíconimona caina báiroite, jacíruíñeno ie ócuifiregamacina cai maméillena,

75 Iemo jái ñúfuiaido ie jaícinaidimacina cai íllena, íemo daje izói nana cai ílláruillaído afémiemo ñue cai jaináillena.

76 Ie mei cue duera jító, caifo monamo íte Juziñamui uai llórainmana o mámeitiai, mei Ocuiraíma úcodo jáitioza, ñuera uai llocana uíllena, comini íemo ínollena.

77 Daje izói afémie bíllado ie comini íaifuiaí féitallena fidítaitio. Afémaci fiénidífuiaí féitalledo afémaci jíllotiai.

78 Mei ua, cai Juziñamui caina izíruillano caimo dúcecaide.

Dúcecaillano cáimaci jáimaci íemo ínollirui caimo íte.

79 Afedo tíiacade jítinodo macádino Juziñamuina onóitiai.

Daje izói comeci uái ílláfuiaímo joide io afémie cai ífoite.

Benomo Zacarías úrilla fuite.

80 Iemo afe úrue móonaicana jaide. Afe llezica joreño dibénedo onóicana jaide. Comini íñenanomo ífiredo. Israel náiraímo abí ie onónanomo afémie dinomo fiévide.

2

*Jesús jocóinafue
(Mt 1.18-25)*

1 Aféruillaido énie jamánomoidillaíma Augusto nana comini mámeciai cuiájillena ocuide.

2 Siria éniemo Cirenio illáimana illa llezica, bie nánora mámeciai cuiájillena ocuica.

3 Naga come ie móotiai illánomo ie mámecei cuiájirediaioi.

4 Ie jira José Galilea éniemo ite Nazaret jófuemona jaide Judea éniemo. Afémie David iziémona comuídeza, David jocóinanomo Belemo jaide.

5 Móotiai illánomo José María diga mámecina cuiájidiailinoi. Afengo jae jicánogango Josemo inreillena, íemo ja úruereacade.

6 Iemo Belemo íaillinoi illa llezica afengo úrue jocólliruimo dúcide.

7 Dinomo afengo nánora jító llíide. Jócuá mei iníroido ferínote. Iemo juráreto ecáranomo rallaí jóbiano ie bitade, mei afe íaillinoímo comini dúciranomo illino íñédeza.

Juzíñamui abi imaci ovejai úñoraimacimo cíocaide

8 Belén jofue onimo dáarie ovéjaiai úñoraini naiona íaioi ovéjaiai úñofirediaioi.

9 Uái daí ítíaoímo raire Juzíñamui abi ímie ángel daínámie íaioímo cíocaide. Afe llezica Juzíñamui quenírie íaioi ábiedo egáñozide. Aferi iere jacínaitiaioi.

10 Mei íadi Juzíñamui abi ímie íaioina daide:

—Jacíruiñeno iri, mei ñuera rafue ómoímo lluaíbiticueza. Bie ráfuerei nana comini iere íobítiaioi.

11 Birui jiaí illaíma David jófuemo omoí Jíllotaraima jae jococa. Afémie cai Ocúraíma Cristo.

12 Afémiena omoí onóillena afe úrue iníroido ferínoga, íemo juráreto ecáranomo bitaca báitiomoi, —daide.

13 Afe llezica Juzíñamui abi ímiemo aillo jíáie mona imaci offoide. Afémaci Juzíñamuimo aillo ñúefuiai llotíaioi:

14 —Caifoide Juzíñamuimo ite ebírenafuiai omoí lloiri.

Afe dáaruido afémie caímare eróinamacimo comécina uái illafue íiteza, —daidíaioi.

15 Iemona, Juzíñamui abi imaci abido monamo jailla mei, ovéjaiai úñoraini dani conímana daízitiaioi:

—Mai mei Belemo cai jai; bie Juzíñamui caímo lloga ie jocóinafue mai cai méiñuai, —daidíaioi.

16 Jira jarire jáidiaioi. María José diga cíódiaioi. Iemo jíái juráreto ecáranomo bitaca úruena cíódiaioi.

17 Afena cíóillano, Juzíñamui abi imaci afe úrue ífuenta íaioímo llúana jino llotíaioi.

18 Nana afefue cacádino afe dáinari iere caímare fágacaidiaioi.

19 Mei íadi María nana aféfuiái comécimo jóoniano áfemo uibíoicaide.

20 Iemo ovéjaiai úñoraini dinena meine abido jaide. Jailla llezica nana íaioi cacana, íemo íaioi cónado Juzíñamuimo ñúefue llotíaioi. Iemo daje izóí ebírenafue Juzíñamuimo nitádiaioi. Mei nana íaioímo daína izóí íteza.

Dúemie Jesús Juzíñamui gairracomo ácataga

21 Jocuamona ocho dígarui íllamona, dúemie bacano icoi quetátataioi. Afe llezica Jesuna ie mámecei jítádiaillinoi, mei afeci nano María nai úruenina llezica Juzíñamui abi ímie aféngomo llóteza.

22 Iemo diga irui íllamona, Moisés ocuica uai llua izói, María abi íainina daíllena níciduafue fúillamo, úruena Jerusalemo uítáillinoi. Afénomo ite Juzíñamui gairíracomo úruena Juzíñamui íena íllena acátajidiaillinoi.

23 Daíí finódiaillinoi Juzíñamui ocuica uaimo daíí cúeina jira. Afe uai daide: “Nana nánora jococa iiza Juzíñamui íena mamérede.”

24 Jira jáidiaillinoi Juzíñamui daina fecalle raa fecállena. “Mena úcugi, nibai mena fíiciri fatá Juzíñamuimo omoi fecari,” aféuai daíí daide.

25 Aféruillaído Jerusalemo Simeóna mámeceiredimie illa. Afémie iere núemie; Juzíñamuimo ínofirede. Israel nairai fairíconimona bairolle úíñote. Simeón Juzíñamui Ñuera Joreño do úicaigamie.

26 Afe Ñuera Joreño, Simeón nai tíñenia Juzíñamui orelle Crístona cóite, daíí ie fidítate.

27 Ie jira Jesús móotiai íaillinoi, gairíracomo Jesuna uilla uícodo, Juzíñamui Ñuera Joreño afe Simeón gairíracomo jáillena ífode. Iemona José María diga, jaiai ocuica fínofirena izói Jesuna íaillinoi fínuaíbillla llezica, Simeón Jesús ie ónoimo llíñote.

28 Simeón íena llíñua llezica Juzíñamuimo núéfue llocana daide:

29 —Juzíñamui, mai birui caimare tíiredicue, mei o ocuífíregamíedicue, o cuena daina izói nana ñue fuitádio.

30 Dama cue uído cai Jíllotaraimana ciódicue.

31 Afémie jae nana comíni eróicana o jóonegamie.

32 Afémie judíuáiñedíno núéfuiaina onótaitimie.

Iemo jáíí afémie o comíni Israelmo núéfuiaina nítaite,
—daíí daide Simeón.

33 Jira José María diga Simeón úruena daíí ie dánari fáigacaidiaillinoi.

34 Ie jira Simeón uáillaído íaioina cáimacaitate. Iemo María, Jesús eina daide:

—Eroi, bie úrue Juzíñamui mamécámie. Diga Israel comíni íena ruífíruillamona táinoficaitaioi. Iemo jáíí aillo comíni íemo ínuamona núemacina jáitiaioi. Afémie onótate raa ízoite, íemo aillo comíni íena íairuitaioi.

35 Afedo illa dígamie ie comeci ífue onoille. Mei íadi ómona bie nana, jáirede lloefai izoide, dango o comeci izire fínoite, —daíí Simeón daide.

36 Afénori daa ringo illa. Afengo Juzíñamuimona ie oga uai llófuefírede. Afengo mámecei Ana; Fanuel jiza. Iemo jáíí Aser náiraimona comuídango. Afengo iere éirogi. Afengo jítáingona illa llezica ínírede. Afengo siete diga fimona afémie diga ite. Afe mei afengo fecíngona jaide.

37 Iemo birui aféngomo ochenta y cuatro diga fimona fecíngona ite. Afengo Juzíñamui gairíracomo jaca ífírede, mei afénomo mona naio diga Juzíñamui ocuífíregangona ite. Afengo iere Juzíñamuimo úrífírede, íemo jáíí iere fímairite Juzíñamui íóbitallena.

38 Simeón Jesudo úrilla llezica afengo afénomo bite. Iemo úrue dibéfodo Juzíñamuina “Figora” daina mei, afengo nana Jerusalemo ite jíllollena uíñotínoimo úrite. Dúemie Jesús núéfuiaina afengo íaioimo llote.

Nazaremo meine jáillafue

³⁹ Iemona, nana Juziñamui ocuica uaila íaiói fuita mei meine Galilea éniemo jáidiaíoi. Afénomo dani íaiói jofue Nazaremo fiébizaide.

⁴⁰ Afénomo afe úrue iere íocire móonaite, íemo jáí ráfuenta baitádimiena móonaite. Afe llezica Juziñamui afézamo caimare eroide.

Juziñamui gairiracomo úrue Jesús finócafue

⁴¹ Jesús moo íaillinoi naga fimónaiaido Jerusalemo pascua ráfuego jáifirede.

⁴² Jesús doce diga fimona fuita mei, íaiói finófírena izói afe ráfuego nana jáidiaíoi.

⁴³ Afe rafue záillamona, jofomo meine íaiói jailla llezica, afe úrue Jesús Jerusalemo fiébicaide. Afeza fiébicaillana ie ei, José diga onóñediaillinoi.

⁴⁴ Nibai cai onóigamací diga bite, daidiaillinoi. Daa mona daí iodo comécidiaillinoi. Mei íadi íaillinoi onóigamací cígido jenódiaillinoimo

⁴⁵ afézana cíóñediaillinoi. Jira meine Jerusalemo íemo jénuaidiaillinoi.

⁴⁶ Afe mei daruiámáni íllamona Juziñamui gairiraco eromo afézana baitiaillinoi. Ocuica uai llófuetino cígimo ráidena baizáidiaillinoi. Afeza afémací úrillamo cacáreide. Afe llezica afeza afémacimo jicánofirede.

⁴⁷ Nana afeza íaiói uailaí úana cacádino fágacaidiaíoi; daje izói ie ráfuenta baitari.

⁴⁸ Ie moo íaillinoi íena cíozaila llezica íaillinoína jacínaitade. Ie ei íena daide:

—Cue jító ¿nibái cócori bifue finódio? Cue o moo diga iere coco comécina llícitatio, ona iere zuure jenódicocozá, —daide.

⁴⁹ Mei jira Jesús íaillinoi uai ote:

—¿Mei nibái cue jenódiomícoi? Cue Moo llogáfuego cue járitaiticue; ¿áfena onóñediomícoi? —daide.

⁵⁰ Mei íadi afe íaillinoína afeza dánana onóñediaillinoi.

⁵¹ Afe mei afeza ie moo íaillinoi diga abido Nazaremo jaide. Iemo íaillinoi ocuállana jeire ófirede. Ie ei nana bífuiaí comécimo jónete.

⁵² Afe llezica Jesús ñue zairíoicaide, íemo onócana jaca jaide. Afe llezica Juziñamui naa comíniri afémiemo jíeruitaíoi.

3*Juan Bautista táizicimo rafue jino llote*

(Mt 3.1-12; Mr 1.1-8; Jn 1.19-28)

¹ Romano jamánomoidillaíma Tiberio illáimana illa llezica, Poncio Pilato Judea énie illaíma. Iemo Herodes Galilea énie illaíma. Iemo ie ama Felipe mena énie illáimana ite. Be ñie: Iturea, íemo Traconite. Afe llezica Lisánias Abilinia énie illaíma.

² Afe llezica Jerusalemo jamánomoide lletáirraíma íaillinoi Anás Caifás diga. Aféruillaído Juziñamui Zacarías jító Juaamo táizicimo úrite.

³ Iemona Jordán abi comíni illágobiaído Juan llócaide. Afémacina bie izói daícade: Omoí comeci ífuiaí méidori; áfemona omoí fiénidífuiaí dólleza. Iemona omoí báutizitari.

⁴ Jáiaí uai lloraíma Isafas úcodo cuela uai izói bífuiaí íficaide. Be afe uai: Fícre úritimie uai táizicimo cácaide. Aféme daide:

“Juziñamui bille io ñue finua izói omoí comeci ñue fino.

Afémiemo io jaícina dénuá izói, omoí comeci íaífuiaí féitari.

⁵ Nana ana jica ite ítaicoiaí ñue jaícina oruízíte.

Nana caifóneduai ana dájena jaícina jóbite.

Jullícana joide io, jaícina tuiñolle.

Daje llezica iñede io, daje llezica jóbite.

⁶ Iemona nana nairai Juzíñamui caimo orelle jílloillifue mo comécidiaoí.

⁷ Comini Juan dine íaioí báutizaila llezica, afémie íaioina daide:

—Ítítade jaíoniaimona comuidino izóidiomoi! Ja ánozide duere ze-
fúllifuemona omoi botállena, ¿bu omoi llua?

⁸ Omoi comeci ifue méidoiacanana ñúefuedo uáfodo jino ácatari. Dani ómoimona táinona “Abrahámona comuidinodicaí” daiñño iri. Mei bie noficiaimona Juzíñamui jítáiadi, Abraham comínina comútaredeza, daiñ ómoína daidicue.

⁹ Fiénide amena tiéllena jata jicaída jóonia izóí fiénidino duere finoille jae ñue mameca. Nana figo llizíñede amena iraimo zocana uillano jobaica. (Tiéfirega izóidiomoi.)

¹⁰ Jira comini afémiemo jicánotiaoí:

—¿Mei bie ñie izóí íredicaí? —daidíaoí.

¹¹ Jira Juan uai ote:

—Mena caifóferoedimie, caifófenidimiemo daa írede. Iemo gülleredimie gülllenidimiemo gülllena fecárede, —daide.

¹² Afénomo dáarie gobierno ibátaga úcube llínoraini báutizaillena Juaamo jicaibitiaoí. Afémiemo jicánotiaoí:

—Llófueraíma, ¿mei bie cai ñie izóí íticaí? —daidíaoí.

¹³ Jira Juan íaioina daide:

—Ocuica uai dáina baimo dama raiñóñeno iri, —daide.

¹⁴ Iemo dáarie “soldado” dáina nairai úiñotino Juaamo jicánuaibitiaoí:

—¿Mei bie cai ñie izóí íticaí? —daidíaoí.

Jira Juan íaioí uai ote:

—Jácidota, jíáimamona minícana bairóñeno iri. Daje izóí jácidoñeno jíáimamo ie finoñegafue táinona íaioimo jítáñeno iri. Nano omoi tájina iba dieze uái omoi iri, —daide.

¹⁵ Nana comini Juaamo coméci idiaoí. “Ñibaí bímie Crístona,” comécido daidíaoí.

¹⁶ Mei íadi Juan nana afémacina daide: Mei uáfueza, cue jáinoina omoi báutizadicue.

—Mei jíáimie ja bite. Afémie Juzíñamui Ñuera Joréñodo ómoína úcaite. Daje izóí iraimo raa ñue zia izóí, afémie ómoína íainino ñue fínoite. Afémie cue baimo riñorede. Cue bie jamáimiedicueza, afémiena dama jacíruiredicue.

¹⁷ Jabe bítimie arroz bíaidimie izóí ja ie llocofe llícabite. Afémie arroz bíamona ícuai oni eneno ua izóí, ñúemacimona fiénidinona oni eneno óite. Ñúemacina ie illánomo ñue éenoite. Mei jíáífodo fiénidicuaí izóidino zíñona dúñeite iraimo jóbaita, —daide Juan.

¹⁸ Afe bíemona naa aillo jíáie lófuiado Juan ñúefuiai jino comínimo llote.

¹⁹ Afe emódomo Juan illaíma Heródesna riire lletade, mei ie ama Felipe ai Herodías ie aina ua jira. Daje llezica ie finoca fiénidifuiari Juan íena lletade.

²⁰ Mei íadi Juan llétajana íñoñeno afe baimo jíáie íaifuena nabaide: Herodes Juan llavéracomo ibaide.

Jesús báutizaga

(Mt 3.13-17; Mr 1.9-11)

²¹ Afe uícodo, Juan nana comini báutizaja llezica, Jesús jiái báutizaga. Afe Jesús báutizaja llezica afémie Juzíñamuimo úrite. Urilla llezica mona tújjicaide.

²² Afemona Ñuera Joreño fíiciri baizáibilla izói, afémiemo comini cóicana baizáibite. Afe llezica monámona daa úrilla cácacaide. Afe úrilla daide:

—Cue izíruiga Jitódio. Ori iere ióbioidicue, —daide.

Jesucristo uzútiái
(Mr 1.1-17)

²³ Ja Jesús treinta fimona íllamona Jesús comínina canóllena ie táijina como tainede. Comini coméçilla izói Jesús José jító.

Iemo afe José Elí jító.

²⁴ Iemo daje izói Elí Matat jító.

Iemo afe Matat Leví jító.

Iemo afe Leví Melqui jító.

Iemo afe Melqui Jana jító.

Iemo afe Jana José jító.

²⁵ Iemo afe José Matatías jító.

Iemo afe Matatías Amos jító.

Iemo afe Amos Nahum jító.

Iemo afe Nahum Esli jító.

Iemo afe Esli Nagai jító.

²⁶ Iemo afe Nagai Maat jító.

Iemo afe Maat Matatías jító.

Iemo afe Matatías Semei jító.

Iemo afe Semei Josec jító.

Iemo afe Josec Judá jító.

²⁷ Iemo afe Judá Joanán jító.

Iemo afe Joanán Resa jító.

Iemo afe Resa Zorobabel jító.

Iemo afe Zorobabel Salatiel jító.

Iemo afe Salatiel Neri jító.

²⁸ Iemo afe Neri Melqui jító.

Iemo afe Melqui Adi jító.

Iemo afe Adi Cosam jító.

Iemo afe Cosam Elmadam jító.

Iemo afe Elmadam Er jító.

²⁹ Iemo afe Er Josué jító.

Iemo afe Josué Eliezer jító.

Iemo afe Eliezer Jorim jító.

Iemo afe Jorim Matat jító.

³⁰ Iemo afe Matat Leví jító.

Iemo afe Leví Simeón jító.

Iemo afe Simeón Judá jító.

Iemo afe Judá José jító.

Iemo afe José Jonam jító.

Iemo afe Jonam Eliaquim jító.

³¹ Iemo afe Eliaquim Melea jító.

Iemo afe Melea Mena jító.

Iemo afe Mena Matata jító.

Iemo afe Matata Natán jító.

³² Iemo afe Natán David jító.

Iemo afe David Isaí jító.

Iemo afe Isaí Obed jító.

Iemo afe Obed Booz jító.

Iemo afe Booz Sala jító.

Iemo afe Sala Naasón jító.

³³ Iemo afe Naasón Aminadab jító.

Iemo afe Aminadab Admin jító.

Iemo afe Admin Arni jító.

Iemo afe Arni Esrom jító.

Iemo afe Esrom Fares jító.

Iemo afe Fares Judá jító.

³⁴ Iemo afe Judá Jacob jító.

Iemo afe Jacob Isaac jító.

Iemo afe Isaac Abraham jító.

Iemo afe Abraham Taré jító.

Iemo afe Taré Nacor jító.

³⁵ Iemo afe Nacor Serug jító.

Iemo afe Serug Ragau jító.

Iemo afe Ragau Peleg jító.

Iemo afe Peleg Heber jító.

Iemo afe Heber Sala jító.

³⁶ Iemo afe Sala Cainán jító.

Iemo afe Cainán Arfaxad jító.

Iemo afe Arfaxad Sem jító.

Iemo afe Sem Noé jító.

Iemo afe Noé Lamec jító.

³⁷ Iemo afe Lamec Matusalén jító.

Iemo afe Matusalén Enoc jító.

Iemo afe Enoc Jared jító.

Iemo afe Jared Mahalaleel jító.

Iemo afe Mahalaleel Cainán jító.

³⁸ Iemo afe Cainán Enós jító.

Iemo afe Enós Set jító.

Iemo afe Set Adán jító.

Iemo afe Adán Juzíñamui jító;

ua, Juzíñamui nano finócamie.

4

Taiŕe Jesús facátate

(Mt 4.1-11; Mr 1.12-13)

¹ Jesús diga Ñuera Joreño uaido íllamona imani Jordámona oni jaide. Afe llezica Ñuera Joreño táizicimo ie uite.

² Afénomo afémie cuarenta dígarui ite. Afe dīnomo Taiŕe íena fiēni facátate. Aféruillaido Jesús jaca due jiza güñēde. Afe mei iere jamánomo jufínaite.

³ Mei jira Taiŕe íena daide:

—Ua Juzíñamui Jitona o íadi, bie noŕiciai güíllena fino, —daide.

⁴ Jira Jesús uai ote:

—Juziñamui Cuegáuai daide: “Fia güilledo come ínide, mei jiáifodo nana Juziñamui lloga uaido írede,” —daide.

⁵ Afe mei Taife caifónedumo ie uite. Dinómona nana éniemo ite náiraiái dáaruido íena ácatate.

⁶ Iemo Taife íena daide:

—Nana bie náiraiái riino naa ie ebíredinuiári omo íitícue. Mei nana bie cúeieza. Iemona cue fecáacana dieze jiámamo íredicueza.

⁷ Cue anamo o dújuillano cuemo o caimátaia nana bie óieiteza.

⁸ Mei jira Jesús uai ote:

—Taife, mai cúemona oni jai, mei Juziñamui Cuegáuai dáideza: “Dama Ocuide Juziñamuimo caimátairena. Dama afémie ocuífíregamiéna o iri,” —daide.

⁹ Nane afe mei Taife Jerusalén jófuemo Jesús uite. Afénomo ite gairíraco emódomo caifo jica uite. Uillano íena daide:

—Ua Juziñamui Jitona o íadi, mai benómona ana batí ticai,

¹⁰ mei Juziñamui Cuegáuai bie izói dáideza:

Juziñamui ie abi imácina ona uíñotaite.

¹¹ Iaiói ónoído ona mozíñoitiaíoi, o eiba nofíciáimo íziñeíllena.

¹² Jira Jesús uai ote:

—Juziñamui Cuegáuai nane daide: “O ocuide Juziñamui mai facátañeno,” —daide.

¹³ Ja Taife Jesuna jiáie facátaja raana baiñénamona nano íanori afémiemona fáicanocaillano oni jaide.

Jesús Galilea éniemo fueñe tájizaide

(Mr 4.12-17; Mt 1.14-15)

¹⁴ Jesús Galilea éniemo abido bite. Juziñamui Ñuera Joreño afémiéna ñue úicade. Nana afe énie fuédado afémiedo úritiaíoi.

¹⁵ Náagobiaímo ite Juziñamui uai llorácuaido Jesús llófuecaide. Iemona nana comíni ñuefuiái afémiemo mamédiaíoi.

Jesús Nazaremo mácjide

(Mt 13.53-58; Mr 6.1-6)

¹⁶ Mei íemo Jesús ie móonalla Nazaret jófuemo abido mácjide. Iemo ocózinaiillaruimo Juziñamui uai llorácomo ie finofirena izói, jofo jaide. Jaillano Juziñamui Cuegáuai facádollena caifo naidaide.

¹⁷ Iemona jaiái uai llóraíma Isaías Cuegáuai illabe Jesumo itiaíoi. Afémie afénico túíñuano afe bie uai illano baite. Afe be níuui:

¹⁸ “Cai ocuide Juziñamui Ñuera Joreño cue diga jáicade.

Mei dúeredinomo ñúefue cue llóllena cuena ñue mamédeza.

Comécina dúeredinona cue jíllotallena ocuícacue.

Daje izói llavécana zuitalle uai llóllena orécacue.

Iemo jiái uina cíoiñedino uina cíoitallena orécacue.

Iemo duere finócanona zuitállena orécacue.

¹⁹ Daje izói Juziñamui caímo jamánomo caimare érocaillirui llóllena orécacue.”

²⁰ Iemona Jesús afénico íbáillano, Juziñamui uai lloraco ero canófiredimiemo abido ite. Afe mei Jesús ana ráinade. Iemo nana afe llorácomo itino Jesumo riire eróediaíoi.

²¹ Iemona Jesús íaioina daide:

—Ja birui omoi eróicana bie Cuegáuai ñue ícoímo fuite, —daide.

22 Nana Jesudo ñue úritiaioi. Afémie íaioimo lloga ebírede uáillairi caimare fáigacaidiaioi. Mei jira jicánotiaioi:

—¿Mei bie afe José jítóíñede? —daidiaioi.

23 Jira Jesús íaioina daide:

—Uáfueza bie omoí daífírena uai cuemo mámeitiomo: “¡tráredinona manóriacadimie, fueñe dama o abina jíllota!” (Comini Jesús Juziñamui oreca ua Crístona íaioi daíñenamona, Jesús bie izóí daide. Mei afémie fia José jító íadi, jáímana jíllotanideza.) Daje izóí nibái cuena daíitiomo: “Nauí caí cacana Capernaumo ebire o finócafue mai birui dama bie o jófue mo finori.”

24 Iemo Jesús ie úrillana mozíñoñeno nai jáí uai llote:

—Mei uáfueña ómoína daidicue, naga uai jino llóráima dama ie comini cígiri jaca figo íinoñega.

25 Omoimo jino uáfodo llóiticue, nauí Elías illáruillaido Israel nairai cígimo diga fecíngotiai ite. Aféruillaido daámani fimona átuedo noci bíñede. Afemona afeno nairai jamánomo júbietaidiaioi.

26 Mei íadi Elías Israelmo ite aillo fecíngotiaimona daíngo mamedá óreñega. Mei jáífodo jica Sarepta jófue mo ite fecíngo mamedá Elías oreca daíngo canóllena. Afe Sarepta jofue Sidón jofue áinori ite.

27 Daje izóí uai llóráima Eliseo illáruillaido Israel náiraímo aillo chínaítinuiai ite. Mei íadi afémacimona dáame jaca jíllotañega. Mei jáífodo jica Siria énie ímie Naamán jíllotaina, —daide.

28 Afe uaina cacáillano nana llorácomo itino afe Jesumo iere ríicaidiaioi.

29 Náidacaillano afe jófue mo jino ie jíúdiaioi. Afe mei afe jofue idu ícoimo íena uitíai, aféno mo ana ie dotállena.

30 Mei íadi Jesús afedu ícoimona gírecaillano íaioi cígido abido jaide.

Fiénide jóriai úcaigamie Jesús jíllote

(Mr 1.21-28)

31 Afe mei Jesús Galilea éniemo ite Capernaum jófue mo jaide. Aféno mo ocózinaillarui mo nane como comini llófuaide.

32 Riire ocuilla uaido ie íaioi llófuiari caimare fáigacaidiaioi.

33 Afe Juziñamui uai llófueraco eromo fiénide jóriai úcaigamie ite. Afémie Jesuna cióillanona riire caillide:

34 —Caí fáicanocai. Nazaret ímie Jesús, ¿nibái mei caímo jíricaidio? ¿Caina niné táinocaitabitio? Ona ónodicue Juziñamui ñuefuiaido jacíruiregamiedio, —daide.

35 Jira Jesús fiénide jóriai uai ote:

—¡Uriñeno! ¡Bímie fáicanocai! —daide.

Mei afemona afe ímana fiénide jóriai comini erócana ana éniemo dotade. Daií fínuano afe jóriai afe ímana ízitañeno oni jáidiaioi.

36 Aferi nana jacínaillano jofu conímaíaina daidiaioi:

—¡Bímie uailai ní mei ríinorena! Afe bímie riírede uaido fiénide jóriaina orede. Iemo afémaci afemona jáidiaioi, —daidiaioi.

37 Afe énie comini nágaboiado Jesudo úritiaioi.

Jesús Simón Pedro jifaiño jíllote

(Mt 8.14-15; Mr 1.29-31)

³⁸ Afe mei Jesús Juzíñamui uai llófueracomona jino billano, Simón jofomo jaide. Afénomo Simón jifaiño ie abi cuarillari iere irárede. Jira afengo jillotalena Jesumo izire jicádiaioi.

³⁹ Iemo Jesús aféngomo ana ánozillano ie onoi llínote. Afe llezica ie abi cuarilla llícaide. Iemona afengo jillobicaide. Daí daina llezica afengo náidacaillano afémaci jitaica raa bai atide.

Jesús diga iráredino jllotate
(Mt 8.16-17; Mr 1.32-34)

⁴⁰ Ja jitoma jímaicaidemo, diga jíáiforiede duico ogánuiaina Jesumo atídiaioi. Afémacimona illa dígamíemo Jesús ie onoi bitade. Bitajamona afémaci jillozitiaioi.

⁴¹ Iaioi atica iráredinuiaimona diga fiénide jóríai jino jaide. Jaillano afémaci riire caillíoidiaioi:

—O Juzíñamui Jitódio, —daidiaioi. Mei íadi, como úrizaidiaioimo Jesús íaioina úritañede. Mei afémaci afémie Crístona illana onódiaioiza.

Jesús Galilea éniemo uai jino llote
(Mr 1.35-39)

⁴² Afe jítiramo Jesús jofue baimo buna iñénanomo jaide. Mei íadi comini íena jenódiaioi; ie illánona baizájidiaioi. Afémaci afémiena iere jeruídiaioi oni jíáinomo afémie jáiñeillena.

⁴³ Jira Jesús íaioina daide:

—Jíáie jófuiáimo Juzíñamui illáimana illíruimo ja ánozideza áfena llúáiredicue, mei afe jira orécacueza, —daide.

⁴⁴ Afemona daí Jesús Galilea éniemo ite Juzíñamui uai llorácomo llófuecana uite.

5

Jesús uaido dáinamona jamánomo aillo chamuniai oga
(Mt 4.18-22; Mr 1.16-20)

¹ Afe mei jíáiruido Jesús Genesaret jorai fuédamo ite. (Afe jorai jíáfodo mameina Galilea.) Afénomo ie illa llezica diga comíniai afénomo dúcina. Afémiena jamánomo rillíretadiaioi, mei afémaci Juzíñamui uáillaimo iere cacáacadiaioiza.

² Afe jorai fueda áinori mena nocáe táicaena Jesús ciode. Mei afécaemona facóraini oni jaillano íaioi chamu ora llóji jocódiaioiza.

³ Iemona Jesús Simón icaemo jaide. Afécaemo jáillano íena daide:

—Bicae fuédamona bai batí due ñuita, —daide. Afe mei Jesús afécaemo ráinaillano nane como bai afénomona comini llófuete.

⁴ Ie llófuia fúillamo, Simona daide:

—Bie nocáe bai batí afóredinomo ui. Afénomo chamu ólleza omoi llóji dota, —daide.

⁵ Jira Simón uai ote:

—Llófueráima, jae naio náamonana facódicaiza, íadi jaca daa onédicaí. Mei íadi o daina izói mei o ocuícaza llóji dótaiticue, —daide.

⁶ Daí dotádemo, jamánomo aillo chámuniai jíideza, llójjina cuatáacade.

⁷ Afe jira oni jíáicaemo ite íaioi nabáitíai ónoído jíiritiaioi, ie íaioi cánuabillena. Jira afémaci cánuabitiaioi. Afe íaioi jíitaga chámuniai íaioi ménacae áillocaemo oruítatiaioi. Jamánomo oruállamona afe ménacae buíacade.

⁸ Afena Simón cíollano Jesús ana dújullano daide:

—Cue Ocuíraima, cúemona oni ii. Cue bie fiénidifue finódimiedicueza, —daide.

⁹ Mei ua, afe aillo chamu jíllari Simón naa ie nabáíñiari jacínaitiaioi.

¹⁰ Iemo jíái Zebedeo jíto íaillinoi Santiago Juan diga, Simón nabai daje izói jacínaitiaioi. Mei íadi Jesús nane Simona daide:

—Jacíruiño. Benómona chamu fácu a izói comínina jénoitioza, cuemo íaioi íinollena, —daide.

¹¹ Iemona afe ménacae oni fuédamo zítajano, dinomo nana fíiano Jesudo jáidiaioi.

Jesús chíinaitimie jíllotate
(Mt 8.1-4; Mr 1.40-45)

¹² Iemo jíáiruido, Jesús jófuemo illa llezica chíinaitimie Jesumo dúcide. Jesuna cíollano ana dújullano uíeco dinena ana éniemo bíjicaide. Daí ñiano Jesumo izire jicade:

—Cue Ocuíraima o jítaíadi bie duícona cúemona oréredio. Cúemona oreri, —daide.

¹³ Iemona Jesús ie ónoído jétano daide:

—Jíi, ona jíllotaiacadicue. Benómona ja íainitioza, —daide.

Daí daina llezica ie irárena chíie jacáibicaide.

¹⁴ Afemona Jesús afémiena “Bie bumo lloñoeno iri” daide. Afe emódomo nane daide:

—Mai lletáriraimamo o abi ácatari. Afe llezica Moisés ocuica o abi ja íainide daítaite raa, mai fecari. Afemona nana comini o chíie ja jacáillana ónoitiaioi, —daide.

¹⁵ Jesús izire íena rairuide íadi Jesús mámecei jamánomo bai jica jalléicaide. Iemona aillo comini ie uaimo cacáreizabitiaioi. Daje izói íaioimo ite duícomona ie jíllotallena aillo bitiaioi.

¹⁶ Mei íadi Jesús bai comini íñénamo jaide, afénoimo ie Moo Juzíñamuimo úrillena.

Jesús tízitaitimie jíllotate
(Mt 9.1-8; Mr 2.1-12)

¹⁷ Nane afe jíáiruido Jesús llófuemaritemo, fariséuaimona dáarie afénoimo ráiede. Afe llezica oni jicana bite ocuica uai llófueraíni dáanomo ite. Dáarie Galilea ígobaiamona bitiaioi. Daje izói jíáimaci Judea éniemona, íemo Jerusalén dinena jíái bitiaioi. Aféruimo Juzíñamui ríino aillo iráredino jílluamona jino ácataga.

¹⁸ Afe dáaruido diga ímie tízitaitimie naa ie bíiralludo atídíaioi. Jofo Jesús uícomo ie uíacadaioi.

¹⁹ Mei íadi íere comínina oruídeza jofo íaioi jáillino íñede. Ie jira caifo jofo emódomo uítiaioi. Uillano afeno tuiñódiaioi. Afeno túíñuano afe iráredimie naa ie bíirallu diga ana comini cígimo Jesús uícomo agúínetiaioi.

²⁰ Jesús ñue íaioi íinuana cíollano, iráredimiena daide:

—Míi, nana o fiénidifuiái ja muiñócaza, —daide.

²¹ Iemona ocuica uai llófueraíni naa fariséuairi, como comecei anado daidíaioi:

—¿Mei bie bu? baie jiáimie fiénidifuiái dóficaila dáiñado Juzíñamuina icírítaja. Jaca bu comini fiénidifue muiñoñena; dama Juzíñamui fiénidifuenta múiñua, —daidíaiói.

²² Mei íadi Jesús comeci íaiói fácajana onóillano daide:

—¿Nibái mei bie izói comeci facádiomoi?

²³ Mei daí daina ménade uáimona ¿nie uai iere llotáinina? Afe ménade uai be nie: O fiénidifue muiñoócaza. Iemo jiáie uai bie izói joide: Mai náidacaillano maca. Iiraie uai jamánomo llotáirede, mei omói eróicana íteza.

²⁴ Mei jira, Nanoide fima Jitódicueza bíniemo cue illa llezica comínimo íte fiénidifue cue muiñolle ríno jino ómoímo cíotaiticue, —daide.

Mei jira Jesús tízitaitimiena daide:

—Ona daíticue náidacai; náidacaillano o bírallu llínota o jofomo jai, —daide.

²⁵ Daí daina llezica, afe tízitaitimie comini eróicana caífo náidacaide. Náidacaillano, íe bírallu llínota, Juzíñamuimo caimátaicana íe jofomo jaide.

²⁶ Aferi nana comini caimare fáigacaidiaíói, íemo Juzíñamuimo caimátaidiaíói. Afe mei jacíruioicana daide:

—Nií birui cai iere ebíredifuiaina ciona, —daidíaiói.

Jesús Leví jíríte

(Mt 9.9-13; Mr 2.13-17)

²⁷ Nane bie méifomo Jesús jofue cígido mácaja llezica, gobierno íbátaga úcube llínoraimamo riire éroicaide. Afémie mámece Leví. Afe úcube íbafirenanomo afémie ráiide. Jesús íena daide:

—Mai cuedo bi, —daide.

²⁸ Iemona Leví náidacaillano nana íe táijina fáicanocaillano Jesudo jaide.

²⁹ Afe mei Leví áillue rafue íe jofomo Jesús íena finode. Afe Leví izoide aillo úcube llínoraini naa jiáimaciri güirábanimo ráiizaíbitiaíói.

³⁰ Mei íadi fariséuai naa ocuica uai llófuetinori Jesús llófuegamacimo como meine fieni úritiaíói. Iaioiña daide:

—¿Nibái mei baie úcube llínofirede fiénidinori güítomoi? —daidíaiói.

³¹ Jira Jesús íaiói uai ote:

—Íocíredimie mánuamo dúiñede. Íráredino manórena.

³² Dani ñúemacina abi mamédinona uáiduaíbiñedicue, mei jiáífodo fiénidifuiaredino comeci ífue méiduaíbiticue, —daide.

Iaiói fímaírilla Jesumo jicánotiaíói

(Mt 9.14-17; Mr 2.18-22)

³³ Iemona afémaci Jesumo jicánotiaíói:

—¿Nibái mei Juan dibénedo jáidino, íemo jiái fariséodo jáidino, diga ícaíño riire fímaífirediaíói? Iaiói fímaírilla llezica Juzíñamuimo jamánomo jicáfirediaíói. Mei jiáífodo o llófuegamaci jaca güífrediaíói, jirófrediaíói. ¿Nibái mei daí ítiaíói?

³⁴ Jira Jesús íaiói uai ote:

—Mai cuena omói daí: ¿Airena rafue llezica áfemo uáidogano meita zúurenari güíndiaíói? Daíitañede; ringo otímie íaiói cígimo illa llezica caimare güítiaíói.

³⁵ Mei íadi ringo otímie íaiói mona báíruaíbillíruimo dúciite. Aféruído comeci zúurenari güíñeítiaíói. Ringo otímie izói birui cuedo jáicaidino cígiri íticueza.

³⁶ Íe emódomo jiáie onótate rafue llote:

—Jaca nino dáamie comue iníroimona jáitano, jácaroimo nitáñede. Daií nitáadi cómoroina fiēni cóitate. Iemo jiái jácaroimo nitaca cómoroi figo cóiñede.

³⁷ Iemo nane jiáifue llote. Daje izói comue vino jácara igorai finoína iciru izoide raamo totánide. Dáamie daií totáadi afe comue vino afe jácara icíruna eroide raana cuatade. Afemona afe iciru naa vino diga táinomo fáifite.

³⁸ Iemona comue vino comue igorai finoína icíruna eróidemo jónerede. Iemona afe naga ñue éenoga.

³⁹ Daje izói jácara vino jiródinomona, buna cómojina jicáñena. Mei afémie “Jácaji jamánomo caimárena,” dáideza. (Afe bie dáinado Jesús ie comue llófueinafue íemo íaioi jaiai llófuegafue dáanomo íinonide íaioimo llote.)

6

Jesús llófuegamaci ocózinai llaruimo trigo ímoiai dícoiano otá güitai
(Mt 12.1-8; Mr 2.23-28)

¹ Daa ocózinai llaruuido Jesús naa ie llófuegamaci jacáfaii cigido íaioi maca llezica, ie llófuegamaci trigo ímoiai dícoiano otíai. Uano íaioi ónoido lléguaño aféjiaina güitai.

² Mei jira fariséuaimona dáamierie jicánotiai:

—¿Níbai mei ocózinai llaruimo rairuícamo táijidiomoi? —daiíai.

³ Jira Jesús íaioi uai ote:

—¿Omoi jaiai illaima David finócafue cúeinana facadóñediomoi? Afémie naa ie nabáñiari jufínitai.

⁴ Afe llezica Juzíñamui jofomo jofo jaillano rairuica pániai ote. Uano güite. Afe mei afémiedo jáidinomo fecade. Mei íadi afe pan dani lletáriraini güiga. Abi dine jamai comini güinide.

⁵ Nane dáanomo íaioina daide:

—Nanoide íima Jitódicueza, ocózinai llaruui, cue ocuille ríino ite, —daide.

Onoína jofo naiídimie rafue
(Mt 12.9-14; Mr 3.1-6)

⁶ Nane jiáie ocózinai llaruimo Jesús Juzíñamui uai llorácomo jofo jaide. Jailano llófuete. Afécomo onoi nabézina jofo naiídimie ite.

⁷ Afe llezica ocuica uai llófuete naa fariséuairi Jesumo báinino éroiediai, ocózinai llaruuido afe ónoína jofo naiídimie jillotajana cóillena. Afémie jillotaia áfede fiénidifue íemo jítaiticai, comeci anado daiíai.

⁸ Mei íadi Jesús íaioi comeci fácajana onode; jira ónoína jofo naiídimiēna daide:

—Náidacaillano bai cai cigimo bi, —daide.

Iemona afémie náidacaillano bai náidazaide.

⁹ Afe mei Jesús jiáimacina daide:

—Omoimo dafue jicánoiticue. ¿Ocózinai llaruimo ñie táijina rairuínina? ¿Cai finoca fiénidifue, mei níbai cai finoca ñúefue? ¿Cómēna jillotaiticai, mei níbai méneitica? —daide.

¹⁰ Iemona Jesús nana ie onífenedo gairide comínimo eroide. Afemaci ie uai oñena jira, ónoína jofo naiídimiēna daide:

—O onoi jino zuita, —daide.

Jira afémie zuitade. Zuitádemo ñue jillode.

¹¹ Mei íadi afemona afe jiáimaci jamánomo ríicaidiai. Dani jofo conímamo jicánotiai, ¿Mei ñie izói baie Jesús uáitaredicai?

Jesús doce diga oni oréllimacina nizede

(Mt 10.1-4; Mr 3.13-19)

¹² Aféruillaído Jesús caifónedumo Moo Juziñamuimo úrizaide. Afénomo afémie Juziñamuimo úritemo monaide.

¹³ Ja monáidemo nana ie llófuegamaci jíirite. Jíirillano afémacimona doce dígamie nizede. “Oni oréllino” íaioina mamede.

¹⁴ Afe be nímaci: Simón, afémie jíaie mámece jíitaina Pedro, íemo Simón ama Andrés, íemo Santiago, íemo Juan, íemo Felipe, íemo Bartolomé,

¹⁵ íemo Mateo, íemo Tomás, íemo Alfeo jító Santiago, íemo Iere Járidotimacimo jaináidimie Simón,

¹⁶ íemo Santiago ama Judas, íemo uire Jesús fécaitimie Judas Iscariote.

Jesús aillo nairai llófuete

(Mt 4.23-25)

¹⁷ Jesús caifónedumona naa afémaciri ana bitíaiói. Billano ñúenomo nano íanori naidáiediaíói. Afénomo aillo jíicánemaci Judea éniemona bitino gairídiaíói. Daje llezica Jerusalémona, íemo jíái Tiro, Sidón diga jica itíniemona bitíaiói. Bimaci nana Jesús úrillamo cacáreizaibitiaíói. Daje izói afémaci íaioimo ite dúicomona Jesús jíllotallena bitíaiói.

¹⁸ Daje izói fiénide jóriai úcaigano jíllotagaiaíói.

¹⁹ Afe llezica nana comini Jesuna jetáacadiaíói, mei afémie íemo ite ríinodo nana íaioina jíllotateza.

Cáimafue zuufue diga

(Mt 5.1-12)

²⁰ Iemona Jesús ie llófuegamacimo érocaillano íaioina daide:

—“Comeci dinena dúeredicai,” dáifiredino omoi íadi, dúerede íadi íóbidiomoi; mei ómoimo Juziñamui illáimana illano dúideza.

²¹ Júbiena méinegamie iere güicana izói, Juziñamui comece jíitaina izói iere íacadino omoi íadi, caimare íóbidiomoi, mei Juziñamui afe omoi íacana izói omoi íllena ómoína cánoiteza.

Birui duere éediomoi íadi caimare itíomoi, mei uire zádaítomoi.

²² Nanoide Ima Jitódicueza cue ícoinia comini ómoína éoína llezica caimare ítíomoi.

Daje izói cue ícoinia ómoína jino íaíói jíúadi íóbítomoi. Iemo jíái cue ícoinia ómoína íaire íaíói daííadi, daje izói o mámečina íairede raa izói íaíói jámairuia, íóbítomoi.

²³ Aféruído iere omoi íóbicaíri. Jamánomo caimare omoi iri, monamo áillue omoi jíridolle raa íteza. Mei afe izói bimaci nánoidígima Juziñamui uai llórainina iere duere finódiaíói.

²⁴ Mei jíaífodo omoi ráanaitino ní dúerena, mei omoi caimátailla raana jae otíomoi.

²⁵ Daje izói omoi jeírede izói itino ní dúerena, mei uire iere jufíruitomoi.

Afe izói birui ómoimona zadáidino ní dúerena, mei uire dúerenari éeítomoi.

²⁶ Daje izói nana comini ómoído ñue íaíói úrilla llezica, ní omoi dúerena. Mei afe izói afémaci jaiáigima taino uai llórainimo caimare úritiaíoi.

Caina éoidinona izíruiredicai

(Mt 5.38-48; 7.12)

²⁷ Mei íadi cue úrillamo cacáreidiomoina dáaiticue: Omoi bacáuai imaci izói dino, nii omoi diga iciritinona mai omoi izírui. Daje izói omoi éoidinona mai ñue omoi finori.

²⁸ Omoi faidódinona mai omoi cáimadori. Daje izói ómoina fieni finóacadiño, ñue íaiói illeza, mai Juzíñamui omoi jicari.

²⁹ Daa come o uieco putáadi, daje llezica enéfenena ie fállena mai o fecari. Daje izói dáamie táinona omo jítajano, o emódoidiroi bairóadi, daje llezica o caifóferoína mai o uitátari.

³⁰ Ninó dáamie raana omo jicáadi mai afémiemo jeruíñeno o fecari. Omona bairoca raana abido jicánoñeno o iri.

³¹ Jira jiámamio uicodo bie izói finórediomoi. Jiáima omo finóllena o óiacana dieze, áfeze afémiemo mai o finori.

³² Daa ómoína izíruiñinona omoi izírui, ¿Mei ñie ñúefue finódiomoi? Mei fiénidino afe izói finuaza.

³³ Daje izói daa omoi ñue finódino ñue omoi finóadi, ¿némei omoi finoca ñúefue? Mei fiénide comini afe izói finuaza.

³⁴ Afe izói daa “meine abido cue méidolle cue coméicillamiemo” o fecáadi, ¿némei o finoca ñúefue? Mei afe izói, fiénidino jiáie fiénidinomo méidollena fecádiaioiza.

³⁵ Mei íadi ómoína éoidinona izíruirediomoi. Abido méidolle coméicño, fia fecárediomoi, afémamio ñue finóllena. Afe izói omoi illemona áillue ñúefuiai máñoiñomoi. Afe llezica caifoide Juzíñamui jítótiana jáitomoi. Mei afémie daje izói jeruíñidimie. Figora daiñididinomo, daje izói fiénidinomo afémie jeruíñeno dájerize fecade.

³⁶ Omoi Moo comínimo dúcaifiredeza, afe dieze jiámamio mai omoi dúcaifireiri.

Jiáima jánana fieni úriñeno iri (Mt 7.1-5)

³⁷ Jiáima jánana mai fieni úriñeno omoi iri, áfemona Juzíñamui riire ómoimo jicánoiza. Mai jiáimana duere finótañeno omoi iri, afe izói Juzíñamui duere omoi fñoiza. Jiáima ómoimo finoca fiénidifue mai omoi féitari, afe izói Juzíñamui omoi fiénidifue féitaiteza.

³⁸ Jiámamo mai omoi ífireiri, íemona Juzíñamui ómoimo ífireiteza. Afémie raa omoi ofítara cirígaimo iere ñue fácajano afégaimo jóoneite. Afémie afégaina ñue riire jílloiciiteza. Iemo jiái afégaina caifo jica ebena óruitaite. Afémie afegai jamánomo oruitajamona ana abido cóciite. Jiámamo cai facáfírena izói Juzíñamui caimo fácaite.

³⁹ Jesús bie onótatifue afémamio lloite:

¿Meita uñidimie jiáie uñidimie iodo ífórede? Nibai afe íaillinoi jáidiaillinoína ¿meita dáafomo báituaillinoi?

⁴⁰ Llófuegamacimona dáamie ie llófuetimie baimo onóñede. Mei íadi ie llófueina fuilla mei ie llófuetimie illa izói iite.

⁴¹ ¿Mei ñie izói o ama uimo ite jéenide ráaruaina eróredio, mei íadi dama o uimo ite jéerie rarúnguaina náfueñedio? (Afena daiacade: Aillo fiénidifue omo illa llezica; ¿ñie izói due jiza oni nibéfodo baiñidimie jánana úriedio? Urinidio.)

⁴² Mei o uimo ite jéerie rarúnguaina o náfueñenia, ¿ñie izói o ámana “o uimo ite jéenide ráaruaina cue otata,” dáitio? Daiñidio. ¡Comeci dine íáirena mei jñofene ñue cóidimedio! Fueñe o uimo ite áillue rarúnguai mai o oíri; afe mei o ama uimo ite jéenide ráaruai óllena ñue cóitioza.

*Nana amena ie llíziedo ónorede
(Mt 7.17-20; 12.34-35)*

⁴³ Ñuera amena fiénide ráajaiaina llizínide. Daje izói fiénide amena ñuera ráajaiaina llizínide.

⁴⁴ Mei naga amena ie llizíllajido onoiga. Jaca jírede monáigimona jíficollina jofu óñenaza. Daje izói “zarza” daína íanoride rarócimona jíricue jofu óñega.

⁴⁵ Ñuera come ñúefuedo úrite, mei ie comécimo ñúefue íllaza. Daje izói fiénidimie fiéní úrite, mei ie comécimo fiénidifue íllaza. Mei uáfueza o comécimo aillo jebuide raa o fuedo úrillaza.

*Mena jofu nillino rafue
(Mt 7.24-27)*

⁴⁶ Cue daínana íinoñediomo: ía çnibái mei, “cai Ocuíraima, cai Ocuíraima” daidíomo?

⁴⁷ Cuemo cacáreizaibitímie, íemo cue daína finófiredimie illa izói ómoimo llóiticue.

⁴⁸ Afémie jofu nállana baitádímie izoide. Afe ñue nífredimie fueñe ana jica jíaílliraina raite; ana maíridínomo jóonete. Afe mei ille renaila llezica afécomo jainoi riire dúcide. Mei íadi afe jofona jainóñede, mei afeco mozioidillirai maíridínomo jóideza.

⁴⁹ Mei jíáfodo, cuemo cacáreizaibitímie mei íadi cue daínana finóñedimie, bie jíáifo jofu nitímie izoide. Bímie riire llíiñede éniemo jofu nite. Afe mei ille renaila llezica afécomo jainoi riire dúcide. Afemona afeco jainode. Iemona afeco due fiébiñeno nine táino caide.

7

*Romano illaíma ocuífregamie Jesús jíllotate
(Mt 8.5-13)*

¹ Jesús comínimo úrilla fuilla mei Capernaumo jaide.

² Afénomo daa romano illaíma íte. Afémie íe ocuífregamíena íere izíruite, mei íadi afe ocuífregamie íere írárede, tíllanomo dúcide.

³ Afe illaíma comíni Jesudo úrillana cacáíllano, judíuaimona ocuífrede éicomíni orede, Jesumo izire jicállena, íe ocuífregamie jíllotaíbillena.

⁴ Afémaci Jesumo dúcíllano íere izire jicádiaioi:

—Baie illaíma íere canórede,

⁵ mei afémie cai náiraimo caimare comécíifrede. Daa afémie cai Juzíñamui uai lloraco nitátate, —daidíaoi.

⁶ Iemona Jesús afémaciri jaide. Mei íadi ja afe jofomo áinozilla llezica afe illaíma dáarie ónoigamíai Jesumo orede. Illaíma daína izói Jesuna daidíaoi:

—Ocuíraíma, ona áfedoacañedicue. Cue jofomo o bíllena dúiñede, mei jamáimiedicue.

⁷ Íe jira dama omo úrizaíbiñedicue. Jicana o uaido o daíiri, áfemona cue ocuífregamie jílloteza.

⁸ Mei cue jíáie illaíma uai anamo íticue. Afe izói cue úiñoga fuíríraíni cue uai anamo íte. Afémacimona dáamíena “Mai jai” cue daííadi, afémie jaide. Iemo jíámíena “Bí” cue daííadi, afémie bíte. Cue ocuífregamíena “Bíemo o táijjiri” cue daííadi, afémie áfena finode, —daide.

⁹ Jesús áfena cacáíllano, afémie daínari caimare fáigacaide. Iemo Jesús afémiedo jáidínomo érocaíllano daide:

—Uáfueña ómoina dáititue: Nana Israel náiraime bie izói ñnote come jaca baiñédicue, —daide.

¹⁰ Afe orécáno meine jofomo jáidiaioimo, afe irárede ocuífirégamie ja jíllodena cíozaidiaioi.

Jesús daa fecingo jitó tilla abido cáadimiena jaitate

¹¹ Bie méifomo Jesús Naína daina jófueño jaide. Ie llófuegamaci naa aillo jíaimaciri iedo jáidiaioi.

¹² Afe jófueño ja ánozidiaioimo, Jesús tíidimie íaioi raíájillana ciode. Afe tíidimie ie éimona daade jitó. Afe llezica afengo jae fecingo. Aféruido afe jofue comínimona aillo aféngona nabáidiaioi.

¹³ Ocuíraima Jesús aféngona cíollano íemo dúecaide. Dúecaillano daide:

—Mai éeñeno, —daide.

¹⁴ Afe llezica Jesús “ataúd” daina tíidimie illácojimo ánozillano afécoji jetade. Jira afécoji uitino mozíñotiaioi. Iemona Jesús tíidimiena daide:

—Jitócome, mai náidacai ona daidicue, —daide.

¹⁵ Mei daí daina llezica, afe tíidimie raínáicaillano úrite. Afe mei Jesús ie eina daide, “Be, o jitó; mai ómicoi jai; uái ómicoi iri,” daide.

¹⁶ Nana comini áfena cíollano jacínaitiaioi. Juzíñamuimo aillo ñúefue jóoniano daidiaioi:

—Birui cai cígiri jamánomoide uai llóraima cíocailla, —daidiaioi.

Nane jíáfodo daidiaioi:

—Juzíñamui ie nairai cánuabilla, —daidiaioi.

¹⁷ Iemona afe bie Jesús finócafue jica jalleide; ua nana Judea éniemo naa afe onífenemo itígobaiido jalleide.

Juan Bautista orécáno

(Mt 11.2-19)

¹⁸ Juan nana afe Jesús finócano fidide, mei íedo jáidino afémiemo llógaza.

¹⁹ Mei íemona afémacimona ménamie uáidota Jesús dine orede. Oriano, bie meita ua bite Cristo dánana ónoillena jicánotade. Daje izói, meita nibai nai jíáie bíitímie uíñoiticaí, afémie daí jicánotade.

²⁰ Afemona Juan orécáno Jesumo dúciillano íena daidiaioi:

—O meita ua bite Cristo dainámiedio áfena ñue onóillena Juan cai jicánotade. Daje izói meita nibai nai jíáie bíitímie uíñoiticaí dánana ónoillena cai jicánotade, —daidiaillinoi.

²¹ Afe íaillinoi dúcina llezica, Jesús diga comini íaioi íranaiemona jíllotade; daje izói dáaruído íaioi ote dúcuaimona jíllotade. Daje izói fiénide jóriai úicaigamacina jíllotade. Iemo jíái diga uínidinuiái uina cíoitade.

²² Afe llezica Jesús íaillinoína daide:

—Ómicoi cíonafue, naa ómicoi cacánafue diga mai Juaamo lluájiri. Bie izói afémiemo lluájiri: Uínidino ui ja cíoide, íemo macáñedino ja macádeza, íemo chíinaitino ja ñúemacina jaide, íemo jefona cacáñedino ja ñue cacádiaioi, íemo dáarie tíidino meine abido cáadiaioi, íemo dúeredinomo jíllona uai llógaza. Nana bífuiaí mai afémiemo lluájiri.

²³ Cuemo ñnoñeilluaina baiñédimie íobite.

²⁴ Juan orécáno meine abido jailla mei, Jesús Juaado comínimo úrite; daide:

—¿Mei táizicimo minícana cíozaidiomi? Nibai dáamie ie daina uaina méidofiredimiena cíozaidiomi.

²⁵ Afe izóidena omoi cíozaiñenia, ¿mei minícana cíozaidiomi? ¿Meita nibai ñue cioide ráifide iniroi jitáoidimiena cíozaidiomi? Onódiomoiza, ñuecuiroi jitáofiredino illaini jofomo ífirediaioi naa dani íaioi comeci jitaina izói itñori.

²⁶ Mei íraínomo, ¿minícana cíozaidiomi? ¿Nibai Juziñamui uai jino llórainmana cíozaidiomi? Jii, ua, Juziñamui uai llórainma baimo jamánomoidimiena cíozaidiomi.

²⁷ Juan baie Cuegáuai dainámie. Jaiai úicodo nai cue biñena llezica, afe uaimo Juziñamui afémie dibenedo cuena daide:

O bille io ñue finóllena izói, comini íaioi comécido ñue omo jíeruillena cue llujáitimie o úicodo óreiticue.

²⁸ Nana comínimona ite Juziñamui uai llórainimona Juan Bautista baimo jamánomoidimiena iñede. Mei jáífodo, Juziñamui illáimana illánomona jabóidimie Juan baimo jamánomoide.

²⁹ Afena cacáillano, Juan bautizaga gobierno ibátaga úcube llínoraini, naa jáíie bautizaiganori, “Juziñamui níifuenidena finódimie,” daidíaioi.

³⁰ Mei jáífodo Juan bautizañega fariséuai naa bautizañega ocuica uai llófuetinori Juziñamui íaioiena mameca ñuefuiái jámairuillano táinomo fáifitataioi.

³¹ Iemo Ocuíraima Jesús daide:

—Bie monado itínona ¿ñue izói íaioina mámeiticue? ¿Mei ñue izói cíoitiaioi?

³² Jofue cigi íbirimo jífánote úrue izóidiaioi. Afémaci conímamo ebírede rúado caimátaiacadiaioi, mei íadi áfena fairíoñediaioi. Daje izói conímama zúurede rúado firaacadiaioi, mei íadi daje izói áfemo cacáreacañediaioi. Afémaci jaca caimátaitanidiaioi.

³³ Afe bie izói ómoimo ite. Mei Juan Bautista billa llezica afémie fímairillano gülleniai figo güiñede, daje izói vínona jiróñede. Iemona “fiénide jóriaí uícaigamiedio” iena daidíomi.

³⁴ Afe mei cue, afe Nanoide Iima Jitó dainámiedicue biticue. Billano, jáíimaci izói güiticue, iemo jiródicue. Afemona bie izói nane cuena daidíomi: “Bímie iere güilláredimie; jéerie jirófredimie. Fiénidifuiaredino nabáidimie; daje izói gobierno ibátaga úcube llínoraini nabáifredimie,” cuena dáifirediomi.

³⁵ Comini Juziñamui orécanona fieni daidíaioi íadi, Juziñamui baitaca rafue jíeruitinodo jino comínimo ñue cíotaga.

Fariseo Simón jofomo Jesús güizájide

³⁶ Fariséuaimona dáamie Jesús güizájillena lloste. Iemona Jesús afécomo güizájide. Jaillano afeco eromo güirábanimo ráinazaide.

³⁷ Afe llezica, afe jófúemo ite fiénide ringo, fariseo Simón Jesús güizaibillana fidíillano afécomo bite. Afengo “alabastro” daina nofici finoina duera iciru atide. Aferu ziore cáiredijina oruide.

³⁸ Eebicaillano Jesús ídai abimo ráinazaide. Afe llezica ie ui jémedo Jesús ídai jocode. Afe mei ie ífótiido dote. Duano ñitade; ñítajano ie uiga ziore cáiredijina afémie ídaimo totade.

³⁹ Afe Jesús güllena uáidote fariseo, afengo finócafuena cíoilano, comécido daide: “Bímie ua uai llóramania, bie ringo fiéninana ónoite. Afémie abina nibai aféngona jétatañeite. Mei afengo fiénidingo illaza afémie aféngomona abí ráiruite,” daí comeci facade.

⁴⁰ Afe jira Jesús fariséona daide:

—Simón, cue daa uai omo llóiacadicue, —daide.

Mei jira fariseo uai ote:

—Llófueraima, mei daini, —daide.

⁴¹ Jira Jesús daide:

—Mena come uícomo íaillinoimo iga úcube daje izóí meine fecádimiemo írediaillinoi. Dáamie quinientos dieze meine írede, íemo jiáimie cincuenta dieze meine írede.

⁴² Mei íadí nágaillinoi afe úcube fecádimiemo íaillinoi méidolle íñena jira, afe fecádimie afe íaillinoi abído írede úcubena féitate. Mei birui cuena daini, mei bíaillinoimona ¿nímie fecádimiena jamánomo izíruirena? —daide.

⁴³ Jira Simón uai ote:

—Cúemona, jamánomo aillo illano féitagamie aillo izíruilla, —daide.

Jira Jesús íena daide:

—Ñue onódio, —daide.

⁴⁴ Afe mei, Jesús ringomo érocaillano Simona daide:

—¿Bingona ciódio? O jofomo cue billa llezica, cue ídaina jocóñedio, mei jiáifodo bie ringo ie ui jémedo cue ídaina jocode. Jócuano ie ifóitido zafénaitade.

⁴⁵ Iemo o jofomo biticue íadí cuena ñitáñedio, mei íadí afengo jofo cue billa llezica cue idai ñitajana jaca fáicanocaiñede.

⁴⁶ Daje izóí o jofomo cue dúcina mei cue ífomo cáiredijina totáñedio, mei jiáifodo afengo ziore cáiredijina cue ídaimo totade.

⁴⁷ Ie jira ona daidicue, bie ringo aillo cuena izíruillamona, afengo finoca aillo fiénidífue dóinana ácatate. Mei jiáifodo jabo cuena izíruitimie íemo ite íaifue jabo doga.

⁴⁸ Mei afe mei Jesús aféngona daide:

—O finoca fiénidífue jae dófideza, —daide.

⁴⁹ Afénomo afémie diga ráiide daane güllena uáidogano dani conímana daidíaioi:

—Mei bie ¿níie come; comínimo ite fiénidífuaiaina dóteza? —daidíaioi.

⁵⁰ Afe mei Jesús afe ringona daide:

—Mei daingo o ínuado jae jíllodio; mai uái daí o jairi, —daide.

8

Jesús canófredingoníai

¹ Bie méifodo, Jesús diga jófuiuido macácaide, naa due illánuiari. Afénuiuido Juzíñamui illáimana illa rafue jino llocana uite. Afe llezica ie nizeca doce dígade oréllino afémiedo jáidiaioi.

² Afe dáaruído dáarie duícuaimona ie jíllotaga ringóniai afémiedo jáidiaioi. Iemo jiái dáarie íaioi uícaide fiénide jóriaimona jíllotaga ringóniai íedo jáidiaioi. Afémacimona Magdalena énie ingo Maríana mámeçiredingo ite. Aféngomona siete dígade fiénide jóriai nauí jino oreca.

³ Iemo jiáie canódingo Cuza ai Juana. Afe Cuza illaíma Herodes jabóidillaíma. Iemo jiáingo Susana. Iemo jiái aillo jiáie ringóniai, íaioimo ite ráaniaina Jesús canódingotiai.

Ríjifredimie rafue

(Mt 13.1-9; Mr 4.1-9)

⁴ Afe jófuiaimona aillo comini Jesuna cióillena bitíai. Aillo comini dáonomo ofilla llezica, íai. onóigafuedo Jesús jiáifue íaioimo llófue. Íaioina daide:

⁵ —Ríjifredimie ie rilliji rizájide. Rizájilla llezica, ie rigájiaimona dáarie iomo baiide. Afe iomo baídijiai zaizíbide; jiáijiai ofocuizai güiga.

⁶ Jiáie rigájiai noficiai emódomo baiide. Aféjiai zícua llezica jainoi inénari dúizite.

⁷ Ie mei jiáijiai éegiai cígimo baiide. Afe éegiai jéerie zícua mona aféjiaina íratitano titade.

⁸ Mei íadi jiáie rigájiai ñuera éniemo baiide. Ñue zícua mei, jamánomo aite. Dáajidemono cien dígaji llizide.

Bie izói úrillano, Jesús ficire daide:

—Cacácadimie cacai, —daide.

Cacácaañedino jánaillena Jesús comini onóigado úrite

(Mt 13.10-17; Mr 4.10-12)

⁹ Iemona ie llófuegamaci afémiemo jicánotiaioi:

—Afe llogafue ¿niie izói daíacade? —daííai.oi.

¹⁰ Jira afémie íaioina daide:

—Juziñamui ie illáimana illa rafue ónonidifuiái ómoína onótate. Mei íadi jiáimacimo afémaci jánaillena comini onóigado úriticue. Iemona uina cíoñedino izói íitiaioi. Daje izói afe uai afémaci cacana llezica, onóñedino izói íitiaioi.

Ríjifredimie rafue Jesús jino uáfodo llote

(Mt 13.18-23; Mr 4.13-20)

¹¹ Ríjifredimiedo lloga rafue bie izói daíacade: Afe rigájiai daina Juziñamui lloga ñuera uai.

¹² Afe iomo baídijiai daina ñuera uaina cacádino. Mei íadi cacana mei, Taife billano afe ñuera uaina comini íaioi comécimona féitate. Afémaci jílloneillena, Taife afémaci afe uaina ínotañede.

¹³ Afe noficiaimo baídijiai daina jiáifodo jóide ñuera uaina cacádino. Afe uaina cacáillano caimare otiaioi. Mei íadi afémaci raire zicode raa riire jaináñena izói, Juziñamuimo afémaci figo jaináñenamona are inédiaioi. Nano íanori ínotiaioi. Mei íadi izire íaioi facatalliruiemo dúcina llezica ñuefueña fáicanocaitiaioi.

¹⁴ Iemo afe éegiai cígimo baídijiai daina, jiáie ñuera uai cacádino. Mei íadi cacana llezica daní íaioi comeci jítaina diné jáiacadiaioi. Iemona afémaci comeci oni jiáinomo uilláfuiáido, nocáe builla izói féiraitiaioi. Daje izói iere íaioi ráareicanado, íemo jiái bíniemo ite caimare cai itátafuiáido anáfenogai.oi izóidiaioi. Iemona figo llizíñede itíaioi.

¹⁵ Mei jiáifodo afe ñuera éniemo baídijiai daina ñuera uaina cacárecadino. Afémaci ñuera comécido cacáillano afe uaina ñue náfuetiaioi. Iemona áfena fáicanocaiñeno ñue aite izói jáidiaioi.

Boode mechera jánaide izóidifue

(Mr 4.21-25)

16 Buna boode mechera retáidoñede. Daje izói buna boode mechera bíra anamo raináñede. Mei íadi jiáifodo boode mechera caifo uáfori cíoidinomo raináfírega, jofo jáidino ñue cíoilena.

17 Mei uáfueza, nana retáidoga ráaniai uáfori jino cíotaibile. Daje izói nana báinide ráfuiái jino uáfori llócailleza.

18 Aquíe izóideza ñue omoi cacáreiri: Iere Juzíñamuina onócadimíemo ie báitaja báimo jamánomo írede, mei íadi Juzíñamui dibénedo figo onóacañedimie, due ie onógafue féitalle.

Jesús ei naa ie ámatiairi
(Mt 12.46-50; Mr 3.31-35)

19 Iemona Jesús ei naa ie ámatiairi ie illánomo dúcidiaioi. Afénomo aillo comini íllaza, afémiemo ánozinidiaioi.

20 Jira dáamie Jesumo llujide:

—O ei, naa o ámatiairi jino benó itíaioi. O diga úriacadiaioi, —daide.

21 Jira Jesús comínina daide:

—Juzíñamui lloga uaina cacáillano afe uai jeire otino cue eina, cue ámatiaina, —daide.

Jesús jorai bagua naa jairifo diga llúcaitate
(Mt 8.23-27; Mr 4.35-41)

22 Afe mei jiáiruido, Jesús ie llófuegamaciri áillocaemo ana jaillano Jesús daide:

—Mai jorai ruícaferaimo cai jai, —daide.

Iemona jáidiaioi.

23 Ruíca íaioi jáitaja llezica, Jesús inide. Afe llezica riírede jairifo jóraimo ónonino raire bite. Riire jáíñuamona afe nocáe buíacade. Afécaena jacire anábaitacade.

24 Mei jira Jesús cazítatiaioi. Cazítajano íena daidiaioi:

—Llófueraíma, Llófueraíma, ¡ja buízaidicái! —daidiaioi.

Iemona Jesús náidacaillano jairifo naa jorai bagua diga llúcaitate. Afemona nana llúcaide; nífuenino jorai uái ite.

25 Afe mei Jesús ie llófuegamacina daide:

—¿Ico nai Juzíñamuimo íinoñediomoi? —daide.

Mei íadi afémaci jacínaitiaioi. Afémiemo caimare fáigacaillano conímamo jicánotiaioi:

—¿Mei bie níie cómeita? Afémie jairífona ocuide, daje izói jáinoina ocuide. Iemo afémie uaina ínotiaioi, —daidiaioi.

Gerasa éniemo ite fiénide jóriai uícaigamie
(Mt 8.28-34; Mr 5.1-20)

26 Jailla ícoímo Gerasa éniemo dúcidiaioi. Afénie Galilea énie ruícaferaimo ite.

27 Como ari aféniemo jáidiaioímo, afe jófuemona dáamie Jesús diné bite. Ja diga fimónaiaí afémie fiénide jóriai uícaiga. Afémie ínícuro jaca jítañede. Daje jofomo uái íñede, mei jiáifodo raíáfuaína jofórede.

28 Jesuna cíoilano afémie anamo dújuzaibite. Dújuzaibillano ficire daide:

—Caifoide Juzíñamui Jító Jesús, ¿níbái mei cuemo jíricaidio? Duere cue o fínoñeillena izire jicádícue, —daide.

²⁹ Afémie bie izói daide, mei Jesús afémiemo ite fiénide jóriai jino oréllena ocuícaza. Diga ícaíño afémiena fiénide jóriai riire uícade. Afe llezica comini afémie onoi idai diga llojéodo máifirediaioi. Jiáimaci fieni finoñeillena izire íena rairuídiaioi. Mei íadi afémie afe maia llójeina titáfiredre, ie mei afe ie uícaide fiénide jóriai afémiena táizicimo botátafiredre.

³⁰ Jira Jesús afémiemo jicánote:

—¿O mámecei bu? —daide.

Jira afémie uai ote:

—Legiona mámeceiredicue, —daide. Afe “Legiona” daína uai, aillo comini, daílacana.

Afémie bie izói daide mei aillo fiénide jóriai íena uícaideza.

³¹ Afe bie fiénide jóriai Jesumo izire jicádiaioi duere finótalle íbáirafomo afémaci óreiñellena.

³² Mei afe llezica afénomo ite íconido aillo meróniai güícaidiaioiza, fiénide jóriai afe meróniaimo jáillena Jesumo izire jicádiaioi. Iemona Jesús áfena fairíote.

³³ Iemona afe fiénide jóriai ímamonai jino billano meróniaimo jáidiaioi. Afe mei afe meróniai ápera íconido jabícana jóraimo cocízitiaioi. Dinomo coróbaitiaioi.

³⁴ Meróniai úiñotino áfena cíoillano jacínaitiaioi. Aferi jacínaillano botádiaioi. Iemona jófuemo llujídiaioi; daje izói oni fuédamo itícuaimo llotiaioi.

³⁵ Iemona jofue comini afe comuídufemo acárizaidiaioi. Jesús illánomo íaioi dúcina llezica fiénide jóriaina jino orécamié Jesús anari uái ráinana cíozaidiaioi. Afe íima ja íniroi jítáode; daje izói ie abína ñue onode. Afena cíoillano iere jacírúituaioi.

³⁶ Afena cíodino nauí fiénide jóriai uícaigamié jíllotaja oni jiáinomo llujídiaioi.

³⁷ Mei bíemona nana afe Gerasa énie comini, afénomona Jesús oni jiáinomo jáillena izire jicádiaioi, mei áfena iere jacírúituaioiza. Iemona Jesús ana áillocaemo jáizaide, ruica abido jáillena.

³⁸ Afe llezica afe fiénide jóriaina jino orécamié Jesús diga jáillena izire jicade. Mei íadi Jesús áfena fairíoñede; afémiena afénomo fiébitade. Iena daide:

³⁹ —Mai meine o jofomo jai. Jaillano nana Juzíñamui omo finócafuaiaina jino lloiri, —daide.

Iemona afémie jaillano, nana jofue comínimo Juzíñamui íemo finócafuaii jino llujíde.

*Jairo jiza íemo jiáingo Jesús íncuíro jétaibitingo Jesús jíllotate
(Mt 9.18-26; Mr 5.21-43)*

⁴⁰ Jesús meine jorai ruicáfenemona dúcina llezica, comini afémiena iere caimare llínotiaioi. Mei nana afémiemo ocuírúidiaioiza.

⁴¹ Afe llezica Jáirona mámeceiredimie dúcide. Afémie Juzíñamui uai lloraco illaíma. Afémie Jesús anamo fueco díne ana bíjicaide. Bíjicaillamo izire daide,

⁴² “Cue jofomo biri; mei daade cue jiza tízaideza,” daide. Afengo ja doce fimona ite. Iemona Jesús afémiedo jaide. Jailla llezica diga comini íedo jaide; iere rillire jáidiaioi.

⁴³ Afémaci cígimo iráredingó ite. Afengo doce fimona die dícotailari irárede. Nana aféngomo ite úcube manófredinomo fuite; mei íadi afémaci aféngona jíllotanidiaioi.

44 Afe ringo jinófene dinena Jesumo billano ie inícuero fueda jetánote. Ie jetánua llezica afengo die llícaide.

45 Iemona Jesús jicánote:

—¿Mei bu cue inícuero jetánoga? —daide.

Iemo nana comini jáanuano “Ona bu jetáñena,” daidíai. Jira Pedro naa ie nabáñiairi daide:

—Llófueraima, nana comini rillírenari o ñuitádiai. ¿Ñibái mei, “Bu cue jeta,” daidío?

46 Mei íadi Jesús daide:

—Ja onódicueza daa come cuena jetade. Mei cue riino afe come jillotajana onódicue, —daide.

47 Afe jetaibitingo ja ie báillana onóillano cuidáricana Jesús anamo dújuzaibite. Iemona afengo jino nana comini eróicana jáanoñeno ie inícuero jetáacana rafue llote. Iemo jái afémie inícuero jeta llezica ie jillona llote.

48 Mei jira Jesús aféngona daide:

—Cue jiza, cuemo o ñnuamona ja jillodioza. Jaillano caimare uái o iri, —daide.

49 Jesús nai úrioidemo, daa come Jairo jofómona Jesús diné bite. Afe Jairo Juziñamui uai lloraco illaima. Afe lluaíbitimie Jáirona daide:

—O jiza ja tídeza. Mai Llófueraimana úridoñeno iri, —daide.

50 Mei Jesús aféna cacáillano daide:

—O jacíruñeno iri. Dama Juziñamuimo ñnofireiri. Afemona o jiza jilloiteza, —daide.

51 Afe jofomo íai. Dúcina llezica, nana comini afe jofo eromo afémie oréñede. Afe jiza moo, ei diga, íemo jái: Pedro, Santiago, Juan diga jofo uite.

52 Nana comini afengo tíllari ficirerie éenaitiaí. Mei íadi Jesús íaioina daide:

—Omoí ééñeno. Afengo tíñedeza, fia inide, —daide.

53 Daií afémie dáinari zadáidiaí, mei afengo tíllana onódiaí. Daje izói nana iráredino jillotallena riino afémacimo fecade.

54 Iemona Jesús afengo onoi llínota ficire daide:

—Jitaingo, mai náidacai, —daide.

55 Afemona afengo meine abido caade. Iemo afe daina llezica caifo náidacaide. Afe mei Jesús, “Mai afengo ecari” daide.

56 Afe llezica ie moo íaillinoi iere caimare fáigacaidiaillinoi. Mei íadi Jesús íaillinoina afe ie finócafue bumo llotáñede.

9

Jesús doce dígade ie llófuegamacina oni orede (Mt 10.5-15; Mr 6.7-13)

1 Jesús doce dígade ie llófuegamacina dáanomo gairítate. Gairítanona afémie mo ite riino íaioimo fecade, nana jáiforiede fiénide joríaí jino oréllena. Daje izói nana iráredino jillotallena riino afémacimo fecade.

2 Iemo Juziñamui illáimana illarui rafue íaioina oni lluaítate. Daje izói iráredinona jillotate.

3 Íaioina daide:

—Omoí jaille llezica minícana uiñeno, fia omoí jairi. Macara jügüida uiñeno iri, daje izói ciríticoi, íemo güíllena, íemo úcube uiñeno iri. Mena caifóferoi uiñeno, daa uiri.

⁴ Ninó daa jofomo omoi dúcia, afécomo uái iri, afénomona oni omoi jáiñeille dino.

⁵ Nñie jofue comini ómoina llínoacañenia afénomona oni omoi jairi. Omoi jaille llezica, omoi eiba íaie afémacimo teténocairi. Afedo íaioi comécimo ite íaifue nai íaioimo illana onótaitiomoí.

⁶ Afemona ja oni nana ñuegobiaoío jáidiaioi. Jaillano ñuera jállona uai llocana uitíaoi. Daje izóí iráredinona jállotacana uitíaoi.

*Juan Bautista tailla rafue
(Mt 14.1-12; Mr 6.14-29)*

⁷ Ocuidillaíma Herodes nana Jesús finócafuiaina fidide. Iemona Herodes comeci uibílluai íñede, mei dáarie “Juan tíide meine abído cáadimiena jaide,” daidiaioi.

⁸ Jáímaci, “Juziñamui uai llóraíma Elías meine cíocaizaibilla,” daidiaioi. Iemo jáímaci, “Jaiaí ninomo tíide jáie Juziñamui uai llóraíma meine abído cáadimiena jailla,” —daíí llotíaoi.

⁹ Mei jira Herodes daide:

—Nauí cue Juan ífoci jaitátaticue. Iemona ¿mei bie nñimie? Afémiedo diga ráfuiái cacáfiredicue, —daide.

Afe llezica Herodes iere Jesuna cíocade.

*Jesús cinco mil comini ecade
(Mt 14.13-21; Mr 6.30-44; Jn 6.1-14)*

¹⁰ Ie orécano abído dúcina mei, nana íaioi finócafuiái Jesumo llotíaoi. Afe mei Jesús afémacina oni eneno Betsaida jofue áinomo uite.

¹¹ Mei íadi áfena fidíllano comini afénomo jáidiaioi. Afénomo Jesús caimare afémaci llínote. Juziñamui illáimana illirui rafue íaioimo llote. Daje izóí afénomo iráredinona jállotate.

¹² Iemo ja nauzáilla llezica, doce dígamie orécano Jesumo billano daidiaioi: —Mai, comini íaioi ocózinaillena oni ore, áinori ite jófuiaido güille íaioi jenoílleza. Mei benomo cai illánomo güille íñédeza, —daidiaioi.

¹³ Mei jáífodo Jesús íaioina daide:

—Afémaci omoi eca, —daide.

Jira ie uai otíaoi:

—Benomo caimo cinco pániai íemo mena chamu ite. Afe baímo íñédeza. ¿Meita nana bie comini ecállena íbajiredicaí? —daidiaioi.

¹⁴ Mei afénomo cinco mil comini gairídiaioiza. Mei íadi Jesús llófuegamacina daide:

—Nana bie comini cincuenta dígamíerie ana raíziri, —daide.

¹⁵ Daíí finua méifodo nana ana raízidaitiaioi.

¹⁶ Afe llezica Jesús cinco dígade pániai, íemo mena chamu llínote. Llínuano monamo eróillanona Juziñamuina afe güílleri “fere figura,” daide. Daíí daina méifodo, afe ditada, ie llófuegamacimo fecade, afémaci comínimo fecállena.

¹⁷ Iemona nana áferi ñue jeírediaioi. Afe mei llófuegamaci güígamona fiébidino doce cirigai oruitaíaoi.

*Pedro Jesús Crístona uáfodo jino llote
(Mt 16.13-19; Mr 8.27-29)*

¹⁸ Afe mei jáíruido Jesús oni eneno Juziñamuimo úrizaide. Afénomo ie llófuegamaciri ite. Afémacimo afémie jicánote:

—¿Comini n̄ie izóí cuena daidíaiói?

¹⁹ Jira uai otíaiói:

—Dáamierie “Bie Juan Bautista,” daidíaiói, jiáimaci “Bie Elías” daidíaiói, íemo nai jiáimaci “Jaii Juzíñamui uai lloraima meine abido cáailla” daidíaiói.

²⁰ Jira Jesús jicánote:

¿Omoí n̄ie izóí cuena daidíomói?

Jira Pedro daide:

—Juzíñamui n̄izeca Cristo dainámiedio, —daide.

Jesús ie t̄ille rafue jino llote
(Mt 16.20-28; Mr 8.30-9.1)

²¹ Iemo afe Pedro llógana afémie jiáie comínimo iere rairuillano ie llófuegamacina áfena bumo llotátãñede.

²² Iaioina daide:

—Nanoide Híma Jitó Crístodicueza, iere duere finóllicue. Ocuide éinamaci cuena ruifíruitiaíoi. Daje izóí lletáriraini illaini cuena ruifíruitiaíoi, íemo jiái ocuica uai llófuefiredino cuena íáruitiaíoi. Cuena titaitiaíoi, mei íadi daaruíamani íllemona meine abido cáaiticue, —daide.

²³ Afe méifodo nana afémacina daide:

—Ninó dáamie cuedo jáiacania dama ie comeci jitáillana féitaredé. Féitano cuedo jáiredé. Afémie cuedo jailla ícoinia t̄idena afémie áfena izire ónide.

²⁴ Mei ie caana rairuicadimie áfena táinomo fáifitaite. Mei jiáfodo cue ícoinia ie caana táinomo fáifitimie afe fáifidena baimo ziiño illínona máíñoite.

²⁵ Mei daa come nana b̄inie ráaniai aillo náamataadi, mei íadi afe llezica dama ie comeci afémie táinocaitiadi, nana ie maíñoa ráaniai afémiena jillotañeite.

²⁶ Ninó daa come cuena meáiruia, daje izóí cue uaina meáiruia, afe íbana uire illáimana ana cue billíruimo afémiena meáruiticue. Nanoide Híma Jitódicueza, aféruimo Moo Juzíñamui ebírededo bíiticue naa n̄ifuenide Juzíñamui abi ímáiri.

²⁷ Uáfena ómoina dáaiticue: Birui benó itínomona, dáarie nai íaiói t̄iñena llezica Juzíñamui illáimana illarui cíoitiaíoi, —daide.

Jesús abi jiáfodo méidoficailla
(Mt 17.1-8; Mr 9.2-8)

²⁸ Daií daina mei ocho dígarui jailla mei, Jesús Juzíñamuimo úrillena caifónedumo jaide. Afémie Pedro, Santiago, Juan dígamie uite.

²⁹ Nai Juzíñamuimo Jesús úrioina llezica, afémie uíeco jiáfodo méidoficaide. Daje llezica ie in̄cuiro jamánomo úzere quenire jaide.

³⁰ Afe llezica mena come ie abimo cíocaide. Afe íaillinoi afémie diga úrite. Afe bíaillinoi Moisés Elías diga.

³¹ Daje llezica ñue ebire quenire cíoide raa afe íaillinoina onífenedo féricaide. Afe íaillinoi Jesús Jerusalemo duere zefuillano t̄iillifuedo úritiaíoi.

³² Afe llezica Pedro naa ie nabáíñiari iere ínie méinegaiáoi ía, ocuídiaíoi. Afémaci Jesumo ite ebire cíoidena cíodiaíoi; daje izóí afémie diga itíaillinoína cíodiaíoi.

³³ Afe íaillinoi Jesúmona oni jáioicailla llezica, Pedro daide:

—Llófueraima, ¡n̄ii benomo caimare cai illa! Mai daámani jofóchupina cai nii. Daaco óie, jiáico Moisés ie, íemo jiáico Elías ie, —daide.

Mei íadi Pedro ie daiñacana ónoñede. Jira comeci facañeno ebena daiñ daide.

³⁴ Nai ie úrioina llezica, mona ero uíllie íaioina ferínocaiide. Mona ero uíllie eromo íaioi íficailla llezica iere jacínaitiaioi.

³⁵ Afe llezica afe uílliemona daa uaina cacádiaioi:

—Bie iere cue izíruiga Jitoza, afémiemo omoi cacáreiri, —daide.

³⁶ Daiñ daina méifodo Jesumo érocaidiaioimo, ja dama ite. Afe mei afémaci afe íaioi ciónana bummo lloñediaioi.

Jesús fiénide jóríai úcaiga jítócome jíllotate

(Mt 17.14-21; Mr 9.14-29)

³⁷ Afe jiáiruido afe ídumona ana íaioi billa llezica, aillo comini io anamo Jesús úiñotiaioi.

³⁸ Temona comínimona dáamie ficire lléjecaide:

—Llófueraima, dúecaillano daade cue jitomo érocai.

³⁹ Fiénide jóríai riire íena úcade. Afe jóríai íena caillítacaide, afémiena nano íanori titáfiredre. Afe llezica ie fuémoma múllecíai bífiredre. Iena duere finode; afémiena fáicanocaiñede.

⁴⁰ O llófuegamacimo afe jóríai jino oréllena izire jicádícue, mei íadi orénidiaioi, —daide.

⁴¹ Jira Jesús uai ote:

—¡Nii jamánomo ínofinidiomoi! Iemo daje izói ñúefuena iere uáitafirediomoi. ¿Ñie dinó omoi cígimo íredícue omoi cue ríidollena? O jító benomo ati, —daide.

⁴² Mei íadi afe jítócome Jesumo ánozilla llezica, fiénide jóríai afémie ana éniemo dotade. Afe llezica afe jítócome íanori titade. Mei íadi Jesús afe fiénide jóríaina riire dainano oni orede. Afemona Jesús afe jítócome jíllotate. Iemona jíllotano ie moomo abído ite.

⁴³ Iemona nana comini Juziñamuimo ite áillue ríinori caimare fáigacaidiaioi.

Jesús ie tílle rafue meine nane llote

(Mt 17.22-23; Mr 9.30-32)

Nana comini Jesús finócari caimare fáigacaila llezica, afémie ie llófuegamacina daide:

⁴⁴ Bíemo ñue omoi cácarei. Afena omoi féitañeno iri. Nanoide íima Jitódícueza, duere cue íaioi finóllena comínimo fécajillícue, —daide.

⁴⁵ Mei íadi ie llófuegamaci afe ie dainana ñue onóñediaioi. Mei afe- fue afémacimona rairuica. Iemo afe llezica afefue afémiemo jicánuana jacíruitiaioi.

¿Mei ñie come jamánomoina?

(Mt 18.1-5; Mr 9.33-37)

⁴⁶ Afe méifomo ie llófuegamaci dani jofe erócana conímama “cáimona níimie iere jamánomoina” daina júfidotiaioi.

⁴⁷ Mei íadi Jesús íaioi comeci úrillana onode. Iemona daa úrue uáidota ie abímo naidánete.

⁴⁸ Daiñ naidániano afémacina daide:

—Bie úrue cue mámedido llínotimie cuena llínote. Iemo cuena llínotimie, ana cue orédímiena llínote. Mei uafue, omoi cígiri jabóidímie Juziñamui erócana iere jamánomoidímie, —daide Jesús.

*Caina uáitañedimie cai dibénemo ite
(Mr 9.38-40)*

⁴⁹ Ie jira Juan Jesuna daide:

—Llófueraima nauí o mámeçido fiénide jóríai orédimiena ciódicai. Afémie cai diga macañena jira afémiena rairuídicaí, —daide.

⁵⁰ Mei jira Jesús íena daide:

—Afe izóí finódimie rairuífíeno iri. Mei caina uáitañedimie cai dibénemo íteza, —daide.

Jesús Sanatiago Juan diga lletade

⁵¹ Jesús monamo jáiacanarui áinozilla llezica, afémie Jerusalemo jáillena riire mamérite.

⁵² Daií mamérellano uícodo raire uai llóitino orede. Afémaci Samaria éniemo ite duera jófueño jáidiaíoi íaíoi dúcillico raire báillena.

⁵³ Mei íadi afeno ítimaci Jesús naa uícodo orécanori Jerusalén diné íaíoi jáiacana jira, íaíoiina llínoacañediaíoi.

⁵⁴ Ie llofúegamacimona Santiago, Juan diga áfena cióillano Jesuna daide:

—Ocuíraíma, jaíai uai llóraíma Elías fínua izóí, bimaci fúilleza monámona iraina cai jíriredicaí ¿meita jítáidíoi? —daide.

⁵⁵ Iemona Jesús íaillínoímo éroillano llétajano daide:

—Omícoí jaínaina joréñona onóñediomícoí.

⁵⁶ Mei uafue, Nanoide fíma Jitódicueza comíni niné táinocaitallena biñédicue, mei jáífodo comínina jillotaíbiticue, —daide.

Iemona oni jáígobiaímo jáidiaíoi.

*Jesudo jáiacadino bie izóí írediaíoi
(Mt 8.19-22)*

⁵⁷ Iodo íaíoi jailla llezica dáamie Jesuna daide:

—Ocuíraíma, o jáiacana diné o diga jáiacadicue, —daide.

⁵⁸ Jira Jesús afémiena daide:

—Nana jazici rílleníai uái ífíreíllino ite. Daje izóí caífodo féedinuíaí uái íaíoi ráííllino ite. Mei íadi Nanoide fíma Jitódicueza dáanori uái cue illíno íñede, —daide.

⁵⁹ Jesús jáíimiena daide:

—Mai cuedo bi, —daide.

Mei íadi afémie daide:

—Fueñe cue moo tíilla ráíaiticueza cue ore, —daide.

⁶⁰ Jira Jesús ie uai ote:

—Juzíñamuina jíeruíñedíno tíide izóidíno; mai mei afémaci jádie ua tíitímiena ráilleza, mei o cuedo bi, billano Juzíñamui illáimana illírui llujírí, —daide.

⁶¹ Afe mei jáímie Jesuna daide:

—Ocuíraíma, odo bíadicue, mei íadi fueñe cue jofe ero comíni jáillena facáduaiticueza cue ore, —daide.

⁶² Jira Jesús íena daide:

—Daa come ie táijina ja táinia mei, jáínomo comeci fácaja fiénide. Ie jira bie izóidímie Juzíñamui illáimana illírui táijíllena ráííñede, —daide.

1 Bie méifodo, Ocuíraima Jesús nane setenta dígamie nizede. Níziano ménamierie ie úcodo orede. Nana ie jáiacanagobiaimo íaioina orede.

2 Íaioina daide:

—Uáfueza, jacáfaimo ite raa ailla llezica jofo óitino iñena izói, birui Juzíñamui illáimana illáruimo jofo órede comini aillo ite. Mei íadi afémaci jofo óitino figo iñede. (Afe jofo óitino jíáimacimo ñúefue llóitino.) Ie jira cai Ocuíraimamo, jacafai Naama izóidimie mo jíáie ñúefue llóitimacina omoi jicari, afémacina afémie oréllena.

3 Jira omoi jai. Jaillano bie uaimo omoi coméciri: illáirede jazici jicóniai cígimo ovejai jiza ória izói, ómoina orédicue.

4 Omoi jailla llezica cirítico uñeno iri, daje izói úcubena uñeno iri. O eiba icona uñeno iri. Io anamo jíáimaci díga are naidáicana úhuriñeno iri.

5 Nínó daa jofomo jofo o jáiadi afeco comina fueñe bie izói omoi daíri: “Caimare uái illífue bie jofomo íteza.”

6 Afécomo comécina caimare uái itino ia, afe uai afémaci íaioieite. Mei íadi afe izoide comini afénomo iñenia, omoi daíí uáidua uai abido ómoimo bíteza.

7 Oni omoi jáiñeille dinó dácomo uái iri. Omoi íaioi ecálleze güitiomoiza. Omoi jírotalleze jírori. Mei jíáimacina omoi cánua jira, nana afemo tájíraima ie tájinado íbaredeza. Ie jira naga jófuedo güícañeno iri.

8 Nínó jófuego omoi dúcia caimare omoi íaioi lláinoia, güíllena omoi íaioi ecaa afe omoi güiri.

9 Daje izói afénomo iráredinuiaina omoi jíllotari. Afe llezica afémacina daíri, “Juzíñamui illáimana illarui ómoimo ja ánozideza,” daíri.

10 Mei íadi jíáie jófuego omoi dúcia afeno comini ómoina lláinoiacañeniadi, jino jofue cígimo ite macáraodo jairi. Jaillano daíri:

11 “Cai eíbamo aífide omoi jofue íaie ómoimo teténoiticaí. Daíí finódicaí, fienu caimo omoi finuana uáitallena. Mei íadi bíena omoi onoiri: Juzíñamui illáimana illarui ja ómoimo ánozideza.”

12 Omoína dáitícue, íraicaíño izire jicánollruimo bie jofue comini Sodoma comini duere finóbina baimo duere finólliaioi.

*Náfuefinide jófuai comini
(Mt 11.20-24)*

13 ¡Corazín jofue comini, nii dúerena! ¡Daje izói Betsaida jofue comini nii dúerena! Mei íaioi cígiri cue finoca ciórainina raa, afena Tiro jofue comini naa Sidón jofue comini cígimo nauí finódicuenia nibai jaiaí úcodo íaioi comeci ífueña méidotiaioi. Uáfue íaioi comeci ífueña méiduamona ja díga fimona jailla. Afe llezica zúunaia jítaíregá jítiroi jítaácadiaioi. Daje izói aféruimo íaioi zúunailla jino ácatallena jízefo ífomo jutáacadiaioi.

14 Mei íadi íraicaíño izire jicánollruimo Tiro Sidón díga duere finóbina baimo Corazín íemo Betsaida comini duere finólliaioi.

15 Daje izói Jesús Capernaum jofue comini lletade; íaioi dibénedo daide: ¿Meita íaioi ínoga jofue monamo úrede? ¿Daíí comeci facádiaioi, ero ua? Mei jíáfodo íaioina dáitícue, tíidino illánomo ana dotaca izói niné táinocaitalliaioi.

16 Íemo ie setenta nizécamacina daide:

—Omoína cacáreidimie cuemo cacáreide. Íemo jíái ómoína ruifíruitimie cuena ruifíruite. Daje izói cuena ruifíruitimie cue ana orédimiena ruifíruite, —daide.

Oreca setenta dígadino abido dáanomo dúcina

17 Naui oreca setenta dígadino meine abido caimare dúcidiaioi. Jesuna daidíaiói:

—Ocuíraima, nana cai llógamo cacáreidiaioi, ua daje izói fiénide jóríai o mámecido daína uaimo cacáreidiaioi, —daidíaiói.

18 Jira Jesús daide:

—Jii, Satanás monamona ameo izói baiíllana ciódicue.

19 Daje izói jaióniaí naa acáiduai ómoína izi cácatañelle ríino naui ómoimo cue iga. Daií nana cai bacáuai izóidimie Taife ríinona izi cácañeno anáfenodiomoí.

20 Mei íadi fiénide jóríai jino ória ríino ómoimo íllado figo comécíñeno iri. Mei jáífodo omoi mámechiaí monamo cúeinari omoi ióbiri, —daide.

Dama Jesús cáimacailla (Mt 11.25-27; 13.16-17)

21 Afe llezica, Ñuera Joreño Jesuna ióbitade. Ióbicaillano Jesús daide:

—Cue Moo, mona énie diga Ocuíraimadio, omo ñúefue mámeiticue, mei ráfueda baitádinomona o dibénedo retáidoga onóigafuaí onótañedio. Mei jáífodo comécina náfuenide úrue izoide jamai comínimo aféfuaiña jino ciótatio. Jii, Moo, mei o daií jítaidioza, —daide.

22 Jesús nai úríoide: “Cue Moo, nana ráaniaí cuemo fecádio. Moo Juzíñamui, o Jitódicue, mei íadi buna uáfodo cuena ñue óñoñena. O cue Móodioza, dama o ñue cuena onona. Daje izói buna uáfodo ona ñue óñoñena. Cue, o Jitódicueza, dama cue ñue ona onona. Iemo jáíi daje izói o Jitó onótaacagano ñue ona ónoítiaioi, —daide.

23 Iemona ie llófuegamacimo érocaillano, daní íaioina daide:

—Omoi ciona raana ciónamona jnií ióbirediomoí!

24 Mei ómoína daidicue, diga Juzíñamui uai llórainí naa illáimaiaíri omoi ciona raana cióacadiaioi mei íadi jaca cióñediaioi. Daje izói omoi cacana uai cacáacadiaioi, mei íadi jaca cacáñediaioi, —daide.

Samaría ímie rafue

25 Afe mei ocuica uai llófuefiredimie Jesumo úrizaide, afémie facátallena. Afémiemo jicánote:

—Llófueraíma; ziiñona cue íllena ¿ñie izói íredicue? —daide.

26 Jira Jesús uai ote:

—Ocuica uaimo ¿mei ñie uai cúeina? Afena ¿ñie izói facádotio? —daide.

27 Jira ocuica uai llófuefiredimie uai ote:

—Afe uai bie izói daide: Nana o comécido o Ocuide Juzíñamuina izírui. Daje izói nana o joreñodo, íemo nana o máiriedo, íemo nana o ífoci úrillado íena izírui. Afe llezica dama o abina o izíruiilla izói afe izói o aino cómena izírui, —daide.

28 Mei jira Jesús daide:

—Ñue fairíotio. Bie izói o finóadi nia are cáaitio, —daide.

29 Mei íadi Ocuica Uai llófuefiredimie ie facátalle uai baiñenamona, ñue jicánotimie daiíllena jáíe uai Jesumo jicánote:

—¿Ñie come cue abi ímiena jóoneiticue? —daide.

30 Jira Jesús uai ote:

—Dáamie Jerusalémona oni Jericomo jaide. Ie jailla llezica merírifiredino afémie fatíaiói. Fájano ie ráaniaí bairódiaioi naa inícuiruaimo. Afémiena iere íztatiaioi; jabo ie títano íena fiénocaidiaioi.

³¹ Afe méifodo lletáriraima ónonino daje llezica afe iodo jaide. Mei íadi fagámiena cíoillano onido jaide.

³² Afe mei Leví nairai ímie afénomo dúcide. Daje izói afémiemo fia érocaillano onido jaide.

³³ Afe méifodo Samaria ímie daje iodo jaide. Fagámiena cíoillano afémiemo zúucaillano iere dúcaide.

³⁴ Mei íemona fagámie mo billano, cáirediji naa vino diga ie boáfiai manode. Afe mei afe boáfiai maite. Maia méifomo dama ie búrromo caifo rainada dúciracomo uite. Uillano afécomo afémiena uíñote.

³⁵ Afe jíáiruido, afe Samaria ímie ja jáizailla llezica, mena úcube uano afeco naama ibade. Ibajano daide: “Bie iráredimie ñue o uíñori. Bímiemo omo cue iga úcube baímo o dotáadi, uire meine cue bia omoi cue ibállea,” daide.

³⁶ Mei íemona birui cuemo llone: Bie daámanidemon a zúñimie ñue finoca bie merírifiredino fagámie aino come finófirena izói? —daide Jesús.

³⁷ Jira ocuica uai llófuefiredimie daide:

—Mei afémiemo dúcaidimie fagámie aino cómena, —daide.

Iemona Jesús íena daide:

—Jaillano bímie fínua izói o finori, —daide.

Jesús Marta María íainguai jofomo dúcide

³⁸ Jesús iodo jaillano duera jófue mo dúcide. Afénomo ite Marta daínango ie jofomo Jesuna caimare llíñote.

³⁹ Marta ebuño María Jesús anamo ráizaibite ie dáinana ñue cáallena.

⁴⁰ Mei íadi Marta diga jetáacaganiamo comeci llícibite. Iemona Jesumo billano daide:

—Ocuíraima, cue ebuño nana táijina cuemo fiénocai, zaferi comécíñedio? Cue dine ore, afengo cue cánuaibilleza, —daide.

⁴¹ Mei jíáifodo Jesús afengo uai ote:

—Marta, iere o jetáacaga raamo o comeci llícitaitio. Afe táijnamo iere duere zefuídio.

⁴² Mei íadi daa jitárede raana nai omo íñede. Ie mei María afe baímo ñuera raa jae nizede. Afengo nizeda oga raa bu báiroñeite, —daide.

11

Juzíñamuimo cai úrifireillena Jesús lloste (Mt 6.9-15; 7.7-11)

¹ Afe mei jíáiruido Jesús bai táinomo Juzíñamuimo úrite. Juzíñamuimo ie úrilla llícaillamona ie llófuegamacimona dáamie daide:

—Nai Juan ie llófuegamacimo ie lua izói, Juzíñamuimo cai úrilla cai llofue, —daide.

² Jira Jesús íaioina daide:

—Juzíñamuimo omoi úria bie izói daiíri:

Cai Moo Juzíñamui, monamo itio; o mámeçido ñúfue nitácaza.

O illáimana illirui raire bíiteza.

Dinomo monamo o comeci jitáillafue íaioi fínua izói, afe izói bie éniemo finótaibiteza.

³ Cai nágarui jitailla gülleniai, birui caimo fecari.

⁴ Cai finoca fiénidifue iba caimo oñeno iri, mei afe izói jíáimaci fiendi caimo finódiaioi íadi, afémacimo ibana oñédicaí.

Iaifuemo cai báiiñellena caina úiñori.

Iemo afe llezica nana fiénidífuiaimona caina jillotari.

⁵ Iemo nane Jesús daide:

—Bie fia cue daiille ráfuemo omoi coméciiri. Omoimona dáamie ie onóigamie ite. Afe o onóigamie dáaferui o jofomo jaillano ona daide: “Daámani páaniai fia cuemo fecá,

⁶ mei cue onóigamie ailli cue jofomo dúcidez. Mei íadi afémie cue ecállena iñede,” daide.

⁷ Ie jira níbai jofona bie izói uai óredio. “Cue úrue diga inídícueza, cuena áifedoñeno iri. Naze ibáicaza, o jicaca raa omo fecállena jino bínidícue.”

⁸ Mei íadi ómoína dáaitícue, afe jicabitimie o nabaina jira fécaifñeitio, mei íadi afémie are ona áifedoñellena nana ie jitaica ráaniaina jeruñeno fécaítio.

⁹ Afe jira ómoína dáaitícue: Juziñamuimo jicari, afémie fécaíteza. Jenori, báitioza. Nazémona jíiriri, íemona afémie tuizáibíteza.

¹⁰ Mei uáfueza, jicádimie jaca llínote; jenódimie jaca baite; nazémona uáidotimie naze tuiñoca.

¹¹ Omoimona úrueredimie ie jitó güllena jicáadi ¿meita noñcina iga? Jaca íniga. Daje izói chamu jicáadi, ¿meita jaiona iga? Iniga.

¹² Iemo jíai jigi jicáadi ¿meita acáidona iga? Iniga.

¹³ Mei fiénidíomoi íadi, ñuera ráaniaina omoi úruiaimo fécajana onódiomoi. Mei íadi afe baímo monamo ite omoi Moo afémie Ñuera Joréñona jicaitinomo fécaite, —daide.

*Fiénide jóriai ríino Jesumo illa afémiemo jitádiaoi
(Mt 12.22-30; Mr 3.20-27)*

¹⁴ Afe mei Jesús uáinidimie ite fiénide jóriai jino orede. Afe jáillamona afe uáinidimie ja ñue úrite. Aferi comini caimare fáigacaidiaoi.

¹⁵ Mei íadi dáarie daidíaioi:

—Bímie Beelzebú dáina fiénide jóriai illaima ríinodo, afe fiénide jóriaina jino orede, —daidíaioi.

¹⁶ Jiáimaci ie facátallena, “Monámona uai dánamona comuide cíorainina raa fino,” daidíaioi.

¹⁷ Mei íadi Jesús afémaci comeci úrillana onóillano daide:

—Ninó daje náiraina ite comini bozíetaillano conima diga fuiriadi, afe nairai niné táinocaite. Daje izói daaco ero comini bozíetaia, afémaci daje izói are iñeno niné táinocaitiaoi.

¹⁸ Afe izói, mei Satanás dama íemo jaináidinona, dani abina uáitaiadi, ¿mei niie izói ie ócuifirena ríino are ite? Bie ómoimo llóitícue, mei cuena “Fiénide jóriaina Beelzebú ríinodo jino orédio,” daidíomoiza.

¹⁹ Mei íadi daiítadena, jiáiuaina ómoimo jicánotícue, Omoído jáidinomo ite fiénide jóriai orelle ríino, ¿bu mei fecaca? Ie jira dani afémaci ñue onóñeno taino omoi llua jino cíotatiaoi.

²⁰ Mei jiáifodo uáfueza, Juziñamui ríinodo fiénide jóriaina jino oréfiredicue. Iemo bifue bie izói ómoína dáiacade: Juziñamui illáimana illirui ja ómoimo dúcidez.

²¹ Mei daa mairide cómemo ie ñue fuirira raa ia, ie jofona ñue úiñofirede. Afedo ie uíñuamona buna ie raana bairónide.

22 Mei afémie baimo riíredimie bíadi, níbai íena anáfenoite. Anáfenuano ie íinoga abi riídúa raana báiroite. Afe mei afe báiruai;bitimie nana íemo ite ráaniaina úite.

23 Cuena ruiffritimie cuena uáitate. Daje izói cue diga dájena táijíñedimie, cue ráaie oni jutádimie izoide, mei afémie jíaimaci cuemo ínotañeđeza, —daide Jesús.

Jino oreca fiénide jóríai meine dáamiemo bite
(Mt 12.43-45)

24 Jesús nai líicaiñeno úrite:

—Fiénide jóríai cómemona jino jáiadi, táiziciaido ie uái illino jenócana uite. Ie uái illino baiñenamona bie izói comeci facade. “Meine abido cue billa cómemo jáitícue,” daide.

25 Afe jóríai meine afe cómemo bítemo, ñue rafoda finócaco izói baizáibite.

26 Temona afémie baimo siete diga jamánomo fiénide jóríai uájide. Afémaci nana afe cómemo jofo jaillano itíaiói. Afemona afe come nauí ie fiénina baimo biruí jamánomo fiénide, —daide.

Uáfúena íóbidino

27 Mei Jesús nai bífuiaido úrioina llezica, comínimona daa ringo ficire Jesudo úrite:

—O jocódingo ní caimare érocaillangona. Daje izói o comútatíngo ní caimare íóbillangona, —daide.

28 Mei jira Jesús jíáifodo daide:

—Juzíñamuí llógamo cacáfiređino, daje izói áfena ñue ínotino o dainango baimo jamánomo caimare itíaiói, —daide.

Fiénide comini ciórainina raa finóllena Jesumo jícadíaiói
(Mt 12.38-42; Mr 8.12)

29 Comini Jesús onífenedo ofídiaíói. Jesús íaiíoína daide:

—Biruímo ite comini iere fiénidino. Afémaci ciórainina raana finóllena jícáfiredíaiói, mei íadi nauí Juzíñamuí uai llórainma Jonás onótágafue baimo jíáifúena llóñeillíaiói.

30 Mei Nínive jófúemo ite comínimo Jonás Juzíñamuí orécamiéna áíói onóillena afémie jóonega raa izóidimie. Afémie illa izói, biruíllaido ite comínimo Nanoide íima Jitó Cristo afe bie comini onóillena jóonellimíéna íite.

31 Íirairuímo bigímaíai izire jícánolle llezica sur dibénemo jica ite nairai illaíngo bigímaíaimo fiénidífuíai nítaite. Mei afengó jica énie fuédamona Salomón comeci onóigafúemo cacáreizaíbiteza. Mei íadi biruí benomo Salomón baimo baitádimie illa.

32 Daje izói bigímaíaimo íirairuímo izire jícánolle llezica, Nínivemo ite comini bimácimo fiénidífuíai nítaite. Mei Nínivemo ite comini Jonás Juzíñamuí uai íaiíoimo llua llezica, íaiói comeci itífuena méidotíaiói. Mei íadi biruí benomo Jonás baimo jamánomoidimie ite.

Cai illafue ñue egáíñote raa
(Mt 5.15; 6.22-23)

33 Uneca mechera bu báinino jóoneñede. Daje izói cajón anamo buna mechera retáidoñena. Mei jíáifodo uneda caífo jica rainaca, jofo eromo jáitino ñue cíóillena.

34 Ñúefuemo o comécilla omo ñue egáiñote raa izoide. Jira mechera egáioinamona o uído ciónana o ióbitaja izói, afe izói ñúefuiai o jítaigana o comeci ífuena caimare itátaite. Iemona ñúefuemo o comécillado nana o illafue jaícina ñue joide. Mei íadi ñúefuemo o comécíñeniadi, jíñifodo mácaja izói itio; nana o comeci ífue zuure íteza.

35 Mei jira omo ite mechera egáioina izoide raa, dúide izói meídoñellena ñue rairuirí.

36 Mei nágarui ñúefuiai mo féitañeno o comécia, mechera egáiñuamo uáfori cóina izói, nana o illáfueña ñue uáfodo cóitio, —dinori Jesús úrite.

*Fariséuai daje izói ocuica uai llófuetinori imaci fiénidíue Jesús jino lote
(Mt 23.1-36; Mr 12.38-40; Lc 20.45-47)*

37 Jesús ie úrilla llícaillamona daa fariseo ímie ie díga güizájillena Jesumo lote. Jesús jofo jaillano güiránomo ránazaide.

38 Afémie afémaci fínofirena izói finóñede, mei afémie íaifue múiñua joreño onoi jócua, finóñeno güíteza. Aferi afe Jesús uitímie fáigacaide.

39 Mei íadi Ocuíraima Jesús íena daide:

—Omoi fariséuai jiróraco naa plato díga jócua izói jinófene ñue jocódiomoi, mei íadi jofo erófenena jocóñediomoi. Afe izói nana omoi jinófenena ñue rairuídiomoi, mei íadi jofo comeci dínená, meríñillado omoi oga raa ite; daje izói fiéni omoi íllado omoi oga raa ite.

40 ¡Comécina úñíñedinodiomoi! ¿Onóñediomoiza comíni jinófene finódímie, íemo íaíoi ero díne comeci finódímie dáamie?

41 Ñúefuiai comécido omoi onónamona ómoimo ite raana jeruíñeno dúeredinomo fia fecari. Afemona nana ránaia ja ómoimo íáinino íítiaíoi.

42 Fariséuai, ¡ñí omoi dúerena! Omoi riga ráamona díe dígademoná daa Juzíñamuimo dúide raana afémiemo ñue fecáfirediomoi. Omoimo ite “menta” dáina rarócimona afémiemo fecáfirediomoi. Daje izói “ruda” dáina rarócimona daa fecáfirediomoi. Iemo jíái omoi porótocoduaimona due Juzíñamui íena mámeñirediomoi. Mei íadi comécina jaícina jóidífuemo naa Juzíñamuina izíruillana náfueñediomoi. Aquíe izói írediomoi. Afe llezica omoi jíáie finóacaigafuena féitañeno finori.

43 Fariséuai, ¡ñí omoi dúerena! Juzíñamui uai lloraco eromo jamánomo ñue ráiraniaina jícañirediomoi. Daje izói jofue cígido macáraodo omoi jáia, comíni jacírede illaíma uáidua izói omoi íaíoi uáidollena íere gáidíomoi.

44 Ocuica uai llófueñiredino naa fariséuairí, ¡ñí omoi dúerena! Jínofene díne ñue cóina mei jofona comeci díne ráataitíomoi. Ciónena énie anamo tídíno ráigano izóidíomoi. Comíni afe acónido ónonino macádiaíoi.

45 Iemona ocuica uai llófueñiredinomona dáamie afe uai ote:

—Llófueráima, jadíe izói o dáina nane caína ráicaítade, —daide.

46 Jira Jesús daide:

—Ocuica uai llófuetino, daje izói ¡ñí jamánomo omoi dúerena! Mei ocuínide méere de raa izoide jíámamo jaca llonódacañirediomoi. Aféfuiaína buna ocuínide. Afe omoi riire ocuícana canóñinídiomoi.

47 ¡ñí omoi dúerena! Mei jáiai omoi nánoragíma faga Juzíñamui uai llóraíni raíafu izoide tídímie jóniacona ébirerie finódíomoiza.

48 Daií omoi fínuado jaiái afémaci finócafuena jíeruitiomoí. Mei afémaci afe uai llóraini titádiaíoi, íemo birui afémaci raiáfo izoide jóniacóna meine abído nitátatiomoí.

49 Ie jira Juzíñamui nana ráfuiái onóillano, bie izóí daíde: “Afémacimo cue uai llórainina óreitícue. Daje izóí jíáie cue nizécáno íaíoímo óreitícue. Afémacimona dáarie títaítiaíoi. Jíáímacina duere finóllena rácaítiaíoi,” daíde.

50 Mei uáfueza, birui itínomo, nana jaiái faga uai llóraini íbana óite. Uafue, énie fínuamona biruímo nana tíidino íbana óite.

51 Faga Abel ígímamona Zacarías tíllaruimo íbana óite. Afe Zacaríasna Juzíñamui gairíracó eromo ite altar áinori fatíaíoi. Jira ómoína dáíitícue, biruímo itínomo Juzíñamui afe titácáno íbana óite.

52 Ocuica uai llófuetino, ¡nii omoi dúerena! Mei nauí Juzíñamui ómoímo fecaca íe ñue báitaja uai íe illáimana illánomo jofo omoi jáillena, áfena ñue náfueñedíomoíza. Iemo afe llezica onóiacadínomona áfena rairuídíomoíza, — dínori Jesús úrite.

53 Jesús bie izóí íaíoína daina llezica, ocuica uai llófuetino naa fariséuairí afémiemo jamánomo ríicaidiaíoi. Iemona díga jícánoiacaga uáillaído afémiéna áífedodiaíoi.

54 Irebaí izóídena afémie óllena jífánodoídiaíoi. Daií finódiaíoi, íe daina uáillaído fiénidífuiái afémiemo nitállena.

12

Comécina íáirena mei jínoífenena ñue cíoidino Jesús lletade

1 Afe dáaruído díga náiraíai dáanomo íere gairídiaíoi. Gairíllamona conímaíaina zaízídiaíoi. Iemo Jesús íe llófuegamacina nano fueñe daíde:

—Fariséuáimona díga comíni comécina íáirena mei abina ñue cíoidino íte. Afémaci daií íllamona abí omoi rairuíri, mei afe íaíoímo íte íaífue pan fáitara “levadura” izóideza. Due jíza jónega ía, nana afe erona maíñode.

2 Nana báinino daina uai jíno uáfodo cíozite. Daje izóí nana báinino retáidoga raa uáfomo báífite.

3 Mei íemona, nana jíitífono omoi báinino úrilla uailíai jíno úzefomo cacaille. Daje izóí jofo eromo báinino omoi daina uai comíni dáanomo uáídota afémaci cacáicana ficíre lolle.

¿Ñíe cómena jacíruiédicaí? (Mt 10.28-31)

4 Omoi cue nabáíñiaídiomoí, jíra bie izóí ómoína dáíitícue. Fia abí íeizi titáfírede comína jacíruiñeno íri. Afe mei afémaci ómoímo íaíoí finolle jíáífuena íñede.

5 Mei jíáífodo omoi jacíruiillmie llóitícue. Abí íeizi títaja méífono boode jóraímo comeci dotáfíredimíena omoi jacíruiiri.

6 Onódíomoíza, cinco díga ófocuíño mena úcubetunido íbárede. Mei íadi afémacimona Juzíñamui dáamíena féitañede.

7 Iemo jíái ómoímo íte ífótíraí illa dígatíraí facádoga. Daiítadeza jacíruiñeno íri. Mei omoi, aíllo ófocuízaí baímo ráífídiomoíza.

Comíni eróicana Jesuna jíeruitíno (Mt 10.32-33; 12.32; 10.19-20)

⁸ Omoina dáititue: Nanoide fima Jitódicueza, comini eróicana nana cuena jieruitinona afe izói Juzíñamui abi imaci eróicana jieruititue.

⁹ Iemo daje izói comini eróicana cuena jáanoitnona, afe izói Juzíñamui abi imaci eróicana jáanoititue.

¹⁰ Iemo nane jiáifue, ninó daa come Nanoide fima Jitona iaire dáia, afémie daina íaifue dórede. Mei íadi ninó dáamie Ñuera Joréñona iaire dáia, afe jaca dónide.

¹¹ Iemo ninó jiáiruido Juzíñamui uai llorácomo afémaci omoi uíadi áfemo comeci llícitaiñeno iri. Daje izói izire jicánofiredinomo, naa ocuídillaini diga, afémacimo omoi íaioi uia, omoi daíacana uaimo comeci llícitaiñeno iri.

¹² Mei omoi úriacanamo dúcille llezica, Juzíñamui Ñuera Joreño omoi daiíllifuenta ómoimo llóiteza, —daide.

Comini ráarena jacírede

¹³ Cominimona dáamie Jesuna daide:

—Llófueraima, cócomo fiévide feci ráamona, cuemo dúina dieze cue ama cuemo ílleza, o lloiri, —daide.

¹⁴ Jira Jesús afémiena daide:

—Ebe, omoi cigímo izire jicánofireitimiena, daje izói fécafíreitimiena ¿bu cue jóonia? Jóoneñegacue, —daide.

¹⁵ Jesús nane dáanomo daide:

—Nana úradoíllafuíaímona caade come izói, abí omoi rairuiri. Mei come ñue íllafue, aillo ráarenamona óñega.

¹⁶ Afe mei bie jino onótate raafue llote:

—Nauí iere ráaredimie ite. Afémie jacáfaiaí iere áíllamona jofo olle llízie iere ite.

¹⁷ Afemona iere ráaredimie comeci facade: “¿Mei ñie izói íititue? Afe áíllue llízie éenollino íñede.”

¹⁸ Nane dáanomo comeci facade: “Cue finóllema ja uíbicaídíue. Cuemo ite éenoracuai júdaiano jamánomo áíllocuaina nitátaititue. Afécuaimo nana jofo cue olle llíziena éenoititue. Daje izói nana cuemo ite raana afécuaimo jóoneititue.

¹⁹ Afe mei dama cue abina dáititue, ‘Ja aillo raa jofo ofitaticue; áfedo diga fimona cáaititue. Nágarui táijíñeno fia güítitue. Iemona fia uái íititue. Aillo vino júruano, áferi caimare ífíreititue,’ ” daide.

²⁰ Mei íadi Juzíñamui íena daide: “Comécina onóñedimiedio. Fui naio títio. Afe mei o ofitaga ráaniaí ¿bu náamatalle?” daide.

²¹ Mei dama ie abi íena aillo raana ofítaitimie daií íteza, mei daií afémie ofítaja llezica, Juzíñamui jítainamo comécíñede. Comécíñeno, afémie Juzíñamui eróicana iere dúeredimiena jaide, —Jesús daide.

Juzíñamui ie úruiaína ñue rairuide

(Mt 6.25-34)

²² Afe méifomo Jesús ie llófuegamacina daide:

—Jira ómoina dáititue, omoi güíacaga güíllema comeci omoi llícitaiñeno iri. Daje izói omoi jítáacaga ínícuiromo comeci llícitaiñeno iri.

²³ Cai ñue íllafue cai güille baimo ráífide. Iemo jiái cai abi cai ínícuiro baimo ráífide.

²⁴ Mai “cuervo” daina cháafona eróidemo comécíiri. Afémaci jaca riñédiaioi; daje izói llizíllaniaí jofo onédiaioi. Daje izói afémaci güille éenoraco íñede, naa

íaioi ofitaranori. Mei íadi Juziñamui afémacina ecade. Ie mei omoi afe ófocuizai baimo jamánomo ráifidiomoi.

²⁵ Omoimona, comeci iere líciamona, ¿mei bu ie zairilla dinori baimo mediio metro zairirena?

²⁶ Mei duera raana finónidiomoi ia, ¿nibái mei jáie raa finuamo iere coméciidiomoi?

²⁷ Raroci záfia zeríllamo omoi coméciiri. Afémaci tájiñediaioi; daje izói raana niñediaioi. Mei íadi jáifodo ómoína dáititue, jaiái illaíma Salomón ñue cíoi de raana jamánomo ráarede íadi, bie záfia ebirena izói, ebirediroina jítáñede.

²⁸ Mei Juziñamui daí raroci ebire cíotaiadi, afémie jeruíñeno ómoína iníroina jítaite, jabo ñnotinodiomoi íadi.

²⁹ Afe jira benómona o güíacaga raa, o jirole diga zuure jenóñeno iri; daa áfemo comeci lícítaiñeno iri.

³⁰ Mei bínie comini daa afe izóidemo járitaidiaioi. Mei íadi omoi Móorediomoi. Afe omoi Moo Juziñamui nana afe ráaniaina omoi jítáillana onódeza.

³¹ Iemona Juziñamui illámána illáruimo dúide raamo raire áfemo omoi coméciiori. Iemo afémie nana bie raana ómoimo fécaiteza.

*Monamo cai jirídollena ofítaredicai
(Mt 6.19-21)*

³² Cue izíruiга ovejai izóidiomoi za, jacíruiñeno iri. Dúemacidiomoi íadi, o Moo ie illaímána illano ómoiena maméacade.

³³ Omoimo ite raa fecari. Fécajano raana jítáidinomo ine. Daí omoi finóadi, Moo Juziñamui comeci jítainana finoitomoi. Iemona monamo ie illánomo ñuefuiái ofítaitiomoi. Daje izói jaca ninomo fúíñeite ñuefuiái ómoiena monamo ómoimo ite. Afénomo merírifredimie jaca jáinide. Daje izói afénomo ícuai güíñeite.

³⁴ Mei uáfueza, omoi ofítaga raa illánomo, afénomo jái o comeci íite.

Nágarui ñue finóbiredicai

³⁵ Benómona jaca nágarui ñue omoi finóbifreiri. Nauíllamona comini mechera unéfírena izói, abí omoi rairuiri.

³⁶ Jofo naama ocuífíregano, áirena ráfueмона meine ie dúciacana uícomo íaioi afémiemo ocuírina izói, afe izói cue billíruimo omoi ocuíriri. Afémaci ñue ocuíridiaioi, afe jofo naama nazémóna uáidoia raire íemo túíñuaibillena.

³⁷ Afe izoide ocuífíregano jaca iníñeno íaioi naama bíllemo ñue ocuíridiaioi. Daí íaioi illa afémie cíoi zaibilla llezica, afémaci ja ñue íaioi finóbillari íóbcaidiaioi. Uáfúena ómoína dáititue: Afe íaioi naama afémacina güíránomo ráinaite. Raina mei dama afémie íaioi güíllena bai ráizíte.

³⁸ Mei nibái dáaferui llezica afémie dúciadi, nibái monáiacademo afémie dúcia, afémaci uícomo iníñeno ocuíridiaioi. Iemona afémaci íóbcaitiaioi.

³⁹ Iemo jááfue dibéñedo bie izói omoi onoiri: jofo naama merírizaibitímie bille monana onóia, afémie iníñeno ocuírite. Iemona jofo naama merírizaibitínona ie jofona tuíñotañeite, ie raa íaioi mériñeillena.

⁴⁰ Afe izói ñue omoi maméeri, mei Nanoide Ima Jitó comini coméciñeillirumo ónonino déizaibite, —daide Jesús.

*Raire íimofrede ocuífíregamie, íemo jái íimofinide ocuífíregamie
(Mt 24.45-51)*

⁴¹ Mei jira Pedro Jesumo jicánote:

—Ocuíraima, bífuena, ¿ñie comínimo llotio? ¿Dani caimo, ñibai nana comini íena llotio? —daide.

⁴² Jira Ocuíraima daide:

—Mei daa jofu naama ie ocuífrega jabóidillaíma eneno mamede. Jofu naama jica jáiacana uícomo, ie jofu ero raana afe jabóidillaímamo llonódacaide. Afe llezica nana jofu ero táijidino ecállena afémiemo jóonenocaide. Daí jóonega jabóidillaíma jaca nágarui ñue ínofiregamíena írede. Daje izóí afémie ñue onódimíena írede.

⁴³ Afe izóidimíe nana íemo llonódacaiga raa nágarui ñue finóírede. Ie jira jofu naama meine bille llezica, daí ie íllana cíozaibite. Temona afe jabóidillaíma íere cáimacaite, mei nana ie ocuica raana ñue ícoímo fuitádeza.

⁴⁴ Uáfueña ómoína daidícue, jofu naama afe ínofirega ocuífregamíemo nana íemo íte raa, llonódacaite.

⁴⁵ Mei jíáfodo, afe jabóidillaíma jofu naama are bíñeite ñainano, jíáie jofu eromo táijidinona duere finóadi, afe jabóidillaíma íere cacáfinidimíena jaide. Mei afe llezica afémie jofu ero táijitatingo fienu finódeza. Iemo aillo güíteza, aillo jiródeza. Jírúa mei jífáitateza.

⁴⁶ Daí íe ílla llezica, afémie due jiza comécíñeitemo jofu naama dénuaibite. Onóñeíllíruimo dúciíte. Dúciíllano afe jabóidillaímána jofu naama jamánomo duere fínoite. Nana jíáie ínofinidino duere zefuilla izóí, afémie íena duere fínoítaite.

⁴⁷ Nínó daa ocuífregamíe íe naama comeci jítaílla táijínana onode íadi, áfemo jaca ñue finóbíñede, daje izóí áfemo cacáreacañede, afe ocuífregamíe duere finoda íere izi cácatalle.

⁴⁸ Mei jíáie ocuífregamíe íe naama jítaíllana onóñede íadi, dama fienu ía, afémie jabo izi cácatalle. Bie jíáie uaimo omoí cácarei. Aillo ígámíemona aillo jícaítiaíoi. Daje izóí ñue ínogamíemo díga ñúfue jóonefirediaíoi. Ie jira afe aillo jóonefregamíemona aillo ócutiaíoi.

Comini énenorie ráinuaibitícue

(Mt 10.34-36)

⁴⁹ Cue bie éniemo irai izóí bónuaibitícue. Aferai raire bóollena íere oíacadicue.

⁵⁰ Ja bautismo izoide, izi cácanafuedo facátallicue. Afénomo ñai dúciñedemo raire uícomo aferui dúciñenari duere zéfufiredícue.

⁵¹ ¿Ñibai bíniemo cáimare dájena uái íllíue atídío, cuena daidíomoi? Omoína daítícue, afe izóí bíñédícueza; comini énenorie ráinuaibitícue.

⁵² Mei benómona dáacomo íte cinco dígadimíe cue ícoínia eneno ráidoizítiaíoi. Afémacimona daámáni cuemo ínoítiaíoi; íemo jadíe enéfenemo ménade ínoñedímaci ráidoizíllanona conima díga fúírítiaíoi.

⁵³ Cuemo ínuamona da jíto íe moo dínena ruífíruille. Daje izóí jíto íe moo cuemo ínua jira dájena uái íñeno íena ruífíruillano éoite. Iemo jíái, ei jiza cuemo ínuamona ei dínena ruífíruille. Dájena uái íñeítiaínguái. Daje izóí jífaiño cuemo ínua jira mío dínena ruífíruille. Afe íbana mío íe jífaiño díga dájena uái íñeítiaínguái, —daide Jesús.

Jirairuillai dúciacana onótaite raa

(Mt 16.1-4; Mr 8.11-13)

⁵⁴ Afe mei nane comínina Jesús daide:

—Fuirina nairíadi “noci bíite” daidíomoi. Afe mei ua bíide.

⁵⁵ Daje izói ñue mona monáillado “fimona baizájilla” daidíomoi. Iemona jaca fimónana jaide.

⁵⁶ ¡Omoi comécina íairena mei abina ñue cíodinodíomoi! Noci bíllana onódiomoi, íemo fimona baizájillana onódiomoi, mei íadi birui omoi cígimo cue finoca onótaitífuiaína onóñediomoi.

O diga icíritímie raire manánaitari
(Mt 5.25-26)

⁵⁷ ¿Níbái mei comeci jaícina jóina izói, dani conímamo jicánoñediomoi?

⁵⁸ Daa come o llógiديوacania, ríimacimo ómicoi úrizaiilla llezica, nai ómicoi dúciñena llezica io anamo afefue ñue o záitari, ríire jicánoraímamo o ie izájíñeillena. Izire jicánoraímamo o ie izájíadi, afe izire jicánoraíma fiénidino llaitáfiredinomo o izájite. Iemo afémaci ona llavéracomo íbaitiaíoi.

⁵⁹ Uafue ona dáitícue o llavétatímie jicaca úcube ie jíajaca dieze o íbaiñenia afécomona jaca jino bíñeitío, —Jesús dinori daide.

13

Cai comeci ifue iere raire méidoredicai

¹ Aféruillaído comínimona dáarie Jesumo Pilato jíaimaci fiéni faaja lluíbitiaíoi. Naui Galilea imácimona dáarie Juzíñamui íóbillena faga rille fécajilla llezica, Pilato afémacina fate. Fáajano íaíoi die íaíoi fecaca rille die diga Pilato tamede. Daíí ie fínuana ¡nii íaire cíoina!

² Jira Jesús daide:

—Omoi bie Galilea comínimo ¿ñie izói comécidiomoi? ¿Meita afémaci jíaie Galilea comini baimo fiénidino, jira afémaci raamo jíridiaíoi?

³ Afe izóiñede, ómoína dáitícue. Mei jira omoi comeci ifue omoi méidoñenia, nana daje izói niné táinocaitíomoi.

⁴ Iemo jíaífue omoi comécíiri. Naui Jerusalemo iere caífo jica caifóidico ite. Afe iere caifóidico, Siloéna mámecirede. Afeco dáillamona dieciocho diga comini jíitafidiaíoi. ¿Meita afémaci Jerusalemo ite jíaimaci baimo fiénidino? ¿Meita jira daíí zefuídiaíoi?

⁵ Omoina daidícueza, afe izóiñede. Mei jira omoi comeci ifue omoi méidoñenia nana omoi niné táinocaitíomoi, —daide.

Higuera daina llizíñede amena rafue

⁶ Afe mei Jesús bie jíaie íaíoi onóigafue afémacimo llote:

—Da come higuera daina amena ie jacáfaimo rite. Afe mei afena llizíadi daíí eróizaide. Eróizaidemo jaca llizíñede.

⁷ Ie jira afémie jacafai uíñotímiena daide: “Ero, daámani fimona bie amena llizíadi daíí eróizaíbifiredicuemo jaca llizíñede. Llizíñedeza, mai o tieri. Fia cue jacafai llótaidoteza.”

⁸ Jira afe jacafai uíñotímie uai ote: “Naama, bie fimónamo mai nai cai tíeñeilli. Afe amena moi ñue fínuano júnaitícue.

⁹ Níbái áfemona llíziteza. Mei íadi áfemona llízíñenia tielle,” —daide.

Jesús ocózinaillaruimo abina ana jíicaidingona jillotate

¹⁰ Jíaie ocózinaillaruimo Jesús Juzíñamui uai llorácomo llófuete.

¹¹ Afe llezica afénomo dieciocho fimónamo abina ana júicaillari iráredíngo illa. Naui fiénide jóríai aféngona daí finoca. Afengo caifo jaícina jaca náidacainide.

¹² Jesús aféngona cíoillano ie júirite. Daide:

—Ríngo, o irárenamona ja jílloítio, —daide.

¹³ Daí dainano Jesús ie onoi aféngomo bitade. Bitá llezica afengo ñue jaícina náidacaide. Afe dáaruido afengo ñúefue Juzíñamui mo lloste.

¹⁴ Mei íadi áferi Juzíñamui uai lloraco illáima rícaide, ocózinairuimo Jesús afengo jílloítaja jira. Afémie comínina daide:

—Seis diga mona táijiredícaí, aféruillaído omoi jílloillena bíredíomoi. Mei íadi ocózinairuimo omoi abina jílloítabiñeno iri, —daide.

¹⁵ Jira Jesús ie uai ote:

—Comécina íáirena mei abina ñue cíoidinodíomoi. Omoi cuinaca burro, íemo juráreto ocózinairuimo ¿meita jainoi ie júruillena zuitáñediomoi? ¿Zuitáñediomoi!

¹⁶ Afe izói bie Abrahámona comuídingo ie irárenamona ¿meita ocózinairuimo zuitánidícue? Mei aféngona Taife dieciocho diga fimona ja cuinaca izói duere finódeza, —daide.

¹⁷ Jesús daí daina cacáillano, ie éoidino méaicaidiaíoi. Mei íadi nana comíni afe Jesús finoca áillue ñúefuíaíri íóbidaíoi.

Mostaza daina raroci jéende íji rafue

(Mt 13.31-32; Mr 4.30-32)

¹⁸ Iemona Jesús daide:

—Juzíñamui illáimana illáruina omoi ónoillena ¿mei ñue izói jino cíotaitícue? ¿Ñue izói afénona mámeitícue?

¹⁹ Afe illarui mostaza daina raroci jéende íjiaí izoide. Daa come aféjiaína ie jacáfaímo rite. Afe jéende íjiaí rillamona afe jéejínde zícua caifo amena dínorí aillo zairide. Afe ícaíruaímo feede ófocuizaí jillaína nitíaíoi.

Levadura rafue

(Mt 13.33)

²⁰ Nane Jesús daide:

—¿Ñue izói Juzíñamui illáimana illáruina mámeitícue?

²¹ Afe illáruina “levadura” daina pan aillo fáitate raa izoide. Daa ríngo daánani julleco harínana oruítajano áfemo due jiza fáitarana tamede. Iemona nana afe íféllana mulleda oni aillo móonaitade, —daide.

Rillírede naze izoide rafue

(Mt 7.13-14, 21-23)

²² Jesús Jerusalemo jailla llezica, áfeomo ite jofue comínina llófuete, naa jéenidígobíaímo.

²³ Afénomo dáamie Jesumo jicánote:

—Ocuíraíma, ¿meita jílloítino dúemaci, ero ua? —daide.

Jira Jesús afémie uai ote:

²⁴ —Juzíñamui illáimana illánomo jofu jáírao rillírede naze izoide. Afe rillírede naze izóidedo jofu omoi jáíllena riire omoi mamériri. Mei ómoína dáitícuéza, aillo comíni afénomo jofu jáíacaitiaíoi, mei íadi jáínitíaoíza.

²⁵ Mei jofu naama náidacaillano naze íbaille mei, omoi ja jinófenemo fébitíomoi. Afe llezica nazémoma jújúritíomoi: “Ocuíraíma, naze caímo tuiño”

dáitiomoi. Afe llezica afémie jofona uai óite: “Omoi ninó comínidiomoiza, ómoína onóñedicue,” dáite.

²⁶ Iemona omoi bie izói dáitiomoi: “Cai, o diga güiticaí, daje izói o diga jiródicaí. Cai jofue cigi iomo caina llófuefiredio,” dáitiomoi.

²⁷ Mei íadi nane afémie uai óite: “Jae ómoína daidicue, ninó comínidiomoiza ómoína onóñedicue. Omoi nana fiénidifue finófirediomoiza cúemona oni jai,” dáite.

²⁸ Iemona afénomo jino éenaitiomoi. Daje izói zúurenamona murímuritiomoi. Mei Juzíñamui illáimana illánomo Abraham, íemo Isaac, íemo Jacob jofó jáillana cíotiomoi, naa Juzíñamui uai jino llórainiri. Mei íadi afe llezica omoi ja jino dotálliomoi.

²⁹ Mei uáfueza, nágafeniamona billano, diga ínotino Juzíñamui illáimana illánomo jofó jáillano güizáibitiaíoi.

³⁰ Mei afe llezica dámerie óodaficaidino uícoficaitiaíoi. Daje izói dáarie uícoficaidino óodaficaitiaíoi, —daide Jesús

Jesús Jerusalén comíniri eede (Mt 23.37-39)

³¹ Aféruído fariséuaimona dámerie dúcillano Jesuna daidíaíoi:

—Herodes o fáiacadeza, benómona oni jairi, —daidíaíoi.

³² Jira Jesús uai ote:

—Mai afe iere abi ráiruide egai izoide Herodes omoi lluájiri: “Cacai. Bímonado íemo daje izói uire jiti, fiénide jóriaiana jino óreiticue. Daje izói iráredinona jllotaiticue. Iemo bai ie uire afemo cue táijina fúitaiticueza,” daí omoi lluájiri.

³³ Mei íadi birui bie cue bíllaodo nai jáiredicue. Daje izói uire jiti nai jáiredicue, íemo bai ie uire nai jáiredicue. Mei Juzíñamui uai llórainadicueza, Jerusalén jinomo oni jica tínidicueza, —daide.

³⁴ Temo Jesús écana daide: “¡Jerusalén comíni! ¡Níi íaíoi dúerena! Juzíñamui uai llórainina fáfirediaíoi. Daje izói Juzíñamui íaíoimo oreca uai lluájitino nófiéna níjifirediaíoi. ¡Diga icaíño íaíoína átava ie átavachingo íaico anamo bícua izói, íaíoína cue anamo bicóacadicue! Mei íadi aféna jíeruiñediaíoi.

³⁵ Ie jira omoi cacai, uire jáíruido omoi jofue zófegacona mámeite. Omoína daidicue, afénomona are cuena cíóñeitiomoi. Mei cuena “Juzíñamui mámecido bitímie caimare íóbidímie” omoi dáíñelle dinó cuena cíóñeitiomoi, —dinori Jesús daide.

14

Abi fáillari duere zefuáimie Jesús jllotate

¹ Ie mei jáie ocózinairuimo Jesús fariséuai illaíma díne güizájide. Afe llezica jáie fariséuai Jesumo janónaioicana eróidiaíoi.

² Afénomo Jesús uíecori daa abina fáillari duere zefuáimie illa.

³ Mei jira Jesús ocuica uai llófuefiredinomo jícanote naa fariséuairi.

—Ocózinairuido ¿meita iráredímie jllotarede? ¿Níbai jllotanide? —daide.

⁴ Mei íadi afémaci uai oñeno tí daí itíaíoi. Iemona afe iráredímie bai uáidota jllotate. Jllotajano, “Mai o jairi,” daide.

⁵ Afe mei Jesús fariséuaina daide:

—Omoimona bu ocózinai llaruimo íemo ite burro, nibai juráreto, ifomo baiía ¿meita raire naado óñega? ¡Ocózinai llarui íadi jaca raire caifo ófirediomo! —daide.

⁶ Afemona afe uaina jaca ónidaioi.

Airena ráfuego uáidoga comini

⁷ Afe güilláfuego bite lloga comini illáicomini ráiira izóidino ráillena izire jenódiaioi. Nana uícoficaiacadiaioi. Jesús áfena cíoilano bie izóí íaioina llófuete:

⁸ —Ninó dáamie áirenafuego omoi uáidoia, illaíma ráiiranomo ráiñeno iri. Mei o baimo jamánomoidimie nibai dúciteza.

⁹ Iemona omoi uáidote rafue naama omo lluáibite. “O ráiirano mai bímiemo feca,” ona dáite. Afemona íraie ráiiranomo meáire ráiizaitio.

¹⁰ Mei jíáfodo ninó dáamie íráizillena o jíria, bai ícoimo ite ráiiranomo o ráiri. Afe mei o uáidote rafue naama billa llezica, afémie ona dáite: “Cue onóigamie, bai benó ñuera ráiiranomo bi,” dáite. Afe daíi nana güiránomo o diga ráiiedino eróicana afe rafue naama ñúefue omo jóoneiteza.

¹¹ Mei jira naga come dama ie abina jamánomoidena fínoitimie, jamáimiena óreite. Daje izóí “Jiba cómedicue” daidímie, jamánomoidimiena jáitaita, —daide.

¹² Afe dáaruido, Jesús ie uáidotimiena daide:

—Güilla rafue o finoa o onóigamaci uáidoñeno iri, naa o ámatiairi. Daje izóí o comini uáidoñeno iri, naa o ánori ite ráanaitimaciri. Mei afe íbana ona uáidoitiaioi. Afe daíi íbaja izóí máiñoitio.

¹³ Mei jíáfodo güilla rafue o finoa dúeredino uáidori naa aídáimaciri. Daje izóí júbene ídainidino uáidori naa uina cíóñedinori.

¹⁴ Afemona iere caimare ítíoza. Mej afémaci afe íbana omo finónidaioi. Mei íadi tíide comécina jaícina jóidino nífuenidino meine abido cáai llaruimo o íbaja ízoide raa máiñoitioza.

Aillue güilla ráfuego jíáfueña ñue cai onótaita

¹⁵ Afe güilla ráfuego Jesús diga ráiiedinomona bífueña cacáillano dáamie Jesuna daide:

—Juziñamui illáimana illíruimo nabáiritimie caimare ite, —daide.

¹⁶ Mei jira Jesús íena daide:

—Daa come áillue güilla rafue finode. Afe ráfuego gairíllena aillo comini jíiritade.

¹⁷ Ja rafue mámiaruiamo táijina ñue fuilla llezica, ie ocuífregamie ie uáidogonomo llujáitata, bie izóí daíllena: “Ja nana raa ñue finócaza, mai omoi biri.”

¹⁸ Mei íadi afe llezica illa dígamie: “Iere cue jétalle íllaza, bínidicue,” daide. Nanóidimie daide: “Como cue íbaca cue jacafai méiñuacadicueza; bínidicueza. Cuena ícíñeno iri,” daide.

¹⁹ Iemo jíámie daide: “Ja cinco diga juráreto naa íaioi nabai diga íbádicueza. Aféretuai fueñe fácajiacadicueza. Bínidicueza, cuena ícíñeno iri,” daide.

²⁰ Iemo nane jíámie daide: “Como fueñe ringo otícueza, bínidicue. Eróíñeno iri.”

²¹ Iemona afe ocuífregamie meine jofomo jaillano ie orédimie bie izóí íaioi daízia llujáide. Aferi rafue naama iere ríicaide. Afe jira ie ocuífregamiena daide: “Jofue cígimo ite áillue macáraodo naa duera iodo mai

raire jai. Aféuaimona dúeredino naa aidáimaci diga bené atiri. Daje llezica júbene ídainidino naa uínidinori benomo atiri,” daide.

²² Afe méifodo íanori íllamona afe ocuífíregamie billano daide: “Cue naama, o ocuilla izói ja finódicueza. Mei íadi nai ñue oruíñede. Nai ráiillonona ite,” daide.

²³ Iemona afe naama ocuífíregamiena daide: “Mai jofue jinómona joide íuaido, áillue iodo naa dúeodo o jairi. Aféuaimona cue jofu íaíoi oruítaibilleza riire oreri.

²⁴ Mei uáfueña ómoina dáitícue: Cue diga güizáibillena fueñe cue uáidogamona buna cue finoca güíllena güíñeítiaíoi,” daide.

Cristodo cai jaille Juáreze

²⁵ Aféruillaido diga comini Jesudo jáidiaíoi. Afe llezica afémie meine gírecaillano íedo jáidinona daide:

²⁶ —Dáamie cuedo jáiacana llezica, ie móotaiña cue baimo izíruiadi cue llófuegamiena ínide. Daje izói dáamie ie aina, ie úruiaíña, ie ámatiaíña, daje izói dama ie abíña cue baimo izíruiá, afémie cuedo bínide.

²⁷ Daje izói dáamie cuedo jailla ícoíña ie tília izire oía afémie cue llófuegamiena ínide.

²⁸ Bífueño comeci facari: ómoimona dáamie jofu níacana uícodo, fueñe comeci facade. Daí comeci facárede ie ofítaga raa ñue nállana fuite dánana onóíllena.

²⁹ Dáamie daí comeci fácañena, jofu jáillirai ie naidánia mei, figo offíñena jira ñue fuitáñeno zoofeite. Iemona afe mei áfena cíoitino afémiena zánoítiaíoi.

³⁰ “Bímie jofu níacade íadi fuitánide,” dáítiaíoi.

³¹ Daje izói daa illaima jóbairiacana uícodo fueñe comeci ñue facárede. “¿Meita cuemo ite diez mil fuíríraíni, baie cai diga fuírízaibite veinte mil fuíríraíñina, ñibai anáfenoredicai? ¿Ñibai nai anáfenonidicai?” daí comeci raire uícodo facárede.

³² Afémie ñue comeci fácano: “Baie bitino anáfenonidicai” daííadi, afémie afe fuírízai bitino nai dúciñena llezica, manánaíllena lluíjítinona óreite, icíríñeno dájena illífue jicánollena.

³³ Afe izói ómoimona ninó dáamie nana íemo ite raana zóofeacañena, cue llófuegamiena jáinide.

Sal ie ríino íñenia jaca ráííñede (Mt 5.13; Mr 9.50)

³⁴ Sal jaca ñuera, mei íadi ie ríino íñenia jaca jíáie raamo jóonenide.

³⁵ Jacafai éniemo jóonegana canóñede. Daje izói riga raa junáíllena fiénide. Jaca énoñeno oni dotárede. Aquíe izóideza cacácadino mai omoi cacai, — daide.

15

Oveja oni féiraila rafue (Mt 18.10-14)

¹ Afe mei nana gobierno íbátaga úcube llíinoraímaci naa fiénidífuiaíredinori Jesús úrillamo cacárezaíbitiaíoi.

² Iemona fariséuai naa ocuica uai llófuefíredino Jesús zanódiaíoi; daídíaíoi: —Bímie fiénidífuiaíredinona caímare uáidota afémaciri güite, —daídíaíoi.

³ Afemona Jesús bie onótatífue llote:

4 —Omoimona dáamie cien diga ovéjaiai ia, afe ovéjaiaimona daa féiraia, áfena riire jénoite. Mei uáfueza, afémiemo fiébide noventa y nueve ovéjaiai fíano afe daa féiraitena afémie baille dinó riire jénoite.

5 Afe mei afe féiraitimie baillano caimare ie fecábemo bíano jofomo uite.

6 Jofomo dúcillano ie onóigamacina naa ie aino comíniri dáanomo garítajano íaioina dáite: “Ja féiraite oveja cue báigaza. Mai cue diga caimare omoí iri.”

7 Mei jira ómoina daídícue: “Afe daje izóí daa fiénidífuiairedímie ie comeci ífue méiduari monamo itino jamánomo íóbidaioí. Mei íadi noventa y nueve diga comeci ífue méidonide Juzíñamuimona oni nibéfedo jáíñedinori jofófemo íóbidaioí.

Ucubetuni niné baiilla rafue

8 Bie jáie níufuemo omoí carei. Daa ringomo diez diga úcubetuni ite. Afemona dáatuni baiide. Afe jenóllena mechera unede. Afe llezica jofe ero rafode. Afe bie izóidedo afe úcubetuni jenócana uite ie baille dinó.

9 Afétuni ie báillamona ie onóigangotíai naa ie aino imáciri dáanomo íaioí garítano íaioina daide: “Jae niné baiide úcubetuni ja cue báigaza, mai cue diga caimare omoí iri.”

10 Nane ómoina daídícue: “Afe izóí fiénidífuiairedímie ie comeci ífue méiduari Juzíñamui abi imaci iere íóbidaioí,” —daídícue.

Moo anámona oni botade jitó rafue

11 Jesús nane jáíífué llote:

—Daa come mena jitórede.

12 Afe íaillinoimona íraimie ie moona daide: “O fecalle ráamona cuemo duide díbene cuemo ine,” daide. Iemona afe íaillinoí moo íemo ite ráaniai íaillinoímo fecade.

13 Afe méifodo íanori íllamona íraimie íemo duide ráaniai jáímamo fecade. Fécajano afe iba úcube llínnota jica jáie éniemo jaide. Afénomo afémie iere fieni illáfue mo jaillano, nana ie llínoga úcube táinomo dótajide.

14 Iemo ie uiga úcube fuite. Afe llezica afe éniemo aillo júbietaidímaci. Aféruillaido afémie iere jufíruite.

15 Iemona afeno itímiemo táijina jénuaide. Iemona afe énie ímie ie tóica meróniai uíñollena orede.

16 Afémie iere júbie méiniamona meróniai ecáinamona güíacade, íadi ninó buna ie ecáñena.

17 Afemona afénomo dama comeci facade: “Cue moo jofomo níue ecaca táijitagano ¡nii aillo illa! Íaioí jeírillamona fiébifrede. ¡Cue nibai benomo júbieri tíítícue!

18 Meine cue moo illánomo jáítícue. Dúcillano íena daítícue: Moo, omo fiénidífué finódícue. Daje izóí Juzíñamuimo fiénidífué finódícue.

19 Cuena cue jitó daííñeitioza. Fia o táijitagamiéna mai cue mameri, daítícue,” afémie comeci facade.

20 Daíí íe comeci faca mei, iodo ie moo diné jaide.

Afémie nai jica ítemo ie moo íena ciode. Cíoillano afémieri iere dúecaide. Iemona moo íe jitó díne aizícana jaide. Dúcillano ie jitona iere caimare llínnote. Llínuano íena fítade.

21 Afe mei jitó íe moona daide: “Moo, Juzíñamuimo fiénidífué finódícue, daje izóí omo finódícue. Cuena nibai cue jitó daííñeitioza,” daide.

²² Mei jiáifodo afémie moo ie ocuífiregamacina daide: “Mai raire jamánomo ñũecuuro jenoda atiri, afémie jitálleza. Daje izói ebírede onocai icuifoí jitari. Daje llezica ie eiba ico jitari.

²³ Afe daáruído farede juráreto jiza fatá atiri. Afe ritá cai iráizilleza.

²⁴ Mei bie cue jitó tílla izóidinomona meine cáadeza. Daje izói ja niné féiraite baitícaiza,” daide. Afemona caimare iráizitiaioi.

²⁵ Bie féiraítimie dúcina llezica, ie ama nánoramie jino jacáfaimo ite. Afénomona bítemo, jofo áinomo dúcidemo íaioi iráizilla naa íaioi rúaniai ca-caina.

²⁶ Ie jira jofómona daa táijitafiregamie jitócome uáidota jicánote: ¿Minica rafue finódiaioi?

²⁷ Afe jitócome íena daide: “O ama dúcina. Afe jira o moo farede juráreto jiza fatátate, mei ie jitó ñue iránino meine dúcina jira,” daide.

²⁸ Mei áfena fidiíllano ie ama nánoramie iere ríicaide. Ríicaillano jofo afénomo jáiacañede. Afe jira ie moo afémie diné lluájide. Jofo bíllena caimare íena bífuiaide.

²⁹ Afe llezica ie moona daide: “Onódioza díga fimona o díga ñue táijifiredicue. Jaca o uaina oni caítáfinidicue. Mei íadi jaca ninó daa duera cabrito cuemo fecáñedio, cue nabáñiairi cue iráizillena.

³⁰ Mei íadi birui bie o úcube jiruúredingotiaimo dotádimie bíllamo afémie íena farede juráreto fatátatio,” daide.

³¹ Jira ie moo afémiena daide: “Cue jitó, o jaca cue díga ífiredio. Cuemo ite raana nana omo dúideza.

³² Mei íadi bie ráfuena cai fínuana ñue jáicina joide, caimare cai íllena, mei o ama tílla izóidinomona meine bíteza. Daje izói ja niné féiraite baitícaiza,” daide.

16

Aillue jofo jabóidillaíma izoide rafue

¹ Jesús nane ie llófuegamacina daide:

—Daa aillo ráaredimie ite. Afémiemo ie táijirainina ócuífiredede jabóidillaíma ite. Jiáimaci afe ráaredimiena lluaíbitiaioi: “O jabóidillaíma omo ite ñuera ráaniaina táinomo dotádeza. Afémie figo ocuífñede,” daidiaioi.

² Ie jira ráaredimie jabóidillaíma uáiduano daide: “O finócafueña cue cacana ¿ñie izói joide? Omo cue iga cue jofo rafue rábiai cuemo izáibiri, mei cue jabóidillaímana íñeítioza. Nana omo cue jóonegafue o záitalleza.

³ Iemona afe jabóidillaíma comeci facade: “Cue ocuídime ja oni cue dotádeza ¿ñie izói fínoíticue? Mairíñedicueza, jacafai tiédimiena ínidicue. Comínimo úcube fia jícana meáiruiticue.

⁴ Cue táijina fuille mei jiáie comini cue íaioi líinollena, cue finóllifue ja onódicue.”

⁵ Ie jira nana ie ocuídime mo ibáredena itímiaí dámierie dáanomo jírillano daide: “O ibáredena cue ocuídime mo ¿nieze ite?” fuéñedime mo jicánote.

⁶ Afémie uai ote: “Cien díga látaniai cáirediji afémiemo cue íballe ite,” daide. Iemo jabóidillaíma daide: “Benó o íbállibe ite. Mai benó raire ráiillano, cincuéntana llotíbena cúeiri,” daide.

⁷ Afe mei jiáíma uáiduano jicánote: “O íbállena ¿nieze ite?” daide. Jira afémie íena daide: “Cien díga costales trigo afémiemo cue ibáredena ite,” daide. Jira

jabóidillaíma íena daide: “Benó o ibállibe ite. Cómobemo ochenta diga costales cúeiri,” daide.

8 Ocuídímie áfena fidíllano, afe ibállibe táinona méidotímíemo iere báitafue nitade. Iemona ja onóigaza, bíníe comíni daní íaíoi nícidogafuíaina Juzíñamuímo ínotino baimo iere baitádiaíoi.

9 Bie izóí omoi íllena llóitícué. Bie fiénide énie ráaniaído, mai omoi nabáñíaiaina maiñori, ráaniaí fuílla méifodo ómoína jofo íaíoi llínoílleza. Mei ómoímo ite ráaniaí ñue omoi uíñuado omoi ñue ínofírenana jino comínímo ácataíomoiíza. Afe izóí Juzíñamuímo omoi ñue ínofírenamona Juzíñamui ie zííñona íllánomo ómoína llínoíteza.

10 Due jiza ite raana ñue uíñotímíe daje izóí aillo raa íemo íadi áfena afémíe ñue uíñoíte. Mei jíáífodo due jiza ite raana figo uíñoñedímíe daje izóí aillo raa íemo íadi afémíe áfeniaí figo uíñoñeíte.

11 Ie jira bie fiénide éníemo ite ráaniaí figo omoi uíñoñenia, ¿bu mei zííñona ráífade ráaniaí ómoímo fecalle?

12 Daje izóí jíáímacímo jainaíde raana figo omoi uíñoñenia, ¿bu mei ómoímo dúíde raa ómoímo fecalle?

13 Dáaruído buna mena ocuídímíemo jaináinide. Iaíllínoímo o jaináíadi dáamiaena éoitio, jíáímana ízírúitio. Daje izóí dáamíe ñue ínoítio, jíáímana jámaírúitio. Mei jira onóigaza: Juzíñamui o náamataja llezica úcubemo abímo náamatanído, —díno Jesús úrite. Daíí Jesús úrilla llezica fariséuaí ímíiaí cacáreidiaíoi.

14 Afe fariséuaí úcubena gáídino Jesús úrillana cacáíllano uáítano íeri zadáidiaíoi.

15 Mei jira Jesús daide:

—Comíni eróicana ñúemacina abí mamédiomoi, mei íadi omoi comeci ífuena Juzíñamui ñue onode. Mei jíí, comíni mameca jamánomoidímíiaína Juzíñamui éoide.

Juzíñamui ílláimana íllarui llua uai naa jaiái Moisés ocuica uai diga

16 Jáíáímona Juan Bautista íllágímamo, comíni Moisés ocuica uaimo dúidiaíoi. Daje izóí Juzíñamui uai jino llóraíni llógamo dúidiaíoi. Iemo aféruimona bené Juzíñamui ílláimana íllarui ñuera uai llócaiga. Iemo afénomo jofo íaíoi jáíllena ízire nícidotíaiíoi.

17 Mei bíníe naa mona diga níne táinocaiadi, ílla diga ocuica uaíllai táinomo faíñeno ñue ícoímo fuitárede.

Jesús íma íe aí dótajado úrite

(Mt 19.1-12; Mr 10.1-12)

18 Daa come íe aí dotáadi, íemo dótano jíáíe ríngo óíadi, afémíe ja jíruífue finode. Daje izóí afe dotácango aína otímíe ja jíruífue mo baíide.

Aillo ráaredímíe íemo Lázaroná mámeçíredímíe diga

19 Daa iere ráaredímíe ite. Afémíe iere ñúecuiruai jírófírede; íllaima jítaíogaroíllai jítafírede. Afémíe nágarui ñue finóbílla rafue finófírede.

20 Daje llezica afénomo dúeredímíe Lázaroná mámeçíredímíe ite. Afémíe abí mallízaina oruíde. Ráaredímíe naze fue mo ráízaífírede.

21 Bie dúeredímíe ráaredímíe güírabanímona dótáfírega güílle álla güífírede. Ie ráína llezica, jícóniaí íe mállíe míáíbífírede.

²² Afe mei diga irui illamona dúeredimie tíide. Afémie Juzíñamui abi imaci monamo ite paraiso daina ñúenomo uiga. Afeno afémie Abraham abímo ite. Afe mei jái, ráaredimie tíilla raitíai.

²³ Ráaredimie comini duere finólliraimo duere zefuilla llezica, caifo erocaide. Erocaide íadi Lázaro Abraham diga ráinana jicana ciode.

²⁴ Iemona afe ráaredimie caillide: “Cai jaiái Moo Abraham, cuemo dúecai. Lázaro bené ore, iere due jiza jáinoína cue jirótaibilleza, cue iife manánaitallena. Mei bie iraimo iere duere zefuídicueza,” daide.

²⁵ Mei íadi Abraham íena daide: “Nauí o illáfue mo começi faca. Aféruillaído iere ñue itio. Mei íadi aféruído bie Lázaro iere duere ite. Mei jáífodo birui afémie benó iere caimare ite. Afe llezica o duere zefuídio.

²⁶ Bie baimo, coco cigiri jáíie iere afóredino ite, jira benó itino jáiacade ia, jáinide. Daje izóí o illánomo itino caifo benó bíacadaíai o ia, bínidiaíai.”

²⁷ Mei jira ráaredimie íena daide: “Cai jaiái Moo Abraham, Lázaro batí cue moo jofomo o oréllena izire jicádícue.

²⁸ Cue cinco dígade ama benomo bie duere zefuillanomo íai o bíñeillena llotátari,” daide.

²⁹ Mei íadi Abraham íena daide: “Afémacimo Moisés naa Juzíñamui uai llóraini diga cúegana ite. Afe uáillaimo náfueitiaíoi,” daide.

³⁰ Jira afe ráaredimie uai ote: “Cai jaiái Moo Abraham, jii, mei íadi tíidinomona dáamie íai o imo llujájadi, íai o começi ífueña méidoitiaíai,” daide.

³¹ Mei íadi Abraham íena daide, “Afémaci Moisés naa Juzíñamui uai llóraini uaina náfueñenia, daje izóí tíidinomona jáidino uaina ñnoñeitiaíai,” daide.

17

Fiénidífue mo come baiilla iere jacírede (Mt 18.6-7, 21-22; Mr 9.42)

¹ Jesús ie llófuegamacina daide:

—Jaca nágarui comini fiénidífue mo baiítafue íteza. Jáímana fiénidífue mo baiítatimie jnií dúerena!

² Trigo llaiéra áillue nofícina afémie cimoi mo ícoi nota monáillaimo dotácana baimo ñuera; úrue izóí como ínotinomona dáamie fiénidífue mo báítañelleza.

³ Afe izóidemona abí omoi rairuirí.

O ama omo fiénidífue finóadi, afémiena lletari. Afemona afémie illafue ie méidoia, caimare íena uáidori.

⁴ Mei dáaruído afémie siete dígcáiño o fiéní finóadi, íemo siete dígcáiño ona “Ja daí omo íñeítícue” afémie daízaíbiadi, jaca ñinomo íena caimare uáidoitio, —daide.

Juzíñamui mo cai íñua ríñorede

⁵ Jesús orécana íai o Ocuíraimana daide:

—Jamánomo cai íñotari, —daide.

⁶ Mei jira afe Ocuíraima íai oína daide:

—Due uáfueña o ínoiadi ríírede raana finóredio. O ínogafue diójina eroide mostaza íjai jéenina izoide íadi, bie sicómoro daina aménana bie izóí daíredio: “Caifo áijicallano monáillajimo zójozai,” daídiónia afe amena o uaina ínoite.

Táijitafregamiemo dúidífue

7 Omoimona daa cómemo ie táijitagamie íadi, afe táijitagamie jacáfaimona táijiano meine bíadi ¿Meita “Mai ráiizaibi, o écaiticue” dáitio?

8 Daiñide. Mei jíáifodo afémiena ñue dáitio: “Mai cue güille finori. Güillano cue jirole llezica nana cue jitailla raa diga bai atíllena, mamériri. Afe méifomo güillano jíroitioza.”

9 ¿Meita nana afémiemo ocuállana fínuana ocuádimie íena “Figora” daiñrede? Daiñede.

10 Afe daje izói, nana Juzíñamui ómoimo ocuica omoi fínua fuilla mei, bie izói daiñrediomoi: “Ñue táijiraimacñedicaí. ‘Iere fígomaci’ caina daiñide. Mei dani caimo duide raa finódicaíza. Baímo jíáie finóñedicaí.”

Jesús diez diga chíñaitino jíllotae

11 Jesús Jerusalem jailla llezica, Galilea énie fuédamo ite duera jófuego dúcida. Afe jofue daje izói Samaria énie fuédamo ite.

12 Afe jófuego dúciacana llezica, diez diga chíñaitino jino bai Jesús diné bitíaiói. Mei íadi afémaci Jesúmona bai jica fiébidiaíói.

13 Afénomona riire íena daiñiaíói:

—Llófueraíma Jesús, caímo dúcecaí, —daiñiaíói.

14 Jesús afémacina cíoillano daíde:

—Batí lletárirainimo omoi abí ácataji, —daíde.

Afénomo íaiói jailla llezica íaióimo ite duícuai jacáibicaíde.

15 Iemo afémacimona dáamie ie abímo ite duico jacáillana cíoillano, Jesús diné abído bite. Billa llezica Juzíñamuimo riire cáimadote.

16 Jesumo dúciállano afémie ana éniemo fueco diné bíjicaíde, Jesuna figura daiñllena. Afe bie izói daiñimie Samaria ímie.

17 Jira Jesús daíde:

—¿Afe duícomona jíllotaga diez dígamieñede? ¿Némei jíáie nueve dígamie?

18 ¿Meita dama bie jícánemiena Juzíñamuina abído cáimaduaiíbilla? —daíde.

19 Iemona Jesús afe íimana daíde:

—Náidacaillano mai jai. O ínuamona o duícomona ja jíllodioza, —daíde.

Juzíñamui illáimana illirui bíllana nie izói ónoiticaí (Mt 24.23-28, 36-41)

20 Fariséuai Jesumo jícánotiaíói, “¿Níirui Juzíñamui illáimana illirui bíite?” Afémie uai ote:

—Juzíñamui illáimana bíllirui jaca cíoñena.

21 Afena “Ba ñie” daiñide. Daje izói “Bai batí ite” daiñide. Mei Juzíñamui illáimana illino omoi cígímo ite, —daíde.

22 Afe mei ie llófuegamacina daíde:

—Uire jíáruido daa birui cue illa izóidiruina cíocaitiomoi, mei íadi cíoñeitiomoi.

23 Jíáimaci ómoína dáititiaíói, “Be ñie,” íemo níbai “Batí ite” dáititiaíói. Mei íadi afénomo jáíñeno iri. Daje izói afémacido jáíñeno iri.

24 Mei ameo llairilla mona enéfemona jica jíáinomo cíoina izói, Nanoide íima Jitó bíllirui afe izói cíocaízaíbite.

25 Mei íadi aferui nai dúciñeille llezica, afémie fueñe jamánomo duere zéfuíte. Daje izói bigímaíai íena ruíffruitiaíói.

²⁶ Noé illágamamo comini iere fienu illa izói, afe izói cue billíruimo comini fienu ítiaioi.

²⁷ Noé ie finoca áillue nocaemo jáiñena llezica, nana comini ie lloga uaina náfueneño fia güloidiaioi. Güillano jirófirediaioi. Afe llezica íaioi fienu illafue méidoñeno áireoidiaioi; íemo íaioi jízaníai ínreitaoidiaioi. Jaca daí ítiaioi abina Noé jofo áillue nocaemo jaide. Iemo aillo noci biide. Jamánomo bíillamona nana afémaci coróbaitaioi.

²⁸ Iemo Lot illágamamo afe izói ite. Juziñamuimo coméciñeno güloidiaioi. Güillano jirófirediaioi; íbajano fécafirediaioi. Jacáfaiaina ritíaioi, íemo jofóniaina nioicaidiaioi.

²⁹ Mei íadi afe Lot Sodoma jófuemona jino bítemo, monámona réiciai noci bílla izói cocide. Afe llezica iere uzire boode ‘azufre’ daina raa cócia. Afemona nana timádimaci.

³⁰ Cue Nanoide íma Jitódicueza, cue cíocaizai billíruí afe izoite.

³¹ Aféruimo daa come ie jofo caifófecomo íadi, ie jofo eromo ite ráaniaina jofo jaillano báiruainide, afénomona botádeza. Daje izói dáamie jino jacáfaimo íadi, abído ie jofomo bínde.

³² Lot aimo omoi uíbicaí.

³³ Ie caana rairuíacadímie áfena afémiemona féite. Mei íadi ie cáanana lloñédimiemona afe féiraiñeno, áfena baímo ziiño illínona máíñoite.

³⁴ Iemo nane ómoína dáitícue, cue dúcille naío, mena come dájena ínia llezica, íaillinoimona dáamie oni uille. Jáimie fiébicaite.

³⁵ Daje izói mena ringo daane trigo lláia llezica, íainguaímona dango oni uille, jáíngo fiébicaite.

³⁶ Daje izói mena íma jino jacáfaimo táijina llezica, íaillinoimona dáamie oni uille jáíamie fiébicaite, —daíde.

³⁷ Daí ie dáinana cacáillano, ie llófuegamaci íemo jicánotiaioi:

—Cai Ocuíraíma, ¿mei ninomo?

Jira afémie uai ote:

—Ínóníai dáanomó gairízaífirenamona, rille rifáíllanona ñue onódiomoi. Afe izói fienu finódiño oni íaioi úllemona daní íaioi duere finóllinona uáfueña onóígaza.

18

Daa fecingo comínimo riire jicánoraimo jícajifrede

¹ Afe mei Jesús ie llófuegamacimo daa rafue mamede, nágaruillai fícañocaiñeno Juziñamuimo íaioi jícafirellena.

² Íaioína daíde:

—Jófuemo daa Juziñamuína náfuéfinide comínimo riire jicánoraima ite. Daje izói jáíamacina lloñede.

³ Afe daje jófuemo daa fecingo ite. Afengo afe jicánoraimo úrizabite. “Cue diga ícíríacadímiéna mai ñue jáicína jicánori,” daíde.

⁴ Diga ícaíño afengo afémiemo jáidemo, afémie afengo uai jeire oñede. Mei íadi méífomo afémie comeci facade: “Juziñamuína jacíruiñedicuénia, daje izói comini uaina náfuéñedicuénia,

⁵ mei íadi bie fecingo diga ícaíño cuemo zefuire bíbideza, aféngona ríidoitícue. Afemona afengo cue dine bíñeilleza. Daí afengo are cue zéfuínaitañeilleza,” daí comeci facade.

⁶ Jira Ocuíraíma daíde:

—Daií bie fiénide comínimo riire jicánoraima daide.

⁷ ¿Meita Juziñamui ie nizécanona, afe ie mona naio diga íemo izire jicádinona ríidoñeite? ¡Raire íaioina ríidoiteza! ¿Meita “Fui ómoimo llóiticue” íaioina daíte? Daiíñeite.

⁸ Omoina daidicue, afémie juare dibáiñeno raire íaioina ríidoite. Mei íadi Nanoide fima Jitódicueza meine cue bíadi, ¿meita cuemo ñnotino íite? ¿Meita íñeite?

Fariseo, íemo gobierno ibátaga úcube llíñoraima izoide rafue

⁹ Jesús nane jiáífue llote, abi ñnuana jiáímaci jámairuitinona ñue llófuellena. Daide:

¹⁰ —Mena íima íaillinoi Juziñamui jofomo Juziñamuimo úrizaide. Dámie fariseo ímie; jiáíma gobierno ibátaga úcube llíñoraima.

¹¹ Fariseo ímie naidáicana bie izóí Juziñamuimo úrite. “Moo Juziñamui, ona figura daidicue, mei cue bie jiáíe fiénidino izóíñedicueza. Jaca merírifinidicue, jiáímaci jífuefinidicue, daje izóí jiruínidicue. Afe baimo bie gobierno ibátaga úcube llíñoraima izóíñedicue.

¹² Naga semánamo ménacaiño güíñeno ífredicue Juziñamui íóbitallena. Nágarui cue oga úcubemona, Juziñamuimo dúide raamo afémiemo fecáífredicue,” daide.

¹³ ‘Mei íadi afe gobierno ibátaga úcube llíñoraima monamo érocáiñeno oni jica fiébite. Dinó ie illa llezica, íere dúeredicue, dainano ie abi íere zuure finode. Finuano daide: “Aí, Juziñamui mai cuemo dúecai. ¡tere fiénidifuiáiredimiedicueza!” daide.

¹⁴ Omoina daíiticue, afe úcube llíñoraima Juziñamui anamo ñue illano jofomo jaide, mei íadi afe fariseo ímie ñue fínoñega jailla. Mei uáfueza, abi ínota jamánomoiacadímie anáfecaide. Mei íadi abí ínoñeno comécina mánaidímie daidímie jamánomoidímiena jailla, —daide.

Jesús úruiai ñue íllena finode (Mt 19.13-15; Mr 10.13-16)

¹⁵ Afe llezica comini íaioi jézainidino Jesumo atídiaoí, afémacimo onoi bitállena. Mei íadi áfena ie llófuegamaci cíoillano afe atíidinona rairuídiaoí.

¹⁶ Mei jiáífodo Jesús ie llófuegamaci uáiduano daide:

—Afe úruiai dama cue diné bitíaoíza. Afémacina rairuíñeno iri. Mei Juziñamui illáimana illíruimo jáitino bie úruiai izóidiaoí.

¹⁷ Uáfueña ómoina daíiticue, ía comécina mánaide úrue izóíñedímie Juziñamui illáimana illíruimo jaca jofó jáíñeite, —daide.

Ráarede jitócome Jesús diga úrilla (Mt 19.16-30; Mr 10.17-31)

¹⁸ Illáicomínimona dáamie Jesumo jicánote:

—Ñuera llófueraima, zíñona cue íllena ¿nie izóí íredicue? —daide.

¹⁹ Jesús íena daide:

—¿Ñibái mei cuena “Fígomiedo” daidío? Abi dine jiáíe ñúemienna íñede. Dama Juziñamui ñuena.

²⁰ Cai ocuína uáíllaina cacádíoza: “Jiruífueña finóñeno iri, jiáímana fañeno iri, meríríñeno iri, jiáímamo taino lloñeno iri, o moo o ei diga ñue jacírui,” —daide.

²¹ Jira afémie Jesuna daide:

—Bíuailaina cue dúemieniadi jaca nai biruido jeire ófiredicue, —daide.

²² Afena cacáillano Jesús daide:

—Mei íadi omo nai daafue fiévide. Nana omo ite ráaniai fécano, afe iba dúeredinomo ine. Afemona monamo ite zúifona ráifide raa óiena íteza. Afe o ráaniai fecalle mei, mai cuedo bi, —daide.

²³ Mei íadi áfena cacáillano iere zúucaide, mei afémie iere ráaredeza.

²⁴ Jesús ie zúucaillana cóillano daide:

—Iere ráaredimie mei íadi ie ráaniaina cue baimo afémie izíruiadi, Juzíñamui illáimana illíruimo jofo jáillena jñii juárena!

²⁵ Camello mámecirede áillue rille eedo uífodo enéfenemo jaille juánide, mei jáifodo iere ráaredimie Juzíñamui illáimana illíruimo jaille iere juárede, —daide.

²⁶ Aféfuena cacádino íena daidíaiói:

—Iemona ¿ñimie jílloille? —daidíaiói.

²⁷ Jira Jesús íaioina daide:

—Comínimona finónide raa Juzíñamui finórede, —daide.

²⁸ Afe mei Pedro íena daide:

—Ocuíraima, odo bíllena caimo ite raana fiénocaidícai, —daide.

²⁹ Jira afémie uai ote:

—Uáfuenta ómoina dáitícue, Juzíñamui illáimana illano ícoinia jofo fiénocaitimie, daje izóí ie móotiai naa ie ámatiaíri fiénocaitimie, daje izóí ie ai naa úruiaíri fiénocaitimie

³⁰ nai bíniemo ie illa llezica aillo baimo llínoite. Afe mei monamo zúifona illino máínoite, —daide.

*Jesús nane dáanomo ie túillífué llote
(Mt 20.17-19; Mr 10.32-34)*

³¹ Jesús oni eneno doce dígade ie llófuegamaci uillano daide:

—Ja birui Jerusalemo jáiticaíza. Afénono nana jaiái Juzíñamui uai llóraini Nanoide íma Jitó cuega uai jino zúilleza. Nanoide íma Jitódicueza.

³² Afeno jicánemacimo cue fécaítiaíói, íemo cuena jifánodoítiaíói, íemo cuena báíñoítiaíói, íemo cuena túallaitiaíói.

³³ Íemo cuena rázido fáitiaíói. Afe mei cuena títaitiaíói. Mei íadi daaruiámani íllemona tíidinomona meine abido cáadimiena íitícue.

³⁴ Afe bífuiaína afémaci jaca onóñediaíói. Daje izóí nímiédo úriteza onóñediaíói, mei aféfuiaí afémaci baitánide.

*Jesús Jericó ímie uínidimie jillotate
(Mt 20.29-34; Mr 10.46-52)*

³⁵ Jesús Jericó jófuemo ánozilla llezica daa uínidimie io fuemo ráiide. Afémie fia úcube jicáfiredé.

³⁶ Aillo comíniai jáillana cacáillano afémie, “¿Níifue comuilla?” daide.

³⁷ Jira afémiemo llotíaíói, “Nazaret ímie bíédo jaille,” daidíaiói.

³⁸ Jira afémie jíríoicaide:

—Davidmona comuídimie Jesús, Mesía dainámie mai cuemo dúecai, —daide.

³⁹ Uícodo jáidino afémiena “Uriñeno llícai,” daidíaiói. Mei íadi afémie nai riire caillide:

—Davidmona comuídimie, Mesía ímie mai cuemo dúecai, —daide.

⁴⁰ Iemona Jesús náidade. “Afémie cue diné omoi uaji,” daide. Afémie dúcizaíbilla llezica Jesús jicánote:

⁴¹ ¿Mínicana jítaidio, omo cue finólleza?

Jira uínidimie uai ote:

—Ocuíraima, meine uído cióacadicue, —daide.

⁴² Jira Jesús iena daide:

—Mai érocai. O íinua ícoinia ja jíllodio, —daide.

⁴³ Daií daina llezica, uínidimie ñue ciode. Afe mei afémie Juzíñamuimo caimátaicana Jesudo jaide. Daje izói nana afe uínidimie jíllonana ciódino Juzíñamuimo caimátaoidiaioi.

19

Jesús Zaqueo uáiduaid

¹ Afe mei Jesús Jericó jófuego dúciillano, afe jofue cígido jaide.

² Afénomo daa ráaredimie ite. Afémie mámecei Zaqueo. Afémie gobierno íbátaga úcube líinoraimaci illaíma.

³ Bie Zaqueo Jesuna cióiacade ie ónoillena. Ua Jesuna cióiacade mei íadi iena ciónide, aillo comíni íllaza, íemo jíái afémie iere íámieza.

⁴ Ie jira Jesús uícomo aizícaillano, sicómoro daina aménamo caífo lííode Jesuna cíoillena. Afe amena Jesús jáillino áinori ite.

⁵ Jesús áfede jailla llezica, caífo íemo érocaide. Iena daide:

—Zaqueo, raire ana bi. Birui o jofomo fiébiticueza, —daide.

⁶ Ie mei Zaqueo raire ana billano Jesuna caimare líínote. Ua Zaqueo jofomo jáidiaillinoi.

⁷ Comíni áfena cíoillano, nana áferi úrizidiaioi. Daidíaioi:

—Jesús fiénidimie jofomo fiébizaide.

⁸ Íemo Zaqueo náidacaillano Jesuna daide:

—¡Ocuíraíma, ero! Cuemo ite ráaniaimona dúredimacimo átuedo fécaíticue.

Daa come jífuiano nauí merídicuena áfena afémiemo meine abído izájíticue. Nane afe emódomo dacaiñoámani afémiemo íitícue, —daide.

⁹ Jira Jesús iena daide:

—Daií o fínuamona Juzíñamui lloga jíllonafue birui jeire o úana ja onódicai.

Nauí féiraitio, mei íadi birui ja jíllotagao. Ja Abraham comuítagamiedio.

¹⁰ Mei jíi, o izoide ja oni baízaidino jenoda jíllotaiíticue. Nanoide íima jíitódicueza, —daide.

Diez dígade úcubetunimo mameca rafue

¹¹ Jesús bífuiaído úrillana comíni cacana llezica, afémie daa rafue íaíoimo llote. Mei Jerusalem afémie ánozioicaidemo, afémaci comécido “Juzíñamui illáimana illírui ja raire dúciacade,” daidíaíoiza.

¹² Jira Jesús íaíoína daide:

—Daa íima ñuemacimona comuídimie. Afémie oni jica jíáiniemo jaide, afémaci illáimana afémie íaíoí jóoneacadiaíoiza. Afe mei afémie nane abído híite.

¹³ Nai ie jáíñena llezica, ie tájítaganomona diez dígamie uáídot. Uáíduano illa dígamie daa iere ráífide úcubetuni fecade. Feca llezica íaíoína daide: “Bie úcubetunido nai cue bíñeille díno ráaniaí oírí. Ua mei, afe fécamo aillo úcubena oni jóoneri,” daide.

¹⁴ Mei íadi dama ie illano comíni afémiena éoidiaioi. Eoillano afémie óodana líóitino orédiaioi. Llotíaioi: “Cai illáimana o íllena jítaíñedicai,” daidíaioi.

15 Mei íadi afémie illáimana jóonega. Jóonia mei dama ie éniemo jaide. Dúciillano úcubetunillaina igámiaí bai uáidote. Uáiduano illa dígamie mo jicánote: “¿Ja nieze úcubena ofitatio?” daide.

16 Nano jírígamié íena daide: “Ocuíraima, o úcubemona diez diga baimo óiena nabáidicue,” daide.

17 Ie jira aféllaíma uai ote: “Iere figura. Ñuera ocuífíregamiedio. Omo due cue ígari ñue ínotioza, diez dígade comíni jofue illáimana o jóoneiticue,” daide.

18 Afe mei nane jíamie jíríte. Afémie billano daide: “Ocuíraima, o úcubemona cinco diga baimo óiena nabáidicue,” daide.

19 Nane daje izóí bímiemo uai ote: “O cinco dígade comíni jofue lláimana o jóoneiticue,” daide.

20 Afe mei nane jíamie jíríte. Afémie daide: “Ocuíraima, be o úcubetuni. Ñue jacíruiocana cue éenogaza.

21 Mei iere ríimiedioza, ona jacíruticue. O jóoneñegamona jaca ófiredio. Daje izóí o ríñeganomona jaca ófiredio,” daide.

22 Afe jira aféllaíma íena daide: “Fíénide cue ocuífíregamiedio. Dama o daina uaido riire omo jicánoiticue. Cue rírenana onódio íadi, ¿níbái mei cue úcubemona nabáidicue? Daje izóí cue jóoneñegamona cue ófírenana onódio íadi, íemo jíai cue ríñeganomona jaca cue ófírenana onódio íadi,

23 ¿níbái mei cue úcubemona jíaié úcubemona iránomo jóoneñedio, abido cue jofomo cue billa llezica afe úcubemona íemo afe baimo jíaié úcubemona diga cue llínollena?”

24 Iemona afénomo ítinona daide: “Bímiemo ite dáatuni uano, diez dígatuni otímiemo feca,” daide.

25 Mei íadi afémaci aféllaímana daide: “Illaíma ero, bímiemo ja diez dígatuni ite. ¿Níbái mei jíaié úcubemona iga?” daide.

26 Jira afe illaíma uai ote: “Mei uáfueza ómoína dáititue, igámie mo baimo aillo írede. Mei íadi íñegamie mo due ite baírórede.

27 Iemo afe baie cue illaíma illana óiacañedino, mai bai bené ati. Atiano cue eróicana afémaci tita,” daide.

Jesús Jerusalén jófue mo jofue jaide (Mt 21.1-11; Mr 11.1-11; Jn 12.12-19)

28 Bie izóí daina méifodo Jesús nai Jerusalén diné jaide.

29 Ja Betfagé jófue mo, íemo Betania jofue diga, afénomo Jesús dúciacade. Afe jofue Olivo idu áinori ite. Afénomo illa llezica ie llófuegamacimona ménamie orede. Íaillinoína daide:

30 —Batí áinori ite duera jófue mo ómicoi jai. Dúciillano afénomo cuinaca búrrona cíotiomicoi. Afe búrrono nai buna ráiñena. Zúitano cuemo atíri.

31 Daa come ómicoi mo jicánoia “Níbái mei uiga” daííadi, “Cai Ocuíraima jítaíllano jicaca” ómicoi daííri, —daide.

32 Afe llófuegamaci íaillinoi jaillano nana Jesús íaillinoína daina izóí cíozaidiaillinoi.

33 Afe burro íaillinoi zúitaja llezica burro naama jicánote:

—¿Níbái mei búrrona zúitádiomicoi? —daide.

34 Jira afe íaillinoi uai ote:

—Cai Ocuíraima jítailla, —daide.

35 Afe mei ja Jesumo uitiaillinoi. Dúciillano afe burro emodo íaioi iníroina jobédiaioi. Jóbiano afe emódomo Jesús rainádiaioi.

36 Afe búrrodo Jesús jailla llezica, ie jáillao comini íaioi iníroillaina jobédiaioi.

37 Olivo daina ídumona ana íaioi jailla llezica, nana afémiedo jaide Juziñamuimo ínotino íobillano caillíodiaioi. Daje llezica Juziñamuimo iere caimátadiaioi, mei diga Jesús uaido daina comúdena naui úcodo ciódiaioiza.

38 Daidíaioi:

—Ocuíraíma mámeçido bite illaíma caimare iri. Caimare uái illafue monamo íteza. Daje izói Juziñamuimo ebire ñúefuiaina nitáfíreiri, —daidíaioi.

39 Iemo afénomo ite comini cígimo fariseo ímíaiaina ite. Afémaci Jesuna daidíaioi:

—Llófueraíma, odo jáidinona “Uriñeno” o daíri, —daidíaioi.

40 Mei íadi Jesús uai ote:

—Omoína daíticue, bimaci úriñenia nofíciai riire úrille, —daide.

41 Afe mei afe Jerusalemo ánozilla llezica, afe jófuena cíoillano Jesús eede.

42 Eiano cómemo úrilla izói afe jófuena daide:

—Nífueningo uái o illífuena iere o onótaacadicue. Birui ñue o illarui. Mei birui afefue ómoimona báinino íteza, aféfuena onónidiomo.

43 Mei uáfueza fiénjiruillai ómoimo biite. Aféruimo omoi éoidimaci omoi illa onido nágafeniai noñbanillaina izói ómoína cirinoítiaioi. Afe mei ómoiri riire fúiritiaioi.

44 Iemo ana éniemo ona dótaítiaioi. Dótano afe jófuemo ite comínina fáitíiaioi.

Afe llezica nana afe jofue finoina nofíciai ana dócoítiaioi; mei Juziñamui ómoína caimare uáiduaibillarui onóñediomoiza, —daide.

*Jesús Juziñamuimo gairítraco ráfua izói ñue finode
(Mt 21.12-17; Mr 11.15-19; Jn 2.13-22)*

45 Jerusalemo ie jofu jailla méifomo, Jesús Juziñamuimo gairíracomo jofu jáillano afeco eromo ite ráaniai fecádino naa íbaríoidinori jino jiude.

46 Iaiolina daide:

—Jaiái Cuegáuaimo daide: “Cue jofu cuemo úrifíreillico.” Mei íadi afécona merírífredino jofu izói finódiomo, —daide.

47 Nágaruillai Jesús afécomo llófuéfirede. Mei íadi afe llezica lletáriraini illaini, daje izói ocuica uai llófuetino, naa jofue illáiniri ie íaioi fallino jenódiaioi.

48 Mei íadi afémie fállena baiñédiaioi, mei nana comini afémie uai iere cacáreidiaioiza.

20

*Illáicomini Jesús ócuifirena ríino jicánotiaioi
(Mt 21.23-27; Mr 11.27-33)*

1 Afe mei jáíruido Jesús Juziñamuimo gairíracomo comini llófue. Afe llezica ñuera jllona uai afémacimo llote. Daí llua llezica lletáriraini illaini, íemo ocuica uai llófuetino, naa ocuide eicomíniri, afénomo dúcidiaioi.

2 Dúciillano Jesuna daidíaioi:

—Nie ríinodo bie ráaniaina finódio áfena cai lloiri. Afe omo ite ríino ¿bu mei omo fecaca? —daidíaioi.

3 Jira Jesús íaioina daide:

—Cuemo omoi jicánua izói ómoimo daafue jicánocitícue. Nee mei cue uai omoi ólleza.

4 Mei Juan ¿bu comini báutizallena ocuica? ¿Meita Juzíñamui ocuica? ¿Mei nibai comini ocuica? —daide.

5 Mei íadi uai oñeno, áfena dani conímamo júfidotiaioi; daidíaiioi:

—¿Ñie izói mei daíticai? “Juzíñamui ocuica” cai daííadi, Jesús cai uai óite, “¿Níbái mei afémiemo ñinoñediomo?”

6 Mei jáífodo “Comínimona ocuica” cai daííadi, nana comini nófiena cai níjítiaioi. Mei afémaci “Juan Juzíñamui dibéneo úrifirede” jaca daíífrediaioi.

7 Iemona afe illáicomini Jesuna daidíaiioi:

—Juan báutizabillena ocuídimeña onóñedicaí, —daidíaiioi.

8 Afe jira Jesús íaioina daide:

—Daje izói bie ráaniaí cue ñinofirena ríino ómoimo llóñeiticue, —daide.

Fiénde táijidino rafue

(Mt 21.33-44; Mr 12.1-11)

9 Afe mei Jesús comínimo úrilla llezica bifue íaioimo llote:

—Daa come jírucuena eroide úvaiaí rillino finode. Afe mei áfemo táijitino nano íanori iba llínollena fecade. Fécano oni jáínomo are illena jaide.

10 Afe úvaiaí llizilla llezica, ie ocuífregamie orede, náamamo dúide dibene afénomo táijidinomona jicállena. Mei íadi afémiemo ñeno fájano ie orédiaioi.

11 Ie jira jacafai naama nane jáie ocuífregamie orede. Mei íadi nane afémiena icida fatíaiioi. Fájano ñeno fia meine orédiaioi.

12 Nane afe mei jacafai naama jáímie orede, mei íadi afe táijidino afémiena bófiانو jino orédiaioi.

13 Iraínomo jacafai naama daide: “¿Ñie izói ñinoiticue? Cue izíruiga jító óreiticue. Afémaci afémiena cíollano, nibai afémiena caimare jacírúitaiioi,” daide.

14 Mei íadi táijidino afémiena cíollano, jofo conímaiaína daidíaiioi: “Bímie uire bie énie máíñoitimie. Mai cai falli. Afe mei bínie cáiena jáíteza,” daidíaiioi.

15 Afe mei jacafai jinomo uillano íena titádiaioi.

Jira Jesús jicánote:

—Afe jacafai naama bimácina ¿ñie izói ñinoite?

16 Afémie billano afémacimo dúecañeno títaite. Afe mei afénie jáímacimo fécaite, —daide.

Afena cacáillano daidíaiioi:

—¡Afe izói cai ílleza Juzíñamui rairuiri! —daidíaiioi.

17 Mei íadi Jesús íaioimo érocaillano daide:

—Iemona, afe Juzíñamui Cuegáuaína ¿ñie izói llóiacade? Afe uai bie izói daide: Jofo níraíni jámairuillano oni fádoica jáíllirai ja nahí jáílliraina jaide. Bie daína daííacade, comini jámairuillano ruííruigamie ja ñuera jica jalleide illáimana jaide.

18 Afe jámairuiga nofici maméidimeño écitaitimie niné tibérotaitaite. Iemo jáí afe nofici anamo jíitafitino jízefo izói jáítiaioi, —daí Jesús daide.

Gobierno ibátaga úcube rafue

(Mt 21.45-46; 22.15-22; Mr 12.12-17)

19 Afe llezica lletáiriraini illaini naa ocuica uai llófueraíni Jesúsna llaitácadiaioi, mei afémacido bie rafue afémie llúana onódiaioiza. Mei íadi afémaci comínina jacírúitaiioi.

20 Ie jira ñúemaci izóí macádino Jesumo báinino oré diaioi. Jesuna comeci féillamona fiéni úritallena orécaiaioi. Afe fiéni ie úrillana cacáillano afémie romano caifóidillaímamo fécaite.

21 Jira afémaci Jesumo bie izóí jicánotiaioi:

—Llófueraíma, onódicaiza jaca ñue illifue llófuefiredio. Daje izóí jaícina ñue úrifiredio. Iemo jino cóidifuiáido izire jicánoñedio. Mei jiáifodo Juzíñamuimo cai jáillido uáfuena úrifiredio.

22 Caímo llone: ¿Romano jamánomoidillaíma ibátaga úcube ibádicainia ñuera? ¿Ñibai fiénide? —daídíaioi.

23 Mei íadi íaioi ie facátaacanana Jesús onode. Jira íaioina daide:

—¿Ñibái mei jíitaja izóí cue finódiomoi?

24 Daa úcubetuni cuemo ácataibi. Afétunimo ite uieco jana ¿bu ie? Iemo afétunimo ¿nie come mámecei cúeina? —daide.

Jira ie uai otíaioi:

—Romano jamánomoidillaíma uieco illa, naa ie mámecei diga, —daídíaioi.

25 Jira Jesús íaioina daide:

—Mei íemona romano jamánomoidillaímamo dúide afémiemo fecari. Iemo daje izóí Juzíñamuimo dúide Juzíñamuimo fecari, —daide.

26 Nana afémaci comíni cacáicana dáina uáillaído ja Jesuna jaca jíitanidiaioi. Mei jiáifodo ie uai úana cacáillano fáigacaidiaioi. Afe mei íaioi uai ollifue iñédeza úriñediaioi.

*Tíide comíni meine abído cáaille jicánotiaioi
(Mt 22.23-33; Mr 12.18-27)*

27 Afe mei saduceo ímíai Jesús díne jaide. Afe saduceuai tíidino meine abído cáañeite daífirediaioi. Jira bímaci Jesuna bie izóí daídíaioi:

28 —Llófueraíma, Moisés caímo cuetá fiécabemo daide: Daa come ie ai nai úruenide abína tíia, afémie ama ie fecíngona órede, afémie úruiaí ie tíide ama méífomo comúllena.

29 Mei nauí cai cigímo siete diga ámaredímíaina ite. Nanóidímie áireíllano nai úruenino tíide.

30 Afe méífoídímie afe fecíngo ote. Ie mei afémie daje izóí úruenino tíide.

31 Afe mei nane jiámie daango ote. Uano nai úruenino tíide. Daje izóí nana afémie ámatiaí daango uano úruenino tíidiaioi.

32 Íirainomo ja afengo tíilla.

33 Iemona comíni tíillano meine abído cáailíruimo, mei siete dígamie afengo óteza, afengo ¿nie íima aina mámeite? —daídíaioi.

34 Ie jira Jesús uai ote:

—Bie éniemo íñiaí áirediaioi. Daje izóí ríngóniaí íñírediaioi.

35 Mei íadi uire monamo jáitena mamécano, daje izóí tíidínomona meine abído cáaitena mamécano jaca áíntiaioi. Daje izóí afénomo íaioi jízatiaína jíáímamo íñíreitañeitiaioi.

36 Mei afénomo buna tíinideza. Iemona afémaci Juzíñamui abí ímáciaí izóidiaioi. Tíillanomona meine abído cáailledo Juzíñamui jítotiaína ja mamécaiaioi.

37 Jaiái Moisés illafue cuegánicomo Juzíñamui tíidino meine abído cáailana caína onótate. Moisés boode rarócina ciona llezica afe bóodemona Juzíñamui daide: “Dáaruído Abraham Juzíñamuidícue naa Isaac Jacob diga,” mei afémaci Juzíñamui illánomo cáadiaioiza.

³⁸ Mei uáfueza, Juziñamui tíidino íeñede, mei jiáifodo cáadino ie. Mei uáfueza, Juziñamui eróicana nana cáadiaioiza, —daide.

³⁹ Temona ocuica uai llófueraimona dáarie daidiaioi:

—Llófueraima, ¡ñue daidio! —daidiaioi.

⁴⁰ Afe baímo Jesús facátalle uaina baiñediaioi.

Cristo ie nano comuidimie ¿bu?

(Mt 22.41-46; Mr 12.35-37)

⁴¹ Afe mei Jesús íaioina daide:

—¿Nibái mei Crístona David jító dáifirena?

⁴² Mei afe David Salmos rabénicomo dáideza:

Monamo ite cai Moo Juziñamui cue Ocuíraimana daide:

“Bené cue nabézimo ráii;

⁴³ ona éoidino cue anáfenolle dino.”

⁴⁴ ¿Mei nie izói Cristo David jító? Mei afe David afémiena ie Ocuífredimiena mamédeza, —daide.

Jesús ocuica uai llófuefiredinomo fiénidifue nitade

(Mt 23.1-36; Mr 12.38-40; Lc 11.37-54)

⁴⁵ Nana comini cacáicana Jesús ie llófuegamacina daide:

⁴⁶ —Ocuica uai llófuefiredinomona abí omoí rairuiri. Afémaci “jáimacídicaí” daíllena áreoi jítáfirediaioi. Afémaci gairíranomo jáiadi, iere caimare uáiduana gáidiaioi. Afe izói Juziñamuimo llófueraicomo ñuera ráiiranuai jénofirediaioi. Daje izói iráizillafue finua lezica jénofirediaioi.

⁴⁷ Daje lezica fecíngotíai jofona báirofirediaioi. Afémaci comini cíocana ñúemacina daíllena, are Juziñamuimo úrifirediaioi. Afémaci jiáimaci duere finolle baímo duere finólliaioi, —daide.

21

Dúerede fecíngo Juziñamuimo úcube fecade

(Mr 12.41-44)

¹ Jesús Juziñamuimo gairíracomo illa lezica, aillo ráaredino Juziñamuimo dúide úcube jóoneranomo úcube dótana ciode.

² Afe lezica dúerede fecíngo cobre finoina mena úcubetuni dótajana Jesús ciode.

³ Cioillano daide:

—Uáfueña ómoina dáitícue, bie dúerede fecíngo nana jiáimaci baímo dotade.

⁴ Mei nana afémaci íaioimo fiébide úcubemona dotádiaioi. Mei íadi bie fecíngo dúerede íadi nana aféngomo ite güille iballe úcube dotade, —daide.

Jesús Juziñamuimo gairíraco niné táinocaite, daide

(Mt 24.1-2; Mr 13.1-2)

⁵ Comínimona dáarie Juziñamuimo gairíraco ero ebire cíoina llotíaioi. Daje izói afécomo ite noficiaí finoina ebire cíoina llotíaioi. Afe izói afécomo fia fecaca ebírede ráaniaí llotíaioi. Afe jira Jesús daide:

⁶ —Nana bie omoí ciona ebire eróidinuiaí uire dáaruído niné táinoficaite. Bico ero ñuera nofítofiaí illa díगतofiaí oni eneno júdaizite, —daide.

Enie fiúacana cai onóllena lloga uai

(Mt 24.3-28; Mr 13.3-23)

⁷ Jira Jesumo jicánotiaioi:

—Llófueraima, o lloga bífuiaí ¿ñiruído íite? Bifue zúille uícodo cai onóille raa, ¿nie izói íite? —daidiaioi.

⁸ Jira Jesús daide:

—Omoi jífuefiza abí omoi rairuri. Mei afe llezica diga “Cue bie Crístodique” dáitino bítiaioiza. Afe izóí “Ja birui aferui” dáitiaioi. Mei íadí afémaci llógamo ínoñeno iri.

⁹ Comini jóbairillana omoi cacáíadi aferi jacínaiñeno iri. Daje izóí jíáie comini íaioi illaima uáitano jíáimiena méidoiacanari jacínaiñeno iri. Mei uícodo daíí íredeza, mei íadí íraírui nai dúciñedeza.

¹⁰ Iemo Jesús nai úrioicaide:

—Daa nairai jíáie nairai diga fúiritiaioi. Daje izóí daa zie jíáizie diga jóbairitiaioi.

¹¹ Afe llezica diga ígobiaido énie iere riire docáirite. Daje izóí aillo nairai júbietaitaioi, íemo jíái aillo comini dáagoberiedo dúicotaitaioi. Aféruido mon-amo aillo cai jacínaitaite raa cíocaite, naa énie fuille joréñuairi.

¹² Mei íadí nana bífuiái jino déiacana uícodo, fiene finóllena ómoína lláitaitaioi. Daje izóí ómoína rácaitiaioi. Iemo Juzíñamui uai llorácomo ómoína uillano riire jicánodoítiaioi. Iemo ómoína llavécomo íbaitaioi. Afe llezica cuemo omoi jainaina jira, jamánomoidillaini naa jabóidillaini uícómo ómoína úitiaioi.

¹³ Daíí omoi íaioi uilla llezica cuedo afémacimo ñue úritiomoí.

¹⁴ Abí omoi ríidolle uaimo uícodo omoi comécillena riire mamériñeno iri;

¹⁵ mei aféruimo afémaci uallaí omoi olle uaina ómoímo llóitícuéza. Afe llezica ómoína ráfuenta ñue baitátaitícué. Afemona omoi éoidino ómoína jaca uáitanidiaioi.

¹⁶ Mei íadí aféruimo omoi onóigamaci Crístomo omoi ínua jira ómoína duere finóllena jíáimacimo izájitiaioi. Daje izóí omoi ámatiaí Crístomo omoi ínua jira ómoína fécaitiaioi, íemo omoi móotiaí dáafuedo ómoína fécaitiaioi, daje izóí jíái omoi nabáíñiaí dáafuedo ómoína fécaitiaioi. Omoímona dáarie títaitaioi.

¹⁷ Aféruido nana nairai cue ícoiniadi ómoína éoitiaioi.

¹⁸ Mei íadí omoi ifótíraíaimona, daa táinomo báííñeite.

¹⁹ Iemo fáicanocaiñeno omoi ínoiadi, zíñona cáallinona máíñoitíomoí.

²⁰ Jerusalén jofue fuíríraíni nágafene afeno cirínoía, áfena cíoillano, áfedo raíre táinocaillena ónoítíomoí.

²¹ Afe jira afe llezica Judea éniemo itíñuiaí caifóneduaimo botárediaioi. Daje llezica Jerusalem itíñuiaí afénomona oni jica jáírediaioi. Iemo jacáfaimo itíno meíne abído afe jófueo jáinidiaioi.

²² Mei afe comini duere finóllíruimo ja dúcidez. Aféruillaído nana jaiái Juzíñamui Cuegáuái ícoímo ñue fuitárede.

²³ Afe llezica namóciredíngotíaina ¡Ñí dúerena! Daje izóí monoí jirode úruena lláíndíngotíaina ¡Ñí dúerena! Mei aféruillaído afénomo aillo izi cácaitiaioi. Afe énie comini jamánomo duere finólliaioi.

²⁴ Afémacimona jíáimaci jóbairillanomo títiaioi. Iemo jíáimaci nana nairai illánomo íaioína llavétaitaioi. Juzíñamui mamécaruillaí díeze, jicánemaci Jerusalén anáfenuano júdaítiaioi. Afe mamécaruillaí fuille díno afe jófuenta fiene fínoítiaioi.

*Nanoide Ñima Jitó Cristo billíruí ñue izoite
(Mt 24.29-35, 42-44; Mr 13.24-37)*

25 Afe mei jítómamo, fiuimo, naa úcuairi jacírede raa jánaniai cíocaite. Afe llezica náiraiaí comeci faca mamérilla uailai niné féite. Iemo monáillaji ficire báguari jacínaitiaíoi.

26 Bíníemo comuízaide raamo coméciillano iere jacínaitiaíoi. Ie jacínaiillamona tíidino izói ificaitiaíoi. Mei afe llezica nana monamo itínuiái riire mozióide ráaniai niráiricaiteza.

27 Afe mei Nanoide Hima Jító Crístona cíoitiaíoi. Afémie íemo ite ríino naa dama íemo ite ebíredifuiáiri uilliedo ana bite.

28 Bífuiái jino zuille llezica, ñue omoi mamériri; íocire omoi érocari. Mei íanori íillamona omoi jíllotallíomoi, —daíde.

29 Daje izói nane bie aménamo mamécáfue Jesús íaíomoi llote:

—Higuera daina aménamo comeci omoi facari. Daje izói nana jíaíe aménamo omoi coméciiri.

30 Íaíoi íbiaí firuillana omoi cíónia, “Ja fimona áinozide” daíífredíomoi.

31 Afe izói bífuiái zuillana omoi cíónamona, “Juzíñamui ílláimana billíruí ja áinozide,” daííredíomoi.

32 Uáfúena ómoína daíítícue, bigímaiaí naí tííñeille llezica nana bie raa jino zúite.

33 Mona énie díga fúite, mei íadi cue uailai jaca fúíñeite. Cue lloga raa nana zúite.

34 Omoi comeci riírelleza abí omoi rairuiri. Mei iere aillo güíacanamona come comeci riire jáite, daje izói jífáífredínamona. Daje izói dani omoi abí ífue níciduamona come comeci riire jáite. Jira cue billíruimo omoi jacínaiñelleza áfena abí omoi rairuiri.

35 Mei rille jíitáfírena raa ónonino jíitaja izói, afe izói aferui nana énie comínina jíitaitéza.

36 Jica ía maí ñue omoi finóbiri. Jaca fáicanocaiñeno Juzíñamuimo omoi úrifíreiri, afe nana bie zúitífuiáimona omoi jíllóillena. Daje izói Nanoide Hima Jító uícomo meáíruíñeno omoi náidáillena, jaca Juzíñamuimo úrifíreillano, jica ía ñue omoi finóbiri, —daíde.

37 Jesús monari Juzíñamuimo gairíracomo llófuefírede. Afe mei naíe, Olivos daina ídumo ínaíírede.

38 Nana comíni afémie llófuiana cacáreillena nágarui raíre jíitíramo bífrediaíoi.

22

Jesús llaitállena maméritiaíoi

(Mt 26.1-5, 14-16; Mr 14.1-2, 10-11; Jn 11.45-53)

1 Fáitañeno pan güífírena rafue ja áinozide. Afe rafue jíaífodo mameina pascua rafue.

2 Iemo lletáriraini ílláini naa ocuica uai llófuetínori Jesús fállena jenódiaíoi, mei afe llezica comínina jacíruitiaíoiiza.

3 Iemo aféruído Taife Judas Iscariótemo jofo jaide. Afe Judas doce dígade Jesús orécamacimona dáamie.

4 Afe bímie lletáriraini ílláinímo naa gairíraco ocuídínomo Jesús íaíomoi fecállena lluíjide.

5 Afena cacáillano íóbidaíoi. Iemona, “Ucubena o íbaitícaí” daídíaíoi.

6 Iemona ie íaioi íbaja úcube llínote. Iemo Judas aféruimona comini figo iñena llezica Jesús íaioimo izájillena jenode.

*Cai Ocuíraima íraicaíño güillafue
(Mt 26.17-29; Mr 14.12-25; Jn 13.21-30; 1 Co 11.23-26)*

7 Ja fáitañega pan güilláruimo dúcide. Afe llezica aféruimo pascua íena ovejai fáfírega.

8 Jira Jesús Pedro, Juan íaillinoína ocuide; daide:

—Mai pascuamo güífírena izóí uícomo ómicoí finori, —daide.

9 Jira afémiemo jicánotiáillinoí:

—Afena ¿ninomo ínuaitcoco? ¿Nínomo áfena güíacadio? —daide.

10 Jesús íaillinoína daide:

—Batí jófuego ómicoí jaille llezica, ícírudo jainoi uitímie cíotiómicoí. Afémiedo jairi. Afe mei afémie jofo jáillícomo jofo ómicoí jai.

11 Afénomo afe jofo náamana ómicoí daíri, “Cai Ocuíraima ona daide: Cue güillíco ¿ninomo ite? Afécomo cue llófuegamaciri páscuamo güífírena izóí güítícue.”

12 Afe mei afémie caifóidíbanimo ite áillocona ácatate. Afeco ero ja ñue finóbide, afécomo cai güille finori, —daide.

13 Iemona afe íaillinoí jaillano, nana Jesús íaillinoína daina cíozaidiaillinoí. Iemona afénomo pascua rafue ana güífírena izóí, güille finódiaillinoí.

14 Ja nauízaidemo güízájilla llezica Jesús naa ie oréllinori dáanomo ráízítiaíoi.

15 Afe llezica Jesús íaioína daide:

—Nai cue tíñena llezica bie pascua ana güífírena izóí omoi díga íere güíacadicue.

16 Mei ómoína dáitícue, bie ie rafue dáanomo meine güíñeítícue. Bie rafue Juzíñamui illáimana illíruimo bíñeille díno güíñeítícue, —daide.

17 Daí daina mei jiróraco llínota Juzíñamuina “Íere figora” daide. Afe mei íaioína daide:

—Bie llínota, conímamo omoi fecari,

18 mei ómoína dáitícue, Juzíñamui illáimana illírui nai dúciñena díno, nane dáanomo uva íjina jaca jíroñeítícue, —daide.

19 Afe mei pan llínota, Juzíñamuina “Íere figora” daide. Daí dainano afe pan dídade. Pan dítano afémacido fecade. Afe llezica daide:

—Bie cue abiza. Tíllínomo fecállícue omoi ñue íllena. Cuemo omoi uíbicaífíreíllena bie izóí omoi finófireiri.

20 Daje izóí güilla fuilla mei jiróraco llínota, íaioimo fécajano daide:

—Bie jiróraco eromo ite íji Juzíñamui ómoína mameca cómue uai ómoína onótáite. Afe íe mameca cómue uai, uafue daíllena cue díe totálleza, mei cue díe omoi ñue íllena totálleza.

21 Mei íadi cue fécaítímie birui benó cue díga güíte.

22 Mei jíi, Nanoide íima Jító Crístodícueza, jaiái uícomo cuemo mameca íodo jáitícue. Mei íadi cue fécaítímie, ¡ñí dúerena! —daide.

23 Afe jira conímamo daídíaíoi:

—¿Cáimona bu mei íe fecalle? —daídíaíoi.

Conímamo jamánomoidímie júfidotiaíoi

24 Afe mei dani afémaci cígimona níímie jamánomoidímiena daina júfidotiaíoi.

25 Mei íadi Jesús íaioina daide:

—Nairai illaini íaioi anamo itínona riire ocuífirediaioi. Daje izói íaioi ocuúidinona, jáíamaci “Omoi ñue finódino” daiífirediaioi.

26 Mei íadi omoi afe izói iñeno iri. Mei jáíafodo omoi cígimo ite jamánomoidimie, afémie jáíamaci baimo jamáimiena írede. Daje izói ómoimona ocuífiredimie jáíamacina canófredimiena írede.

27 Bífuego omoi coméciri. Dáamie güirábanimo güllena ráina llezica, jáíamie güille bai atífrede. Afe íaillinoimona ¿bu mei iere jamánomoina? Mei uáfueza, güirábanimo ráiidimie jamánomoina. Mei íadi cue omoi cígiri ocuífrega táijifredimie izói iticue.

28 Comini fiene cue facátafirena llezica jaca cue diga ífirediomoí.

29 Ie jira cue Moo illáimana illánona cuemo illa izói, afe izói ómoimo íiticue.

30 Afena ómoimo íiticue, cue illáimana illánomo cue diga omoi güllena. Daje izói afe llezica afénomo illaima ráiranomo ómoína ráinaiticue, doce dígade Israel náiraimo izire omoi jicánollena, —daide.

*Jesús Pedro ie jáanollena úcodo llote
(Mt 26.31-35; Mr 14.27-31; Jn 13.36-38)*

31 Ocuúraima Jesús nane daide:

—Simón cácarei. Tafe ona facátaiacade. Comini magari izilla izói ona izíacade.

32 Mei íadi Juzíñamuimo ja jicádicue Juzíñamuimo o íinua féitañeillena. Iemo afe facátainamona abido o bille méifodo, o ámatiai canori, íaioi íinogafuena íaioi fáicanocaiñeillena, —daide.

33 Iemona Simón Jesuna daide:

—Cue Ocuúraima, llavéracomo o diga cue jáillena ja finóbidicue. Daje izói afénomo o diga cue tíillena ja mamériticue, —daide.

34 Jira Jesús íena daide:

—Pedro, birui ona dáititcúe, átava nai úriñena llezica daacaiñoámani, cuena jáanoitio, —daide.

Jesús facátalle hora ja ánozide

35 Afe mei Jesús ie llófuegamacimo jicánote:

—Nauí ómoína cue ória llezica, ipécona uíñeno, daje izói úcubena uíñeno, íemo jáí eiba icona uíñeno, ía omoi jairi, daidicue. Aféruimo ¿minica ómoimo nai iñena? —daide.

Jira afémaci daidíaioi:

—Aféruimo ja nana ñue ite, —daidíaioi.

36 Iemona Jesús íaioina daide:

—Mei birui jáíafodo daidicue. Ipécoredimie mai afena ui. Daje izói úcuberedimie úcubena ui. Iemo jáí lloéfainidimie íemo ite iniroi fécajano afe íbado lloefai oiri.

37 Mei Juzíñamui Cuegáuaimo lloga cuemo ñue ícoimo fuitáredeza. Be nñuui: “Fíenidimaci cígimo cuena mamédiaioi.” Mei uáfueza, nana cue dibénedo cúegana ñue ícoimo fuitárede, —daide.

38 Iemona afémaci daidíaioi:

—Cai Ocuúraima, caimo mena lloefai ite, —daidíaioi.

Afémie uai ote:

—Jadie ja figo baite, —daide.

*Jesús Getsemanímo Juzíñamuimo úrite**(Mt 26.36-46; Mr 14.32-42)*

³⁹ Afe mei Jesús oni jaide. Ie jáifirena izói Olivos ídumo jaide. Afe llezica ie llófuegamaci afémie diga jáidiaioi.

⁴⁰ Ie jáillanomo dúcállano daide:

—Fiénidifuemo omoi báiiñelleza Juzíñamuimo úrífireri, —daide.

⁴¹ Afe mei Jesús comini nofici bai nitáfíreña dino afémacimona oni jaide. Afénomo Juzíñamuimo jicállena ana dújude.

⁴² Daide:

—Moo, o comeci jítaiadi, bie duere cue zefuúllífuemona cue jíllotari. Mei íadi cue comeci jítaina izói finóñeno iri, mei jáífodo o comeci daina izói finori, —daide.

⁴³ Afe llezica Juzíñamui abi ímie monámona Jesumo cíocaide; afémie Jesuna mairítaibite.

⁴⁴ Iemo Jesús ie comeci jamánomo zúureña llezica, afémie Juzíñamuimo iere riire jicade. Afemona iere uzínailla izói ie abi úllie iere jino bite. Afe jino bite úllie ie die izoide. Afeji ana éniemo llocode.

⁴⁵ Juzíñamuimo ie jícaya fuilla mei, afémie ie llófuegamaci diné jaide. Inídiaioina cíozaibite, mei zuufue inítagaiaioi.

⁴⁶ Jira íaioina daide:

—¿Níbái mei inídiomoi? Fiénidifuemo omoi báiiñelleza cazállano Juzíñamuimo úrífireri, —daide.

*Jesús llaitada uitíaioi**(Mt 26.47-56; Mr 14.43-50; Jn 18.2-11)*

⁴⁷ Jesús nai úrioidemo aillo comini dúcidiaioi. Afe doce dígadimonona Júdasna mámeçiredímie bitino ifode. Ainozillano afémie Jesús ñitade.

⁴⁸ Jira Jesús afémiena daide:

—Judas, ¿Nanoide íima Jitó o ñítafuedo fécaibitio? —daide.

⁴⁹ Jesús abimo itino áfena cíóillano jicánotiaioi:

—Cai Ocuíraima, ¿bimaci diga lloéfaido fúiriticai? —daide.

⁵⁰ Afe llezica afémacimona dáamie lletáriraini caifóidillaíma ocuífíregamie bofede. Ie jefo nabefo ñetade.

⁵¹ Jira Jesús daide:

—Dama íteza. Mai fáicanocai, —daide.

Iemona Jesús afe jefona ñetácamie jefo jetánote. Afena afémie jacáitate.

⁵² Afe mei Jesús lletáriraini illaini naa gairíraco ocuídino, naa ie lláitaibite éinamacina daide:

—¿Mei núbái merírifiredímiedicue izói lloéfaillairi, naa bigíniari cuena lláitaibitiomoi?

⁵³ Naui nágaruillaído Juzíñamuimo gairíracomo omoi cue llófuefíreña llezica, jaca cuena jetáñediomoi. Mei íadi birui omoi jitaica raa finóllirui. Naio comini íbailla izói, ja birui Taife bínie náamatade, —daide.

*Pedro Jesuna jáanote**(Mt 26.57-58, 69-75; Mr 14.53-54, 66-72; Jn 18.12-18, 25-27)*

⁵⁴ Iemona Jesús llaitada, lletáriraini caifóidillaíma jofomo uitíaioi. Afe llezica Pedro bai jicado jaide.

⁵⁵ Afénomo afeco cigi íbirimo irai bonódiaioi. Aférimo agáidiaioi. Iemo Pedro afémaci cigímo agáizaide.

⁵⁶ Iemo afénomo ite ócuifregango irai fuemo Pedro ráiinana ciode. Afe mei afengo daide:

—Bímie jaca Jesús diga ífirede, —daide.

⁵⁷ Mei íadi Pedro jáanuano daide:

—Afémiena onóñedicue, —daide.

⁵⁸ Afe mei íanori íllamona jíáimie íena cióillano daide:

—O bie afémaci íédio, —daide.

Mei íadi Pedro daide:

—Íeñede; cue bie afémaci ímieñedicue, —daide.

⁵⁹ Afe mei jabo are íllamona da hora fidi jíáimie riire daide:

—Uáfueza. Bímie afémie diga ífirede mei afémie daje izóí Galilea ímieza, —daide.

⁶⁰ Jira Pedro daide:

—O úrillana onóñedicue. ¿Mínica llotio? —daide.

Ja Pedro úrioidemo átava úrite.

⁶¹ Iemona Jesús Pédro mo érocaide. Afe llezica Pedro afémiena daináfue mo uibicaide. Be níuui: “Atava nai úriñena llezica dacaíñoámami cuena jáanoitio.”

⁶² Afemona Pedro jino jaillano zuure eede.

Jesús jífánodoídaioi

(Mt 26.67-68; Mr 14.65)

⁶³ Jesús llaitada úíñotino afémiena jífánodoiano razido íena fatíaioi.

⁶⁴ Daje llezica ie ui íbáillano, ie uíeco fátano daidíaioi:

—¿Bu o faaja? ¡Onóillano jino llone! —daidíaioi.

⁶⁵ Afe llezica diga jíáfuiaido íena báíñotiaioi.

Dáanomo gairide illáicomini úcomo Jesús uitíaioi

(Mt 26.59-66; Mr 14.55-64; Jn 18.19-24)

⁶⁶ Ja mona monáidemo judíuui éicomini, naa lletáriraini illaini, naa ocuica uai llófuetinori dáanomo gairírdiaioi. Afe gairítaga illáicomini “Junta Suprema” dainámaci. Afénomo Jesús uillano, jícanotiaioi:

⁶⁷ —Caimo llone, ¿o meita Cristodio? —daidíaioi.

Jira afémie uai ote:

—Afena jíi daidícuenia, cuemo íñoñeitiomoi.

⁶⁸ Daje izóí jíáfue ómoimo cue jícanoia, íbana uai óñeitiomoi. Afe izóí cuena zúitañeitiomoi.

⁶⁹ Mei íadi benómoma Nanoide íima Jitó Cristo jamánomo ríinorede Juzíñamui nabézimo ráinaite, —daide.

⁷⁰ Afe mei nane afémiemo jícanotiaioi:

—¿Meita o Juzíñamui Jitodio? —daidíaioi.

Jira Jesús íaioi uai ote:

—Jíi, dani omoi daina izóí nímiedicue, —daide.

⁷¹ Iemona afémaci daidíaioi:

—Ja jíaie uai nábatinona jítaíñedicaí. Cai bie dama ie fuémoma ie fienu úrillana cacádicaí, —daidíaioi.

23

Pilato úcomo Jesús uitíaioi

(Mt 27.1-2, 11-14; Mr 15.1-5; Jn 18.28-38)

¹ Iemona nana náidacaillano Jesús Pilátomo uitíaioi.

² Afénomo diga fiénidífuiaí íemo jóonetiaioi. Daidíaioi:

—Bímie cai comínimo icírafue comuítajana ciódicai. Iemona comíni áferi faillíñaicadaíoi. Afémie “Romano jamánomoidillaíma ibátaga úcube ibánidicai,” daide. Afe llezica afémie “Illaima Cristodicue” daiífiredé, —daidíaioi.

³ Jira Pilato afémiemo jicánote:

—¿Meita o judíuai Illáimana? —daide.

Jira Jesús uai ote:

—O daina izói, jii níimedicue, —daide.

⁴ Iemona Pilato lletáriraini illáinina, naa comíniri daide:

—Bie cómemo fiénidifuenta baiñedicue, —daide.

⁵ Mei íadi dáanomo riire daidíaioi:

—Nana Judea comínimo ie llófueinafuiaido icírafue íaióimo comuítate. Fueñe Galilea éniemo daií finode, íemo biruí cai éniemo náragobiaido daje izói finode, —daidíaioi.

Herodes úcomo Jesús uitíaioi

⁶ Jesús nauí Galiléamo llófueoinafuena Pilato cacáillano, jicánote:

—¿Bie ima Galilea ímie? —daide.

⁷ Comíni daií daidíaióimo, Heródesmo íena orede, mei afémie Galilea illáimana. Aféruillaído Herodes Jerusalemo ite.

⁸ Herodes Jesuna cióillano iere ióbicaide. Jaiái ninomo íena cióiacade. Comíni Jesudo dáinana Herodes cacáfirede. Iemona Jesús daa ciórainina raa fínuana Herodes cióacade.

⁹ Iemo Herodes diga icaiño diga ráfuiai íemo jicájicanode. Mei íadi Jesús jaca uaina oñede.

¹⁰ Dáanomo lletáriraini illaini ocúicafue llófueraíniri itíaioi. Bimaci Jesumo fiénidifuiái riire jóonetiaíoi.

¹¹ Iemona Herodes ie fuíríraini diga Jesuna ja jámairuitiaíoi; iere íena áifedotiaíoi. Afe mei ebírede illaima iníroina íemo jítadiaíoi; jítamona daií afémie jifánodoidiaíoi. Afe meífomo Herodes dáanomo Jesuna Pilátomo orede.

¹² Aféruído Pilato Herodes diga daje nabaina mameide. Jaiái uícodo are conímana éoidiaillinoi.

Jesús titállena mamédiaíoi

(Mt 27.15-26; Mr 15.6-15; Jn 18.39-19.16)

¹³ Afe jira Pilato lletáriraini illaini, íemo riimaci naa comíni dáanomo gairítano daide:

¹⁴ —Bie omoi lloga comínimo icírafue comuítatímie. Mei íadi omoi cacáicana izire íena jicánoticue. Jicánuamona ie fiéni finócafuenta baiñedicue. Afena cacáíomoi. Daje izói afémiemo omoi nitaca fiénidifuiái cióñedicue.

¹⁵ Daje izói Herodes níifuenta cióñenano afémie abido cuemo orede. Ja ciódiomoiza, bímie titállena íñede.

¹⁶ Afémiena zechétaiticue. Afe mei afémiena zuitada jino óreiticue, —daide.

¹⁷ Afe rafue ana comíni cámacaitallena, Pilato daa llavécamiéna zuitáfirede.

¹⁸ Mei íadi nana comíni dájena riire daidíaioi:

—Bie Cristo oni jica titálleza. Barrabás caimo zuitari, —daidíaioi.

¹⁹ Nauí afe Barrabás llavéracomo llavédiaíoi, mei afémie jofue comíni uaitajano jíaié illaima jóoneacade. Afe llezica afémie jíáimana ie tita ícoínia llavédiaíoi.

20 Pilato Jesuna zuitáacade. Iemona dane dáanomo íaioimo úrite.

21 Mei íadi afémaci riire daidíaioi:

—¡Cruzmo ie corai! ¡Cruzmo ie corai! —daidíaioi.

22 Ja dacaiñoámani Pilato íaioina daide:

—¿Nibái mei ie títaiticue? ¿Afémie nñé fiénidifue finode? Ie cue titalle fiénidifueña íemo baiñédicue. Afémiena zechétaiticue. Afe mei afémiena zuitada jino óreiticue, —daide.

23 Mei íadi afémaci Jesús coráillena riirerie jicádiaioi. Jamánomo riirerie íaioi jícajama, íaioi jitaica otíaioi.

24 Íaioi jícajana are illa ícoinia Pilato fairíote.

25 Afe jira nana llavécanuaimona afe nizeca Barrabás Pilato zuitade. Afe Barrabás illaima uátano jíállaima jóoneacana ícoinia íena llavédiaioi. Afe izói jíáima ie tita ícoinia, llavédiaioi. Mei íadi Pilato afe comini jitailla izói Jesuna fecade.

Jesús cruzmo coráidiaioi

(Mt 27.32-44; Mr 15.21-32; Jn 19.17-27)

26 Jesús íaioi coráiailla llezica Cirene énie ímie Simona llaitádiaioi; Jesús uiga cruz íena uitátataioi. Afémie jino jacáfaimona jófueño bite. Jira Jesús rocaca cruz Jesús óodana uitátataioi.

27 Afe llezica diga comini afémie óodana jáidiaioi. Daje izói diga ringóniai afémieri zúucaillano éecana jáidiaioi.

28 Mei íadi Jesús aféngotiaimo érocaillano daide:

—Jerusalén ringóniai, mai cueri éeñeno iri. Mei jíáfodo dani omoi abiri eeri. Daje izói dani omoi úruiaimo eeri.

29 Mei jamánomo zúurediruillaimo dúciitiaioiza. Aféruimo bie izói dáitiaioi: “Uruena comuítáñedingotiai, jñi caimare illa! Daje izói úruenidingotiai, jñi caimare illa! Afe izói úrue mónoina jirótañedingotiai, nñi caimare itíaioi.”

30 Aféruimo comini caifóneduaina dáitiaioi: “Cai emódomo jaíri,” dáitiaioi. Afe izói duera íduaina dáitiaioi: “Cai retáidori” dáitiaioi.

31 Mei birui nífuenidimiedicue ía bie izói duere cuena finódiaioi. Iemona jíáiruudo fiénidino cue duere zefuilla baímo duere finólliaioi, —daide.

32 Afe llezica mena come, comini fáfiredino Jesús diga daane coráillena uitíaioi.

33 Calavera maméidinomo dúciillano Jesús coráidiaioi. Daje llezica afe mena fiénidimie íaillinoi, dáamie Jesús nabézimo, jíámie ie jarífezimo coráidiaioi.

34 Ie íaioi coraina llezica Jesús daide:

—Moo, íaioi fiéni finócafue iba oñeno iri; abina onóñediaioi daíí ñíaza, —daide. Afe mei fuiríraíni onótaraji dotádiaioi Jesús iníroi áfedo dani íaioi maiñóllena.

35 Afénoimo ite comini acáritiaioi. Afémaci naa nairai imaci illáicomíniri afémie áifeduano daidíaioi:

—Jíáimana jíllotafiredioza, ua o Cristo o íadi, daje izói Juzíñamui nizécamiéna o íadi, daje izói Juzíñamui mai o abi jíllota, —daidíaioi.

36 Daje izói fuiríraíni íena áifedodiaioi. Ainozillano rochíredijina, figóñede vino íena jírotataioi.

37 Jirótano daidíaioi:

—Judíuai Illaíma o íadi o abi jíllota, —daidíaioi.

38 Ie ifo acónimo cuezábicí jae jóonega. Afébicí dazieámani uai cúeina: griego, íemo latín, íemo hebreo diga. Afébicimo daide:

“Bímie Judíuai Illaíma.”

³⁹ Coraíca fiénide íaillinoímona dáamie Jesús uáitano daide:

—Crístona o íadi, mai o abi jállota coco diga, —daide.

⁴⁰ Mei íadi jíáimie ie nabáimie llétajano daide:

—¿Níbái mei Juzíñamuina o jacíruiñedio? Daje duere finóinafue anamo itíoza.

⁴¹ Coco aillo finócafue ite. Jira dúere finóbídico. Coco finoca fiénidifue iba ua otíaiói. Mei íadi bie iima fiénidifueña finóñede.

⁴² Jira uáitañedimie Jesuna daide:

—Jesús, o illáimana illíruimo o dúciadi cuemo uíbicairi, —daide.

⁴³ Jira Jesús uai ote:

—Uáfueña ona dáitícué, ja biruí cue diga ñue ebíredinomo íitío, —daide.

Jesús tílla

(Mt 27.45-56; Mr 15.33-41; Jn 19.28-30)

⁴⁴ Ja jítoma jaíciri illa llezica nániéna nauíbicaide. Afe nauilla are ite. Ua jítoma arífemona ana ítemo llícaide.

⁴⁵ Afe llezica jítoma ui duide. Jítíficaide. Daje llezica gairíracomo fetácaroi caifona ana eróicana dáafenedo daingo cúajicaide.

⁴⁶ Afe mei Jesús ficire caillide:

—Moo, cue joreño omo cue ígaza, —daide.

Daí dainano tíide.

⁴⁷ Romano illaíma afe íficaidifue cíóillanona Juzíñamuimo caimátaide. Daide:

—Uáfueza. Bímie jaca níífuenidimie, —daide.

⁴⁸ Daje izóí nana afénomo ite comíni bie íficaidifueña cíóillano afénomona íaiói jófueño jamánomo zuure jáidiaíoi.

⁴⁹ Mei íadi nana Jesús onóigamaci aféfuiaimo jicana acáritiaíoi. Daje izóí Galiléamona Jesudo jaide ringóniaí jicana acáritiaíoi.

Jesús raitíaiói

(Mt 27.57-61; Mr 15.42-47; Jn 19.38-42)

⁵⁰ Judea éniemo ite Arimatea jofue ímie José afénomo ite. Afémie ñue comeci jaícina jóidimie. Afe José judíuai ocuide illáicomínimo jainaide.

⁵¹ Afe bie José Juzíñamui illáimana illíruimo ocuirífiredé. Afe jira afémie jáie judíuai ocuide illáicomíni finócana jíeruíñede.

⁵² Ie jira afémie Jesús abi Pilátomo jícajide.

⁵³ Afémie Jesús abi crúzmona ana uano áillue iníroina junide. Junilla mei, idu anamo nofícimo finócacojimo afémie Jesús raite. Aféfomo nai buna ráíñena.

⁵⁴ Nana bífuiaí viernes nauife dibénedo zuide. Jaca uícodo viérnemo ocózinaillaruímo jitaica raana finófirediaíoi.

⁵⁵ Afe Galiléamona Jesudo bite ringóniaí Jesús ráinano éroizaidiaíoi. Afe llezica ie abi tíide bínana cíodiaíoi.

⁵⁶ Aféngotiaí meine jofomo jaillano, ziórediji, naa abi bíraniaíri finódiaíoi. Afe mei ocózinaillaruímo ocuica uai dáina izóí ocózinaidiaíoi.

24

Jesús tíllanomona meine cáadimiéna jaide

(Mt 28.1-10; Mr 16.1-8; Jn 20.1-10)

1 Semana nanóidiruido afe ringóniai raire jítiramo Jesús raiáfo éroizaidiaioi. Iaiói finoca zióredijillai uitíaiói. Iemo jáie ringóniai íaióina nabáidiaioi.

2 Afe ringóniai afénomo dúcidiaioimo, raiáfo ibaila nofici nano illa izói iñede. Oni eneno jónega.

3 Aféfomo jofu jáidiaioi, mei íadi jofu jáidiaioimo cai Ocuíraima Jesús abi cióñediaioi.

4 Afemona iere jacínaitiaioi. “¿Ñiie izói íiticaí?” daidiaioi. Daií íaiói daina llezica mena ima aféngotiai áinori naidánana ciódiaioi. Afe íaillinoi quenírede inroi jítádiaillinoi.

5 Afe íaillinoina cióillano, iere jacínaitiaioi. Jacínaimona ana éniemo bíjicaidiaioi. Iaiói bíjicailla llezica afe íaillinoi aféngotiaina daide:

—¿Ñibái mei cáadimie tíidino cígido jenódiomoí?

6 Afémie ja benó iñede. Ja meine cáadimiena jáideza. Naui Galiléamo ie illa llezica, ómoína ie daina uaimo uíbicairi.

7 Afénomo afémie bie izói ómoína daide: “Nanoide ñima Jitó Cristo fiénide comínimo fecalle. Afémiena cruzmo córaitiaioi. Iemo daruíamani íllemona meine abido cáadimiena jáite,”—daidiaillinoi.

8 Afemona aféngotiai Jesús íaióina daiífirena uaimo uíbicaidiaioi.

9 Afe mei raiáfomona meine bitíaiói. Billano nana bífuiái once dígade llófuegamacimo llotíaiói. Daje izói jáíimacimo llotíaiói.

10 Bífuiái llocana uitíngotiai mámeciaí be ñie: Magdalena énie ingo María, íemo Juana, íemo Santiago ei María, naa jáie ringóniaíri.

11 Mei íadi aféngotiai íaióina dánana uáiritaidino úrilla izói cacaide. Jira aféngotiai llógana ñnoñediaioi.

12 Iemo Pedro ñnoñede íadi, Jesús raiáfomo aizícana jaide. Jofu eromo érocaidemo dama ie juníllaroi dínomo jóidena cióizaide. Afe mei Pedro afénomo íficaidemo fáigacaillano meine jofomo jaide.

Emaús jofue iomo Jesús cíocaide (Mr 16.12-13)

13 Aféruido afémacimona ménamie Emaús jofue iodo jaide. Afe jofue Jerusalémona once kilómetros dinó jino ite.

14 Afeodo jailla llezica, nana aféruillaido itífuiái júfidocana jáidiaillinoi.

15 Íaillinoi úrilla llezica Jesús íaillinoimo ánozide. Dúciillano afe íaillinoi díga jaide.

16 Afémiena ciódiaillinoi mei íadi afémiena onóñediaillinoi.

17 Jira Jesús afe íaillinoimo jícanote:

—Íodo ómicoi jailla llezica, ¿ñifue júfidotíomoi? ¿Ñibái mei iere zuure itíomoi?—daide.

18 Afe íaillinoimona, Cleofas mámeciredimie uai ote:

—Nana comini biruíllaido Jerusalemó finócafuaiaina fidídiaioi.

Afeno ímiedio íadi ¿meita aféfuaiaina jaca nai fidíñedio?—daide.

19 Temona afémie íaillinoína daide:

—¿Ñifue finódiaioi?

Jira íena daidiaillinoi:

—Nazaret ímie, Jesús ñue riire uai llóraima aillo ebírede raana uaido finode.

Afena Juzíñamui eróicana finode, daje izói nana comini ui cíocana finode.

20 Mei íadi lletáriraini illaini naa cai ocuúidillaini díga afémiena coráiano titállena fecádiaioi.

21 Afe llezica íemo ocuúridicai, ua Israel Nairai anáfenodinomona cai jillotallena. Ja afefue záillamona ja daruíamani íteza.

22 Ie emódomo cámona ringóniai ja caina jacínaitade. Aféngotiai raiáfomo nai jítiredemo jaillano íaiói ciónana meine caimo luuáibítiaioi.

23 Ie abina ciónediaioi. Mei íadi Juzíñamui abi imaci ángeles dainámacina jae cíodiaioi, daidíaioi. Afe ángeles ringóniaina daide: “Jesús caade.”

24 Iemona cámona raiáfomo jáidiaioi. Dinomo ringónaiiai llua izói baitíaioi. Mei íadi Jesuna ciónediaioi.

25 Jira Jesús daide:

—¡tere féitafrediomoi! Nana uai llóraini daináuaina iere rairuóicana ínotiomoi.

26 ¿Uáfueñede Cristo ie ebíredinomo nai jáiñena llezica, afémiemo bie duere finóbillafue jítárede?

27 Ie mei nana Cuegáuaimo afémiedo dainana ñue jino llote. Moisés cuegánicuaimo ite afémiedo úrilla uai ñue jino llote. Daje izói nana jíaie uai jino llóraini llogánicomo itino jino ñue llote.

28 Jófuemo dúcidiaioimo, Jesús iodo nai jáiacadena éroide.

29 Mei íadi afémiena jeruúdiaillinoi. Daidiaillinoi:

—Jae nauízaienza, mai benó coco díga fiebi, mei ua jítireoicaideza, —daide.

Jira Jesús jofo jaide íaillinoi díga íllena.

30 Jae íaióri jofo güirábanimo ráillano pan llínote. Llínuano Juzíñamuina:

—Iere figura, —daide.

Daí dainano dítajano íaillinoimo ite.

31 Afe llezica íaillinoi ui tújjicaillamona íena onódiaillinoi. Afe mei afémie cíobicaíñena.

32 Conímana daidíaillinoi:

—¿Uáfueñede iodo cai úricana jailla llezica, afémie caimo Cuegáuai jino llua llezica coco começi náicaitade? ¡Afe uáfueza!

33 Iemo afénomo are íñeno meine Jerusalemo abido jáizaidiaillinoi. Dinomo once orécamací naa íaiói nabáíñiairi dáanomo gairide baizáidiaillinoi.

34 Afénomo itino íaillinoína daide:

—Uáfueza cai Ocuúraíma ja meine abido caade, Simón Pedro ja íena cíode.

35 Iemo afe íaillinoi afémacimo nana iomo íaiói úrillafuena llotíaillinoi. Afemona Jesús pan ditada íllamona afémiena íaillinoi onónana gairídinomo llotíaillinoi.

Jesús ie llófuegamacimo cíozite

(Mt 28.16-20; Mr 16.14-18; Jn 20.19-23)

36 Afe íaillinoi dainamo úritiaioimo, Jesús íaiói cígimo náidazaide. Náidacaillano íaiói uáidote; daide:

—Jacíruiñeno, uái omoi iri, —daide.

37 Afémiena cíoillano, “¡Come joreño caimo billa!” dainano iere jacínaitiaioi; cuidíridiaioi.

38 Mei íadi Jesús íaióina daide:

—¿Ñibái mei jacínaitiomoi? ¿Ñibái jizíreoicana cue ínotiomoi?

³⁹ Bené cue ónoimo érocai. Daje izói cue ídaimo eroi. Níimedicue. Cue abi jeta. Cómedicueza ónoi. Ja cue abina ciódiomoiza. ¡Mínica joreño ícurunideza; íeizinide! —daide.

⁴⁰ Daíí daina llezica ie onoi ie idai diga afémacimo ácatate.

⁴¹ Mei íadi afémaci ióbidiaioi ia, iere uáinificadiaioi. Ie jira afémie uáfuenta íllana nai figo íñoñediaioi. Jira Jesús íaioina daide:

—¿Benó ómoimo due güíllena ite? —daide.

⁴² Te jira ruica chamu íemo itíaioi, naa due ciifo iji diga.

⁴³ Afe líinota íaioi eróicana güite.

⁴⁴ Afe mei íaioina daide:

—Nana nauí cuemo íficaidífuiai, nauí omoi cígimo cue illa llezica, ómoina cue daina be ñie. Nana cue dibénedo uícodo cuegáuai daina ñue ícoimo fuitárede: Moisés cuegánicomo cue dibénedo úrite; daje izói jaiái uai jino llóraini cue dibénedo úrite; íemo jíái Salmos cuetímie cue dibénedo úrite. Nana afémaci cue dibénedo úrilla uai ñue ícoimo fuitárede, —daide.

⁴⁵ Temona Juzíñamui Cuegáuaimo dánana Jesús afémacina ñue onótate.

⁴⁶ Íaioina daide:

—Cuegáuaimo daina izói Cristo jaca tíirede. Daje izói daruíamani íllamona afémie tíillanomona meine cáadimiena jáirede.

⁴⁷ Daje izói Jerusalémona oni nana jíáie náraiaimo comini comeci ífuiai íaioi méidollena cue mámecido llórede. Daje izói comeci íaioi méiduamona íaioimo ite fiénidí fue múiñua cue mámecido llórede.

⁴⁸ Nana bie cuemo comuídífuiai uai nabáirainidíomoi.

⁴⁹ Ie jira cácarei, cue Moo uícodo lloga fecáacaga Ñuera Joreño ómoimo óreitícue. Afe caifona bille ríino omoi nai lííñoñeille dino, benó Jerusalén jófueo omoi iri, —daide.

Jesús ja caifo monamo jaide

(Mr 16.19-20)

⁵⁰ Afe mei Jesús afémacina jofue jinomo uite. Betania áinomo jáidiaioi. Afénomo Jesús onoi caifo ñúitajano íaioi ñue íllena llote.

⁵¹ Daíí ie daina llezica afémacimona oni jírecaillano afémie ja caifo monamo uiga.

⁵² Afémiemo íaioi caimátaila mei, abído Jerusalemó iere ióbicana jáidiaioi.

⁵³ Afemona afémaci Juzíñamuimo gairiracomo ífirediaioi. Afe llezica aillo ñúefuiai Juzíñamuimo nitáfirediaioi. Daítadeza. Jae ñie.

JUZÍÑAMUI ÑUEFUE SAN JUAN LLOGAFUE El Santo Evangelio Según San Juan

Juzíñamui Uaina maméidimie ímana ificaide

¹ Naga raa táinia uícomo afe Uai dainámie Cristo jaca ite. Afe Uai jaca Juzíñamuimo ite. Afémie Juzíñamui.

² Ua nanóidiruimo afémie Juzíñamuimo ite.

³ Afémiedo Juzíñamui bínie naa ráaniairi finode. Minícana ññede afémie finóñegana.

⁴ Afémiemo cáallino ite. Afe cáallino nana comini egáñote.

⁵ Afe egáñotino jaca jítiredinomo egáñote; íadi afe jítiredino afe egáñotinona jaca dúitanide.

⁶ Daa Juzíñamui orécamié biniemo bite. Afémie mámece Juan.

⁷ Afémie uai nabáiraímana bite egáñotinodo ñue úrillena. Daíí úrizaibite, afémie daináfuedo nana comini ñnollena.

⁸ Juan dama egáñotimieñede. Fia afémie orécamié egáñotimie uai nabáiraímana úrizaibite.

⁹ Afe egáñotimie uáfueña ñue egáñotimie. Bie egáñotimie nana caimo egáñote. Afe egáñotimie biniemo dúcizaibite.

¹⁰ Afe Uai dainámie biniemo ite; Juzíñamui afe Uai dainámiedo bínie finode, íadi biniemo itino afémiena onóñediaioi.

¹¹ Afémie ie éniemo bite, íadi ie comini afémiena llínoñediaioi.

¹² Mei íadi dáarie mei afémiena llínotiaioi; afémiena ñnotiaioi. Afe ñnotino rínorediuaína igáiaioi, Juzíñamui úruiaína íaioi jáillena.

¹³ Afe úruiaí come móotiaí úruiaí izóí cómuítañega. Come móotiaí bie énie comuilla izóí, comuítatiaioi. Afémaci íaioi comeci jítainafuedo comuítatiaioi, íadi Juzíñamui úruiaí dama Juzíñamuimona comuide.

¹⁴ Afe Uaina maméidimie cai come abi izóí dama ificaide. Ie mei cai cigiri nano nié dino ite. Afémie comécimo ññefuiaí illa, ua nana izíruillafue uafue diga. Ie jira afémiemo ite ñue ebírenafue caimo cíocaide; afe ebíredífue dama Moo Juzíñamui daade Jitó ie.

¹⁵ Juan afémieri jéerie ññufuedo úrite. Daide:

—Baie cue úrillamie, ómoimo cue llogámie, cue óodana bitímie. Afémie jae cue uíeco dibénemo jaide, cue ññeniadi íteza, —daide Juan.

¹⁶ Afémie aillo ññuera ráfuiaímona caimo ñue ézicigafuiaína llínoticaí. Ua nana fáicanocaiñeno llínoticaí.

¹⁷ Juzíñamui caimo ocuícáfue Moisedo oreca, íadi izíruinafue uáfuaí diga Jesucrístodo bite.

¹⁸ Buna jaca Juzíñamuína cíóñena; mei íadi dama daade ie Jitó, ua Moo comeci áinomo ítimie, baie Juzíñamui ífueña cai onótatimie.

Báutizaraima Juan Jesucrístodo ññue úrite

(Mt 3.11-12; Mr 1.7-8; Lc 3.15-17)

¹⁹ Jerusalem ite judíuaí, dárie lletáraini Levítaniaí diga Juaamo orédiaioi. Daíí íaioína orede bámiemo jicánollena, “Búdio” daiíllena.

²⁰ Afémie jáanoñeno llote. Daide:

—Cue Crístoñedicue, —daide.

²¹ Nane dáanomo íemo jicánotiaioi:

—¿Búdio mei? ¿O Juzíñamui uai llóraima, Elíadio? —daidíaioi.

Juan: —Íéñedicue, —daide.

Iemo nane jicánotiaioi:

—¿Nii Juzíñamui uai llóraima bille daínámiedio? —daidíaioi.

Jira uai ote: —Íéñedicue, —daide.

²² Ie jira íena daidíaioi:

—¿Mei búdio? cai orédinomo fairíogafuena cai uíllena. ¿Mei nie izóí caina o abi ífuena dáitio? —daidíaioi.

²³ Juan íaioi uai ote:

—Cue dama jofue íñenanomo caillide uáidimiedicue. Bai Juzíñamui io jaícina zitari, jaiai Juzíñamui uai llóraima Isaías daína izóí, —daide.

²⁴ Juan diga úrizaibitino jae Fariséuaimona orécaiaioi.

²⁵ Ie mei Juaamo jicánote:

—Mei Crístoñedio, Elíañedio, Juzíñamui uai jino llóraimañedio, ¿nibái mei báutizaibifiredio? —daidíaioi.

²⁶ Juan íaioina daide:

—Fia jáinoido báutizadicue. Mei íadi omoi cígimo daa omoi onóñegamie ite.

²⁷ Cue ódana afémie bite, íadi cue jinomo baitade. Afémie eiba ico igai zuitánidicue, mei jamáimiedicueza, —daide.

²⁸ Nana afe Juaamo jicánollena Betábaramo úritiaioi. Betábara énie Jordán imani ruicáfellemo ite. Ja dínomo nauí Juan comini báutizafirede.

Jesús, Juzíñamui Cordero

²⁹ Afe meifo iruido Juan ja Jesúsna ciode. Jesús Juaamo áinozide. Ainozidemo Juan daide:

—¡Eroi! Juzíñamui Cordero daina ie Ovéjana mamécamié. Ua, afémie nana comini fiénidifue oni dóraima.

³⁰ Nauí afémie cue llogámie “Cue ódana daa úima bite. Ua ódana bitímie cue baímo baitade, mei afémie cue jinófenemo íteza; daje izóí cue íñenia afémie jae nano itímieza.” Dái nauí afémiedo úriticue.

³¹ Dama afémiena onóñedicueza, búdimieza. Iadi jáinoido comini báutizaibiticue, Israel nairai afémiena ñue onóíllena, —daide.

³² Ie emódomo daide Juan:

—Ja Juzíñamui Ñuera Joreño, Espíritu Santo, bímiemo monámona ana bíllana ciódicue. Fíicirina eroide. Iemo afémiemo fiévide.

³³ Jaca nanómoma onóñedicue nibai bu. Mei íadi jáinoido comini báutizallena daíí cuena ocuáimie cuena daide: “Ñuera Joreño daa úimamo ana bíllana íemo afémiemo fiébillana o cióadi, afémiena ónoitio. Afémie Ñuera Joreñona itátatimie.” Dáií cuena daide.

³⁴ Ja íena ciódicue. Ie jira ñue llóraimadicue. Uáfuenta lloticue. Afémie Juzíñamui Jitó, —daide Juan.

Jesús nano fueñe ie llófuegamaci

³⁵ Afe meifo iruido Juan mena ie llófuegamie íaillinoi diga, meine batí dáanomo ite.

³⁶ Jesús mácajana cióíllano, Juan daide:

—Eroi bímie Juzíñamui Cordero daina ie Ovéjana mamécamié, —daide.

37 Iemo Juan llófuegamie íaillinoi ie daináfuea cacáillanona oni Jesumo jáizaidiaillinoi.

38 Ie mei Jesús jino érocaidemo, afémiemo íaillinoi jáizailana ciode. Iaillinoina daide:

—¿Bu mei jenódiomicoi? —daide. Afe íaillinoi afémiena daide:

—Llófueraíma, ¿ninomo itio? —daide.

39 Jira Jesús fairíote:

—Eróizaiibi, —daide.

Iemona iedo jáidiaillinoi. Afémie illánona cíozaidiaillinoi. Ie mei, nibai jítoma ana ítemo, afémieoiri iruido fiébidiaillinoi.

40 Daa afe íaillinoimona ua Juan llogáfuea cacádinomona, Jesús diné jáidimie Andrés.

41 Afémie Simón Pedro ama. Afe Andrés, nano fueñe abido ie ama Simón baizaide. Baizájillano íena daide:

—Mesíana, Juzíñamui mámecigamiena jae baiticai. Cristo jáífodo mamécamié, —daide.

42 Ie mei Andrés Jesús illánomo Simona uite. Dúcidemo Jesús íena cíóillano daide:

—O Simona, Jonás jítódio. Iadi biruímona Céfana mámeitio. Pedro jáífodo mameina.

Jesús Felipe uáidote Natanael diga

43 Afe meifo iruido Jesús Galilea éniemo jáiacade. Jaillano Felipe baizájide. Afémiena daide:

—Cuedo bi, —daide Jesús.

44 Afe Felipe Betsaida jofue ímie. Andrés Pedro diga daano imaci.

45 Ie mei Felipe dinena Natanael baizájide. Baizájillano daide:

—Moisés ocuica uai ciegánicomo llogámie ja cíódicai. Ua Juzíñamui uai jino llóraini llua izói, afe íaioi llogámiena cíódicai. Afémie Jesús, José jító, Nazaret jofue ímie, —daide Felipe.

46 Natanael dinena daide:

—¿Níga ñúefue jadí Nazarémona fídiitio? —daide.

Felipe uai ote:

—Eróizaiibi, —daide.

47 Jesús Natanael ánozillana cíóillano daide:

—Benomo bite nahí israelita ímie; jífuiáfue afémiemo íñede, —daide.

48 Ie jira Natanael Jesumo jicánote:

—¿Níe izói cuena onódio? —daide.

Iemo Jesús íena daide:

—Felipe nai ona uáidoñenia, ona cíódicue. Ua higuera anamo o íllana cíódicue, —daí Jesús daide.

49 Iemo Natanael daide:

—Llófueraíma, O Juzíñamui Jítódio. Israel Illáimadio, —daide.

50 Jesús ie uai ote:

—¿Dama cue dainana higuera anamo ona cíódicue iedo daí cuena ínotio? —jicánote Jesús. Afe emódomo Jesús íena daide:

—Bie rafue jinomo jáíe áillue ráfuea cíóitio, —daide.

51 Iemo afe emódomo Jesús afémacina daide:

—Uáfuena ómoimo llóiticue. Mona túiñuana cíoitíomoi. Iemona Juzíñamui abí imaci, ángeles dainámaci, cuemo ana bíitíaiói, caífo cúemona jáitíaiói. Mei Nanoide Iima Jitódicueza. Afena cíoitíomoi, —daide.

2

Galilea éniemo Caná jófuego árenafue

¹ Daruíamani íllamona, jadí Caná jófuego, Galilea éniemo, árenamona iráizillafue finódino. Jesús ei afénomo ite.

² Jesús naa ie llófuegamaciri ja afe áireina ráfuego uáidogamací.

³ Afe iráizillafuego jirórai, vinoi fuilla. Ie ei Jesuna daide:

—Ja vino íñede.

⁴ Jesús uai ote:

—Eí, ¿nibái cuena daí daídoi? Cue jíeruillaruímo nai dúcíñede, —daide.

⁵ Mei íadi afengo afénomo ite jirole atírainina daide:

—Mai, nana afémie daína diga fino, —daide.

⁶ Dinomo seis diga icírui, nofirui ráiide. Judíuai afe icírui oruítajano jáimaci ñue oréllena nícodofrediaíói, íaiói abí fiénidífue dóllena. Naga icírumo ochenta o cien litros oruízite.

⁷ Iemo Jesús atírainina daide:

—Jadí icírui jáinoina oruítari, —daide.

Iemona fuemo jibiezidiaíói.

⁸ Iemo Jesús íaioina daide:

—Due uano rafue náamamo uiri, —daide. Daí finódiaíói.

⁹ Iemo afe rafue naama jáinoi facádemo, jáinoíñede. Jae vino. Rafue naama onóñedemo icírui jáinoina oruízite. Dani atídino áfena onona. Afe vino nimánuanona, rafue naama ringo óiacadimie uáidote.

¹⁰ Iena daide:

—Nágamiíai ñújei nano fueñe atífirediaíói. Ie mei nana uáidogamací aillo jirole mei, jamai vino atífirediaíói. Mei íadi nai biruido ñújei ja o éenoga, —daide.

¹¹ Afe vino méduafue ua Jesús nanoide uaido daingo comuítaga raa; afefue Galilea éniemo, Caná jófuego finoca. Bie uaido comuítaga raado afémie ie ebírede ríino jino cíotote. Iemona ie llófuegamaci ñue íena ínotíaiói.

¹² Ie meífodo Capernaúmo, Jesús jaide ie ei diga, ie ámatíai diga, ie llófuegamaciri. Dinomo ja bai niga mona itíaiói.

Jesús Juzíñamui gairáco ñue duafue

(Mt 21.12-13; Mr 11.15-18; Lc 19.45-46)

¹³ Aféruillaído Judíuai pascua rafue ánozide. Iemona Jesús Jerusalem jaide.

¹⁴ Afe dinomo gairáco eromo jurárai, ovejai, íemo fíicirillai dieze fecárainacina Jesús cíode. Dáanomo úcube méidoraini ráidiaíói.

¹⁵ Afena cíollano Jesús ñécigai móillano jiura finode. Afedo gairáco erómoma nana fecáraini íaiói jurárai ovejai diga jino jiude. Daje llezica úcube méidoraini úcubetunillai Jesús ana jutade. Íaiói úcube facádorabani Jesús oni caítade.

¹⁶ Fíiciri fecárainina daide:

—Bie raa benómoma oni ui. ¡Cue Moo jofe fecáiracona mamériñeno iri! —daide.

¹⁷ Ie mei afémie llófuegamaci jaiái cuegáuái úbicaidiaíoi. Afe uai llote: “O jofu cue ríiduamona cue abí íñeite izoide,” daide.

¹⁸ Iemona Judíuái afémiemo jicánote:

—¿Minícado o ríinona caí ácatatio? ¿Bie raa o fínuana bu o ocuilla? — daidíaiói.

¹⁹ Jesús íaiói uai ote:

—Cue ríino ómoimo bie izóí ácataticue. Bie gairíracu omoi júdai, ie mei daruíamani íllemona meine nane caífo cue raiñolle, —daide.

²⁰ Jae judíuái Jesuna daidíaiói:

—Cuarenta y seis fimona niga gairíracoca; ¿éca daruíamani íllamona meine abido caífo o ráiñoiti? —daidíaiói.

²¹ Iadí afémie daina uai gairíracu, dama ie abí llote.

²² Iemona Jesús tíidinomona meine abido cáaillano ie llófuegamaci bie daina uaimo uibíodiaíoi. Daje llezica Cuegáuaina ínotiaíoi nana Jesús íaíoina daina uai diga.

Jesús nana comíni comécina onode

²³ Jesús Jerusalemo illano, pascua rafue llezica, aillo comíni afémiena ñue ínotiaíoi. Ua íaiói cíófinina afémie uaido fínuana cíodiaíoi. Afena cíoillano afémiena ínotiaíoi.

²⁴ Mei íadí Jesús afe comínimo ie abína nai rairuide. Mei nana imaci comécina onódeza.

²⁵ Jáí come afémie comíni ífuena llónide. Dama afémie dinena íaiói comeci ífuena onode.

3

Nicodemo Jesumo úrillafue

¹ Daa Judíuái illáima mámece Nicodemo. Afémie fariseo.

² Afe bie Nicodemo naiu Jesumo úrizaibite. Jesuna daide:

—Llófueraíma, Juzíñamui orécau caí llófuellena onódicaí. Juzíñamui cómemo íñeniadi bu bie ríirede cíófinina fínuana ácatanide. Ua o fínua izóí buna finónide, —daide.

³ Ie jira Jesús íena daide:

—Uáfuena dáititue: meine nane jéiciñegamie jaca Juzíñamui illáimana illánona cíóñeite, —daide.

⁴ Jira Nicodemo jicánote:

—¿Jae éicomedicaí! ¿Nie izóí meine jocóllicaí? ¿Meine nane ei eromo come jáirede, dáanomo abido jéicillena? —daide.

⁵ Ie jira Jesús uai ote:

—Uáfuena dáititue: meine nane jáinoina jéiciñegamie, Moo Joréñomona jéiciñegamie diga, ua Juzíñamui illáimana illánomo jofu jáinide.

⁶ Come móomona jéicigamie jaca come. Iadí Juzíñamui Joréñomona jéicigamie jaca joreño.

⁷ Cue ona daináfuerei jacínaiñeno iri. Uáfuena nágamie comue jéiciafue, ua caífona jéiciafue jaca jítáirede.

⁸ Jairifo náganomo ebena jaiñófirede. Ie jáíñuana cacáido, mei íadí ninena bite, niné jaide, onóñedio. Daje izóí nana Juzíñamui Joréñomona jéicigano, afe jairifo izóí itíaiói, —daide.

⁹ Jira meine nane Nicodemo jicánote:

—¿Nie izóí bie iite? —daide.

¹⁰ Jesús uai ote:

—¿Nibái mei jicánotio? O iere aillo Israel llófueraimana o íadi ¿bie ráfuena onóñedio?

¹¹ Uáfueña dáíticue: cai onógafuedo úriticai. Cai ciónafueña féinino lloticai. Mei íadi cai ómoimo llogáfueña ññoñediómoi.

¹² Bie énie raado ómoimo cue úriadi nai ññoñeniadi, ¿nie izóí cuena ññoitio mona ero ráfuedo cue úriadi?

¹³ Buna mona eromo jáiñede. Dama monámona ana bitímie, Nanoide ñima Jitó, monamo jáirena; mei nauí monamo itímieza. Dámiedicue.

¹⁴ Nauí jaiái Moisés jofue iñénazicimo jaio caifo ráiñua izóí ua afe izóí caifo ráiñobaiticue. Nanoide ñima Jitódicueza.

¹⁵ Ua afe cue ráiñua jitáirede nana cuemo ñnotino fiénidifueño báíñeilla. Mei íadi ñnotino zíñona íitíai.

Juziñamui nana comínina izíruillafe

¹⁶ Jesús nai úrillano daide: Juziñamui nana comínina iere izíruite. Afe iere izíruillamona Juziñamui ie daade Jitó caimo ite. Ua, afémie ie caimo ite, nana afémieño ñnotino jaca ñinomo féiraiñeilla; mei jáífodo ñue zíñona íaió ñlena.

¹⁷ Comini fiénidifue iba otátaraimana Juziñamui ie Jitona oréñede, mei íadi ie Jitona orede afémiedo comini jíllobicailla.

¹⁸ Juziñamui Jitomo ñue ñnotimie duere finóbiñede. ññoñedimie jae duere finóbide, Juziñamui daade Jitomo ññoñena jira.

¹⁹ ññoñedino jae duere finóbidaíai. Mei ua ñue egáñotimie ana bie éniemo bitemo, jítinona jamánomo gáidiaíai, fiénidifue finódinona íaió illa jira.

²⁰ Nana fiénidifue finóraini úzefona éoidiaíai. Jaca úzefomo áinoziñede. Ua íemo áinoziñediaíai íaió fiéni finócafueña óñoñellena.

²¹ Uáfueño comeci facáðino úzefomo áinozifrediaíai. Íaió finócafue jaca Juziñamui cacáðinona íaió illa izóí finódiaíai. Uzeño íaió finócafue jaca daí ñue cíoitae, —daide Jesús.

Báutizaraima Juan Jesudo meine úrizaibite

²² Ie meífomo Jesús Judea éniemo jaide, ie llófuegamaci diga. Dínó diga irui íitíai. Dínomo comini báutizadiaíai.

²³ Daje llezica Juan, Enón éniemo báutizade. Enón Salim áinomo ite. Dínomo báutizade, aillo jainoi illa jira. Iemona comini báutizabitíai.

²⁴ Bifue finódiaíai Juan nai llavéracomo úññenia.

²⁵ Juan llófuegamacimona dáarie judíuaimo úrizaide. Comini íaifue oni dollínodo úritíai.

²⁶ Juaana daízaibitíai:

—Llófueraima, nauí o diga itímie, Jordán ruicáfelleño itímie, caimo o llogámie, ja comini báutizade. Nana comini afémie diné jáidiaíai, —daidiaíai.

²⁷ Iemo Juan afémacina daide:

—Juziñamui cómemo ífue fécañenia, bumo ráfuena íñeite.

²⁸ Cue nauí uáfuedo ðainafue ðani cacáðiómoi. “Cristoñedicue” ðaidicue. Afémie úcodo orécamedicue.

²⁹ Airenafueño ringo otímie ua ringo óite. Otímie nabai afe dínó itímie ie úrillana cacade. Cacáñlanona íeri iere íóbite. Daje izóí biruido cue íóbicue.

³⁰ Nágari afémie jamánomo illáimana jáizaide. Ie llezica cue jabómieiticue. Daií jitáirede, —daide.

Caifona ana bitímie

³¹ Juan nai úrite; daide:

—Caifona bitímie nana cai jaináinamie. Bie énie ímie ja bíniamo jainaide. Enie ífuená úrite. Mei íadi monámona bitímie nana cai baimo jamánomoidímie.

³² Afémie cacánafuedo úrite ie ciónafue diga. Iadi afémie dáinana buna íinoñena.

³³ Da come ie dáinana ínoiadi daií Juzíñamuimo fairíote. Ua daií Juzíñamui uáfuená dainafue uáfuetáite.

³⁴ Juzíñamui orécamie Juzíñamui uáillaido úrite, mei Juzíñamui ie Joreño afe orécamiemo facáñeno nana íteza.

³⁵ Moo ie Jitona izírute. Naga itínuiaina afémiemo fecade.

³⁶ Iemo ie Jitona ínotimiemo fúíñeite illánona íemo ite. Mei íadi Jitona ínoiacañedimiemo afe fuiñédinona íñeite. Juzíñamui afémiena iere duere fínoite.

4

Jesús Samaria ingomo úrite

¹ Fariséuai Jesús Juan baimo aillo comíni jáillana fidídiaioi. Daje izói Jesús Juan baimo báutizafirenana fidídiaioi.

² Mei íadi Jesús báutizañede; dama ie llófuegamaci báutizaja.

³ Afena Jesús fidíllanona Judéamona meine abido Galilea éniemo jaide.

⁴ Jesús jailla llezica Samaria énie cígido jáirede.

⁵ Ie mei Samaria jófuemo dúcide. Afe jofue mámeçi Sicar. Sicar áinori Jacob fecí énie ite. Afe éniena ie jitó Josemo maiñótate.

⁶ Dáanori Jacob jainoi orano ite. Jesús iodo mácajamona zegónaite. Ie jira jainoi orano abimo ráinade ocózinallena. Jae jaíciri íacademo.

⁷⁻⁸ Ie llófuegamaci jófuemo güille jae íbajidiaioi. Iemo Samaria ringo dúcide. Jainoi uáibite. Iena Jesús daide:

—Jáinoina cue jírota, —daide.

⁹ Ie jira Samaria ringo Jesuna daide:

—¿Nibái mei jainoi cuemo jícadío? Odi judíodio. Cue Samaria ingódicue, —daide. (Ua jaiái dinómona judíuai samarítanuaimo nabáirirainide.)

¹⁰ Ie jira Jesús uai ote:

—Juzíñamui fia fecalli raa o onóadi, ua áfena raire cuemo jícaítio. Daje izói omo jainoi jícadímiena, o onóadi ua raire cuemo jícaítio; íemona ua cáadijina o íticue, —daide.

¹¹ Afengo afémiena daide:

—Íima, o jainoi olle raa íñede. Jainoi orano afórede. ¿Ninómona cáadijina cue ítío?

¹² Cai jaiáigimie Jacob bie jainoi orano caimo iga. Benómona afémie jíruaide ie úruiai diga. Ua dájemona afémie tóiníai jíruaide. ¿O iere afémie báimoidío? —daide.

¹³ Jesús uai ote:

—Nana bie jáinoimona jiródimaci nane meine abido jiróacaitiaioi.

14 Mei íadi cue jirótagano jaca meine abido jiróacañeitiaioi. Omo cue ille jainoi ua zlíñona íitiji. Nágarui caimare o itátaite. Illánona fúíñeitinona omo ífcáitaite, —daide.

15 Ie mei ringo afémiena daide:

—Híma, jadíe jáinoina cue ine; ja cue jíroacañeilleza, ua nane meine bie jainoi oránomo cue bíñeilleza, —daide.

16 Jesús aféngona daide:

—O ini jírizairi ie mei bené bi, —daide.

17 Ringo uai ote:

—Ínínidícue, —daide.

Ie jira Jesús aféngona daide:

—Uáfúena daídío. Ínínidío.

18 Jae cinco dígacaiño ínreidio; birui o illámie o iníñede, —daide.

19 Afena cacáillano ringo afémiena daide:

—Híma, Juzíñamui uai llóramiedío ja onódicueza.

20 Cai jáiaimaci Samaritánuai bie ídumo Juzíñamuina íóbitadiaioi; ñúéfuedo íemo úrizabítiaioi. Mei íadi o íemo naa judíuairi jáífodo daídíomoi. Jerusalemo cai gairíllano Juzíñamuina cai íóbitallena daídíomoi, —daí afengo daide.

21 Jesús uai ote:

—Ringo, cuena íno. Jáiruimo ja dúciizaide. Aféruimo bídumo bíñeno, Juzíñamuina íóbitaitiomoi. Daje izóí Jerusalemo jáíñeno, Juzíñamuina íóbitaitiomoi.

22 Omoi íóbitagamiena onóñediomoi. Iadi cai íóbitagamiena onódicai, níbai jíllonafue judíuaimona bíteza.

23 Jae como cue llogáruimo dúcide. Jae biruí aferuí. Naga Moo Juzíñamuina uáfúena íóbitaacadímie afe o joreñodo uáfúena afémiena íóbitaite. Daí Moo Juzíñamui cai íena íóbitallena jítaide; ua nana afémiena íóbitaacadino daí bíllana Moo jítaide.

24 Juzíñamui ua Joreño. Afémiena íóbitadino íaioi joreñodo uáfúena íóbitaitiaioi, —daide.

25 Iemona afengo íena daide:

—Cue onódicueza Mesías bíite. Afe Mesías dáina Cristo. Afémie bia nana ñue rafue caímo jino llóite, —daide.

26 Jesús daide:

—Níimíedicue, ori úrilla, —daide.

27 Íemo ie llófuegamaci dúcide. Dúciillano Jesús ringomo úrillari fáigacaidiaioi. Mei íadi buna jícanoñena áfena. Ua afémiemo afengo jítaíllana jícanoñediaioi; “¿Mínícafuedo úritiomíco?” íena daíñediaioi.

28 Ie mei afengo íciru fíenocaillano, jófúemo jaide. Dínomo comínimo llujáide:

29 —Nana cue finócafue jino llotímiemo omoi éroizaibi. ¿Bie afe Cristoñede? —daide.

30 Ie jira jófúemona Jesús illánomo jáidiaioi.

31 Afémaci bitíaioimo ie llófuegamaci afémiena jícade:

—Llófueráima, due güi, —daidiaioi.

32 Ie jira afémie daide:

—Cuemo ite güíllena omoi onóñediomoi, —daide.

33 Ie jira ie llófuegamaci como fueñe conímamo jícanotiaioi:

—¿Jáíe come afémie écaibite? —daidiaioi.

34 Ie jira Jesús afémacina daide:

—Cue orédimie comeci jítaina izóí cue finóadi bie cue güllena. Daje izóí ie táijina cue fuitáadi, güitcúe izoide.

35 Omoi llua: “Nai riga raa ollíruimo cuatro diga fiui ite” daidíomoi. Mei íadi daíitcúe: Erocaí. Ja rigánuemo eroí. Ja jéiaruimo áinozide.

36 Ollemo táijidimie iba llínote. Afe oga llízieniai jaca ninomo fiébite; ua fiúñeite illánomo fiébite. Ua ríjiraima óraima diga dáanomo camátaillena daíí ite.

37 Omoi jaiai daina uáfueña llote: “Ríjiraimie dáamie íadi otímie jiáimie.”

38 Jae omoi ríñeganomo ómoína orédicúe. Jiáimaci táijidiaioi íemo íaioi táijina caimare ínotiomoi, —daide.

39 Aillo Samaria jofue imaci Jesumo ínotiaioi. Ua uafue ringo llogáuaido Jesuna ínotiaioi. Afengo daínauai, be ñie: “Nana cue finócafueña cuemo llote.”

40 Ie jira Samaritánuaí Jesumo billano jicádiaioi:

—Cai diga iri, —daidíaoi. Ie jira Jesús ménarui íaioi diga ite.

41 Afémie daínana cacáillano aillo jiáimaci ínotiaioi.

42 Ie jira aféngona daidíaoi:

—Nauí dama o daínado jabo ínoticaí, mei íadi birui ja cai dani afémiena cacáillano áfedo como ñue ínoticaí. Ja onódicaí bie ua Cristo, nana nairai jíllotaramaza, —daidíaoi.

Jesús gobiérnomo táijiraima jító jíllotate

43 Ménarui íllamona Jesús Samáriamona jáizaide Galilea énie iodo jáillena.

44 Jae dama Jesús llote:

—Juzíñamui uai jino lloraíma dama ie éniemo jaca jámairuiga, —daide.

45 Galiléamo dúcidemo afénomo itino íena ñue llínotiaioi. Ua caimare íena llínotiaioi, ñibai pascua ráfueño Jerusalemo nauí Jesús illa llezica jáidiaioi. Iemo aféfuemo nana ie finócafuiaina cíodiaioiza.

46 Ie mei Jesús meine Caná jófuemo, Galilea éniemo jaide. Ua jainoi vónona meíduanomo jaide. Afe llezica Capernaum jófuemo gobierno illaíma táijiraima jító iere irárede.

47 Afe táijiraima Jesús Judéamona Galiléamo dúciana fídiano, afémieño eroizaide. Ua ie jító jíllotaíbillena jícajide; mei ja ie jító tízaide.

48 Iemo Jesús íena daide:

—Onótate ráaniaí íemo cíofinina finócafuiái diga omoi cíóñeniadi íñoneíomoi, —daide.

49 Íadi gobierno táijiraima Jesuna daide:

—Ocuíraíma, raire bi cue jító nai tíñena llezica, —daide.

50 Ie mei Jesús íena daide:

—Meine o jofomo jai. O jító jílloteza, —daide. Afémie Jesús íena daina uaina ínote, jira jaide.

51 Ie jofomo dúcizaidemo ie jaiénizai jino íemo bitíaoi. Dúciillano daidíaoi:

—O jító jae jíllode, —daidíaoi.

52 Iemo, —¿Ñie hóramo jíllode? —íaoímo jicánote. Jira daidíaoi:

—Nauiri jaíciri illa mei ie abi bóua llícaide, —daidíaoi.

53 Iedo moo bie daje hora Jesús íena daina hora uíbicaide. Ua “O jító jíllote” daina hóramo afeza jíllode. Iemona afémie Jesumo ínote, naa ie comíni diga.

54 Daií Jesús Judéamona Galiléamo billano mena onótate raa finode. Bie jílloatafue ua ie meífodo finoca cíofininafue.

5

Jesús Betzátamo ite tizitaitimie jílloata

1 Ie meífomo judíuai rafue ite; jira Jesús meine Jerusalemo jaide.

2 Afe jófue, ovejai naze ánnori jainoi ofillano ite. Afeno hebreo imaci uaido mameca Betzata. Nane dínomo cinco díga gairirano ite.

3 Bie gairira macáranuaimo aillo iráredimaci bíede: uínidimiai, aidáimiai, tizitaitimiai díga. Bimaci jainoi bagua úiñotiaioi.

4 Daií úiñotiaioi mei dáruinarie Juzíñamui abi ímie ana billano jainoi bagótáfiredeza. Bagota mei nanoide come jáinoimo ana jáidimie, ie irárenamona ja jíllobicaifirede.

5 Dínomo iráredimie ite. Ua treinta y ocho díga fimona irárede.

6 Jesús billano ie bíinana ciode. Afémie are jaijai nínómona daií dínomo íllana onóillano, Jesús íena daide:

—¿Jíllobicaiacadió? —daide.

7 Iráredimie uai ote:

—Ocuíraima, cue cánoitimie íñede, jainoi bagua meífomo jáinoimo cuena ñuitállena. Nágari cue jáiacana llezica jáíimie nano fueñe jáinoimo dúcide, —daide.

8 Jesús íena daide:

—Caifo náidacai. O bírallu llíno. Mai maca, —daide.

9 Afe llezica afémie jíllobicaide. Iemo ie bírallu llánuano macáicaide. Aferui ocózinallarui.

10 Jira judíuai jílloatagamiéna daide:

—Birui jae ocózinallarui. O bírallu rocánollena omo rairuírede, —daídíaioi.

11 Afémie uai ote:

—Cue jílloatimie cuena daide: “O bírallu llíno; mai maca,” —daide.

12 Iemo íena jícanotiaioi:

—¿Bu ona “o bírallu llíno, mai maca” daina? —daídíaioi.

13 Mei íadi afémie ie jílloatimiéna onóñede, aillo comíni dínomo íllaza. Ua Jesús jae jáideza.

14 Afe mei Jesús gairiraco eromo íena baizájillano daide:

—Mai eroi. Birui jae jílloadio. Meine fiénidífueña finóñeno iri, jamánomo figóñede raa omo jíriñeillena, —daide.

15 Iemo afémie judíuaimo Jesús íena jílloatimie lluájide.

16 Ie jira judíuai Jesuna duere finóllena racádíaioi; íena fáiacadíaioi, ocózinallarui aféfuai ínúa jírai.

17 Mei Jesús íaioina daide:

—Cue Moo Juzíñamui jaca nanómona biruimo táijide, jira cue nane táijidicue, —daide.

18 Iemona judíuai jamánomo íena fáiacadíaioi; nibai ocózinallarui ocuícáfue afémie jáanote. Ie emódomo afémie Juzíñamui izóidimiéna dama finótate, “Juzíñamui cue Moo” ie daina jira.

Juzíñamui Jitó ríino

19 Ie mei Jesús íaioina daide:

—Uáfueña ómoína dáititue, mei Juzíñamui Jitódicueza, dama cue jítaina izói minícana finónidicue. Dama cue Moo Juzíñamui finócafue cue ciona izói birui finódicue. Nana cue Moo finócafue afe izói nana finofiredicue; ie Jitódicueza.

²⁰ Ua Moo Juzíñamui nana ie finuafue ie Jitomo ácatate, Moo ie Jitó izíruilla jira. Ie emódomo jamánomo áillue finóllifue íemo ácataite, omoi fáigacaillena.

²¹ Mei Moo Juzíñamui tíidino cáadinona itátateza, ua cáallinona íaioimo ite; daje izói ie Jitó nana afémie oíacaiganomo cáallinona ite.

²² Moo Juzíñamui buna jicánoñede íena duere finófallena, mei íadi nana afe jicánolle ríino ie Jitomo iga.

²³ Daií nana comíni Moo ñue jacíruilla izói, afe izói ie Jitona ñue jacíruiítiaioi.

²⁴ Uáfueña ómoína dáititue: cue uaina cacádimiemo, dáanomo cuena orédimiena ínotimiemo ja ziiño cáatatinona ite. Afémie duere finóbiñeite, tíllanomonona ja bai finona jira; jae cáananomo dúcide.

²⁵ Uáfueña ómoína dáititue: tíidino meine cáailirui áinozioicaide. Aferui birui. Ua tíidino Juzíñamui Jitó úrillana cácaítiaioi; íemona nana afena náfuefiredino cáaitiaioi.

²⁶ Mei Moo Juzíñamui cáatalle ríino íteza, daje izói afe cáatalle ríino ie Jitomo afémie itátate.

²⁷ Dáanomo comíni duere finóllena jicánua ríino íemo iga, afémie Nanoide íima Jitona jira. Afe Jitódicue.

²⁸ Afemo fáigacaíñeno iri. Nana tíidino cue úrillana cacáailiruiemo dúciíteza.

²⁹ Aféruido raiáfuaímona jino bíítiaioi. Ñúfue finódimaci meine cáadinona íítiaioi zííñona íaioi íllena; mei íadi fiénidifue finódimaci meine cáadinona íítiaioi, duere íaioi finóbillena.

Jesús ríino uáfueña daiítatífuaí

³⁰ Dama cue comeci izói minícana finónidicue. Moo cue ocuilla izói comíni finuafuaí ríire jicánoticue. Cue jicánuafe jaícina ñue joide; cue jítaina izói jicánoñedicueza, mei íadi cue orédimie, cue Moo jítaina izói jicánoticue, afe izói finóllena.

³¹ Dama cueri uai cue nabáiadi, cue dáinana figo uáfueña daiíñede.

³² Mei íadi jíaimie cueri uai nabáiraíma ite. Afémie cueri dainafue ñue uáfueña facátate. Afena onódicue.

³³ Juamo jicánuaídiomoi. Afémie ie uai úana jaca uafue.

³⁴ Mei íadi íimamona cueri uai nabáíllana jicáñedicue. Daa bíena dáititue omoi jíllobicaillena.

³⁵ Juan egáiñora izóidimie. Afe egáiñora bóocabillamona egáiñofiredede. Ie egáiñuanomo nano íanori íllamona íóbicaídiomoi.

³⁶ Mei íadi jíaie cueri uáfueña facátafue ite. Afefue Juan cueri dainafue baímo ite. Afe uáfueña facátafue cue finócafuaí. Aféfuaí cue Moo cue finóllena ocucafuaí daje izói jóoideza. Afe jira afe cue finócafuaí Moo orécacue uáfueña facátate.

³⁷ Ie dáanomo Moo, cue orédimie cueri uai nabaide, mei íadi omoi ie uaina jaca cacáñediomoi; ie abi cíocailana jaca cíóñediomoi.

³⁸ Ie uailai omoi ífócimo déíñede, afe Moo orécamienna omoi íinoñena jira.

³⁹ Juzíñamui Cuegáuailai izire jenoda facádotiomoi; dinomo “Zííñona íllino báititai” comécimo facáoidiomoi. Uafue, Cuegáuailai cueri ñue úritiaioi,

⁴⁰ mei íadi cuemo bíacañediomoi afe ómoimo zííñona íllena.

41 Comini cuemo nitáacaga jalléinafuiai náfuēñedicue.

42 Mei íadi ómoína onódicue. Juzíñamuina izíruiñediomoi onódicueza.

43 Cue Moo cue ória jira biticue, íadi cuena llínoñediomoi. Jiámie dama ie ória izói bíadi afe íimana ñue llínoitiomoi.

44 ¿Omoi ñie izói ñnotiomoi? Dani ómoimona cáimadua uallai llínofirediomoi; mei íadi daade Juzíñamuimona bitíuai, ie cáimadua uai jenoñediomoi. Jira ñnonidiomoi.

45 Cue Moo uiecori ómoimo fiénidífue cue nitale comécido facáoñeno iri. Uafuena Moisés ómoimo fiénidífue nítaite, nii omoi úiñogamie.

46 Moisés daináuai omoi ínoiadi daje izói cuemo ínoitiomoi, mei Moisés cueri ñue cúeteza.

47 Mei íadi afémie ciegáuai omoi ínoñeniadi ¿ñie izói ómoína cue daináfuenta ínoitiomoi? ¡inoñeitiomoi! —daide.

6

Jesús cinco mil íñiaí ecade

(Mt 14.13-21; Mr 6.30-44; Lc 9.10-17)

1 Afe meífodo Galilea jorai ruícaferaimo jaide. Afe jorai jiáfodo mameina: Tiberias.

2 Aillo comini íedo jáidiaioi, cíofinina ráaniai ie fínuaana íaioi ciónamona. Ua iráredino jíllostana cíodiaioi.

3 Ie mei Jesús ídumo ráiizaide ie llófuegamaci diga.

4 Ja judíuai rafue páscuaíue áinozide.

5 Jesús érocaillano aillo afémie óodana bitínona ciode. Jira Felípena daide:

—¿Ninómona nana bimaci ecállena íbaitícai? —daide.

6 Afe daí jicánote, Felipe uai úana onóillena. Jesús dama ie finóllífue ñue onode.

7 Iemo Felipe uai ote:

—Doscientos dígabe fidí pan dúciñeite naga come jéenino óllena, —daide.

8 Ie jira jiáie llófuegamie Andrés, Simón Pedro ama, Jesuna daide:

9 —Benó daa dúemiemo cinco diga panes ite mena chamu diga. (Bie pan cebada finoína.) Mei íadi iere duera; aillo comini íllaza, —daide.

10 Ie mei Jesús daide:

—Nana íaioi ráiilleza afémacina omoi daíri, —daide.

Aféno mo aillo raitire ite. Iemo cinco mil íñiaí raizídaitiaioi.

11 Ie mei Jesús pan llínota Juzíñamuina “Iere figura” daide.

Dáinamona llófuegamacimo fecade. Afemona llófuegamaci nana ráiiedinodo fecade. Jesús daje izói finode mena chámuna, ua nana ráiacadinodo fecade.

12 Jae íaioi jeírilla mei ie llófuegamacina daide:

—Fiébidinuíai nana iráiri, daa báiiñelleza, —daide.

13 Fiébidinuíai doce diga cirigai iráica. Ua cinco diga panes fiébidinomona diga cirigai oruítaga.

14 Ie mei comini bie cíofinina raa Jesús fínua ciónamona daidíaioi:

—Uafue bímie afe jaiái nanómona lloga ana éñiemo bíacade uai lloraíma, —daidíaioi.

15 Mei íadi comini íena riire lláitano illáimana jóneacana Jesús fidíbicaide. Fidíllanona Jesús dama meine idu caifónedumo jaide.

*Jesús jainoi emódodo macade**(Mt 14.22-27; Mr 6.45-52)*

¹⁶ Ja nauídemmo Jesús llófuegamaci ana jóraimo jáidiaioi.

¹⁷ Dúciillano nocaemo jaillano, jorai ruícaferaimo Capernaúmo jaitádiaioi. Jae jíitredemmo, mei íadi nai Jesús meíne abído bíñede.

¹⁸ Iemo aillo jairifo daingo náidacaide. Iemona bagua móonaioicaide.

¹⁹ Due bai jáidiaioimo Jesús nocaemo áinozillana ciódiaioi. Jainoi emódodo macade. Iemo jacíruiúiaioi.

²⁰ Mei jira íaioina daide:

—Cueza, omoi jacíruiñeno, —daide.

²¹ Iemona caimare nocaemo íena llínotiaioi. Iemona íaioi jáillinomo nitaca izóí jarire dúcíaioi.

Comini Jesús jénua

²² Jáírui meífodo jorai enéferaimo fiébidimaci, llófuegamaci daa ite nocaedo jáillana fidídiaioi. Iadi Jesús afémaciri jáiñede.

²³ Mei íadi biruícana jáíe nocáiaí Tiberias jófueмона dúcizaide. Ua pan güilla áinori Ocuíraíma Jesús “Iere figura” dáinamona, ua afénomo dúcizaidiaioi.

²⁴ Daií Jesús dinomo íñénana cióillano íe llófuegamaci diga, afécaiaímo jofó jáidiaioi. Iemona Capernaúmo íena jénuaidiaioi.

Jesús, zíñona cáaille paana maméidimie

²⁵ Jorai ruícaferaimo dúciillano, Jesús baitíaioi. Baillano íena jícanotiaioi:

—Llófueraíma ¿niruido benomo dúcídío? —daidíaioi.

²⁶ Jira Jesús daide:

—Uáfuenta ómoína dáititue, güllena omoi jeírillamona cuena jénuaibitíomoi. Cue finoca ciófinina raa omoi onónamona cuena jenóñediomoi.

²⁷ Fúifrede güllemo táijiñeno iri. Mei íadi fúíñeite güllemo táijiri. Afe güille ómoína zíñona itátaite. Afe bie güille ómoimo íititue mei Nanoide fima Jitódicueza. Mei ua, omoi uáfuenta ínogamiéna jae Moo Juzíñamui jóonegacueza.

²⁸ Jira jícanotiaioi:

—¿Minícana finoitícaí Juzíñamui jitaille raa cai fuitállena? —daidíaioi.

²⁹ Jesús uai ote:

—Juzíñamui orécamiéna omoi íñollena jítáirede, —daide.

³⁰ Iemo jícanotiaioi:

—¿Minica onótaite raa caimo ácataredío, afe cióillano ona cai íñollena? ¿Minícafue finoitío?

³¹ Cai jáiáidígima zaféredizicimo maná güitíaioi; Juzíñamui Cuegáuai daina izóí: “Juzíñamui monámona ana baiítaga gülleníai áfena íaioi güitátate,” —daide.

³² Jesús uai ote:

—Uáfuenta dáititue: monámona baiide gülleníai fecáraíma Moiséñede. Mei íadi uáfuenta monámona baiide gülleníai fecáraíma cue Moo.

³³ Juzíñamui fecaca gülleníai, monámona ana bitímie. Afémie cáaille paana maméidimie. Afémie ínie íitímacimo zíñona cáallinona itátaite, —daide.

³⁴ Iemo íena daidíaioi:

—Ocuíraíma, bie gülleníai nágarui cai íne, —daidíaioi.

³⁵ Jira Jesús daide:

—Cue cáatate güilledicue. Cuemo bitímie jaca júfiruñeite. Cuemo ñnotimie jaca ninomo jíroacañeite.

³⁶ Mei íadi ómoína cue daína izói, cuemo ñnoñediomoi nai cuena ciódiomoi íadi.

³⁷ Nana Juziñamui cuemo fecácamací cuemo bífireitiaioi. Cuemo bífireitinona jino dótañeiticue.

³⁸ Uafue, cue comeci jitaina izói finóllena, monámona ana biñédicue, mei íadi cue orédimie comeci jitaina izói ana fñuaibiticue.

³⁹ Cue Moo, ua cue orédimie, nana cuemo igánomona buna oni ninó báññeillena jítaide. Ua nana afémaci írairuido cáadinona itátaiticue.

⁴⁰ Cue orédimie nana Juziñamui Jitona ciódimaci íena ñnollena jítaide. Daií íaioi ñnuamona zíñona cáaillinona íaioimo íllana cue orédimie daje izói jítaide; ie mei írairuido cáadinona íaioina itátaiticue, —daide.

⁴¹ Iemona judíuai Jesuri gugúritiaioi. Ua ie daínáfuerei: “Monámona ana bañde gülleniaina maméidimiedicue” íeri gugúritiaioi.

⁴² Daidíaioi:

—¿Bímie José jító Jesúñede? Ie moona onódicai ie ei diga. ¿Ñie izói “Monámona ana bitímiedicue” daiírede? —daidíaioi.

⁴³ Jira Jesús íaioina daide:

—Gugúriñeno.

⁴⁴ Buna cuemo bínide, cue Moo, cue orédimie nai átíñenia. Ie mei írairuido afémiena cáadimiena itátaiticue.

⁴⁵ Uai lloraini cuegoñicuai llote: “Nana afémaci Juziñamui llófuegamaciza íitiaioi.” Daií nana Moomo cacádino, afémiemona fibítagamaci cuemo bitíaioi.

⁴⁶ Bie izói cue daína dáarie Moo Juziñamuina ciona daiíacañede. Dama Juziñamuimona bitímie Moona ciona.

⁴⁷ Uáfueña ómoína daíticue: cuemo ñnotimiemo zíñona cáaillinona ite.

⁴⁸ Cue cáatate güilledicue.

⁴⁹ Omoi jáiairagima zaféredizicimo manana güitíaioi, mei íadi nana jae tíidimaci.

⁵⁰ Íadi cue daína monámona ana bite güilledicue güitino tíñeitiaioi.

⁵¹ Cue dama afe bie monámona ana bite cáatate güilledicue. Bie güille güitímie zíñona iite. Bie cue ille güille dama cue íeizi. Afena íiticue nana énie imaci cáallena, —daide.

⁵² Iemona judíuai dani íaioiri júfidotiaioi. Daidíaioi:

—¿Ñie izói bímie dama ie íeizina caina écaite? —daidíaioi.

⁵³ Jesús íaioina daide:

—Uáfueña ómoína daíticue: Nanoide fima Jitódicueza; cue íeizi omoi ríñeniadi, daje izói cue die omoi jíroñeniadi nai omoi cáaillinona íñede, dájena cuemo jaináññena jira.

⁵⁴ Cue íeizi ritímie, daje izói cue die jiródimie comeci zíñona cáaillinona ite; ie mei írairuido afémiena cáadimiena itátaiticue.

⁵⁵ Cue abi uafue güille. Cue die uafue jirólli.

⁵⁶ Cue íeizi ritímie, jái cue die jiródimie ja cuemo dájena ite. Daje izói afémiemo dájena íticue.

⁵⁷ Cue caade Moo orécacue, jira afémiedo cáadicue; daje izói cue rítimie cuedo cáaite.

⁵⁸ Monámona ana bite gülleri úriticue. Bie güille omoi jaiáidigima güiga maná izóifede. Nana afémaci tíidimaci; mei íadi bie güille güitímie zíifona iite, —daide.

⁵⁹ Jesús Capernaúmo ite Juzíñamui uai llófueriracomo nana bífuiai íaioimo llófuete.

Zíifona cáatate uailai

⁶⁰ Bie llófuiana cacáillamona, aillo Jesudo jáidimaci daidíaioi:

—Bie afémie daina afe jeire ollíuai iere féirede. ¿Bu áfena jeire órena? — daidíaioi.

⁶¹ Iemona Jesús íaioi gugúrillana onóbicaide. Onóillano jicánote:

—¿Aféfuiai ómoina íairuificaitade?

⁶² Ie mei Nanao íima Jitó nano ie illánomo caifo ie jáillana omoi cióadi, ¿nie izóí ítiomoi?

⁶³ Cai joreño cai cáatate. Íeizi cáatañede. Omoina cue daináuailai joreño izoide uafue uailai. Cáataitaioi.

⁶⁴ Mei íadi ómoimona dámierie nai íinoñediaioi, —daide.

Jesús afe íinoñedimaci nanómona onode. Afe llezica íena éoidimacimo fécaitimiena onode.

⁶⁵ Ie mei daide:

—Íemona ómoina dáitícue, Moo átiñenia buna cuedo bínide, —daide.

⁶⁶ Aféruimona aillo Jesudo jáidino íena fiénocaidiaioi. Ja íedo macañediaioi.

⁶⁷ Ie jira ie doce díga llófuegamacimo jicánote:

—¿Omoi daje izóí jáiacadiomoi? —daide.

⁶⁸ Mei íadi Simón Pedro uai ote:

—Ocuíraíma, ¿bumo jáiredicai? Zíifona cáatate uailai omo ite.

⁶⁹ Ja cai ínoticaíza. Onódicai caade Juzíñamui Jitódioza. Crístodio, —daide.

⁷⁰ Jesús íaioina daide:

—Jae doce dígamie nizédicue; mei íadi omoi cígimona dámie Taife izoide, —daide.

⁷¹ Afe dainado Jesús Júdari úrite. Judas Iscariote Simón jitó. Afémie Jesuna éoidimacimo fécaitimie, mei íadi afémie doce dígademona.

7

Jesús ámatiai íena íinoñediaioi

¹ Afe méifodo, Jesús Galilea éniado macade. Judéamo íacañede, dinomo judíuai ie íaioi fáiacana jira.

² Ja bizáinillaimo iráizillafue ánozide. Afefue judíuai rafue.

³ Ainozillamona ie ámatiai íena daide:

—Benó fiébiñeno. Judéamo o jairi, dinomo ite odo jáidino o finócafueña cíoillena.

⁴ Dámie nana comini íena íaioi onóillena jitáidi, ie raana báinino finóñede. Afe áillofuiai o finóadi nana comini uícomo finori, —daidíaioi.

⁵ Bie izóí daidíaioi, mei nai ie ámatiai íena íinoñediaioiza.

⁶ Jira Jesús daide:

—Cue ñue illíruimo nai dúciñede. Mei íadi ómoimona nano nígarui ñuera.

⁷ Enie imaci ómoina éoinide, mei íadi cuena éoidiaioi, nibai íaioi fiendi finócafuiiai uai nabáiraímadicueza.

⁸ Mai ráfueo omoi jai. Nai jáiñeitícue, cue ñue illíruimo nai dúciñede.

⁹ Daí daina mei Galiléamo fiévide.

Jesús bizáinillai irázizillafuemo jaide

¹⁰ Ie ámatiai jailla mei, Jesús daje izói ráfue mo jaide, mei íadi uáfodo jáiñede. Jabo báinino jaide.

¹¹ Judíuai afe rafue ana íena jenódiaioi. Daidíaioi:

—¿Ninomo mei afe iima ite? —daidíaioi.

¹² Comíni cígiedo aillo afémieri úritiaioi. Dáarie, “Ñúemie,” daidíaioi. Jáimaci, “Fiénidimie; mei comínina jífujeteza,” daidíaioi.

¹³ Mei íadi judíuaina jacíruillano buna afémieri uáfodo úriñede.

¹⁴ Ja rafue cigi iruido Jesús Juzíñamui gairíracomo jofo jaide. Jaillano dínomo llófuellena tainede.

¹⁵ Iemona judíuai fáigacaillano daidíaioi:

—¿Nie izói bie iima diga ráfuaiaina onode, afémie nai llófueñegamo? —daidíaioi.

¹⁶ Jira Jesús uai ote:

—Cue llófuegauai cúeieñede; mei íadi cue orédimie ie.

¹⁷ Dámie Juzíñamui jitailla izói finóacania, afémie cue llófuegauai Juzíñamuimona bitúuaina ónoite. Afe llezica dama cue jitailla izói llófueñedicuena ónoite.

¹⁸ Dama ie comeci jitailla izói úritimie, comíni íemo ñúefuena nitállena úrite. Mei íadi íena orédimie mo ñuera ráfuena nitácadimie uáfueña dáite. Afémie mo jífuafuena iñede.

¹⁹ ¿Omoimo ocuica uailai Moisedo ómoimo iga? ¿Ero ua? Mei íadi buna ómoimona aféuai jeire oñena. Aféuai jeire oñédimiedicue izói, ¿nibái mei cue fáiacadiomoi? —daide.

²⁰ Jira comíni uai ote:

—Omo fiénide jóriai illa. ¿Bu o fáiacana? —daidíaioi.

²¹ Jira Jesús daide:

—Daa raa ocózinaillarumo cue fínuari nana fáigacaidiomoi.

²² Mei íadi úrue bacano ícoi quétajana facátafue Moisés ómoimo iga. Jira íiza bacano ícoi quetádiomoi ocózinaillaruido íadi. (Moisés afefue táineñegaza; jáiairagimaci taineca.)

²³ Mei jira Moisés ocuica uailai nana ñue fuizáillena, íiza bacano ícoi omoi quetáadi ocózinaillarui íadi, ¿nibái ríicaidiomoi iima abi námiena cue jíllotaia ocózinaillarumo?

²⁴ Mai jinófene éroillano comíni ifue nitátañeno. Omoi nitáadi jáicina uáfueña nitari.

Jesús ie comuñllanodo úrite

²⁵ Ie mei Jerusalemo dáarie itínomona jícanuaidiaioi:

—¿Bímie íaioi fáiacagamiñede?

²⁶ Mei íadi batínomo comíni cígimo úrite íadi buna nie izói daiñfena. ¿Uáfueña caifóidimaci bímie Crístoza ínotiaioi?

²⁷ Mei íadi cai, afémie ninómoma ie bíllana onódicai. Iadi íbana Cristo bíadi, buna ninómoma ie bíllana ónoñeite, —daidíaioi.

²⁸ Afena cacáillano Jesús nai gairíracomo llófuia llezica riire daide:

—¿Cuena onódiomoi? ¿Ninómoma bitícueza onódiomoi? Mei íadi dama cue comeci izói bíñedicue, íadi caade cue orédimie mo biticue. Afémie jaca íitímie. Afémiena onóñediomoi.

²⁹ Afémiena onódicue, afémie mo bitícueza, ie orécacueza, —daide.

30 Iemona íena lláviano úiacadaíoi. Mei íadi nai buna íena llaitáñede, nai ie llaitáilliruimo dúciñe deza.

31 Mei íadi aillo comini íemo ínotiaíoi; daidíaioi:

—Cristo bíadi ¿bímie finoca cíofinina onótaiuai baimo fñoite? —daidíaioi.

Fariséuai llazíriraini orede, Jesús lláviano úillena

32 Fariséuai comini Jesuna dainana cacadaíoi. Jira lletáriraini illaini, gairíraco jabóidillaímaíai orede Jesús llaitada úillena.

33 Jira Jesús uai ote:

—Omoi cígiri dama íanori nié dino íitícue. Ie méifodo cue orédímie diné jáitícue.

34 Cuena jénoitiomoi mei íadi cuena báíñeitiomoi, cue illínomo jáinidiomoíza, —daide.

35 Ie mei judíuai dani íaíoi jicánuaidiaíoi:

—¿Bímie ninomo jáite, íena cai báíñeillena? ¿Judíuai júdaicamací griego éniemo afémie jáite, griego imaci llófuellena?

36 Ie dainana, “Cuena jénoitiomoi mei íadi cuena báíñeitiomoi, cue illínomo jáinidiomoíza,” ¿nie izóí daide? —daidíaioi.

Jesús, jáinoi izóí cómena cáatate

37 Rafue íirairuimo jamánomoidíruí. Aféruído Jesús naidáillanona como aillo uaido úrite:

—Nana jirócadímie cuemo bi; júraíbi.

38 Cuegáuai daina izóí, cuena ínotímie ie comécimona áillue imani tua izóí aillo ñue cáataitífuíai bíite, —daide.

39 Aféruído nana afémiena ínotino Ñuera Joreño llínoitiaíoi daide. Ua mei, Ñuera Joreño nai bíñede, Jesús ie cáimafue ebíredí fue diga nai llínoñena jira.

Comini Jesuna daináfuíai jáífordorie jóide

40 Dáarie comini cígimona aféfuena cacáillano daide:

—Uáfuena bímie uai llóraíma, jáíai ninomo bíacadímie, —daide.

41 Jáíimaci daidíaioi:

—Bie ua Cristo.

Mei íadi jáíimaci daidíaioi:

—¿Nie izóí Cristo dino Galilea ímieite?

42 Cuegáuai llote: “Jáíaidillaíma David, ie izíe ímieina Cristo íite. Ua Belén ímieina íite, afe jófuemo nauí David íteza,” —daidíaioi.

43 Daíí nana comini Jesús ícoínia dázierie bózietaidiaíoi.

44 Dámierie Jesús maíáno úiacadaíoi, mei íadi buna daíí ñeñena.

Caífoide ríiredíno Jesuna íñoñediaíoi

45 Gairíraco jabóllaini abido fariséuai illánomo, daje izóí lletáriraini illaini illánomo bitíaíoi. Afémaci íaíoi jicánote:

—¿Níbái mei íena atíñediomoi? —daide.

46 Jira jabóllaini (jáíifodo mameina llavériraini) uai otíaíoi:

—Jaca ninomo buna afémie úrilla izóí úríñede, —daidíaioi.

47 Jira fariséuai daidíaioi:

—¿Omoi daje izóí ja jífuegamacidiomoi?

48 ¿Cai illáícomini dáarie íena ja ínotiaíoi fariséuai diga? ¡Jaca íñoñediaíoi!

49 Mei íadi bie comini ocuícáfuaíai onóñediaíoi, ja faidócaíaióiza, —daidíaioi.

⁵⁰ Nicodemo, naio Jesumo eróizaitimie daa fariseo imácimona. Iaioina daide:

⁵¹ —Cai ocuícafue daina izói buna duere finónidicai, nano fueñe íena cai cácañeniadi, ie finócafuea cai ónoillena, —daide.

⁵² Mei jira uai otíaiói:

—¿O jái daje izói Galilea ímiedioza? Cuegáuai fácado. Dinomo cíoitio buna uai llóraima Galiléamona biñede, —daidíaiói.

Jirúredingo Jesumo atídíaiói

⁵³ Mei íemona naga come íaiói jofomo jaide.

8

¹ Mei íadi Jesús Olivo daina ídumo jaide.

² Ie jítiramo monáillamona, abido gairíracomo bite. Nana comini íemo áinozidíaiói. Afémie ráinaillano íaioina llófuiaide.

³ Ie mei ocuícafue llófueraíni fariséuai diga jirúredingo Jesumo atídíaiói. Daií ñécade afengo baitíaiói. Afe gairíracomo itímaci cígímo aféngona jóonetiaíói.

⁴ Jóoniano Jesuna daidíaiói:

—Llófueraíma, bie ringo afe jiruírenafue finócade baiticai.

⁵ Afe izoide ringona Moisés ocuícafue cai ocuide noficiaído fállena. ¿O ñie izói daidío? —daidíaiói.

⁶ Daií daidíaiói Jesús facátallena. Bie facátamona fiénidifue íemo nitáacadiaíói. Iemona Jesús jíjicaillano éniemo onócaído cuete.

⁷ Mei íadi diga icaíño jicánotiaíoiimo Jesús meine jaícina rainade. Ráinaillanona daide:

—Omoimona dáamie fiénidifuea iñédímie, mai nanoide nofici aféngomo nitari, —daide.

⁸ Dáanomo nane jíjicaillano éniemo cuete.

⁹ Mei íadi aféuena cacáillano, nana íaiói comeci úrilla uaido méaicaidíaiói. Méaicaiillano oni nana dáarie jáioidiaíói. Ua iere éicomedímie uícodo oni jailla. Nana ja íaiói jailla mei, Jesús dama dinó fiébide afe atícango diga.

¹⁰ Iemo Jesús jaícina meine rainade. Afe ringo baímo buna cíóñenano aféngona daide:

—Ringo, ¿ninomo omo fiénidifue jítádino ite? ¿Buna omo nofícina nitáñena? —daide.

¹¹ Jira afengo daide:

—Ocuíraíma, ua buna nitáñede, —daide.

Mei jira Jesús daide:

—Cue ona daií nitáñeitícue. Mai o jairi. Fieni meine abido daií ñeñeno iri, —daide.

Jesús, bie énie comini egáñoraíma

¹² Jesús dáanomo nane comínimo úrite; daide:

—Cue bínie comini egáñoraímadícue; cuedo jáitimíemo cáataite egáñua iite. Jaca nino jítifodo mácañeite, —daide.

¹³ Ie jira fariséuai íena daidíaiói:

—Dama o uai nabáidío. Afe uai ráifiñede, —daide.

¹⁴ Jira Jesús uai ote:

—Cue daina uáfueña ráifide, afe dama cuemo uai nabáidicue íadi. Cue ninómona biticue, daje izói cue jáillinona onódicueza. Mei íadi ninómona bitícueza onóñediomoi, cue jáillinona diga.

¹⁵ Bie énie facárado jenócana facáidomoi; cue buna jenócana facáñedicue.

¹⁶ Mei íadi cue facáadi, cue facállifue jaícina ñue jóide. Dama facáñedicueza. Moo, cue orédimie diga dáanomo jenoda facádicoco.

¹⁷ Omoi ocuica cuezáuai daide: “Mena uai nabáiraima dáanomo daííadi, aféfuena ínoitiomoi.”

¹⁸ Cue dama cueri uai nabáiraimadícue. Cue Moo, cue orédimie jáie cueri uai nabáiraima, —daide.

¹⁹ Jira jicánotiaioi:

—¿Ninomo mei o Moo ite? —daidíaioi.

Jira Jesús uai ote:

—Omoi cuena onóñediomoi. Daje izói cue Moona onóñediomoi. Cuena onódiomoi nia, daje izói cue Moona onódiomoi za, —daide.

²⁰ Gairíracomo llófuia lezica, afe bíuai daide; ua fia fecaca úcube jóoneraco illánomo dínomo llófue. Mei íadi buna íena lláviano uñede, ie llaitáilliruimo nai dúciñena jira.

Cue jáillinomo jáinidiomoi

²¹ Jesús nane dáanomo íaioina daide:

—Cue jáiticue. Cuena jénoitiomoi, íadi omoi fiénidifue nai doñégamo tíitiomoi. Mei jii cue jáillinomo omoi jáinidiomoi za, —daide.

²² Jira judíuai daní conímama daidíaioi:

—¿Mei níbai afémie dama abi títaite, mei “Cue jáillinomo jáinidiomoi” afémie caina dáideza? —daidíaioi.

²³ Jira Jesús íaioina daide:

—Omoi ana bebeco iéidomoi, mei íadi cue caifófeco ímiedicue. Omoi bie énie iéidomoi, mei íadi cue bie énie ímieñedicue.

²⁴ Ie jira omoi fiénidifue nai doñégamo tíitiomoi daidicue. Cue daina izói íimiedicuena omoi ínoñeniadi, omoi fiénidifue nai doñégamo tíitiomoi, —daide.

²⁵ Jira jicánotiaioi:

—Mei ¿o búdio? —daidíaioi.

Jira Jesús uai ote:

—Jaiái nanómona ómoimo lloticue.

²⁶ Cuemo aillo ómoina cue daiíllifuiái ite. Daje izói aillo ómoina cue jenoda facállifuiái ite. Cue orédimie uáfueña daide. Afémiemona cue cacana izói bie énie cominina áfedo daidicue, —daide.

²⁷ Mei íadi Moodo íaioimo Jesús úrillana figo cacáñediaioi.

²⁸ Jira Jesús íaioina daide:

—Enie acónimo cuena caifo omoi raiñóadi cue daina izói íimiena ónoitiomoi, mei Nanoide fima Jitódicueza. Afe lezica dama cue comeci izói finóñidicueza ónoitiomoi. Dama cue Moo cuemo llogáfuiái daidicue.

²⁹ Cue orédimie jaca cue diga ite. Cue Moo dama cuena fiéñede, afémie ióbitadifuiaina finofredicueza, —daide.

³⁰ Jesús daí dánamona, aillo íena ínotiaioi.

Juzíñamui jitóniai fiénidifuedo jeruícamaci baimo ñue itíaioi

³¹ Afemona judíuaimona íena ínotinona Jesús daide:

—Cue ómoína dáinana omoi jaícina jeire oíadi, cue llófuegamacina uáfuenta jaítiomoi.

³² Te mei uáfuenta ónoitiomoi. Afe uáfuedo jéruiñegamacina ítiomoi, —daide.

³³ Afémaci ie uai otíaioi:

—Abraham iziedicai. Jaca ninomo buna jéruiñegamacidicai. ¿Nie izói, jéruiñegamacina íticai, daidíio? —daidíaioi.

³⁴ Jira Jesús daide:

—Uáfuenta ómoína dáitícue, nana fiénidifue finódimaci fiénidifuedo jeruicamacai.

³⁵ Jeruicamie ie naama izíe diga jaca ínide. Mei íadi naama jitó aféziemo jaca jainaide.

³⁶ Daií mei Juziñamui Jitó jeruñenafue ómoimo fecáadi, uáfuenta jéruiñelliomoi.

³⁷ Abraham izíe iédiomoiiza ja onódicue; mei íadi cuena fáiacadiomoi, ómoína cue daináfuenta omoi llínoñena jira.

³⁸ Cue Moo cuemo ácataga raado úritícue. Omoi moo daina izói finófirediomoi, —daide.

³⁹ Jira uai otíaioi:

—Cai moo Abraham, —daidíaioi.

Mei íadi Jesús daide:

—Uáfuenta Abraham jitóniaina omoi íadi, afémie fínua izói fínnoitiomoi.

⁴⁰ Mei íadi Moo Juziñamui cuemo lloga uáfuenta ómoína cue daina íadi, nai cuena fáiacadiomoi. Abraham jaca daií finóñede.

⁴¹ Omoi moo fínua izói finódiomoi, —daide.

Jira afémaci daidíaioi:

—Jaca jiruñenamona jócoñegacai. Caimo daade moo illa, Juziñamui, —daidíaioi.

⁴² Jira mei Jesús daide:

—Juziñamui uáfuenta omoi módenia, cuena izíruiomoi, mei Juziñamui mona cue billa jira. Ua ie jira benó itícue. Dama cue comeci izói biñédicue, mei íadi Juziñamui orécacue.

⁴³ ¿Níbái mei cue dáinana cacánidiomoi? Cue úrilla uaina cacáacañediomoi, jira onóñediomoi.

⁴⁴ Omoi moo Taife. Ie jira afémie iédiomoi. Afémie jitaina izói finóacadiomoi. Taife jaca nanómona fáfredimie. Jaca uáfue mo jaináñede. Jaca uafue daiñede. Táinofuiai afémie lloíadi, ie illa izói úrite. Afémie táinofuiairede, ua táinofuiai moo.

⁴⁵ Mei íadi uafue daidícue mo cuena ínoñediomoi.

⁴⁶ ¿Omoimona bu cue fiénidifue jino due ciotarede? Uáfuenta cue daiíadi ¿nibái mei cuena ínoñediomoi?

⁴⁷ Juziñamui iédimie Juziñamui uáillaina cácafiredi. Mei íadi Juziñamui íeñediomoi, ie jira íena cacáacañediomoi, —daide.

Cristo Abraham nano jae itímie

⁴⁸ Jira judíuai íena daidíaioi:

—Omo fiénide joreño íllana onódicaiza; íemo Samaria ímiena o íllana, onódicaiza, —daidíaioi.

⁴⁹ Jesús uai ote:

—Cuemo fiénide joreño jaca íñede. Cue finócafue cue Moomo ñúefuenta nitade. Omoi cuemo ñúefuenta nitáñediomoi.

⁵⁰ Cuemo ñúefuena nitállena jenóñedicue, íadi jiáimie ite cuemo ñúefuena nitállena. Afémie jenoda facade.

⁵¹ Uáfueña ómoina dáititue, cue daináfueña jeire otímie jaca ninomo tíñeite, —daide.

⁵² Jira judíuai uai otíaiói:

—Fiénde jóríai omo íllana ja uáfueña onódicai. Abraham jaiái tíide naa uai llóraini diga, niadi jiáifodo daidío: “Cue dainana jeire otímie jaca ninomo tíñeite.”

⁵³ ¿Uáfueña cai moo Abraham baimo jáidío? Afémie tíide. Ua uai llóraini daje izói tíidiaíói. ¿O comécimo bu o íllana facádío? —daidíaiói.

⁵⁴ Jesús dinena íaióimo uai ote:

—Dama cuemo ñúefuena cue nitáadi, cue ñúefuena minícana ráifiñede. Mei íadi ñúefuena cuemo nitádimie cue Moo. Dáamiena omoi Juzíñamui daidíomoi.

⁵⁵ Mei íadi íena onóñediomoi. Cue íena ua onódicue. Afémiena onóñedicue cue daiíadi, omoi izói táinofuairredimiena íitue. Mei íadi íena uáfueña onódicue. Ie dainana jeire oticue.

⁵⁶ O jaiáidigima Abraham cue illíruina cióacade áfemona ióbillena; áfena cióillano afémie iere ióbicaide, —daide.

⁵⁷ Jira judíuai Jesuna daidíaiói:

—Nai cincuenta fimona íñedio, ¿Nie izói “Abraham cuena ciode” daidío? —daidíaiói.

⁵⁸ Jesús uai ote:

—Uáfueña ómoina dáititue: Abraham nai íñeniadi cue iticue, —daide.

⁵⁹ Iemona noñiciai llánota Jesumo nitáacadaíaiói. Mei íadi afémie retáirillano gairíracomona jino jaide. Afémaci cigido jaillano finocaide.

9

Jesús uina cíoiñede jocócamie jíllotae

¹ Afénodo jaillano, Jesús uina cíoiñede jocócamiena ciode.

² Ie llófuegamaci íemo jícanote:

—Llófueraíma, ¿níbai mei bie íima uina cíoiñede jococa? Níbai ie moo fiénidifuiái ícoínia daií jococa. Níbai dama ie fiénidifue finua ícoínia daií jococa. ¿Bífuiaimona ní fue uáfueña? —daidíaiói.

³ Jira Jesús daide:

—Dama ie ícoíniañedeza, jíai ie moo ícoíniañedeza. Mei íadi afémiemo Juzíñamui finóllifue ñue jino ácatallena, daií íficaide.

⁴ Nai monana llezica cue orédimie tájinafue cue finua jítaíredeza. Ja nauilla llezica buna tájínide.

⁵ Nai bie éniemo cue illa llezica, énie comini egáíñotimiedicueza, —daide.

⁶ Afe daina méifodo, Jesús éniemo tuánote. Tuánogamona ja énie ídiaide. Afe tuánua ídiaidemona ota, uina cíoiñedimie uimo bitade.

⁷ Ie mei íena daide:

—Siloé jainoi ofillanomo jócuai, —daide. Afe Siloé mámece jino dobáiñua dibéneo “Orécañona” mameide.

Iemona uina cíoiñedimie ui jócuaide. Meine bítemo ja cíoiide.

⁸ Iemo ie abi comini, daje izói naui uina ie cíoiñenana ciódino diga daidíaiói:

—¿Bímieñede, níí ráicana úcube jícafiredimíñede?

⁹ Dáarie daidíaioi:

—Jii, níimie.

Jiáimaci dinena daide:

—Ieñede, mei íadi afémiena eroide, —daidíaioi.

Mei íadi afémie dinena dama daíi daide:

—Jii, níimiedicue, —daide.

¹⁰ Jira íemo jicánotiaioi:

—¿Nie izóí ja ciódio? —daidíaioi.

¹¹ Jira afémie uai ote:

—Afe iima, Jesuna mámeciredimie, ídiaidino finuano cue uimo bitade. Bítanona daide: “Siloé jainoi ofillanomo o ui jócuai.” Jócuaidicue. Iemona cue jócuaimona ciódicue, —daide.

¹² Jira íemo jicánotiaioi:

—¿Ninomo afe iima ite? —daidíaioi.

Iaioina daide:

—Íco mei, —daide.

Fariséuai jíllotaga uina cíoiñedimie jicánodoidiaioi

¹³ Iemo fariséuaimo nauí uina cíoiñedimiena uitíaioi.

¹⁴ Jesús ídiaidino finuaruí, afe ocózinallaruí. Aféruimo Jesús uina cíoiñedimie jíllotate.

¹⁵ Fariséuai afe ímana nie izóí afémie ui cíoinafue meine abido jicánotiaioi. Iemo afémie íaioina daide:

—Cue ui ídiaidinona bitade. Jira jócuaidicue. Iemona ja ciódicue, —daide.

¹⁶ Jira fariséuaimona dáarie íena daidíaioi:

—Afefue finódimie, Juzíñamui ímieñede, ocózinallaruína íñoñena jira.

Mei íadi jíaimíai daide:

—Afémie fiénidifue finóraíma íadi, ¿nie izóí bie cíofinina finócafue fínoite? —daidíaioi.

Comini bózietaillamona

¹⁷ meine nauí uina cíoiñedimie jicánuaidiaioi:

—¿O afémiena nie izóí daidío, o ui cíoitatimiena? —daidíaioi.

Jira afémie daide:

—Afémiena uai llóraíma daidicue, —daide.

¹⁸ Mei íadi judíuai afe uina cíoiñedimie finócafueña ínoiacañediaioi. Ie ja cíonafueña ínoiacañediaioi. Ie jira jíllotagamie móotíaina uáidotiaioi.

¹⁹ Iemo jicánotiaioi:

—¿Afe nii be o jíto uina cíoiñede jocócamie ómicoi daina? ¿Nie izóí mei biruí ciode? —daidíaioi.

²⁰ Ie móotíai uai ote:

—Onódicaiza bie cai jíto; uina cíoiñede jococa.

²¹ Mei íadi nie izóí afémie como cíónana onóñedicaí. Daje izóí bu ie ui jíllotana onóñedicaí. Afémiemo jícano. Jae eicómeza. Aféfuena onódeza. Afemona uai óite, —daidíaiillinoi.

²² Ie móotíai daíi úritiaillinoi judíuai jacínaillamona. Judíuai jae nana comini onótiaioi. Daidíaioi:

—Nágamiíai Jesús ua Cristo dainámiena mámeitimie Juzíñamui uai llófueriracomona jino jíuiticaí, —daidíaioi.

²³ Iemona móotíai daidíaioi, “Afémiemo jícano. Jae eicómeza.”

24 **Ie mei judíuái** meine nauí uina **cióiñedimiena** uáiduano **daídíaiói**:
 —**Juzíñamui** uíécomo uáfueña caina **daíri**. **Onódicaíza**, **bímie**
fiénidífuiaíredimie, —**daídíaiói**.

25 **Afémie** uai ote:
 —**Afémie** **nibái** figura, **nibái** **fiénidífuiaíredimie** **onóñedicueza**. **Daa** cue
onógafue. **Nano** fueñe uina **cióiñedimiedicue**, **mei** **íadi** **birui** **ciódicue**, —**daide**.

26 **Nane** **dáanomo** íemo **jicánuaidíaiói**:
 —¿**Nie** **izói** **ona** **ñete**? ¿**Nie** **izói** **o** **finode** **o** **ui** **cióillena**? —**daídíaiói**.
 27 **Jira** uai ote:
 —**Jae** **omoi** **lloticue**, **íadi** **cuena** **íinoñediomoi**. ¿**Nibái** **mei** **dáanomo** **omoi**
lloíticue? ¿**Omoi** **jáiá** **daje** **izói** **iedo** **jáiacadiomoi**? —**daide**.

28 **Báiñuano** íena **daide**:
 —**O** **bímiedo** **jáidio**, **mei** **íadi** **Moisedo** **jáidícaí**.
 29 **Juzíñamui** **Moisemo** **úrillana** **onódicaí**, **mei** **íadi** **bie** **Jesús** **ninómona** **bite**
onóñedicaí, —**daídíaiói**.

30 **Jira** **afe** **iima** uai ote:
 —¿**Bífue** **ní** **cácafinina** **raa**! **Ie** **billánona** **onóñediomoi**, **íadi** **cuena** **ñue** **cióitate**.
 31 **Fiénidífue** **ínofiredimacimo** **Juzíñamui** **cacáñede** **ñue** **onódicaíza**. **Iemo**
afémie **mo** **ióbicaitadinomo** **cacáfirede**, **ie** **jítáinafue** **finódimaci** **diga**.

32 **Jaca** **nanómona** uina **cióiñede** **jocócamie** **jíllotatímie** **dáinana** **cacáñena**.
 33 **Bímie** **Juzíñamuimona** **biñédeniadi**, **minícana** **ñénide**, —**daide**.

34 **Jira** **daídíaiói**:
 —**O** **fiénidífuiaímona** **jocócamiedo**. ¿**O** **caina** **llófueacadio**? —**daídíaiói**. **Ie** **jira**
íena **jino** **jiúnotíaiói**.

Joreño dibéfuaiaina onóñedimaci

35 **Jesús** uina **cióiñedimie** **jino** **íaiói** **jiúnuana** **fidide**. **Ie** **baillano** **íena** **daide**:
 —¿**Juzíñamui** **Jitomo** **ínotio**?
 36 **Jira** **afémie** **daide**:

—**Ocuíraíma**, **cuemo** **llone** **bu** **afémiena** **íemo** **cue** **íinolleza**, —**daide**.
 37 **Jira** **Jesús** uai ote:
 —**Ja** **ciódioza**. **Níimiedicue**, **o** **diga** **úrilla**, —**daide**.

38 **Iemona** **afémie** **Jesús** **anari** **ana** **dújuillanona** **daide**:
 —**Ocuíraíma**, **ínoticue**, —**daide**.
 39 **Ie** **méfomo** **Jesús** **daide**:

—**Bie** **éniemo** **biticue**, **jaícina** **jenoda** **facállena**. **Ua** **biticue** uina **cióiñedimie**
eróillena. **Dáanomo** **biticue** **eróidino** uina **cióiñellena**.

40 **Ie** **mei** **fariséuaimona**, **Jesús** **diga** **itínomona**, **dáamierie** **afefue** **cacáillano**
íena **jicánotíaiói**:

—¿**Meita** **cai** uina **cióiñedinodicaí**? —**daídíaiói**.
 41 **Jira** **Jesús** uai ote:
 —**Omoi** uina **cióiñeniadi**, **omoi** **fiénidífuiaí** **icoí** **íiñeite**. **Mei** **íadi** “**Ciódicaí**”
daídíomoi **jira** **omoi** **fiénidífuiaí** **icoí** **ite**, **mei** **joreño** **dibéfuaiaina** **onóñediomoiza**,
 —**daide**.

1 Uáfueña ómoína dáititue, ovejai cirínoraco nazedo jáiñedimie ua meríriraíma. Enéfenemo táifodo tícaillano jofo jáidimie ua meríríredimie.

2 Mei íadi nazedo jofo jáidimie ua úiñoraima. Níimie ie ovéjaína ñue uíñote.

3 Naze tuiñoraima naze tuiñode afémie jofo jáillena. Ie uaina ovejai onódiaioi. Ie ovéjaiai íaioi mámeçido jírite. Daí cirínoracomona jino ófiregaiaioi.

4 Nana ie ovejai jino óinana méifodo, íaioi uícodo ífóicaide. Ovéjaiai ie óodana jáioicaidiaioi mei ie uaina onódiaioiza.

5 Mei íadi onóñegamiemo jáioicaíñediaioi. Mei jáifodo afémiemona niné botádiaioi, ónoñegamaci uaina onóñena jira.

6 Bie daje izoide ráfuedo Jesús íaioimo llófuete. Mei íadi daí daíacana uaina onóñediaioi.

Jesús ñue ovéjaiai úiñoraima

7 Iemona Jesús meine dáanomo daízaide:

—Uáfueña ómoína dáititue: Cue bie ovéjaiai jofo jaira nazédicue.

8 Nana cue uícómo bitímaci meríriraíni daje izóí baíróriraíni. Mei íadi ovéjaiai afémacina náfueñediaioi.

9 Cue nazénaza. Cuedo jofo jáidimie jíllobcaite. Afémie cirínoracomona jofo jaide, meine jino bite. Afe jofo jáitimie oveja izóidimiena iite. Ie güille raana báifrede.

10 Meríriraíma fia merírizaíbite; fájaíbite, táinocaitajaíbite. Mei íadi cue biticue íaioi cáatallena, ua jamánomo íocire íaioi íllena biticue.

11 Ñue ovéjaiai úiñoraimadicue. Afe ñue ovéjaiai úiñoraima ovéjaiaimo ie cáallinona itátaite.

12 Mei íadi fia íbaca úiñoraima dama úcube llínollena táijide. Jico izoide bíllana afémie cióillano, ovéjaiai fíianona botade. Afémie botade uáfueña úiñoraimañena jira; daje izóí ovéjaiai íeieñena jira. Iemona jico izoide ovéjaiaína llaítade. Iemona nana jáíie ovéjaiai júdaizítiaioi.

13 Bie íima botáifrede, daa fia íbállena táijideza. Ovéjaiaína nai lloñede. Íaioína duéruiñede.

14-15 Cue bie ñue úiñoraimadicue. Cue Moo cuena onona izóí daje izóí cue Moona onódicue. Afe izóí cue ovéjaiaína onódicue, ie izóí afémaci cuena onódiaioi. Cue cáallino ovéjaiaimo íiticue.

16 Jáíie ovéjaiai cuemo íte. Bie cirínoraco íeñede. Cue uaina cacáillanona jeire óitiaioi. Iemona daa cirínoraco íite, daje izóí daa úiñoraima íite.

17 Cue Moo cuena ízírute, cue abi fécaillano meine cue llánua jira.

18 Buna cue abi báiroñeite, mei íadi dama cue comeci izóí fécaíticue. Cue áfena fecáredicue, ie mei meine áfena llínoredicue. Afe bie cue Moo cue ocuilla dieze, —daíde.

19 Judíuai afe uaina cacáillano bócoizítiaioi.

20 Afémacimona aillo daídíaioi:

—¿Nibái mei uai jeire otíomoi? Afémiemo fiénide jóriai íllaza, íemo uáíritaide, —daídíaioi.

21 Mei íadi jáíimaci daídíaioi:

—Fiénidena jóriaredimie jaca afe izóí úrinide, —daídíaioi. Fiénide joreño uina cíoiñedimie uina cíoitánide.

Judíuai Jesús llínocañeno íena ruífruitiaioi

²² Jae rozíruillarullai. Afe llezica Jerusalemo irázillafue finódiaioi, gairíraco Juzíñamuimo oni íficaillarui uibíñoicaillena.

²³ Jesús Salomón macáranodo gairíracomo macade.

²⁴ Judíuai Jesumo ífoina gairíllano daidíaioi:

—¿Nie dinó caina figo onótañeítio? O Crístodio raire uáfodo caimo llone, — daidíaioi.

²⁵ Jira Jesús uai ote:

—Jae llotícue íadi cuena íñoñediomoi. Cue finócafuiai cue Moo ríinodo finódícue. Afedo ñue jino ácatagacue.

²⁶ Mei íadi cuena íñoñediomoi, cue ovéjaiaíñediomoiza. Afena naui ómoina daidícue.

²⁷ Cue ovéjaiai cue uaina onode. Iaioina onódícue, jira cuedo bitíaioi.

²⁸ Zíñona cáailino íaioimo fecádícue. Jaca afémacimona dáamie niné báizaiñeite. Buna cúemona íaioimona daa báiroñeite.

²⁹ Afémaci cue Moo cuemo íga. Afémie jamánomoidimie. Nana baimo jáidimie. Buna cue Moo Juzíñamuimona afémacina bairónide.

³⁰ Cue, cue Moo diga dáamiedicoco, —daide.

³¹ Iemona judíuai meine íena nofíciaina nitáacadiaioi.

³² Jira Jesús daide:

—Omoi eróicana diga ñúfuiaina cue Moo ríinodo finódícue. ¿Nífue ícoinia nofíciado cue níjitiomoi? —daide.

³³ Jira judíuai uai otíaioi:

—Ñúfuiiai o fínuamona ona níjiiñeíticai; mei íadi o uáillado Juzíñamuina báíñotio. Fia ímadío, mei íadi Juzíñamuina o abí maméacadio, —daidíaioi.

³⁴ Jira Jesús daide:

—Omoi ocuínafuiaimo Juzíñamui daina jae cueda. Be níuai: “Omoi juzíñamuillaídiomoi.”

³⁵ Cuedáuai dánana jaca jáanonide, onódicaiza. Juzíñamui, ie uailai líínotimíiaina juzíñamuillaina mameide.

³⁶ Juzíñamui jae cuena oni ífcaítajano bie éniemo cuena orede. Ua ie orécamedícue. Jira ¿nie izói dáitio “Juzíñamuina báíñotio” cue daíadi “Juzíñamui Jitódícue”?

³⁷ Cue Moo finoca izói cue finóñenia, mai cuena omoi íñoñeno.

³⁸ Mei íadi ie finócafue izói cue finóadi, mai aféfuiaína íino, omoi nai cuena íñoñenia. Afemona cue Moo cuemo íllana, jabe ónoitíomoi. Daje izói cue, cue Moomo itícuéza, ónoitíomoi, —daide.

³⁹ Meine maíano íena uíacadiaioi, mei íadi Jesús oni fínocaide.

⁴⁰ Ie mei Jesús Jordán ruicáfellemo meine jaide. Dinomo fiévide. Ua naui Juan báutizano íte.

⁴¹ Aillo comini íena eróizaidiaioi. Daidíaioi:

—Uáfuenta, Juan cíofinina onótalle raa finóñede, mei íadi nana Juan bímeri daínafuiai uáfuiiai, —daidíaioi.

⁴² Dinomo aillo comini Jesuna ínotiaioi.

¹ Daa iima Lázaro iere irárena. Betania ímie. María ie ebuño Marta diga daje jófuego itíaiói.

² Afe María iráredímie Lázaro miríngo. Afe María nauí Jesús ídaimo ziórede cáiredíji totade. Tótanona ie ifótiido zafénaitade.

³ Ja biruí afe miríngo íanguai uai Jesumo orede, Lázaro iere tíiacana jira: llote:

—Ocuíraíma, o nabai Lázaro irárede, —daide.

⁴ Jesús cacáillano daide:

—Afe duico títañeite, mei íadi jamánomo ñue Juzíñamuí ebírenafue ácataite. Ie llezica afe duico Juzíñamuí Jitó ebírenafue ácataite.

⁵ Marta ie ebuño ie íio Lázaro diga Jesús íaióina iere ízírúite;

⁶ mei íadi Lázaro irárenafuena fidíillanona, Jesús raire jáíñede; nai ménaruí ie illánomo ite.

⁷ Ie mei ie llófuegamacina daide:

—Meine Judéamo cai jai, —daide.

⁸ Jira llófuegamaci daidíaiói:

—Llófueraíma, nano cómoicana Judíuái dino nofíciáido o fáiacadaíói. ¿Nane meine afe diné jáiacadio? —daidíaiói.

⁹ Jira Jesús ie tílliruí nai áinozifñenana onóillano, íaióina onótatiuáido daide:

—¿Uáfueñede, naga mona doce horas ite? Come monari macáadi éicitañede. Bie éniemo ite egáíñuana ciode.

¹⁰ Íadi come nai macáadi éicitáide; afémiemo egáíñotinona íñédeza.

¹¹ Ie mei Jesús nai úrite; íaióina daide:

—Cai nabai Lázaro inídeza, mei íadi cazítaiticue, —daide.

¹² Jira llófuegamaci daidíaiói:

—Ocuíraíma, afémie iníadi ja jíllocaite, —daidíaiói.

¹³ Mei íadi Jesús jáífodo daiíacade, Lázaro tíide. Llófuegamaci comeci facade Jesús dáinana fia ínia llote.

¹⁴ Jira Jesús jino uáfodo íaióina daide:

—Lázaro ja tíide.

¹⁵ Ióbídicue afémie tíillanomo íñédicueza. Daí ómoimona ñuera, omói íinollena. Mei íadi cai éroizailli, —daide.

¹⁶ Iemo Tomás, Guarámie maméidímie, jáíe llófuegamacina daide:

—Mai cai jai, afémie diga dáanomo cai tíilleza, —daide.

¹⁷ Jesús dúciillano como fídide Lázaro ja cuatro dígaruí énie anamo ite.

¹⁸ Betania iere Jerusalén áinori ite, mena kilómetro átuedo ízói.

¹⁹ Aillo judíuái jáídimaci Marta María diga uáíduaidiaíói, íanguai íio tíillari. Íanguaímo fíraíbitiaíói.

²⁰ Marta Jesús dúciana fidíillano afémiena jino cióizáide. Mei íadi María jofomo fíévide.

²¹ Marta Jesúna daide:

—Ocuíraíma, o nibai benó itíoniadi cue íio tííñede.

²² Mei íadi onódicue naga raa Juzíñamuimona o jícáadi afémie omo iite, —daide.

²³ Jira Jesús daide:

—O íio meine cáate.

²⁴ Iemo Marta daide:

—Jii, cue onódicueza tíidino cáadinona illíruimo, énie írairuimo afémie meine cáate, —daide.

²⁵ Jira Jesús daide:

—Cue tíidino meine abido náidataraimadicue; cáadinona abido itátaraimadicue. Cuená ínotímie ie tíadi meine cáate.

²⁶ Nana nai cáadino cuena ínoiadi jaca ninomo tííñeítiaioi. ¿O afefue ínotio? —daide.

²⁷ Jira afengo daide:

—Jii, Ocuíraima, o Crístodio ínoticue. Juzíñamui Jitó ana éniemo bitímiedioza. Afena ínoticue, —daide.

²⁸ Daí dáina méifodo, Marta ie ebuño María uáiduaide. Báinino aféngona daide:

—Llófueraima benó ite. O jírítade, —daide.

²⁹ Afena cacáillano María raire náidacaillano Jesumo eróizaide.

³⁰ Nai Jesús afe jófuego jofo jáíñede. Marta ie baizájillanomo nai ite.

³¹ Jofo ite judíuai afengo fíraidiaioi. Afengo náidacaillano, raire jino jáillana judíuai cíoillano, aféngodo jáidiaioi. Afémaci comeci facádiaioi, afengo raiafo dinomo éeiaide.

³² Ie mei María Jesús illánomo dúcide. Dúciano afémie eiba abimo caiñícido dújuillano daide:

—Ocuíraima, o nibai benó itíonia cue íio tííñede, —daide.

³³ Jesús María éeiana, naa aféngodo bitino judíuairi éeiana ciode. Cíuano afémie iere zúureficaide. Ie comeci docaide.

³⁴ Jira jicánote:

—¿Ninomo omoi raiga?

Jira daidiaioi:

—Ocuíraima, eróizaibi, —daidiaioi.

³⁵ Jesús eede.

³⁶ Jira mei judíuai daidiaioi:

—¡Ero, nii afémiena izíruilla! —daidiaioi.

³⁷ Iadi afémacimona dámie daide:

—Bímie uina cíoiñedimiena meine cíoitaraima. ¿Nai afémiemo íñede ríino Lázaro tíitañeillena? —daide.

Lázaro tíillamona meine abido cáadimiena jaide

³⁸ Jesús comeci meine iere docaide. Raiáfomo áinozide. Raiáfo idu ana ifo. Ie jofo jáirano daa nofícina íbaica.

³⁹ Jira Jesús daide:

—Nofici oni ono, —daide.

Tíidímie miringo, Marta daide:

—Ocuíraima, jae íaire jallede. Ráiamona cuatro dígarui íteza, —daide.

⁴⁰ Jira Jesús daide:

—¿Nai ona daíñedicue, o ínoiadi Juzíñamui ebírenafuena cíoitio? —daide.

⁴¹ Iemona nofici oni otíaioi. Ie mei Jesús monamo érocaillano daide:

—Moo Juzíñamui, iere figora cuemo cacáreífredio.

⁴² Onódicueza cuemo jaca cacáreíidio. Mei íadi daí daidicue benó ite comini núeillena, daje izói bimaci o cue óriana ínollena, —daide.

⁴³ Daí dáina méifodo jíríte:

—¡Lázaro, dinómona jino bi! —daide.

44 Tíidimie jino bite; ua onoi idai diga ferínoraroido maiáno jino bite. Uiéco iníroina ibaica diga bite. Jira Jesús íaioina daide:

—Zuita, zuítanona ie ore, —daide.

Jesús llaitállena jáicina maméritiaioi
(Mt 26.1-5; Mr 14.1-2; Lc 22.1-2)

45 Afedo aillo judíuaimona Jesuna ínotiaioi. Afémaci, María ícoinia bitino, Jesús finócafuena cíódimaci.

46 Mei íadi afémacimona dáamierie fariséuaimo úrizaide. Ua Jesús finócafuiai íaioimo llujide.

47 Iemona fariséuai, lletáriraini illaini diga gairídiaioi naa caifóidillainiri. Daidíaioi:

—¿Nie izói ñéiticaí? Bie iima aillo cíofinina onótalle raana finode.

48 Fia daií íena cai fáicanocaiadi nana íena ínoitiaioi. Iemona romano ríimaci cai gairíraco táinocaitaitaioi naa cai náirairi, —daidíaioi.

49 Dáamie íaioimona Caifás mámeciredimie. Afémie afe fimónamo lletáriraini illaíma. Afémie íaioina daide:

—Omoi minicana onóñediomoi.

50 Daa iima comíniri tíia baímo jamánomo ñuera, nana nairai tííñeillena. Afefue nai figo fidíñediomoi, —daide.

51 Mei íadi Caifás afefue dama ie comécido lloñede; mei jáífodo afe fimónamo afémie lletáriraini illáimana íllamona, Juzíñamui Joreño daináfuedo afemie daide: “Jesús judío náirairi tíizate.”

52 Ua dani afe náirairi tííñeite, mei íadi nana júdaizite Juzíñamui jítóniaí dáanomo meine gairillena tíizate.

53 Daií aféruimona judíuai ríimaci Jesús fállena maméritiaioi.

54 Jira Jesús ja judíuai cígido uáfodo macáñede. Judea éniemona oni jaillano, táizici áinori ite jófuemo jáizaide. Afe jofue mámece Efraín. Dínomo ie llófuegamaci diga fiébede.

55 Judíuai pascua rafue áinozidemo aillo jofue comini Jerusalemo jáidiaioi, pascua uícómo comece duáfuiái finóllena.

56 Jaillano Jesús jénuaidiaioi. Gairíracomo íaioi illano conímamo jicánoidiaioi:

—¿O nie izói daidio? ¿Afémie ráfuemo biite? ¿Ñibai bíñeite? —daidíaioi.

57 Fariséuai lletáriraini illaini diga jae ocuídiaioi: “Daa come Jesús illánona onóiaí lloiri,” ie cai llaitálleza, —daidíaioi.

12

Ringo Jesús jillaide
(Mt 26.6-13; Mr 14.3-9)

1 Pascua uícómo seis dígarui ítemo, Jesús Betániamo jaide, Lázaro illánomo. Lázaro ua tíidimacimona Jesús abido cáatagamie.

2 Dínomo nauife güillafue finódiaioi Jesumo ñúefuiaina nitállena. Marta güille raizífiredede. Güirabanimo ráicana Jesús diga güitino, Lázaro afémacimona dáamie.

3 Iemo María litro átuedo zíoji cáiredena fáíñegaji atide. Afeji jamánomo ráifide. (Afeji mámece nardo.) Atiano Jesús eiba emodo jillaide. Daií ñiano ífótiido zafénaitade. Nana afeco ero zúena oruíbicaide.

4 Dínomo Judas Iscariote ráiide. (Judas Simón jitó Jesús llófuegamacimona. Afémie Jesús éoidimacimo fécaitimie.) Afémie daide:

5 —¿Ñibái mei trescientos dígabe fidi bie cáirediji fécañega, duéredino cai canoi daií? —daide.

6 Mei íadi duéredimaci izíruillamona daií daiíñede. Mei íadi afémie meríriraíma. Nane íaioi úcubellu uícaífirede. Aféllumo jónega raana merífirede.

7 Ie jira Jesús íena daide:

—Aféngona fáicanocai. Raiáfomo cue raillíruimo aféjina afengo éenote.

8 Duéredimaci jaca omoi diga ífirede, mei íadi cue jaca omoi diga are íñeíticue, —daide.

Lázaro fállena maméritiaioi

9 Aillo judíuai Jesús Betániamo íllana fidídiaioi. Jira dinomo jáidiaioi dama Jesumo éroiñellena, mei íadi daje izói Lázarona cíoilena, tíidimacimona Jesús abido cáatagamiena jira.

10 Iemona lletáriraíni illaíni Lázaro fállena mamédiaioi.

11 Ua Lázaro ícoíniadi aillo judíuai illáicomínimona jírecaillano Jesuna ínotiaioi.

Jesús Jerusalemo ebire jofo jáillafue (Mt 21.1-11; Mr 11.1-11; Lc 19.28-40)

12 Pascua ráfue mo aillo comíni Jerusalemo jáidiaioi. Ie méidíruido Jesús jófue mo dúcizaillana fidídiaioi.

13 Amena rafóruai jaitada jino Jesús uáíduaidiaioi. Caillícana daidíaioi:

—¡Juzíñamuina ebífuena daiíri! ¡Juzíñamui mámecido bitímie caimare comuiri! ¡Israel Illaíma caimare comuiri! —daidíaioi.

14 Iemo Jesús burro baillano afe emódomo ráinade, jaiái Cuegáuai daína izói; be níuai:

15 “Sión comíni omoi jacíruiñeno.

Erocai, o Illaíma búrrodo ráicabite.”

16 Nanómona íe llófuegamaci aféfuiaína cacáñediaioi. Ie méífoto ebírenafue Moo íemo nitaca mei, íe tíllanomona meine abido cáatallíruimo, nana afémieri Cuegáuaimo uíbicaidiaioi. Daje izói íemo daií finócafue mo uíbicaidiaioi.

17 Lázaro jino raiáfomona uáíduaruído aillo comíni Jesúsóiri íte. Ua Lázaro tíidimacimona abido cáanana cíódino afe íaioi cíónafuena llujáidiaioi.

18 Ie jira comíni Jesuna caimare baizájidiaioi, afe cíofínina íe finócafue íaioi fidína jira.

19 Jira fariséuai dani daidíaioi:

—Ja cíódiomoi, jaca nie izói ñénide. Erocai, nana comíni íedo jáidiaioi, —daidíaioi.

Dáarie griego imaci Jesús jenódiaioi

20 Rafue illa díno acádoillena Jerusalemo bitímaci cígimo dáarie griego ímíai íte.

21 Afémaci Felípemo áinozidiaioi. (Felipe Galilea ímie; Betsaida jofue ímie.) Áinozillano íemo izire jícánotiaioi:

—O onógamie Jesuna cíoiacacícaí, —daide.

22 Jira Felipe Andrena daiízaide. Iemo afe íaillinoi Jesumo llujáide.

23 Ie jira Jesús íe abina úrillano daide:

—Nanoide Iima Jíto mo ebírenafuena nitállíruimo ja dúcide.

24 Uáfueña ómoína dáititcúe, daa güüga raa ido éniemo ríñenia, tíñenia, jaca nai dáajina jóoide; mei íadi afeji ríllamona tídena eroide zícua mona aillo aite.

25 Daje izói dáamie ie cáaillinona dama íeiena rairuíadi, áfena féitaité, mei íadi dáamie ie cáaillinona bie éniemo jámairuíadi, áfena ziiñona cáaillinomo éenoite.

26 Dáamie cuemo jaináiacadímie cuedo jáirede. Cue illínomo dánomo cuena jaináidímie iite. Dáamie cuemo jaináia, cue Moo afémiemo ñúefueña nítaite, —daide.

Jesús ie tíllifuena jino llote

27 Jesús nai úrillano daide: Birui cue comeci iere lícítaiide. ¿Ñie izói cue daíri? ¿Ñibai bie izói dáititcúe: “Moo birui cuemo zuídfuemona cue jíllota?” Mei íadi cue afe jira biticúe.

28 Moo, o mámecimo ebírenafueña jóoneri, —daide.

Iemona monámona daa uai cácacaiide. Daide:

—Afena jae ebire íficaitadicúe. Iemo meine dánomo ebire íficaitaiticúe, —daide.

29 Afénono ite comini áfena cacáillano daidíaiói:

—Mona giria, —daidíaiói.

Iemo jáámaci:

—Juziñamui abi ímie íemo úrite, —daidíaiói.

30 Mei jira Jesús daide:

—Afe uai cuemo cácacaiñede. Omoímo cácacaiide.

31 Ja biruimo bie énie comini jenoda facátalliaíói. Jabe bie énie ocuídímie jino dotácana iite.

32 Enie acónimo titállena cue íaiói raiñolle llezica, nana dama cuemo cue atille, —daide.

33 Afe dáinamona, ie tílla izói onótate.

34 Jira comini uai otíaíói:

—Cai ocuilla uai cuegánicodo caímo llófuega: “Cristo ziiñona iite.” ¿Ñie izói daidío: Nanoide íima Jitó titállena caífo raiñóbicaite? ¿Bu mei bie Nanoide íima Jitona? —daidíaiói.

35 Jira Jesús daide:

—Nai omoí cigiri egáiñotimiena izói nano íanori iticúe. Bie cue egáiñuana ómoímo illa dino, maí cue llua izói omoí macari, jíitredino raire omoí éidafíñeillena. Jitinodo macádímie ie jáillana onóñede.

36 Uzefomo ñno, nai ómoímo illa dino, egáiñogamacina daíí omoí jáillena, —daide.

Afefue daina méifodo, Jesús afémacimona retáirizaide.

Judúai Jesuna íñoñediaíói

37 Jesús íaíoi mo eróicana diga cíofininafuiaina finode. Mei íadi íena íñoñediaíói.

38 Ua íñoñediaíói, jaíai uai llóraíma Isaías Cuegúai fuitállena. Isaías daide:

Ocuíraíma, ¿bu cai úrillafue íñua?

¿Bumo Ocuíraíma ie ríñona ácatate? daide.

39 Daítana jira ínonidiaíói. Ie emódomo jáííodo Isaías cuete:

40 Juziñamui uina cíoiñedimacina íaíoi na finode.

Íaíói ífoci jáíaitate.

Daíí finode uído cíoiñeillena,

daje izói ífócido ónoñeillena.

Jira cuemo bínidimaci, íaiói cue jíllotallena.

⁴¹ Isaiás aféfuiaí llote, mei afémie Jesús ebírenafuena ciódeza. Jira afémiedo úrite.

⁴² Mei íadi aillo judíuaimona Jesuna ínotiaíoi, illáicomínimona jíái dáarie. Mei íadi uáfodo lloñédiaíoi, fariséuaina jacíruillano gairíracomona jino íaiói óreñeillena.

⁴³ Comini ñúefuena íaióimo nítajana jamánomo gáidiaíoi. Mei íadi Juzíñamui ñúefuena íaióimo nítajana jámairuitiaíoi.

Jesús uailai comínimo ríre jicánoite

⁴⁴ Jesús aillo uaido daide:

—Cuena ínotímie, dama cuena ínoñede, mei íadi daje izói cue orédimiena ínote. Ua cue Moona ínote.

⁴⁵ Cuena ciódimie daje izói cue orédimiena ciode.

⁴⁶ Cue egáínotimiedicue. Ana bie éniemo biticue, cuena ínotino jítreidifomo fiébiñeillena.

⁴⁷ Dáamierie cue uaina cacáadi íadi jeire ie óñeniadi, ie jicánoramana íñeíticue. Cue bie énie comínina duere fínuaíbiñedicue, mei íadi afémacina jíllotaíbiticue.

⁴⁸ Cuena jámairuitimie, cue uaina jeire oñédimie ja ie duere fínoítimie ite. Cue daína uailai íirairuillaido duere íena fínótaite.

⁴⁹ Dama cue comeci izói úriñedicue. Moo Juzíñamui, cue orédimie cue daínana llófuellena jae ocuide.

⁵⁰ Moo cuemo ocuícáfue zíiñona itátate. Afena onódicue. Jira mei, cue daína, jaca cue Moo cue ocuilla izói.

13

Jesús ie llófuegamaci idai jocode

¹ Jae pascua rafue uícodirui. Jesús bie éniema ie fiénocaillana, ie Moo díne jáillirui áinozillana fidide. Ieiema éniemo itínona izíruite. Ua jaca fáicanocaiñeno íaióina izíruite.

²⁻⁴ Taife jae Judas Iscariote comécimo Jesús fecállena llote. Judas Simón jíto. Afe llezica Jesús Juzíñamui mona bitímiena fidide. Daje izói Juzíñamui moine jáillana fidide. Juzíñamui nana rínona íemo fécajana Jesús onode. Ie mei güillano, güirábanimona náidacaillano jinóidicuiro duiñode. Dúíñuano daa abi doraroi ciráigimo maítade.

⁵ Ie mei jainoi icáífemo tótajano, ie llófuegamaci idai jócuaide. Daí ñiano, afe ciráigi maítaca abi dorároido íaiói idai zafénaitade.

⁶ Simón Pedro idai ie jócuaila llezica afémie Jesuna daide:

—Ocuíraima, ¿cue ídaína jócoítio?

⁷ Jira Jesús uai ote:

—Birui cue fínócafue onóñedio, mei íadi fui ónoítio, —daide.

⁸ Mei ie jira Pedro daide:

—Jaca ninomo cue ídaína jócoñeítio, —daide.

Jira Jesús íena daide:

—Ona cue jócoñeniadi, cuemo jáinaiñeítio, —daide.

⁹ Jira Simón Pedro íena daide:

—Mai mei, Ocuíraima, daa cue idai jócoñeno, mei cue onoi, cue ifo díga jocori, —daide.

10 Jira Jesús daide:

—Como nóidimie daa ie idai jócuana dúide, abi nana dóina jira. Ja dogáomoi, mei íadi nánañede, —daide.

11 Iena fécaitimiena onona jira, Jesús jae daide “Nana dóñegaomoi.”

12 Iaiói idai jócuá méifodo, Jesús ie jinóidicuiro meine jitade. Güirábani abimo ráinaillanona daide:

—¿Omoimo cue finócafuenta onódiomoi?

13 Omoi jae Llófueraimana, Ocuíraimana cue mamédiomoi. Daíi ñue daidíomoi, nímiedicueza.

14 Jae omoi Llófueraimadicue; jae omoi Ocuíraimadicue mei íadi omoi idai jocódicue. Afe izói dani conima idai omoi jocolle jitárede.

15 Jae ómoína finócafuenta onótaticue, cue finua izói omoi finóllena.

16 Uáfuenta dáititue: Táijitatimie baimo jaide jaiénicína ñede. Daje izói orédimie baimo jaide orécamiéna ñede.

17 Aféfuiaí omoi onóadi, íemona afe izói ñiano, ióbificaitiomoi.

18 Omoíri nana úriñedicue. Cue nizécamacína onódicue. Mei íadi Cuegáuai daína ñue fuitállena jitárede. Cuegáuai daide: “Cue diga güitímie jae cue ícidote.”

19 Afefue uícomo ómoimo lloticue afe íficailliruimo Crístodicue cuemo omoi íinollena.

20 Uáfuenta ómoína dáititue, cue orécamiéna llínotimie afe izói cuéna llínote. Cuéna llínotimie afe izói cue orédimiéna llínote, —daide.

Jesús Judas ie fecálfue jino llote

(Mt 26.20-25; Mr 14.17-21; Lc 22.21-23)

21 Daíi daína méifodo, Jesús jamánomo comeci zúucaide. Uáfodo jino llote:

—Uáfuenta ómoína dáititue, ómoimona dáamie cue fécaite, —daide.

22 Ie jira llófuegamaci jíáimamo eróricaidiaíoi, onóñegaza budo úrite.

23 Llófuegamacimona dáamie Jesús iere izíruigamie. Afe güilláruído Jesús abimo ráiide.

24 Simón Pedro íemo onócaído llote:

—Mai Jesumo jícano, ¿budo úrite? —daide.

25 Jira jofo áinozillano Jesumo jícanote:

—Ocuíraíma, ¿bu llotio? —daide.

26 Jira Jesús uai ote:

—Daa pánllicina cue riáitano afémiemo íititue. Afe nímie, —daide.

Iemona pánllicina riáitano Judas Iscariote, Simón jito mo fecade.

27 Afe pan Judas llínuamona, Taife ie comécimo jofo jaide. Mei jira Jesús daide:

—O finóllifuenta raire fino, —daide.

28 Júdasna daíi daínáfuenta güirábanimo güitínomona buna aféfuéna onóñena.

29 Ucubellu Judas uícaiga jira dáamierie comeci facádiaíoi: Jesús daííacade ráfuemo jitailla raana íbajitade. Jíáimaci comeci facádiaíoi, nibai duéredino úcube afémie íllena.

30 Afe pan güilla méifomo Judas jino jaide. Ja naína.

Comue ocuñlafue

31 Judas jino jailla méifomo, Jesús daide:

—Jabe Nanoide íima Jitó ebírenafue ácatalle. Afe daínámiedicue. Iemo jíái jabe Juzíñamui ebírenafue íedo ácatalle.

³² Nanoide Hima Jitó Juzíñamui ebírenafue ácataiadi, ibana ie Jitó ebírenafue Juzíñamui ácataite. Afena raire fínoite.

³³ Cue izírui gamaci, omoi diga ja are íñeiticue. Cuena jénoitiomoi. Mei íadi nauí judíuaina cue daína izóí birui ómoína dáitícue: cue jáillinomoi jáinidiomoi.

³⁴ Bie comue ocuícáfue ómoimo llotícue: conímana omoi izírui. Cue omoi izírui illa izóí afe izóí conímana omoi izírui illa jítárede.

³⁵ Nana conímana omoi izírui, nana comini cue llófue gamaci diomoi fidiítiaoi, —daide.

*Pedro Jesuna jáanollífue Jesús uícomo llote
(Mt 26.31-35; Mr 14.27-31; Lc 22.31-34)*

³⁶ Ie mei Simón Pedro Jesuna jicánote:

—Ocuíraima, ¿niné jáidí? —daide.

Jira Jesús uai ote:

—Cue jáillinomoi birui bínidí; mei íadi méifoidíruído cuedo bíití, —daide.

³⁷ Mei ie jira Pedro daide:

—Ocuíraima, ¿nibái mei birui odo bínidí? Ja finóbídicue o diga cue tíllena, —daide.

³⁸ Jira Jesús uai ote:

—¿Uáfue na meita finóbídí cue diga o tíllena? Uáfue ona dáitícue: nai átava úriñeniadi, dacaiñoámami cuena jáanoití, —daide.

14

Jesús, Moo Juzíñamuimo jaira io

¹ Omoi comeci zúucaíñeno. Juzíñamuimo ñno; daje izóí cuemo ñno.

² Cue Moo jofomo aillo illánuiái ite. Bífue táinofue íadi, raire ómoimo llóitícue; íadi jaca uafue. Mei jira omoi illíno fínuaídícue.

³ Omoi illíno cue fínuailla mei, abído ómoína uábitícue, cue illínomo dáanomoi omoi íllena.

⁴ Cue jáillinona onódiomoi afe io diga, —daide.

⁵ Jira Tomás daide:

—Ocuíraima, o jáillinona onóñedícaí. ¿Ñie izóí afe iona ónoitícaí? —daide.

⁶ Jira Jesús uai ote:

—Cue íódícue. Cue uáfuedícue. Daje izóí cue cáatatínodícue. Ie jira daa cuedo Moo illánomoi dúciredíomoi.

⁷ Cuena omoi onóíadi, daje izóí cue Moona ónoitiomoi. Ja biruimo íena onódiomoi. Ja íena cíodiomoíza, —daide.

⁸ Jira Felipe daide:

—Ocuíraima, Moo Juzíñamui caímo cíota. Afedo figo baite, —daide.

⁹ Jira Jesús uai ote:

—Felipe, ja are omoi diga itícue, ¿nai cuena onóñedí? Cuena cíodímie daje izóí cue Moona ja cíode. ¿Nibái mei Moona cíotalle cuemo jicádí?

¹⁰ ¿Moomo cue íllana nai ñnoñedí? ¿Daje izóí cue Moo cuemo íllana ñnoñedí? Nana cue daínáfuiái dama cue comeci izóí daíñedícue. Cuemo ite Moo dama ie táijina finode.

¹¹ Cue Moomo cue íllana ñno; afe izóí Moo cuemo íllana ñno. Ménaillínoí dáanomoi itícocoza. Daí omoi ñnoíacañenia cue finócafueña ñno.

12 Uáfueña dáititue: cuena ínnotimie cue finócafue izói fínoite. Nane afe baimo aillo jíáifue fínoite, cue Moo illánomo cue jailla jira.

13 Nana omoi cue mámecido jicaca raa fínoiticue, Moo ebírenafue ie Jitó ácatallena.

14 Naga cue mámecido jicalle raana fínoiticue, –daide.

Jesús Ñuera Joreño oréllena uafue llote

15 Cuena omoi izíruiá, mai cue ocuífafuiai cacáfireiri.

16 Iemo omoi canóraíma, omoi fíraráíma jícaiticue. Moo ómoimo íena oréllena íemo izire jícaiticue. Bítimie uafue Joreño. Afe Ñuera Joreñona jícaiticue omoi díga nínomo íllena.

17 Enie imaci íena llínonidiaíoi, afémiena ciónidimaci jira; daje izói afémimona ónoñedimaci jira. Mei íadi íena ja onódiomoi, omoi díga illa jira. Ua uire jaca ómoiri dájena íite.

18 Omoina zóofeñitue. Abído bítitue omoi díga íllena.

19 Nano nígarui íanori íllamona comini ja cuena cíofñeitiaíoi, mei íadi cuena cíoitimoi. Afe jira omoi cáaitimoi, cue caana jira.

20 Aféruído cue Moomo cue íllana ónoitimoi. Daje izói cuemo omoi íllana ónoitimoi; daje izói ómoimo cue íllana ónoitimoi.

21 Cue uaina onódimie, íemo jíái afe uaina jeire otímie uáfueña cuena izírullana cíotate. Jira cuena izírutimie cue Moo daje izói izírute. Cue daje izói íena izírutitue; ie mei afémimona cuena cíotaitue, –daide.

22 Iemo Judas (íadi Iscarióteñedimie) íena daide:

–Ocuíraíma, ¿nibái énie cominimo ácatañeno, daní caimo o abina ácataitio? –daide.

23 Jira Jesús uai ote:

–Cuena izírutimie cue dáinafue jeire ote, ie jira cue Moo íena izírute. Afe llezica cue Moo cue díga bítitoco afémie díga íllena.

24 Cuena izíruiñedimie cue dáinafue jeire oñede. Omoi cacana úrillafue dama cúeieñede. Afefue Moo Juzíñamui, cue orédimie ífue.

25 Omoiri cue illa díno aféfuiaína ómoimo llotitue.

26 Mei íadi Moo cue mámecido Ñuera Joreño óreite, ómoína canóllena, ómoína fírallena. Nágafuiaína omoi llófueite. Nana ómoína cue dáinana uíbicaítaite.

27 Comeci caimare uái illifue ómoimo fiéditue cue jailla jira. Cue comeci caimare uái illifue ómoimo ititue, mei íadi énie comini comece illifue izóiñede. Omoi comece zúucañeno. Jacíruiñeno.

28 Jáititue, cue dáinana cacádiomoiiza. Daje izói meine bítitue ómoiri cue íllena. Uáfueña omoi cuena izíruiá, cue Moomo cue jáillifue omoi fidínamona cáimacaitimoi, mei afémie cue baimo illa jira.

29 Jira áfena uícodo ómoimo llotitue, afefue fínuaruimo omoi ínollena.

30 Omoiri ja aillo úriñeititue, bie éniemo ocuítimie ja billa jira.

31 Mei íadi afémie cuena ocuínide. Daíí írede, énie comini Moona cue izírullana íaíoi onóllena. Daje izói Moo cue ocuilla raana cue fínuaña ónoitiaíoi. Mai náidacai. Benómona cai jáilleza, –daide.

¹ Afe mei nane Jesús úrite; daide:

—Uafue ‘vid’ daina jírícue llizítate rao izóidicue. Cue Moo afe rao úiñotimie.

² Lliziacañede rao ícairo jaitade. Nana llizíacade ícairo ie icoi jáicoide, áfemona jamánomo llizíllena.

³ Omoi cue llófuiafuedo jae ñue dóficaidiomoí.

⁴ Mai cuemo dáanomo omoi jainairi ómoímo cue jainaina izóí. Daa ícairo fia daingo llizínide. Daje izóí cuemo dáanomo omoi jaináiñenia, ññefuiai omoi comécimona comúitanidiomoí.

⁵ ‘Vid’ daina jírícue llizítate rao izóidicue; afe rao zitaca ícairuai izóidiomoí. Cuemo dáanomo jaináidimie, íemo dáanomo cue jainaila llezica, ua jamánomo aite. Mei íadi cue iñédicuenia minícana finónidiomoí.

⁶ Cuemo jaináiñedimie jino faille. Fáiamona zafénaite, rao rábiai izóí. Afémacina iráida iraimo jobaica.

⁷ Cuemo ñue omoi jaináiadi, daje izóí cue llogáfueña omoi féitañenia, o jitaiga raana jicari. Iemona áfena ómoímo íiticueza.

⁸ Aillo llizilla izoide ññefue omoi finóadi, cue Moomo ññefueña nítaitio. Afedo cue uáfueña llófuegamacina omoi íllana ácataitiomoí.

⁹ Cue Moo cuena izíruilla izóí, afe izóí ómoína izírúiticue. Omoína cue izírúiticueza; áfedo dānomo omoi jairi.

¹⁰ Cue ocuífuaíaina jeire omoi óiadi, daíí cuedo izíruilliomoí. Daje izóí cue Moo ocuífuaíaina jeire oticue. Iemona afémiedo izírúigacue.

¹¹ Cue daíí úriticue cue dibénedo caimare omoi íllena. Daíí íóbillafueña oruíbicaitiomoí.

¹² Bie cue ocuífue: Omoína cue izíruilla izóí naga come ie conímāna izírúiri.

¹³ Dáamie jamánomo izírúillafuedo ie abi ie nabáiñiaimo fecárede. Afe baimo iere izírúillafue iñede.

¹⁴ Cue ocuífue omoi finóadi cue nabáiñiaidiomoí.

¹⁵ Ja jaiénicāna ómoína mámeñeiticue, jaiénici ie ocuídímie finuafueña óñoñena jira. Cue nabáiñiaína ómoína mamédicue, nana cue Moo cuena daínáfuaíai omoi cue onota jira.

¹⁶ Omoi cuena nizéñediomoí, mei íadi cue nizécamacidiomoí. Iemona ómoína ocuídícue, aillo llízie izoide ññefuíaína omoi finóllena. Afe llízie are íllana ocuídícue. Ie jira daíí nana cue mámeçido omoi jicaca raana cue Moo ómoímo fécaite.

¹⁷ Jira bifue ómoína cue ocuíllafue: Naga come ie conímāna izírúiri, —daide.

Enie comini Jesuna éoide ie comini diga

Jesús nai úrillano daide:

¹⁸ —Enie comini ómoína éoiadi, nano fueñe cuena íaioí éoíllamo omoi uíbicaíri.

¹⁹ Enie comínina omoi íadi, afémaci íaioí comínina izírúilla izóí ómoína izírúitiaioí. Mei íadi énie imácimona ómoína nizédicue. Ie jira énie imaci ómoína éoidiaioí, éniemo íaioí jainaina jira.

²⁰ Omoína cue daínáfueño uíbicaíri: “Ñie jaiénici ocuídímie baimo iñede.” Cue duere finóllena íaioí racáoiadi, daje izóí ómoína rácaitiaioí. Cue llófueinafueña jeire íaioí óiadi, ómoína jeire óitiaioí.

²¹ Nana aféfuiai cue ícoínia ómoímo finoitiaioí, cue orédímiena onóñena jira.

²² Iaoímo úrizaiñédicuenia íaioí ícoínia iñede. Mei íadi birui íaioí fiénidífue ícoínia jae ite.

²³ Cuena éoidímie daje izóí cue Moona éoide.

24 Jaca bu jáimie íaiói cígiri cue fínua izói finóñede; mei íadi afe jáimie finófinide raana ja íaiói cígiri finódicue. Ie jira íaiói ícoinia íteza. Mei uáfueña aféfuiaína ja ciódiaíoi. Mei íadi afe emódomo cuena éoidiaíoi. Afe izói cue Moona éoidiaíoi.

25 Afefue daí jaide, íaiói cuega ocuífauiaí uai fuitállena. Afe Cuegáuai daide: “Nífueninanomona cuena éoidiaíoi.”

26 Mei íadi Móomona cue oréllimie, afe Ñuera Joreño bíadi, cueri úrite. Afe llezica ómoína cánuano náirecaitaite.

27 Omoi daje izói cueri úritiomoi, nanómona cue diga omoi illa jira.

16

1 Aféfuiaí ómoimo lloticue, fiénidífueño omoi báiiñellena.

2 Juzíñamui uai llófueriracomona ómoína jino dótaítiaíoi. Ua uire jamánomo fiéni illíruimo dúciite. Aféruillaido ómoína fáitimaci, “Omoína fallífuedo Juzíñamui táijinana fínóiticaí” daí daína ínoítiaíoi.

3 Aféfuiaína fínóitiaíoi Moona jaca ninomo onóñena jira, daje izói cuena onóñena jira.

4 Afena ómoína dáitícue, aféruillai dúcillemo, cue daináfueño omoi uíbicaillena, —daide Jesús.

Ñuera Joreño finóllifuaí

Jesús nai úrillano daide:

—Aféfuena nanómona ómoimo lloñédicue, omoi diga cue illa jira.

5 Mei íadi biruímona cue orédímie dínomo jáitícue. Omoimona buna cue jáillinona jicánoñediomoi.

6 Mei íadi bie cue ómoína daináfueri iere zúucaidiomoi.

7 Iadi uáfueña dáitícue: cue jaille ómoimona iere ñuera. Cue jáíñenia, ómoína canoda firaraima bíñeite omoi diga íllena. Mei íadi cue jaía íena óreitícue.

8 Ie billíruido éniemo itino íaiói fiénidífuaína uáfueña onótaite. Daje izói dama daa jáicina ñúefuedo cai jáilliona onótaite. Daje izói Juzíñamui íaioina duere finóllena onótaite.

9 Afémaci fiénidífuairedimaci, cuena ínoñena jira.

10 Afe jáicina jáilliona ónoítiaíoi, Moo illánomo cue jailla jira. Afe cue jailla mei cuena cíoñeitiomoi.

11 Juzíñamui facátallifueña ónoítiaíoi, bie éniemo ocuídímie jae duere finóbilla jira.

12 Cue ómoimo llollífuaí nai aillo ite; mei íadi nai onónidiomoi, nánidiomoi.

13 Uafue Joreño bille llezica ómoimo nana uáfuaína afémie llóite. Dama íe comeci jítaina izói úríñeite, mei íadi íe cacana izói dáite. Uire íitífuaína ómoína onótaite.

14 Cúeiemona llínuano ómoína onótaite; onótamona ñúefueña cuemo nítaite.

15 Nana Momo íte raa daje izói cueíe. Ie jira dáitícue: Ñuera Joreño cúeiemona llínoite, áfedo aféfuena ómoína onótaite.

Zúuenaíue cáimafueña méidolle

16 Nano íanori íllemona cuena cíoñeitiomoi. Mei íadi jabo bai diga iruillai íllamona, nane meíne cuena cíoitomoi, mei cue Moo illa díne cue jáillaza, —daide.

17 Temona íe llófuegamacimona dáarie jofo conímamo jicánote:

—¿Afe nie izóí daináuai? Caina daide nano nie dino íllamona íena cíoiñeíticai. Ie mei nane caina daide, báifenemo diga iruí íllemona meine íena cíoiñeíticai, mei ie Moo íllánomo ie jáillaza.

¹⁸ ¿Nie izóí aféuai daide: “Nie dino íllamona?” Afémie nífuedo úriteza onóñedicai, —dai díaioi.

¹⁹ Jesús íaioi íemo jícanoíacagafuena onóíllano daide:

—Cue daidicue nie díno íllemona cuena cíoiñeítiomoi. Nane ie baímo diga iruí íllemona meine cuena cíoiñeítiomoi. ¿Afe fue conímamo jícanotíomoi?

²⁰ Uáfueña dáitícue: omoi éeítíomoi. Zuure ítíomoi; mei afe llezica énie comíni caímare ítíaioi. Mei íadi omoi zúunaíllafue cáimafuena méidoficaite.

²¹ Ringo úrue jócócania ízínaíllari zúucaite, afengo ízínaíllaruimo dúcidez. Mei íadi úrue jócua méifodo afe ízírenamo uíbicaíñede, úrue éniemo jócínari ie íóbilla jira.

²² Daií birui omoi izire zúucaítíomoi. Mei íadi ómoímo cíoiñeítícutie. Iemona omoi comécíai cáimafuena óruíte. Afe cáimafuíai bu ómoímona báíroñeíte.

²³ Aféruido mínícana cuemo jícanoñeítíomoi. Uáfueña ómoína dáitícutie, nana cue mámedido omoi jíaca raa, cue Moo ómoímo fécaite.

²⁴ Biruimo cue mámedido mínícana nai jícañeítíomoi. Mai jíca omoi íllínollena, áferi comeci cáimafuena orúbicáíllena.

Jesucristo, Juzíñamuina éoidínona anáfenodímie

²⁵ Bífuíai aillo daje izóidífuíaido ómoímo llotícutie, mei íadi daruína daje izóidífuíaido ómoímo úríñeítícutie. Aféruimo ja ánozide. Aféruido uáfodo Moodo ómoímo úritícutie.

²⁶ Aféruíllaido omoi cue mámedido jícaítíomoi. Moomo ómoíri izire cue jícállena daiíñeítícutie,

²⁷ mei dama Moo ómoína ízíruílla jira. Iemo jíai cuena omoi ízíruílla jira, ómoína ízíruíte. Moo díneña cue bíllana omoi íñnua jira, afémie ómoína ízíruíte.

²⁸ Moo íllánomona bíllano bie éniemo bíttícutie. Biruí énie fíénocáíllano meine Moo díne abido játtícutie, —daide.

²⁹ Jira ie llófuegamací daide:

—Ja biruí daje izóidífuíaido daiíñeno, jino uáfodo úritio.

³⁰ Biruí naga rafue o onóígana onódícaí. Ja jíaimie omo llúana jíttíñede. Mei jira Juzíñamuimona o bíllana íñnotícaí, —dai díaioi.

³¹ Jira Jesús uai ote:

—¿Biruí cuemo ja daií íñnotíomoi?

³² Omoi enénorie júdaízíllíruimo ánozide. Ja biruí aferuí. Omoímona nágamie oni eneno júdaízíte. Dama cuena fíénocáítíomoi. Mei íadi damáñeítícutie, cue Moo cue diga ílla jira.

³³ Nana bífuíai ómoímo llóttícutie, cuemo íñnuano omoi comeci uái íllena. Afe bie éniemo duere zéfuitíomoi. Mei íadi, ¡abí omoi mameri! Ja Juzíñamuina éoidínona anáfenodímiedícutie, —daide.

17

Jesús ie llófuegamacíri Juzíñamuimo jícade

¹ Aféfuíai dáina méífomo, Jesús caífo monamo érocaíllano daide:

—Moo, cue íraíruimo ja dúcide. O Jítomo ñúefuena níitari, afe izóí o Jító omo ñúefuena nítaíteza.

² Aillo ríino o Jitomo jae o iga, nana comini náamatallena; daje izói nana cuemo igámacimo zíiñona cáailinona íaioimo cue illena.

³ Zíiñona cáailino comini ona íaioi onónamona llínotiaioi. O dama uafue Juziñamuidio. Daje izói zíiñona cáailino, o orécamié Jesucristo íena onónamona llínotiaioi.

⁴ Bie éniemo cue illa llezica ebírenafue jae omo nitádicue. Cuemo o ocuícáfue jae fuitádicue.

⁵ Moo, nauí o diga cue illáruimo cue ebírenafue dájena biruí o uícori meine cuemo ine. Afe ebírenafue nai énie íñena llezica nauí cuemo ite.

⁶ Enie imácimona doce dígamie otio cuemo íllena. Afémacina búdioza jae onótaticue. Afémaci óie. Cuemo o igano. O úrilla uaina ínotiaioi.

⁷ O nana cuemo igáfuiái ómona bitífuiaina onódiaioi.

⁸ Jira o cuemo iga úrilla uai bimácimo lloticue. Aféfuena jeire otíaioi. Uáfuenta ómona cue bíllana onódiaioi. Daje izói o cue óriana ínotiaioi.

⁹ Afe cuemo o igámaciri izire jicádicue. Enie imáciri izire jicáñedicue. Dama cuemo o igámaciri izire jicádicue, ómacina jira.

¹⁰ Nana cueie óie diga. Afe íbana nana óie cueie. Afémacimona cue ebírenano ácatafícaide.

¹¹ Cue ja éniemo fiébiñeiticue; mei íadi afémaci afe éniemo fiébitiaioi. Cue o diga íllena jáitícue. Jamánomo ñuera Moo, cuemo o igano o ríinodo uíñori, nana dájena cuemo ñue jaináíllena, omo cue jainaina izói.

¹² Bie éniemo afémaciri cue illa llezica, o ríinodo íaioina úiñoidicue. Íaioi abí ríidotícue. Íaioimona buna féiraiñede. Mei íadi dáamie jaca féiraitimie, Cuegáuai fuitállena. Afémie nanómona féiraitimie.

¹³ Jabe o illánomo jáitícue. Mei íadi nai éniemo cue illa dino aféfuíaina llóllodicue, cuemo ite íóbillafue afe izói afémaci ñue íóbicaíllena.

¹⁴ O úrilla uai íaioimo iticue, mei íadi énie imaci íaioina éoidiaioi, énie imáciñena jira. Daje izói cue jíái énie ímieñedicue.

¹⁵ Eniemona íaioi o óllena jicáñedicue, mei íadi Taifémona íaioi ríidollena jicádicue.

¹⁶ Enie ímieñedicue; afe izói énie ímaciñediaioi.

¹⁷ Íaioina uáfuedo dama óiena rairuirí. O úrilla uai uafue.

¹⁸ Enie imaci cígimo cue o ória izói, daje izói énie imaci cígimo íaioina orédicue.

¹⁹ Afémaci ícoínia cue dama abí rairuídícue. Daí finódicue, uafue uaido afémaci daje izói íaioi rairuíllena.

²⁰ Daa afémacimo omo izire jicáñedicueza, mei íadi bimaci úrilla uaina cacáíllano cuemo ínotinomo izire jicádicue.

²¹ Nana afémaci dájena jaináíllena omo jicádicue. Ua Moo, afémaci dájena cócomo jaináíllena jicádicue. Uáfuenta o cuemo itio, nane uáfuenta cue omo iticue. Afe izói íaioi cócomo íllena jicádicue. Afémaci dájena jainaille jítaírede, énie comini cue o óriana ínollena.

²² Cuemo o iga ebíredífue izói, afémacimo jae cue iga, dájena íaioi íllena, o diga dájena cue illa izói.

²³ Afémacimo cue íllena jicádicue, nane o cuemo íllena jicádicue, nana afémaci dájena íficaíllena. Daí íaioi íllena jítaírede, énie comini cue o óriana fidáíllena. Nane áfedo énie comini cuena o íziruilla izói, bimácina o íziruillana ónoitiaioi.

²⁴ Moo, bimaci cuemo itio. Cue illínomo cúeoiri íaioi íllena jitáidicue, cuemo o iga ebíredifuenta íaioi cóoillena. Nai énie fínoñenia uícomo cuena izíruitio.

²⁵ Moo, jaícina ñue jóonetimedio. Enie comini ona onóñediaioi, mei íadi cue ona onódicue. Bimaci cue o óriana onódiaioi.

²⁶ Búdio, jae íaioina onótaticue; iemo nai onótaoicaiticue, o cuena izíruilla íaioi comécimo fiébillena; daje izói cue dama afémacimo fiébillena, —daide.

18

Jesús maiano úinafue

(Mt 26.47-56; Mr 14.43-50; Lc 22.47-53)

¹ Aféfuiai daina méifodo, Jesús ie llófuegamaci diga jino jaillano Cedrón illétue ruica jáidiaioi. Dinomo ite ocózinairabirimo jofo jáidiaioi.

² Judas afébirina onode, Jesús ie llófuegamaciri, diga ícaiño afénomo gáirifirena jira.

³ Jira dinomo Judas fuiríraíni diga dúcide. Afe llezica dáarie gairíraco llaizíraíni Judas jicácamaci bitíaioi. Afémaci fariséuaimona lletáiraíni illáinimona orega. Lloéfaillai diga jacire abi mamédiaioi. Unéruaári bitíaioi, daje izói lámparaíari.

⁴ Mei íadi Jesús afémiemo fínuauillifuenta onóillano, jino billano íaioimo jicánote:

—¿Bu jenódiomoi? —daide.

⁵ Jira afémaci uai ote:

—Jesús, Nazaret ímie jenódicai, —daidiaioi.

Jesús uai ote:

—Níimiedicue, —daide.

Afe llezica éoidimacimo fecádimie, Judas dinomo afémaciri ite.

⁶ Jesús “Níimiedicue” daina llezica, jinófecaíñoa éniemo baíidiaioi.

⁷ Ie mei Jesús dáanomo nane jicánote:

—¿Bu jenódiomoi? —daide.

Jira afémaci:

—Nazaret ímie, Jesús, —daidiaioi.

⁸ Mei jira Jesús daide:

—Jae níimiedicue daidicue. Cue omoi jenóadi, bie jiáimaci fáicanocai íaioi jáilleza, —daide.

⁹ Afe daí daide Jesús dama ie dainafue fuitállena. Afe dainafue llote: “Cue Moo cuemo igámacimona buna dáamie féiraiñede.”

¹⁰ Iemo Simón Pédro mo daa lloefai ite. Otá Malco dainámie jefo nabefo ñetade. Malco lletáiraíni illaíma jaiéni.

¹¹ Jira Jesús Pédrone daide:

—O lloefai ie icomo abido meine joone. ¿Cue Moo cue duere zefuítajana llínoñeiticueza, daí o comeci facádio? —daide.

Lletáiraíni illaíma uícomo Jesús uitíaioi

(Mt 26.57-58; Mr 14.53-54; Lc 22.54)

¹² Ie mei fuiríraíni íaioi ocúraíma diga Jesuna llaítadiaioi. Nana bimaci judíuái llaizíraíni diga Jesús maiano oni uitíaioi.

¹³ Ie méifomo Anás jofomo íena uitíaioi. Anás Caifás jifai. Afe fimona llezica Caifás lletáiraíni caifóidillaíma.

14 Bie Caifás nauí judíuaina bie izói daidímie: “Daa come nana cai nairai ícoinia tíllena cai baimo ñue jaide.”

Pedro Jesuna jáanote

(Mt 26.69-70; Mr 14.66-68; Lc 22.55-57)

15 Simón Pedro jíáie llófuegamie diga nai Jesudo jaide. Jíáie llófuegamie lletáriraini caifóidillaíma onóigamie. Jira caifóidillaíma jofo ibírímo afémie jofo jaide Jesús diga.

16 Mei íadi Pedro jino naze fuemo fiébicaide. Ie jira lletáriraini caifóidillaíma onoíga llófuegamie jino jaillano, naze úíñoraimamo jícánuaide Pedro jofo oréllena.

17 Iemo naze úíñoraima Pédro mo jícánote:

—¿O báimie llófuegamieñedio? —daide.

Pedro uai ote:

—Jíi, cúeñede, —daide.

18 Aféruido rozírena jira, jaiénizai llaíziraini diga irai bonódiaioi. Dínomo naidáillano irai fuemo agáidiaioi.

Lletáriraini caifóidillaíma Jesumo izire jícánote

(Mt 26.59-66; Mr 14.55-64; Lc 22.66-71)

19 Lletáriraini caifóidillaíma Jesumo jícánuaillano daide:

—¿Nímaci o llófuegamacina? ¿Nífuaína llófuetio?

20 Jira Jesús daide:

—Cue nana comíni uícomo uáfodo úriticue. Juzíñamui uai llófueriracuaimo jaca llófueñedicue. Daje izói Juzíñamuimo gairíracomo llófueñedicue. Jaca afénomo judíuai gairífrediaioi. Daí bínino nífuena lloñédicue.

21 ¿Níbái mei cuemo jícanotiomoí? Cue uaimo cacádinomo jícano. Afémacimo cue dáinana jícano. Cue íaioína dáinana onódiaioiza, —daide.

22 Jesús daí daina llezica, daa dño ite gairíraco llaíziraima Jesús uíeco pútanona daide:

—¿Níbái daí lletáriraini caifóidillaíma uai otio? —daide.

23 Jira Jesús uai ote:

—Fiéñidí fue cue lloía, áfena cuemo llone; mei íadi cue daina uai ñuera íadi, ¿níbái mei cuena putádio? —daide.

24 Iemona Anás Caifamo íena maitá orede. Caifás lletáriraini caifóidillaíma.

Pedro nane dáanomo Jesús jáanote

(Mt 26.71-75; Mr 14.69-72; Lc 22.58-62)

25 Due jiza bai jáidemo, Pedro nai náidaillano irai fuemo agaide. Afénomo ítino íena daidíaioi:

—¿O báimie llófuegamaci iéñedio? —daide.

Pedro jáanuano daide:

—Jíi, iéñedicue, —daide.

26 Dínomo Pedro jefona jaitácamie come ite. Afémie jíáie lletáriraini illaíma jaiénici. Afe íima Pédro mo jícánote:

—¿Báimie diga dínomo ocózínairabírímo ona cióñedicue? —daide.

27 Pedro dáanomo nane jáanote. Afe llezica átava úrite.

Jesús Pilato uícomo uíga

(Mt 27.1-2, 11-14; Mr 15.1-5; Lc 23.1-5)

28 Iemona Caifás jofómona oni romano jabóidillaíma áillocomo Jesuna uitíaiói. Ja monáiacademo. Judíuai jofo afécomo jáiñediaíói, íaiói íaicaiñellena. Mei íaicagamací páscuamo güilláfuena güinidiaíói.

29 Ie jira Pilato jino íaióimo úrizaillano daide:

—¿Mínica ícoínia bímiemo nitádiomoi? —daide.

30 Jira afémaci uai otíaiói:

—Afémie fiénidímiñedena omo izájiñedícai, —daidíaiói.

31 Jira Pilato daide:

—fena omoi úi. Omoi ocuícáfue izóí afémie omoi riire jicánori, —daide.

Judíuai ie uai otíaiói:

—Cai judíuaidícai, dani buna titánidícai, —daidíaiói.

32 Daí Jesús ie tízaiillonona daina izóidíuai fuitade.

33 Pilato áillocomo jofo meine jaide. Jaillano Jesús jíriillano jicánote:

—¿O níi judíuai illáimana? —daide.

34 Jira Jesús daide:

—¿Aféue dama o comeci jítaina izóí jicánotio? ¿Níbai jíáimaci cueri ona daina jicánotio? —daide.

35 Jira Pilato úrite:

—¿Cuenta judío daidío? O náiraimona lletáriraini illaini cuemo ona fecadíaiói.

¿Mínica ñetío? —daide.

36 Jira Jesús uai ote:

—Cue illáimana illano bie énie íeñede. Daí ítenia cuedo jáicadino nia fuiridiaíói, cuena judíuaimo fécañeillena. Mei íadi cue illáimana illano benó íeñede, —daide.

37 Jira Pilato daide:

—¿Íi, o daí illáimadio? —daide.

Jira Jesús uai ote:

—Illáimadicue, o daina izóí. Cue, bie éniemo jéciaíbigacue uafue uai llóllena. Nana uáfueo cacáfiredino, cue dáinana cacadíaiói, —daide.

38 Jira Pilato jicánote:

—¿Mínica uafue uaina? —daide.

Jesús tíillinomo maméritiaíói

(Mt 27.15-31; Mr 15.6-20; Lc 23.13-25)

Afe jicánua meífodo, Pilato meine jino judíuaimo jaillano úrizaide. Iaióina daide:

—Jaca nífuena bie íimamo baiñédicue.

39 Mei íadi ómoímo cue fínofiregafue ite. Naga pascua ráfueo ómoiri daa maigámie zuitáfiredicue; mei jira ¿judíuai illáimana ómoiri cue zuitállena jítádiomoi? —daide.

40 Iemona nana meine caillíoidiaíói:

—¡Afémiena zuitáñeno iri! ¡Barrabás zuitari! —daidíaiói. Afe Barrabás meríriraíma.

19

1 Ie mei Pilato Jesús lláinuano zechétatade.

2 Iemo fuiriraini ífo icuífoi eegi nínacuífoi Jesumo jítadíaiói. Afe llezica ráífide illaíma iníroina íemo jítadíaiói.

3 Daí ñiano íemo áinozillano, báñuano daidíaiói:

—¡Judíuai illaíma, are ii! —daidíaiói.

Iemona ie uieco fácoidiaioi.

⁴ Pilato meine jino billano daide:

—¡Bímiemo eroi! Afémiemo nífuena baiñédicue. Ie jira jino bené cue ógaza, aféfuena omoi onóillena, —daide.

⁵ Jesús eegi icuifoi ifomo jínari jino bite. Ráifide illaíma iníroina jitaca naari jino bite. Jira Pilato daide:

—¡Benó afe íima ite! —daide.

⁶ Afémie cióillano, lletáriraini illaini, llaizáraini diga caillíoidiaioi:

—¡Ie corai! ¡Ie corai! —daidiaioi.

Iemo Pilato daide:

—Mai íena uillánona omoi corai, mei íadi afémiemo fiénidífueña baiñédicueza, —daide.

⁷ Mei ie jira judíuai uai otíaioi:

—Caímo ite daa ocuica uai. Afedo afémie tíllena jitáirede, dama “Juzíñamui Jitódicue” ie daina jira, —daidiaioi.

⁸ Afena cacáillano Pilato jamánomo jacináifcaide.

⁹ Aillocomo nane jofo jaillano Jesumo jicánote:

—¿O ninó ímiedio? —daide.

Mei íadi Jesús jaca uaina oñede.

¹⁰ Jira Pilato daide:

—¿Cue uaina fairíoñedio? ¿Cuemo ite o tílle ríino onóñedio? ¿Cuemo ite o zuitalle ríino onóñedio? —daide.

¹¹ Jira Jesús uai ote:

—Juzíñamui omo íñenia, o cue ocuille ríino íñede. Ie jira omo cue fecáino o jinomo afémaci íaifueredino, —daide.

¹² Afe llezicamona Pilato, “Nie izói Jesús cue zuitalle” dainano, áfena jenode; mei íadi judíuai caillíoidiaioi:

—Afémie o zuitáadi, romano jamánomoidillaímamo nábairíñeitio. Naga illáimana íacadímie caifóidillaíma dibénedo éoidímiena jáite, —daidiaioi.

¹³ Mei jira áfena cacáillano, Pilato Jesuna otátate. Ie mei comini riire jicánoranomo Pilato ráinazaide. Afeno hebreo imaci uaido Gabátana mameide. Jáímaci daina Empedrado, mei nófiái ie finoina macáranona íllaza.

¹⁴ Jae pascua uicodirui jaiciri ítemo. Jira Pilato judíuaina daide:

—¡Benomo o illaíma ite! —daide.

¹⁵ Mei íadi afémaci caillíoidiaioi:

—¡Dama tíideza, oni ui! ¡Iena corai! —daidiaioi.

Jira Pilato íaioina daide:

—¿Omoi illáimana córaíticue? —daide.

Jira lletáriraini illáicomini uai otíaioi:

—Jáíe illáimana caímo íñede; dama romano jamánomoidillaíma, —daidiaioi.

¹⁶ Afemona Pilato íena íaioímo ite, afémiena coráillena. Mei jira íena uitíaioi.

Coráinafue

(Mt 27.32-44; Mr 15.21-32; Lc 23.26-43)

¹⁷ Iemo Jesús jino jaide. Ie coráilibici rocáoicaide Calavéramo; afe daíacade come ífócorai. Hebreo imaci uaido daina Gólgota.

¹⁸ Afénomo íena coráidiaioi. Afe llezica nágafene jáíimie íaillinoi coráidiaioi; Jesuna cígiide.

19 Pilato afémie mámece ibícimo cuetá ie coráinabícimo jóonetade. Afébicimo cuega daide: “Jesús Nazaret Imie, Judíuai Illaíma.”

20 Aillo judíuai afe cuegábici facádotiaioi, Jesús coráinano jofue áinori illa jira. Afébici daámami comini uáillaído cuega, hebreo, griego, latín diga.

21 Ie jira judíuai lletáiraini illaini Pilátona daide:

—Judíuai illaíma daí cueño. Mei íadi “Judíuai illámadícue daídímie” daí cúeiri, —daídíaioi.

22 Jira Pilato uai ote:

—Jae cue cuegáuai, dama daí ite, —daide.

23 Fuiríraini Jesús coraia mei, ie inícuiro llínuano cuatro fidi tizáruano fecádiaioi. Afe izói ie caifóferoi llínuano “Iere ñueraroi,” daídíaioi. Ua aferoi dájena tifoca, zotáinanona ifede. Caifona aná fuizájide.

24 Jira fuiríraini conímami daídíaioi:

—Dama ite, cúatañeíticai. Bai ñue onótaraji cai dotalle bumó jíiteza, —daídíaioi.

Daí Cuegáuai daína fuitátatiaioi. Aféuai daide: “Cue inícuiro dani fecádiaioi. Afemo onótaraji dotádiaioi.” Jira mei fuiríraini daí finódiaioi.

25 Jesús coráinabici áinomo ie ei ite afengo ebuño diga. Dáanomo Cleofas ai, María ite, María Magdalena ingo diga.

26 Jesús ie eina cióillano, iere izíruiga llófuegamie diga, ie eina daide:

—Ei, batí o jítone como maméidímie ite.

27 Iemo afe llófuegamiena ibana daide:

—Aféno mo o eina como maméidíngo ite, —daide.

Mei aféruillaído afe llófuegamie afengo ie jofomo ñue llíinote.

Jesús tállafue

(Mt 27.45-56; Mr 15.33-41; Lc 23.44-49)

28 Afe mei Jesús naga rafue fuitáinana fidide. Fídiano Cuegáuai fuitállena daide:

—Jiróacadícue.

29 Afe dinomo iciru rochírede vínona oruítaga rainaca. Ie jira jainoi fiillicide raa afe rochíredijina riáitatiaioi. Iemo razi ícoimo jóoniano ie fuemo dutádiaioi.

30 Jesús afe rochíredii jirode. Jíruano daide:

—Nana ja fuite, —daide.

Daina mei, ifo ana jíjicailla llezica tíide.

Fuiríraímie ie ducírirado Jesús ciraiğı faitade

31 Ja pascua uícodirui. Judíuai ocózinaillarumo coráicano íaioi abi coráinabícimo fiébillana jítañediaioi. Bie ocózinaillarui iere áillue. Ie jira Pilátomo jicádiaioi coráicano idai ditátallena. Iemona íaioi abi dinómona oni óllena jicádiaioi.

Jira fuiríraini jaillano nánoramie idai ditádiaioi. Jíáímie, Jesús diga coráicámie daje izói íena finódiaioi.

33 Ie mei Jesumo áinozillano jae tíidena ciódiaioi. Ie jira ie ídaina ditáñediaioi.

34 Mei íadi fuirírainimona dáamie ducírirado ie ciraiğı faitade. Iemona jainoi die diga tóide.

35 Bifue llotímie áfena ciódímie. Uáfueña daide. Afe uáfueño uai nabaide, omoi daje izói ínollena.

³⁶ Aféfuiai daií íficaide Cuegáuai daina ñue fuitállena. Afe uai daide: “Bu ie ícuruna dítáñeitaiói.”

³⁷ Jiáinomo Cuegáuai daide: “Iaiói bofécamie mo éroitaiói.”

Jesús raiáfomo jóonetaíói

(Mt 27.57-61; Mr 15.42-47; Lc 23.50-56)

³⁸ Afe meífodo José, Arimatea jofue ímie, Jesús abi uíllena Pilátomo jicade. Afe José Jesudo jácadímacimona, mei íadi judíuaina jacíruillano báinino jaide. Iemo Pilato fairíote; íemona José jaillano Jesús abi uite.

³⁹ Daje llezica nauí Jesumo naióna úrizaíbitímie, Nicodemo dúcide. Afémie treinta kilos dieze mérede zíochoa atide. Aféchoa mena zióredena ímuica.

⁴⁰ Daií José Nicodemo díga Jesús abi uillano, áronoi íniróido ie abi junide. Aferoi ziórena, mei díga zióredena fáigaza. Daií tíidino judíuai ráifrediaíói.

⁴¹ Jesús coraía áinori ocózinairabirí ite. Dínomo daa comue raiáfo, come nai ráííñenafo ite.

⁴² Aféfomo Jesuna jóoneaidiaillinoí, áinori illa jira. Ua dínomo íena jóonetaíillinoí, judíuai ocózinairabirí ite.

20

Jesús meine abído cáadímiena jaide

(Mt 28.1-10; Mr 16.1-8; Lc 24.1-12)

¹ Semana nanóidíruído Magdalena ingo María jítiramoicana raiáfomo jaide, ua nai jítireoidemo. Dúciillano raiáfo íbaina nofíci íñénana cíode.

² Ie jira aizícana jaide Simón Pedro illánomo. Dínomo jíáie llófuegamie Juan ite. Afémie íere Jesús izíruigamie. Íaillinoína daide:

–Jae raiáfomona cai Ocuíraima comini bairódiaíói. Ie íaiói jóoniano onóñedicaí.

³ Iemona Pedro jíáie llófuegamie díga jino jaillano raiáfo díne jáidiaillinoí.

⁴ Dájena aizídiaillinoí, íadi jíáimie Pedro baimo íere raírede; jira uícomo raiáfomo dúcide.

⁵ Ie abi ana jíjíillano raiáfo eromo eroide. Eróillano juníllaroina cíode, mei íadi jofó jáíñede.

⁶ Iemo Simón Pedro afémie óodana dúcide. Dúciillano raiáfomo jofó jaide. Abi juníllaroi díno jóoinana nane cíode.

⁷ Iadi Jesús ífo íbáinaroi ie juníllaroi dáanomó jóoiñede. Afe ífo íbáinaroi jabínota oni eneno jóonega.

⁸ Iemo jíáie llófuegamie, raiáfomo uícodo dúcidímie, jofó jaide. Afe finócafuena cíode. Cíóillanona áfemona ínote.

⁹ Mei Cuegáuai dáinana nai figo onóñediaíói. Aféuai daide: “Jesús tíillanomona meine abído cáadímiena jáite.”

¹⁰ Iemona afe llófuega íaillinoí jofomo jaide.

Jesús Magdalena ingo Maríamo cíocaide

(Mr 16.9-11)

¹¹ Mei íadi María jino raiáfo áinomo éecana ráíide. Eeia llezica abi jíjide raiáfo eromo éroíllena.

¹² Dínomo mena Juzíñamui abi ímie íaillinoí ángeles dainámaci úzerói jítdena cíode. Ua nauí Jesús abi illánori ráíidiaillinoí; dáamie ífo illánori, jíáimie ídai illánori.

¹³ Iemo Juzíñamui abi ímie íaillinoí jícanote:

—Ringo, ¿nibái éedio? —daide.

Jira afengo daide:

—Cue Ocuíraima oni ninomo íaioi uilla jira. Iaioi jóonianona onóñedicueza, —daide.

¹⁴ Afe daina llezica afengo gírecaillano Jesuna ciode; íadi íena onóñede.

¹⁵ Jira Jesús jicánote:

—Ringo, ¿nibái éacadio? ¿Bu jenódio? —daide.

Afengo comeci facade, afémie afébiri úiñoraíma; jira íena daide:

—Íma, afémie oni jíainomo jae o úiadi cuemo llone, meine cue uájilleza, —daide.

¹⁶ Jira Jesús aféngona daide:

—¡María! —daide.

Afengo ñue gírecaillano hebreo uaido daide:

—¡Raboni! —daide. Afe uai dobáicana daide, Llófueráima.

¹⁷ Iemo Jesús daide:

—Cue abi jetáñeno iri. Cue Moo illánomo nai caífo jáiñedicueza. Mei íadi cue ámatiaímo llujiri: “Cue Moo illánomo, daje izói omoi Moo illánomo caífo jáitícue. Ua cue Juzíñamui, omoi Juzíñamui dine jáitícue.” Daií íaióimo lloiri, —daide.

¹⁸ Ie jira Magdalena ingo María llófuegamacimo llujjide. Afengo Ocuíraimana cíoilana lloite, nana bie afémie aféngona daináuai diga.

Jesús ie llófuegamacimo cíocaide

(Mt 28.16-20; Mr 16.14-18; Lc 24.36-49)

¹⁹ Aféruído, semana nanóidíruido afe naio llófuegamaci gairídíaioi. Naze íbáillano judíuaina jacíruillamona itíaioi. Iemo Jesús jofo eromo cíocaide. Iaioi cígímo náidazaide. Iaioi uáiduano daide:

—Omoímo comeci caímare uái iri, —daide.

²⁰ Daií dainano, ie onoi, ie ciraigí diga íaióimo ácatate. Llófuegamaci íaioi Ocuíraimana cíoilano íóbicaídiáioi.

²¹ Iemo Jesús dáanomo íaióina daide:

—Omoímo comeci caímare uái iri. Moo cue ória izói daje izói ómoína óreitícue, —daide.

²² Afe mei íaióimo jágíilli fúunuano daide:

—Ñuera Joréñona mai omoi ono.

²³ Naga come ie fiénidino omoi fáicanocaiadi fáicanocaite; mei íadi omoi fáicanocaiñeniadi dóñega izói fiébite, —daide.

Tomás meine abido caade Ocuíraimana ciode

²⁴ Iadi Tomás, guarámiena maméidímie, doce dígamiedemona, Jesús cíocailaruido íñede.

²⁵ Ie mei jíáie llófuegamaci íena daide:

—Ocuíraimana ja cíódícaí, —daídíaioi.

Mei íadi Tomás íaióina daide:

—Ie ónoímo ite boafe, puntilla meífo, cue cíóñenia, cue onocai aféfodo ñuitáñenia, cue onoi ie ciraigí méifodo ñuitáñenia, íinoñeitícue, —daide.

²⁶ Ocho dígamona íllamona llófuegamaci meine gairídíaioi. Afe llezica Tomás afémaciri ite. Iemo jaca naze ibaica íadi, Jesús jofo eromo cíocaide. Iaioi cígímo náidajano uáiduano íaióina daide:

—Omoímo comeci caímare uái iri, —daide.

²⁷ Iemo Tomásna daide:

—Benomo o onocai ñúitaibi. Cue ónoimo éroi. O onoi cue ciráigimo ñúitaibi. Jáanocaiñeno iri. ñnori, —daide.

²⁸ Jira Tomás uai ote:

—¡Cue Ocuíraima! ¡Cue Juzíñamui! —daide.

²⁹ Jira Jesús daide:

—Tomás, ja cuena ciónamona ñnotio. Jamánomo ióbidino cuena ciónedino íadi ñnotiaioi, —daide.

Bibénico nibái mei cuega

³⁰ Bífuiái baímo Jesús aillo jíáie cíofinina raa ie llófuegamaci uícori finode. Aféfuiái bibénicomo cúeñega.

³¹ Mei íadi ja bie llogáuai cuega, Jesús Crístonana omoi ñnollena; daje izói afémie Juzíñamui Jitona omoi ñnollena. Ua jae cuega, omoi ñnuamona cáaillino ómoimo ie mámecido íllena.

21

Jesús siete diga ie llófuegamacimo cíocaide

¹ Afe mei Tiberias jorai fuédamo Jesús ie llófuegamacimo meine cíobicaide. Bie izói cíocaide.

² Ie llófuegamaci dáanomo itíaiói. Dinó ite Simón Pedro, Tomás níimie jíáifodo mameina Guarámie, Galilea jofue Caná ímie Natanael, Zebedeo jító íaillinoi, jíái mena llófuegamie diga.

³ Simón Pedro íaioina daide:

—Fácuaidicue, —daide.

Jira daidíaiói:

—Mai nana cai fácuaili, —daidíaiói.

Iemo nocáe eromo caifo jáidiaioi. Afe naio chámuniaína oñédiaioi.

⁴ Jítiramo monáiacademo, Jesús ja jorai fuédamo náidaide. Mei íadi “Jesús” daíñediaioi, llófuegamaci íena íaioi onóñena jira.

⁵ Iemo Jesús daide:

—Omoi, ¿chamuna oñédiomoi? —daide.

Uai otíaiói:

—Jíi, oñédicai, —daidíaiói.

⁶ Jira Jesús afémacina daide:

—Nocáe nabézimo llóiji omoi dota, afe llójjimo jíiteza, —daide.

Jira daí finódiaioi. Ie ñnuamona llójjina jáinoimona caifo zonónidiaioi, iere aillo chámuniaí íllaza.

⁷ Iemo Jesús izíruiga llófuegamie Pédrona daide:

—¡Baie cai Ocuíraima! —daide.

Simón Pedro, Jesús ite dainana cacáillano, ie jínofecuiro jítade, nauí duiñoca jira. Jítanona jóraimo tícacaide Jesumo jaillena.

⁸ Jíái llófuegamaci chámuna oruítaga llójjina oni zocana nocaedo uitíaiói. Afe mei afémaci jorai fuédamo dúcidiaioi, nai are íaioi íñena jira. Afémaci cien metros dinó bai itíaiói.

⁹ Eniemo dúcillano, chamu pan diga iraimo ruícana cíódiaioi.

¹⁰ Jesús íaioina daide:

—Jae omoi oga chámuniaimona atíri, —daide.

¹¹ Simón Pedro nocaemo jaillano, afe llójjina ari guamáemo zote. Ja ciento cincuenta y tres jéerie chámuniaina oruítaga, mei íadi afe llójji cuáiñede, ñi aillo chámuniái illa íadi.

¹² Iemo Jesús íaioina daide:

—Mai omoi güizáibiri, —daide.

Llófuegamacimona buna ¿Búdio? daíñide. Afémie Ocuíraimana onódiaioiza.

¹³ Ie mei Jesús ánozillano afe pan lláinota íaioimo fecade. Daje izói chámuna fecade.

¹⁴ Daí Jesús tíllanomona meine abido cáadimiena jáillamona dacaiñoámani ie llófuegamacimo cíocaide.

Jesús Simón Pédro mo úrite

¹⁵ Güilla méifodo, Jesús Pédro mo jicánote:

—Jonás jító, Simón, ¿baimaci baimo cuena izíruitio? —daide.

Pedro uai ote:

—Jíi, Ocuíraima, ona cue gáinana onódio, —daide.

Jesús íena daide:

—Mei jira cue ovéjatiruai o ecari, —daide.

¹⁶ Jesús meine dáanomo íemo jicánote:

—Jonás jító Simón, ¿cuena izíruitio? —daide.

Pedro uai ote:

—Jíi, Ocuíraima, ona cue gáinana onódio, —daide.

Jesús daide:

—Mei jira cue ovéjaiaí uíñori, —daide.

¹⁷ Ja dacaiñoámani Jesús meine abido íemo jicánote:

—Jonás jító Simón, ¿cuena gáidíio? —daide.

Pedro jae zúucaide, Jesús bie íraicaíño íena gáinana jicánua jira. Jira íena daide:

—Ocuíraima, o nana onódioza. Ona cue gáinana onódio, —daide.

Jesús íena daide:

—Mei jira cue ovéjaiaí o ecari.

¹⁸ Uáfueña ona dáitíicue, iere o jítócomena llezica, jaca o comeci jíitaina izói iníroina jítafiredio. Daje izói nana o jáiacananomo jáifiredio. Mei íadi o eímaille llezica o onoi oni zítaitio, jáímie o inícuíro jíátallena, daje izói jáímie o uíllena o jáiacañenanomo, —daide.

¹⁹ Afe dáiñado Pedro nie izói tíitena Jesús daí onótate. Afe ie tíilledo Juzíñamuimo ñue ebírenafue nítaite. Ie méifodo íena daide:

—Cuedo biri, —daide.

Izíruiga llófuegamie

²⁰ Pedro gírecaillano Jesús iere izíruiga llófuegamie Juaana ciode. Afémie óodana bíllana ciode. Afémie nauí íraicaíño güílláruído Jesús abímo ráidímie. Afémie, “Ocuíraima, ¿bu o fecalle?” daidímie.

²¹ Pedro Juaana ciona llezica Jesumo jicánote:

—Ocuíraima, ¿báímie nie izói íite? —daide.

²² Jira Jesús uai ote:

—Afémie cue billíruimo caadi cue óiacaia ¿ómona mei ñibai? O cuedo bi, —daide.

²³ Jira Jesús jaináidinori taino daináfuenta fidíbicaidiaioi. Afefue daide, “Bie llófuegamie tíñeite.” Mei íadi Jesús afémie tíñeiteza daiñede. Fia dáideza, “Afémie cue billíruimo caadi cue óiacaia zómona mei nibai?”

²⁴ Bímie llófuegamacimona aféfuiai uáfuenta llotímie. Aféfuiai cuetímie. Afémie daina uai uáfuenta onódicaiza.

²⁵ Jesús jíáie finócafuiái nai aillo ite. Nana aféfuiai dámierie cúeiai; jamánomo aillo rabénicuaina zúite. Ua nibai afe rabénicuai jónellino nániena báñeite. Jae níie.

JESÚS ORÉCAMACI FINÓCAFUIAI

Los Hechos de los Apóstoles

Ñuera Joreño billifue úicodo llogáuai

¹ Cue izíruiga Teófilomo nane omo cueticue. Cue nánoidibemo nana Jesús bie éniemo illa llezica nanómona ie llogáfuai ie finócafuiai diga omo cueticue.

² Ua ie monamo jáillaruimo finócafuiai cueticue. Nai monamo ie jáiñena llezica ie orécamacina nizede. Níziano Ñuera Joréñodo íaioina llote nie izói finólleña.

³ Ie tílla meífodo, Jesús dáamie cómena íaioimo cíocaide. Cuarenta dígarui uáfori cíocaifirede. Afe cionanuedo ie cáanano ñue uáfueña daítate. Afe llezica Juziñamui illáimana illíruido íaioimo úrite.

⁴ Orécamaciri illa llezica, Jesús íaioina rairuide Jerusalémona oni jáiñeillena. Íaioina daide:

—Cue Moo uafue uai llote: “Ie Ñuera Joreño ómoimo fecácade.” Afe fecállirui omoi úíñori, nauí ómoimo cue llua izói.

⁵ Uáfueña Juan fia jáinoido báutizade. Mei íadi íanori íllamona Ñuera Joreño ótiomoi, —daide.

Jesús caifo monamo jáillafue

⁶ Jesumo gairíllano jicánotíaioi:

—Ocuíraima, ¿ua birui Israel nairai illáimaillena meine caimo itátaitoi?

⁷ Jira Jesús uai ote:

—Moo afefue finóllirui ómoimo ónonide. Dama afémiemo ríino afefue finólleña íte.

⁸ Mei íadi Ñuera Joreño ómoimo bíadi, ríino ótiomoi. Iemona cuedo úrizaitiomoi, ua Jerusalemo, nana Judea éniemo Samaria énie diga. Ua jamánomo jica íte itínuaiaimo llujítiomoi, —daide.

⁹ Daí daina meífodo, nana íaioi éroillamo, afémie caifo ráiñuano monamo uiga. Iemo mona ero úillie íena ferínote. Iemona jaca íena cíóñediaioi.

¹⁰ Jesús caifo jáidemo monamo eróioidiaioi. Afe llezica mena come úzecuiro jitada íaioi abímo cíocaide. Juziñamui abí íaillínoi.

¹¹ Daidíallínoi:

—Galilea íñíai, ¿nibái mei monamo eróioidiaioi? Dámie Jesús, afe ómoimona caifo úilliedo jáidímie, afémie íe jáillana omoi ciona izói daje izói meine ana biite, —daide.

Judas meifo méidollena Matías nizédiaioi

¹² Ie mei Olivo ídumona oni jáillano abído Jerusalemo bitíaioi. Jerusalén áinori afe idu íte. Ua ocózinaillaruido macácana jailla daa kilómetro dieze izói íte.

¹³ Afe jófuemo dúcillano caifófecomo íaioi ífirenenomo jáidiaioi. Bie íaioi mámeciai: Pedro, Santiago, Juan, Andrés, Felipe, Tomás, Bartolomé, Mateo, Alfeo jító Santiago, Iere Járidotimacimo dúidímie Simón, Santiago ama Judas.

¹⁴ Nana afémaci dáanomo gairífrediaioi Juziñamuimo úrillena. Afénomo Jesús ámatiai gairífrediaioi, íe ei María diga naa jáíie ringóniari.

15 Aféruillaído Pedro afe ámatiai dainámaci cígiri caifo náidaillano úrite. Afe ámatiai ciento veinte dígamiede. Afémacina daide:

16 —Amataiai, Ñuera Joreño Cuegáuaimo Davido llote: “Judas meifo cai cígiri méidolle jitáirede,” daide. David cuegáuai uícodo llote: “Judas Jesús lláitaitimaci ífoite.”

17-18 Mei jíi, afe Judas dani cáimona. Bie cai táijina afémie dibénemo ite. Mei íadi afe meífodo cimoi cúinano ágüicaillano caifona ifo dinena éniemo baiíde. Baiíllamona ie jebe bójicaide. Afemona nana ie eromo itínuiái jino cocide. Afe mei ie fiénidifue iba úcubedo ja ie raillíbiri ibádiaioi.

19 Jerusalén itímaci áfena íaioi fídiano, afébirina “Acéldama” jitádiaioi. Afe mámecei íaioi uaido dibénedo “Die illábirí” dáiacade.

20 Mei jírrari Salmos ibénicomo daí daide:

Daí o jofo zóofefiteza

Buna afécomo íñeilleza.

Jíáifuedo daide:

Afémie táijina jíáima ólleza,

—daide.

21 Cai Ocuíraima Jesús nana cai diga illáruillaído caíri macádino birui cai cígimo itíaioi.

22 Jesús báutizaruimona, ie monamo jáillaruimo caíri jáicadiaioi. Mei jira afémacimona dáamie cai dájellena jitáirede, Jesús meine abido cáaillafuemo uai nabáillena.

23 Jira dainámacimona mena come oni naidánetaioi. Dáamie daámani mámeçirede: José Barsabás Justo. Jíáimie Matías.

24 Ie mei Juzíñamuimo úritiaioi; daidíaioi:

—Cai Ocuíraima Juzíñamui, nana comíni comeci onódimiedioza. Baiíllinoimona o nizécámie caimo onótari orécámie táijina finóllena.

25 Afe táijinamona Judas ie fiénidifue ícoinia oni baiíde. Baiíllano dama ie zefuinaillinomo jaide.

26 Iemo onótarají dotádiaioi. Jae Matíasmo níjide. Afe llezícamona afémie once orécamiiaimo dájena jaináicaide.

2

Ñuera Joreño billafue

1 Pentecostés irui ráfuemo jae dúcide. (Afe fue güille jofo óinarui rafue.) Afe rafue dúcidemo jae nana dáanomomo gairídiaioi.

2 Ie mei rairéfeicana minica izói ficire monámona cácaicaide. Jairifo riire jáiñua izói cácaicaide. Nana íaioi ráinaco eromo cácaizaibite.

3 Iemona íífiái izói iráiciai íaioimomo cíocaide. Nana illa dígamierie íaioimomo níjizaibitiaioi.

4 Afe llezica nana Ñuera Joreño úicaigaiaioi. Iemona jíáie náiraiaí uáillaído como úritiaioi; mei afe Ñuera Joreño íaioi úritade.

5 Aféruillaído Jerusalemo aillo judíuái náganuiamona bitíaioi. Ua íaioi Juzíñamuimo jitáirede finóllifuiái finuaibitiaioi.

6 Afe riire ficírenana cacáillano comíni dáanomomo ofidiaioi. Níie izói comeci fácana onóñediaioi nágazie dani íaioi uáillaído íaioi cacana jira.

7 Abi fáigacadiaioi; daidíaioi:

—¿Nana bie úriraini Galiléamona bitímaci; uáfueñede?

⁸ Nágamierie daní cai uaido íaioi úrillana ¿ñie izóí cacáfiredicaí?

⁹ Benomo nágaziai ite: Partía imaci, Media imaci, Elam imaci, Mesopotamia imaci, Judea imaci, Capadocia imaci, Ponto imaci, Asia énie imaci,

¹⁰ Frigia imaci, Pamfilia imaci, Egipto imaci, Africa illánie Cirene batífenemona bitímaci diga. Afe dáanomo áinori ite romano imaci gairídíai. Bie románomana dáarie judíona jococa. Jiái romano imaci judíuai Juzíñamui mo ínuafuena jeire otíai.

¹¹ Afe llezica Creta imaci bitíai Arabia imaci diga. “Mei íadi Juzíñamui caimare llogáfuiái ñue finócafuai diga, nágamierie daní cai uáillaído cacádicaí,” daidíai.

¹² Nana fáigacaidíai. Iai comecei fácana onóñediai; jira jicánotíai:

—Nana bie caimo comuídifue, ¿ñie izóí caina daiíacade? —daidíai.

¹³ Mei íadi jíaimaci íai uai áifeduardo daidíai:

—Bimaci jífaídíai, —daidíai.

Comínina Pedro daínafue

¹⁴ Ie mei Pedro once diga orécamaciri náidaillano comínimo riire úrite; daide: —Judea comíni naa Jerusalemo itínuaíari cácarei. Bie ráfuena omoi onoiri. Dáíticueza ñue omoi cacáreiri.

¹⁵ Bie íñiai jífaíñedímaci omoi comecei faca ízoi. Jitoma nai fuiri daídimo. Jítiramo díbenemo comíni jaca jífaífnidíai.

¹⁶ Bífue jíáfodo ite. Afe bifue uai lloaíma Joel jaiai uícodo llogáuai. Afémie daide:

¹⁷ Juzíñamui ómoína daide:

“Íraíruillaído cue Joreño nana náíraíaina, jainoi tua izóí fáicanocaiñeno íaíoína úcaítaitíe.

Omoi jíotíai jízatíai diga cuedo úritíai.

Jítócomíni nicaído ciónafuái izóí cíotíai.

Einamaci ñuera nicaído nicáritíai.

¹⁸ Aféruillaído cue Joreño cue tájítagamíaina naa cue tájítaga ringóníari ñue úcaítaitíe.

Iemona cuedo úritíai.

¹⁹ Caífo monamo jacínaitadínona cíotaitíe;

Aféruimo ana éniemo onótajafuena fínotíe.

Afe onótajafue díena cíotaitíe; iraina cíotaitíe, jamánomo irai úillíena cíotaitíe.

²⁰ Afe monado jitoma jííreficaíte, fui die izóí jáite.

Daí íite cai Ocuíraíma Jesucristo billíruimo nai dúcíñenia.

Afémie billíruí íere ebíreitíruí.

²¹ Nana Juzíñamui íaioi canóllena íemo jícadíno jíllóbicaítíai.”

Aquíe izóí Juzíñamui Joeldo daide.

Iemo Pedro nai úrillano daide:

²² ‘Mei jí, Israel nárai cue daíllífuemo cácarei. Nazaret ímie Jesús omoi uícori Juzíñamui ñue facácamie. Uafue aillo fáigatate ráaniaído ñue facátaga. Daí Juzíñamui omoi cígiri afémiedo finode. Aféfuíaina ñue fidídímoíza.

²³ Mei íadi afémie omoi fecállíruimo maíano uitá fatíomoi, Juzíñamui jaiai uícodo comécíífuíai onótafuái diga daína izóí. Uafue fíenídímacido íena coráítatiomoi.

24 Mei íadi Juzíñamui afe tílla cuinaca raa zuita izói, zúitano íena meine cáatate. Mei tíllafue jaca íena anáfenonide.

25 Mei illaíma David Jesudo úrillano daide:

Ocuíraímana cue uíecori cíófredícue.

Afémie cue nabézimo izói íte, minícana cue jácicaíticue.

26 Ie jira cue comeci cáimafuena iere íte, afe llezica cue fuemo íte cáimafuíaído úriticue.

Afe jira daje izói cue íeizi ñue ocózinaitaiticue, mei tíllamona meine cue abina cáataítio.

27 Mei jíi cue joréñona tíidinomo fiénocaiñeítio.

Afe izói o izíruiga táijitagamie abi rifáíllana ráiruitio.

28 Cáatatinomo jóoide ío cue llófuetio.

Cue diga o íllado, cáimafuena cue orúítaitio, —daí daide David.

29 ‘Amatíai, cácarei. Cai jáíairagima David tíide raiga uáfodo onórede. Afe raíífo nai cai diga íteza.

30 Mei afe David uai llóraíma. Jaíai Juzíñamui uícodo uafue llóllena ríífuedo íena daide:

—O emódoídiziemona dáamie Cristoite. Afémie o illáímana illánomo ráinaite, —daide.

31 Jira daí David, uícomo ciona izói Cristo meine abído cáaillafuedo úrite. Afe izói daide:

—Cristo joreño tíidinomo fiébiñeíte. Ie íeizi rifáíllana ráiruícaza, —daide.

32 Mei jíi Juzíñamui afe Jesuna meine abído cáatate. Aféfuemo nana cai uai nabáíraímacídícaí.

33 Daí Juzíñamui nabézimo Jesús naidánega; naidánia meífodo Móomona uícodo lloga Ñuera Joreño fecállifue llánote. Llínuana nana bie omoi ciona, omoi cacana raa finode. Nana aféfuíai afémiemona bite.

34-35 Mei David monamo jáíñedímie, mei íadi dama David daí daina:

“Caifoide Ocuíraímana cue Ocuíraímana daide:

—Cue nabézimo rainai, o éoídino cue anáfenollíruimo, —daide.”

36 ‘Nana Israel nairai, maí comeci jííñeno omoi onóiri: bie omoi coraíca Jesús Juzíñamui Ocuíraímana ítátate: Crístona ítátate, —ací dínó Pedro daide.

37 Aféfuena cacáíllano, iere comeci llícitagaíaiói. Afemona Pédro mo jícánótíaiói jííe orécamací diga:

—Amatíai, ¿níie izói ñéíticai?

—daídíaiói.

38 Ie jira Pedro uai ote:

—Omoi illafue Juzíñamui uíecomo meídori. Omoi nágamíerie Jesucristo mámeçido báutizatari. Omoi íaífuíai oni dófilleza. Daí Juzíñamui íe Ñuera Joreño ómoína úcaíteza.

39 Afe bie uícodo llogáuai ómoie. Daje izói o jíótíai íe. Daje izói nana jícarie ítino íe; ua aféuái nana cai Ocuíraímana Juzíñamui uáídogamací íena, —daide.

40 Aféuáíllado dáanomo jííe uáíllado Pedro íaíoi lluno daide:

—Bie duere finóbitímacimona omoi jíllóiri, —daide.

41 Mei daí afémie úrilla uaina jeire otino diga báutizagaíaiói. Aféruído Jesumo íínotímacimo tres mil dígamíai dáazienua jáínacaidíaiói.

42 Nana bimací orécamací llófuíafuemo jáícina jáídíaiói. Afe daí conímamo ñue coméçídíaiói. Afe llezica Juzíñamuimo úrifredíaiói, íe mei gairíllano Jesús jae íraícaíño güílla izói finódíaiói.

Nano fueñe ñnotino illafue

⁴³ Aféruillaído nana jácicaidiaioi; mei aillo cíóraininafuiái naa onótate raa diga orécamací finódiaioiza.

⁴⁴ Jae nana ñnotino ñue dájena itíaiói, íemona íaiói ráaniai conímamo jeruñño ífrediaioi.

⁴⁵ Mei jii íaiói illábiri jíáie ráifide raa diga fecádiaioi. Fécanona afe úcube nágamíai imaci jitailla izói jofo conímamo fecáfirediaioi.

⁴⁶ Nágaruillaído gairíracomo gairídiaioi. Íaiói jófuego pan fécano dáanomo cámafuedo, comeci mánainafuedo güitíaiói.

⁴⁷ Juziñamui íóbitaoidiaioi. Afe llezica nana comini afémacimo ñue comécidiaioi. Afe daí cai Ocuíraíma nágaruideo afe ñnotimacimo jíáie jíllloizaíbitimaci dáamacina itátate.

3

Aidaima jíllotate

¹ Jáíruido jítoma ana ítemo Pedro Juan diga gairíracomo jáidiaillinoi. Afe Juziñamuimo comécido úrioína llezica.

² Nágaruillaído jocóinamona aidaima dinomo ífirede. Ie comini gairíracomo íena úifrediaioi. Uillano afémiena nazemo ie ráinaifrediaioi, jofo jáioidinomona dúcaillano fecaca úcube jicállena. Afe naze mámece Ebíredize.

³ Aidaima Pedro Juan diga gairíracomo jofo jáillana cíoillano dúcaillano fecaca úcube íaillinoimona jicade.

⁴ Mei jira Pedro Juan diga íemo érocadiaillinoi. Pedro íena daide:

—¡Caimo érocail!

⁵ Iemona afémie náicaide. Comeci anado daide: “Ñibaí minícana cue iite.”

⁶ Iemo Pedro íena daide:

—Cue úcubenidicue; óronidicue; mei íadi cuemo ítena o íiticue. Nazaret ímie Jesucristo mámeceído náidacai. Maca, —daide.

⁷ Iemo Pedro onoi nabézido íena naidánete. Afe daí finua llezica ie idai mairíbicaide, ie idácoíñuai diga.

⁸ Iemona aidaima caífo tícaicaide. Caífo náidaillano macade. Afémie íaillinoído ja jofo gairíracomo jaide. Tícaticacana jaide. Juziñamuimo íóbitaoidie.

⁹ Nana comini ie mácana cíódiaioi.

¹⁰ Aferi iere jacínaifcaidiaioi naa abi fáigacaillafue diga, afémie daí náidacaillari. Afémiena onódiaioiza. Afémie Ebíredize mámeceíredizemo ráíifredimie, gairíracomo úcube jicáfiredimie.

Pedro comínimo Salomón jinófenemo macáranomo llófuete

¹¹ Jíllotaga aidaima Pedro Juan diga íaillinoído níjinijicaide. Aféfuerei fáigacaillano nana comini gairíraco dibénemo jáidiaioi. Salomón jinófenemo macáranomo Pedro, Juan, aidaima diga illánomo afe comini aizícana jáidiaioi.

¹² Pedro afena cíoillano comínina daide:

—Ísrael náirai, cácarei. ¿Omoi minícari fáigacaidiomoí? ¿Ñibaí mei cócomo eróizaíbitiomoí? Bie íma dama coco rínodo jíllotano macátaticoco, ñibaí daí comécido daidíomoí. Daje izói coco Juziñamuimo ñue comécinafuedo afefue finódicoco, daí ñibaí cócona comécido daidíomoí. Iadi aféfuiaído finóñedicoco.

13 Mei íadi jaífodo joide. Cai jáiairagima Abraham, Isaac, Jacob diga, íaioi Moo Juziñamui ie Jitó Jesumo baimo ñúefuena nitade. Afe Jesús ríimacimo omoi fecácamié, Pilato ie zuitáacana llezica áfena ráiruitiomoiza.

14 Aféruído jaícina nífuenidimie zuitátajana jicáñediomoí, mei íadi jaífodo jicádiomoí. Come fatímie zuitátatiomoí.

15 Afe daíí cáatatiño fecádimie titádiomoí. Mei íadi Juziñamui afémiena tíllanomona meine abido cáatate. Aféfuemo uai nabáiraimadicoco.

16 Bie dáamie Jesús mámecido, ie mámecimo ínuafuedo omoi ciona, omoi onoiğa aidaima jae mairíbicaide. Afe Jesumo ínuafue íena ñue jaícina jillotate, omoi uiécomo cíocaidimie illa izói.

17 Amataiai, onódicueza, mei omoi naa omoi illáiniri Jesuna fáiacana llezica omoi finócafueña onóñeno íena fatíomoí. Uáfueña omoi finócafueña onóñenano finódiomoí.

18 Mei íadi Juziñamui ie uai lloráimado uícodo daina uai bie izói fuitade. Aféuai daide: “Te Cristo duere zefuúllifue jítáirede.”

19 Mei ie jira omoi mácafuiái méidori. Omoi illafue Juziñamuimo ñue jaícina jóneri. Omoi íaifuíai oni muiñólleza. Iemona cai Ocuíraima Jesús caina cánuafuiái mánainaruillai izói caimo orérede.

20 Aféruimo nano uiécomo ómoiena mamécamié Jesucristo Juziñamui óreite.

21 Mei íadi birui Jesucristo monamo fiébirede, Juziñamui naga rafue jaícina nai jóneñeñilleza. Afe daíí jaiáidiruillaimo ite ñuera uai lloraini daidíaiói.

22 Mei daíí Moisés cai jáiairagimana daide: “Cai Ocuíraima Juziñamui omoi ámatiaimona nahí uai lloráimana ómoimo óreite, Juziñamui cue ória izói. Afémie ómoína nana daináfuiái jeire omoi oíri.

23 Mei afe uai lloraima dainana jeire oñédino Israel náiraimona oni táinocaite. Uáfueña íficaite.” Daíí daide Moisés.

24 Mei daíí nana uai lloraini, Samuélmona batine ite lloraini diga bie írairuillaido úrite.

25 Juziñamui ie uai lloráinido uícodo daináuailai ja birui ómoiri jino llotátaga. Juziñamui cai jaiáiragimacimo íbana ñuera raa finóllifue llote ñue omoi íllena. Afefue Abrahamo llote. Daide, “Nana énie nairai o emódomo comuídinodo ñue caimare íficaitiaíoi,” daide.

26 Mei Juziñamui ie Jitó caata meífodo nano fueñe ie Jitó ómoimo orede caimare omoi íllena, ómoimona nágamiiai ie íaifue fáicanocailleña, —daide.

4

Pedro Juan diga ráiredino uiécomo uiga

1 Pedro Juan diga nai comínimo úrioidemo, lletáriraini gairíraco úiñotino illaima diga bitíaiói. Daje llezica saduceo comini bitíaiói.

2 Pedro Juan diga comini llófuetiaillinoí. Íaioína daide: “Comini tíllanomona cáatafue Jesudo ácataga.” Daíí llófuiari como bitímaci ríicaidiaíoi.

3 Iemona íaillinoína llaitádiaíoi. Lláitano íaillinoína llavéracomo jítiramoidiruimo íbáidiaíoi, ja nauízaila jira.

4 Mei íadi aillo afe úrillauai cacáдино ínotiaíoi. Afena ínotimaci dani íñíaií facádua cinco mil áinomo dúcide.

5 Afe jáiruimo Jerusalemo judíuai illaini, éinamaci, naa ocuífue llófuerainiri gairídiaíoi.

⁶ Afe llezica afénomo lletáriraini illaíma Anás ite. Afe dáanomo ite Caifás, Juan, Alejandro naa lletáriraini illaini comíniri.

⁷ Iemo Pedro Juan diga atítatíai. Atíano íai. Cígimo naidáneta jicánotíai. —¿Nie rínodo bífuiai finódiomícoi? ¿Bu mámedico bífuiai finódiomícoi?

⁸ Mei jira Pedro, Ñuera Joreño úcaigamienaza daide:

—Nairai illaini, Israel éicomíni, omí cácarei.

⁹ Mei afe baie iráredimíemo como finoca ñúefuena jicánotíomí. Mei ñie izóí afémie jíllotaga daí daidíomí.

¹⁰ Mei jira omí uécomo jino uáfodo llóitícoco, nana Israel nairai fidíillena. Afémie omí uécori Nazaret ímie Jesucristo mámedico, omí coráicamie mámedico íocire ite. Afe coráicamie (Jesucristo) tíllanomona Juzíñamui meíne abído cáatate.

¹¹ Bie Jesús omí jofo níraini omí dotaca jofocai izóidímie. Mei íadi afecai uálliraina jáizaide.

¹² Nie jíaimíemo jíllonafue íñede. Jesucristo jíai daítade jíllotaraimana cáimo íñede, afémiedo cai jíllóillena. Ua nana éniemo daítade jíllotaraimana íñede, —jaca dínnori Pedro daide.

¹³ Iemona rímaci Pedro Juan diga méaicaiñeno úrillafue cacáíllano, íaíllinoi llófueñegaíallinoi íllana fídía llezica, íere fáigacaidíai, jamáimíeíllinoi illa jira. Iemona rímaci bíallinoi Jesudo macádino daí íaíllinoímo úbicaidíai.

¹⁴ Afe emódomo jíllotaga aídaima dínomo íaíllinoi abíri naidaide. Ie jira aféfuena jáanoicana daíñide.

¹⁵ Mei jira gairídínomona íaíllinoína omí orédíai, dani jofo conímamo íai. Íaínoína jira.

¹⁶ Daidíai:

—¿Bie íma íaíllinoína nie izóí ñéitícaí? Mei jíi, nana Jerusalemo bitino bie cíorainina onótate raa íaíllinoi fínuaífuena onódíai; meí aféfuena jáanonídícaí.

¹⁷ Mei íadi mai íaíllinoi cai jácidolle, afefue comínido jamánomo jalléíñellena. Afedo íaíllinoína ráiruitícaí, Jesús mámedico ja benómona batine úríñeíllena, —daidíai.

¹⁸ Mei jira íaíllinoína jíritíai. Íaíllinoi dúcidemo ocudíai:

—Jesús mámedico jíi mai due jiza úríñeno iri. Afe daí llófueñeno iri, —daidíai.

¹⁹ Mei íadi Pedro Juan diga uai ote:

—Juzíñamui uécomo níí fue baímo ñuena comeci omí faca: omínoa ñue cai cacáreíllena, níbai jíáífo Juzíñamuína ñue cai cacárellena.

²⁰ Mei jíi cai cíonafue cai cacánafue diga aféfuemo úrillana fáicanídícaí, —daide.

²¹ Mei jira rímaci íaíllinoína jácidotíai. Ie meí íaíllinoína zuitadíai. Íaíllinoi duere fínóllí fue baíñedíai; nana comíni afe fínua jira Juzíñamuímo íóbíodíai. Íaínoína.

²² Afe cíorainínafuedo jíllotaga aídaima, afémíemo cuarenta fímona baímo ite.

Ínotino méaicaiñenafue comeci ríno diga jícadíai

²³ Pedro Juan diga íaíllinoi zuitaina meí íaíllinoi nabáíñíai íllánomo jáidíallinoi. Dínomo afémacímo nana lletáriraini illaini éínamaci diga íaíllinoína dáínana llotíallinoi.

²⁴ Aféfuena cacáíllano nana dáanomo Juzíñamuímo úritíai. Daidíai:

—Cai Ocuíraima, O Juzíñamuina; mona, énie, monaillai naga ráaniairi finódimiedio.

²⁵ O Ñuera Joréñodo, o táijitagamie Davido daidio:

¿Nibái mei náiraii caillíoidiaioi?

¿Nibái mei comini táinofuiaiimo comeci facádiaioi?

²⁶ Enie illaini Juzíñamuina ie Cristo diga anáfenuai bitiaioi.

Daje izói jofue illaini Juzíñamuimo ofidiaioi ie Cristo diga áfedo afémiemo fuiríllena, —daide.

²⁷ Uafue bie jófuego Herodes, Ponico Pilato diga o nífuenide Jitomo fiени gairídiaioi. Afénomo jicánemaci Israel comíniri fiени gairídiaioi, mei íadi omo jaináidimie Jitó illáimana ja jáitatio.

²⁸ Afe fiени íaioi gairíllafuedo nana o uícomo uaido finócafuiaiimo dánana finódiaioi. Afe daí íficaillena jítáiretadio.

²⁹ Cai Ocuíraima Juzíñamui, mai birui cai íaioi jáciduamo eroi. Jae o táijitagamacidicai. Afemona ñue méaicaiñenafue caimo fecari, o úrillauai jino jácicañeno cai llóllena.

³⁰ Afe llezica omo ite ríinodo comini íaioi dúicomona ñue jíllotari. Afe izói o nífuenide Jitó mámevido ciórainina onótate raa finori, —dinori daidiaioi.

³¹ Juzíñamuimo íaioi úrilla fúillamona afe íaioi gairíllano docáiricaide. Afe llezica nana Ñuera Joreño úcaigaiaioi. Iemona Juzíñamui úrillauai méaicaiñeno jino llotíaioi.

Finotimaci íaioi ráaniaina jeruñeno “Nana caie” daidiaioi

³² Afe aillo irai ca íinotimaci dáaziena nana ñue jaináidiaioi. Ua daje izói dájemo comeci facáoidiaioi; daje comeci jitailla uai íaioimo ite. Buna afémie ráaniaina “Dama cueie” daíñede, mei íadi nana comini íaioi ráaniaina “Nana caie” daidiaioi.

³³ Orécamaci Ocuíraima Jesús cáanafuemo aillo ríinodo uai nabáioidiaioi. Juzíñamui nana cominina iere caimátaitade.

³⁴ Íaioi cígiri jítáiredena ráanidimie íñede. Nana ibácana énieredino jofóredino diga áfeniai fécano afe oge úcube atidiaioi.

³⁵ Atiano orécamacimo izájidiaioi. Iemona orécamaci nágamieriemio íaioi jítaina dieze fecádiaioi.

³⁶ Afe izói íaioi cígiri Leví izíe ímie finode. Afémie mámece José. Monáillai zafedu Chípreno jocócamie. Orécamaci íena jíáie mámeceina jítádiaioi. Afe mámece Bernabé daína Fíradimie.

³⁷ Afémie ie illánie fecade, fécano afe iba úcube orécamacimo izáibite.

5

Ananías Safira diga finoca íaifue

¹ Mei jíáimie Ananías, ie ai Safira diga, daa illánie fecádiaillinoi.

² Bímie nano baa nieze úcubena jeruide. Jíáie dájeze úcubena nana ñue ite izói orécamacimo izájide. Aféfuena ie ai nana ñue onode.

³ Jira Pedro íena daide:

—Ananías, ¿nibái mei Taife o comécina féitate, Ñuera Joréñomo taino o llóllena? ¿Nibái mei o illánie nano nieze feca iba úcubena abimo maiñódio, daí jífueridio?

4 ¿Nano fueñe afe énie óieñede? Jii, óie. ¿Afe o fécaja mei afe úcube óieñede? Jii, óie. ¿Nibái mei daií afe finóllena comeci facádio? Comínimo taino lloñedio, mei íadi Juzíñamuimo taino llotio, —daide.

5 Ie jira áfena cacáillano, Ananías éniemo baiíllano tíibicaide. Nana afefue fídiaibitino iere jacínaitiaioi.

6 Mei jira nano ba niga jitócomini bite. Ie abi jabínota ie raiájidiaioi.

7 Afe mei tres horas illamona Ananías ai jofo bite. Nai ie ini tíllana fidíñede.

8 Jira Pedro jicánote:

—Cuemo llone, ¿afe ómicoi daña dieze afe énie fecádiomico?

Jira afengo daide:

—Jii, áfeze.

9 Jira Pedro daide:

—¿Nibái mei dáafueritiomico, Juzíñamui Ñuera Joreño o ico facátallena? Jino batí o ini raiájidino bitíai. Jabe daje izói ona úitiaioi.

10 Afe llezica afengo Pedro anamo baiíllano tíibicaide. Jitócomini jofo billano afengo tíllana cíozai:bitiaioi. Mei jira jino uillano ie ini abímo íena raiájidiaioi.

11 Nana Juzíñamuimo ínotino nana aféfuai:na fidídimaciri iere jacínaitiaioi.

Aillo cíorainina raaniai onótate raa diga

12 Aféruillaido comini cigiri orécamací aillo onótate raa, cíorainina ráaniai diga finódiaioi. Nana Salomón jinófenemo macáranomo gairídiaioi.

13 Buna jiáimacimona íaioi diga daane gairíllana jacíruitiaioi; mei íadi comini íaioimo ñue izire comécidíai.

14 Aillo comini íñiaí ringóniaí dájeze Ocuíraima Jesucrístomo ínuai:bitiaioi.

15 Uafue jamánomo ínotiaioi. Mei jira iráredino jofo abi íuemo, naa íaioi bíralluaíri jino bírodiaioi. Afénomo Pedro áfedo jaille llezica afémacimona nano dámerie, Pedro jana anamo itábicaítiaioi. Afedo jíllozitiaioi.

16 Afe llezica aillo ánomo ite jofue comini Jerusalem bitiaioi. Íaioi iráredinuiaí atídiaioi fiénide jóriaído áfifedogamací diga. Nana jíllotagaiaioi.

Ríimací illaini Pedro Juan diga duere finóllena llaitátatiaioi

17 Iemona lletáriraini illaíma, afémieoiri ite saduceo imaci iere úradoizaidiaioi.

18 Ie jira orécamacina llaitada afe jófuemo ite llavéracomo íbáizaidiaioi.

19 Mei íadi Juzíñamui abi ímie naio llavéraco naze tuizái:bite. Jino íaioi uánona daide:

20 —Gairíracomo omoí jai. Dinomo naidáillano comínimo nana bie comeci cáataite uáillaido úrizairi, —daide.

21 Aféfuena cacáillano, afe jiáirui monáídadacemo jofo gairíracomo jáidiaioi. Jáillano llófuaide.

Afe llezica lletáriraini illaíma afémiemo itínori, Nahíllaini gairíranomo gairídiaioi. Afe Nahíllaini Israel nairai éicomini. Gairíllano llaveca orécamací atítatiaioi.

22 Mei íadi llavériraini llavéracomo dúciillano orécamacina baiñédiaioi. Daa íaí afefue abido lluaí:bitiaioi. Daidíaioi:

23 —Llavéraco ñue riire ibaide naa naze jinófene úiñotinori eróiediaioi baizájdicaí. Mei íadi cai zuitádicaimo afeco eromo buna íñena, —daidíaioi.

24 Aféfuena cacáillano lletáriraini illaíma, gairíracó úññoraini illaíma, íemo nanoide lletárirainiri ífo júdaízite; jicánotiaíoi:

—¿Bífuiái ninomo jica jálleite?

25 Afe llezica daa íima daízaíbite; íaíoiña daide:

—Llavéracomo omoí íbaicogamíai jae gairíracomo comini llófuetiaíoi, —daide.

26 Iemona úññoraini illaíma naa llavérirainiri íaillinoí uájidiaíoi. Mei íadi duere finóñeno íaillinoína atídiaíoi, “Comínina nófiena cai níjiite” dainano jacíruítiaíoi.

27 Iaillinoí átianona, Nahíllaini uícomo íaillinoína naidánetaíoi. Iemo lletáriraini illaíma íaillinona daide:

28 —Afe mámeçido ómicoí llófueñellena jamánomo riire rairuídicaí. ¿Ja minica finódiomicoí? Nana Jerusalén comínimo ómicoí llófufuíai jica jalleide. Afe llezica afe íima tílla ícoínia caimo nitáacadiomicoí, —daide.

29 Mei jira Pedro jíaie orécamaci díga uai ote:

—Juzíñamui uai jeire cai olle comini llogáuai baímo ñuera.

30 Cai jáiairagíma Juzíñamui Jesuna tíllamona cáatate. Bie Jesús coráirabicimo agúñneta omoí faíamie.

31 Juzíñamui caífo monamo uano nabézimo íena rainade. Afe llezica afénomo Illáimana jóonete. Dáanomo Jíllotaramana jóonete. Daíí Juzíñamui Israel náiraímo íaíoi illafue méidollirui jóonete, íaíoi íaífuíai dóllena.

32 Aféfuemo uai nabáiraímadicaí. Daje izóí Ñuera Joreño aféfuemo uai nabaide. Nana ñue cacáredímacimo afe Ñuera Joreño Juzíñamui iga, —daide.

33 Aféfuena cacana llezica, ríicaídiaíoi. Iaillinoína fáiacadiaíoi.

34 Mei íadi ríimaci cigiri fariseo ímie ite. Afémie mámeçi Gamaliel. Afémie ocuífufue llófueráíma. Nana comini íemo ñue coméçidiaíoi. Afémie náidaillano ocuide:

—Nano dáallegoí bimaci oni jíainomo ui, —daide.

35 Afe ífodo ríimacina daide:

—Israel comini, cacai. Baimácimo omoí finóllífue abí omoí rairuiri.

36 Jáíífuemo omoí úbicairi. Naui nígarui íllamona Teudas dúcizaíbite. Dúçíllano daide: “Jamánomoidimiedicue. Illáimaiticue,” daide. Iemona cuatrocientos dígamie afémiedo jáidiaíoi. Mei íadi íena fatíaíoi. Nana afémiedo jáidino ráidozinaidiaíoi. Iemona afefue niné táinocaide.

37 Afe mei comini mámeçi cuiájillaruímo, Galilea ímie Judas dúcizaíbite. Aillo comini íedo jáidiaíoi. Daje izóí íena fatíaíoi. Afe izóí nana íedo jáidino ráidozinaidiaíoi.

38 Ie jira bimácina omoí fáicanocai; afémacina áfedefoñeno. Mei bifue ííñiaí íeza, fuizájite.

39 Mei íadi Juzíñamui ífue, táinocaitanidiomoi. Abi omoí rairuiri, Juzíñamui díga omoí fuírízaiñelleza, —daide.

40 Nana jae jíeruíficaídiaíoi. Mei jira orécamaci jíritiaíoi. Íaíoi dúçinamona íaíoiña zechénotiaíoi. Afe meífodo Jesús mámeçido úrillana íaíoiña rairuídiaíoi. Afe mei íaíoiña fáicanocaidiaíoi.

41 Orécamaci ríimaci uícomona jíno jáidiaíoi. Íóbioicaídiaíoi, mei Juzíñamui íaíoiño ñue comeci facáoillaza. Jesudo jáináinamona méaífuedo duere ze-fuídiaíoi.

⁴² Ie mei nágaruido Jesudo úritiaioi. Afe izói llófueoidiaioi. Gairíracomo, comini jófuedo daje izói llófuiaidiaioi.

6

Juzíñamui uai llotino canórainina siete dígamie mámeciga

¹ Aféruillaido ínotino aillo jebuoidiaioi. Griego imaci judío imácina zúucaillafuedo jítádiaioi:

—Nágarui güille fécanomo cai fecínguai figo íñégaiaioi, —daídíaioi.

² Mei íemo doce diga orécamací nana ínotinori dáanomo iráidiaioi. Iaioina daide:

—Juzíñamui úrilla uai jino llófueredícai. Afena cai fáicanocaillena dani omoi güille cai fecállena figóñede.

³ Mei jira, ámatiai, omoi cígimona siete dígamie nize. Nana comínimona ñue comécidimie izóidena jitaide. Ñue onódimiena jitaide. Ñuera Joreño úcaigamiena daje izói jitaide. Ie mei daítadimíai güille fecárainina mai jóneri.

⁴ Mei cai dani Juzíñamui comece facáoitícai. Afe llezica Juzíñamui úrilla uaido llófueitícai.

⁵ Nana aféfuemo ñue comécidiaioi. Iemona Ñuera Joreño úcaigamie Esteban nizédiaioi. Afémie Juzíñamui uaina iere ínofiredimie. Daje llezica jíaimíai nizédiaioi: Felipe, Prócoro, Nicanor, Timón, Parmenas, Antioquía ímie Nicolás, nani nano afémie judíuai íaioi ínoga uaimo dáafueriacadimie.

⁶ Ie mei orécamací illánomo afémacina atídiaioi. Atia mei orécamací íaioimo onoi bíitano Juzíñamuimo úritiaioi. Afedo güille fecárainina mamécaiaioi.

⁷ Iemo Ocuíraima Jesucristo úrilla uai comínido oni móonaiocaide. Jerusalemo ínotino aillo jebuíaioi. Afe llezica aillo judíuai lletáraini aféfuemo ínotiaioi.

Esteban llaitádiaioi

⁸ Esteban Juzíñamui izói ríinoredimie Juzíñamui ézicigamie. Ie jira comini cígimo aillo cíorainina raa onótate raa diga finode.

⁹ Ie jira Rairuíñegamací llófueriraco ímíaimona dáarie Estébamo como fueñe ie finócafue júfíduaidiaioi. Afe llezica Cirénemona dáamierie, daje izói Alejandro, daje izói Asia éniemo ite Cilíciamona: nana afémaci Estébamo afefue júfíduaidiaioi.

¹⁰ Mei íadi íena anáfenonidiaioi. Ñuera Joreño íemo iga úrillana fibíllafuedo úriteza.

¹¹ Ie jira taino lloraini íbajidiaioi. Afémacina llotíaioi:

—Mai omoi daíri: “Esteban Moisená Juzíñamui diga fiéndiuaina dáinana cacádícai,” —daí daítatiaioi.

¹² Aféfuemo comínina éinamací diga fáillifáillíñeitadiaioi, daje izói ocuífue llófueraini. Iemona cirínuano íena llaitádiaioi. Lláitano Caifóidíllaini uíécomo íena uítiaioi.

¹³ Afe izói taino uailai nabáiraini jenódiaioi. Afémaci daide:

—Bímie cai ñue rairuírede gairíracomo báíñuano fáicanocaitañede. Jaca báíñofirede, daje izói ocuífueimo.

¹⁴ Afémie dáinana cacádícai. Afe dáina daide: “Baie Nazaret ímie Jesús afe gairíracó júdaítaite. Moisés caimo iga finóllífuiaí meídotaite,” —daí daídíaioi.

¹⁵ Iemona riimaci naa dinó ráiedinori, Estébamo eróillano, ie uiéco Juziñamui abi ímie uiécona eróidena cióidiaioi.

7

Esteban abi ie riíduafue llote

¹ Mei jira lletáriraini illaíma Estébamo jicánote:

—¿Meita nana bífuiaí uáfuiaí?

² Jira afémie uai ote:

—Ñue coméciide ámatiai, móotiai diga, cue úrillamo cácarei. Cai ebíredinoredimie Juziñamui cai jaiái nanóidimie Abrahamo cíocai. Ua Abraham Mesopotamia éniemo illa llezica, afémie nai Haramo jaiániñena llezica,

³ Juziñamui éna daide: “O illánie fiénocai naa o comíniri. Afemona omo cue lolle éniemo o jairi.”

⁴ Mei jira Abraham Caldea éniemona oni jaide; jáillano, Harán jófuego nano nie dino ite. Dinomo ie moo tilla. Iemona Juziñamui Abraham afe bie omoi illíniemo atide. Ja birui aféniemo itíomoi.

⁵ Mei íadi ñie feci raana nai afémie Juziñamui éna iñede. Afe izóí due jiza ie macálliniéna íemo fecáñede. Mei íadi Juziñamui uícomo uáfueña daide: “Bie énie óeite. O tilla meífomo o jitótiai íeite.” Mei íadi aféruillaido Abraham nai jitónide.

⁶ Nane dáanomo Juziñamui éna daide: “O uícoídígima jáímaci éniemo onínemaci izóí íitiaioi. Dinomo afémaci rairuícamacai izóí íitiaioi. Dinomo cuatrocientos fimona duere finólliaioi,” daide.

⁷ Mei íadi nane dáanomo Juziñamui daide: “Omoi rairuícamacina finódizie íaioi fiénidifuiaí cue jicánolle mei, afémacina duere zefuítaiticue. Ie meífomo o comíni afénomona oni jáitiaioi. Oni jaillano, bíniemo cuemo ñue caimare táijizaibitiaioi,” daide.

⁸ Juziñamui Abrahamo daináuai ibana finóllifue llote. Afe llezica ie jitótiai bacano ícoi quetállena ocuúllado afe finóllifue uáfueña onótate. Ie jira ie jitó Isaac jócua mei ocho dígarui illamona, Abraham ie jitó bacano ícoi quetade. Daje izóí Isaac ie jitó Jacobona finode. Afe izóí Jacob nana ie jitótiaína finode. Afe jitótiai Israel doce diga nairai moona jáidiaioi.

⁹ Bie Jacob jitótiai cai nánoragimaciai. Afémaci ie ama Josemo úradoidiaioi. Afemona aféniéna fecádiaioi, Egipto éniemo úllena. Mei íadi Juziñamui Joseri ite ie canóllena.

¹⁰ Nana ie zefuínailamona zuitade. Ñue úrillana fibíllafue íemo ite. Faraón uícomo ñue coméciidiména Juziñamui Josena itátate. Afe Faraón Egipto nahíllaima. Afe Faraón Josena Egipto jabóllaimana mamede. Afe llezica daje izóí dama Faraón jofo illáimana mameca.

¹¹ Iemona júbietaillafue nana Egipto éniemo baite aillo zefuínailafue diga. Daje izóí Canaán éniemo ite. Ie jira cai móotiai güllenidiaioi.

¹² Mei íadi Jacob Egiptomo trigo illana fidiano afénomo ie jitótiai orede. Afémaci cai jáiairagima. Bifue íaioi fueñe güille uájillafue.

¹³ Ie mei dáanomo nane jáidiaioimo, José ie ámatiai ie abína onótate. Afe llezica José ie ámatiai Faraómo cíotate afémie íaioína onóillena.

¹⁴ Iemona José ie moo Jacob naa ie comíniri atítate. Afémaci setenta y cinco dígamiede.

15 Afe daií íaioimo íficaide Jacob Egíptomo jaiánillena. Dinomo afémie tíide; daje izói afénomo cai jáiairagimamona dáríe tíide.

16 Afe meífodo íaioi ícuruai Siquém illánomo uitá raiájidiaioi. Afe dinomo Hamor jitótiaimona Abraham ie comini ícuruai raillínuai ibade. Jira afénomo raiájidiaioi.

17 Jáiai ninomo Juziñamui Abrahamo uire ñue íaioi illena riírede uaido uáfueña lloste. Afe uícodo daiñáuai fuizáillirui ánoziacademo, Israel nairai Egíptomo ñue jebuidiaioi; ua iere áillue náiraina jáidiaioi.

18 Afe llezica Egíptomo jáie Faraón illáimaizaide. Afémie Josena onóñede.

19 Aféllaime cai náiraina jífujete; cai jáiairagimacina duere finode. Cai como jococa úruiaina zóofetade íaioi tíillena.

20 Aféruillaído Moisés jococa. Afémie ie dúeza illáruimona Juziñamuina íóbitade. Afe izói ie moona ie ei diga íóbitade. Afe íaillinoi daámani fíui jofomo íena móonaitadiaillinoi.

21 Mei íena zóofetarui dúcinamona Egípto illaime nahí jiza íena abimo ote. Afengo jitó izói afézana comúitate.

22 Ie jira afe Moisés Egípto comini nana onóigafueña llófuegamie. Iemona ie daiñauaillai riírede. Afe izói afémie finócafuiái jamánomoide.

23 Ja afe mei cuarenta fimona illa llezica, Moisés ie nairai israelita comini meíñuaiacade.

24 Afénomo Egípto ímie Israel náiraimona dámie duere finóinana Moisés cíoziaide. Ie jira Moisés ie nairai ímie riíduaibillano Egípto ímie fate afe íba óllena.

25 Moisés comécido daide: “Cue ámatiai israelita comini Egíptomona fáicanocailífue onódiaioi. Ua Juziñamui íaioi cuedo fáicanocaitafueña fidídiaioi,” daide. Mei íadi áfena fidíñediaioi.

26 Afe jítiramoidíruido Moisés Israel ímíaiillinoi fúirienailana ciode. Iaillinoi fúiríllafueña llícaitaacanano íaillinoína daide: “Omícoi daje ámadíomícoi. ¿Níbái conímana duere finódiomícoi?” daide.

27 Ie jira nabai duere finódimie Moisés oni ñuitade. Oni ñuita mei íaillinoimona dámie Moísená daide: “¿Bu o cai cígímo illáimana jóonegao? ¿Bu cai fiénidífue jícanoraimana jóonegao?”

28 ¿Nauri Egípto ímie o faaja izói birui cuena fáiacadio?” daide.

29 Daií dánana cacáillano, Moisés botade. Bótano Madián éniemo jaide. Dinomo jícanemie izói ite. Afénomo mena jitórede.

30 ‘Cuarenta fimona meífomo, Moisés amena figo íñénazicimo mácajide. Sinaí idu ánomo ite. Afénomo Juziñamui abi ímie boode íaízafeínamo cíocaide. Afe irai bóoidinomo cíocaide.

31 Afena cíonamona Moisés jabo fáigacaide. Afena ñue cíoillena áfemo jofó ánozide. Ánozillano Ocuíraíma Juziñamui úrillana cacade. Afe uai daide:

32 “O nánoidimaci Juziñamuidícue. Ua Abraham, Isaac, Jacob dieze Juziñamuidícue,” daide. Jira Moisés jágieri cuidírícaide. Iemona dáanomó áfemo eróillana jacírúite.

33 Iemona Ocuíraíma Juziñamui íena daide: “O eiba ico duiño, benó o naidáillano cue íllaza jamánomo ñúenoza.

34 Cue comini Egíptomó duere zefuállana cíodícue. Íaioi eehe cáilliana cacadícue. Jira ana íaioína zúitaíbitícue. Jira cue dánana cacai. Egíptomó ona óreitícueza,” daide.

35 ‘Ja nano fueñe nana comini Moisená jámairutiaioi. Iena jaiái daízaidiaioi: “¿Bu illáimana mamécao, caimo jicánoraimana o illena?” Mei íadi bóodinamo ciode Juzíñamui abí ímiedo Juzíñamui Moisená zúitaitimiena orede, íaioi illáimana.

36 Jira Moisés cai jáiairagimaci Egiptomona jino bairódimie. Afémie bie éniemo ciórainina raa onótate raa diga finódimie. Afe izói Jiáirede Monáillaimo ciórainina dánamona comuide raa finode. Afe izói cuarenta fimona íllamona zaféredizicimo íaioi illa llezica ciórainina raa finófirede.

37 Afe dáamie Moisés Israel comínina daidímie: “Juzíñamui dani omoí ámatiaimona uai llórainana ómoimo óreite, cue ie ória izói. Afémiemo jeire omoí oíri.”

38 Afe Moisés zaféredizicimo comíniri ítimie. Afe Moisés Sinaí ídumo ítimie. Dinomo Juzíñamui abí ímie íemo úrzaibite. Afemona Moisés cai jáiairagimamo aféuai jino llotímie. Afe Moisés cáatatiuallai llínote, afe uáillaina caimo fiénocailena.

39 ‘Mei cai jáiairagimaci íemo cacáreacañediaioi. Iena ruifíruillano, meine Egiptomo jáiacadiaioi.

40 Jira Arona daidiaioi: “Cai uícodo ífoite juzíñamuillaina caimo finóllena jítáidícai. Baie Moisés Egipto éniemona cai otímie, íemo ítífuenta onóñedícai,” daidiaioi.

41 Ie jira juráreto jiza jana finódiaioi; jáie rílleníai fatíaiói afe jízato jánaraina finócamo fia fecállena íena íóbitallena. Mei íaioi ónoído finoca raamo camátaioidiaioi.

42 Ie jira Juzíñamui íaioimona oni jaide. Afemona Juzíñamui íaioina fiénocaide mona úcuaimo íaioi comeci facáoillena. Mei daíí uai llóraini rabénicomo cuegáuai daide: ¡Israel comini, omoí cacai!

¿Cuarenta diga fimona íllamona zaféredizicimo rílleníai fatíomoi cuemo fia fecállena?

43 Ieñede. Jiáífodo finódiomoi.

Taino juzíñamui Moloc ráiicallacoji abímo máíñuano úioicaidíomoi.

Afe llezica jáie taino juzíñamui Renfán ucúduna eroide jánaraimo jeire otíomoi.

Afe jánarai dani omoí finoca íóbitalle jánarai.

Ie jira omoí éniemona omoí otá Babilonia batífenemo ómoína óreiticue, daide.

44 ‘Cai jáiairagimamo Juzíñamui gairíracó ite. Afénomo noficomo cuega ocuica uallai éenotiaioi. Afe gairíracó Juzíñamui Moísemo ocuilla izói niga. Nano fueñe Juzíñamui íena daide: “O ciónaco omo cue ácata izói o nitátari,” daide.

45 Cai jáiairagimaci afe gairíracó feci raa izói llínnotiaioi. Ie mei Josué diga bitino jáie nairai énie báirua llezica afeco atídiaioi. Afe éniemo ítínuiái Juzíñamui oni juide, íaioi meífomo ie comini illíno finóllena. Afeco daíí dínomo íte David illáruillaído.

46 Illaíma David Juzíñamuina íóbitade. Iemona Juzíñamui afe Davidna canófirede. Aféruillaído ie jáiairagima Jacob ínoga Juzíñamui illico nitátaicade.

47 Mei íadi ie jító Salomón Juzíñamui jofo ua nitátatímie.

48 Mei íadi jamánomo caifoide Juzíñamui, comini ónoído niga gairíracuaimo ífinide. Afe izói uai lloraima daide:

49 Caifo bie mona ua cue illáimana ráirano izoide.

Ie mei bie énie cue idai bitáoinanie izoide.

¿Ñie izóidico cúeiena nitátaitio?

¿Nee cue ocózinairano?

50 ¿Ua meita nana bie ráaniaina cue ónoido finódicue?

Jii finódicue, —daí Ocuíraima Juzíñamui daide.

51 Nai Esteban afémacimo úrioicaide. Daide:

—Mei íadi omoi comeci jaca Juzíñamuina rairuífirede. Juzíñamuina onóñedimaci izói jefónidiomoi. Juzíñamui comécíñedimacidiomoi. Ñuera Joreño llétafue jaca jeire oñédiomoi. Omoi jáairagima izóidimacidiomoi.

52 ¿Ua meita omoi jáairagima nii uai llórainina duere finódiaioi? Nana íaioina duere finódiaioi. Nii figomie bíllana uícodo llotínona titádiaioi. Afe figomie jae dúcide. Iena fécano fatiomoi.

53 Omoi Juzíñamui abi ímíaido llogámacidiomoi, mei íadi ñue cacáreñediomoi, —daí dinori Esteban daide.

Esteban túllafue

54 Aféfuaiina cacáillamona, ríicaidiaioi. Estébamo fuedo gugúricaidiaioi.

55 Mei íadi Esteban Ñuera Joreño úicaigamie. Afe llezica monamo érocaide. Dinomo Juzíñamui ebírenafuena ciode. Afe llezica Jesús Juzíñamui nabézimo naidáinana ciode.

56 Ie jira daide:

—¡Ero! Mona túinana ciódicue. Nanoide íima Jitó Jesús Juzíñamui nabézimo naidaide, —daide.

57 Mei íadi afémaci jefo íbáidiaioi. Ríirerie caillíoicana illíñana íemo caízaidiaioi.

58 Jófueмона oni uitá nófiena ie níjidiaioi. Níjidino íaioi emódodiroillai jítócome Sáulona mamédimiēna úiñotadiaioi.

59 Nai ie íaioi níjia llezica, Esteban Juzíñamui úrillano daide:

—Ocuíraima Jesús, cue joreño oni llíno, —daide.

60 Ie mei ana dújullano, ríire caillide. Daide:

—¡Ocuíraima! Bie fiénidifue ícoinia bimácimo jítáñeno iri, —daide.

Daí daina meífodo tíibicaide.

8

Saulo Jesudo gairirani racade

1 Fatímaci izói Saulo afémacimo comécioide.

Aféruimona Jerusalemo ite Jesudo gairirani duere finóllena como fueñe judíuai jénuaidiaioi. Ie jira nana ínotimaci Judea énie fuédado ráidoizitiaioi; daje izói Samaria éniēdo. Dani doce dígamie orécamaci Jerusalemo fiébitiaioi.

2 Iemona Juzíñamui raana duéruitimaci Esteban raíájidiaioi. Ieri aillo éediaioi.

3 Afe llezica, Saulo gairíramacina nai racáide. Nágacuaído jenode. Afécuaimona íñiaí ringóniaí diga jino zónuano íaioina llavétate.

Jesucristo ñuera uai Samárimo lluájidiaioi

4 Ja birui Jerusalemo oni jáiredino, Cristo jíllonafue íaioi jáillanuaimo lluájidiaioi.

5 Afémacimona dámie Felipe Samaria jófueмо jaide. Dinomo Cristo ráfuedo íaioimo úrizaide.

6 Afe comini gairillano Felipe dainamo ñue cacáreidiaioi. Felipe finoca ciórainina onótate ráaniai ciódiaioi.

7 Mei jira aillo fiénide jóriaimona jillotagaiaioi. Afémacimona fiénide joríaia caillicana oni jaide. Afe llezica aillo tíztaitimíai aidáimaiaia diga jillotagaiaioi.

8 Aferi afe jofue comini iere caimátaioidiaioi.

9 Mei íadi dáame Simona mámeciredimie afénomo ite. Afémie úicoidiruillaido aimana jaide. Afe jofue comini jífujete. “Jamánomoidimedicue” daiífiredimie.

10 Nana comini jabóidinomona ua nahíllaímamo dieze íemo iere cacáreidiaioi. Daidiaioi:

—Bímie caifoide Juziñamui ríinona igámie, —daidiaioi.

11 Iere are ie aimánafuedo afémacina jífujete; ie jira íemo jeire otíaioi.

12 Mei íadi Felipe Juziñamui illáimana illirui uai Jesucristo mámece diga, íaioimo llote. Aféuailana cacáillano afemo ñue ínotiaioi. Íñiaia ringóniairi dájerize ínotiaioi. Ínuano báutizagaiaioi.

13 Afe dama Simón ínuano báutizaga. Iemona afémie Felipe nabaina jaide. Afémie Felipe finoca áillue ciórainina raa onótate raa diga, áferi fáigacaide.

14 Jae Samaria comini Juziñamui úrillauai jeire otíaioi. Afe íaioi jeire uáfueña Jerusalemite orécamací fididiaioi. Fidiano afénomo Pedro Juan diga orédiaioi.

15 Dúciillano Samáriamo ite ínotinori Juziñamuimo jicádiaioi, Ñuera Joreño íaioi llínollena.

16 Mei afémacimona nímiemo Ñuera Joreño nai biñede. Dama Ocuíraima Jesús mámece báutizaga.

17 Afemona Pedro Juan diga íaioimo onoi bitade. Iemona daí Ñuera Joreño úicaigaiaioi.

18 Orécamací bimácimo onoi bitamona Ñuera Joreño bíllana Simón ciode. Cionamona úcube orécámie íaillinoimo íoicana

19 daide:

—Jadíe ríino cuemo ine. Afe izói nie cómemo cue onoi cue jóoneadi Ñuera Joreño íemo bílleza, —daide.

20 Jira Pedro íena daide:

—¡Naa o úcube diga o táinocairi! Juziñamui fecaca raa úcubedo íbárede daidio; daí comeci facádio.

21 Bífueño o dúñedio. Bie coco táijnafueño jaináíñedio, o comeci jaícina Juziñamuimo jóoiñena jira.

22 Bie o fiénidifue o fáicanocai. Juziñamuimo izire o jicari o fiéni comécido dainafue íba omo óñeilleza.

23 Ja onódicueza o comeci filliru izói eríredeza. Afe íaífuiaido cuinácamie izói itíoza.

24 Jira Simón uai ote:

—Ocuíraímamo cuedo jicari, nana o cuena daináfuiamona dafue cuemo níjñeillena, —daide.

25 Afénomo Crístomo ñúefue nitádiaioi. Daje izói Juziñamui uáillaido úritiaioi. Ie meífodo, orécámie íaillinoi; Juziñamui jíllolluauai aillo Samaria duera jófuiaimo llófuiaidaillinoi. Ie mei Jerusalemite meíne bitaillinoi.

Felipe Etiopía ímiemo úrite

26 Afefue meífodo Juziñamui abi ímie Felípena daízaíbite:

—Náidacaillano, fuiri batí Jerusalémona Gaza jófuego jóidido o jairi, —daide. Afeo zaféredizicido jóidio.

²⁷ Iemona Felipe náidacaillano áfeodo jaide. Dinomo uieçodo jaide Etiopía ímie éidajide. Afémie illaingo abi ríimie. Afémie Etiopía illaingo Candace úcube úñoraíma. Afe llezica afémie óinima. Naui uicodo afémie Jerusalemo Juzíñamui cáimaduaide.

²⁸ Afémie abido ie éniemo jáizaide. Ie caballo zonóicaiga ráiralloicimo ráicana Juzíñamui uai lloaíma Isaías cuegáuai facádote.

²⁹ Afe llezica Ñuera Joreño Felípena daide:

—Jadilloicimo áinozillano afénomo nabairi, —daide.

³⁰ Ainozillano, Felipe afémie Isaías cuegáuailai facáduana cacade. Iemona íemo jicánote:

—¿O facádoga uaina meita onódio? —daide.

³¹ Jira afémie uai ote:

—Cuemo jino lóitímie íñédeza, ¿ñie izóí ónoiticue? —daide.

Iemona Felípemo caífo ie diga dáanommo ráíillena jicade.

³² Juzíñamui Cuegáuaimona afémie facádoga uai áfena daide:

Oveja izóí tíizaillonomo uiga.

Oveja jiza abi cuidódino uieçocomo úriñedímie izóí táíide,

afe izóí afémie jaca nífuedo úriñede.

³³ Afémie iere jámairuigamie; jáicinaidífueña íemo rairuíaiaioi.

¿Ie ñue illáfuedo mei bu úrille?

Mei ie cáajano bie éniemona niné táinocaide, —daide.

³⁴ Jira illaingo abi ríimie Felípemo jicánote:

—Cuemo llone, ¿bumo úrite uai lloaíma? ¿Ñibai dama íemo úrite? ¿Ñibai jáíimie mo úrite? —daide.

³⁵ Jira Felipe afémie facádoga Cuegáuaimona Jesús úrillauai íemo jino llote.

³⁶ Jainoi illánodo jailla llezica ríimie daide:

—Benomo ite jainoi. ¿Birui áfejido cue báutizanidicue? —daide.

³⁷ Jira Felipe daide:

—Nana o comécido o ínoiadi báutizarellio, —daide.

Jira afémie uai ote:

—Jesucristo Juzíñamui Jitoza áfemo ínoticue, —daide.

³⁸ Iemona jáiralloici mozíñota ille diné jáidiaillinoi. Dinomo Felipe ie báutizade.

³⁹ Illémona ari abido jáidiaillinoimo, Juzíñamui Ñuera Joreño Felípena oni uite. Iemona ríimie íena jaca nane cíñede. Mei dama ie éniemo caimare jaide.

⁴⁰ Felipe nane Azoto jófuego cíocaizaide. Dinómoma naga jófuedo jíllonauai llócade. Úa ba Cesarea jófuego fuizájide.

9

*Saulo comeci jáíifodo méiduafue
(Hch 22.6-16; 26.12-18)*

¹ Afe llezica Saulo Jesumo ínotinona fáiacanafuedo úrioido. Ie jira lletáiraini illáimamo jicánuaide.

² Daide:

—Llavétallibiaina cue ine, Damasco jofue gairíracomo cue jáilleza, Jesús uaimo ínotino cue jenuailleza. Afemona íñiaia naa ringóniairi maitá Jerusalemo cue atílleza, —daide.

³ Mei nai iodo jailla llezica, Damasco jófuego ánozidemo, monámona bite úzefo nágafene ie abimo úzere egáñocaide.

⁴ Iemona Saulo éniemo baíde; baiílla llezica Jesús íena dáinana cacade:

—Saulo, Saulo, ¿níbái mei cue racádio? —daide.

⁵ Mei jira Saulo uai otá jicánote:

—Ocuíraima, mei o ¿búdio? —daide.

Jira aféuai ote:

—Cue Jesúsícue. Dama o racácamedícue. Aillue juráreto zaitáacademo jáiredizimo jiide. Afe izóí ízitagamiedio.

⁶ Mei íemona Saulo jágieri cuidíde; daide:

—Ocuíraima, ¿ona nie izóí finóredícue? —daide.

Jira Ocuíraima uai ote:

—Náidacaillano baie jófuego mai jofo jai. Dinomo o finóllífueña omo llóitiaioiza, —daide.

⁷ Sáulodo jaide comíni aféuaina cacádiaioi íadi mei buna ciónñediaioi. Aferi iere jacínaitiaioi.

⁸ Ie meíodo Saulo éniemona caífo ráinacaillano, érocaide. Mei ui botáicaide íadi éroinide. Mei jira daí ónoído jáinátacana Damasco jófuego íena uitíaoi.

⁹ Dinomo daruíamani uina ciónñede. Afénomo minícana güññede, jiróññede.

¹⁰ Afe Damasco jófuego ínotimie Ananías illa, nímíemio Ocuíraima nicáirilla izóidedo cíocaide. Iena daide:

—¡Ananías! —daide.

Afémie uai ote:

—Ocuíraima, benó itícue, —daide.

¹¹ Jira Ocuíraima íena daide:

—Náidacaillano, Deréchana mámecirede iodo jairi. Dinomo Judas jofomo jicánori: “¿Nínomo ite Sáulona mámeciredimie, Tarso jofue ímie?” O dúcina llezica afémie Juzíñamuimo úrite

¹² Ie úrioína llezica nicáirilla izóidedo ie uimo onoi bítaibitimie, Ananías mámeciredimiena ciode; áfemona nane ie ui ñue cíoitte, —daide.

¹³ Afe uaina cacáillano Ananías daide:

—Aillo comíni baie ímana cuemo llotíaoi. Afe llezica omo ínotinuíaimo nana Jerusalemo ie fiení finócafuaia cuemo llotíaoi.

¹⁴ Ja birui afémie benomio bite. Lletáriraini illaini llavétallibiai díga bite nana o mámecido jicáñiredino maitá úillena, —daide.

¹⁵ Jira Ocuíraima daide:

—¡Mai jai! Afe ímana jae cue nizeca jíaie náiraimo cuedo úrillena naa íaioi illáiniri.

¹⁶ Afémie aillo cue náiraimo llóite. Afémie aillo cue ícoínia duere zefuállana íemo ácataitícue, —daide.

¹⁷ Iemona Ananías Saulo illácomo jaide. Jofo jáillano íemo onoi bítajano daide:

—Ama Saulo, Ocuíraima Jesús o billa íomo omo cíocaidimie cue o ui meine abido cíoillena ocuide. Afe dáanomo afémie Ñuera Joreño ona cue úcailallena cuena daide, —daide.

18 Afe daíí dáinamona, chamu icogi izoide ie uímona cúcoizite. Iemona nane ie ui meine cíoide. Afemona Saulo náidacaillano báutizatata.

19 Afe meífodo güillano, ie riino meine comúitate. Afe mei nano nígarui Damáscomo ite ínotinori fiévide.

Saulo Damasco jófuego jino llófuerite

20 Ie meífodo Saulo garíracomo jino llófuerizaide. Afénomo daíde: “Jesús Juzíñamui Jitó.”

21 Nana afémiemo cacádino fáigacaillano daídíaiói:

—¿Ua meita bie níimiede, nauí Jerusalem Jesús mámedido jicáfiredino racádimie? ¿Níie nauí benomo bitímie lletáriraini illánimo cai maitá úillena? —daídíaiói.

22 Mei íadi Saulo jamánomo riire jino llófuerite. Jesús Crístonana jino uafodo ciótate. Mei jira Damáscomo ite judíuai Saulo ifona íritagaiaíói.

Saulo judíuaimona jillode

23 Díga iruillai jailla meífomo, judíuai dáanomo começi fácana Saulo fállena maméritiaíói.

24 Mei íadi aféfuena afémie fidide. Naa mona naío díga jofue jino jáirazemo úíñoidiaíói ie fállena.

25 Mei íadi ínotimaci áillue cirígaimo íena jóonetiaíói. Jóoniano afe jofue jinófene cirínuailla jinomo naío íena agúínetiaíói. Afe daíí afémie botade.

Saulo Jerusalemo illafue

26 Saulo Jerusalemo dúcillano, Juzíñamuimo ínotinori gairíacade, mei íadi nana afémiena jacíruiitiaíói. Afémie ínogafuena nai jeire oñédiaíói.

27 Mei íadi Bernabé íena uáidote. Iemona orécamiáimo íena ácatajide. Afemona Saulo iomo Ocuíraimana cíónafue íaíoimo llote. Ie mei Saulo Damasco comínimo méaicaiñeno Jesús mámedido úrillafue íaíoimo llote.

28 Jira Saulo Jerusalemo díga irui ite. Dinomo ínotimaci díga macácaide.

29 Ocuíraima mámedido méaicaiñeno úrite. Griego uaido úritino judíuaimo úrite. Conímamo jicánua uai ua daíí úrite. Iemona ie fállena mamédiaíói.

30 Jáíie ámatiai afefue fídiano, Saulo Cesaréamo uítiaíói. Dínomona Társomo íena orédiaíói.

31 Ie meífomo nana Judea éniemo ite Jesús mámedido gairídino fírazitiaíói. Ja íaíói ínogafuemo caímare náireoicaidiaíói. Afe izói Galilea éniemo Samaria énie díga ite ínotino fírazillamona riire náireoicaidiaíói. Ocuíraima Jesús ñúfueri jáicaidiaíói. Ñuera Joreño íaíói cánuamona jebuíoicaidiaíói.

Eneas jae jíllotaga

32 Pedro jáíie ámatiai uáiduailla llezica, daje izói Lida jófuego ite ínotino éroizaide.

33 Dínomo Enéasna maméidimiena cíoizaide. Afémie ocho díga fimona bíiramo bíide ie tízitailla jira.

34 Iena Pedro daíízaide:

—Eneas, Jesucristo ona jíllotaitenza. Náidacaillano o bíira ñue fino, —daíde.

Afemona Eneas riire jíllobicaide.

35 Lida jofue nairai aféfuena nana cíodiaíói naa Sarón náirairi. Iemona jaiái nano íaíói ínogafuaíái fáicanocaillano Ocuíraima llogáfuego ínotiaíói.

Dorcas tíide meine abido cáanafue

³⁶ Aféruillaído Jope jófuego ite ñnotingo. Afengo mámecei Tabita. Afe mámecei griego uaido Dorcas. Afe ringo ñúefuedo jáicade. Jitáidinona canófirede.

³⁷ Aféruillaído afe Dorcas iráreizaide. Iemona tíide. Ie abi jócua meífodo oni caifóidicomo jóonetiaioi.

³⁸ Lida áinori ite Jope. Aféruimo Pedro afénomo nai ite. ñnotino afénomo íllana fídiamona, ménamie orédiaioi éna daiíllena:

—Jópemo jizíñeno raire biri, —daide.

³⁹ Iemona Pedro afémie íaillinoído jaide. Pedro dúcinamona, Tabita abi jóoinanomo éna uitíaioi. Nana fecíngotiai abido ífoina naidározillano éediaioi. Afe llezica nana Dorcas nauí ie caana llezica tifócacuiruai íemo ácatatiaioi. Emodo íroillai naa jíáie íníroillairi íemo ácatatiaioi.

⁴⁰ Afécomona Pedro nana jino íaioi orede. Ie mei caíñici ífodo dújuillano Juzíñamuimo úrite. Tíidingomo eróillano daide:

—Tabita, mai caifo náidacai, —daide.

Iemona afengo ui botáicaide. Pédromo érocaillanona caifo ráinade.

⁴¹ Onoído llínota ie caifo naidánete. Afe mei ailli jino oreca fecíngotiai íemo ámatiai daínamaci diga abido jíirite. Iemona afengo caade íaioimo izájide.

⁴² Afefue nana Jope jófuego jállecaide. Iemona aillo comíni Ocuíraimamo íñotiaioi.

⁴³ Afe mei Pedro diga irui afe jófuego fiébide. Igorai ídiai jinítaraíma Simón jofomo ífirede.

10

Pedro Cornelio uáiduafue

¹ Afe Cesarea jófuego Cornéliona maméidímie ite. Afémie fuíríraíni áillogüelli illaíma. Afe áillogüelli mámecei Italiano.

² Afémie naa dama ie comíniri Juzíñamuimo comecei fácajano caimare úrite. Afe llezica Juzíñamuimo ñue jacíruioides. Daje izói aillo úcubena judíuaimo fecáfírede íaioi canóllena. Iemo Juzíñamuimo nágarui úrífírede.

³ Ie mei daarui jítoma ana ítemo nicáírilla izói cíode. Afe nicai anado Juzíñamui abi ímie uáfodo cíode. Afe abi ímie jofu Cornelio illánomo jaide; jáillano éna daide:

—¡Cornelio! —daide.

⁴ Cornelio afe Juzíñamui abi ímiemo jacíruiociana érocaillano jícanote:

—Ocuíraíma, ¿bie múnica?

Iemona abi ímie éna daide:

—O jícanua Juzíñamui jae jeire ote. Daje izói jítáidino o cánuafuaíina jeire ote.

⁵ Mei jira Jope jófuego íñiaí ore, Simón jíirizaillena. Afémie jíáfodo mameína Pedro.

⁶ Afe Pedro jíái Simón igorai ídiai jinítaraíma. Afémie jofu monáillai fuédamo ite. Afe Simón Pedro o finóllífue omo llóite, —daí daide.

⁷ Afe íemo úrite Juzíñamui abi ímie jáidemo, Cornelio mena tájítagamie jíirite. Ie mei ie abi ímiaímona daa ñúefuego ínofírede fuíríraíma jíirite.

⁸ Nana Juzíñamui abi ímie íemo llogafue llua meífomo Jópemo íaioína orede.

9 Afe jítiramoidiruimo, nai afémaci iodo jailla llezica, Jópemo áinozidiaioimo, Pedro jaíciri illa llezica jofo emodo ibánimo Juzíñamuimo úrizaide.

10 Aillo jufinaillamona güíacade. Mei íadi nai güille íaioi fínua llezica, nicáirilla izoide ciode.

11 Afe nicai anado mona tújicaillana ciode. Afénomona áillue iniroi izóidena nágafene zicai ícoinoga ana éniemo agüínana ciode.

12 Afe agüínega iníroimo naga táíide ríllenai ite, jaíóniai féedínuaiai díga.

13 Iemona daa uai dáinana cacade:

—Pedro, náidacaillano fatá ríi, —daide.

14 Jira Pedro uai ote:

—Jíi, Ocuíraíma, ríñeiticue. Bácaca ríllena jaca ríñédicue. Daje izói íáirede ríllena ríñédicue naa rairuica rille díga, —daide.

15 Afe uai nane dánomo íena daide:

—Naga Juzíñamui doga izói finoca rílleza íáire maméñeno iri, —daide.

16 Afefue dacaiñoámani íemo íficaide. Ie meífomo afe iniroi meine abido monamo jaide.

17 Nai Pedro afe nicáirillafuemo comeci facáaide. “Afe cue ciónafue nie izói daíacade,” dáidemo, Cornéliomona orécamiiai nazemo náidazaíbitiaioi. Simón jofo jicánotiaioi.

18 Dúciillano aillo uaido jicánotiaioi:

—¿Simóndimie bicommo ite? Afémie jaífodo mameina Pedro, —daídiaioi.

19 Nai Pedro nicáirillamo comeci facáaidemo, Ñuera Joreño íena daide:

—Cacai, damieámani o jenódiaioi.

20 Náidacaillano ana billano jizire úriñeno íaioido jai, mei cue omo orécamiíaiza, —daide.

21 Mei jira Pedro jofo emódobanimona ana billano Cornelio orécamací, nazemo náidaidinona daide:

—Cue omoi jenócamiedicue. ¿Nibái mei bitíomoi? —daide.

22 Jira afémaci uai otíaioi:

—Íllaíma Cornelio cai ória jira biticai. Afémie ñúefuena nitácamié. Afémie Juzíñamuimo ñue jacíruoide. Nana judíuai íena ñue llínotiaioi. Iena iere izíruítiaioi. Juzíñamui abi ímie íena daide: “Jópemo comini oreri Pedro uáidollena, afe mei o jofomo Pedro bílleza.” Jira o uáibiticai. Dinomo Cornelio íena o daíacallifuena cácaite, —daídiaioi.

23 Ie jira Pedro jofo íaioina ote. Afe naio ie díga fiébidiaioi. Afe jaíruido Pedro afémaci díga jaide. Afe llezica Jópemo ite ámatiaimona íena nabáioicaidiaioi.

24 Afe jaíruido Cesaréamo dúcidiaioi. Dinomo Cornelio íaioina úíñote. Aféno mo bíllena ie llogámaci ie comínimona, ie gaíga nabáíñiaimona dáanommo gairídiaioi.

25 Afécomo Pedro dúcia llezica, Cornelio jino íena llínuaíbite. Jino billano Pedro anamo dújude, ie cáimadollena.

26 Mei íadi Pedro íena náidacaitano íena daide:

—Náidacai. Cue o izói énie ímiedicue, —daide.

27 Nai afémie díga úrioína llezica, jofo jaide. Jáillano aillo gairídinona cóizaide.

28 Jira Pedro daide:

—Jae onódiomoi, judío ímie ie ínuafuaíaido jaízíe ímie díga nabáirinide. Daje izói ie jofomo jaillae rairuírede. Mei íadi Juzíñamui jae cuena llófuete.

Buna jiáimana comécina íáiredimie daiínide. Daje izói rofóciredimie jiáimana daiínide.

²⁹ Te jira orécamiái cue jírilla llezica nie izói daiíñeno jarire bitícueza. Mei jira nibái mei cue uáidotioza onóacadicue, —daide.

³⁰ Te jira Cornelio uai ote:

—Jae nagaamarui jáidemo, afe bie daje hóramo, benó cue jofomo güiñeno iticue. Aferuimo jitoma ja ana ítemo Juziñamuimo comeci faiticue. Comeci faiano quenírede inícuiro jitáoidimie cuemo cíocaide.

³¹ Afémie cuena daide: “Cornelio, o jicánogafuiaina Juziñamui cacade. Afe llezica jitáiredinomo o cánuafuiaimo Juziñamui comécide.

³² Jope jófue mo ore Simón uájillena. Afémie jiáifodo mameina Pedro. Afémie jiáie Simón jofomo biruido ite. Jiáie Simón igorai ídiai jinítaraima. Te jofomonallai fuédamo ite. Pedro dúcia o diga úrizaité,” daide.

³³ Daií raire ona jenótaticue. Jira o bille ñuera. Birui nana benomo Juziñamui uécomo iticai. Nana Juziñamui omo llotátaguai caimo o daiíllena cacácadicai, —daide.

Pedro Cornelio jofomo llófueza

³⁴ Jira Pedro ja úrillano daide:

—Ja birui Juziñamui jiáimana daa úradotatañedeza onódicue.

³⁵ Mei íadi nizíemo itino íeri jácicaillano ñúefuedo úritinona Juziñamui íaioina llínofirede.

³⁶ Israel cómogimacimo Juziñamui úrite. Jesucristodo comeci caimare uái illafue íaioimo llote. Afémie nana nairai Ocuíraima.

³⁷ Nana judío éniemo comuíduena ñue onódiomoi. Juan Bautista jino llúajilla mei, comíni báutizailla meífodo afefue Galiléamo como fueñe taineca.

³⁸ Nazaret ímie Jesumo Ñuera Joreño ríino Juziñamui ígaza onódiomoi. Afe Jesús ñúefue finócana jáillana onódiomoi. Afe izói nana Taife ríino anamo duere zefuídinona ie jíllotafuiaina onódiomoi. Afefuiaina daií finode Juziñamui ie diga jáicana jira.

³⁹ Nana Jesús judío éniemo finócafuiái uai nabáiraimacidicai. Daje izói Jerusalén jófue mo ie finócafuiái uai nabáiraimacidicai. Ie méifomo cruzmo íena coráiano íena titádiaioi.

⁴⁰ Mei íadi Juziñamui daruíamani íllamona abido íena cáatate. Ie mei afémiena caimo cíocaitade.

⁴¹ Nana comínido cíocaitañede mei íadi dani caimo cíocaide, Juziñamui uícomo nizeca uai nabáiraimacidicaiza. Afe mei afémie tíllanomona meine abido cáanamona ie meífomo, afémie diga güiticaí; ie diga jiródicaí.

⁴² Afémie Jesucristo rafue jino comínimo caína llotátate. Afe izói jiáifue caína ua nabáiritade. Afefue daide: “Juziñamui afe Jesús tíidino cáadino diga íaioi fiénidifuiái jicánoitimiena ocuide. Cai aféfuemo uaina nabáitagamacidicai.”

⁴³ Daje izói jaiái ninómona nana uai lloraini Jesudo úritiaioi. Daidíaioi: “Nana afémiemo ínotino íaioi íáiredifue mona ie mámeçido ñue dóficaitiaioi,” daidíaioi, —daide.

Juduañedino Ñuera Joreño como fueñe úicaigaiaioi

⁴⁴ Nai Pedro úrioina llezica, ie úrillauaimo cacáredimacimo Ñuera Joreño nana íaioimo ana bite.

45 Jira Pédrodo bite ínnote judíuai fáigacaidiaioi. Ñuera Joreño judíuaiñedinomo daje izói úicaigafueri fáigacaidiaioi.

46 Jae jiáizie uáillaído íaioi úrillana cacádiaioi. Afe llezica Juzíñamuimo íaioi íobioinana cacádiaioi.

47 Mei jira Pedro daide:

—¿Birui bu mei ráiruille bimaci báutizallena; mei daa cai izói Ñuera Joreño úicaigaiaioi? —daide.

48 Iemona Jesucristo mámeçido íaioi báutizazigaiaioi. Ie meífodo Pédrodo izire jicádiaioi: “Nano nígarui cai diga iri,” daídíaioi. Daí íena jeruídiaioi, nano nígarui íaioi diga íllena.

11

Pedro Jerusalemo ite ínnotinomo llogafue

1 Judéamo ite orécamaci ámatiai diga, cómoicana jiáifuena fidídiaioi. Afefue daide: Judíoñedinomaci Juzíñamui úrillauaina jae jeire otiaioi.

2 Pedro meine Jerusalemo jáidemo, judíuaimona dámierie ínnotino Pédrona zanódiaioi.

3 Zánuno daídíaioi:

—¿Ñibái judíoñedinu uáiduidio? ¿Ñibái íaioi diga güitio? —daide.

4 Ie jira Pedro afefue nanómona nana ie finócafuiai llote; daide:

5 —Jope jófuego cue íadi, Juzíñamuimo úrifiredicue. Afe llezica nicai anado ciódicue. Afe nicai anado áillue iniroi izóidena monámona ana bíllana ciódicue. Afero nágafene zícaino ícoínoga. Daí cue illánomo dúcide.

6 Afemo ñue eródicue ie eromo itínuiaina onóillena. Iemona afe eromo ite táicaide rílleniaina ciódicue. Afe dáanomo jacírede rílleniaina ciódicue. Daje izói afénomo jáizai, íemo féedinuiai diga íllana ciódicue. Nana afe ciona rílleniai bácaziga.

7 Iemo daa uai cuena dánana cacádicue. Daide: “Pedro, náidacaillano afe ríllemona fatá rii.”

8 Mei jira daídicue, “Ocuíraima, dama ite. Jaca nanómona cue fúedo íáiredena riñédicue bácaie diga.”

9 Ie mei afe monámona cacaiude uai dáanomo cuena daide: “Juzíñamui doga rílleza íáirede daíñeno o iri.”

10 Afefue dacaiñoámani meine íficaide. Afe meífomo dáanomo nana monamo meine jaide.

11 Afe llezica daameámani cue illánomo dúcide. Afémaci Cesaréamona cue jenóllena orécamaci.

12 Ñuera Joreño afémacido cuena orede: “Due jiza jizíñeno afémacido jairi,” cuena daide. Daje izói baie seis ámatiai cuedo jáidiaioi. Nana cai daaco jofomo jáidicai.

13 Afémie Juzíñamui abi ímiena ie jofu eromo ie ciónafue caimo llote. Afe Juzíñamui abi ímie náidaillano íena daide: “Jope jófuego nano nígamie ore, Simón jírizai llena. Dáamie jiáifodo mameina Pedro.

14 Afémie ona dáiteza, nie izói o nana o comini diga jíllotioza,” daide.

15 Cue fueñe íaioimo úrizaila llezica, Ñuera Joreño imaci acónimo bite, nano fueñe cai acónimo billa izói.

16 Mei íemona Ocuíraima daínáfuego úbicaidicue. Afefue daide: “Uáfueña Juan fia jáinoido báutizade, mei íadi Ñuera Joreño úicaigamacina ítiomoi.”

17 Mei jii Ocuíraima Jesucristomo cai íinuano Juzíñamui caimo iga Joreño, bimácimo Juzíñamui íacade. Afena fidíillano Juzíñamuido jarífeicana úriacañedicue. Jamaí cómedicueza, —Pedro daíí daide.

18 Mei ie jira Jerusalemo ite ámatiai aféfuiaina fídia llezica, llícaidiaioi. Llícaillano Juzíñamuimo caimátaidiaioi. Daíídaíioi:

—Ua afe izói judíoñedimacimo íaioimo fieni itífue méidollena jae Juzíñamui íaioimo fecade. Afemona daíí jaca zíñona cáaillinona íaioimo ite.

Antioquíamo ite Juzíñamuimo ínote gairídino

19 Esteban íaioi faa llezica, jiáie ínotimacimo duere finótatiaioi. Dáarie Feni-cia éniemo botádiaioi; jiáimaci Chípreno Antioquía diga botádiaioi. Dinomo afe ñúfue dani judíuai namácimo llotíaioi. Jiáimacimo llóñega.

20 Mei íadi dáarie Chipre imaci, Cirene imaci diga ínotino Antioquía jófuego dúcidiaioi. Dúciillano judíoñedinomo úritiaioi. Afemona Ocuíraima Jesús úrillauai íaioimo lloté íaioi jilloillena.

21 Afe llezica Ocuíraima ríino íaioimo ite. Mei daíí aillo comini nano íaioi jaiái ínogafuiai fáicanocaillano Ocuíraima Jesumo ínotiaioi.

22 Afefue Jerusalemo ite ínotinomo jállecaide. Iemona afémaci Bernabé Antioquíamo orédiaioi.

23 Bernabé dúciillano, Juzíñamui cáimadogamací izói ciode. Aferi afémie iere ióbicaide. Nana íaioi llófuete; daide:

—Nana cai Ocuíraimana fáicanocaiñeno ie llogáfuemo jaícina omoi comécíiri, —daide.

24 Afe Bernabé comécina fígomie, Ñuera Joreño úcaigamie. Afémie Jesucristomo izire ínofiredimie. Daíí aillo comini Ocuíraima Jesucristo íena náamatade.

25 Afe meífodo Bernabé Társomo Saulo jénuaide. Baillano Antioquíamo íena úite.

26 Dinomo daa fimona namónaze ínotino cígimo ñue fuitádiaillinoi. Afénomo aillo comini llófuete. Afe Antioquíamo ínotino como fueñe Crístomo jaináidinona ja maméciaiaioi.

27 Aféruillaido dámierie Juzíñamuimona llínoga uailai lloráimaci Jerusalémoma Antioquíamo jáizaide.

28 Afémacimona dámie Agábona mámeciredimie. Nana ínotino cígiri náidaillano daide:

—Nana bie éniemo aillo jamánomo júbie biite, —daide.

Ñuera Joreño ie comécimo llúamona afefue jino lloté. Afe júbie daíí bite Claudio illáimana illáruillaido.

29 Ie jira Antioquíamo ite ínotino comeci facádiaioi Judéamo ite ámatiai canóllena. Naga come íaioimo ite úcube díerize bai jóonetiaioi.

30 Afe daíí ñeta, Bernabé Saulo íaillinoido afe íraica úcube Judéamo ite ínotino illáicomínimo orédiaioi.

12

Santiago tíllafue Pedro llavéinafue diga

1 Aféruillaido Juzíñamuimo jaináidinó duere finóllena illaíma Herodes nane jénuaide.

2 Iemo Herodes Juan ama Santiago llóéfaido títatate.

³ Afémie titátari judíuai iere ióbidiaioi. Aféfuena Herodes fidínamona nane Pedro lláitajide. Ja birui irázillarullai. Afe irázillarullaído fáitañega pan güitaiioi.

⁴ Pedro llaitada mei Herodes llavéracomo íena íbaicuaide. Dinomo cuatro dígagüelli íena úiñotiaioi. Naga afe güéllimona cuatro dígamírie lláiziriraini ite. Herodes comeci facade pascua rafue meífodo Pédrona jino comínimo ciótallena.

⁵ Ie jira Pedro llavéracomo llaveda ñue úiñoga. Mei íadi Juzíñamuimo gairídino íemo izire Juzíñamuimo jicáoidiaioi.

Juzíñamui Pédrona llavéracomona jino oreca

⁶ Herodes Pedro jino comini uécomo diacnarui uícodo, afe naio Pedro llavéracomo inide ñue úiñoga. Nágafene onoi llóejina maiga úiñoraíma íaillinoi jaináoigari inide. Afe llezica jíáie úiñoraíma íaillinoi jino llavéraco naze úiñoide.

⁷ Iemo Juzíñamui abi ímie raire cíocaizaíbite. Afe llezica llavéraco ero úzerecaide. Juzíñamui abi ímie Pedro ciraigi teténote íena cazítate. Cazítano íena daide:

—Mai raire náidacai, —daide.

Iemona llóejillai Pedro ónoimona ana cocide.

⁸ Afe Juzíñamui abi ímie íena daide:

—Mai o ciraigi tirínorafe jofo ríire tirino.

O éiba ico jita, —daide.

Pedro daíí abi fínua llezica Juzíñamui abi ímie íena daide:

—O emodo jítaca áreoi jítada, cuedo bí, —daide.

⁹ Iemona Juzíñamui abi ímie óodana Pedro jaide. Afe abi ímie finócafue Pedro onóñedeza; nibai uafue nibai táinofue. Comeci facáoide: “Nícaí anado ciona izóidífueña cíódicue.”

¹⁰ Mei íadi fueñeide jóonetimíemona bai jújicaillano báifeicana jóonetimíemo dúcidiailinoi. Ie mei afémiemona jújicaillano bai nazemo dúcizaidiaillinoi. Afe naze íbaira llóébani. Dúcidiailinoímo afe naze íbaira daingo tújicaide. Jino jáillano bai iodo daallu macádiaillinoi. Ie mei Juzíñamui abi ímie íe fénocai.

¹¹ Iemona Pedro ñue onócaillano daide:

—Íco iere uáfueza. Juzíñamui abi ímie cuemo orede Herodes cue llavénamona cue zuitállena. Afe izóí nana judíuai cue duere finóacanafuemona cuena zúitaíbite, —daide.

¹² Aféfuemo coméciillano Juan ei María jofomo jaide. Afe Juan jíáfodo mameide Marcos. Afécomo aillo comini Juzíñamuimo iere úrillena gairídiaioi.

¹³ Pedro afeco abi íbiri llaveca nazemo náidazaide. Náidaillano jofo ero imaci jíirite. Iemona Ródena mámeçirede ringoza bu billa daííllena eróizaide.

¹⁴ Mei íadi Pédrona uáimona onóillano, nazena tuiñóñeno, ióbicaillano meine jofo aizida llujáide:

—Pedro nazemo dúcina, —daízaide.

¹⁵ Jira íena daidíaioi:

—¡Uáiritaidio!

Mei íadi afengo daide:

—Uáfueña ñue llotícue; uáfueña Pedro dinomo ite, —afengo daííoide. Mei íadi afémaci íinoñeno daidíaioi:

—Pédroñedeza; fia íe joreño, —daidíaioi.

16 Mei íaioi úrioina llezica, Pedro nazemo nai jírrioides. Afe meífomo naze tuiñoda íemo érocáidíaiói. Erocaillano jacínaitíaiói:

—Ua meita Pédrodio, —daidíaiói.

17 Mei íadi ónoído:

—Mai omoi úriño, lliicai, —daide. Iemona Juziñamui llavéracomona ie zúitafue llote. Iemo íaioina daide:

—Bifue Santiágo lluájiri nana jíáie ámatíari, —daide.

Ie meífodo jino jaillano oni jíainomo jaide.

18 Jae monáizaidemo, llavécano úñorainimo aillo riire júfidotíaiói, mei onóñediaoiza; daidíaiói:

—Benó cai úiñoga Pedro ¿niné jaide? —daidíaiói.

19 Herodes Pédróna íaioina jenótate. Iena íaioi baiñenamona, nana úñorainimo jíicáicanode. Ie mei Herodes afeúñoraini fatátate, Pedro íaioi botata jira. Afe mei Herodes Judéamona jae oni Cesaréamo jaiánite.

Herodes tíllafue

20 Jae Herodes Tiro comini Sidón comini diga íaioiri icírrioides. Mei íadi afémaci dani comeci facádíaiói ie uíecomó cíozabillena. Illaíma Herodes jabóidíllaíma Blasto. Afémiena fairíotaredíaiói íaioiri ñue nabáirillena. Afémiedo ñue caimare illifue Heródemo jíicádíaiói. Ua izire jíicádíaiói, íaioi güllenai, illaíma Herodes éniemona íaioi ófírena jira.

21 Ie jira Herodes íaioimo úrizailirui íaioimo llote. Aféruimo ebírede illaíma iniroi jíitano illaíma ráiranomo ráinade. Daí ñiano are íaioimo úrite.

22 Mei íemona comini caillíoicana íena daidíaiói:

—Bie úritímie ía cómeñedeza, afémie juziñamui, —daidíaiói.

23 Afe llezica Juziñamui abi ímie Heródena iráretade Juziñamuimo ñúefuena nitátañena jíirari. Iemona afe Herodes aíaide tílla.

24 Íadi Juziñamui lloga uai oni jalléicaide. Afe jalléinamona náganerie fidídíaiói.

25 Bernabé Saulo diga íaillinoi afe úcube íiaillano meine abído Jerusalémona bitíailinoi. Aféillinoído bite dáamie, Juan dainámie. Dáamie mámecei Márcona.

13

Bernabé Saulo diga como fueñe nágabíai llócaidíallinoi

1 Antioquíamo ite gairíracomo nano niga uai jino llóraini ite naa llófueraniri. Afémaci mámecei: Bernabé, Simón, Cirene ímie Lucio, Manaén, Saulo dígamiedíaiói. Simón jíáífo mameina Negro. Galilea illaíma Herodes Manaén diga, dáanomó comuídíaillinoi.

2 Aféruillaido afémaci güñeno Juziñamuimo caimátadíaiói. Iemo Juziñamui Ñuera Joreño íaioina daide:

—Bernabé Saulo diga oni eneno nízeri, cue ocuica raa íaillinoi jetállena.

3 Güñeno Juziñamuimo úrilla meífodo éinamaci íaillinoina ónoído ézícita, daidíaiói:

—Mai, ómicoi jairi, —daidíaiói.

Orécamaci Chipre éniemo llófuíaidíaiói

4 Ie mei daí Ñuera Joreño íaillinoimo llujállamona oni Antioquíamona Selúciamó jáidíallinoi. Dínomona áillocaedo monaillai cígi záfedu Chipremo jáidíallinoi.

5 Salamina ígobemo dúcizaidiaillinoimo judío llófueriracomo Juzíñamui uaillai jino llotíaiillinoi. Afe llezica Juan íaillinoi canócana nabáizaide.

6 Nana Chipre éniedo llócadiaioi. Iirainomo Pafo jófuemo dúcidiaioi. Dinomo judío aima Barjesuna mámeciredimie baizájdiaioi. Afe aima táinona llófuefiredimie. Afémie daiífiredi:

—Juzíñamui dibénedo úriticue, —daide.

7 Afe aima ocuídillaíma Sergio Paulo dígamie dáanomo itíaiillinoi. Afe Sergio ráfuena ñue onódimie. Aféllaíma Bernabé Saulo diga júritade Juzíñamui uaillai cacáillena.

8 Mei íadi afe aima Bernabé Saulo diga llogáuai uáitano zanode. Ocuídillaíma ínuana aima rairuicade. Afe aima jáífodo mameina, Elimas.

9 Saulo jáífodo mameina Pablo. Afe Pablo Ñuera Joreño úcaigamie. Aima dáinana cacáillano íemo riire érocaillano

¹⁰ daide:

—Jíáíma jífuetimedio! Íaíba Taife jítódio. Nana ñúefuíaína uáitaraimadio. ¿Nibái mei ñuera Juzíñamui lloga uai oni cáitano féitaacadio? ¿Nibái mei o táinofuíaína fáicanocaiñeno jino llóllodio?

11 Mei jabe Ocuíraíma Jesucristo riire ona duere fínoite. O ui nírite. Nano nígarui jítoma egáíñuana cióñeítio, —daide.

Daí dánamona ie ui nírbicaide. Jae jítidine taino mellécade. Dáamie íena ónoído jainátacana úite, ie ui cióñena jira.

12 Ocuídillaíma Sergio Paulo áfena cióillano, llogáuaina ñue íinote, mei Juzíñamui llófueinamo jacíruiocana aféuaimo ñue eroide.

Pablo Bernabé diga Pisidia éniemo ite Antioquía jófuemo jáidiaillinoi

13 Pablo ie nabáíñiai diga nocaedo Pafo jófueмона jáidiaioi. Dinómona Panfilia éniemo ite Perge jófueмо jáidiaioi. Afénono Juan íaioína fiénocaillano abido Jerusalem jaide.

14 Pablo ie nabáíñiai diga afe Pérgemo dúcillano, Pisidia éniemo ite Antioquía jófueмо arido jaícina jáidiaioi. Dinomo ocózinaiillaruimo llófueriraco eromo ránazaidiaioi.

15 Ocuícafuiái illánicomona fueñe facádotiaioi. Ie mei Juzíñamui uai jino lloránicuaímona facádotiaioi. Afe facádua fúillamona llófueriraco illaíni íaillinoína daídíaioi:

—Amatai, ómicoi cacai. Omicoi llóíacaigafuiái íadi comíni cacáilleza jino ómicoi llóoiri, —daide.

16 Mei íemona Pablo náidacaillano, ónoído comínina llícaítade. Afe mei íaioína daide:

—Israel nairai, omoi cácarei. Daje izói Juzíñamuina jacíruioidino, omoi cácarei.

17 Israel nairai Juzíñamui cai jáíairagima nana íaioína nízedede. Iemona Egipto éniemo ónoñegamacina íaioi illa llezica, aillo náiraina afémie jebuítate. Afe mei aféniemona dama íemo ite ie rínodo íaioína oni ote.

18 Ua mei Juzíñamui comeci jítáinafue nai figo fuitáñediaioi, mei íadi afe táizícimo cuarenta diga fimona Juzíñamui íaioína zófeñeno úíñote.

19 Afe mei Canaán éniemo ite siete nairai Juzíñamui niné táinocaitaga, afe énie cai jáíairagima maíñóllena.

20 Afe meífodo diga riire jicánoraini cuatrocientos cincuenta fimona ocuíaiaioi. Ua ocuíaiaioi uai llóraíma Samuel illáruimo.

21 Ie mei íaioina ócuite ríllaíma jicádiaioi. Jira Juzíñamui Saúl cuarenta fimona afémaci illáimana jóonete. Afe Saúl Cis jító, Benjamín nairai ímie.

22 Afe mei Juzíñamui Saúlna oni orede. Oni óriano David illáimana ie meífomo jóonete. David ífuedo Juzíñamui úrite; daide: “Cuena íóbitadímie David baitícue. Afémie Isaí jító. Nana cue jitaiga raana jetáfiredé,” daide.

23 Afe David cómogimamona Jesús jococa. Afe Jesús Juzíñamui uícomo daináuai izói Israel nairai jíllotaitimiena íaioi cígiconi Juzíñamui comúitate.

24 Jesús comínimo nai abi báifitañenia Juan nana Israel náiraímo jino llote; daide: “Nana omoi báutizarediomoí. Omoi comeci ífuiái mai ñúefuena méidoziri.”

25 Juan uícodo llófuai llafue fúiacademo, daide: “Omoi comeci fácamieñedicue. Jamáimedicue. Mei íadi cue meífodo bitímie cue baímo baitádímie. Afémie ídai ico igaina zuitánidícue, (jiba jamáimedicueza),” daí Juan daide.

26 ‘Cáimaci, omoi cácarei. Abraham nairai urúcidíomoi; mai cácarei. Omoi mona Juzíñamuina jacírioidino, omoi cácarei. Bie ñue jíllotaituái ómoie.

27 Mei Jerusalem itino íaioi illáiniri Jesús nahí ífueña fidíñediaioi. Daje izói naga ocózinairuimo facádoga uai llóraini llogáuallaina cacádiaioi, mei íadi aféuai daináfueña onóñediaioi. Aféuallaina íaioi onóñenado Jesús duere finótatíaoi. Daí jaiái ninomo mamécáfuiái afémiemo fuitádiaioi.

28 Afe Jesús fatátallífuena due jiza jaca baíñediaioi; mei íadi Pilátomo ie fatátallena jicádiaioi.

29 Afe mei nana afémiedo Cuegáualláimo jaiái ninomo lloga uallái fuitádiaioímo, crúzmona íena ana otá íena raíájidiaioi.

30 Mei íadi Juzíñamui tíllanomona íena meine cáatate.

31 Afe mei diga irui illamona Galiléamona Jerusalem ie diga jáicadinomo Jesús íaioímo cíocai. Afe íedo jáicadino ja birui comínimo afémie llócaigafue llotíaoi.

32 ‘Juzíñamui cai jáiairagimamo uícomo llogáuaido úrite. Ñúefuedo úrite. Ja birui afe ñúefue ómoímo llotícaí.

33 Ja cai bie afémaci cómogimadicaí. Ie jira afémie uícodo llogáuái ja caímo fuilla. Afe uai daide: “Jesucristo tídena meine abído cáataticue.” Daí rúanicomo cuega; segundo ruamo cuega; llote: “Cue jítódio. Birui ona cáataticue.”

34 Diga ícaíño Juzíñamui ie cáailífuena llote. Ua tíllanomona íena cáataite, ie íeizi jaca ninomo rífaíñeillena. Juzíñamui aféfuena jaiái ninomo Cuegáualláido daide. Afe uai ie jító Jesuna daide: “Davidmo uícodo cue uafue lloga ñue cámafuiái nahí omo jainaide.”

35 Ie jira rúanicomo jáírúado daide: “O izírúiga ñue canódimie íeizi ráirúitio ie rífaíñeillena,” daide.

36 Afe David ie llezica igímána ñue canode, Juzíñamui ie ocuilla izói. Afe meífomo David tíllano ie uzútíai cígímo íena raíájidiaioi. Iemo íe íeizi rífaide.

37 Mei íadi Juzíñamui cáatagamie íeizi rífaíñede.

38 Cáimaci, omoi cacai. Afe bie rífaítañeno cáatagamie Jesudo omoi fiénidífuíai íba óñeillífué ja ómoímo jino lloga.

39 Afémiedo nana íena ínotino nana íaioi fiénidífuíaimona dófcaitíaoi. Mei íadi Moisés ocuácfuiái cai fiénidífuíaimona caína zuitáñede, mei cuínaca izói jaináidicaí.

40 Ñue abi omoi rairuiri uai jino llóraini cuega mamécafuiai ómoimo báíñeillena. Afe mamécafue daide:

41 ñinoñeno uáitaoidino, omoi cácarei; cacáillano áferi omoi jacínaifcairi.

Iemona niné táinocaitiomoiza, aféruillaído jamánomo ñue jácifue cue finua jírari.

Aféfuenta dámie ómoimo lloía, íadi áfena ñinoñeitiomoiza, —daide.

42 Pablo ie nabáñiairi judío garíracomona jino jáidiaioi. Jáidiaioimo judíoñedino jocócaiaioi íaioimo aféfuenta meine abido íaioimo lluaíbillena jicádiaioi. Afe úreite ocózinaillaruiome meine lluaíbillena jicádiaioi.

43 Afe llófueriracomo íaioi gairilla záillamona aillo judíuai Pablo llogafue jieruitiaioi. Iemona Pablo Bernabé diga íaillinoído jáidiaioi. Daje izóí aillo judío onógafuenta jeire otino íaillinoído jáidiaioi. Pablo, Bernabé diga íaioimo lloite:

—Mai Juzíñamui caina izíruillafuemo nágarui aféfuemo ñue omoi coméciri, —daide.

44 Siete dígarui íllamona ocózinaillaruiome, nana jofue comini dáanomogairídiaioi, Juzíñamui uailai cacáreillena.

45 Mei afénomo aillo comini gairíllana judíuai cióillano, úrioína izóí itíaioi. Afénomo Pablo uailai uáitano íena báíñotiaioi.

46 Ie mei Pablo Bernabé diga abi mámano íaioína daide:

—Judíuai, bie Juzíñamui uai fueñe ómoimo llole iere jitárede; mei íadi ja aféfuenta óiacañediomo; afe ícoína ziiñona cáallínona llínoñeitiomo. Ie jira ja birui judíoñedíno jáiticaí.

47 Mei jira Juzíñamui daí caina llotátate; Juzíñamui daide:

Cuedo náiraina fidítaraimana o mamédicue.

Nana énie íiraino imaci ñuera jíllonafue llóraimana íitio.

48 Aféfuenta cacáillano judíoñedino íóbicaidiaioi. Íaioi úrilla fueñe táinia llezica:

—Juzíñamui uáillaina jamánomo ñuera, —daídiaioi.

Afémacimona aféfuenta ñnotino aillo ite. Ziiñona cáatatinona llínoitínona mamécaiaioi.

49 Iemona Juzíñamui uailai nana afe énie náiraído jae ñue jalleide.

50 Afe jófuemo Moo Juzíñamuimo izire jaináiacade ringóniaimona dáingorie ite. Afe ringóniai illaingo izóidingotiai. Judíuai afe ringóniaimo úrite, Pablo afe jófuemona oni oréllena. Daje llezica judíuai afe jofue illáinimo daje izóí úrizaidiaioi. Íaioi comeci fiendi finua jira, jíáie Páblona duere finócanafue comuízailla, Bernabé diga. Afe jófuemona oni íaillinoi orédiaioi.

51 Afe ória meífodo afe íaillinoi eiba ico íáie íaioimo teténote; afe teténuafue baimaci comeci íaífuiaimo íteza, daíacade.

Daí ñiano Iconio jófuemo jáidiaillinoi.

52 Mei íadi Jesús llogáfue ñnotino iere íóbioidiaioi. Afe llezica Ñuera Joreño úicaigaiaioi.

14

Pablo Bernabé diga Icóniomo itíaillinoi

1 Icóniomo dúcillano judío llófueriracomo daane jofe jáidiaillinoi. Dinomogamánomo ñue úritiaillinoi. Afemona aillo judíuai Jesumo ñnotiaioi; judíoñedínomona daje izóí aillo afefue ñnotiaioi.

² Mei íadi ínoacañede judíuai jíáie judíoñedino comeci íaire finódiaioi. Daií Páblona Bernabé diga éoicana eróidiaioi.

³ Ie jira dinomo diga irui ñue jaícina jacíruiñeno Ocuíraima Jesús mámeçido llófuetaillinoi. Afe llezica Juzíñamui dama ie ñue ríino íaillinoimo fecade. Afemona onótate ráaniai cíorainina ráaniai diga finódiaillinoi. Aféniaido íaillinoi lloga Juzíñamui caina izíruillafue Juzíñamui ñue comínimo fidítate.

⁴ Mei íadi jofue comini bózietaidiaioi. Dáarie judíuai dibénemo jaináiacadiaioi. Jíaimaci Pablo Bernabé diga dibénemo jaináiacadiaioi.

⁵ Afe meífodo ínoacañede judíuai jíáie judíoñedino diga naa íaioi illáiniri noficiaina íaillinoi njíacadiaioi. Daií íaillinoína duere finóacadiaioi.

⁶ Mei íadi aféfuena orécamací uícodo fidídiaioi. Fidiano Pablo Bernabé diga Licaónia éniemo botadíiaillinoi. Dinomo ménagobemo macáoidiaillinoi, Listra Derbe diga naa afe áinori itíniaido.

⁷ Dinomo ñue jíllonafue llotíiaillinoi.

Lístramo Pablo noficiaina njíidiaioi

⁸ Iemo Lístramo macáñede aidaima ite. Ie jocóinanomona tízitaite izóí macáñede. Jaca ie macánina jira dinomo ráide.

⁹ Afémie Pablo daináfuemo ñue cacáreide. Iemona Pablo íemo érocaillamona, tízitaítimie ñue ínuana Pablo comécido fidíde. Ie ínuamona afémie jíllorede.

¹⁰ Iemona Pablo íena riire daide:

—O ídaido caífo jaícina naidai, —daide.

Afénomona afémie tícacaillano náidacaide; náidacaillano como fueñe mácajide.

¹¹ Daií Pablo finócafueña cíoillano, nana comini Licaónia uáillaído caillíoicana daidíaioi:

—Juzíñamuillai jamai comini izóí ana caí cígimo billa! —daidíaioi.

¹² Bernabena Júpiter juzíñamui daidíaioi; Páblona Mercurio juzíñamui daidíaioi, jamánomo ráfuiai llotímiena jira.

¹³ Júpiter gairíracó naze fueri ite. Afeco úiñotimie juráretuai atide naa amena záfiaiai diga. Afémie naa comini íaillinoimo cáimadoacadiaioi. Juráreto fáillemona íaillinoína íóbitaacadiaioi.

¹⁴ Mei íadi orécamací Pablo Bernabé diga fidídiaillinoi. Aféfuena fidínamona, ínícuro cúatacaillano, comini cígimo jáidiaillinoi. (Afe iniroi cuata daíacade íaillinoi comeci jamánomo ríicaide.) Jaillano caillíoicana daidíaillinoi:

¹⁵ —¡Nana omoi, cacárei! ¿Níbái bie izóí finódiomoi? Coco omoi izóí jiba cómedicoco. Ñúfue ómoimo atídicoco. Afe bie tánofuiai omoi fáicanocaillena lluaíbíticoco. Fáicanocaillano, ua caade Juzíñamui dine omoi jáillena daií lluaíbíticoco. Afémie mona, bie énie, monáillai dieze finode naa íaioimo itínuiari.

¹⁶ Jáiairagima illa llezica nana nairai íaioi comeci jítaíllafodo macáoidiaioi. Aféruillaído Juzíñamui íaioína lletáñede.

¹⁷ Mei íadi Juzíñamui ñúemie ífuena ñue ómoimo finócafuaído ómoína fidítafirede. Ua ñue nocina ómoimo bítafirede. Nana aménaiái llizíllajaina ómoiri lizítate. Afedo omoi güille ñue ite, omoi comeci íóbillena, —daií úrite Pablo.

¹⁸ Mei nana afe daináuailai daína íadi, nana comini íaillinoiri juráretuai nai fáiacadiaioi. Iadi ícoimo afétuai íaioi faana féitatadiaillinoi.

19 Afe mei Antioquíamona Icóniomona dáarie judíuai dúcizaide. Listra comínimo júfiduano Pablo fállena mamé diaioi. Iemona Páblona noficiaina níj diaioi. Níjiano jofue jinófenemo íena zonócaidí aioi. Comécido daidí aioi: “Níbai tíide,” daide.

20 Mei íadi ínotino íemo gairí diaioimo Pablo náidacaillano meine jófue mo jaide. Afe jítiramoidiruido afémie Bernabé diga Dérbemo jáidiaillinoi.

21 Dínomo jíllona uail lai jino llotí aillinoi. Afe jófue mo aillo comini Jesumo ínotí aioi. Afe mei meine abído Lístramo, Icóniomo íemo Antioquíamo dieze jáidiaillinoi.

22 Nana afénuiai jofue ínotínui ai ñue caimare íociretadiaillinoi. Ñue jaícina ínuafuedo íaioi jáillena llófuetaillinoi. Iemo íaioina daidí aillinoi:

—Juzíñamui illáimana illíruimo cai jáillena, aillo afe facátafuai iere caimo jítaírede, —daide.

23 Afe llezica naga gairíracuaimo ócuite illáinina mamé diaillinoi. Afe mei güíñeno Juzíñamuimo iere úrilla meífomo nana como ocuídíllainina mamécami ai Juzíñamui úíñuamo jónetiaillinoi, Juzíñamuimo ñue íaioi íñua jira.

Pablo Bernabé diga íaillinoi nano billánomo abído jáidiaillinoi

24 Afe meífodo Pisidia éniemona jaillano Panfilia éniemo dúc diaiaillinoi.

25 Perge jófue mo jíllonafue llotí aillinoi. Afe llua meífomo Atalia jófue mo jáidiaillinoi.

26 Dínómona Siria éniemo ite Antioquía jófue mo nocaedo ruica jáidiaillinoi. Naui afe jófue mo ite ínotino íaillinoina Juzíñamuimo jónetí aioi. Daií finódí aioi jáie nairai ñúefuena llófui aillena. Ja birui afe táijina fuilla.

27 Antioquíamo dúc diaiaimoimo, nana ínotino Juzíñamui gairíracomo gairí diaioi. Gairí diaioimo Pablo nana Juzíñamui íaillinoído finócafuai jino íaioimo llote. Afe llezica judíoñedinomo Juzíñamui ñue jíllolle io como túíña llotí aillinoi. Afe izóí afemo afémaci íno redí aioi.

28 Afe meífomo Pablo Bernabé diga ínotino cígimo are diga irui ití aillinoi.

15

Ínotino illai ni Jerusalemo gairí diaioi orécamaci diga

1 Aféruillaido dáarie íñíai Judea éniemona Antioquíamo ite ínotino llófui aibite. Íaioina daidí aioi:

—Moisés ocuica íza bacano ícoi quétafuena omoi finóñenia, jílloneití omoi, —daidí aioi.

2 Ie jira Pablo Bernabé diga íaioimo rírede uáillaido úritiaillinoi aillo júfuduafuiai diga. Iemona Antioquíamo ite ínotino Pablo, Bernabé, jíámaci diga nízedí aioi, Jerusalemo ite orécamaci mo aféfuena jícánuail lena; daje izóí Jerusalemo ite Juzíñamuimo gairídino illáinimo jícánuaití aioi.

3 Mei daií nízia mei Antioquía ínotino afe nízécanona oré diaioi. Afe oréinamona, Fenicia éniedo Samaria énie diga jáidiaioi. Jaillano judíoñedino íaioi jaiaí llóinauail lai féitano Juzíñamui dibenedo jáillafue llotí aioi. Nana ámatí ai aféfuena cacáillano iere íobí diaioi.

4 Pablo Bernabé diga Jerusalemo dúc diaiaillinoimo, Juzíñamuimo gairídino mo caimare uáidogai aillinoi. Daje izóí orécamaci naa gairídino illáiniri

íaiillinoina caimare uáidotiaioi. Dinomo Juziñamui íaioiri finócafuiai íaioimo jino llotíaiillinoi.

⁵ Mei íadi fariséuaimona dáarie ínotino caifo naidáillano íaioina daide:

—Ínote judíoñedinomo afe cai izói quetáinafue jitáirede. Afe emódomo

Moisés ocuícáfue ñue ínollena jitáirede, —daidíaiioi.

⁶ Iemona orécamací naa ínotino illáiniri aféfuena ñue onóillena gairídiaioi.

⁷ Aféfuiai are íaioi júfidua meífomo, Pedro caifo náidaillano daide:

—Amatíai, omoi cácarei. Naui Juziñamui cuemo finócafuena onódiomoi.

Juziñamui omoi cígimona cue nizada judíoñedino cígimo orede. Ua cuena nizede afémacimo ñue jillonafue uaillai cue llujállena; áfemona afémaci aféfuiaina ínotiaioi.

⁸ Cai comécina onode Juziñamui cuemo llote: “Afe judíoñedinona ñue llínoíticue,” daide. Afemona Ñuera Joreño íaioimo fecade caimo ie feca izoi.

⁹ Juziñamui cáimona afémacimo jáífodo finóñede. Íaioi ínuado íaioi comeci íaifue Juziñamui oni dote caie ie dua izoi.

¹⁰ Mei birui çñibái mei Juziñamui finócafue jeire oñédiomoi? Çñibái mei baie ínotino jamánomo riire ocuícadió? Afe ocuínafuena cai, cai jáiairagima diga finóndicai.

¹¹ Mei íadi jáífodo ínoticai, cai jilloillena. Ocuíraima Jesús caimo dúecaide. Afemo cai ínuamona ibáñeno jillobicaidicai. Afe izói judíoñedino Jesumo ínuamona ibáñeno jillobicaidiaioi, —daide.

¹² Mei jira afémaci llíicaidiaioi, Bernabé Pablo diga llogáfuemo cacáreillena. Nana judíoñedino cígimo Juziñamui finócafuiai llotíaiillinoi. Dinomo íaillinoído uaido finoca onótate raa cíorainina raa diga Juziñamui finode. Aféfuiai jino llotíaiillinoi.

¹³ Íaillinoi llogafue fúillamona, Santiago daide:

—Amatíai, cue dánamo cácarei.

¹⁴ Simón Pedro jae Juziñamui judíoñedinona como fueñe íaioina izire canóinafue caimo jino llote. Juziñamui jae judíoñedimacimona dáazie como nízaiabite dama ie náiraina.

¹⁵ Afefue ua Juziñamui jaiai uai llóraini cuégáfuaímo jáicina dájena jóobide. Afe Cuegáuai daide:

¹⁶ Bifue mei, meine bíiticue.

Ua David jaiai nairai, júdaizitaga íadi, meine dáaziena jofo gairítaiticue.

Aféziemona due fiébidino jaiai íaioi ízaina izói meine jebuitaiticue.

Rínidimaci jofo dánonomo otátaiticue, ñue riirediziena íaioi íllena.

¹⁷ Afe daí finuaibiticue nana jáíamaciai Juziñamuimo comeci fácajano íaioi ínollena.

Daí fínoíticue nana cuena náamarede judíoñede náiraiiai cuemo comeci facada ínollena.

¹⁸ Ua jaiai ninómona aféfuiai onótate Juziñamui daí daide.

¹⁹ Íe jira bifue lloticue. Afe como Juziñamuido jáiacade judíoñedino mai, cai íaioina áifedoñeiticai. Jae íaioi jaiai ínoga táinofuiai fáicanocaidiaioi Juziñamui llogáuaina íaioi ínollena.

²⁰ Due llétafue íaioimo cai cúellena ja dieze figo baite. Afe bífuiai íaioimo llóiticaí. Mai jánaraimo fia fecaca güllena omoi jetáñeno iri. Mai jiruífuemona abi omoi rairuiri. Dama áredimie ie ai diga illa ñuena. Mai cimoína cíginoga

rillenai riñeno iri. Afe izói coró baitaga rillenai riñeno iri. Daje izói díena omoi jiroñeno iri.

²¹ Daií judíoñede como ñnotimacimo lletádicaiza, nibai nanómona nana jófuego Moisés ocuífue llófueraini ite. Naga ocózinairuido llófueriracomo afe Cuegáuai jino facádotiaioi. Ací dño Santiago llote.

²² Iemo orécamací gairídmací, nana íaioi illaini diga, “Jii,” daidíaioi. Iemona íaioi cígimona dámierie nizéllena maméritiaioi, Antioquíamo oréllena Pablo Bernabé diga íaillinoi nabáillena. Judas dainámie nizédiaioi; afémie jíáfodo mameina Barsabás. Daje llezica Sílasna nizédiaioi. Afe íaillinoi ámatiai cígiri illaíma izóidiaillinoi.

²³ Iaillinoído cuegabe orédiaioi. Afébemo daide:

“Cai Antioquíamo ite judíoñede ámatiaimo uai orédicai. Afe izói Siria éniemo ite ámatiaimo, Cilicia éniemo ite ámatiai dieze nana ómoimo uai orédicai. Nana orécamací, Juzíñamuimo gairídño illaini, benó ite ámatiai diga, ómoimo uai orédicai.

²⁴ Cáimona ómoimo nauí bitino finócafue jae fidídicaí. Caimo lloñeno oni jáidiaioi. Cai óreñegaiaioi. Dani imaci uáillaido jae omoi ifoci írínuaidiaioi. Daií ómoína áfeduaidiaioi. Omoi bacano icoi quetállifuaí llujáidiaioi; jíáie Moisés llogáuallai ómoimo ocuízaidiaioi.

²⁵ Ie jira cai comécido ñue jaide cai cígimona mena come mamedada ómoimo oréllena. Aféfuena nana jíeruiticaí. Bie nizécaillinoi Pablo Bernabé diga omoi éroizaíbitiaioi. Pablo Bernabé diga cai iere izíruiga ámaillinoi.

²⁶ Cai Ocuíraíma Jesucristo ñúefue íaillinoi llua ícoína, jaci cácatagaillinoi.

²⁷ Daií Judas Sílas diga ómoimo orédicai. Aféillinoi ómoimo jofu úritiaillinoi nana bífuiaí jino ñue llóllena.

²⁸ Mei cáimona ñue cioide; afe izói Ñuera Joréñomona ñue cíoide riñede rafue ómoimo cai mámeñeillena. Dama jítaíredifue mámeiteicaí.

²⁹ Jánaraímo fia fecaca rílleniaina omoi riñeno iri. Daje izói díena jíroñeno iri; cimóina cígínoga ríllena omoi riñeno iri. Nana jíruífueomona abí omoi rairuiri. Dama áiredimie ie aí diga illa ñuena. Bífuiaimona abí omoi rairuíaí, ñue ítiomoi. Jae ñue.”

³⁰ Daií Jerusalemo ite ñnotino íaioína Antioquíamo orédiaioi. Antioquíamo dúcidiaioimo, dñomo ite ñnotino dánomo gairítatiaioi afe rabe fecállena.

³¹ Afebe ámatiai facáduamona iere íobidiaioi. Ua afe caimare llétafueri íobidiaioi.

³² Judas Sílas diga Juzíñamuimona oga rafue jino llórediaillinoi. Ie jira íaillinoi uáillaido afe ámatiai ñue náirecaitadiaillinoi. Afe llezica íaioína ñue comeci firazitadiaillinoi íaioi caimare íllena.

³³ Dñomo diga iruí íllamona, Antioquíamo ite ámatiai comeci jacinaíñenafuedo íaioína jáitatiaioi. Daií íaioína uáidonocaidiaioi meine íaioi orécamací dñé jáillena.

³⁴ Mei íadi Sílas Antioquíamo fiébicaillena mamérite.

³⁵ Afe izói Pablo Bernabé diga Antioquíamo fiébidiaillinoi. Afe meífodo, aillo jíáie llóraíni diga, llófueritiaioi. Cai Ocuíraíma Jesucristo uallai jino llotíaioi.

Pablo dánomo nane jáizaide ñúefue llujáillena

³⁶ Diga iruí illa meífomo Pablo Bernabena daide:

—Mai dánomo meine coco jai, nauti coco llófuegano coco uáiduauilli. Nana íaiói jófuedo Jesucristo uauillaí llófueticoco, ie jira afémaci nie izói itíaióiza coco eróizai, —daide.

³⁷ Bernabé Marcos úiacade íaillinoí jaille dine. (Marcos jíáifodo mameina Juan.)

³⁸ Mei íadi Pablo íena úiacañede, nauti Panflia éniemo íaióina fiénocaila jira. Iemo íaillinoí táijicanado jáiñede.

³⁹ Afefue jamánomo íaillinoí riire júfidua meífodo, dárie enénorie oni jáidiaillinoí. Ie mei Bernabé Marcos uite. Daií ñiano, nocaedo Chípremo jáidiaillinoí.

⁴⁰ Afe llezica Pablo dama íeiena Silas nizeda ote. Nízia mei, afénomo ite ámatiai Juziñamui íaillinoí iziruillena caimare jicádiaíoi, daje izói Juziñamui íaillinoína nabáirillena. Daií jica meífomo, oni jíáinomo jáidiaillinoí.

⁴¹ Siria énie, Cilicia éniedo jáidiaillinoí. Afénomo Juziñamuimo gairide ámatiai náicaitaíiaillinoí.

16

Timoteo Pablo Silas diga nabáizaide

¹ Derbe, Lystra jofue diga dínomo Pablo, Silas diga dúcidiaillinoí. Afénomo daa Juziñamuimo ínotimie baizájidiaillinoí. Ie ei judíuaimona Juziñamuimo ínotingo. Mei íadi ie moo griego ímie.

² Lystramo ite ámatiai afémiedo ñue úritiaíoi naa Icóniomo ite ámatiaiíri.

³ Pablo Timotéona ie nabaina úiacade. Ie jira ie bacano icoí quetátate, íaiói jáillinomo ite judíuai afémiedo comeci fiéni fácañeillena. Mei afémaci ie moo griego ímienana ñue onódiaíoi.

⁴ Nana íaiói jáillado ite jófuedo lletáinafue llotíaiói. Afe lletáinafue Jerusalemo ite orécamací ocuide éinamací diga llotátatiaíoi.

⁵ Daií Juziñamuimo garídimaci íaiói ínuafue ñue oni mónaioicaide. Afemona nágarui aillo jebuíoicaíiaíoi.

Pablo Macedonia ímiéna nicaí anado ciona izói ciodé

⁶ Asia éniemo Ñuera Joreño ñúefue íaiói llujáillana ráiruide. Ie jira Frigia énie, Galacia énie diga afe éniemo oni llujáidiaíoi.

⁷ Ie mei Misia énie fuédamo dúcidiaíoi. Dinómona Bitinia éniemo jáillana comeci facádiaíoi, mei íadi Jesús Joreño dínomo íaiói jáillana ráiruide.

⁸ Ie jira jica Misia énie fuédado jáidiaíoi. Dinómona Troas ígobemo jáidiaíoi.

⁹ Dínomo afe naíoi Pablo nicáirilla izói ciodé. Afe nicáirilla izói Macedonia énie ímiéna ciodé. Afémie náidaicana Páblona izire jicade; daide: “Bené Macedóniamo cai cánuabi,” —daide.

¹⁰ Daií Pablo nicaí anado izói cionamona Macedóniamo cai jáillena mamériticaí. Jae Juziñamui cai jírillaza ua onódicaí dínomo ñúefue cai llujáillena.

Pablo Silas diga Filipos jófuemo illafue

¹¹ Iemona Tróasmana nocaedo monaillai cigí idu Samotráciamo jáicína jáidicaí. Ie jítiramo Neápolismo dúcidicaí.

¹² Dinómona Filipos jófuemo jáidicaí. Afe Macedonia fueda Filipos jamánomo jalléidigobe. Romano comíni afe jofue nauti nitátatino. Dínomo nano nágarui iticaí.

¹³ Afe ocózinai llaruimo afe jofue jinomo jáidicai. Ua imani fuemo íaiói Juziñamuimo iere úrizafirenano jaidicai. Dinomo ráinaillano ñúefuedo gairidingotai mo úriticai.

¹⁴ Aféngotai mona daango Lidia mámece redingo. Afengo Tiatira jofue ingo. Afengo jáire jítirede ñuera iniroi fecáraingo. Afe ringo Juziñamuimo ánozioidingo Juziñamuimo camare úrilla. Iemona afengo afe ñúefuena cacáecade. Jae Juziñamui afengo comécina tuiñode, Pablo llogáuailai jeire óllena.

¹⁵ Afengo naa ie comíniri báutizagaiaíói. Báutiza mei izire jicada caina daide: —Comeci anado omoi daííadi, Juziñamuimo ua innotingodicue, mai cue jofomo omoi bi, —daide.

Iemona aféngodo jáidicai.

¹⁶ Afe Juziñamuimo úrizairanomo cai jailla llezica, fiénidena jóriarede ringoza baizajáidicai. Afe fiénide jóriaido come óñoñega écina raire onófirede. Afengo izire jerucango. Afe eici báillado aillo úcubena ie náamatiai éna ófirediaíói.

¹⁷ Afe ringoza Pablo diga caido jáizaide. Caillícana jaide; daide:

—Bimaci caifoide Juziñamuimo dúidiaíói. Omoi jilloile io ómoimo llotíaíói, —daide.

¹⁸ Diga iruillai daí afengo caillide. Are ie caillícana ícoimo, Pablo zefuinaite. Meine gírecaillano aféngomo ite fiénide jóriaina daide:

—Jesucristo mámece aféngomona ona oni orédicue, —daide.

Daí daina llezicamona afe fiénide jóriai aféngona fáicanocaillano jaide.

¹⁹ Afe ringoza náamatiai daí ie finóinana ciódiaíói. Iemona:

—Jae aféngodo úcubena óñeiticai, —daidiaíói.

Daí dainano Pablo Silas diga llaitada ríimaci uícomo aillo gairírabirimo uitíaíói.

²⁰ Riire jicánorainimo íaillinoína izájidiaíói. Daidíaíói:

—Bíaiillinoí, judío ímíai cai jófue mo comínina ríicaitaíbite.

²¹ Caímo lluaíbígafuina jeire ónidicai. Afe izói cai ínidicai, cai bie románodicaiza, —daidiaíói.

²² Iemona afeno comíni íaillinoimo ríicaidiaíói. Riire jicánoraini íaillinoi inícuirona duiñoda rázido íaillinoína fatátate.

²³ Íaillinoí aillo fáina meífomo, llavéracomo íaillinoína lláviaidiaíói. Afe llavéraco úñoraima riire ocuidiaíói íaillinoína ñue rairuillena.

²⁴ Afe riire ocuínafuena cacánamona llavéraco úñotímie llavéraco jamánomo jofóidicomo íaillinoína orede. Dinomo come idai jítara íredamo íaillinoína jítate.

²⁵ Afe naio dáaferuimo Pablo Silas diga Juziñamuimo úrilla Juziñamui ruai rotíaiillinoi. Afécomo jáie llavécamiiai afe rúana cacádiaíói.

²⁶ Íaillinoí rua llezica afe éñe raire iere riire docáiricaide. Nana afe llavéraco jáillirai izói riire mozide noficiái jaidinocaiga izói íficaide. Afe llezicamona llavéraco náziai túicoizite. Afemona nana llavécamiiai llójeuai túicoizite.

²⁷ Iemona llavéraco úñoraima cazide. Cazídemo jae nana náziai túienana ciode. Comeci anado daide: “Nana llavécamací jae nibai botádiaíói.” Ie jira lloefai ota ie abi faitáecade.

²⁸ Mei íadi Pablo íemo caillide:

—¡Dama o abina fiendi finóñeno iri; nana benó iticaiza! —daide.

29 Mei jira llavéraco úiñoraima bobaie jicade. Iemona Pablo diné aizícana bite. Dinomo afe jágieri abi cuidírioicana, Pablo Silas diga íaillinoi anamo dújude.

30 Te meifomo íaillinoína jino jiáinomo uillano, jicánote:

—Pablo, ¿cuemo ite fiénidifuemona cue jilloillena nie izói íitícue? —daide.

31 Jira aféillinoi uai ote:

—O jilloillena cai Ocuúraima Jesucristomo ñno. Iemona o dama jillobicaitio. Daje izói o ai nana o úruiaí diga ñnuamona jillobicaitiaioi, —daide.

32 Iemona Juziñamui uaillai íemo llotíiaillinoi naa ie jofo ero itínuáiri.

33 Mei íadi daje naio llavériraima íaillinoi fáina boáfiaí jocode. Afemona afémie naa íaillinoi úruiairi báutizaigaiaioi.

34 Afe mei aféillinoína ie jofomo uillano ecade. Afémie naa ie comíni diga Juziñamuimo ñnuari caimare íobidiaioi.

35 Afe jítiramo riire jicánoraini jiáie llavériraini llavéracomo orede, Pablo íaillinoi zuitállena.

36 Iemona llavéraco úiñoraima Páblona daide:

—Riire jicánoraini ómicoína cuena zuitátate. Mei ja birui ómicoi nífuenino uái íllena jino jáirediomícoi, —daide.

37 Mei íadi Pablo llavérirainina daide:

—Romano ímiedicoco, mei íadi cócomo jicánoñeno razido cócona fatíomoi. Faano cócona llavétatiomoi. ¿Mei íadi ja birui báinino cócona zuitátatiomoi? Mei íeñedeza. Coco llavétatino mai coco zúitaíbiri, —daidíiaillinoi.

38 Afefue llavériraini jicánoraini llujáide. Lluájillamona jicánoraini jacínaitiaioi, aféillinoi romano ímienari.

39 Ie jira Pablo Silas diga íaillinoimo jicajidiaioi:

—Caimo ómicoi dúceai, —daíízaidiaioi.

Iemona íaillinoi jino uano, íaioi jófuemona oni jáillana izire jicádiaioi.

40 Afe llavéracomo jino billano, Lidia jofomo jáidiaillinoi. Amatiaína cíoillano íaioína ñue náicaitadiaillinoi. Daíí ñiano jiáinomo oni jáidiaillinoi.

17

Tesalónicamo comuide aillo úrioinafue

1 Pablo Silas diga íaillinoi jaillano Anfípolis jófuedo jáidiaillinoi. Ie mei Apolonia jófuedo jáidiaillinoi. Afe mei Tesalónica jófueмо dúcidiaillinoi. Afénomo ite judíuai llófueriraco.

2 Pablo ie fibilla izói, afe llófueriracomo jofo llófuerizaide. Daámani ocózinailaruido íaioimo úrite.

3 Juziñamui jaiaí Cuegáuai jino íaioimo llóollode. Aféuaimona Cristo duere finóinafue jitáirede, daíí íaioimo jino lote. Daje izói Cristo tíida meine cáallena jitáirede daíí jino íaioimo lote. Íaioína daide:

—Be ómoimo cue llogámie Jesús dámie Crístona, —daide.

4 Mei íemona judíuaimona dámierie aféfuemo ñnotiaioi. Afemona Pablo Silas íaillinoi dibénemo itábicaidiaioi. Afe izói aillo Juziñamuimo jaináiacade griego ímiaí iere ñue ñnotiaioi. Afe izói aillo illaingo izóidingotiaí aféuaina ñnotiaioi.

5 Mei íadi ñnoñede judíuai aféfuerei úradoilla izói itíiaioi. Iemona cálleмо ite fiénide ráiraiedinomo gairídiaioi. Ie mei judíuai cálleмо ite itínori aillo úrioinafue finódiaioi. Daíí jofue comíni comeci fiени icírítadiaioi. Jasón jofomo

ite Pablo Silas diga llaítállena, afeço cirínotiaioi, aféillinoi llaitada afeño comínimo izájillena.

⁶ Mei íadi íaillinoína baiñédiaioi. Ie jira Jasón zocana uitíaiói, jíáie ámatiai diga. Jofue illaini uíe como íaioína uitíaiói. Daí caillídiaioi:

—Biaillinoi nággobiaido fieni faillíñinafuiai finódino ja benomo dúcia.

⁷ Ie mei Jasón ie jofomo íaioína llínote. Nana afe bie bitino cai caifoide romano illaíma ocuícafuiai uáitaoicana daide: “Jíáie ua cai illaíma ite, Jesús,” —daidíaiói.

⁸ Aféfuena cacáillano ríimaci naa comíniri faillíñeidiaioi.

⁹ Jasonmo daidíaiói:

—Cai o jífueñellena uí como o úcube caimo ine. Uire aféillinoi o oréadi o úcube meine omo íitícai, —daidíaiói. Ie jira afe úcube íaioimo fécamona ja Jasón jíai ámatiai diga zuitádiaioi.

Pablo Silas diga Berea jófuego dúcide

¹⁰ Afemona afe naio ámatiai Pablo Silas diga Beréamo raire oréadiaioi. Dinomo dúcillano judíuai llófueriracomo jáidiaillinoi.

¹¹ Bie judíuai Tesalónicamo ite judíuai baímo fígomaci. Caimare afe úrillauaina jeire otíaiói. Nágarui Juzíñamui Cuegáuallaimo jénofirediaioi, íaioimo llogáuallana uafue daíllena.

¹² Afemona aillo afémacimona ínotiaioi. Daje izói griéguaímona ínotiaioi. Dájerize íñíai íemo jíai íue caimare jacíruingangotiai ínotiaioi.

¹³ Mei íadi Tesalónicamo ite judíuai Pablo Beréamo Juzíñamui llogáuai llófueüllana fidíillano, dinomo nane comíni fieni faillíñaitaitaioi.

¹⁴ Mei íadi ámatiai dama Páblona raire aféruído monáillai fuédamo oréadiaioi. Ie mei Silas Timoteo diga Beréamo fiébicaide.

¹⁵ Pablo nabaina jáidino Atenas jófuego íena izájidiaioi. Íaioi meine jáidino Silas Timoteo diga Pablo íaillinoimo uai orede. Daide: “Cue diné íere raire ómicoi birí, dánomo cai gairílleza,” daide.

Pablo Aténasmo illafue

¹⁶ Nai Pablo Aténasmo Silas, Timoteo diga úíñua llezica, afe jófuedo macade. Macádemo aillo íaioi jánaraiái cíóizaide. Aferui Pablo comei íere zúucaide.

¹⁷ Mei jira llófueriracomo judíuairi úrite; daje izói jíáie Juzíñamuimo jáináiacadinori. Nágarui jofue gairírabirímo itínuaímo lloite.

¹⁸ Dárie “epicuro” daina llófueinafue facádotino como Pablo diga úrizaidiaioi. Daje izói, dárie “estoicos” daina llogáfuiai facádotino Pablo diga úrizaidiaioi. Dámierie daidíaiói:

—Bie aillo úrifiredímie, ¿nífue caimo llóite? —daidíaiói.

Mei íadi jáíimaci daidíaiói:

—Níbai jíáie juzíñamuíllai llotímie, —daidíaiói.

Daí úritiaioi, Pablo Jesús úrillauai, ie meine cáanafue diga íaioimo llóiacana jira.

¹⁹ Ie mei Areópago daina illánomo íena uitíaiói. Dinomo gairífrediaioi llófueinafuena cacáillena. Dinomo íena jícánotiaioi:

—O atica cómue llófueinafuena cai onóacadicaí.

²⁰ Mei ónoñegafuiai caimo llotio. Afe bífuiai dánana onóacadicaí, —daidíaiói.

²¹ Nana Atenas imaci naa afénomo ite onínemacírí, cómue ráfuíina cacáillena járitaitaioi. Afe izói cómofuiai llóllena járitaitaioi. Jíáie tájínamo járitañediaioi.

²² Ie jira Pablo Areópago comini cígimo náidaillano daide:

—Atenas imaci, omoi cácarei. Aillo juziñamuillaido iere jaináidinodiomoi. Daií omoi íllana ciódicue.

²³ Omoi juziñamuillai áinozillena finócafuiái illánuiaido éroicaidicue. Dinomo daa omoi juziñamuillaimo comeci facáranó ciódicue. Afénomo cuega uaillai daide: “Bie cai ónoñega juziñamui ie.” Bie omoi onóñeno jaináiacana Juziñamui, ua birui ómoimo cue lluíbigamie.

²⁴ Afe énie finode Juziñamui naa éniemo itínuiairi, afémie bie énie Naama, mona diga. Afémie comini nigácomo íñede.

²⁵ Afémiemo cai nífuena finónidicai. Nífuena llónidicai. Mei jira dama afémie nana comínimo cáatatinona fecáfirede; daje izói afémie jáfaicina cai ite. Ie emódomo nana ite ráaniaina afémie caimo iga.

²⁶ Naga náiraiai fueñe dáziemona Juziñamui comuitaga, naga illa dígano íaiói éniemo íllena. Iemona dájena diédicai. Nana íaiói íllínuiai mamede. Daje izói nano nié dino íaiói íllíruillai mamede.

²⁷ Daií afémie finoca afe Juziñamui íaiói jenóllena, nibái are illa ícoinia ie íaiói báillena. Mei íadi uáfua Juziñamui cai illa dígamieмона jica íñede.

²⁸ Mei Juziñamuido cáadicai. Afémiedo cai jetáacaga raana jetádicai. Afe izói afémiedo iticai. Afe daje izói ómoimona dárie rua finua izoide llote: “Juziñamui comuitagamacidicai; ie izíedicai.”

²⁹ Iemona afe Juziñamuina fia oro finoina jánarai daií comeci omoi facáñeno iri, mei Juziñamui comuitagamacidicaiza. Afe izói afémiena plata finoina jánarai, ebírede nofici finoina jánarai, daií comécido omoi daiíñeno iri. Nana bie jánaraiaina dani comini comeci faca izói finódiaíoi.

³⁰ Naui jáiádiruillaido comini abina onóñediaíoi; daií íllaza Juziñamui íaióimo nai ibana óñede. Mei íadi birui náganomo itímiaína Juziñamui ocuícana daide: “Omoimo fiene itífuiaína méidori,” —daide.

³¹ Nana comínimo itífuiaí izire jicánollirui Juziñamui jae mamede. Aféruillaido afémie nizécamiendo jáicina caimo izire jicánoite. Juziñamui afe nizécamiéna nana comínimo ñue jino uáfua onótate; tíllanomona íena meine abido cáatanado nana comínina uáfodo jino fidítate, —daií Pablo llote.

³² Afe tídimaci meine cáanafuena cacáíllano, dárie itínomona Pablo jífánodoidiaíoi. Jáimaci íena daidíaíoi:

—Íco jíáiruido aféfuena meine nane dánomo ómona cácaíticai, —daidíaíoi.

³³ Temo Pablo íaiói cígimona oni jaide.

³⁴ Mei íadi dáarie íedo jáidiaíoi. Jaillano ínotiaíoi. Afe ínotimacimona dámie Dionísio. Afémie Areópago nimáiranimo jaináidimie. Afe ínotimacimona Dámaris mámeciredingo ite, nai bai jíaimaciri.

18

Pablo Coríntomo illafue

¹ Afe meífodo Pablo Aténasmona oni Corinto jófueмо jáizaide.

² Dinomo dúcia meífomo Aquila mámecirede judío ímie baizájide. Afémie Ponto énie ímie. Afe Aquila ai Priscila. Afe íaillinoi cómoicana Itáliamona botádiaíllinoi; romano caifóidíllaima Claudio nana judíuai Roma jófueмона oni íaiói oréina jira. Dinomo Pablo Aquila uáiduaide.

³ Aquila ie ai diga jédaciede iniroi tífuaño bizáinicai fe nitíai. Afe íai. nillado úcube otíai. Pablo afe táijinana fibídime. Ie jira Pablo afe íaillinoiri fiébicaide, dájena íai. táijillena.

⁴ Naga ocózinallarumo llófueriracomo Pablo llófuiaifrede. Afemona judíuaimona dáarie inotíai. Afe dájerize judíoñedimacimona ja inotíai.

⁵ Jae Macedonia éniemona Silas Timoteo diga dúcidiailinoimo, Pablo ie bizáinillai nilla fáicanocaillano, dama Juzíñamui ñúefue jino llóllena iere izire locana uite. Judíuaina uáfodo daide:

—Jesús omoi úñogamie Cristo, —daide.

⁶ Mei íadi judíuai íena uáitaoidíai. Iemo fiénide uailai nitádiai. Ie jira Pablo ie inícuero íai. oimoi faiánote. Afe faiánua daide: íai. íaire finócafue ícoinia afémie ícoiniañedeza, daní íai. ícoinia.

Pablo íai. oina daide:

—Daní omoi ícoinia timáritiomoi. Jae ómoiri nífuenidimedicue. Biruímona judíoñedimacimo llúajiticue, —daide.

⁷ Llófueriracomona jino jaillano, Justo maméidime jofomo jaide. Justo Juzíñamui ánozillano caimare úritime. Afémie jofo llófueriraco abimo ite.

⁸ Afe llófueriraco illaíma Crispo. Afémie naa ie comíniri Ocuíraíma Jesucrístomo inotíai. Afe llezica aillo Corinto jófuego itino, Pablo lloga ñúefuaina cacáillano afemo inotíai. Inuamona bautizagaiaí.

⁹ Afe mei Juzíñamui Páblona nicai anado daide:

—Jacíruíñeno iri. Mai ñúefue llícaíñeno lloiri, mei o diga itícueza.

¹⁰ Fiénidifuenta bu omoi jírítanide. Nai bie jófuego aillo cuemo inoitinona ite, —daide.

¹¹ Iemona Pablo Coríntomo nai daa fimona átuedo Juzíñamui uailai comínimo llófullofuede.

¹² Mei íadi Galíona mámeçiredime, Acaya éniemo illáimana illáruído nana judíuai Páblona uáitaocana gairídiai. Iemona íena lláitano, ríimaci uíecomu utíai.

¹³ Illáimana daídíai:

—Bímie comíni cígido llófuericaide. Jáifodo Juzíñamui ánozilli uailai llófuecaide. Iemona afe uáillaimo cacáreidiai. Mei íadi afefue caimo ocuica uailai uáitaocai, —daídíai.

¹⁴ Pablo como úrizaidemo, illaíma Galión judíuaina daide:

—Judíuai, cue omoi áfedeñoeno iri! Bímie aillo fiénidifue ícoinia íadi, cómena fájafue izóí, come merírinafue izóí, ua afémie daí íadi ómoimo cacáreiticue.

¹⁵ Mei íadi fia omoi uáillaído, omoi mámeçiaído júfidotiomoi, ómoimo judíuai ocucafuaí diga. ¡Mai daní jaícina omoi finori! Aféfuiaimo izire jicánoraimana íacañedicue, —daide.

¹⁶ Ie mei afémie nana íai. oina jino jicánoracomona orede.

¹⁷ Iemona nana griéguaí Sóstenes maméidime llaitádiai. Sóstenes llófueriraco illaíma. Iena lláitano, riillaíma Galión uíecomu íena fáfadiai. Mei íadi Galión afe finócafuaína raa daíñede.

Pablo Antioquámo meine jaide dinómona ja dacaiñoámani nane llúajide

¹⁸ Dino Coríntomo Pablo diga iruillai ite. Ie jáiacanaruimo, ámatíai íraicaíño íena facádonocaidíai. Afe mei Pablo nocaedo Siria éniemo ruica jáizaide. Aquila ie ai Priscila diga Pábloiri jáizaidíai. Nai Cencrea ígobemona nai

jáiñediaioimo, Pablo ie ifo cuidode. Daiñ finode, jae ie nauí Juzíñamuimo llogáuai fuilla jira.

¹⁹ Ruica jáillano jae Efeso jófuemo dúcidiaioi. Dinomo Pablo, Aquila Priscila diga fiénocaillano, llófuerriracomo jaide. Afénomo gairide judíuaimo Pablo úrizaide.

²⁰ Afémaci ie íaioi diga are íllena izire jicádiaioi, mei íadi Pablo fairíoñede.

²¹ Iiraicaiño íaioina uáidonocaillano íaioina daide:

—Ja Jerusalemo íacade iráizillafuemo raire jáiacadicue, mei íadi Juzíñamui óiacania dáanomo abido ómoína érozaibiticue, —daide.

Iemona nocaedo Efésomona oni monáillaido jaide.

²² Cesarea jófuemo dúcillano, Pablo arido Jerusalemo jaide, dinomo ite Juzíñamuimo gairidino uáidollena. Afe mei oni Antioquíamo jaide.

²³ Diga iruillai dinomo illa meífomo, meine nane nana Galacia jófuemo Pablo oni jáizaide, Frigia jofue diga. Naga jófuemo dágoberie llófuecade. Daiñ Pablo nana Juzíñamuimo ñnotimaci comécina ñue náirecaitate.

Apolos Efésomo ñúefue jino llote

²⁴ Aféruillaído judío ímie, Apólona maméidimie Efésomo dúcizaide. Afémie Alejandría jofue ímie. Afe iima uai jino llúana ñue fibidimie. Afémie Juzíñamui Cuegáuaina ñue onode.

²⁵ Ocúraima Jesucristo llogáuailaina afémie llófuegamie. Aféfuiai jino llúana iere méaicaiñoeno caimare llote. Jino uáfodo Jesús ífuiaído llófuerite. Mei íadi dama Juan íaioi báutizafuena onode. Afe izói Juan Jesudo llogáfuena Apolos onode.

²⁶ Apolos llófueriracomo comeci jáicaiñenado úrizaide. Mei jira Priscila Aquila diga Apolos llófueillana cacáillano, ie eneno úitáillinoi, Juzíñamui uaillai baímo ñue jino jáicina llóllena.

²⁷ Afe mei Apolos Acaya éniemo jáiacade. Iemona ámatiai ie abina jafue oñeno, ñue íena náicaítadiaioi. Daje llezica uícomo rabe afénomo ite ñnotinomo cuetiaioi, íaioi afémiena ñue llínollena. Afémie Acáyamo dúcillano, afénomo ite ñnotinona ñue canode. Juzíñamui jae íaioimo dúcaillano íaioina ñnotade.

²⁸ Nana comini eróicana judíuái lloga taino uai Apolos íaioimo cíotate. Afémaci Apolos jamánomo ñue jáicina jódiuaina jáanonidiaioi. Afémie Juzíñamui Cuegáuailaido ñi íaioi úíñoga Cristo dámie Jesuna jino íaioimo uáfodo llóteza.

19

Pablo Efésomo meine dúcinafue

¹ Apolos nai Coríntomo illa llezica, Pablo Galacia éniemo jaillano, íduai íllado jaide. Jáillano Efeso jófuemo dúcide. Dinomo ite Juzíñamuimo ñnotimacina cíozaide.

² Íaioimo jicánote:

—¿Meita omoi ñnuamona Ñuera Joreño úicaigaomoi? —daide.

Jira afémaci uai otíaioi:

—Afe Ñuera Joreño íllana, jaca due cacáñedicaí, —daídiaioi.

³ Mei jira Pablo nane jicánote:

—¿Mei bu mámeçido báutizagaomoi? —daide.

Jira afémaci uai otíaioi:

—Juan mámecido báutizagacai, —daidíaiói.

⁴Jira Pablo íaióina daide:

—Juan lloga báutizainafue comini comécimo ite fiénidifuiái méiduana jino náiraimo ciótate. Mei íadi Juan meifodo bitímiemo ínorediomoí ómoína daidicue. Afe bitímie Jesús; afe Jesús Juzíñamui Nizécamié Cristo, —daide.

⁵Aféuena cacáillano cai Ocuídímie Jesús mámecido báutizagaíaiói.

⁶Pablo íaióimo onoi bitamona, Ñuera Joreño íaióimo bite. Iemona afémaci jáímaci uáillaido úritiaíói. Juzíñamuimona oga úrilla uailalai jino llotíaiói.

⁷Afémaci níbai doce dígamiediaíói.

⁸Pablo afe llófuieracomo daámani fitui jáicade. Dinomo comeci jáicaiñeno jino íaióimo llófuierite. Juzíñamui illáimana illáfuedo izire íaióimo jino llote íaiói ínollena.

⁹Mei íadi dámierie comeci rairuillano aféuena ínnoacañede. Comini eróicana Juzíñamui ñúefuiaido fiéni úritiaíói. Iemona Pablo íaiói cigimona oni jáíicomo jaide. Jaillano Pablo afe Juzíñamuimo ínnotinona jáíie comini llófuieracomo uite. Afe llófuieraco naama Tiranno. Dinomo Pablo nágaruillaido llófuiaide.

¹⁰Daií dinomo mena fimona llófuierite. Iemona nana Asia énie nairai Ocuíraíma Jesús llogáfuiáimo cacáreidiaíói. Judíuáimona nano diga ímiái ínnotiaíói. Afe dájerize judíoñedinomona ínnotiaíói.

¹¹Juzíñamui diga áillue ciórainina ráanaí Páblodo finode.

¹²Uiéco dóraroillai Páblomo atídiaíói jinófene jitáaroillai diga. Aféoroillai Pablo jétanona iráredimacimo uitíaiói. Afe jetácaroi íaiói llínuamona jíllobicaidiaíói. Daje izói jáíimacimo ite fiénide jóriaí oni jáízitíaiói.

¹³Afe mei macáraini judíuai dárie dúcidiaíói. Afémaci:

—Fiénide jóriaíai comínimona oréredicai, —daidíaiói. Ja Ocuíraíma Jesús mámecido afe fiénide jóriaíai jino oréacadiaíói. Jáíimacimo ite jóriaíaina daidíaiói:

—Pablo lloga Jesús mámecido ja birui ómoína jino orédicai, —daidíaiói.

¹⁴Afe izói judío ímie Esceva siete diga jitótiaí daidíaiói. Afe Esceva lletáriraini illaíma.

¹⁵Afémie jitótiaí daií dáinamona afe fiénide jóriaí íaiói uai ote:

—Cue Jesuna onódicue. Daje izói Páblona onódicue; mei íadi omoi mei ¿búdiomoi? —daide.

¹⁶Daií daína mei, fiénidena jóriairedimie riire íaióina llaitade. Nana íaióina anáfenuano iere duere íaióina finode. Ja iere jamánomo duere íaiói finóinamona, afécomona émuíromaiái naa boáfiaíri jino botádiaíói.

¹⁷Nana Efésomo ite comini, judíuai naa judíoñedinori aféuena fidíillano iere jacíruítiaíói. Iemona Ocuíraíma Jesús mámecina jamánomoideza daidíaiói. Afemona aillo ñúefue Jesumo nitádiaíói.

¹⁸Aillo áfemo ínnotimacimona jaíai íaiói finoca fiénidifuiái uáfodo jino llotíaiói.

¹⁹Daje llezica aillo nauí aiñíniaí uaimo fibídino, íaióimo ite fiénino úrilla rabénicuai átiano nairai eróicana jobáidiaíói. Afe jobáicanicuai comécido facádiaíomimo, jamánomo ráifide izoide, daidíaiói. “Cincuenta mil úcubetunillai dieze ráifide,” daidíaiói.

²⁰Daií Juzíñamui lloga uailalai jamánomo oni mónaioicaide. Afedo Juzíñamui ríino jino ciótaoicaide.

²¹ Afe meifodo Macedonia éniemo Acaya énie diga dino comini uáiduallena Pablo mamérite. Afeno comini uáidua meifomo, abido Jerusalemó jáizallena Pablo comécido daide. Afe emódomo daide:

—Jerusalemó cue jaille mei, dinómona Rómamo jáiacadicue, —daide.

²² Mei jira Macedóniamo mena ie canórama Timoteo Erasto diga uícodo orede. Mei íadi Pablo nai Asiamo nano nígarui fiévide.

Efésomo fiénidifuedo faillíñeidiaioi

²³ Aféruillaido Jesús lloga ñúefuairi aillo fiéni faillíñeidiaioi.

²⁴ Afe faillíñeinafue Demetrio como fueñe taineca. Afémie aillo ebírede ráaniai plátamona finórama. Juzíñamuina íaioi mamécango Artemisa, nofici finoina jánarai. Aféngomo gairíracó izóí, plátamona ráiracojina finoda, Demetrio fecáfírede. Afedo afémie ie diga táijiraimaci íena aillo úcube otíaioi.

²⁵ Iemo Demetrio naa jáie daje izóí táijinana fibídinori dánomo gairídiaioi. Dinomo íaioina daide:

—Cáimaci, omoi cácarei. Bie cai táijnado ñue ráaredicai, onódiomoi.

²⁶ Mei íadi baie Pablo llócaigafuena cacádiomoiiza. Afémie daide: “Comini finoca juzíñamuillaina íeñede,” daide. Ie llogáfuego Pablo aillo comínina ínotade. Daa benó Efésomoñede daí ínotade, mei íadi nana Asia éniédo ínotaacade.

²⁷ Afefue iere jacire cacaide. Afedo cai fecácaiganiaina táinocaitabite. Daje izóí cai áillue juzíñamui cai ñainango Artemisa gairíracó jalléinafuena féitaité. Afe izóí bie juzíñamui ñainango jamánomo ebírenafuena jámairuitabite. Nana Asia énie naa jáie éniiairi aféngomo ánozifírediaioi, —daí Demetrio daide.

²⁸ Aféfuena cacáillano, iere comécido ráicadiaioi. Iemona caillíoicana daidiaioi:

—¡Cai Efeso imaci juzíñamui cai ñainango Diana, jaca ninomo záíñeno iri! —daidiaioi.

²⁹ Iemona nana afeno jófuedo aféfuiai iere riire júfidotiaioi. Aillo afeno comini ifo irínote. Afe llezica mena Pablo nabaide íaillinoi llaitádiaioi. Afe íaillinoi mámecei Gayo Aristarco diga; Macedonia ímie íaillinoi. Íaioi llaita mei afémaci nairai uícómo íaioi gairíracómo íaillinoina zocana uitíaioi.

³⁰ Pablo afeco jofomo comínimo úrizaiacade, mei íadi ñúefuena ínotino afe jofó jáillena rairuídiaioi.

³¹ Afe llezica Asia ráimaci Pablo diga caimare úriraini, Pablo afeco jofó jáíñeillena uai íemo orédiaioi.

³² Íaioi gairilla llezica, dárie jáífodo llotíaioi; jáímiaia jáífodo júrioicana llotíaioi. Mei aféfuairi jamánomo fiéni faillíñeidiaioi. Ja nabénairai aféfuena onóñediaioi, nífuerei gairídiaioiza.

³³ Mei íadi gairídino cígimona dámerie jino Alejándromo aféfuiai llotíaioi. Afe Alejándrona judíuai, afeno comini uícómo judíuai abi ríiduafuedo úrilla, bai íena naídánetaioi. Bai náidaillano ie ónoído íaioina, “Mai omoi llícai,” daide.

³⁴ Mei íadi afémie judío ímienana íaioi comécido onónamona, mena hora nana caillíoicana daidiaioi:

—¡Cai Efeso nairai naango Artemisa, jaca ninomo záíñeno iri! —daidiaioi.

³⁵ Iemona afeno jofue jabóllama ícoinia comini llícaitate. Llícaitano íaioina daide:

—Efeso nairai, omoi cácarei. Naga énie náirai ai cai iere jalleide juzíñamui dainango Artemísamo gairíracona úñotagamacidicai, afe cai úñuafuena onódiaioi. Afe daje izói aféngona mameca monámona ana baiíde jánaraina úñotagamacidicaiza onódiaioi.

³⁶ Mei bifue buna jaca jáanonideza, mai omoi llícai. Comeci facáñeno núfuena lloñeno iri.

³⁷ Mei bie omoi atica íaillinoi, omoi juzíñamui dainango Artemísari fiénidifuena úriñediaillinoi. Aféngona rícaitañediaillinoi.

³⁸ Demetrio zúucaillafue númiemo íadi, mai jicánoraimamo llujjiri. Daje izói afémieri táijiraini zúucaillafue íadi llujjiri. Jaca ríimaci uícomo meine abido óllena afémaci llórediaioi.

³⁹ Mei jáífodo omoi jicánoiacaniadi, mai ríimaci daina izói omoi gairiri.

⁴⁰ Ja birui jácifue mo baiízaidicaiza. Birui omoi finócafue íconia, illaima anáfenuafuena caimo nítaitaioi. Bie omoi faillíñeinafue caimo íaioi jicánoidi, íaioi uai cai ollifue jaca due íñede, —daide.

⁴¹ Daí daina meífodo, aféno mo gairídino oni rainode.

20

Pablo Macedóniamo Grecia diga dine jáillafue

¹ Afe íaioi faillíñeinafue llícailla meífomo, Pablo Juzíñamuimo ínotino ñue llófuellena jírítade. Daí íaioi llófua meífomo íaioi llínuano íraicaiño uáidonocaide. Uáidonocaillano Macedóniamo jáizaide.

² Nana aféno mo itígobiai comíni uáiduaide. Ie uáillaído aféno mo ite ámatiai náicaitade. Afe mei Pablo ja Grecia éniemo dúcide.

³ Dinomo daámani fui llófuete. Dinómona nocaedo Síriamo jáizaidemo, judúuai íena llaitáacanafuena fidide. Ie jira ari éniemo Macedóniamo abido jáillena comecei facade.

⁴ Dinómona ie nabáidino: Berea ímie Sópater; Tesalónica ímie íaillinoi Aristarco Segundo diga; Derbe ímie íaillinoi Gayo Timoteo diga; jáie Asia énie íaillinoi Tíquico Trófimo diga.

⁵ Afe bie ámatiai uícomo Troas jófuemo caina uíñuaidiaioi.

⁶ Fáitara jóoneñega pan güilla iráizilla meífomo, Filípomona nocaedo ruica jáidicai. Ja cinco dígarui illamona Tróasmo dúcidicai. Dinomo daa semana iticai.

Pablo Troas comíni uáiduafe

⁷ Semana nanóidiruido gairídicaí pan ditada fecállena. (Afe pan ditada güillamona Jesucristo íraicaiño güillamo úbicaidicai.) Güilla mei Pablo Jesumo ínotino llófuete. Afe jítiramo afémie ja jáiacade. Ie jira úroidemo ja dáaferui ite.

⁸ Caifo jica ite caifóneco ero ico mo gairídicaí. Afe dinomo aillo unérachecoí bóotatiaioi.

⁹ Dinomo ite daa jítócome, Eutícóna maméidimie. Afémie jino eróirafomo ráiide. Pablo iere are úrillamona, afe jítócome jamánomo ínietaide. Íconia izire íniamona, caifona ana baiíde. Afécomo dabaniámani ite. Dinómona ana éniemo baiíde. Tíide caifo llínotiaioi.

¹⁰ Mei jira Pablo ana afémiemo jáillano, ie acónimo dújuillano íena meníñote. Afe mei ámatiaina daje:

—Cáadeza, omoi jacinaíñeno, —daide.

11 Daií daina mei Pablo meine caifo jaide. Caifo meine dúciillano, pan ditada güillano nai íaioimo nane úrite. Da úritemo monaide. Monáillamo oni jaide.

12 Afe baíidimiena ñue caade uitíaiói. Iemona nana comini ñue caimare íficaidiaíói.

Pablo Tróasmona Milétomo jáillafue

13 Ie meífomo Pablo Asonmo iodo jáiacade. Ie jira cai jáíimaci nocaedo uícómo Asonmo jáidicai dinomo Pablo otá cai úillena.

14 Afémiena Asonmo cai báillamona, dinómona cai nocaedo nana Mitilénemo jáidicai.

15 Dinómona jáillano jítiramoidiruido Quío jofue áinodo jáidicai. Afe jáíruido Samos ígobemo zíjidicai. Dinómona Trogíliomo ocózinaidicai. Afe jáíruido Milétomo dúcidicai.

16 Pablo Asia éniemo are íacañede. Ie jira Efésomo meine jáiacañede. Mei íadi Pablo raire Jerusalemo dúciacade, afénomo íacade Pentecostés ráfuena cíoilena, íadi níbai cíoiñeite.

Pablo Efeso éinamacimo úrillafue

17 Nai Mileto jófue mo cai illa llezica, Efésomo Juziñamuimo gairíraíni éinamací jírítate.

18 Íaíói dúcinamona Pablo íaíoi na daide:

—Nano fueñe Asiamo cue dúcinamona cue ífrenana ñue onódiomoi.

19 Nágaruillaído comeci mánaínafuedo éeíafuedo omoi cígiri iticue. Daií cai Ocuíraíma Jesumo tájifiredicue. Afe llezica judíuai iere aillo duere cuena finóacadiaíói. Afedo aillo facátafuíai cuemo nitádiaíói.

20 Mei íadi fáicanocaiñeno nana ómoímo ñue illífuena llófuefiredicue. Daií uáfodo omoi gairíracomo ómoímo llófueriticue. Daje izói naga omoi jofomo llófuefiredicue.

21 Judíuaímo lloticue; daje izói judíoñedinomo lloticue. Nana íaíoi na daidicue: “Omoi fiénidífuíai ñífueíuina Juziñamui comeci jitailla izói omoi meídori. Iemona cai Ocuíraíma Jesucrístomo omoi íinori,” daií íaíoi na daidicue.

22 Mei birui benómona Jerusalemo jáiticue; afénomo cue jaille Juziñamui Ñuera Joreño cue ocuilla izói. Dinomo cuemo cómuitífuena ónoñedicue.

23 Dama dafue cue comécido onóigafue; nana cue jailla jófuedo Ñuera Joreño cue llavébillífue aillo duere cue finóbillífue diga cuena fidítate.

24 Mei íadi aféfuena due lloñedicue. Ocuíraíma Jesús cuemo jónega tájinafuena ñue ícoímo cue fuitáadi cue cáanano cúemona ráifíñede. Afe tájinafue Juziñamui ñue caina izíruillafue comínimo llócadicue. Ua comini ázia izóidinomona cue tájina ícoímo caimare ñue dúcítaiacadicue.

25 ‘Omoi cígido Juziñamui illáimana illafue llócaidicue; mei birui ua onódicueza, ómoímacimona buna cuena meine cíoiñeite.

26 Ie jira biruido daiíacadicue, ja ómoímona nífuenidímedicue.

27 Mei jira nana Juziñamui caímo llófuegafuíai ómoímo uáfodo lloticue. Nífuena báinino lloñedicue.

28 Ie jira afe izói dani abi omo rairuiri. (Jae einamácidiomoi za.) Daje izói nana Juziñamuimo gairídinona úíñori, mei jira Ñuera Joreño íaíoi na úíñotade.

Ua Ocuíraima Jesumo gairídino úiñotagaomoi. Afe gairídina Jesús dama ie tíllado, ie die tóillamona dama ie comínina meine maiñode.

²⁹ Cue jailla mei jiámaci Juziñamuimo gairídina jifueridino bíitiaioi. Ua riñrede jicóniai ovéjaina fázia izói Juziñamuimo omoi ñnogafuena féitaitaibitiaioi.

³⁰ Daje izói omoi cigiri táinofuiai llóitina iite. Afémaci uáfueña féitajano táinofuiai ómoimo llóitiaioi, ñnotino afe uai jeire otátallena.

³¹ Mei jira abi omoi rairuiri. Naui omoi diga cue illáfueño omoi uibíoi. Dafimonaámani, mona naio diga éebicaillano izire ómoimo nágamiáimo fáicanocaiñeno ómoimo jino lloticue.

³² ‘Mei cue ámatiai, ja birui Juziñamuimo ómoína jóoneiticue, omoi úiñollena. Daje izói Juziñamui caina iziruilla uaimo omoi comeci uibíoilena jitáidicue. Afe uai ómoína náirecaitaite. Afe daje llezica, aféuaido Juziñamui dibénemo ñue rairuicamacina ja itíomoi naa jiáie ie rairuicamaciri. Mei afe rairuicamací Juziñamuido ñue finócamacidiomoi.

³³ Jiáimieo ite úcubiairi íaioimo ite iníroillairi dama cúeiena jaca úradoiñedicue.

³⁴ Mei íadi jiáfodo, dama cue jitailla raa óllena dama cue ónoído táijidicue. Daje izói cue diga itino íena oticue.

³⁵ Daí omoi tájillena lloticue. Afe izói raana jitáidino omoi canóllena ómoína llófueticue, Ocuíraima Jesús daina uaimo comeci omoi facáicaillena. Afémie daina uai daí daide: “Fia iga raa llánotimie baímo, fecáfiredimie jamánomo íóbide,” —daide.

³⁶ Daí íaioína daina meífodo, Pablo cañici ana dújuillano Moo Juziñamuimo nana afémaciri úritiaioi.

³⁷ Iemona nana éenaitiaioi. Afe llezica Páblona meníñuano ñitada cáimadotiaioi.

³⁸ Afe llezica Pablo “Ja meine abido cuena cíóñetiomoi” dáinari iere zúucaidiaioi. Afe mei fei nocaemo íraicaiño íena nabáidiaioi.

21

Pablo Jerusalemó jáillafue

¹ Amatiai fuénocaillano, Cos jófueño nocaedo jaícina jáidicai. Afe jítiramo Rodas jófueño jáidicai. Dinómona Pátara jófueño jáidicai.

² Afe Pátaramo Feníciamó jáiacade nocáe baiticai. Dinómona afécaedo jáidicai.

³ Jaillano, monaillai cigi idu Chíprena jicana ciódicai. Afe énierna jarífezi dibénemo ñianona Siria éniemo jáidicai. Afe cai jáillacaemo Tíromo fielle ráaniai illa jira afégobemo zójidicai.

⁴ Afégobemo ite Juziñamuimo ñnotina cíóizaidicai. Dinomo siete dígarui íaioi diga iticai. Dinomo Ñuera Joreño llogáiaioi. Ie jira Páblona daidíaioi:

—Benómona Jerusalemó jáiñeno iri, —daidiaioi.

⁵ Mei íadi afe siete dígarui illa meífodo jáidicai. Cai jáizailla llezica nana Juziñamuimo ñnotino, íaioi ringóniai naa úruiairi jofue féimo caina nabáidiaioi. Dinomo ite guamáimo ana dújuillano Juziñamuimo iere úriticai.

⁶ Ie mei meníñota íraicaiño íaioi facádonocaidicai. Daí ñiano nocaemo caífo jáidicai. Afémaci íaioi jófueño meine jáidiaioi.

⁷ Tíromona biticai Tolemáidamo dúcina. Dinomo ite ámatiai uáidollena darui nabáidicai.

⁸ Afe jítiramo Pablo naa íedo jáidinori dinómona Cesarea jófueмо dúcidicai. Dinomo ite ñúefue llóraima Felipe jofomo jáidicai. Afémie siete dígamiede güille fecáranimona Juzíñamuimo gairíracо tájiraima. Dinomo afémie jofomo íticai.

⁹ Afe Felipe jiza nagaámazade. Nai iníndiaioi. Aféngotiai Juzíñamuimona cacana uaillai jino llotíaioi.

¹⁰ Afénomo diga irui íticaimo, uai jino llóraima Agabo Judéamona cai uáiduaibite.

¹¹ Afémie Pablo ciraigi ife zuitáicaillano dama ie idai onoi diga maiáno daide: —Ñuera Joreño daide: “Jerusalemо judíuai bie ciraigi ife náamana bie izói máiite. Maiáno íena jicánemacimo fécaitiaioi,” daide, —daí Agabo lluaíbite.

¹² Aféfuena cacáillano, Cesarea imaci naa cairi, Pablo Jerusalemо jáiñiellena íemo izire jicádicai.

¹³ Mei jira Pablo uai ote:

—¿Nibái cuena zúucaitatiomoi? ¿Minícarí eédiomoi? Cue íaioi maille baimo comécido mamériticue. Juzíñamui jítáiadi Jerusalemо cai Ocuíraima ícoinia tíiticeuza, —daide.

¹⁴ Afémie mámiafuena jáanonidicai. Ie jira afefue fáicanocaillano daidicai:

—Juzíñamui comeci jitailla izói omo íficaiteza, —daidicai.

¹⁵ Afe meífodo, Jerusalemо jáillana finóbidicai.

¹⁶ Cesaréamona dárie Juzíñamuimo ínotino caina nabaide. Afémaci cígimona daa Chipre ímie Mnasón ite. Afémie jae diga fimona Juzíñamuimo ínote. Afémiemo ite Jerusalemо dúciracomo jáidicai.

Pablo Sanatiago uáiduafe

¹⁷ Jerusalemо dúcidicaimo dinomo ite ámatiai caimare caina llínotiaioi.

¹⁸ Afe jítiramo Pablo naa cairi Santiago uáiduaidicai. Daje izói nana illáicomini afénomo ítíaioi.

¹⁹ Pablo íaioi uáidote. Uáiduaño Pablo nana íedo judíoñedinomo Juzíñamui finócafuiuai jino illa dígafuiuai íaioimo llote.

²⁰ Iemona aféfuiaina cacáillano Juzíñamuimo caimátaioidiaioi. Jira Páblona daidíaioi:

—Mii, o llogáfuiuai iere ñuera, mei íadi judíuaimona diga mil comini afe ñúefuemo ínotiaioi ciódioza. Nana afémaci Moisés ocuica uai izói cai íllena iere jítáirede daidíaioi.

²¹ Mei íadi dáarie o nana jica jáinomo ite judíuaimo llogáfuena lluaíbitiaioi. Afe íaioi cacánafue daide: “Moisés ocuica uaina jeire omoi oñeno iri.” Afe izói íaioi jítótiai bacano ícoi quetáañedio, daidíaioi. Ie emódomo cai fibíllafuiaina finótañedio, daidíaioi.

²² Iemo bifuiaina cai dibénedo ¿nie izói llóitio? ¿nie izói ñéiticaí? O billáfuena comini fidíillano ua dáanomo gáiritiaioi, —daide. Iemo Santiago nai úrillano íena daide:

²³ —Cai daínauai jeire o úamona aféuai izói o finolle jítáirede. Cairi benomo ite nagaámamie. Afémiaí uícomo Juzíñamuimo nauí íaioi llogáuai fuitáacadiaioi.

²⁴ Bimaci o uírí. Uillano nana omoi comécimo íafue múíñuafue mai omoi finuairi. O úcubemona omoi ífue cuidótalle ibari. Iemona dani cuidótaitiaioiza. Afe daí o finuamona, benó ite ínote judíuai, o ñue ífírena izói ónoitiaioi.

Moisés ocuífafue jeire o úana fidiitiaioi. Daje izói ja ónoitiaioi nana o rafue benó comínimo jiáimaci lluaibiga táinofuiai.

²⁵ Mei íadi ínote judíoñedinomo jiáifodo jae cueticai. Aillo judíuai finócafuaímo íaioi jíruiñeillena lloticai. Daa bifue íaioímo lloticai: “Jánarai izóidemo fecaca líiciaina omoí riñeno iri. Díena jiróñeno iri, daje izói cimoina cigínoga rílleniaina riñeno iri. Mai nana jruífuaímona abí omoí rairuirí; dama áiredimie ie ai diga illa ñuena,” —dinóride Santiago llogafue fuilla.

Pablo gairíracomo llaitáinfue

²⁶ Ie mei Pablo afe nagaámamie uite; uillano afe jítiramo, íaioi comécimo ite íaífuiai múiñufue finódiaioi. Afe meifodo jofu Juzíñamuímo gairíracomo jáidiaioi. Dinomo íaioi comécimo ite íaífuiai múiñóilliruillai fuillíruí llujidiaioi. Afe daií íaioi llúamona illa dígamierie íaioi raa fia íaioi fecállíruí llotíaioi.

²⁷ Afe siete dígarui ja fúiacademo Asia éniemona bite judíuai Páblona Juzíñamuímo gairíracomo cíozabitiaioi. Iena cíozabillano nana afeno comínina fieni faillíñaitadiaioi. Iemona Pablo llaitádiaioi.

²⁸ Llátano caillíoidiaioi:

—Ísrael nairai, cai cano! Bímie náragobiaido nana comíniaímo cai nairai uáitaoicana llófuecaide. Daje izói Moisés ocuífafuena uáitaoide. Bie cai Juzíñamuímo gairíracona uáitaoide. Ie emódomo jae mena griego ímie íaillínoí jofu uite. Daií bie Juzíñamuido ñue finócaco ero bácajaibite, —daidiaioi.

²⁹ Nauí Pablo afe jófuedo judíoñedinome Trófimo diga nabáirillana íaioi cíonamona daií daidiaioi. Afe Trófimo Efeso ímie. Afémaci comeci facádiaioi, nibai Pablo Trófimona gairíraco eromo jofu uite, daidiaioi.

³⁰ Iemona nana afeno comini aféfuiai júfidotiaioi; aféfuerei fieni faillíñaidiaioi. Afe llezica nana comini áiziaizi bitíaioi. Billano Pablo llaitádiaioi. Llátano gairíraco jinomo zocana íena uitíaioi. Daií ñiano afe llezica gairíraco náziai íbáidiaioi.

³¹ Ja íena titáacadaíomímo, soldados igüelli illaíma ja afe aillo comini fieni faillíñainana fidide. Daje izói Pablo ja íaioi titáacanafuena fidide.

³² Mei jira afe illaíma ie jabóidillaímaíai naa ie llazírainíri jíríte. Jírillano afe comini illánomo aizícana jáidiaioi. Iemona nana comini llazírainí illaíma naa ie llazírainíri bíllana cíóillano, Pablo fáajana fáicanocaidiaioi.

³³ Afe mei afe illaíma Páblomo áinozide. Ainozillano Pablo llaitádiaioi. Llátano mena llóejina íena maitátate. Afe mei illaíma íena daide:

—O mei ¿búdio? ¿Níífue finódio? —daide.

³⁴ Mei íadi comini jamánomo jiáifodo caillíoidiaioi. Jiáimíai jiáifodo daidiaioi. Illaíma ífona jamánomo írinote. Jaca jefomo uibíñede, jamánomo íaioi úroinaza. Jira illaíma llazírainí gairíracomo íena uitátate.

³⁵ Afeco caífo jáirabicímo íaioi dúcina llezica, llazírainí Páblona caífodo rocádiaioi, comini íena llaitada íaioi fáiacana jira.

³⁶ Afémie uilla óodana caillícana daidiaioi:

—¡Pablo dama tídeza! —daidiaioi.

Pablo ie abí ríidollífue comini uiécomo lloite

³⁷ Afécomo íena uizájidiaíomímo, Pablo afe llazírainí illáímamo griego uáillaido jicánote:

—¿Meita comínimo úriredicue? —daide.

Jira aféllaíma uai ote:

—¿O griego uai úrillana ónodio?

³⁸ ¿Mei o egipcio ímieñedio? Afémie nauí jiáie illáimana benó jóoneacade. Táizicimo cuatro mil come fáraíni uite, —daide.

³⁹ Jira Pablo íena daide:

—Tarso jófue mo jococa judíodicue. Cilicia éniemo ite ñue onórede jofue ímiedicue. Comínimo cue úrilleza cuemo izire cácarei, —daide.

⁴⁰ Iemona afe illaíma Páblona faíríote. Iemo Pablo afe caífo jáirabicimo náidaillano comínina ónoído llícaítade. Iaiói úríoina llícaillamona Pablo afémaci uáillaído íaíoimo úrite. (Afémaci úrilla uai ‘hebreo’ daina.) Iaiíoína daide:

22

¹ —Cai comíni naa illáicomíni diga, omoi cácarei. Cue abi ríiduafue jino llóiticueza, —daide.

² Hebreo uaido íaíoína dáinana cacáillano, iere tíi daídíaíoi. Iemona Pablo íaíoína daide:

³ —Cue judíodicue. Cilicia éniemo ite Tarso jófue mo jocócacue. Mei íadi benó Jerusalemocomuítacacue. Afe mei Gamaliel llófuegacue. Cai jáiáidígíma ocuícáfuaí llúana iere áfemo jíerúitucue. Jaca Juzíñamuimo tájinafue mo comeci cue facai izóí naa cue ríinodo iere járitaífiredicue. Ua ja birui Juzíñamui ocuícáfue mo omoi járitaílla izóí jáiaí daí járitaífiredicue.

⁴ Jáiaí Jesumo ínotinona daje izóí fállena racádicue. Afe dáruido íñíiaí ringóniaíri llavéracomo llávíaídicue.

⁵ Lletárirainí illainí nauí comíni cue llávíaífue mo uai nabáirainí itíaíoi. Daje izóí nana illáicomíni rábiaí cue fécamo uai nabáirainí. Afe rábiaído Damáscómo ite cai ámatiaí judíuaí jénuaidicue. Dinomo ite Jesumo ínotino jénuaidicue, atida Jerusalemó íaíoína duere cue finófallena.

Pablo íemo ite fíénidífue méidua jino llote (Hch 9.1-19; 26.12-18)

⁶ ‘Mei íadi Damasco iodo jáidicue mo, ja jáiciri ítemo afe jófue mo dúciacadicue. Afe llezica monámona jamánomo riire cuemo egáíñocaide.

⁷ Iemona éniemo baídicue. Afe llezica monámona cuena daina uai cacádicue; aféuaí cuena daide: “Saulo, Saulo ¿níbái mei cue racádio?”

⁸ Mei jira jicánoticue: “¿O mei búdio?” Jira afémie cuena daide: “Nazaret ímie Jesúsídicue. Daa o racácamiedicue,” daide.

⁹ Cuedo jáidino afe egáíñuana cíóillano jacínaitaíoi; mei íadi cuemo úrite uaina cacáñediaíoi.

¹⁰ Jira íena daidicue: “Ocuíraíma, ¿mei níie izóí líticue?” Jira afémie cuena daide: “Náidacaillano o jaílla Damasco jófue mo jái. Dinomo o finóllífuiaína omo llóítaíoi,” daide.

¹¹ Afe riire egáíñua cue ui dúitaga. Ie jira cue nabáíñiaí Damáscómo ónoído jáinátaoicaigacue.

¹² Aféno mo ite Ananíasna mámeciredimie. Afémie iere Moisés ocuícáfue mo ínofirede. Nana Damáscómo ite judíuaí ñúefuena íemo nitáírediaíoi.

¹³ Iemo afe Ananías cue uáiduaíbite. Billano cuena daide: “Cue ama Saulo, o ui meine nane cíoíteza,” daide. Daí daina llezica meine cue ui ñue cíoide. Afémiena cíódicue.

14 Mei jira afémie cuena daide: “Cai jáiairagima Moo Juzíñamui nizécamedio. Afémie jaiai ninómona ona nizede íemo o táijillifuiái jino omo llóllena. Ua dama Jesús fuémone ie úrilla uáillaina cácaítio. Afe llezica jaícina ñue finófiredimiena Jesuna cíoitio.

15 Mei o cacánafuiái o cíonafuiái diga nana comini uícomo jino llóitio.

16 Mei birui çmñicari jizídio? Náidacaillano o báutizatari. Ocuíraima Jesús mámecimo ñue ínori. Afedo o fiénidifue jae muiñócaza,” dinori Ananías daide.

Pablo Judíoñedinomo ie orécáfue jino llote

17 Pablo nai úrite. Iaióina daide:

—Jerusalemo meine cue billa llezica, Juzíñamuimo gairíracomo úrizaidicue. Dinomo nicai anado cíodicue.

18 Cai Ocuíraima Jesuna cíodicue. Afémie cuena daide:

—Jerusalémone mai raíre oni jai. Afémaci cuedo o úrilla jieruñeítiaíoi, —daide.

19 Jira Ocuíraimana daidicue:

—Nana afémaci omo ínotinona llófueriracomo cue lláitainafuena onódiaíoi. Llavrácomo íaióina fácana cue uilláfue mo uibóidiaíoi.

20 Esteban o mámecido úrite táijitagamie. Afémie tíde die tota llezica afénomo iticue. Aféfuemo “Jii” daidímiedicue. Ie emódomo Esteban fatímie inícuirona oni llíidicue, —daidicue.

21 Mei íadi Ocuíraima cuena daide:

—Mai jai. Judíoñedino çigimo jica ona óreiticue, —daide.

Pablo llaizíraini illaíma anamo illafue

22 Afe dinó afeno comini íanori tí daidíaíoi. Mei íadi dánomo nane caillíoicana daidíaíoi:

—¡Bie íima dama tídeza! ¡Afémie cáailinona íñeite! —daidíaíoi.

23 Nai are caillíoidiaíoi. Iere icírillano daní íaíoi inícuiruai cúacoidiaíoi. Afe llezica eníchomaíai caífo táinomo júcoidiaíoi.

24 Ie jira llaizíraini illaíma Páblona íaíoi gairíracomo orede. Oriano dinomo zechénotade ie finócafue jino llóllena, comini riíre íemo fienni caillíoinafuena onóllena.

25 Ja maitá fállena naidánega, íemo Pablo dinomo ite jabóllaímana daide:

—¿Jicánoñeno romano ímiena fárediomoi? —daide.

26 Afena cacáillano jabóllaíma llaizíraini illáímamo lluájide; lluájillano daide:

—Bímiemo o duere finóacanafue o jírcañeno iri; afémie romano ímieza, —daide.

27 Jira afe llaizíraini illaíma Páblomo jicánuaíbite; daide:

—¿Ua romano ímiedio?

Jira Pablo:

—Íe mei, —daide.

28 Jira afe illaíma daide:

—Aillo cue úcube baílla baímo romano ímiena jáidicue, —daide.

Iemo Pablo daide:

—Cue jaca romano ímiena jocócacue, —daide.

29 Afe daíí ie dáinamona, ie zechénotino afémiemona oni raídíaíoi. Nana afémaci naa aféllaímaoíri jacainaitaíoi ie íaíoi llaítari; afémie romano ímienana íaíoi fidínamona.

Pablo judíuai Nahí Ríillaini uícomo naidánetaíoi

³⁰ Afe jiáiruido afe llaizíraini illaíma Páblomo íaiói jitácafuiaina ñue jaícina onóiacade. Ie jira lletáriraini illaini naa íaiói ríillainiri dánomo gairítate. Afe mei Pablo llaveina llójei zúitano íaiói uícomo bai naidánete.

23

¹ Dinomo Pablo Nahí Riíllainimo éroicaillano daide:

—Cue ámatiai, cácarei. Jaca birui comeci mánainafuedo Juzíñamui uícori caimare iticue, —daide.

² Ie jira lletáriraini illaíma Ananías Pablo abímo itino fúena putátate.

³ Jira Pablo íena daide:

—¡Afe izói Juzíñamui ona fátaite! Jae jinóidiuaido ñue úritio, o comeci fiénide íadi. ¿Jadí ráiidio ocuica uai daina izói cuemo jicánollena? Iemona ¿ñibái mei ocuicafue uáitano cue fúena putátatio? —daide.

⁴ Iemona afénori itino íena daidíaiói:

—¿Ñibái daí Juzíñamui caifoide lletáriraimana báíñotio? —daidíaiói.

⁵ Jira Pablo daide:

—Amatai, afémie caifoide lletáriraima ie íllana onóñedicue. Onódicueza Cuegáuaillai daide: “O jofue ríimacina báíñoñeno iri,” —daide.

⁶ Iemona Pablo Nahí Riíllaini cígimo itínona fidide. Afémacimona dárie fariséuaimo jaináidiaíói. Jiáimaci saducéuaimo jaináidiaíói. Ie jira íaióina riire daide:

—Amatai, cue fariséodicue. Afe emódomo fariseo ímie jitódicue. Ja birui cuemo jicánotiaíói, mei tídimaci meine abído cáailliruimo cue úíñua jira, —daide.

⁷ Daíí daina meífomo, fariséuai saducéuai díga conímamo jofo afefue riire júfdotiaíói. Iemona afénomo gairídino dázierie bozíetaidiaíói.

⁸ Afe saducéuai tíidinona meine cáañeite daidíaiói. Afe emódomo Juzíñamui abí imácina íñede, daje izói jóriaiaína íñede daidíaiói. Mei íadi fariséuai nana aféfuaimo íñotiaíói.

⁹ Nana caillidiaíói. Ie mei dárie ocuicauai llófueraíni naidáidiaíói. Afémaci fariséuai dibénemo jaináidiaíói. Caífo naidáillano daide:

—Bímie fiénidifuiaína caído llócaíñede. Nibai joreño íemo úrilla; nibai Juzíñamui dibénedo úaitañeíticai, —daidíaiói.

¹⁰ Afe júfiduafue riire anado jaide. Iemo llaizíraini illaíma Pablo íaiói tibéruari jacínaite. Ie jira aféllaíma íaiói cígimona Páblona llaizírainina oni uitátate. Uíllano meine íaiói gairíracomo íena orétate.

¹¹ Afe jíáie naío Ocuíraíma Jesús Páblomo cíocaillano daide:

—Pablo, jacíruiñeno, abí mame. Benó Jerusalemo cuedo o úrilla izói, daje izói Rómamo úrizaitio, —daide.

Pablo fállena mámiafue

¹² Afe jiáiruido judíuaimona dáarie Pablo fállena maméritiaíói. Dani íaiói abí faidódiaíói. Jira fiénide uáillaído daidíaiói:

—Páblona nai cai fáñeille dino güíñeíticai, jíroñeíticai, —daidíaiói.

¹³ Afe daí úritimíai cuarenta baimo jaide.

¹⁴ Iemona afémaci lletáriraini illáinimo naa judíuai éinamaciri jáidiaíói. Dinomo daíizaidiaíói:

—Dani cai abí fiéni daináfuedo faidódicai. Pablo cai fáñeille dino güíñeíticai, jíroñeíticai.

15 Mai omoi naa jiáie Nahí Riállainiri llaizáraini illáimamo Pablo uire jiti atállifue jica. Fia daií íemo lloíri, meine nane íemo itífue izire omoi jicánollena. Afémie nai dúciñeite, afe atica llaitada íena títaiticai, —daiíaiói.

16 Mei íadi Pablo comoma afe Páblona íaiói fáiacanafuena fidáizabite. Iemona afémie llaizáraini gairacomo Páblona llujáide.

17 Mei jira Pablo jabóllaima jírillano daide:

—Bie jitócome llaizáraini illáimamo úi. Afémiemo lllólfuena íteza, —daide.

18 Afe jabóllaima íena uillano, llaizáraini illáimana daide:

—Afe llaveca Pablo cue jírillano bie jitócome benó cue atállena jicade, afémiemo da lllólfuena íteza, —daide.

19 Afe llaizáraini illaíma afémie ónoído oni eneno jicánollena uite; daide:

—¿Níifue cuemo llóiacadio? —daide.

20 Jira afémie daide:

—Judíuai jae nana dáfuerrillano meine comeci facádiaíoi. Uire jiti Pablo Nahí Riállaini uícomo meine o atállifue jicaitiaíoi, meine íemo izire íaiói jicánollena.

21 Mei íadi íaiói jicállifue mo íinoñeno iri. Afémacimona cuarenta baímo dígamie baínino Pablo fállena jónetiaíoi. Afe fáiacadino dani íaiói abi faidódiaíoi. “Pablo nai cai fáñeille dino, güññeiticai; daje izói jiroñeiticai,” daiíaiói. Ja birui afémie fállena ñue finóbidiaíoi. Mei íadi o uai ollífue mo nai úiñoidiaíoi, —daide.

22 Iemona afe llaizáraini illaíma afe jitócomena:

—Mai o jairi, —daide. Afe íemo ie lluáibigafuena jííamacimo “Lloñeno iri,” daide.

Caifóidillaíma Félixmo Páblona orédiaíoi

23 Mei jira afe llaizáraini illaíma mena jabóidillaíma uáidote. Uáiduano íaillinoína daide:

—Mai doscientos díga llaizáraini mácaitinona finóbitari. Afe llezica setenta dígamie cabállodo jáitínona finóbitari. Afe emódomo doscientos dígamie zídaiáiri jáitínona finóbitari. Nana afémaci nauilla baído Cesaréamo jáitiaíoi, —daide.

24 Afe llezica Pablo jaille cabállona finóbitade. Daje llezica Pablo ñue fañeno cáanori caifóidillaíma Félixmo uitátate.

25 Afémacido cugabe orede. Afe cugabe daide:

26 “Cue Claudio Lisias mamécacue. Jamánomo cáimafuerede caifóidillaíma Félix, o uáidotícue.

27 Judíuai bímie láítano duere finótaacadiaíoi. Iena fáiacadiaíoi. Mei ie romano ímie íllana cue fidínamona cue llaizárainido íena ríiduaidícue.

28 Iemo íaiói jitácafue na onócadícue. Ie jira judío Riállaini uícomo íena uitátaticue.

29 Ie mei aillo íemo júfdogafue záilla meífomo íemo nífuena baiñédicue. Dani íaíoi mo ocuica uai ie jeire ie oñena íemo nitádiaíoi. Mei íadi ie cue fallífue na íñede. Daje izói ie cue llavéllifuena íñede.

30 Dani afémie íaiói nane fáiacanafuena cue fidínamona, íena omo orédicue. Afe llezica nana íemo fiénidífuai nitádinona daidícue: Mai Páblomo nífue o nitáadi caifóidillaíma Félix uícomo o daiízairi. Mai, jae ñie.”

31 Mei jira nana llaizáraini íaiói illaíma ocuilla izói Pablo uitíaíoi. Afe naio Antípatris jófue mo íena uitíaíoi.

³² Afe jítiramo eíbado jaide llazírairini meine íaiói iníracomó bitíaiói. Ie mei cabállodo jáidino Páblooiri nai Cesaréamo jáidiaiói.

³³ Dinomo afe Cesaréamo dúciillano, afémaci uiga cuegabe caifóidillaímamo izájidiaiói. Daje izói Pablo íemo fecádiaiói.

³⁴ Afebe facádua meífodo, caifóidillaíma jicánote:

—¿O nino ímiedio?

Pablo uai ote:

—Cilicia énie ímiedicue, —daíde.

³⁵ Ie jira íena daíde:

—Omo fiénidífueña nitáđino bíadi ona cácaíticue, —daíde.

Afe mei Félix Páblona Herodes illaíma illaco áillocómo rairuítatinona uitátate, afécomo íena íaiói ñue rairuillena.

24

Félix uíecomó Pablo abí ríiduaíue

¹ Jubécuiro dígarui illa meífodo lletárirairini illaíma Ananías Cesaréamo bite. Afémiedo dárie énamaci bitíaiói. Dáruído, caifóidillaíma uíecomó raire úritímie bite. Afémie mámeći Tértulo. Nana afémaci caifóidillaíma Félix uícomó Páblomo jítacafuiai nítaíbitíaiói.

² Pablo íaiói átia llezica, Tértulo íemo jíidífue riire nítade. Félixna daíde:

—Cai izíruiğa caifóidillaíma, ori íóbiacádicai. Ñue záillafue caímo ite; íemo caímare llícaíllafuemo iticai. O fibíllafuedo nana ñue ocuícacai.

³ Nana bífuiairi náğagobiaído íóbioídicai. Félix o iere jamánomo fígomiedio.

⁴ Mei íadi are o cue áifedoñeilleza cai úrillamo o cacáreillena omo izire jicádicue.

⁵ Bímie fiénide duico billa izói bíllana ciódicai. Naga éniáido llócaide judíuai oni énenorie bozítaíllena. Afémie Nazaret ímie Jesumo ínotino ífódimie.

⁶ Icoímó cai Juzíñamuimo gairíracó ero bácajide. Ie llaitádicai ñue afémiemo cai ocuína uai dáina izói jicánollena.

⁷ Mei íadi llajírairini illaíma Lisias aféfuemona caina rairuide. Iemona cai anámona íena ríífuedo oni báirode.

⁸ Afe emódomo caina daíde: “Bie cómemo bifue jítáđino odo bírediaíói.” Dama o afémiemo jicánoreña, nana íemo cai jítacafue uáfueíteza. Daí áfena uáfueña onóitio, —daíde.

⁹ Afénomo jaide judíuai nana aféfuiaína uáfuiái daídíaíói.

¹⁰ Jira Pablo úrillena caifóidillaíma ónoído llote. Jira Pablo daíde:

—O uícori cue abí ríiduaíue jino caímare llóíticue. Jaiái díğa fimona bie nairái o jicánoraímána o íllana onódicueza.

¹¹ Ja doce dígarui íllamona Jerusalemo Juzíñamuimo ánozillano íemo caímare úrillena dúcidicue. Aféfuena dama o jicánoreña, ñue o ónoíllena.

¹² Bumo riire cue úrillana cacáñediaíói. Daje izói Juzíñamui gairíracómo comínina fieni failíñaitañedicue. Iemo jíái Juzíñamui llófueriracómo daje izói júfidogafuiai finótañedicue. Daje izói nairái jófuedo nífuena loñedicue.

¹³ Nana bímaci cuena nitácafuiaina bu áfena uafue daínina.

¹⁴ Mei íadi dafue jino llóíticue. Judíuai fieni mameca fiénidíodo jáidicue. Afe como Jesús lloga íodo cue jáíllamona cai uzútíai Moo Juzíñamuimo tájídídicue. Mei nana cueğa ocuica uáíllaina ínoticueza. Afe daje izói nana uai jino lloraini Cueğáncuaimo ite uáíllaina ínoticue.

¹⁵ Iaioi Juziñamuimo úiñoinafue daide: “Tíidino ñúemaci fiénidimaci diga meine abido cáaitiaioi.”

¹⁶ Ie jira Juziñamui uiécomo nífuenidimiena cue illena jaca nágarui cue comeci ñue finófiredicue. Afe izói comini uícomo nífuenidimiena íacadicue.

¹⁷ Ja diga fimona jiáinuiaimo cue maca meífomo, meine cue éniemo Juziñamuimo fia fecaca úcube izáibiticue. Afe izói dúeredimacimo dúecaillano úcubena fécaibiticue.

¹⁸ Afe daí cue feca llezica, cue comécimo ite íaifuiái cue múiñuafuemo nícidoticue. Daí cue comeci nícidua meífodo afe úcube cue fecalle llezica, dárie Asia énie judíuai Juziñamuimo gairíracomo cuena baitíaioi. Afénomo nai comínina figo iñena llezica iticue. Afénomo ite comínina jaca buna failíñaitañedicue.

¹⁹ Afénomo cuena ciódino benomo cuemo jítaibirediaioi, cuemo nífue íaioi nitáadi.

²⁰ Mei jiáifodo navi judíuai Nahí Riállaini uiécomo cue illa llezica fiénidifue cuemo navi íaioi báadi, benomo ite aféfuena cacádino mai jino lloiri.

²¹ Aféruillaído íaioi cígiri cue illa llezica dafue riire íaioimo lloticue. Daídicue: “Ja birui cuemo jicánotíomoi tíidimaci meine abido cáaiñífueemo cue ínua jira.” Dino Pablo úrite.

²² Félix Pablo daí dánana cacáillano, aféfuena dinó fiénocaide. Afe Jesucrístomo dibénemo itino finócafuiaina Félix ñue fibídimie. Ie jira aféfuena dinó fiénocaide. Fiénocaillano daide:

—Fui llazíraini illaíma Lisias dúciadi bie ómoimo itifue afémie cuemo ñue jino llóite, —daide.

²³ Iemona Félix, jabóidillaimana ocuúde Páblona nai zuitátañellena. Mei íadi ie comini ie uáiduaíbillena rairuññede. Afe izói ie íaioi cánuabillena jeruññede. Afe daí Félix Pablo figo riire llavétañede.

²⁴ Afemona afe mei dígarui íllamona, Félix meine dúcide ie aí Drusila diga. Afengo judío ingo. Félix Pablo jíritade Jesucrístomo ínuaafuedo úrillena.

²⁵ Afe ínuaafuedo úrilla llezica Pablo ñue jaícina jáillifuedo úrite. Afe daje izói ñue comini íllena abí rairuñnafuiái llote. Ie émodomo írairuimo comini jicánollifue jino llote. Aféfuiaína cacáillano, Félix jacínaite. Jacínaillano daide:

—Mai birui jai, uire cue jítaílliruido nane ona jíriticueza, —daide.

²⁶ Afe jiáifue Félix, Pablo ie zuitalle úcube fecalle úiñote. Ie jira diga ícaño Félix íena jíjiride ie diga úrillena.

²⁷ Mena fimona daí íhidiaioi. Afe mei Félix ie ílláimana illano fáicanocaide. Ie meífomo Porcio Festo ílláimana jónetiaioi. Félix judíuai uícori ñue íacanamona llavécamié Páblona zuitáñeno oni jaide.

25

Pablo Festo uícori abí ríiduaíue

¹ Ie meífomo Festo ja ílláimana bite. Afe mei daruíamani íllamona Cesaréamona Jerusalem jaide.

² Dinomo lletáraini íllaini naa judíuai ríimaciri Páblomo íaioi nitácafuiái nane Féstomo llotíaioi.

³ Jerusalemo abido Pablo oréllena izire jicádiaioi. Pablo io anamo íaioi fallífueña maméritiaioi.

4 Mei íadi Festo íaioi uaimo daide: Pablo nai Cesaréamo llaveca. Nano íanori illamona afénomo nane jáitícué.”

5 Jira íaioi na daide:

—Íe jira omoi cígiri ite ríimaci mai cuedo Cesaréamo jairi. Afémiemo nifue íadi dínomo íemo nítajirediomoí, —daide.

6 Festo afe Jerusalemo nano ocho nibai diez dígarui illa meífodo meine Cesaréamo bite. Afe jáíruido ie riire jicánoranomo ráinazaide. Páblona atítate.

7 Pablo afénomo jofo jáidemo, Jerusalémoma como dúcide judíuai íemo áinozidiaioí. Ainozillano aillo fiénide ráfuiuí íemo nitádiaioí. Mei íadi aféfuaiamo únollifueña íñede.

8 Mei jira Pablo ie abi ríiduafeña daide:

—Cue nie fiénidifueña finóñedicue. Judíuai ocuífufuiuí uáitaoíñedicue. Íaioi gairíracó ero bácañedicue. Daje izóí romano caifóidillaima uáitaoíñedicue, —daide.

9 Mei íadi Festo judíuai cígiri ñue íacade. Jira Páblomo jicánote:

—¿Jerusalemo abído jáiacadio omoi nitácafuiuí dínomo cue jicánolleza? —daide.

10 Jira Pablo uai ote:

—Ja birui romano illaima uícomo náidadicue. Ja benomo cuemo nitácafuiuí jicánorede. Mei judíuaimo nífuenidimíedicueza ñue onódio.

11 Cue títate fiénidifue cuemo íadi, áfemona abi jáanoñeíticué, mei íadi nana cuemo íaioi nitácafuiuí táínofue íadi, buna íaioi mo cuena ríifuedo izájínide. Dama romano jamánomo ocuídillaima cuemo jícana daidícué, —daide.

12 Iemo ie fidítatimíaimo úrilla meífomo, Festo daide:

—Mei “Jamánomo ocuídillaima cuemo jícana” daidízoa, ie jira afe jamánomo ocuídillaimamo ona óreíticué, —daide.

Pablo illaima Agripa uíécomo illafue

13 Diga irui illa meífomo illaima Agripa ie ai Berenice diga Cesaréamo Festo uáiduaide.

14 Afénomo diga irui itíailinoímona, Festo Pablo rafue Agrípamo llote. Iena daide:

—Félix fiénocaiga llavécamié nai benomo ite.

15 Naui Jerusalemo cue jailla llezica, lletáriraini illaini, naa judíuai éicomíniri íemo íaioi nitácafuiuí cuemo llotíaioí. Ie duere cue finótallena cuemo jicádiaioí.

16 Jira íaioi uai otícué. Íaioi na daidícué: Romano ríimaci íaioi fibilla izóí, afefue nitádimíe íemo nitácamié uíécomo conímamo jofo eróicana nai úriñenia, nitácamiéna fañédiaioí. Afe daí táínofue nitácamié ie abi ríiduafeña finórede.

17 Ie jira afémaci benomo billa llezica, raire afe jáíruido cue jicánoranomo ráinazaidícué. Ráinazaillano afe cómena atítaticue.

18 Mei íadi afémiemo nitádimíe cue comeci daina izóí nitáñediaioí.

19 Daa íemo íaioi nitácafue fia íaioi únogafuaimo jaináidifue. Daje izóí da Jesudo úritiaioí. Afémiéna tíde daidíaioí; mei íadi Pablo “Caade” daide.

20 Mei aféfuéna onóñedicueza. Nie izóí aféfuéna níbaíticué, daidícué. Jira Páblomo jicánoticue: ¿Jerusalemo meine jáiacadio dínomo omo nitácafuiuí ñue jicánollena?

²¹ Mei íadi afémie jamánomo ocuídillaíma Augusto íemo jicánollena jicade. Ie jira nai íena zuitáñedicue. Iena rairuídicue jíáiruido afe caifóidillaímamo ie cue oréllena, —daide.

²² Jira Agripa Féstona daide:

—Cue jíái daje izói afe íima uaimo cacáreacadícue, —daide.

Jira Festo uai ote:

—Uire jiti cácaítio, —daide.

²³ Afe jítiramo, Agripa Berenice diga dúcillano, áillue gairíraco nana jofo jáidiaioi, naa llazíraini illáiniri, naa jofue ríimaciri. Ua aillo ebire finóbillano jofo jáidiaioi. Dinomo Festo Pablo jírítade.

²⁴ Afe mei Festo illaíma Agrípana daide:

—Hlaíma Agripa, nana cairi benó gairídínori, omoi cácarei. Bímiemo omoi eroi. Aillo judíuai afémiedo cuemo úritiaioi. Benó Cesaréamo cuemo úritiaioi; daje izói Jerusalemo izire cuemo jicádiaioi. Jaca fáinocaiñeno ie titácanafuena cuemo llotíaioi.

²⁵ Mei íadi afémiemo comeci facádicue, íadi ie cue titállifuena íñede. Mei caifóidillaíma Augusto íemo jicánollena dama jicade. Jira afémiemo íena oréllena mamédicue.

²⁶ Mei caifóidillaímamo afémie rafue cue cuellífuena íñede, ¿níífue mei cúeíticue? Ie jira, Agripa, bímie o uíécomo atídícue íemo omoi jicánollena. Afedo caifóidillaímamo cue cuellífuena ónoíticue.

²⁷ Mei cue comeci daide: Da llavécamié cue oréadi, íemo íaioi nitácafueña óñoñenia, níbai afefue táinofue, —daide.

26

Illáima Agripa uícori Pablo abi ríiduaíue llote

¹ Jira afe Agripa Páblona daide:

—O dama o abi ríiduaífuena llórena, —daide.

Iemona Pablo como fueñe íaioímo úrite; daide:

² —Hlaíma Agripa, cue abi ríidollífue o uícomo cue llóleri íóbídicue. Nana judíuai cuemo nitaca táinofuíai jino jaícina llóíticue.

³ Nana judíuai fibíllafuíaina ñue onódioza. Daje izói conímamo cai úrillafueña onódio. Aferi iere íóbídicue. Ie jira fáicana cue úrillamo o cacáreíllena jicádicue.

Pablo íemo ítifue méiduaíue uícomo finócafuíai

⁴ Nai cue úruenamona dama cue éniemo, daje izói Jerusalemo íaioi cígiri nana judíuai cue illáífuena onódiaioi.

⁵ Daje izói cue jítócomenanomona fariseo ímiena cue íllana onódiaioi. Afémaci jítaia aféífuena jino llóredícue. Cai íinogafuíaimo afe fariséuai jamánomo riire jáináidino.

⁶ Íaioi íinogafue izói Juzíñamui tíidino meine abido cáatallífuemo ínotíicue. Juzíñamui daje afe cáallífue cai jáiairagímamo llote. Afefue ícoínia birui bie jicánollífuemo cuena atídiaioi.

⁷ Cai Israel doce nairai afe uícomo llogáuai fuizájillínomo úíñoidiaioi. Ie jira mona naio diga Juzíñamuimo áinozillano caimare úritiaioi. Afe izói íemo tájídiaioi. Illaíma Agripa, afe bie daje úíñogafue ícoínia, judíuai fiénidífuíai birui cuemo nitádiaioi.

⁸ ¿Nibái mei daíí comeci facádiomoi? ¿Nibái mei afe Juzíñamui tíidino meine abido cáatallifue mo buna íinonide, daidíomoi?

Pablo nauí Jesucrístomo íinotino rácafue

⁹ ‘Nazaret ímie Jesús mámecimo jaináidino duere cue finótallena, nauí aféfuemo comeci facáoidicue.

¹⁰ Iemona Jerusalén imácina duere finótaticue. Lletáriraini illaini ríibiaido aillo Jesumo íinotinona llavéracomo íbaicotadicue. Comini afe llavécamací titáacana llezica aféfuena fairíoticue.

¹¹ Diga icaíño íaioina duere finódicue, íaioi íinogafue féitallena. Afe duere finótafue naga llófuériracuaido daíí finódicue. Afe íinotinona jamánomo fiéniruidicue. Ie jira afémacina onínemaci jófuemo racádicue.

*Pablo íemo itífue méidoinafue nane llote
(Hch 9.1-19; 22.6-16)*

¹² ‘Bie daíí comeci mamérillafuedo Damasco jófuemo jáidicue. Lletáriraini illaini ríibiaido comini llaitállena orécacue.

¹³ Mei íadi jaiciri ía iodo jáidicue mo, jamánomo monámona riire cuemo egáíñoacáide. Afe egáíña jítoma egáíña baimo meáirede. Cue abimo egáíñoacáide naa cuedo jáidinori.

¹⁴ Iemona nana éniemo baíidicái. Hebreo uáillaido monámona cuena daínana cacádicue; cuena daide: “Saulo, Saulo, ¿nibái mei cue racáidío? O dama o abí fiení finóidío. Aillue juráreto jiúrainomo ite jáirede razi. Afe rázimo juráreto záitacailla jilla izóí, afe izóí dama abí daíí finóidío” daide.

¹⁵ Jira uai oticue: “Ocuíraima, ¿mei o búidío?” Jira afémie cuena daide: “O racácamie Jesúdicue.

¹⁶ Mai náidacaillano macácana jaí. Jae cuedo o tájillena omo cíocaidicue. Afemona biruí o cíonafuemo uai nabáiraimana lítio. Ie meífomo jáíruido jáífuiái omo ácataiticue. Aféfuiaimo nane uai nabáiraimana lítio.

¹⁷ Ja judíuaimona jáíe jicáneziemo ona orédicue. Dinomo ona lláitaitaioi íadi ona jillotaiticue.

¹⁸ Dinó afeno imácimo ona orédicue, íaioi comeci o zuitállena. Afemona, jíitífoto íaioi macáñeno úzefodo íaioi macállena o orédicue. Daje izóí nana íaioimo ona orédicue Taife íaioi náamatañellena, mei íadi Juzíñamui dibéfomo íaioi jaináillena. Afe izóí íaioimo ona orédicue cuemo íaioi íinollena. Iemona íaioimo ite fiénidífuiaí dófícaite. Afe fiénidífuiaína dófícaidino íaioi fecí raa máíñoitiaioi naa jáíe Juzíñamui ñue finócamaciri,” daíí Jesús cue ocuide.

Nicaí anado Jesús íemo ocúcauai Pablo jeire ote

¹⁹ ‘Mei jira, illaíma Agripa, monámona cue cacánafuena jámairuíñedicue; mei íadi áfena jeire uano fueñe Damasco imácimo afe úrilla uai jino lloticue.

²⁰ Afe meífomo Jerusalén comínimo daje izóí nana judea éniemo llócaidicue. Afe izóí jáí judíñedínomo llócaidicue. Nana íaioimo itífuiaí íaioi meídollena riire lloticue. Iemona Juzíñamui dibénemo íaioi íficallena íaioi llófueticue. Ñúefuaido íaioi macállena lloticue íaioimo ite meídogafue jino ácatallena.

²¹ Afe bífuiaí cue llua ícoínia, judíuái Juzíñamui mo gaíríracomo cuena llaitada fáíacadiaioi.

²² Mei íadi Juzíñamui cue cánuado nai biruímo ñue jáicadicue. Naga cómemo, illáícomini naa jamái comíniri Juzíñamuido úricaidicue. Moisés llua izóí

llocue. Jaiai uai jino llóraini llua izói llófueticue. Nana íaiói lloga caimo ífcaitífuiai jino llocue.

²³ Jaiai ninomo uícomo llotíaiói: “Cristo duere finólleza,” daidíaiói. “Afe meífomo tíite; tíillano meine abido cáate. Afe daí fueñe tíidíiemona meine abido cáatimiena maméllimieite.” Daí aféfuena daidíaiói. Afe emódomo jáífue daide: “Cristo cáaillemona, comíni jílloillífue jino llóite. Ua cai náiraímo llóite. Daje izói jáie náiraíana fidítaite,” —dín Pablo úrite.

Pablo Agripa Jesucristo dibénemo jaináillena llote

²⁴ Daí Pablo afe abi ríiduafue llua llezica, Festo caillíoicana daide:

—¡Pablo, o uáiritaidío! Aillo rábiai o facáduamona o ifoci uáiritaide, —daide.

²⁵ Jira Pablo uai ote:

—Fígomie Festo, cue uáiricoñedicue. Mei jáífodo cue daínauai ñue comécido facádoede. Aféfuiai uafue.

²⁶ Benori illaíma Agripa íte, bífuiaína ñue onódimie. Ie jira comeci mánainafuedo afémie uíécóri úritícue. Afémie nana bífuiaína ie onónana ñue onódicue. Afémie nana bífuiai báinino izúgumo lloñégaza onode.

²⁷ Illaíma Agripa, ¿uai jino llóraini llogáuaimo ínotío? O ínuana onódicue, —daide Pablo.

²⁸ Jira Agripa daide:

—¿Jesucrístomo afe dibénemo cue jaináillena raire cuena ífcaitaacadio? —daide.

²⁹ Jira Pablo íena daide:

—Raíre Crístomo jaináidimiena o ífciaíadi, o are íllamona Crístomo jaináidimiena o ífciaíadi, nai biruí Juzíñamui uaillai ñue jeire o ollífue jicádicue. Afe izói dama óíñedeza mei íadi cue Jesucrístomo ínuua izói nana cue úrillamo cacáreídino Crístomo ñue ínotinona jítáidícue. Mei íadi llójeina cue máína izói ómoina maitáacañedicue, —daide.

³⁰ Pablo aféfuiai llua meífomo, illaíma Agripa caífo náidacaide, afe caífoídillaíma Festo diga. Afe llezica íe ai Berenice nana dín ráíiedino diga caífo náidacaidíaiói.

³¹ Náidacaillano bai eneno jáidíaiói aféfuiaido úrillena. Dinomo jofu conímana daidíaiói:

—Baíe cómemo íe tíallífueña íñede. Daje izói llavéracomo íe llavéllinona íñede, —daidíaiói.

³² Jira Agripa Féstona daide:

—Bímie nauí jamánomo ocúidillaíma íemo jicánollena jicáñeniadi ja biruí zuitárede, mei íadi báillaimamo jicádeza zuitánide, —daide.

27

Pablo Rómamo oréinafue

¹ Pablo Itáliamo oréillífue mo maméritíaiói. Iemona Pablo naa jáie llavécamiáiri jabóidillaíma Júliomo izájidíaiói. Afémie Augusto llazírani igüéllimo jainaíde.

² Iemona Adramítio ígobemona áíllue nocaedo jáizaidícaí. Afecae nana Asia énie ígobiaído zójicana ja jáizaide. Daje llezica Tesalónica ímie Arístarco caído jaide. Tesalónica Macedonia énie jofue.

³ Afe jítiramoidiruido Sidón ígobemo dúcidicai. Afégobemo Julio iere caimare Páblomo úrite. Iemona Páblona rairuñño ie onóigamiaina uáiduajitade. Afe daií ie onóigamiaina Pablo jitaica raana fecárediaioi.

⁴ Sidón ígobemona jáidicai. Jaillano monáillai cigi idu Chipre jarífezimo fiéicoaidicai, mei jairifo jiáifodo cai ñuitáocaillamona.

⁵ Dinómona Cilicia énie áinodo Panfilia énie diga baído monaillai cigido jaitádicai. Afe mei Licia éniemo ite Mira ígobemo zíjidicai.

⁶ Dinomo llazíraini illaima Alejandríamona bite, Itáliamo jáizaide áillue no-caena cóizaide. Afécaemo afémie caina nana jofo orede, afénomona afécaedo cai jáillena.

⁷ Dinómona diga irui fíaicana juare jáidicai. Icoimo Gnido jofue féifenemo dúcidicai. Mei jairifo nai jiáifodo oni cai ñuitáocaillamona monaillai cigi idu Salmón féifenedo jáidicai. Ie jira monaillai cigi idu Creta onido neficana jáidicai.

⁸ Afe monaillai fue áinodo fíaicana juare jáidicai. Icoimo Buenos Puertos mámeciredinomo dúcidicai. Afégobe Lases jofue áinori ite.

⁹ Jae diga iruillai fia fíaicana jáidicai. Iemo ja uáicimo áinozidicai. Iemona monaillai cigido cai jaitalle jamánomo jacírede. Ie jira Pablo íaioina izire llote; ¹⁰ daide:

—Cuemo úrillamo omoi cácarei. Bie cai ruica cai jaille onódicueza iere jacíreite. Cai uiga ráaniai niné tánocaite. Cai jaille nocáe daje izói tánocaite. Daje izói cai nibai coróbaizaiticai, —daide.

¹¹ Mei íadi llazíraini illaima nocáe naama jáiacanafue Pablo dainafue baimo jeire ote. Daje izói afecae illaima daina uai llazíraini illaima jeire ote.

¹² Afégobe uácíai uíñollena figo jinoñede. Ie jira nana comécido daidíai: “Nibai Fenice ígobemo jáidicaina figura izoide,” daidíai. Afégobe Creta énie mona ícoi dibénemo ite. “Afe dinomo uáci záillena úñoitícaí,” daidíai.

Monáillaimo jamánomo riírede jairifo noci diga jáiñuafue

¹³ Afe jiáiruido mona átuje dinena jairifo fíaicana fúuoide. Jira afemo ínotiaioi ruica íaioi jáitallena. Afemona jáizaidicai. Afe Creta énie áinodo jáidicai.

¹⁴ Mei íadi due afe meífodo riírede jairifo cai jailla nocáe riire ñuitaíbite. Ua afecae riire aiñócaide.

¹⁵ Mei cai jáiacananomo jáinina jira, “Dama jairifo niné uigacai,” daidíai.

¹⁶ Iemona duera monaillai cigi idu Clauda jinófenedo jáidicai. Dinomo jairifo caina riire fúuoíñede. Ie jira cai abido uiga dúecae, fíaicana juare caifo bitádicai.

¹⁷ Dúecae bita meífomo, áillocae jéerie ñécigaído riire jofo mozidicai. Afe mei guamáeaimo íaioi bíjizai daíi jacírúitíai. Afe guamáeai mámecei Sirte. Afe jágiedo íaioi ñuite vela daina áillue iniroi ana zúicoidiaioi, cai nocáe fia jairifo fíaicana úllena.

¹⁸ Afe jiáiruido afe jairifo riire jaiñode. Ie jira íaioi uiga ráaie como fueñe afécaemona monáillaimo dócoidiaioi.

¹⁹ Ja daruíamani íllamo nocáe ero tájjina ráaniai dani cai ónoído monáillaimo fádoidicai.

20 Aféruillaido diga irui jitoma naa úcuai diga cióñena. Dinomo afe riírede jairifo llavécamiiai izóí duere cai finode. Iemona nana jilloillena cai comécinafuiiai niné táinocaide.

21 Ja diga iruillai güiñeno iticai. Ie jira Pablo íaiói cigimo naidáillano daide:

—Nana omoi cácarei. Naui Crétamona jáiñeiticai cue daina uaina jeire oñédiomoi. Afe cue daina uaina ñue ñnotiomoinia bie izóí duere zefuñedicai. Daje izóí nana cai atica ráaniai niné táinocaiñede.

22 Mei íadi, birui omoi jacíruiñeno iri. Bie nocaena niné táinocaite mei íadi ómoimona buna tíñeite.

23 Mei ja naio Juziñamui oreca ie abi ímie cuemo daízaibite. Afe Juziñamuimo jaináidimedicue. Afe izóí íemo táijidimedicue.

24 Afe oreca abi ímie cuena daide: “Pablo, jacínaiñeno iri. Romano jamánomo ocuídillaíma uícomo náidazaitioza. Ie jira o illa ícoinia nana no-caedo odo jáidinona Juziñamui túillinomona jillotaite.” Dinó Juziñamui oreca ie abi ímie cuena daide.

25 Ie jira abi ómói mameri. Juziñamui uaimo ñnoticueza. Ie oreca ie abi ímie cuena daina izóí bie cai duere zefuillafuemona ñue jino jáiticaíza. Afe bífuena ñue onódicue.

26 Mei íadi benómona daa monaillai cigi ídumo jairifo caína nétaite, —daide Pablo.

27 Mena semana cai jailla meífodo daa naio Adria monaillai cai illa llezica, riírede jairifo meine abido caína úioicaide. Iemo dáaferui illa llezica, marinéruai éniemo cai ánozillana comécido onódiaíoi.

28 Jira níe dinó afórede dainano facádiaíoi. Facádiaíoi mo treinta y seis metros afórede. Nane afe baimo dáanomo facádiaíoi. Ja veintisiete metros afórede.

29 Noficiaímo íaiói ñáijizaillana jacíruiillano moi dibécaemona cuatro diga noçae cuinara lloéloici monaillai anamo dotádiaíoi. Afe mei comeci jacíruióicana mona ñaílle úíñotiaíoi.

30 Afe llezica afecae marinéruai “Bie áillocaemona mai cai botalli” dani conimana daidíaíoi. Afe daí íaiói botácanamona emódomo bitaca dúecae ana jáinoimo agüñetiaíoi. Afe llezica jáímacina jífueacana daidíaíoi: “Bie dúecaedo áillocae ifo dibécaemo jáíe cuinara lloéloici dotaiticai,” daidíaíoi. Daí afe nocae ana agüñiada jífuercadiaíoi.

31 Mei jira Pablo llaiíziraini illáimamo naa ie llaiízirainiri lluno daide:

—Baimaci bie nocaemo fiébiñeno botáadi ómoimona buna jilloñeilleza, —daide.

32 Ie jira llaiíziraini dúecae agüina ñécigai jaitádiaíoi, afecae illemo baíllena.

33 Afe monáidemo Pablo íaióina daide:

—Maí omoi güiri. Ja mena semana güiñédiomoi; iníñediomoi.

34 Izire ómoína güitátaticue. Afe omoi güille jítárede ñue omoi jilloillena. Uafue ómoimona buna córobaiñeite. Daje izóí omoi abímona minícana due jiza baíñeite.

35 Daí dainano, Pablo daa pan llínuano nana comini eróicana Juziñamuina “Iere figura” daide. Daí ñiano afe pan ditade güite.

36 Afemona nana náreficaidiaíoi. Afe daje llezica jáíno güitíaíoi.

37 Afe áillocaemo doscientos setenta y seis dígamedicai.

38 Ja íaiói güácaga güille güilla meífodo, fiébide trigo illemo dotádiaíoi, afecae féecocaillena.

Afecae buíllafue

³⁹ Jae monáidemo, afe éniena onóñediaioi, mei íadi guamai diga ñue ítízuguaina ciódiaioi. Onóñegaza afénomo íaioi zíjizaillena maméritiaioi.

⁴⁰ Iemona afecae cuinaina lloéllóici igai jaitádiaioi. Afe lloéllóici monáillai anamo fiébricaide. Afecae datara jairábiai zuitádiaioi. Afe mei afecae uite iniroi ífófecaemo caífo jairífo mo jónetiaioi. Iemona afecae oni guamáemo áinozioicaide.

⁴¹ Mei íadi meña meine ábiedo totínuaímo dúcíaiaioi. Iemona afecae afénori ite guamáemo bíjide. Ífófecae afe guamáemo jamánomo riire bíjide. Mei íadi móifecae nai ñue fairídemo, monaillai bagua niné llazéraga.

⁴² Jira afécaemo ite llazíraini llavécamiái fáiacadiaioi, “Íihí bótaitaioi” dainano.

⁴³ Mei íadi afe llazíraini illaíma Julio Páblona jílloatacade. Mei jira íaioina fatátañede. Jiáifodo ocuide nana íiana onódino illedo íicana raire uícomo dúcillena.

⁴⁴ Jiáimaci íiana onóñedino afe nocáe lláicoizillabici emódodo jáitate. Daí nana oni fuédamo dúcíaiaioi. Afe daí ñue jíllodiaioi.

28*Pablo monaillai cigi idu Máltamo dúcinafue*

¹ Nana ari éniemo ñue jíllobicaídicaímo, afe monaillai cigi idu, comini cai llúamona Máltana mámecirenana onódicaí.

² Afedu nairai ñue caina llínotiaioi. Aillue irai bonódiaioi noci jáíñua rozírena jira. Aferai bónuana nana caina: “Mai omoi agázaíbi” daide.

³ Afe llezica Pablo záfegai llínota aféraímo jónoiaide. Aferai uzire cácanamona títade jaio jino billano Pablo onoi ainide.

⁴ Afedu nairai afe jaio ie ónoímo agúñana cióillano, conímamo llotíaioi: —Nibai baie íima come fáíredimie. Meiti monáillaimona ñue jillode íadi, Juzíñamui jaícina jóidífue nana comínimo onótaiacanamona íena raamo jíritate ie jíllóíñeillena, —daí daidíaioi.

⁵ Mei íadi Pablo afe jaio iraimo jaidínota dotade; íena ñue izóí nibáíñede.

⁶ Nirui íena fáitaite dainano áfemo nana ocuúridiaioi. Jiáifodo nino llezica íena ana dotada títaite daidíaioi. Mei íadi íena ja are úíñodiaioímo ñue izóí íena nibáíñede. Ie jira nano comécido íaioi daináuai jiáifodo meídotaioi. Iemona bie Pablo Juzíñamui izóidímie daidíaioi.

⁷ Afe áinori afedu illaíma Publio illánuaí ite. Dinomo daruíamani afe Publio caina ñue llínote. Cai jitaica raana ñue caímo fecade.

⁸ Aféruillaido afe Publio moo irárede. Bíirallumo diga irui bííírede, ie abi cuaríllari. Iemo jamánomo lluide. Afénomo Pablo íena uáiduaide. Dinomo Juzíñamuimo íena jicade. Daí ie jica mei Pablo onoi íemo bitade. Iemona afémie jíllobicaide.

⁹ Afena íaioi fidínamona nana afédumo ite iráredinuaí Páblomo atídiaioi. Iemona nana jíllozítiaioi.

¹⁰ Aferi ióbillano aillo ñúefuiai caímo nitádiaioi. Afe mei nane dánomo cai jáiacanaruimo, nana cai jitaica ráaniai caímo atídiaioi.

Pablo Rómamo dúcinafue

¹¹ Afe monaillai cigi ídumo dauíamani iticaí. Afe meífodo, jiáíe nocaena cióizaidicaí. Afecae nauí bie ídumo uáici zaille dino úíñote. Dinómoma afecae

jaíllado ruica jáidicai. Afecae Alejandría jófue mona bite. Afecae ifomo mena taino juzíñamui uíecona cuega. Afe íaillinoi mámece Castór Pólux. Afecae aféillinoína náamaredena mameide.

¹² Dínómona Siracusa ígobemo dúcidicai. Afégobemo daruíamani iticai.

¹³ Dínómona fueda áinodo Regio ígobemo jáidicai. Afe jáíruido jairifo mona átué dinena billamona Régiomona jáidicai. Ja ménaruí illamona Puteoli ígobemo dúcidicai.

¹⁴ Afénomo ite ámatiai cíozaidicai. Iaiói diga da semana cai íllena jicádiaíoi. Afe mei ja Rómamo jáidicai.

¹⁵ Jae Rómamo ite ámatiai cai billáfuena uícodo fidídiaíoi. Ie jira io anamo conímamo caimo dúcillena uícodo bitíaiói. Conímamo íaiói dúcinano “Foro de Apiona” mameide. Jáífodo daina, Apio iomo ite fecárraco. Jáino mámece “Tres Tabernas.” (Afe mámece dobáíñuano daina Daámani Dúcirachupi.) Afénuiamo Pablo éroicaillano Juzíñamuimo “Iere figura” daide. Iemona Pablo comeci caimare íficaide.

¹⁶ Ie mei Rómamo dúcidicaimo llazíraíni illaíma Julio ie uiga llavécano rairuídino illáimamo izájide. Mei íadi Pablo oni eneno dama íecomo uiga. Afénomo daa llazíraíma íena rairuide.

Pablo Rómamo Juzíñamui uai jino llote

¹⁷ Rómamo íaiói dúcinamona daruíamani íllamona Pablo Roma judíuai illaíni jírítade. Iaiói gairilla llezica Pablo íaíoína daide:

—Amatai, judíuaimo fiénidífue lloñédicue. Afe izói cai jaiáidígima fibíllafuena uáitaoíñedicue. Mei íadi Jerusalem romano comínimo llátano izájigacue.

¹⁸ Dínomo cuemo íaiói jicánua mei, cuena zuitáacadiaíoi cue íaiói titállifue íñena jira.

¹⁹ Mei íadi judíuai jáífodo cuena zuitátañediaíoi. Ie jira romano jamánomo ocuídillaíma cuemo jicánorena daidicue. Mei íadi afe llezica cue náiraimo cue jítállifuena íñede.

²⁰ Mei jira omoi diga cue úrillena jíríticue. Mei cai bie daje Israel náiraídicai. Daje cai Mesías billífue mo comécidicai; daje izói meine abido cai cáaillífue mo úíñoidicai. Afe cai úíñoigafue ícoíniadi birui benó llavécamie cue llavéinana ja cíódiomoíza.

²¹ Jira íena daidíaíoi:

—Jaca daabe o finócafuiái lluabe caimo dúciñede. Daje izói afénomona bite ámatiai judíuai o mámeceido fiénidífuiaina nítaíbiñediaíoi.

²² O comeci fácafuiaimo cacáreacadicai. Mei náganíaimo afe bie comue Jesumo jaináidinona onódicaíza uáitaoídiaíoi, —daí íena daidíaíoi.

²³ Ie jira meine íaiói cacáillirui mamédiaíoi. Afe maméinaruimo aillo náirai Pablo illácomo nane gairízaíbitiaíoi. Jítiramona ua nauízaidemo Pablo Juzíñamui illáimana illafue íaíoimo llote. Moisés ocuica uáillaído Pablo Jesús dibénemo íaíoína ínotaacade. Afe llezica Juzíñamui uai jino llóraíni cuega uáillaído Jesumo íaíoína ínotade.

²⁴ Dárie Pablo llogáfuemo ínuaidiaíoi, ie mei jáíimaci íñoiacañediaíoi.

²⁵ Mei íadi nana dáafuemo comécíñenamona raízítiaíoi. Como raíacadiaíomo Pablo íaíoína daide:

—Ñuera Joreño cai jaiáidígimacimo uai jino lloraíma Isaíado ñue úrite. Afémie daide:

²⁶ Baimácimo bifue llujáiri, daide:

Omoi uafue aféfuena cácaitiomoi íadi áfena ónoñeitiomoi.

Omoi uáfuena cioitiomoi íadi ñue fidiñeitiomoi.

²⁷ Mei bie comini comeci meine fiени riírenamona bie ñúefuena óiacañediaioi. Íaioi ifoci jáiainamona fiени cacádiaioi.

Íaioi uíjiaí nitáoidiaioi daní íaioi uído áfena íaioi cíoi dáii.

Daje izói íaioi jefodo cácañeillena jefo íbáidiaioi.

Afe izói comécido cacácañediaioi.

Daje izói meine cuemo bíacañediaioi, íaioi cue jíllotallena, —daí Isaiás daide.

²⁸ Bifue omoi onoiri: biruímona bie Juzíñamui lloga jílloilífue judíoñedimacimo llujáiga. Aféfuemo afémaci ñue cacáreitíaoi, —daide.

²⁹ Pablo daí dái namona, judíuai aillo conímamo úricana jáidiaioi.

³⁰ Aféno mo Pablo ie íbaca jofomo mena fimona fuitade. Nana íemo ráfuiái jícanuai bífiredinona ñue caimare llínoñefirede.

³¹ Aféruillaído Pablo Juzíñamui illáimana illafue jino uáfodo comínimo llote. Afefue ie jino lolle rairuide cómena íñede. Daje izói Ocuíraíma Jesucristodo díga irui llófuerite. Aféruillaído ie llófuerilla buna llótaiñoñede. Mai. Jae ñie.

ROMA COMINIMO SAN PABLO ORECABE La Carta del Apóstol San Pablo a los Romanos

Pablo Rómamo ite Jesumo ñnotinomo cuete

¹ Cue Páblodicue; Jesucristo ocuífirgamiedicue. Juzíñamui cuena uáiduano eneno cuena nizede ie jillona uai jino llóllena. Ua afémie orécacue; Juzíñamui mamécamedicue.

² Afe bie jíllonafue Juzíñamui jaiiai ninomo uícodo ñuera Cuegáuaimo, ie uai llórainido jino llotátate.

³ Afe jíllonafue cai Ocuíraima Jesucristodo úrite. Afémie Juzíñamui Jitó. Iemo jáií afémie cai come izóidimie. Afe Jesucristo jaiiai illaima David méifoidigimamona jocócamie.

⁴ Mei íadi Ñuera Joreño dibénemo afe Cristo uáfodo ríinorede Juzíñamui Jitona cíotaga, mei dama tíllanomona afémie meine cáatateza.

⁵ Juzíñamui Jesucristodo, ññefuena cuemo itátate. Aferi iere ióbidicue. Afefue cuemo illano, iere cuena canode, ie mámeçido oni jiáinomo ie orécamierna cue íllena. Bie cue ióbillafue ie mámeçido oni jiáinomo cue oréllena. Afe cue oréinamona naga náiraiaido aillo Jesumo ñnotinona iite. Daje izóí ie uaina jéruitinona iite.

⁶ Afémacimona Crístimo ñnotinona itíomoi. Ie jira Jesucristo íeiena omoi íllena, Juzíñamui eneno omoi nizede.

⁷ Mei jira nana ómoimo cueticue Roma jófuemo itínodiomoi. Juzíñamui izíruigamacidiomoi. Afémiemo omoi ñue jaináíllena eneno uáidogamacidiomoi. Iemo ite caimátaillafue, naa começi caimare uái illafue diga ómoimo fécaiteza. Nana bífuiai cai Moo Juzíñamui cai Ocuíraima Jesucristo diga, ómoimo mámeiteza.

Pablo Rómamo macáacade

⁸ Nana ómoiri fueñe Jesucristodo “Iere figura,” cai Juzíñamuina daiífiredicue. Ua daií daidicue mei nágagobiaido ómoimo ite ñuera ñnogafuedo úritiaioi.

⁹ Jaca nana cue coméçido Juzíñamuimo táijidicue, ie Jitó ñuera uai jino comínimo llóllena. Nane daje izóí Juzíñamuimo coméçido cue úriadi, ómoimo uibíoi-firedicue. Aferi Juzíñamui cue uai nabáidimie.

¹⁰ Bie icoi iruimo ómoimo cue jáíllena Juzíñamuimo jicá-firedicue. Ua Juzíñamui começi jitaia, nibai nibéfodo ñue cuena óreite, ómoimo cue mácajillena.

¹¹ Mei ómoína cíóacadicue, Crístimo omoi ñnogafuiai cue cánuamona, ñue riire jaícina omoi íllena.

¹² Ua bie ñnogafue cuemo íteza ja ómoimo ite. Afe Juzíñamuimo cai ñnogafuedo conímamo cai úrillamona, conímaiaina coméçina caimare náiretaicai.

¹³ Juzíñamuimo ñnote ámatiai, diga icaiño omoi diné cue jáiacanafue ómoína cue cíóíllena, ómoimo fidítaacadicue; mei íadi nai jaca jáinidicue. Omoi diné jáiacadicue ómoimona jiáimacina Jesumo jaináitallena. Ua jeede ria llízie jofu ua izóí, afe izóí Jesús uaimo ñnotinona itátaacadicue. Oni jiáigobiaimona dáarie cue itata izóí, daje izóí, ómoimona itátaacadicue.

14 Mei cue naga cómemo ñúefuena cue llóllena iere jitáirede. Ua iere baitádinomo llóredicue; daje izói abina onóñedinomo daa fiéño llóredicue.

15 Iemona afe izói cue dibénedo nana afe jilloilluiai ómoimo jino ñue lluábiacadicue, jica Rómamo itíomoi íadi.

Ñúefue riürede

16 Bie ñúefue uai jino cue llólleri méairuifeiticue, mei aféuaimo ite Juzíñamui ríino nana áfemo ínotino jilloillena. Nano fueñe judúuaina jillotaite, ie mei daje izói judúuainédinona jillotaite.

17 Bie jillonauai Juzíñamui anamo ñue jaícina cai íllena caina fidítate. Dama Jesumo cai ínogafuiaido Juzíñamui anamo ñue jaícina íticaí. (Abi diné jiáiena íñede.) Jaiái Cuegáuai daí daide: “Ínogafuedo Juzíñamui anamo ñue jaícina ítimie, ziiñona cáate.”

Nana énie nairai íaiói fiénidífuiaí ícoinia ite

18 Mei monámona bite Juzíñamui iere izire duere finuafue nana fiénidinomo, naa comécina jaícinaíñedinomo jaiái zúllana, ja birui fidídicaí. Dani íaioimo ite íaifuedo ua ráfueña ónuana rairuicaiaíoi. Daje izói afémaci jiáimacina ua ráfueña onóíllena jeruúdiaíoi.

19 Cai onoiaga Juzíñamui dibénemo itífuena daje izói ñue onódiaíoi; mei dama afémie íemo itífuena nana caimo cíotateza.

20 Juzíñamuimo ite ie cíóñena raa, ie finócafuiaido caimo ónorede. Jaca énie finuaruimona afémie nahí Juzíñamui nana uáfodo ónorede. Daje izói afémie jaca ríinoredeza uáfodo ónorede. Bífuiaina comini náfueñediaíoi; íemona dani íaíoi ícoinia daí ite.

21 Mei Juzíñamuina onódiaíoi íadi, íemo nitárede ñúefuina íemo nitáñediaíoi. Daje izói íena “Figora” daíífinidiaíoi. Mei jiáfodo ráííñede raamo comécidiaíoi. Íaíoi abina onótatañede comeci jíitfomo fiébicaiide.

22 “Nimáirainídicaí” daíífrediaíoi íadi, abina onóñedinona jáidiaíoi.

23 Ziiño Juzíñamuimo ite ebíredífuena ziiñoñede come jánaraina méidotiaíoi. Afe baímo figóñede jánaraina finódiaíoi. Féedinuiai jánaraina finódiaíoi. Jaizai jánaraina finódiaíoi. Táícaide rille jánaraina finoda jeire otíaíoi.

24 Ie jira Juzíñamui íaioimo ite fiení comeci óiacanafuemo íaioina zóofete. Daí afémaci dani jofo conímamo méaífuiaí finódiaíoi.

25 Juzíñamuimo ite ua ráfueña ínoñeno tánofuiaí jeire otíaíoi. Afe emódomo ie finoca raamo ñúefue nitádiaíoi, mei íadi fueñe afe finode Juzíñamuimo ñúefue nitáñediaíoi. Daje izói ie finoca raamo caimare ánozioidiaíoi, mei íadi nahí Juzíñamuimo cáimadoñediaíoi. Bie Juzíñamuina jaca ninomo cáimadoaredicaí. Daí íteza.

26 Mei jira Juzíñamui jiáie meáire comeci óiacanafuemo íaioina zóofete. Ringóniaí daa íaíoi ini diga íllana féitatiaíoi; féitano aillo méaífuiaí jiánori otímaci. Juzíñamui ringóniaí jóonia izói íacaño afe jóoniafueña uáitatiaíoi.

27 Daje izói íñiaí daa ringo diga ñue íllana féitatiaíoi. Féitano fiení ílláfuedo íaíoi abi bóobicaide, conímaiaímo fiení finóllena. Afe íñiaí conímamo méaífuiaí finódiaíoi, íemona dani afémaci abímona comuídífuerei duere zefuúdiaíoi. Bie izói Juzíñamui íaioina duere finótate, dani íaíoi comeci ífue jaícina jóíñena ícoinia.

28 Ja mei Juzíñamuina onóacañediaioi, jira íaioi comeci jaícina jóiñenafuemo Juzíñamui zóofegaiaioi, Juzíñamui rairuícafuiai finódimaci íaioi íllena.

29 Afémaci naga íaífuiaimo itíaiioi; comeci jaícinaíñenafuemo itíaiioi. Daje izói jiruirénafuemo itíaiioi; fiéni jítainafuiaimo itíaiioi; naga ráaniaina óiacanafuemo naa fiénidífuiai diga itíaiioi. Daje izói afémaci úradorifiredino; come titáfiredino. Fuiríllafuedo úritiaioi. Jífuemarifirediaioi; ñúeodo jáíñedino. Táinona conímamo fiéni úrifiredino.

30 Afémaci jáíama jánana fiéni úritiaioi. Juzíñamuina éoidiaioi. Daje izói ríimacimo náfueñediaioi. Táinofuiaimo comécidino. Daje izói fiéni abi íñotino. Fiénidífuiaimo comeci facada finófrediaioi. Íaioi úruiai móotiai ocuícafuena jeire onédiaioi.

31 Afémaci abina onóacañediaioi. Íaioi daina izói finófinidiaioi. Buna duéruíñediaioi. Caimare uáiduanu íba óñllena onóñediaioi. Daje izói afémaci jáímamo dúecaiñediaioi.

32 Juzíñamui ocuállana ñue onódiaioi, íadi óiacañediaioi. Afe nana bie fiénidífuiaimo itino jaca zííñona duere finólliaioiza, áfena jáí onódiaioi. Onódiaioi íadi aféfuiaina féitañeno nai uícadiaioi. Nane bie emódomo jáímaci afe fiénidífuiai finua llezica, íaioina: “Caimare bie izói cai illi,” daidíaioi.

2

Juzíñamui nahí uafue daina izói comínimo riire jicánote

1 Jáíama fiéni illafue riire o jicánollena íñede. Naga come “Cue nífuenidicue” daíñidiaioi. Nana omoi dáafuemo itíomoi. Mei jáímamo ite fiéni illafue riire o jicánua llezica, dama o abi duere finótaitio. Aféfuena riire jicánotio íadi, o jáí dáafuiaimo itio.

2 Mei jii, bífuiaimo itino Juzíñamui duere finótaja llezica, afémie nahí uafue daina izói riire jicánoteza, áfena onódicai.

3 Mei o, jáíama fiéni illafue riire o jicánua llezica, o jáí daje izói dáafuiaimo itio. Daí o illa llezica “Juzíñamui ie duere finóllifuemona níbai cuena jíllote,” ¿daidí? jílloteitio!

4 ¿Juzíñamui omo zííñona fuiñede dúecaillafuena jámairuitio, naa omo ie járitañenafue diga? Afe bie Juzíñamui omo dúecaillafuedo, afémie o comeci ífuena ñúefue dibénemo méidotacadeza, ¿afe jaca o comécimo úbicaiñedeza, ero ua?

5 Mei o, comécina iere ríiredioza. O comeci ífuena méidoacañedio. Iemona o duere finóllifuiaina aillo ofítaocaidio. Ua Juzíñamui cíocaizaibilliriuimo o jaícina jóoide duere finuafue jino omo llóite.

6 Aféruído naga come dani íaioi finócafuiiai izói, íaioimo íbátaite.

7 Aféruído ebíredífué jenódinomo, zííñona cáataitino íaioimo iite. Daje llezica, nana Juzíñamui íaioimo ñúefue nitállena jenódinomo, naa zííñona illa raa jenódino diga, Juzíñamui zííñona cáataitino íaioimo fécaite. Aféfuiaina jenódiaioi, mei nágarui féitañeno ñúefue dibénemo ífirediaioi.

8 Mei íadi aféruíllaido nana fiéni abi íñotinona, Juzíñamui duere fínoite. Daje izói nana ua ráfuenta jeire óiacañedinona Juzíñamui ie ríifuedo duere fínoite, fiénidífuiai jeire íaioi ua jira.

9 Nana fiéni mácafiredinomo aillo duere zefuillífué iite, naa jamánomo íaioi comeci zúunailífué diga. Nano fueñe daí judíuaimo iite; ie mei jáí daje izói judíuáíñedinomo cómuite.

10 Mei jiáfodo ñúefuiai finódinomo, Juziñamui íemo ite ebírenafue íaioimo iite, naa comeci caimare uái illafue diga. Daje llezica Juziñamui íaioimo ñúefue nítaite. Nano fueñe daíi judíuaimo iite, ie mei jái daje izóí judíuainédinomo cómuite.

11 Comínimona dámie jáie come baimo Juziñamui gáigamie iñede.

12 Nana fiñi itino Moisés ocuífafuena nai onóñena llezica, ico nine táinocaitiaioi, aféfuena nai onóñenano. Daje izóí nana jáie fiñi itino Moisés ocuífafuena onódiaioi íadi, afe daje bie ocuífafuedo riire jicánolliaioi.

13 Mei ocuífafuena táinona cacádino Juziñamui anamo ñue jaícina iñédiaioi, mei íadi ocuífafuena jeire otino Juziñamui anamo ñue jaícina itíaioi.

14 Dáarie ocuífafuena onóñede judíuainédino afe ocuilla daina izóí dani íaioi comécido jeire otíaioi. Iemona afémaci dani abi lletádinona itíaioi.

15 Mei jii, íaioi ñue mácafuedo íaioi comécimo cuica uai cúeinana ácatafirediaioi. Afe llezica íaioi comeci úrilla uai ñue íaioi uaina nabaide. Daje llezica íaioi ifoci úrillafue fiénidifue íaioi finóadi, áfena íaioimo llóite. Fiénidifue nai íaioi finóñenia,

16 Juziñamui comínimo riire jicánolliruimo íaioi ifoci úrillafue íaioina ráiruite. Aféruillaido naga comini báinino finoca raana Jesucrístodo Juziñamui riire jicánoite, cue lloga jilloilluiai daina izóí.

Judíuiai Moisés ocuífafuemo figo náfueñediaioi

17 Mei ja birui, “Judío ímedicue” daidío. O jilloillena, Moisés ocuífafuemo íinotio; o Juziñamui dibénemo fiñi abina íinotio.

18 Juziñamui comeci jitáinafue onódio; afe ocuífafue omo llote: “Nana o nícidogafuemo ñuera diga o nizeri”.

19 “Unidino izóidino ífóllena, ñue uáfueña onódicue,” daidío. “Daje izóí jítifodo macádinona ñue egáñollena onódicue,” daidío.

20 “Abina onóñedinona llófueredicue,” daidío. Daje izóí, “Urue izóidinona jaícina llófueredicue,” daidío. “Ua nahí ráfuena onótate uai afe cai ocuífafuemo ite,” daífiredio. Afe izóí, “Nana ífócido onóigafue caimo ite,” daidío.

21 Mei jáimana llófuetio íadi, ¿nibái mei dama o abina lletáñedio? Omoi meríríñeno iri daíicadio íadi, ¿nibái mei merírífiredio?

22 Omoi jiruíreñeno iri, dama daíicadio íadi, ¿nibái mei jiruíredio? Jánaraiaina éoidio íadi, ¿nibái mei íaioi illácomo ite ráifide ráaniai o mériano ráaredimiena jáidío?

23 Ocuilla uai dibéfodo iere abi íinotio; mei íadi Juziñamuina jámairuitio, afe daje ocuífafuena jeire o oñena ícoinia.

24 Meita Cuegáuai ñue daide: “Judíuainédino omoi ícoinia Juziñamuina fiñi úritiaioi.”

25 Moisés ocuífafue jeire o oíadi omoi finóñirena bacano icoi quétafue uáfueña omo ráifite. Mei íadi afe uai figo o ínoñeniadi, jaca quétañegamie izóí íitio.

26 Mei jiáfodo, daa bacano icoi quétañegamie ocuífafue daina izóí jeire oíadi, afémie bacano icoi quétacámie izóí facádoga, quétañega íadi.

27 Afe bacano icoi quétañegamie, mei íadi ocuífafue jeire otímie, ona riire jicánoite, bacano icoi quétacámiena o íadi, daje izóí cuega ocuífafue omo ite íadi, mei áfena jeire oñédiaioi.

28 Judíona jáillena dama jinófenemo cóide ráaiñede. Daje izóí bacano icoi quétacámiena jáillena fia abimo cóide ráaiñede.

²⁹ Mei íadi nahí ráfuiái jíáifodo jóide. Nahí jáidimie ie comécimo áfena jaide. Daje izói nahí bacano ícoi quétafue comécimo dúide. Cuega ocuilla uaimo jaináñede; mei íadi come joréñodo ie comécimo ite. Bie izói ítímie comínimona jíeruiñegaza, mei íadi Juzíñamui jíeruiga.

3

¹ Judío ímiena cue íllemona ¿mínica mei baimo óitícue? ¿Bacan quétafue mei nibénemo ráifide?

² Judío ímiena cue íllamona áilofuiái ícoínia ñue ítícue. Daje izói quétafuemo aillo ráifinafue ite. Nano fueñe Juzíñamui ie comeci úrilla uai Judíuaimo orede.

³ Íaioimona dáarie íaioi ínogafuena féitátiaioi. Féitátiaioi íadi, Juzíñamui lloga uai jáanonide, mei afe Juzíñamui jaca féitafinidímie.

⁴ Ie íaioi féitaja íena nie izói nibáñede. Mei jíáifodo íteza: nana comíni taino llófredino ille llezica, Juzíñamui nana ie jetáacagafuena nai uáfueña jaícina flóde. Daí Cuegáuai úrite:

O daina uáillaimona jaícinaidímiena o íllana ónoítiaioi.

Riire o jicánua mei, comíni ñue ínogamíena ítío.

⁵ Mei caimo ite fiénidífuedo Juzíñamui jaícinaidímie ílláfueña jino uáfomo cíotaiadi ¿nie izói dáitícaí? ¿Mei Juzíñamui cai duere finóllena jaícinaíñedímie? (Jamai come úrilla izói úritícue.)

⁶ Mei íeñedeza. Mei Juzíñamui comécina jaícina íñeniadi, ¿nie izói nana énie comíni riire jicánoite? Afémie jaca ninomo comécina jaícina jóidimienamona, nana náiraina riire jicánorede.

⁷ Mei cue táinofuiáido Juzíñamui uafue nai jamánomo cue ebíruiadi, ¿nibái mei fiénidímiedícue izói Juzíñamui riire cuemo jicánote?

⁸ Bie uáfueña, ñúefue bíllena nibái mei fiénidífueña finóñedicaí. Afe bie izóidífue llófuiana dáarie caimo jíadáiaioi. Bífue caimo jíadáino comeci fiéni jítainafuedo úritiaioi. Bie izói ítino duere finólliaioi.

Nana caimo ite fiénidífue ícoínia

⁹ ¿Mei níifue? ¿Cai bie judíuai jíáie comíni baimo ñuera? Mei ua íeñede. Ja como fidítaticai judíuai naa jíáie comíni díga riirede fiénidífue anamo itíaioi.

¹⁰ Jáiaí Cuegáuai daí daide:

Buna jaca íaífuenidímiena íñede.

Jaca ninó daa ñúemíena íñede.

¹¹ Daje izói jaca ninó ñúefueña onócadímiena íñede.

Daje izói Juzíñamui daa jenódimíena íñede, ie díga íllena.

¹² Nana Juzíñamuimona onido jáidiaioi.

Afémaci daní fiénidímacina jáidiaioi. Buna ninó ñúefue finóñena.

Jaca ninó daa íñede.

¹³ Íaioi úriragoi íbaiñega raírafo izoide, mei íere íáire úritiaioiza.

Íaioi fuedo jífuemarífirediaioi.

Íaioi fuemo ite úrilla jaio aífoi izoide, mei jíáima jánana íere fiéni úritiaioiza.

¹⁴ Afémaci daa faidórafuiáido úritiaioi, naa íáirede uáilláido.

¹⁵ Come titállena jarire áizicaidiaioi.

¹⁶ Íaioi fiéni ílláfuedo aillo jíáimaci táinocaitadiaioi.

Daje izói comínina zúunaitadiaioi.

¹⁷ Afémaci comeci caimare uái illáfuenta onóñediaioi.

¹⁸ Daje izói afémaci Juzíñamui ñue jacírenafuemo due jiza comeci facáñediaioi,
—daí jaiái Cuegáuái daide.

¹⁹ Nana jaiái ocuícáfue daina uaina, afe ocuícáfue anamo itínomo dúide. Bífuenta ñue onódicaiza. Daí Juzíñamui mamérite, nana comíni úrillana llícaitallena; daje izói naga nairái Juzíñamui riire jicánollifue anamo íaioi itábicaillena.

²⁰ Ocuica uai jeire cai úado, buna Juzíñamui anamo ñue jaícina íñeite. Ocuícáfue caina jíllotañeite; daa caimo ite fiénidifuiaina caina onótate.

Jíllollifue cai ñnogafuedo comuide

²¹ Mei birui, jácara ocuícáfue oni eneno fíano, Juzíñamui anamo ñue jaícina cai íllena afémie cómofuena caimo onótate. Bie cómofuena uai lloraini cuegánico facadoiadi ónorede. Daje izói ocuilla uai cúeinanicomona jíái ónorede.

²² Juzíñamui anamo ñue jaícina cai íllifue bífuedo ite. Dama Jesucrístomo cai ñnuado bie izói íticaí. Nana ie uaimo ñnotinona afémie daje izói fñoite; dáamie jíáimie baimo gáñeno nana dájerize jaícina jóneite.

²³ Mei naga come fiénidifuiarede; jíllotaite Juzíñamuimona nana jica itíaiói.

²⁴ Mei íadi Juzíñamui caimo dúecaillanona, ía íbatañeno ie anamo ñue jaícina caina itátate. Mei dama ie jíto Jesucrístodo caina jíllotate.

²⁵ Cai finoca fiénidifue íbana Juzíñamui Jesucrístoto tíllamo dane ote. Iemona íaifuenta dogá izói íticaí. Bie múiñuafue cai ñnogafuedo caimo dúciite. Bífue daí íficaide Juzíñamuina jaícinaidimie daíllena. Mei jaiái finoca fiénidifuiái íbana raire otátañede; afémie comécina járidoñedimie.

²⁶ Daje izói daí íficaide birui Juzíñamui jaícinaidimie daíllena. Nana Jesumo ñnotinona Juzíñamui nai birui afémie anamo ñue jaícina itátate. Iemona Juzíñamui nai jaícinaidimiena íoicaite.

²⁷ Ie mei ¿come abí ñnuafue mei nie izói ite? Afe abí ñnuafue oni eneno fiébicaite. Ocuícáfuiái jeire íaioi úado nai fiéni abí ñnuafuemo itíaiói. Mei íadi Jesucrístomo ñnogafuemo fiéni abí ñnollifuenta íñede.

²⁸ Nana cai llogáfuiaimona bífue jino llúana ñue baite. Dama Jesumo ñnotimie Juzíñamui anamo ñue jaícina írena. Ocuica uaiílaí afémie jeire ua oni jíáífodo joidé. Afena Juzíñamui náfueñede, dama íemo ñnuana náfueite.

²⁹ ¿Meita Juzíñamui dama júduái íena? Ieñede. Daje izói afe Juzíñamui júduáiñedino ie.

³⁰ Mei jí Juzíñamui damade. Afémie baimo jíáiena íñede. Afémie nana íemo ñnotinona ie anamo ñue jaícina itátate. Afémaci bacano ícoi íaioi quétajana náfueñede. Daje izói quétañenana náfueñede.

³¹ Ie mei níbai dámie jícanoite. ¿Meita cai ñnogafuedo ocuilla uaina uáitaiticaí? Ieñedeza; úaitañeíticaí. Mei jíáífodo Jesuna cai ñnuado afe ocuilla uaina uáfuenta jíeruiticaí.

4

Abraham Juzíñamuimo ñnua izói cai ñnollena cai onótate

1 Mei áfemona cai jaíaidigíma Abraham dibénemo jiáfue jicánoiticaí. ¿Afe Abraham mei nie ñúefue ote? Daina uai jeire ie ófírenamona abí dine nífuena oñede.

2 Mei Abraham ie finócafuiaido Juzíñamui anamo ñue jaícina ie itábicaiaí, afémie abí ñnorede. Mei íadí Juzíñamui uícori afémie abí ñnonide. Ie finócafuiaido Juzíñamui anamo ñue jaícina itátañega.

3 Mei jiáfodo Cuegáuai daina izóí, “Abraham Juzíñamuimo ñnote.” Iemona Juzíñamuimo ie ñnuado Juzíñamui íena “Íaifuenidimiedio” daide.

4 Da come táijiadi, afe táijina iba fia íemo dúecaillano íñega; afe táijitatimie íena ibárede. Mei íadí cai jíllloillifue cai táijicanado iba llínua izóí llínonide.

5 Mei jiáfodo, dámie jíllona táijina finóñeno, ie jíllloillena dama Juzíñamuimo ñnorede; mei Juzíñamui íemo ñnote íaifuiairedimiena llínofíredeza. Mei íemo Juzíñamuimo ie ñnuado, Juzíñamui íena: “Íaifuenidimiedio,” dáite.

6 Dama David come cáimafuiaido úrite. Dámie ie uícodó finócafuiaina Juzíñamui náfuñede. Ua náfuñede, mei íadí íemo ie ñnuado Juzíñamui íaifuiainide dainámiena afe ñnotimie jaide. Afe daiítadimie iere caimare ite.

7 David daináuai daide:

Íaioimo ite fiénidifuiaina Juzíñamui dogánona iere ióbidiaioi.

Daje izóí íaifuiaina oni féitagamiái iere ióbidiaioi.

8 Daje izóí íaioimo ite fiénidifuenta náfuñegano iere caimare itíaiioi.

9 ¿Meita bie cáimafuiái dama bacano icói quetaca judíuaimo duide? Ieñedeza; nana comíni íena mameide. Jira bacano icói quétañega judíuainñedimacimo daje izóí afe cámafue íaioimo duide. Jae llotícueza Abraham Juzíñamuimo ñnuado Juzíñamui íena: “Íaifuiainidimiedio,” daide.

10 Mei íadí çñíruído daí íena daina? ¿Bacano icói quetaa mei daí daina? ¿Ñibai quétañenia daí daina? Jii, uáfueza, nai quétañena llezica daí íena daina.

11 Afe: “Íaifuenidimiedio,” daina méifodo, Abraham bacano icói quétafuena Juzíñamui ocuide. Bie quétañafue onóillena jóonega raa izoide, Juzíñamui ja bímie ie ñnuafuedo íaifuenidimie daiíllena. Daí Abraham nai quétañena llezica Juzíñamuimo ie ñnuamona, nana judíuainñede ñnotino moona jaide. Iemona Juzíñamui daje izóí nana afémacina: “Íaifuenidimioi,” daide.

12 Uáfueza. Abraham nana afémie dama ie ñnua izóí ñnote quétacano moo. Mei nanoide cai moo Abraham ie bacano icói nai quétañega ía, ñue Juzíñamuimo ñnoteza.

Juzíñamui jica ía raíre llogáuai comíni ñnuamona ñue ícoimo fuitaca

13 Mei jii, Juzíñamui Abrahamana ñuera jica ía raíre fidítuauí daide. Aféuai lloté: “O nana o erófene igímaiaíri nana éniéna máíñoitíomoi.” Abraham Juzíñamuimo jaiaí uícodó ñnua jira, Juzíñamui búai íemo lloté. Fia ocuilla uai íe jeire úado Juzíñamui daí íena daiíñede. Ua, dama Juzíñamuimo íe ñnuado Juzíñamui íena: “Íaifuenidimiedio,” daide.

14 Mei dani ocuilla uai jeire otino ñúefuena íaioi maíñóadi, íemona ñnogafue comínimo figo jínoñede. Daje llezica Juzíñamui jica ía raíre llogáuai ráifinano niné feide. Mei íadí daiítañedeza jiáfodo joide. Juzíñamuimo cai ñnuafuedo íe caimo lloga ñúefuena maíñoredicaí.

15 Ocuilla uai llóina meifodo aféuai jeire oñédino duere finótalliaioi. Mei íadi ocuilla uai nai lloñena lezica, aféuai náfuenide.

16 Afe Juzíñamui Abrahamo jica ia raire llogáuai, Juzíñamui ñue riire mamede, nana ie erófene igímaiaí afe ñúefue jeire íaioi óllena. Mei jira, afe Juzíñamui lloga ñúefue, fia fecaca raa izóí comini Juzíñamuimo ínuado íaioimo írede, mei áfena íaioi ñéfina cigimona óndiaioiza. Bifue daíacade, Juzíñamui uícodo raire llogáuai daa ocuilla uai jeire otino íeñedeza, mei íadi nana Abraham ínuua izóí ínotino ie.

17 Iemona Abraham Juzíñamui eróicana nana cai moona jaide. Abraham afe Juzíñamuimo ñue ínote. Jaiaí Cuegáuaido Juzíñamui Abrahamana daíí daíde: “Aillo náiraiaí moona ona jóneticue.” Afémie daíí daíírede, mei Juzíñamui tíidinona meine abido caátaitaredeza. Daje izóí íñede ráaniaina Juzíñamui itátarede.

18 Aféfuiaimo Abraham fáicanocaiñeno ínoide. Ua comini daína izóí Abraham jamánomo jónaiteza, ja úruenide. Abraham daíí úruereillinona úíñonina lezica nai Juzíñamuimo ínuano úíñoide. Afe daíí Juzíñamui íena daína izóí, Abraham “aillo náiraiaí moona” jaide. Juzíñamui bie izóí íena daíde: “O uícoide erófene igímaiaí aillo jébutiaioi,” daíde.

19 Abraham cien fimónamo ánozide íadi, ie ínogafue jaca féíñede. Afémie jónailla izóí ie ai jónaillana onode. Ua afengo iere jónaillamona tíiacade. Jae úruena comúitanide.

20 Mei íadi afe lezica Abraham jizíñeno Juzíñamuimo ínofírede. Juzíñamui jica ia raire llogáuaina ruífruiñeno nai íemo ínoicaide. Mei jíáfodo Abraham áfena féitañeno iere izire ínote. Jaca comeci rairuíñeno Juzíñamuimo úrioicaide. Juzíñamuimo íóbioicana úrite.

21 Afémie daíde:

—Nana jaiaí Juzíñamui jica ia raire cuemo lloga rafue Juzíñamui uáfuenta cuemo zúitaite, —d-aide.

22 Iemona, íemo ie ínuado Juzíñamui íena daíde: “Íaífuenidímiedio,” daíde.

23 Bie Juzíñamui Abrahamana daína “Cuemo o ínuado jae íaífuenidímiedio” daa Abrahamo cúeñegaza,

24 mei íadi nana caimo cuega cai ínollena. Mei jira tíillanomona cai Ocuíraíma Jesús cáatate Juzíñamuimo biruí ínoticaí. Iemo cai ínuado caina: “Íaífuenidínodiomoí,” daíite.

25 Afe Jesús caimo ite fiénidífue ícoínia duere finótagamiena jaide. Afe mei Juzíñamui anamo ñue jaícina nífuenino cai íllena afémie cáataga.

5

Juzíñamui “Nífuenidímiedio” daína méifomo ñue cai íllífue

1 Mei afe jira, dácaíño Juzíñamui anamo ñue jaícina nífuenino cai illa mei, meine abido Juzíñamuina jáciruíñeíticaí. Afe comeci caimare uái íllafue cai Ocuíraíma Jesucristo ie tíllado cáiena ote.

2 Mei jíí, cai ínuado bie afémie cai cánuafue dibénemo jónegacaí. Aferi izire jaínáídicaí. Iemona íóbífiredicaí, mei Juzíñamuimo ite ebíredemona cáiena oni máíñoíticaíza. Afemo ocuítiticaí.

³ Daa bie cai ocuírillamo íobíñeíticai, mei daje izói duere cai zefuállifue mo íobíticai. Mei onódicaíza duere cai zefuállifue cai comeci járitañenafue caímo comuide.

⁴ Iemo afe comeci fígomie dáinana caína jáitate. Iemo fígomie dáinana mei Juzíñamui cámafue mo úíñoifreíticai.

⁵ Iemo bie úíñoíñafue caína zúucaitañeíte, mei Juzíñamui caína ie izíruillafue ñue caímo llóteza. Bie caína ie izíruillafueña ie orecá Ñuera Joréñodo onódicai.

⁶ Dani cai ñéfina cígimona jíllonidicai. Daíí cai illa llezica, Juzíñamui jica ia mamécaruimo, Jesucristo nana fiénidino ifomo tíizaíbite.

⁷ Biniemo comécina jaícina jóidimie tílla ifomo tíitimiena íñede. Mei níbai jamánomo fígomie ifomo, daa tíirede.

⁸ Mei jíáfodo cai fiene illa llezica, Cristo cai ifomo cai jíllóillena tíizaíbite. Afedo Juzíñamui caína ie izíruillafue caímo cíotote.

⁹ Iemona ja birui Cristo tíillamona Juzíñamui anamo ñue jaícina itícaíza, ie jira líraíruimo ite duere fínuañemona, Cristo cai rairuállado, jamánomo oni eneno íredicai.

¹⁰ Nai afémie bacáuai imácina cai illa llezica, ie Jitó cai ícoínia tíide. Daíí ie tíillamona, Moo Juzíñamui comécina jácíruitañegacai. Ja birui cai comeci íena jacíruiñenamona, birui ie cáanado jamánomo ñue jílloredicai. (Ua caade Cristo Juzíñamui uícómo caído úrite. Afe daíí ie úrioinado, íco bite duere cai finóllifueñemona jíllóiticaí).

¹¹ Daa bífueñedeza, nane bie emódomo cai Ocuíraíma Jesucristodo Juzíñamuimo íobíoticaí, mei afe Crístodo Juzíñamuina cai jacíruiñenafueña otícaíza.

Nanoide Adán caímo comútagafueñemona Juzíñamui caína éoícaide; mei jíáfodo Cristo caímo comútagafuedo Juzíñamui caímare caído eróícaide

¹² Mei onóigaza, dáamíemona fiénidifue nana comínido jaide. Ie mei afe fiénidifueñemona tíillafue daje izói naga cómemo comuide, mei naga come fiénidifuiaredeza.

¹³ Moisés ocuilla uai nai íñena llezica, fiénidifue jaca comínido ite. Mei íadi ocuilla uai nai íñena llezica, afe fiénidifue comínimo nítañega.

¹⁴ Mei íadi jaiái Adán illágimamona Moisés illágimamo fiénidifuiái finódino tícozifrediaíoi, mei titade ríino anamo itíaióiza. Juzíñamui jónega íaiói comeci ñue úrilla uaimo náfueñediaíoi. Daíí náfueñenamona íaiói fiénidifue comuide. Mei jíáfodo Adán fiénidifue Juzíñamui uáfodo lloga rairuica uai jeire ie onéñamona comuide. Mei íadi bie Moisés uícodo itino fiénidifue jíainodo comuide. Adán finoca fiénidifue izói comuíñede. Afe Adán uire bíite Cristo jana.

¹⁵ Adán náfueñegafue Juzíñamui caímo fia iga cámafue izóíñede. Mei dama Adán náfueñegafuedo nana comíni tímáritiaíoi. Mei íadi Juzíñamui raiñóñeno caímo fecaca jíllonafue jamánomo baímo ñuera. Dama Jesucristodo aillo comíni canócaiaíoi.

¹⁶ Dáamiede finoca fiénidifue jaca Juzíñamui caímo fecaca jíllonafue izóíñede. Mei afe daade Adán náfueñegafueñemona cai duere finóbillifue zúide, mei jíáfodo Juzíñamuimona caímo lloga jíllonafuedo, Juzíñamui raiñóñeno aillo comínina ie dibénemo ñue jaícina itábicaítate, aillo íaiói náfueñegafuiái íaióimo ite íadi.

17 Mei jii, daa come ná fueñenamona titáfirede riino anamo nana comini are ninomo itiaioi. Mei jiáifodo dáamiede Jesucristodo nana Juziñamui anamo raiñóñeno ñue jaícina jóonegano, jamánomo baímo ñuera ziiñona íaioi ille riino óitiaioi.

18 Mei daíi Adana ná fueñegafuemona duere finóbillafue nana comínimo comuide. Daje izói Jesucristo ní fuenide comécimona tízaibillafuemona, duere finóbiñenafue nana comínimo zuide. Daje llezica ziiñona cai illifue caímo comuide.

19 Bie daide: dáamiede jeire óñegafuemona nana comini fiénidifuiare dinona jáidiaioi. Mei íadi dáamiede Jesucristo jeire ogáfuemona aillo comini Juziñamui anamo ní fuenidinona ñue jóonegaiáioi.

20 Mei jaíai Juziñamui cai ocuilla uai caímo lloga, caímo ite fiénidifue jino uáfodo cai onóillena. Ua, ocuilla uai llua mei caímo ite fiénidifuiái aillo jebuide. Mei íadi daje llezica Juziñamui caímo dúecaillafuiái daje izói afe fiénidifuiái baímo aillo jamánomo jebuide.

21 Iemona, fiénidifue caímo íllamona afe riírede fiénidifue caina titárede. Daje izói Juziñamui caímo izire dúecaillano, Juziñamui anamo ní fuenino ñue jaícina cai illa llezica, cai Ocuíraima Jesucristodo, afémie caina ziiñona cáataredé.

6

Comini fiénidifuiáimo íllamona tíidino izóidiaioi, mei íadi daje llezica afémaci Crístomo ínuamona cáadiaioi

1 Nana bie caímo llógamona ¿nie izói dáiticaí? ¿Mei níbai fiénidifue finócana uiticaí, Juziñamui jamánomo caímo íe dúecaillafue caímo ácatallena?

2 ¡Mei íeñedeza! Cai bie ja fiénidifue díbénemo tíidinodicaíza ¿mei nie izói, fiénidifue mo naí íoicaiticaí?

3 ¿Naí bífuena onóñediómoí? Nana cai íe báutizaillarui mona Jesucrístomo uáfue na jainaina llezica, dáaruido afe Cristo tílla díbénemo jaináitagacai.

4 Mei jii, cai báutizaillarui mona Cristo díga dáafomo raigacai izóidicai. Iemona aféruimo tíidinona maméidicai. Ua tíidinona mamécacai, áfemona Cristo íe tíillanomona meíne abído cáadimíena jaílla izói, bíruí cáadena cai jáíllena. Daíí cai jaíllano cómofue mo íocairedicai. Mei jii, Cristo íe Moomo íte jamánomo ñuera riínodo meíne cáadimíena jáitaga, íemo daje izói afe daje riínodo cómofue mo íocairedicai.

5 Uáfue na dáitícué, Cristo tílla izói tíidinona jae mamécacai. Iemona daje izói íe meíne abído cáadimíena jaílla izói, daní cai tíillanomona meíne cáataga izói cómofuiáimo íredicai.

6 Cristo cruzmo coraíca llezica nauí fueñe cai íllafue dáanomó titácaza onódicai. Uafue, afefue tíitaca, nanómóna cai comécimo íte fiéní gáinano caina anáfenoñeíllena. Iemona fiénidifue díbénemo rairuícanona íñeíticai. Daje izói riíre tájítatímíemo jainaina izói, fiénidifue mo jáinaiñeíticai.

7 Mei jii, Cristo díga tíidímíe ja íaífuemona oní jírecaide.

8 Iemona dácaíño Cristo tílla izói dáanomó afémíe díga, cai comeci fiéní óíacanafue tíide izói féitaga. Nauí daíí íe díga cai tíillamona, daje izói bíruíllaído afémíe díga cai íllana ua onódicai.

9 Mei onódicaiza, Cristo dácaíño tíllanomona meine abido cáadimiena jaide. Daí meine jaillano ja meine abido dánomo tíñeite. Afémie ja ménacaiño tíñide.

10 Mei Cristo ie tíllaruimo, fiénidifue dibénedo dácaíño tíide, jaca ninomo nane tíñeillena. Mei íadi afémie meine cáadena jaillano ie cáanano Juzíñamuimo duide.

11 Daje izói, mai fiénidifue dibénemo tíidino izói omoi iri. Mei jíáfodo Juzíñamui íena cáadinona mai omoi iri. Afemo izire comécimo mai omoi facáoiri, mei cai Ocuíraima Jesucrístomo dájena jaináidiomoiza.

12 Ie jira fiénidifueña omoi abina náamatatañeno iri; afefue omoi zlíñona íñena abi ana úillemona abí omoi rairuiri. Mei Taife comuítaga caimo ite íaífue cai abi fiéni jítainafue jíno déillena ocuíoideza. Afemona izire abi omoi rairuiri.

13 Dani omoi abina fiénidifueña finótañeno iri. Mei jíáfodo dani omoi abina Juzíñamuimo omoi jainátari; ua, tíllanomona meine cáadena jaide izóidino afémiemo omoi abi jainátari. Ie jira nana omoi abina Juzíñamui ñúefue finóllena, omoi jainátari.

14 Ja benómoma fiénidifue ómoína ana úíñeite. Mei ocuilla uai anamo ja íñedicaiza; mei jíáfodo Juzíñamui cairi dúecaillafuemo itícaiza.

Comini jacire riire rairuillaruimona daa ráfueña caína onótate

15 Ie mei ¿nie izói itícaí? Mei ocuilla uai anamo íñedicaiza mei jíáfodo Juzíñamui cairi dúecaillafuemo itícaiza; íemona ¿meita fiénidifue finóredicaí? Ieñedeza, finónidicaí.

16 Ñue onódiomoiza, ómoimona nágamíai riire ocuídillaímamo fecaca llezica, aféllaíma ocuillana ñue jeire óredíomoi. Daje llezica aféllaímamo izire jaináidiomoi. Bie izói caimo ite fiénidifuiái, jacire ocuídillaíma ana uilla izói, nana caína ana uite. Afemona tíllafue naga cómemo comuide. Mei íadi Jesumo cai ínua llezica jíaie cai ocuídillaíma Juzíñamuimo dúídicaí, comécina jácina ñue jóidímacina nágarui cai íllena.

17 Mei íadi ómoiri Juzíñamuina: “Iere figura,” daídícue. Mei nauí fiénidífuemo izire rairuícana omoi illa llezica, ómoímo lloga llófueinafueña ja ñue jeire otíomoiiza.

18 Afe fiénidífuemona oni omoi jírecailla mei, jíaie ocuíraíma Juzíñamui rairuícana jáidiomoi. Iemona comécina jáicina ñue jóidínona nágarui íredíomoi.

19 (Ua omoi onoíga comini ráfuiáido úritícue, mei omoi ifoci déíñenamona bífuiána ñue cacánidi omoi.) Nauí fiéni illáfuiáimo omoi abina jainátífredíomoi. Nane afe baimo jíaie jamánomo fiéni abi fínuamo abina finótadiomoi. Nauí daí abina omoi finota izói, mai birui comeci jáicínainafuemo abí omoi jainátari, dama Juzíñamui íena oni eneno ñue mamécánoma omoi íllena.

20 Nai fiénidífuíaimo riire rairuícana omoi illa llezica, comeci jáicina jóinafuemo jaináíñediomoi.

21 Nauí omoi illáfuiáina birui meáiruitíomoi. Mei aféfuíaimona ¿nie cánuafuiái otíomoi? Oñédiomoiza; tíllafue diné jaca ómoína uite.

22 Mei íadi fiénidífuemona oni eneno omoi jírecaillamona, ja birui Juzíñamui rairuícánodiomoi. Iemona birui afémiemo ñue jaináidiomoi. Bie izói omoi íllamona, Juzíñamui íbana ñue caímare ómoína cánoite. Ua afémie

íeiena ómoína oni eneno ñue ñinoite. Iemona afe ícoimo ziiñona illáfueña óitiomoi.

²³ Fieni cai íllamona daa tíllafue óiticaí. Mei íadi Juzíñamui raiñóñeno fia caimo iga raa, cai ziiñona illífue. Bie ziiñona cai illífue dama cai Ocuíraíma Jesucrístomo dájena cai jaináinamona caimo iga.

7

Fima áireinamona ringo iníreinamona daa ráfueña cai onótate

¹ Amatiai, onódiomoi za, da come dama nai ie tíñeniadi, ocuilla uai nai íemo dúide.

² Ja omoi onóigafue jino llóiticue, áfede jíáífueña omoi onóillena. Da inírede ringo, ie ini caana llezica, ocuilla uaido ie inimo cuinaca izói jainaide. Mei ie ini tilla mei, afe íemo jainátate ocuilla uáimona afengo jae oni jírecaide.

³ Afe llezica afengo jíáie ímamo inírena ñuera. Afengo daí iníreilla jíruíreñede. Mei íadi ie ini nai ítemo afengo jíáie iima díga illa afengo iere jíruírede.

⁴ Cue ámatiai, biruí Jesucrísto abímo dájena jaináidicaí; ua iníredingo inimo jainaina izói jaináidiomoi. Afe Crístomo omoi jaináinamona, ie tíllado tíidinona mamécaomoi. Ie jira ocuilla uai dibénemo tíidino izói iticaí. Fueñe bie ocuilla uaimo, ringo inimo jainailla izói, jaináidicaí. Mei íadi ja biruí tíidino izói cai íllamona afe ocuilla uaimo jaináíñedicaí. Dama tíllanomona meine abído cáadimiena jaide Crístomo jaináidicaí za. Afe bie Crístomo cai jaináinana Juzíñamui caimo comúitate. Ua comúitate caído ie comeci jíitáinfue ñue ícoimo cai fuitállena.

⁵ Mei nanómona comíni comécimo itífue dibénemo cai ífrena llezica, afe ocuilla uai cai abímo ite fieni óiacanafuina cazítate. Aféfuíai caina ana tíllinomo uite.

⁶ Mei íadi ja biruí afe ocuilla uai dibénemo tíidino izóidicaí. Fueñ afe ocuilla uai anamo riire iticaí, mei íadi ja biruí afe uáimona ñue oni jírecaidicaí, Ñuera Joreño cómuena méidoga caimo itífuedo Juzíñamui ocuícamacina cai íllena. Jaiái cuega ocuilla uaido Juzíñamui ocuícamacina ínidicaí.

Cuomo ite íaífue cue caimare illafue llóitaidote

⁷ Iemona ¿mei nie izói dáiticaí? ¿Ocuilla uaina fiénidífue daíredicaí? ¿Daínidicaí! Mei íadi afe ocuilla uaido fiénidífueña onótágacue. Afe uai nai jino lloñena llezica fiénidífueña onóñedicue. Ja omoi onóigafue jino llóiticue, áfede jíáífueña omoi onóillena. Ocuilla uai nai cuena dáíñeniadi, aino come raana óiacanana onóñedicue. Mei íadi afe daí llua mei fieni óiacanana onódicue.

⁸ Afena cue onónamona, bie ocuilla uai llúado, cue comécimo ite naga fieni jíitainana uáfodo cazítaga. Mei ocuilla uai nai cuemo lloñena llezica, fiénidífue tíide izói uái illano figo onóñedicue.

⁹ Nauídíruimo, ocuilla uai cúemona nai oni eneno illa llezica, cue comeci úrilla caimare ite. Mei íadi ocuilla uai ja lluaíbillado fiénidífue meine abído comuide. Afefue meine comuíllamona fállena cue orede.

¹⁰ Dinómona bie izói cuemo zúide. Daje cuena ñue ziiñona illífuemo úrede uailai, ñue illífuemo cuena uíñede. Mei jíáífodo cue dibénemo, cuena ana tíllanomo uite.

11 Mei jii, fueñe fiénidifue cuemo iñede daidicue. Mei íadi ocuilla uaina cue fídiamona, cuemo ite fiénidifuiaina onódicue. Afe ícoinia Juzíñamui fáiacagamiena iticue.

12 Afemona onoiga, afe ocuilla uai iere ñuera. Daje izói lletara uai jamánomo ñuera. Afe uai ñue jaícina jóidiuai.

13 ¿Meita bie ñuera ocuilla uai cuena ana tíllinomo úirede? Ñue onóigaza, úinide. Mei jíáfodo cuemo ite fiénidifuedo ana tíllinomo uigacue. Afemona uáfueña cíotagaza, bie fiénidifue ua nahí fiénideza. Afe cuena ana uillafue ñúefuedo finoca. Daíí Juzíñamui ocuilla uai, nana fiénidifuiái jamánomo íaire nana caina onótate.

14 Afe ocuilla uai Juzíñamui Ñuera Joreño como dúidifue. Afena onódicaiza. Mei jíáfodo nanómoma cue comécimo itifue Ñuera Joreño como dúíñede. Mei izire rairuícamié izói íaifue finuanamo fecácamié izóidicue.

15 Birui cuemo ífícaidifueña onóñedicue. Ñue cue comeci jítainafueña finóñedicue, mei íadi cue comeci éoillafueña áfena finófiredicue.

16 Mei cue comeci jítaiñenafue cue finóadi, afe cue finócafue fiéninana onódicue, mei Juzíñamui Ocuilla uai cuena áfemona rairuúdeza. Iemona afe bie ocuilla uaina nahí ñuera daidicue.

17 Mei daíí áfena dama finóñedicue, mei jíáfodo cuemo ite íaifue aféfuemona comuide.

18 Mei onódicueza, dama cuemo ñúefueña iñede. Bíedo daííacadicue, nanómoma cuemo itifue ñúeñede. Mei jii, cue comeci ñúefue finóacade, mei íadi áfena jaca finónidicue.

19 Cue jitaiga ñúefueña finóñedicue; mei íadi cue jítaiñega fiénidifuiaina finócadicue.

20 Iemona cue finóacañega fiénidifue cue finóadi, dama cúeñedeza, cuemo ite fiénidifuemona comuide.

21 Daíí jaca bie izói cuemo íoicaide: mei ñúefue cue finóacania, áfena baiñeno dama cuemo ite íaifuiái báifiredicue.

22 Mei jíáfodo cue comécido Juzíñamui ocuilla uaina gáidicue.

23 Mei íadi afe llezica cue comécimo ite jíaie niné cue úiacade uaina comécido onódicue. Afe uai cue ífoci úrilla ñúefueña niné féitaoide. Afe bie fiéni cue rairuíoide uai cue abimo ite. Afe uai cuena llavéioide.

24 ¡Nai iere íobíñedimiedicue! Bie ana tíllamo cue uite abímona, ¿bu oni cue jírecaitalle?

25 Dama Juzíñamui ie Jitó cai Ocuíraíma Jesucristodo bífuemona cuena oni jírecaitarede. Iemona, ja birui Juzíñamuina “Iere figura” daidicue. Iemo cue illafue bie izói ite: Juzíñamui ocuilla uai anamo cue itábicaillena dama Juzíñamui jóonega cue comeci ñue úrillado finóredicue. Mei íadi dama cue abi díbenedo nanomo cuemo itífuedo llavéicaigacue. Dinómoma fiénidifue cuemo íoicaide. Iocaiillamona fiénidifuiaina jaca finóicaidicue.

8

Juzíñamui Ñuera Joreño úicaigamié illafue bie izoide

1 Mei ja benómoma, nana Jesucristomo dájena jaináidinomo duere finótaitiúi jaca iñede. Afémaci Juzíñamui Ñuera Joreño ríinodo afe Joreño illa izói ífirediaíoi. Dáanomo afémaci nanómoma comécimo itífuiái izói comécíñediaíoi. Daje izói nánorafuiaina náfuéñediaíoi.

2 Juzíñamui Ñuera Joreño cai rairuilla uai, dájena Jesucristomo cai jaináinamona, caina ñue cáataite. Afe llezica caina rairuide Ñuera Joreño uai, afe nanómona cue rairuilla fiénide uáimona cuena oni jirecaitate. Afemona fiénidifue ana tíllinomo cuena úiñeite.

3 Moisés ocuica uáimona finónidifueña, Juzíñamui daade ie Jitó ana óriano áfena finode. Afe caimo ite fiénidifuemona oni cai jirecaillafue Moisés ocuilla uáimona finónide, mei nanómona cai comécimo fiénidifuiái illado, afe uai réinonideza. Iemona afe uai figo jinoñede. Ie jira Juzíñamui cai oni jirecaitalena, daade ie Jitó jamai cómena bie éniemo jéicitade. Afe mei, cai fiénidifuiái ícoina cai ifomo Juzíñamui ie Jitó fatátate. Bie izói daina daiíacade, bíniemo ite fiénidifuiáiredino comínina íaioi illa izói, afe izói Juzíñamui ie Jitó ana bíniemo orede. Afe bie izoide ória mei, afémie abi, cáie izói eroide, mei íadi afémie íaifuenide. Afe izói ie íllamona afémie bíniemo ua nífuenidimiena jáicaillado nana caimo ite fiénidifuiáina anáfenode.

4 Mei ocuica uai jeire cai óllena, afémie nana bie izói finódeza, mei ja nano cai comécimo comuífuiáimo comécíñedicaíza. Afena ja náfueñedicaí. Mei jáífodo Juzíñamui Ñuera Joreño ífuiáimo comécíoidicaí; aféfuáina ñue náfueticaí.

5 Nano comécimo fiéni comuífuiáimo comécíidino, daa bie cai abi ífuiáimo izire comécido lícioidiaíoi. Mei jáífodo Ñuera Joreño ífuiáimo comécíidino afe Ñuera Joreño daináuaimo izire comeci fáioidiaíoi.

6 Da bie cai abi ífuiáimo comeci izire cai lícioia, ana tíllinomo caina uite. Mei jáífodo Ñuera Joreño daináuaimo izire comeci cai fáioia, zíñona illífueño caina uite. Iemo daje izói caina caimare uái illínomo uite.

7 Daje bie cai abi ífuiáimo izire comeci lícioidino, Juzíñamui uáitatímacina jáidiaíoi, mei afémaci, nana comíni Juzíñamui ocuilla uaina gáíñediaíoi. Afémaci áfena gáíñenamona afe uai anamo índiaíoi.

8 Ie jira nano cai comécimo comuífuiáimo jaináidino Juzíñamuina íóbitaniaíoi.

9 Mei íadi Juzíñamui Ñuera Joreño ja ómoimo íllamona, comécimo fiéni itífuiáimo, cuinaca izói, izire jaináíñediomoi. Mei jáífodo Ñuera Joreño dájena iere jaináídiomoi. Cristo Ñuera Joreño ina íñédime Cristo íeñede.

10 Cristo ómoimo íllamona ómoimo ite joreño caade. Ua, Juzíñamui anamo ñue jaícina itábicaillamona omoi joreño cazítaga izoide. Mei íadi afe llezica caimo ite fiénidifue cai abina ana tíllinomo uite.

11 Mei jáífodo Jesucristo tíllanomona Juzíñamui Ñuera Joreño do meine abído cáadimiena jáitaga. Iemo afe Cristo cáadena jáitate Juzíñamui omoi tíñirena abina nane meine cáadena jáitaite. Ua ómoimo ite Juzíñamui Ñuera Joreño do Juzíñamui cáadena jáitagamacina ómoína fínoite.

12 Amatíai, mei daí cai comécimo fiéni ífiredífuiáimo comécíñellena, izire ocuicanodicaí.

13 Da bie omoi abi ífuiáimo omoi comécíioiadi, tíllinomo ana ómoína uite. Bie cai comécimo itífue jaca fiénidifueña caina finótate. Mei íadi afe ómoína finótate fiénidifue Ñuera Joreño do omoi anáfenoiadi jaca ninomo cáaitiomoi.

14 Nana Juzíñamui Ñuera Joreño ífócamaci, Juzíñamui úruiaí.

15 Mei jii, ómoimo iga Ñuera Joreño, jacire ráiruite joreñoñede. Daje izói ómoimo ite Ñuera Joreño ómoína meine jacíruitañede. Mei íadi afe ómoimo

iga Ñuera Joreño Juzíñamui jítótaiina ómoina mamede. Afe Joreño Juzíñamuina “Cue Móodio” caina daiítate.

16 Da bie Ñuera Joreño caimo ite joreño diga, dájena nabáizaibite “Juzíñamui jítódicai” caina daiíllena.

17 Afe daií ie jítótaiina cai íllamona, Juzíñamui raire uícodo caimo lloga feci raa izoide cáimafue maiñóredicai. Afe cáimafue dama Cristo ie, mei afémie Juzíñamui nahí Jitoza. Mei íadi ja birui áfena daane afémieoiri maiñóredicai. Afe Cristo duere zefuilla izóí, daane birui duere cai zefuíadi, Juzíñamui caina cíoite. Iemona Juzíñamui ebíredifueña íemo nitalle izóí, afe izóí caimo nítaite.

18 Iemona ja biruíllaido duere cai zefuilla figo ráañenamo comeci facádicue. Afefue ráañenari íobidicue. Ua afe aillónedeza áfena lloñédicue: mei afe uire caimo cómuite ñue ebíredifue jamánomoideza. Afe ebíredifue duere zefuíllafue baimo jamánomoideza, afe duere zefuíllafueña úibiñoñeiticai.

19 Nana Juzíñamui finoca cómena maméñedinuiai, Juzíñamui jítótiai meine cáadino jaillano jino cíotallirumo iere izire úíñoidiaíoi.

20 Ua comínimo ite fiénidifue ícoinia, nana afe Juzíñamui comúitaganuiai zuure fiállifueño mamécaiaíoi. Dani íaíoi jítainamona aféfuemo mámeñegaiaíoi. Mei íadi Juzíñamui daií íaíoiina mamede; afe ie comeci jítaina ízoi mamécaiaíoi.

21 Mei afémie nana ie finócanona riire ocucafueña oni jirénoiacade. Daje izóí ie finócanona niné táinocaitifueña oni jirénoiacade. Afe íaíoi jirénollifueño Juzíñamui ñue coméciide. Daií íaíoi oni jirecaitaite, Juzíñamui jítótiaíoiri ebire jaícina joide cáimafueña íaíoi maiñórilla.

22 Onódicaiza, jaiái fiénidifue bíniemo táinéinanomona, nana Juzíñamui finoca cáadinuiai abi izírenari murífirediaíoi. Ua jaiáimona nai biruímo, ringo úrue jocóacana llezica izínailla izóí, nana ie comínina mámeñega comúitaganuiai izi cáadiaíoi.

23 Daa afémaci izi cácañenaza; daje izóí cai izi cácaillano, afe caina jaícina ñúeitalliruido izire ocuítiticaí, Juzíñamui Ñuera Joreño caimo ite íadi. Juzíñamui ícoi aillo caimo fecalle caimátaillifueñaímona, bie Ñuera Joreño fueñe raire uícodo caimo iga. Mei íadi nai bíniemo iere zuure murífiredicai; mei Juzíñamui jítótiai maméidicai íadi, móonidiza jaíie come íena náamataja izóí, cai ie náamatallirumo ocuítiticaíza. Aféruimo nana fiénidifueñaímona, naa jaíie cai rairuíoide íaífuiaíri, Juzíñamui cai abina oni jirecaitaite.

24 Afe bie cai jíllollifueño úíñoidicai. Jesucristo daií caimo llogáuaimo afe jeire cai úamona, áfemo úíñoidicai. Afemo daií izire cai úíñoinado jíllotagacai. Cai úíñoga raana cai cíonamona, jae áfemo úíñoñeiticai, mei jae íteza.

25 Mei jaíáfodo cai cíóñena raamo cai úíñoiaídi, ja áfemo raire járitaño úíñoedicaí. Iemona Juzíñamui Ñuera Joreño, Juzíñamui jítótaiina cai maméinamo uaina nabaíde.

26 Daje izóí Juzíñamui Ñuera Joreño mei ñifue Juzíñamuimona cai jícállena ñue caina cánuaíbite. Juzíñamuimona jaícina ie jitailla izóí cai jícajana onóñedicaí. Mei daií cai illa llezica, Ñuera Joreño come uaido jino llónide murilla uaido Juzíñamuimo caido izire jícade.

27 Juzíñamui naga come comeci ífueña ñue onóíllena izire jícanofredimie. Afemona Ñuera Joreño caido daiíacanana Juzíñamui ñue onode, mei Ñuera Joreño, Juzíñamuimo jaináidinodo Juzíñamui comeci jitailla izóí izire íaíoiimo jícadeza.

Nana zuure íaifuiamona caifófeficairedicai

28 Onódicaiza, Juzíñamui nana cómemo ífcaitifuiaina ñue jaícina mamede, nana íena izíruitino ñue íllena. Ua Juzíñamui comeci jítaina izóí, ie jíirigano ñue íaíoi íllena, Juzíñamui illa dígamemo cómuitifuiaina ñue jaícina zúitafrede.

29 Mei Juzíñamui nana ie uícodo onóigano nanómona mamede, ie Jitó illa izóí íaíoi íllena. Bie izóí íaíoi íllamona Juzíñamui Jitó ámatiaina itíai. Afemona aillo ite ámatiaí cígimona Jesucristo dama námiena jaide, Juzíñamui jaiái uícodo mámia izóí.

30 Nana daíí ie mamécanona, daje izóí íaíoiina jírite. Nana ie jíiriganona, daje izóí ie anamo ñue jaícina itábicaítate. Daje izóí, nana daíí ie anamo ñue jaícina itábicaítaganomo Crístomo nitaca ebíredifuena afe izóí íaíoiimo nitade.

31 ¿Bífuena nie izóí dáiticaí? Juzíñamui cai díbénemo íadí, ¿mei bu caina anáfenolle? ¡Cai anáfenoitena íñede!

32 Juzíñamui dama ie daade nahí Jitona cámona rairuínede. Mei jíáfodo nana ñue cai jíilloíllena, ie daade Jitó titállena jeruíñeno fecade. Iemona onódicaiza, nana jíaíe cai jíitaille ríiduana naa ie Jitóoi rí nágarui caimo fecáfireite.

33 Juzíñamui nizécamacimo, ¿bu fiénidifuena nitárena? Afe izóí nítaitimie íñede, mei afémaci nífuenidínona Juzíñamui jae jino uáfodo llóga.

34 Afe Juzíñamui nizécanona, ¿mei bu duere finótarena? Íaíoiina duere finótaitimie jae íñede, mei Jesucristo íaíoi ícoínia tízaíbiteza. Afe baimo Jesucristo tíllanomona meine abido cáadimiena jaíllano, Juzíñamui nabézimo ránazaide, dínomona Juzíñamuimona cai ie canóllifuena izire jíállena.

35 Cristo cai ie izíruíllana, ¿bu mei féitarena? ¿Meita duere cai zefuíadí, Cristo caina izíruíllana féitaite? Féitanide. ¿Meita llotáiredífuíai caina ie izíruíllana féitaite? Féitanide. ¿Meita fiení caina finócadino caina ie izíruíllana féitaite? Féitanide. ¿Meita júbietaillafue caina ie izíruíllana féitaite? Féitanide. ¿Meita ínícuiroinafue caina ie izíruíllana féitaite? Féitanide. ¿Meita jíacífuíai caina ie izíruíllana féitaite? Féitanide. ¿Meita tízaillafue caina ie izíruíllana féitaite? Féitanide.

36 Juzíñamui Cuega Uai bie izóí dáideza:

Nágaruillai o ícoínia tíllanomo ánozitagacai, mei íadí tííñedicaí.

Daje llezica caina titalle ovéjaíai izóí maméíai.

37 Mei íadí nana bie zúuredífuíamona, caina izíruitimie Jesucrístodo, caifófeficaídino baimo ñue jino jáidicaí.

38 Iemona ñue onódicueza, Juzíñamui cai ie izíruíllana ráiruitena íñede. Naga raamo cai jíriadí Juzíñamui féitañeno caina izíruíoiide. Cai tíllífue Juzíñamui caina izíruíllana cámona feitañeite. Daje izóí bíniemo cai cáanafue caina ie izíruíllana cámona rairuínide. Daje izóí Juzíñamui abí imací caina ie izíruíllana cámona rairuínide. Daje izóí fiení ríñorede jóriai caina ie izíruíllana cámona rairuínide. Daje izóí biruido comuídífuíai caina ie izíruíllana cámona rairuínide. Daje izóí uire cómuitífuíai caina ie izíruíllana cámona rairuínide.

39 Daje izóí Juzíñamui abí imácimona rííllaini caina ie izíruíllana cámona rairuínide. Daje izóí Taífemo jáináidino rííllaini caina ie izíruíllana cámona rairuínide. Ua nana Juzíñamui finócanuíamona buna Crístodo caimo jino cíotaga izíruíllana cámona rairuínide.

9

Juzíñamui jaiiai úcodo Israel nairai nizede

¹ Ja birui jáiífue ómoimo llóiticue. Crístomo cue jaináinamona táinona llóñeiticue. Daje izói Juzíñamui Ñuera Joreño nabáioicaigacueza cue comeci urilla uai ñue jino deide. Afedo bie cue lllifue nahí ua ráfueza, onódicue.

² Be ñie: nana cue nairai comíniri iere zúuruiticue. Afémaci Crístomo ñnoñenamona zúufueri comécina cuidíridicue.

³ Iemo mei cue dáinamona nibai afémacina jillotarenadi, Juzíñamuina, “Mai fiene cue faido,” nibai raire dáititue. Mei íadi cue daína izói Juzíñamui cue faidódena, cue nairai imácina cánoñeite.

⁴ Afémaci jaiiai Juzíñamui nizécamié Israel, méifomo comuícana jáidino. Daje izói afémacina Juzíñamui daide:

—Bimaci cue nairai, —daide. Afe mei íaioi cigimo ie íllado íemo ite áillue ebírede riino Juzíñamui íaioimo jino ciótate. Daje izói íaioina ie ñuera finóllifuiai Juzíñamui íaioimo llote. Iemo Juzíñamui Moisédo ocuica uaina llogáiaioi. Daje izói Juzíñamuina nahí caimátaitajana onótagaiaioi. Daje izói Juzíñamui lloga caimare íaioi ílluai íaioimo íteza.

⁵ Bimaci mámecina jica jalleide judíuai jaiáidigimamona comuíttagano. Iirainomo íaioi náiraímona Cristo cómena jócuai biga. Bífuiamona Juzíñamui naga ráfuiái jamánomo ocuállana onódicai. Iemona nana náiraíamona illa dígamíai Juzíñamuina jica ninomo fáicanocaiñoño íobitarediaioi. Mai daí íteza.

⁶ Díga ñúefuiái cue náiraímo duide; mei íadi Crístona náfueñediaioi. ¿Mei níbai? ¿Níbai Juzíñamui úcodo lloga Israelna ñuera daínauai figo déizaibiñede? Daí daíñedicueza. Jáiífodo jóide. Nana Israel náiraína maméidinomona dáarie Juzíñamui nízeñegano.

⁷ Daje izói Abraham méifomo comuídino dáarie ie nahí úruiañediaioi. Jaiiai úcodo Juzíñamui Abrahana daide:

—Dama Isáacimona cómutino o uáfueña méifomo comuídinona jaille, —daide.

⁸ Bie uai jáiífueña cai onótateza: Dámie ñuera náiraímo jócuado, dama áfedo “Juzíñamui jítódicue” daíñide. Mei jáiífodo Juzíñamui úcodo daína uai fúitamona jocócano, dama afémaci ie uáfueña méifomo comuídinona mameína.

⁹ Juzíñamui Abrahana úcodo daína uai be ñie: “Úire afe nauí cue mamécaruimo meine bíititue; íemo o ai Sara jító jócoite,” daide.

¹⁰ Iemo nai jáiífueña ite. Rebeca jító íaillinoi dáamiena móorediaillinoi. Íaillinoi moo cai jaiáidigima Isaac. Afe jító íaillinoi guarázaiillinoi.

¹¹⁻¹² Mei íadi íaillinoi nai jocóñeniadi, afe ménaiillinoi nai níffuenina illa llezica, Juzíñamui Rebécana daide: “O jító nánoramie ie méifoide ama anamo jabóidimiena íte.” Juzíñamui daí daide, bífueña cai onóillena: Afe íaillinoimona dáamiena Juzíñamui nizéllena dama Juzíñamui comeci jítaina izói mamede. Afe Juzíñamui íaillinoimona dáamie níziafue íaillinoi finócafueña comuífede. Dama Juzíñamui mámiamona íaillinoimona dáamie nizécamiéna jaide.

¹³ Juzíñamui Cuegáuái bie izói daide: “Jacob cue nizécamié, íemona cue izíruigamie, mei íadi Esaú cue ruíffruigamie.”

14 Iemona dáarie nibai dáitiaioi: “Juzíñamui daií dáamiena fia ruifruillano jiáimie nizada máifua jaícina jóifñede.” Mei íadi bie comini daináuai uáfueñede; jaícina jóifñedifuenta Juzíñamuimo jaca ifñede.

15 Mei Juzíñamui Moisená ja dáideza: “Daa cómemo cue dúecaianadi, afémiemo dúecaiticue. Daje izói daa cómena duéruillano riire ibana cue óiacañeniadi, íemo ibana óñeiticue.”

16 Bie Juzíñamui daína uáimona onódicaiza: Juzíñamui dáamie eneno nízia afe come óiacanamona daingo comuíñede. Daje izói afe come riire finuamona Juzíñamui níziafue comuíñede. Juzíñamui afémie nízia dama cómemo Juzíñamui dúecaianamona comuide. Daje izói afe ímana ie canócanamona comuide.

17 Mei jii, Juzíñamui ie Cuegáuaido, Egipto illáimana daide: “Ja illáimana o jóneticue, cuemo ite áillue riino jiáimacimo odo jino cíotallena. Afe llezica iere duere o cue finólledo cue mámece naga náiraiáido jica jalléitaitio,” daide.

18 Ie jira onódicaiza: Juzíñamui dama ie óiacana izói, daa cómemo dúecaiticue; íemo Juzíñamui dama ie óiacana izói jiáie come comécina riireitaite.

19 Bifuiáimona daa come nibai cuena jicánoite: “Mei Juzíñamui afe ie óiacana izói finófiredeza, jiáfodo ínidicai. Iemona ¿nibái mei fiénidifue ícoina caimo nitáfrega? ¿Bu mei Juzíñamui óiacanafuena uáitarena?”

20 ¡Ací! ¡Daií dainámie cacai! ¿O iere ua ímiedicue daidio, Juzíñamuimo riire júfidollena? Mei nana Juzíñamui comuitagacaiza bie jiáifuemo coméciri. ¿Mei nibai nogo, afe nogo niráingona dáite: “¿Nibái mei cuena bie izói nitio? ¡Daiíñeite!

21 Nogo niraingo daingo ie comeci óiacana izói afe nogórina nírede. Afe daje nógorafella átuedo daa ebire eroide íciruna nírede, íemo daje nógorafella enéfenemona jamai nogócirina nírede.

22 Iemona daje izói Juzíñamui finócafuiái ñúeraza, onódicai. Afémiemo ínoñedinona Juzíñamui duere finótaacade, íemo ite fiénidifuenta gáíñenana jino ácatallena. Afe llezica íemo ite aillo ñuera riino jino comínimo onótaiacade. Mei íadi afémaci fiene illafue ibana raire otáañede. Ie ícrafue anamo itínomo, Juzíñamui raire comeci járitañede. Iaiomimo dúide niné táinocaitallifuenta nai are ocuíñede.

23-24 Daje izói Juzíñamuimo ite jamánomo ñuera ebíredinona comínimo jino onótaiacade. Iemona Juzíñamui dáarie judíuai, daje izói dáarie judíoñedinona nizada íaiomimo dúecaide. Dúecaillano íaioi fiene illafue ibana oñeno íaioi jillotade. Afe ie dúecaillado nizécanodicaí. Afémie jaiaí uícodo, íemo ite ebíredifuemona afe cáiena oni cai maiñóllena caina mamede. Daií finuamona, íemo ite jamánomo ñuera ebíredifuiái Juzíñamui caimo jino fidítate.

25 Jaiaí Juzíñamui uai jino llóraima Oseas cuegánicomo Juzíñamui bie izói daide:

Cuemo jaináifñede comínina “Cúeiena” náamataiticue.

Daje izói nauí cue izíruifñega náiraina “Cue izíruigamacina” mámeiticue.

26 Daje izói batí jiáie éniemo itínona Juzíñamui daína “Cue comínifñediomi,” afénomo itínona “Cáataite Juzíñamui jítótiana mamélliaoi,” —daií Oseas daide.

27-28 Mei íadi Israel nairai dibénemo Isaiás daide: “Israel comini iere aillo jebuídiaoí, ua monáillai fuédamo ite facádonide guamájaí izói, jamánomo áillomaci. Mei aillo jebuídiaoí íadi, afe náiraímo Juzíñamui raire duere finótalle

mei, daa dúemacina fiébitiaioi. Dani afe dúemaci jilloitiaioi. Mei jii, Juziñamui ie daina uai izói náiraina duere zefuüllifue jino zuítaite.”

²⁹ Dáamie Isaiás afe duere zefuüllifue úfcodo llote:

Mei jamánomo ríinorede Juziñamui, caina due méifomo cómuitinona níiriñeniadi, Sodoma íemo Gomorra diga jofue nairai niné táinocailla izói niné táinocaiticai, —daide.

Jesucristo cai jllotalle ñúefue daje izói Israel comínimo dúide

³⁰ Cai lloga uallai bie izói daiíacade. Be ñie: Judíoñedino Juziñamui anamo ñue jaícina íaioi illínona figo jenóñediaioi, mei íadi Juziñamuimo íaioi íinuamona, Juziñamui anamo ñue jaícina itátagaiaioi.

³¹ Mei jáífodo afe Israel nairai, (judíuaina maméidino) Juziñamui anamo ñue jaícina íaioi itátaite ocuilla uállaina jenódiaioi, mei íadi afe uállaina ñue ícoimo figo dúcitañediaioi.

³² ¿Nibái mei afeno baiñediaioi? Mei Juziñamuimo ínuado íaioi comeci ñue jaícina jóillifuenta jenóñediaioiza. Dani íaioi nícidogafuiaimo comécidiaioi. “Nibai aféfuaido Juziñamui anamo ñue jaícina íiticaí,” daidiaioi. Ie jira Juziñamui oreca jllotaitimíemo, ñie Jesumo, uéco riire finódiaioi; ínuano Juziñamui anamo ñue jaícina íñediaioi. Come iodo jáiadí éicitaila izói, Jesumo éicitaidiaioi. Afémie iomo éicitaitate nofici izóidimie mei afémie ñúemie, mei íadi ruífirugamie.

³³ Juziñamui Cuegáuai afémie dibénedo bie izói úrite:

Omoí cácarei, judíuai iomo éicitaitate nofici izóidimiena jóoneticue.

Afemo comini éicitailano oni nibéfodo báitiaioi.

Mei íadi nana íemo ínotino íena méairuñeitiaioi.

10

¹ Cue ámatiai, nane ómoína dáititue: Cue nairai israelitas imaci jilloillena, nana cue comécido izire óiacaditue; íemo áfena Juziñamuimo jicáfireditue.

² Bie ñúefue afémacimo nitáreditue: Juziñamui comeci jítainafuemo nágarui iere járidofrediaioi. Mei íadi áfena ñue jaícina íaioi fidíñenamona daí táinomo járidotiaioi.

³ Comini Juziñamui anamo ñue jaícina ie itátallifuenta, íaioi ífócimo ñue denóñede. Mei jáífodo Juziñamui anamo itábicaíñeno dani íaioi mameca comeci ñue jaícina jóitaitifuemo járidotiaioi. Ie jira Juziñamui lloga ñue jaícina itátaitifuenta maiñóñediaioi.

⁴ Mei jii, Cristo billano nana íemo ínotino Juziñamui anamo ñue jaícina itátagaiaioi. Ie jira comini Juziñamui eróicana ñue íaioi íllena, Moisés ocuica uaimo dani íaioi níciduafuenta Cristo jae féitate.

⁵ Ocuica uai jeire úado Juziñamui anamo ñue jaícina cai illifue dibénemo Moisés bíena daide: “Nana ocuica uallai dáamie ñue ícoimo fuitáadi, áfede afémie are íite.” Mei íadi afe uállaina ñue jeire otímiena íñede.

⁶ Mei jáífodo, Jesumo cai ínogafuedo Juziñamui anamo ñue jaícina cai illífuenta Juziñamui Cuegáuai bie izói daide: “O comeci anado bífuenta daí jicánoñeno iri: ¿Bu mei caifo monamo jaille, Cristo ana cai jllotataíbillena?”

⁷ Daje izói bie jáífue daiñeno iri: ¿Bu mei ana tíidino illánomo jaille, afénomona Cristo caina caifo jllotataíbillena?”

⁸ Juziñamui Cuegáuai bie izói daide. Be ñie: “Aci, Juziñamui jíllootaja uaina ja cacádiomoi. Ie llógamo ja coméidiomoi.” Bie uailai ómoimo cai lloga omoi ñinollifue. Be ñie:

⁹ O fúedo jino comínimo “Jesús cue nahí Ocuíraima,” o daiíadi, nane daje llezica afémie tíllanomona meine abido cáadimiena Juziñamui jáitagamiemo o comécido o ñinoiadi, ua jílloitio.

¹⁰ Mei Juziñamui anamo ñue jaícina cai itábicaillena, afémiemo comécido ñinoredicai; ie mei Jesucristomo nahí cai jaínáinafuenta, cai fúedo jino comínimo llóredicai, áfedo ñue cai jílloillena.

¹¹ Juziñamui Cuegáuai daide: “Nana íemo ñinotino íena meáiruiñeite.”

¹² Jesucristo nana náiraimo daje uaido úrite. Judíoñedinona énenoruiñeno daje uaido íaioimo úrite, naa judíuai diga. Nana nairai Ocuíraima daade Jesucristo; nana afémiemo jicádinomo afémie jaca dúecaifirede. Ja ie jira íemo ite jamánomo ñúefuaimona íaioimo fecáfirede.

¹³ Mei Juziñamui Cuegáuai daií dáideza: “Nana cai Ocuíraima Jesucristomo jícaitino jílloitiaioi.”

¹⁴ Mei íadi Crístomo nai íaioi ñinoñeniadi, ua afémiemo jicánidiaioi. Daje izói afe jíllole uai nai íaioi ñue cácañeniadi áfemona nai ñnonidiaioi. Iemo afe uai jino llóraima nai íñeniadi, afe uaina ua cacánidiaioi.

¹⁵ Afe izói, uai jino llóraimana nai íaioi ocuñeniadi, afe ñúefue uaina ua jino llónide. Jira Juziñamui Cuegáuai bie izói llote: “Núefue llúaíibitimie billa iere ñuera.”

¹⁶ Mei íadi nana cue nairai imaci, Cristo daína ñúefuena jeire oñédiaioi. Jaiai uai llóraima Isaías dama bie izói daide: “Ocuíraima, cai llúaíibigafuena jaca buna ñinoñena!” daide.

¹⁷ Aféfuaimona bie izói onódicai: ñúefue fidínamona comini ñinotinona jáidiaioi. Iemo dáamie Cristo daína uai jino llúaíibillamona, comini afe ñúefuena fidídiaioi.

¹⁸ Mei íadi jicánoticue: ¿Mei nibai nana judíuai afe ñúefuena fidíñediaioi? ¡Ieñede! Ja fidídiaioi. Juziñamui Cuegáuai daje izói llote:

Afue llóraini úrilla uai nana énie náiraiáido cácacaide.

Íaioi daínauailai nana énie fuédamo jica itínuaímo ñue jalleide, daide.

¹⁹ Dánomo nane jáífuenta jicánoticue: ¿Mei nibai afe cacánafue Israel comini ífócimo nai figo déíne? Dáamie Moisés, Juziñamui dibénedo fueñe uai ote. Moisedo Juziñamui daide:

Ua comíñedimacimona ómoína úradoitaiticue.

Daje izói abina onóñede nairai ícoínia ómoína ícírítaiticue, daide.

²⁰ Afe mei Isaías jacíruiñeno Juziñamui daínafue llote. Be ñie:

Cuena jenóñedino ja cuena baitíaioi.

Cuena jicánoñedinomo dama cue abina ja onótaticue, daide.

²¹ Israel nairai dibénemo Juziñamui daínauai Isaías llote. Be ñie: “Nágaruillaído cue uaina náfuecañedinona uáidotícue. Mei íadi fairíoñediaioi. Daje izói cuena uáitaoidinona uáidotícue, mei íadi náfueñediaioi,” daide.

¹ Iemona nane jicánoticue: ¿Ja nibai Juzíñamui ie nizeca Israel náiraina ruifiruiaga? ¡Jaca íeñede! Mei cue dama Israel nairai ímiedicue. Daje izóí Abraham iziedicue. Iemo Benjamín comínimona comuídicue.

² Jaiái ninomo uícomo íeiena onoíga Israel comínina birui ruifiruiñeite. Uáfueza, uai llóraíma Elías daina uaina onódiomoi. Aféuai Juzíñamui Cuegánicomo ite. Juzíñamuimo Elías jícaja llezica, Israel nairai fiendi finócafuiai íaíoimo riire jítade. Daide:

³ “Cue Ocuíraíma, o uai jino llórainina fatíaiói. Daje llezica o íóbitalle illánuiaina niné táinocaitatíaiói. Afemona dama cue fiébilla. Iemo daje izóí nane cuena titáacadiaíói,” daide.

⁴ Mei íadi Juzíñamui ie uai fairíote: “Siete mil dígamaci eneno cúeiena ja níriticue. Afémaci afe táino juzíñamui Baal jánarai anamo caiñici ífodo dújuñediaíói, ie íóbitallena,” daide.

⁵ Te jira daje izóí birui judíuaimona ínote dúemacina eneno mamécaiaíói. Juzíñamui nana comínimo dúecaillano daa bimácina oni eneno nizede.

⁶ Bie níziafue Juzíñamui caimo dúecaillamona comuide. Iemona come finóacanamona comuñede. Mei íadi cai níziafue come finóacanamona comuñeniadi, Juzíñamui caimo dúecaillafue nahí caimare dúecaillafueñede.

⁷ Bie daináfue ¿mei nífuena cai llote? Be níie: Israel comíni íaíói jenoca Juzíñamui anamo ñue jaícifuena baiñédiaíói. Mei íadi Juzíñamui nizeca dúemaci afe íaíói jenócana otíaiói. Ie mei baiñédimaci Juzíñamui íaíói comécina ríretade.

⁸ Juzíñamui Cuegáuai daíí daide: “Bimácina Juzíñamui comécina tíidino izóí finode. Uina cíoiñedino izóí íaíoína finode. Daje izóí jefona cacáíñedino izóí íaíoína Juzíñamui finode. Nai afémaci jaca biruíllaimo bie izóí itíaiói.”

⁹ Iemo jíái David Juzíñamuimo jícajano daide: Juzíñamui íóbitallena íaíói finoca güilláfuiái táinona finódiaíói. Afe jira Juzíñamuina daidicue: Mai duere íaíói finoiri.

Iemona aféfuiai tácofo izóí íaíoimo jáiteza; daje izóí llójeji izóí jáiteza.

Afe táinona finócafuiaímo écitaillano izóí duere finólliaíoiza.

¹⁰ Daje izóí uina nirídino izóí mai mei íaíói jáilleza, Juzíñamui ñúefuiai íaíói ónoñeilleza.

Iemo nágarui iere baizídaitaganona íitiaíoiza, daide.

Judíoñedino jíllotafue

¹¹ Ja birui nane jicánoticue: ¿Ja nibai judíuái íaíói écitaillamona niné nana táinocaitalliaíói? ¡Jaca íñeídeza! Mei jíáífodo judíuái Juzíñamui lloga uaina cacáacañena llezica, judíoñedino aféuai cacáillano íaíói jíllóillifue maiñódiaíói. Afe íaíói máíñua Israel comínina úradoitate, afe jíllonafue otino illa izóí íaíói íllena.

¹² Iemona judíuái ínoñenafue íirainomo nana náiraiaina canode. Afe judíuái ícoimo fuitáñeno zófenocallafue, judíoñedinona ñue canode. Mei íadi judíuái meine abido Jesumo ínuaiilla llezica, nana náiraiái jamánomo ñue ézicilliaíói.

¹³ Ja birui judíoñedinomo úriticue. Mai omoi cácarei. Mei judíoñedinomo ñúefue llujállena Juzíñamui orécacueza, afe bie cue llócaillifue mo iere jíritaíifredicue.

14 Nibai áfemo riire cue táijinamona, cue nairai comini, omoi illa izói íacaitiaioi; afe izói íaioi íllena jitáidicue. Afemona afémacimona dáarie ñue jíllobicaitiaioi.

15 Mei Juzíñamui judíuai ruifíruillamona nana jíáie nairai Juzíñamuimo comeci caimare uái ílláfueña llogáiaioi. Iemo uire judíuaina íaioina Juzíñamui caimare dáanomo uáidua llezica, iere jamánomo caimare nana íiticaí. Ua aféruimo tíide meine abido cáadena caimare illa izói caimare íiticaí.

16 Mei jíi, Abraham Juzíñamuimo dúinamona, nana ie anamo comuíocaidino Juzíñamuimo dúidiaioi. Daje izói da amena jáinao Juzíñamui íeiena maméiadi, daje izói nana afe amena ícairuai Juzíñamuimo dúide.

17 Mei íadi dáarie Abraham anamo comuídino íaioi íñoñenamona Juzíñamui comínina íñeíllena ruifíruigaiaioi; íemo ie uai jeire omoi úamona Juzíñamui comínina ítátagaomoi. Afe ruifíruigamací ífomo jae jóonegaomoi; jóoneficailano Juzíñamui Abraham ímácimo lloga ñúefuiai daje izói llínorediomoí. Ie jira judíuai ñuera olivo amena naa íe ícairuai díga izóidiaioi. Iemo omoi nano fueñe jazicí amena ícairuai izóidiomoí, mei judíoñediomoíza. Jae judíuaimona dáarie íaioi íñoñenamona amena ícairo jaitaina izói jaitácaiaioi. Afe mei omoi ínuamona afe jaitácairuai méífomo jóonegaomoi. Ua, jaiái jaitaca ícairuai jíáie aménamona méífomo zicóllena jóonegano izóidiomoí. Biruí daje moi ícoraimo jaináidiomoí. Afe ñuera olivo jíido cáadiomoí.

18 Ie jira abína íñoñeno iri. “Olívomona jaitaca ícairuai izóidimací baímo ñúeracue” daíñeno iri. Afe izói daíñidiomoí, mei ñuera olivo moi ícoraiaína cáatañediomoíza; daní jíainamona zicóllena jóonega ícairuai izóidiomoí. Mei uáfueza, daní Juzíñamui nizeca comínimo biruí omoi jaináinamona íe lloga ñúefuiai llínorediomoí.

19 Nibai dáamie daííte: “Dáarie afe ñuera olivo ícairuai jaitácaiaioi, afe méífomo cue jóonellena”.

20 Jíainamona ñuera olívomo zicódiomoínia ñuera, mei íadi jaitaca izóidimací jíáífo joide: Juzíñamuimo íaioi íñoñenamona jaitácaiaioi. Daní omoi ínogafuemona jóonegaomoi. Iemona áfedo daní abína ínonidiomoí. Mei jíáífodo omoi jaitábiza abína ñue omoi rairuíri.

21 Mei Juzíñamui nano nizécanona figo íaioi íñoñenamona jíizíñeno íaioina ruifíruite, afémie daje izói omoi figo íñoñeniadi, amena ícairo jaitaina izói, jíizíñeno raire ómoína ruifíruiteza.

22 Mai bífuemo omoi coméciiri. Juzíñamui daíí omoi jóoniano íere ñuera. Afedo afémie ómoímo dúecaífirenana fidídiomoí. Mei íadi nane afémie íere riire jaícina ocuáimie, mei íe uaimo náfuñedimacina afémie íere duere finode. Mei jíáífodo afémie ómoíri dúecaífrede. Iemo fáicanocaiñeno íe uaina jeire omoi oíadi, íe dúecailla díbenedo íífreitiomoí. Afefue jeire omoi óñenia, jíái ómoína afémie jáítaite.

23 Mei jíáífodo judíuai nane abido íñoia, afémaci abido dáanomo jofo jóonelliaioi. Mei Juzíñamuimo meine íaioi jóonelle ríino íte.

24 Mei omo judíoñediomoíza, jica íte onínemací izóidiomoí; Juzíñamui comínimo due jiza dúíñediomoí. Daíí omoi illa llezica Juzíñamuimo omoi ínuado, afémie íe comínina ómoína ítátate. Ie jira nano fueñe íe

nizécamacimona oni nibéfodo baiídino íaiói ínoyadi, abido daje ie comínina itátallena, Juzíñamui dibénedo jamánomo juánide.

Iraírullaído Israel nairai jilloitiaíoi

²⁵ Amatíai, omoí cacai. Afe olivo amena ráfuena ja ómoímo lloticue, uáfodo ónoñega Juzíñamui mamécafuena comécido omoí onóillena. Juzíñamui nanómona comécido mamérillaфуena ómoína fidítaiacadicue. Aféfuena ónoillano Juzíñamui comínina omoí itátagafuedo abina ínoñetiíomoi. Juzíñamui mamérillaфue bie izóí joide: Juzíñamui Israel nabémacina comécina riire finode, mei íadi nano íanori íaiói comécina riiretade. Íaiói comeci riireta mei, Juzíñamui nana jíaíe náiraina caímare uáidote, íaióimona nana Jesumo ínotino nizéllena.

²⁶ Nana Juzíñamui óiacana dieze íemo ínotimaci ofille mei, nana Israel nairai jilloiziitiaíoi. Mei Juzíñamui Cuegáuai daíí daide:

Cai Jíllotaraima dani cáimona cómuite.

Afémie Jerusalén jófuemona biite. (Afe jofue jíaífodo Sióna mameide.)

Jacob meífo ígímaíai íaífuiaína afémie múíñoite.

²⁷ Íaiói fiénidífuiaí oni cue dolle mei nana uícodo cue lloga ñúefuiaí ñue fuite, daide.

²⁸ Nana comíni jílloille uai dibénedo judíuai fairíoñediaíoi. Iemona judíuai Juzíñamui ruiírruigaza, ie bacáuai imácina jáidiaíoi. Ie bacáuai imácina íaiói íllamona Juzíñamuimo cai nabáirillino comuide. Mei íadi Juzíñamui nai íaióina izírúite, íaiói jáiáidígimaíai ie nízia jira.

²⁹ Mei uáfueza. Juzíñamui ja ie fecaca raana abido bairíoñede. Daje izóí cai ie uáiduafuena jaca jíaífodo méidoñede.

³⁰ Naui Juzíñamui uaina ínoñediómoí; mei íadi jíaí birui judíuai daje izóí íaiói ínoñenamona Juzíñamui ómoíri dúecaizaide.

³¹ Ja birui nano áinori judíuai Juzíñamui uaina ínoñediaíoi, Juzíñamui ómoímo dúecailla izóí íaióimo dúecaillena.

³² Bie uáillaímona bífuena onódicai: Nana jíaíe comíni ie uaina dájerize ínoñediaíoi. Ie uaina cai ínoñenamona fiénidífuiaí finófiredicai. Iemona Juzíñamui nana caina dájerize cai gaíga fiénidífuiaímo llaveca izóidinona jóonete. Afémie bie izóí caina daide, afe méífomo afémie nana caimo dájerize dúecaillena.

³³ ¡Díga Juzíñamui ebírede comeci ífuiaí caímo ie dúecaillena, naa ie onóigafuiaí díga! ¡Afémie iere ráfuena baitádimie! Uícodo ie mamérillaфуiaína cai jino llónidicai. Daje izóí eneno dáarie comínina ie níziafuiaína, onóñedicai.

³⁴ Cai Ocuíraíma comeci úrillafuiaína buna onóñede. Daje izóí afémiena bu llófuetimie íñede.

³⁵ Iemo jíaí cai Ocuíraímamo raana izájitimie íñede, afe raa íba llíñollena.

³⁶ Mei nana ráaniaí Juzíñamui comuítaga. Nana afémie finoca; daje izóí íeiéna nana finode. Jaca ziiñona Juzíñamuina íóbioitaredicai. Aquíe izóí íeza.

12

Juzíñamuimo ñue jaícina cai dúina uai

¹ Cue ámatíai, birui Juzíñamui caina dúecaillamona, ómoímo izire jícadicue. Dani omoí maí Juzíñamui anamo itábicaíri. (Dani omoí comeci gáinaфue finóñeno, maí Juzíñamui comeci jítainafue omoí finori, cai ie ocuilla izóí.) Juzíñamui íóbitalle rille jaíai íemo jaíai fecaca izóí, nai omoí caana llezica,

Juziñamui anamo dani omoi mai ñue itábicairei, íena ie ñue facátagamacina omoi illena. Afe llezica dama íeiena eneno ñue finócamaci omoi íllamona, omoi ie ocuilla uai, mai jeire omoi óiri. Nana bifuiái ñue cai fínuamona, cai joréñodo Juziñamuina caimátaitadicaí.

² Biniemo ite comini comeci táinomo facáoidiaioi. Mai, afe izói omoi íñeno iri. Mei jiáfodo, omoi comeci ífuiái, mai jiáfodo méidori. Daíi omoi comeci ífuiái omoi méiduamona afe izói Juziñamui nana o illafue cómofuena méidoite. Afemona Juziñamui comeci ñue jitáinafue ónoiticaí. Daje izói ie jitaina ñúefue ónoiticaí, naa ie cai ióbitallifuiáiri. Daje izói ie ciona jaícina jóidifuiáina ónoiticaí.

³ Juziñamui cuena dúecaillano cuemo jóonegafuedo, nana ómoína dáiticaue. Juziñamui cai fibítajafuemo da comécina facáredicaí. Afedo abí cai íinolle ñuera. Mei íadi afefue baimo táinodo ínonidicaí. Iemona nana ómoimona dámie, afefue baimo dama ie abina íñoñeno iri. Mei jiáfodo illa dígamie comécina ñue jaícina facárede, Juziñamui íemo lloga ie comécimo Juziñamui comuítaga ínuafue daína izói.

⁴ Da come abimo aillo táijide ráaniai ite. (Onoi jiáfodo táijide. Daje izói ídai táijina jiáifoide. Daje izói fue táijina jiáfodo joide. Daje izói jefo táijina eneno jiáfodo joide.) Mei íadi daade cai abí íadi. Naga cai abimo ite raa eneno jiáidofodo caina canode. Daje táijinamo íñédiaioi.

⁵ Daje izói, áilloziena Jesumo ínoticaí. Aillo cióidicaí íadi, daade abí izóidicaí. Ua, Crístomo dájena cai jaináinamona, dáamiende abina iticaí. Dáamacidicaí. Afe llezica dáamiedicaí abimo ite táijide raa izói, dani conímamo dájena jaináidicaí.

⁶ Naga cómemo Juziñamui jóonega táijinana fibíllafue jiáfodo joide. Juziñamui comeci óiacana izói, afémie naga cómemo fecade. Bie táijinana fibíllafue ñue jeire óredicaí. Dáamiemo Juziñamuimona onoiga uaillai jino llóllena fibítaga. Afemona áfena afémie rairuíño jieruirede. Nano ie ínogafue íllaze jino llófuere de.

⁷ Jiáimaci cai canófireille fibíllafue Juziñamui caimo jóoneiadi, áfede rairuíño canóredicaí. Daje izói llófuiana fibítagamie, afe ie llófuefrenamo ñue járitairede.

⁸ Afe izói jiáima comécina náiretallena fibítagamie, áfemo afémie ñue járitairede. Daje izói comini canolle raa fécafiredimie, afe íbana ie maiñoíllemo coméciinide. Fia íaioimo dúecaillano fecádenia ñuera. Afe izói comini jetállifuenta ocuídímie caimare abí rairuíoicana ocuírede. Duéredino canófredimie, caimare íaioina canórede.

Jesumo ínotino finórede uai

⁹ Táinona lloñeno conímama izíruiri. Íafue bai oñeno iri, mei íadi ñúefue jeire omoi óiri.

¹⁰ Jiáimana caimare nahí ama izói izíruiri. Afémiemona raire uícoficaiño iri, mei jiáfodo méifomo fiéño raire íena o uícodo o otátari.

¹¹ Ráiraieño jiere omoi iri. Ñue naire cai Ocuíraimamo omoi táijiri.

¹² Cai ocuírinafueмона caimare omoi ífireiri. Duere omoi zefuíadi, áfemo raire járitaiño, íaicana caimare úriri. Juziñamuimo úrillana jaca féítaño iri.

¹³ Jesumo ínotino jitaila raana, íaioi canóllena jeruíño fecari. Nana omoi jofomo uáiduaíbitinona caimare uáidori.

¹⁴ Omoí fienni finódinona ñue caimátaitari. Iaiói ibana fienni faidóñeno, íaiói cáimafuíai Juzíñamuimona jicari.

¹⁵ Caimátaidino diga caimare omoí iri. Daje izói raamo jiridinomo omoí dúecairi. Eedino diga omo eeri, íaiói firallena.

¹⁶ Conímana úradoiñeno iri, dájena illa dígamíemo ñue comécíiri. Daje izói fienni abina íinoñeno iri, mei jiáifodo comécina mánaidino izói omoí iri. “Tere baitádimiedicue” comécido daiíñeno iri.

¹⁷ Da come fienni omo finóadi, afe ibana afémiena fienni finóñeno iri. Mei jiáifodo, nana comíni eróicana iba oñeno ñue o finori.

¹⁸ Omoí illa dino, nana comíni comeci jacíruiñenafuedo caimare uái omoí iri.

¹⁹ Cue izíruiga ámatiai, fiénidífue comuíadi, ibana omoí oñeno iri. Mei íadi aféfuena fáicanocairi. Afémie Juzíñamui duere finólleza. Mei jii, Juzíñamui Cuegáuai daide: “Duere finóllífue cuemo dúideza. Daje izói cue iba ólleza. Daií cai Ocuídímie daide.”

²⁰ Nane dánomo daide: “O bacáuai ímie juffruia, icíñeno íena ecari. Iemo afémie jiróacaniadi, ie o jirótari. Bie izói ie o finuamona, izire íena méaicaitaitío,” Juzíñamui Cuegáuai daií daide.

²¹ Fiénidífue omoí anáfenuamona abí omoí rairuiri. Mei jiáifodo ñúefue jeire omoí úado, fiénidífueña mai omoí anáfenori.

13

¹ Nana comíni omoí jamánomo ocuídillaima ocuica úiñotillaini anamo ñue omoí itábicairi, mei nana ocuídillaini Juzíñamui jóonegaza. Afémie jóoneñega ocuídímiena íñeéza.

² Iemona afe úiñotillaimana uáitaoidímie Juzíñamui jóonegamiena uáitate. Nana daií uáitatino, afe ie uáitaja ícoínia afémacina Juzíñamui duere finótaite.

³ Mei jii, ñúefuena jeire ófredino ocuídillainina jacíruiñeítiaiói; mei jiáifodo fienni finóidino jacírullena jóonegaiáiói. ¿Meita ocuídillaimana jacíruiñedímiena íacadio? Mai ñúefuena jeire o oíri. Iemona aféllaima “Facátagamiedo” ona dáite;

⁴ mei afémie Juzíñamui táijitagamieza, ñúefue dibénemo o jaináillena canóllena. Mei fiénidífue o finóadi, aféllaimana jacíruiñeido, mei afémie duere finótalle ríno táinomona íñegaza. Uafue, afémie Juzíñamui táijitagamie nana fienni itino duere finótallena. Nana íaiói fienni finócafue íllaze ñue jaícina íaióina duere finótaite.

⁵ Ie jira ocuídillaini anamo itábicairidíomoi, daa duere omoí finobiñeillena, mei íadi daje izói Juzíñamui jóonega omoí comeci úrilla uai jeire omoí óllena.

⁶ Afe bie izói ñue omoí íllena, ocuídillaini lloga gobiérmomo íbarede úcubena íbáfiredíomoi. Mei jii, aféllaini Juzíñamui táijitagano. Afe íaiói táijinamo izire jarítaoidiaíói.

⁷ Iemona naga cómemo dúide raana, mai jeruíñeno ñue íemo ine. Gobiérmomo cai jaináinamona, íaiói ocuica úcuba íllínoraíma lloga gobiérmomo dúide úcubena mai omoí fecari. Daje izói gobierno caímo jicana oga raa, emódomo raiñócana áfena mai omoí ibari. Naga ocuídillaimamo dúide ñúefuedo jacíruiñofue, áfede ñue íena omoí jacíruiiri. Daje izói naga jamánomoidillaimamo dúide ñúefuena, mai áfena íemo omoí nitari.

⁸ Omoi záitaiñega ibállifueña bumo itáteñeno iri; jiáifodo daa ñue ibállifue ite. Afefue jiáimana cai izíruillifue. Afemona dani conímaiana izíruiredicai. Mei naga conímana izíruitimie, áfedo Juzíñamui ocuica uaina ñue jaícina fuitádeza.

⁹ Jaiái Juzíñamui ocuica lletara uailái daide: “Jiruífueña finóñeno iri, cómena titáñeno iri, meríriñeno iri, jiáimamo táinona lloñeno iri, jiáimie mo ite ráaniairi úradoiñeno iri.” Mei íadi bie ocuica uailái naa jiáie lletara uáillairi daa bie dáinamo dájena itáioi: “Dama o abina o izíruilla izói, afe izói o abi cómena izíruiri.”

¹⁰ Izíruitimie ie abi cómemo fiénidifueña finóñede; íemona izíruillafuedo Juzíñamui ocuilla uailái ñue jaícina jino zuitárede.

¹¹ Nana bífuiaimo jeire omoi ua lezica, birui cai illáruillaimo ñue mai cai uibíoilli. Ja iere abi cai rairuillirumo ja dúcidicai. Afemo ñue omoi comécioiri. Mei Jesucristo caina jillotajano uire jiáiruido caina uáibiteza. Afe ie cai uáibillirumo ja ánozide. Fueñe Jesús uaina cai ínua lezica, afe cai ie uáibillirui bai jica ite, mei íadi birui ja aféruimo itícaiza.

¹² Bie énie fiénidifue árrera naio izoide. Afe bie árrera naio ja monáiacade. Jítinomo finoca fiénidifuiái finuana ja fáicanocairedicai. Fuiráima ie abi ríidua llojeco jítaja izói, afe izói íaifue cai finoñeillaena cai comeci rairuillafueña jeire óredicai. Ie mei ñúfuedo, úzefomo itino izói macáredicai.

¹³ Ua, úzefomo itino izói, mai ñue jaícina cai macalli. Jifáifrenafue mo mai cai íñeilli, naa fiénide aillo güillárenafuairi. Afe izói nana jiruífuiaimo mai cai íñeilli, naa jiáie comeci meáire óiacanafuairi. Daje izói dájena comécíñedimaci izói íñeno omoi iri. Iemo jiái fiénide júfdogafuedo mai cai úriñeilli, naa úradoillafuairi.

¹⁴ Mei jiáifodo Jesucristo ñue illa izói, ie cánuado afe ñue illáfuemo mai omoi iri. Omoi comécimo ite fiéni óiacanafue mo, áfemo mai omoi comécíñeno iri. Daje izói, afefue omoi finóllemo mamériñeno omoi iri.

14

O ama jánana fiéni úriñeno iri

¹ Juzíñamui uai como fueñe jabo ínotimieña, ñue jofu omoi cígimo llínori. Afémie ínogafueña féitaicaniadi íena caimare uáidori. Ua, ie ínoga onóñega uáillaimo aillo omoi úridoñeno caimare íena omoi uáidori.

² Mei jii, “Naga raana íáruíñeno güiredicai,” daífiredinona ite. Daje izói dáarie Juzíñamuimo jabo ínotino “Ríllena ríñeno da ria llizíllana güiredicai,” daífirediaioi.

³ Ie jira naga raana güitimie mai afe ríllena fímairitimieña jamairuñeno iri. Afe izói, fímairitimie, mai naga raana güitimie mo comeci fiéni facáñeno iri. Mei Juzíñamui afe íaillinoi, íemo ínuamona, ie comínina caimare íaillinoína uáidoteza.

⁴ Afémaci Juzíñamui ocuícamaciza, íaioína fiénidifuedo jicánonidio, mei afémaci óieñedeza. Dani íaioi ocuídime mo uai orédiaioi. Íaioi illafue ríre jicánollena dama íaioi ocuídime mo dúide. Ocuícamié illafue ñúenia, ie ocuide Juzíñamui uícomo méairuñeno náidaite. Ie illafue fiénia, ie ocuide Juzíñamui duere íena fínoite. Mei íadi afémie ñúefue dibénemo féitañeno íite, mei cai Ocuíraima Jesucristo ríñoredeza, afémieña ñúefue mo jaícina jaináitallena.

⁵ Daje izói, dáamie nágaruillai baimo daa illirui eneno rairuide, Juzíñamuina caimátaillena aferui judíuai ráfuena jira. Jiáimaci naga mona daje izói ñúeruillai, daidíai. Illa dígamie dama ie comeci úrillafuena ñue onótaredeza.

⁶ Daruina eneno ráruitimie, cai Ocuíraima ióbitallena íeienu íllamona, aferuina eneno rairuide. Daje izói nana raana güítimie cai Ocuíraima ióbitallena íáiruifeno güífiredede, mei afémie afe güílleri Juzíñamuina “Iere figura” dáideza. Daje izói cai Ocuíraima ióbitallena íimairitimie íimairillano Juzíñamuina “Iere figura” daide.

⁷ Nana cámona buna dama ie comeci ióbioillena ínide; daje izói buna dama ie comeci ióbillena tíñede.

⁸ Cai caana llezica cai Ocuídmiemo jaináidicai. Daje izói cai tíadi, nai íemo jaináidicai. Iemona cai caana llezica, mei nibai cai tíilla llezica, jaca cai Ocuíraima íédicai.

⁹ Mei jira Cristo tíizaíbillano, meine abído cáadimiena jaide, cáadino náamata izói, daje izói tíidinona náamatallena.

¹⁰ Mei íadi comínina náamañedio. Iemona ¿nibái mei o ama jánana fieni úrillano íena riire jicánotio? ¿Nibái mei íena iziruiñeno jámairuitio? Mei jii, nana cai Cristo uíecomo ácatallicai. Afénomo afémie caimo itífueña riire jicánoite.

¹¹ Juzíñamui Cuegáuai llote:

Uáfueña jaca ninomo cáadimiena cue íllana onódiomoi; afe izói uáfueña nana comíni cuemo eróicana íaioi cañici ífodo dújuzaíbitaíai.

Daje izói nana comíni jino uáfodo ñúefueña Juzíñamuimo nítaítaíai, daide.

¹² Iemona jae onódicaíza, cámona illa dígamie dama ie illáfueña afe Juzíñamuimo jáanoñeno jino íemo llórede.

O ámana ñúefuemoni oni nibéfodo baítañeno iri

¹³ Ie jira benómona mai conímaiaina comécido fieni úriñeno iri. Mei jiáífodo, nágarui omoi finócafuaído conímana fiénidífueño omoi baítañeno iri áfemo mai ñue omoi mamériri. Daje izói omoi illáfuedo afémiena fieni facátañeno iri. Afemona abí omoi rairuiri.

¹⁴ Jae onódicueza, nana güille naa rílleniaíri, dama íainideza. Ua, cai Ocuíraima Jesumo cue ínuamona, ie daina izói, cómena íáiruitaite güille íñedeza, ñue onódicue. Daa “Bíena cue güíadi cuena íáiruitaite” comécido daidímiemo, afe raana afémie güíadi íena íáiruitarede.

¹⁵ Mei jiáífodo, o ama comécilla rairuica güille o güíllamona o ama o ríitaiadi, íena ja figo izíruíñedio. Mai daade o güíacaga güíllado, Jesumo o ínote ama íaífueño féiraitañeno iri; mei afémie jíllloillena Cristo tíizaíbiteza.

¹⁶ Omo ite ñue finócafuaído jiáimacina fieni úritañeno iri.

¹⁷ Mei jii, daa cai güiga raado Juzíñamui comínimo jaináíñedicai; daje izói daa cai jiroca raado afémacimo jaináíñedicai. Mei jiáífodo Juzíñamui anamo ñue jaícina cai íllamona Juzíñamui comínimo jaináitagacai. Daje izói Ñuera Joreño caimo comútaga caimare comeci uái illáfuedo, afe díbenemo jaináitagacai. Daje izói íeri cai ióbioillafuedo, dájena ie comínimo jaináitagacai.

¹⁸ Cristo lloga iodo jailla llezica, nana bífuiaína jeire otímie Juzíñamuina ióbitade. Afe llezica afe izói finófiredino comíni ñue facátagamaci.

19 Iemona, naga come conímana caimare uái itátatífuiaina nágarui mai cai jenófireilli. Daje izói conímana Juzíñamuimo baimo izire jaináitaja raa, mai cai jenófireilli.

20 Daa o óiacaiga güllado, dani omoi cigiri Juzíñamui comuítaga caimare dájena omoi jaináinana, mai fia táinomo fáifitañeno iri. Uafue, nana Juzíñamui finoca güille güurede, mei ja ñueraza. Mei íadi daa o güiga güllado jiáimana ñuera lómona oni nibéfodo o baiñtaiadi, afe fiénide.

21 Daje izói rille o ríamana jiáimana fiénidifue mo o baiñtaiadi, ríllena o ríñeille, afe baimo ñuera. Afe izói vino o jírúamona íena ie íinogafue o uáitaiadi, vínona o jiróñena afe baimo ñuera. Daje izói nana o finuafuiaimona jiáima íinogafue jabo o féitaiadi, afe o finócafue fiénide. Mei íemona afefue o finóñedionia jamánomo ñuera, o ama íinogafue o féitañeillena.

22 Iemona bie güillafue, nibai güíñenafue dibénedo o ñuera íinogafue fáicanocaiñeno, Juzíñamui eróicana dama óiena ñue o mameri. O comécido mamérillamona finócafufuiai dibénedo ñuera o daiñeniadi, áfedo caimare itio.

23 Mei íadi dámie Juzíñamuimo figo íinoñenamona ie güille jizíreocana güíadi, afémie fiénidifue mo báide. Mei Juzíñamuimo ínuamona cai onoiga íena íóbitallifue cai finoca ñuera, mei íadi nana aféfuiai jinomo cai finócafuiari fiénideza.

15

Dama o abina íóbitañeno o ínote ámana ñue íóbitari

1 Nane Jesumo ínotinuaimona dámiere ñue ríinorede. Jiáimaci figo comécina náinidiaioi. Cai ja comécina ríinoredinodicaí, íemona nai comécina ríinidinona canóredicaí. Afefue caimo llonódacaigafue. Afedo dani cai abina íóbitanidicaí.

2 Cáimona illa dígamie ie ínote ámana íóbitarede, afémie ñue íllena. Daje izói íena Juzíñamuimo aillo ínotaredicaí.

3 Mei Cristo dama ie abíri íóbillena jenóñede. Mei jiáifodo Juzíñamui Cuegáuai íemo zúilla. Afe uai daide: “Afe báíñoridino Juzíñamui jiáima báíñoia cuemo baite.”

4 Nana jaiari uícodo Juzíñamui Cuegáuailai cai llófuellena cuega. Aféuaimo cai comeci firajai uai baiticaí. Afe izói bíuai cai facáduamona comeci járitañenafue caimo comuide. Iemona Juzíñamuimo íco cai nabárizzaillirui mo ocuáridicaí.

5 Juzíñamui afe comeci járidoñenafue llotímie. Daje izói afémie, cai comeci firajano caina náiretade. Iemona omoi ie canóllena afémiemo jicádícue, illa dígamie jiáimairi dájena caimare omoi íllena. Mei Cristo Jesús daí caina dáideza.

6 Afe llezica, dájena omoi comécillena íemo jicádícue, cai Ocuárima Jesucristo Moo Juzíñamuina dáuaido omoi caimátaitallena.

Judíoñedino Juzíñamui ñuefue jae llujáiga

7 Mei daí Cristo caimare cai uáidua izói, afe izói conímana caimare omoi uáidori, Juzíñamuimo ebíredifue nitállena.

8 Mei bie cue daina uai: Cristo judíuai ñue finuabite. Nana Cristo tájina fueñe judíuaimo dúide, cai nanódigimona daina uai ñue fuitállena. Afedo Juzíñamui ie méidoñega llogáuaina caimo jino ácatate; mei Juzíñamui afe ie daina uai jaca jiáifodo méidofinideza.

⁹ Daje izói judíoñedino Juzíñamuimo ióbillena Cristo ana bíniemo bite. Iemona Juzíñamui íaioimo dúecaillari ióbidiaioi. Juzíñamui Cuegáuai jaiiai uícodo daíi daide:

Íe jira afe izói judíoñede náiraiai cígiri omo caimátaiticue.

Omo ñúefue cue nitalle rua afémaci cígimo róititcue.

¹⁰ Íe mei jáinomo Cuegáuai daje izói daide:

Judíoñede náiraiai mai omoi cáimacairi, naa Juzíñamui imáciairi.

¹¹ Nane jáinomo Cuegáuai daje izói daide:

Naga judíoñede náiraiai, cai Ocuíraima ióbiri.

Mei afe Juzíñamui jamánomoidimieza, íemo omoi ióbiri.

¹² Mei daje izói Isaías cuete:

Isaí (illaima David moo) íe méifomo comuídigimamona jamánomoidillaima cómuite.

Afémie nana judíoñedino cígiri illáimaite.

Afe comíni afémiemo ocuírítiaioi, daide.

¹³ Juzíñamui caina íemo ocuírítaité. Íe jira íemo omoi ínuamona ñue cáimafue jeire omoi óllena, afémiemo jicádicue, daje izói omoi comeci caimare uái illafue jicádicue. Afe llezica Juzíñamuimo omoi nabáirizaillena birui jabo ocuírídiomoi. Afemona Ñuera Joreño ríinodo ñue izire omoi ocuírillena Juzíñamuimo jicádicue. Mai mei daíi Juzíñamui ómoína ñue ézicíteza.

¹⁴ Cue ámatiai, ñue onódicueza, ñúefuiaina jeire otíomoi naa omoi fibítainafuairi. Daje llezica illa dígamie jáímacina caimare llófuiana onódiomoi.

¹⁵ Mei íadi bie cue cuegábedo, bíuaillai ómoimo íere jino uáfodo cueticue, afe uáillaina omoi féitañeillena. Juzíñamui cuemo dúecaillano cuemo jóonenocaigafue jino lloticue.

¹⁶ Bie cue tájinafue: Juzíñamui lloga cai jilloillifue ómoimo cue llujillena. Afefue ómoimo lloticue, Juzíñamui íena omoi maméillena, mei judío imáciñediomoiza. Íe mei, Juzíñamui ómoína caimare uáidoite, mei omoi ja Ñuera Joreño ñue finócaomoiza.

¹⁷ Mei daíi dama Jesús cue ínuamona, Juzíñamuimo cue tájinafueri ióbillano caimare íticue.

¹⁸ Dama Cristo cuedo finócafuiairi llócaíticue, mei áfedo judíoñedino Juzíñamui uaina jeire otátaticueza. Jáímie tájinafuena jaca jino llócaíñeíticue. Afe íaioi Juzíñamui uaillai jeire ua, cue daina uáillaído jino ñue ícoimo fuitádicue. Daje izói cue ñue tájinado íaioína ñue jaícina ínotadicue.

¹⁹ Afe izói jino cue cíotaga uaido comuítaga cíorainina ráamona íemo jáíe onóillena finócafuiairi, íaioína ñue jaícina ínotadicue. Daje izói Ñuera Joreño ite ríinodo íaioína ñue jaícina ínotadicue. Bie izói cue ínuamona Jesucrístodo cai jilloillifue llujillena ja ñue ícoimo fuitádicue. Ua Jerusalémóna oni jica nágagobiaído aféfuena llócaidicue. Ua ícoimo Ilírico éniemo zátajidicue.

²⁰ Afe daíi, nai jaca Cristo mámecina cacáñedinuaimo, afe ñuera cai jillonafue llócaidicue. Daíi oni jicado llócaidicue, jáíima jae llógamo dáanomo nane cue llóñeillena.

²¹ Mei íadi Juzíñamui jaiiai Cuegáuai daina izói:

Juzíñamui ífuena nai lloñeganuiai afémiéna ñue ónoítiaioi.

Daje izói jaca íena cacáñedino nane aféfuena como fídítiaioi, daide.

Pablo Rómamo jáillena comeci facade

22 Diga icaíño omoi uáiduaillena comeci facáfiredicue, íadi jaca jáinidicue. Mei como ómoimo cue lloga oni nágagobiaido cue llócaigafuemo záitaiacadiecueza; bínidicue.

23 Mei ja birui bígobiaido cue táijicana ja fuitádicueza. Jai ai diga fimónai ai omoi diga íacadicue.

24 Ja birui Espáñamo cue jáizailla llezica ómoína méíñuaíbiacadicue. Omoi cígiri cue illa llezica, iere caimare íticue. Afe mei Espáñamo cue jáicana llezica, omoi cue canóllena jítaiticue.

25 Mei íadi birui fueñe Jerusalemo ite ámatiai canolle raa úiticue.

26 Macedonia énie imaci, naa Acaya énie comíniri, Jerusalemo ite dúredino canolle úcube ofítallena maméritiaíoi. Afe íaíoi ofitaga úcube cuedo Jerusalemo óreitiaíoi.

27 Afe bie úcube oréllemo ñue comécidiaíoi. Mei jii, afefue ñue jáicina joide. Uafue benó ítimaci afémacimona aillo comeci cáimafuiaí ibáñeno itiaíoi. Iemona birui Jerusalemo ite ínotinomo raíre íballe ite. Ua judíuaimo ite Jesumo ínotino, íaíoi mo ite comeci cáimafuiaí, jae judíuáiñedinomo dájeze fecádiaíoi. Iemona benó Macedóniamo ite ínotino naa Acaya ínotinori, judíuaimo ite ínotinona, afe íbana íaíoi mo ite úcubedo canóacadiaíoi.

28 Bie íaíoi afémaci cánua mei, afe izóí íaíoi jóonega úcube cue izájille mei, Espáñamo jáíticue. Ua omoi uáidocana afénomo jáíticue.

29 Ñue onódicueza, omoi cígiri cue dúcille llezica, nana Cristo uáimona comuide cáimafuiaí ómoimo llófueredicue.

30 Amataí, cai Ocuíraíma Jesucristo mámeçido izire ómoimo jicádicue. Daje izóí Ñuera Joreño caimo comuítaga izíruíllafuedo izire ómoimo jicádicue. Mai, cue diga dájena omoi iri, Juzíñamuimo dájena cai úrillaena. Juzíñamui cue canólleza, mai izire omoi jicari.

31 Dinó Judea éniemo ite ínoñedinomo cue íaíoi llaitáacanamona cue ie zuitálleza izire Juzíñamuimo jicari. Afe llezica bie cue uiga Jesumo ínotino canolle úcube caimare íaíoi llíinolleza, daje izóí Juzíñamuimo omoi jicari.

32 Bie Juzíñamuimo omoi jicáfireíllifuaí ómoimo jóonenocaidicue, Juzíñamui comeci jítaina izóí omoi illánomo caimare cue dúciillena. Afe mei omoi cígiri nano áinori cue ílledo cue comeci ñue náireite.

33 Mai, comeci caimare uái illáfuenta fecade Juzíñamui omoi ñue nábaiteza. Daiítadeza.

16

Pablo íe onóigamací uáídote

1 Birui cai Jesumo ínote miringo Fébena, ómoína caimare uáidotadicue. Afengo Cencrea jófuemo ite Juzíñamuimo gaiírdimaci canófiredingo.

2 Cai Ocuíraíma mámeçido aféngona caimare omoi llíinori. Mei nana Jesumo ínotino illa dígamie jíáimana daií caimare llíinofiredeza. Daje izóí nana afengo jitailla raana aféngomo omoi fecari. Afedo aféngona canórediomoi za, mei afengo jai ai aillo comínina canófiredeza. Iemo jíái daje izóí cuena canódeza.

3 Iemo Aquílamo íe ai Priscila diga, uai orédicue; mei afe íaíllinoí Cristo Jesús uaimo cue táijicana llezica cuena nabáidiaíllinoí.

4 Jácinomona cue íaillinoi jíllozado íaillinoi illafue jacire fiévide. Aferi afe íaillinoína “Tere figura” daidicue. Dama cue daí daíñenaza, nana júduaiñedinomona gairífirede ámatiai daje izóí “Tere figura” daidiaioi.

5 Daje izóí Aquila Priscila jofomo gairífirede cai ámatiai uáidori. Daje izóí cue izíruiga nabai Epeneto uáidori. Afémie fueñe Acaya éniemona Crístomo ínotimie.

6 Afe izóí ómoído iere táijifiredingo María omoi uáidori.

7 Iemo llavéracomo cue llaveína llezica, cue diga llaveca cue nabai Andrónico, Junias diga, daje izóí afe íaillinoi omoi uáidori. Cáizie ímie íaillinoi. Jesús orécamacimona mámecina jica jalleide íaillinoi. Afe íaillinoi nai Crístomo cue íinoñenia, raire ufcodo Crístomo ínotiaillinoi.

8 Afe izóí cue izíruiga nabai Amplias uáidori, mei cue izóí cai Ocuíraimamo jaináideza.

9 Iemo Cristo Jesumo cue táijina llezica, cue nabai Urbano uáidori. Daje izóí cue izíruiga Estaquísimo uai orédicue.

10 Afe izóí Apeles uáidori, mei diga ícaíño Crístomo ie íinogafuena afémie jino comínimo cíotateza. Daje izóí nana Aristóbulo comini uáidori.

11 Cue nairai ímie Herodiómo daje izóí uai orédicue, naa cai Ocuíraimamo ínote Narciso comíniri.

12 Daje izóí Trifena ie ai Trifosa diga uáidori. Afe íaillinoi cai Ocuíraima táijinamo táijifirediaillinoi. Daje izóí cai izíruiga miríngo Pérsida uáidori, mei afengo cai Ocuíraima táijinamo táijifiredeza.

13 Iemo mámecina jica jalleide Ocuíraimamo ínotimie Rufo uáidori, naa ie ei diga. Afengo aillo cuena ie izíruillado cue ei izoide.

14 Daje izóí Asíncritomo uai orédicue. Iemo Flegonte, íemo Hermas, íemo Patrobas, íemo Hermes, daje izóí íaioiri ite ámatiai uáidotícue.

15 Daje izóí Filólogo, Julia, Olimpás, Nereo, naa ie miríngooiri uáidori. Iemo nana íaioiri ínote ámatiai uáidori.

16 Mai, illa dígamie Crístomo izíruillamona conímana caimare uáidori. Daje izóí benó Juzíñamui mo gairíracuai ímaci ómoímo uaillai orédiaioi.

17 Amatiai, bifue jeire omoi óllena izire jicádicue. Conímaiaína éoitadinomona abí omoi rairuiri. Afémaci jíáimana fiéni éicitaila izóí finódiaioi, omoi ñue ínogafue féitallena. Baimáci jíáimana énenoruitaitiaioi. Bie íaioi lloga uai, nauí omoi cue llófuiafuena úaitaacadeza. Afémacimona oni jicado omoi iri.

18 Afe izóidino cai Ocuíraimo comeci jítaina izóí íñédiaioi. Dani íaioi comeci gáinanomo táijidiaioi. Afe llezica íaioimo ite caimare ebírerie urilla uaido, comécina nífuenidínona jífuetiaioi.

19 Nana jíáie comini Juzíñamui uai jeire omoi úana fidídiaioi. Iemona áferi íóbídicue. Iemo ñúefue dibénedo iere baitádimacina omoi íllena jítaidicue. Mei jíáifodo fiénidífue fínua dibénedo nífuenide onóñedimacina omoi íllena jítaidicue.

20 Mei onódicaiza, comeci caimare uái illafue llote Juzíñamui Taiife uaina anáfenoteza, omoi ie áfedeñoíllena. Mei cai Ocuíraima Jesucristo ómoína ñue éziciíteza.

21 Cue diga táijiacade nabai Timoteo ómoímo uai orede. Daje izóí cai nairai ímíiai Lucio, íemo Jasón, íemo Sosípater diga ómoímo uaillai orédiaioi.

²² Pablo ocuica rabe cúeraimadicue; cue mámece Tercio. Daje izói Jesumo cue jaináinamona uai ómoimo orédicue.

²³ Benó ite Gayo ómoína uáidote. Birui afémie jofomo iticue. Daje izói nana Juzíñamuimo gairíacadinomo íaiói dúcillena, afécona nano íanori íaióimo fiède. Daje izói cai jófuemo ite úcubemo táijidimie Erasto, uai ómoimo orede. Iemo cai ama Cúartona mámeçiredimie uai ómoimo orede.

²⁴ Mei cai Ocuíraima nana ómoína ñue illena éziciíteza. Daiítadeza.

Iraicaiño Juzíñamuimo caimátaillafue Pablo úrite

²⁵ Juzíñamuimo mai cai caimátailli, mei afémie omoi íinogafuena iere izire íinotaredeza. Cue ómoimo jino lloga cai jilloille uai daií dáideza. Daje izói Jesucristodo omoi cue llófuiafue daií dáideza. Juzíñamui jaiái ie comécido mamérilla izói, ja birui judíoñedino comécina ñue náiretade. Ua, bínie nai cómuiñenia, bífuena jica ía daií comécido mamede. Ja diga fimona jaide íadi, aféfuena báinino íteza, nai jino comínimo uáfodo llóñega.

²⁶ Mei íadi ja birui Juzíñamui uai llócaidino cáiena fieca Cuegáuaido, afe-fue jae jino denoca. Bifue ziiño Juzíñamui ocuilla izói caimo íficaide. Bie fueñe báinino Juzíñamui comécido mamérillafue, ja birui nana náiraiaimo jino cíotaga, aféfuena íaiói onóillena. Daje izói afefue jae jino íaióimo cíotaga, comécido íinota afe uaimo ñue jeire íaiói óllena.

²⁷ ¡Daade jamánomo baitade Juzíñamuimo ebírede ñúefuiai nítaiticaíza! ¡Daií afémieimo Jesucristodo ziiñona jaca ninomo llóiticaíza! Mei daiítadeza; jae ñie.

NANOIDE SAN PABLO CORINTO IMÁCI MO ORÉCABE Primera Carta del Apóstol San Pablo a los Corintios

Coríntomo ite Jesucristomo ñnotinomo Pablo cuete

¹ Cue Páblodicue. Ñúefue llujállena Juzíñamui começi jítaina izói Jesucristo jónegamedicue. Bie izói daina Jesucristo orécamedicue.

² Cue, cai ama Sóstenes diga, Corinto jófue mo ite Juzíñamuimo gairífiredino uáidoticoco. Afe llezica bibe ómoimo cueticue. Omoimo Jesucristomo dájena jaináinamona Juzíñamui iédiomoi. Juzíñamui iena omoi jáillena afémieoiri ómoína jíríte. Náagobiaimo ite cai Ocuíraima Jesucristo mámedido jicáfiredino, daje izói Juzíñamui íeiena uáidogaiáioi. Afe Ocuíraima Jesucristo afémaci ie, daje izói cáie.

³ Cai Moo Juzíñamui, cai Ocuíraima Jesucristo diga, íaillinoína ñue uái illifue dibénemo ómoína jóneiteza. Daje izói afe íaillinoi ómoína ñue ézicíteza.

Jesucristomona comuide caimare illafue

⁴ Nágarui ómoiri Juzíñamuina iere figura daífiredicue, mei Juzíñamui Jesucristodo ñue caimare ómoína itátate.

⁵ Mei jii, Jesucristomo dájena omoi jaináinamona, Juzíñamui nana ie cáimafuái ómoimo orede. Nana ie caimare úrillafue Juzíñamui ómoimo llote. Daje izói ie onóigafuáiaina ómoína onótate.

⁶ Mei daí Juzíñamui Crístodo daina uai ja ómoimo bie nahífuena ite.

⁷ Biemona cai Ocuíraima Jesucristo cíocaizaibilliruimo nai dúciñena llezica, nana Juzíñamui lloga uaina ómoimo iteza; abi diné jíáie uaina jítaiñeitiomoiza.

⁸ Afémie ico íirairuimo ómoína náiretaite. Iemona cai Ocuíraima billiruimo dúcille dino buna ninó íienidífuena ómoimo nitáñede.

⁹ Juzíñamui uicodo ie dáinana jaca ñue ícoimo fuitáfiredo. Afe ínofirega Juzíñamui ie jító Jesucristomo cai nabáirillena caina uáidote. Afe Jesucristo cai Ocuídime.

Crístomo gairífiredino dájena iñeno oni eneno comécidíaioi

¹⁰ Amatíai, omoi cacai. Cai Ocuíraima Jesucristo mámedido izire ómoimo jicádicue. Dájena omoi jainairi. Daje izói eneno omoi bozítaiñeno iri. Mei jíáfodo jíáimana énenaruíñeno ñue dájena omoi iri. Daje izói dáafuemo começi fácaitiomoiza, íemo daje izói dáafuemo omoi maméritiomoiza.

¹¹ Cue amatíai, bifue ómoína daidicue, mei Cloé comínimona dáarie cuemo llotíaioi, omoi cigiri jíáimana ruifiruillano oni énenorie itíaioi, daí daidíaioi.

¹² Bie izói cue cacánafuedo ómoína daíacade. Omoimona illa dígamíai jíáfodo úritiomo. Dáarie cue Pablo iédicue daide, jíáimaci cue Apolos iédicue daide, jíáimaci cue Pedro iédicue daide, jíáimaci cue Cristo iédicue daide.

¹³ Mei íadi nana omoi Cristo abi izóidinodiomoi. ¿Meita afe Cristo abi énenorie fecaca? Daítañede. ¿Meita Pablo omoi méfomo cruzmo coraica? Córaiñega. ¿Meita Pablo mámedido omoi báutizagaomoi? Daítañede.

¹⁴ Cue mena come Crispo Gayo diga báutizadicue. Omoimona abi dine jíáimacina báutizañedicue. Aferi Juzíñamuina “Figora,” daidicue.

¹⁵ Iemona ómoimona buna “Cue bie Pablo mámedido báutizagacue,” daíñide.

16 Iemo jiái daa Estéfanas comini báutizadicue, mei íadi cuemo úbicaiñedeza, abí dine jiáimacina báutizañedicue.

17 Mei Cristo cuena “Comini o báutizari,” daiñede. Cuena “Cue ñuera jílona uai o llócairi,” daide. Mei íadi cue abí ñnotade comini bacácido cuena llotáñede, Cristo cruzmo tíllana cue ráifitañellena.

Cristo llogáfuemo Juziñamui riño ite naa ie baitácafuiari

18 Afe bie Cristo cruzmo tíllafue, nana nine táinomo báitino dibénemo ráifiñede taino uailai izoide. Mei íadi ñue jílloitino dibénemo, Cristo cruzmo tíllado cai comeci illafue méidorede, mei afe uaimo Juziñamui riño íteza.

19 Jaiái Juziñamui Cuegáuaido afémie bie izói daide:

—Iere baitáidino onóigafuiaina niné táinocaitaicue.

Daje izói fibídino fibíllafuena ráifitañeiticue, —daide.

20 Ja biniemo fibídime ¿mei ñífuemo cánoite? Comini comeci ífuena ñue méidoñede. Daje izói fia fibíllafue llófueraima canóñede. Afe izói binie ráfuiái júfidotimie canóñede. Mei nana biniemo fibíllafuiái Juziñamui ja jiáfodo méidoga. Ráifiñede taino uáillaina méidoga.

21 Juziñamui nana ie finóllifuiaina onófirede. Iemona “Fia binie comini báitajafuedo cuena ónoñeitiomoi,” afémie daiñocaide. Mei jiáfodo Juziñamui íaioimo lloga uailai íaioi ñnuado afémacina jílloatacade, afe bie lloga uai jiáimacimo ráifiñede taino uai izoide íaioimo cíocaide íadi.

22 Iemo Judíuai fia dáinamona comuide cíorainina ráaniaina cíocadiaioi. Iemo judíoñedino iere báitajafue jenódiaioi.

23 Mei cai, cruzmo coraica Cristo rafue jino llófiredicai. Ie mei judíuai afefue llófuiana meáiruítiaioi. Iemo judíoñedino aféfuena “Ráifiñede taino uailai,” daidíaioi.

24 Mei jiáfodo Juziñamui jílloillena maiñócano dibénemo afe Cristo cairi tilla llogáfuemo Juziñamui riño ite. Daje izói afémaci íena afe llogáfuemo Juziñamui baitaca uai ite. Daa Juziñamui jírrigamie judío ímie íadi, bifue afémiemo ráifide. Daje izói Juziñamui uáidogamie judíoñedime íadi, bifue dájerize íaillinoimo ráifide.

25 Mei jii Juziñamui lloga uai, ráifiñede taino uai izói comínimo cíoide, mei íadi afe uai énie comini baitácafue baimo iere baitade. Daje izói Juziñamui finócafue riñonina izói comínimo cíoide, mei íadi comini máirrie baimo jamánomo rífrede.

26 Amatiai, mai Juziñamui omoi jírillafuemo uibóicairi. Omoimona baitáidinona figo íñede, mei íadi nai ie comínidiomoi. Daje izói ómoimona ríillainina figo íñedeza. Iemo ómoimona jica jalleide comínina figo íñede, mei íadi nai Juziñamui izíruigamacidiomoi.

27 Mei jiáfodo, binie comini daína abina onóñedino Juziñamui jae nizeca, ráfuiaina baitáidino méaicaillena. Daje izói binie comini daína riñidimaci Juziñamui jae nizeca, nana “Mairídicue” daidino meáicaillena.

28 Iemo biniemo ite jica jalléiñedino naa jámairuigamaci diga Juziñamui jae nizede. Nana bie Juziñamui nizécana jamai comini. Juziñamui bie izói jamai comini nizede, abí ñnota “Aillomiedicue” daidino ríinitallena.

29 Iemona buna Juziñamui uícomo abina ñnonide.

³⁰ Mei dama Juziñamui ómoína Cristo Jesumo dájena jaináitate. Daje izói Juziñamui, Jesucristo cai ifoci déitatimiena jónete. Iemo Crístodo, Juziñamui anamo ñue jaícina cai íllena, afémie caimo jónete. Afe llezica Juziñamui íeiena Crístodo caina ñue finode. Afe bie Crístodo daíi jillo dicai.

³¹ Afémie daíi finode, Juziñamui Cuegáuai daina izói jaícina jino fuitállena. Afe uai daide: “Dámie abí ínoiacania, cai Ocuíraimado abí ínori,” daide.

2

Dama coraica Cristo rafue Pablo comínimo llote

¹ Birui ómoimo cue llua izói, afe izói naui Juziñamui ua rafue ómoimo cue lluaíbillaruido, cue baitaca féirede uaido ómoimo úriñedicue, “fere ráfuiaina baitádimiedio” cuena omoi dáiiñeillena.

² Mei naui omoi cigiri cue illa llezica daa Jesucristo ráfue naa ie coraíafue diga, abi diné jiáifuena ómoína onótaacañedicue.

³ Aféruillaído ómoiri ríinidimie izói iticue. Ie jira benena cue jácieri cuidíridicue.

⁴ Ómoimo jino cue llua llezica fia énie come baitaca uaido ómoína jieruitañedicue. Mei jiáifodo Juziñamui Ñuera Joréñodo jieruitadicue. Daje izói Juziñamuimo ite ríinodo: “Bífuena omoi jieruiri,” daidicue.

⁵ Daíi ómoína daidicue omoi ínogafue, Juziñamui ríino dibénemo íllena; daje izói omoi ínogafue bínie comíni onóigafuemo jáinaiñeillena.

Juziñamui da ie Ñuera Joréñodo onoiğa

⁶ Mei íadi ómoimona Juziñamuimo ínogafuemo ñue móonaitinomo cue baitaca uaido úriticue. Bie cue baitaca uai bínie comíni íeñede. Daje izói bínie uíñote ríillaini uáiñede. Afémaci naa íaioi uáillairi niné cíocaiñeitiaioi.

⁷ Jaiái uáfodo ónoñega Juziñamui fibíllafuiaiido úriticai. Afémie jaiái énie comuíacana úicodo báinino mamérrilafuedo úriticai. Aféruillaído caimo zíiñona fuíñeite jíllollifue caimo mamede.

⁸ Nana bínie uíñote ríillainimona bífuena buna onóñede. Bífuena onódiaioina cai ñuera Ocuíraima Jesucristona coraíñediaioi. (Aféfuena íaioi onóñenado íena coraídiaioi.)

⁹ Mei íadi Juziñamui cáiena mamécáfue ie Cuegáuai daina izói ite. Afe uai daide:

Bínie comínimona jaca buna cíóñena ñuera raa Juziñamui íena izíruitino íaioiena jónete.

Afe izóidena comíni jaca cacáñediaioi.

Daje izói áfemo jaca buna comeci facáñena.

¹⁰ Afe bífuiaina Juziñamui ie Ñuera Joréñodo caimo llotátate, mei afe Ñuera Joreño nana Juziñamuimo ite uáfodo ónoñega ráfuiaina onóillena izire jicánofiredeza. Iemona afémie cai fiditate.

¹¹ Bínimo ite comínimona, ¿mei nímie jiáima comeci ifue onona? Dama afémiemo ite joreño ie comeci ífuena onona. Afe izói dama Juziñamui Ñuera Joreño Juziñamui comeci ífuena onona.

¹² Bínie comíni fiéni comécíillafuiai úicaiñegacai, mei íadi Juziñamui caimo oreca Ñuera Joreño úicaigacai. Juziñamui ie Ñuera Joreño caimo orede, aillo jeruíñeno caimo ie fecaca ráfuiaina cai onóillena.

13 Juziñamui Ñuera Joreño caimo llófuega uáillaido afe bífuiaido ómoimo úriticai. Dani cai fibíllafuemona cai onoiga uáillaido ómoimo úriñedicai. Afe daií Ñuera Joreño úcaiganomo Ñuera Joreño lloga ua ráfuiai jino ñue lloticai.

14 Mei jii, Juziñamui Ñuera Joreña úcaíñegamie afe Ñuera Joreño lloga ráfuiaina jeire oñede. Mei afémiemona bífuiai ráíñíñede taino uaillai izóideza. Aféfuiai afémiemo jánaide, mei bífuiai cómemo dama Juziñamui Ñuera Joreño do llófuegaza.

15 Mei íadi Juziñamui Ñuera Joreña igámie naga ráfuiaimona ñifue ñuena, ñifue fiénina daiñede. Mei jiáifodo Ñuera Joreña iñegamie afe izóí daiñide. Iemona Ñuera Joreña iñegamie Joreña igámiemo jaca ñífueña jicánonide.

16 Mei Juziñamui Cuegáuai daide: “¿Bu mei cai Ocuíraima comeci fácafueña onona? ¿Mei ñámie Juziñamuina llófuereña?” Mei íadi ie Ñuera Joreño do Cristo ifoci úrillafue caimo ite.

3

Dájemo tájidiño izóí Juziñamui ocuica uai llúajillena canódicai

1 Amatai, bie lloga Cristo comeci fácafue nai ómoimo figo jóobiñede. Iemona Ñuera Joreño úcaiganomo izóí nai ómoimo úrinidicue. Mei jiáifodo Ñuera Joreño nai figo jaináñedino izóidiomoi. Crísto jaináidino dibénemo nai figo onóñede úruiai izóidiomoi.

2 Iemona nauí ómoimo féinino llófueticue. Nai monoi jirode úruiai izóidiomoi; jáiaide güille nai ómoimo dúñíñede. Iemo afe izóí ñue baitácafue nai ómoimo jaca dúñíñede. Nai aféfuena jeire ónidiomoi.

3 Mei nai Ñuera Joreño jaináñena llezica jamai come izóidiomoiza. Nai birui jáimana úradoidiomoi, íemo ícrafueña jenófrediomoi, íemo nai jáimana énenoruidiomoi. Iemona bíniemo ite Juziñamui Joreña nai iñegano izóidiomoi. Nana íaioi eneno bozíetaillafuiaina nai jeire otíomoi.

4 Omoimona dáarie “Pablo íedícue,” daide. Jiáimaci: “Apolos íedícue,” daide. Bie izóí omoi illa, nai bíniemo ite Juziñamui Ñuera Joreño úcaíñega comini izóidiomoi.

5 ¿Mei ñámie Páblona? ¿Mei jiái ñámie Apólona? Coco bie daa Juziñamui ocuicamedicoco. Daa cócodo cai Ocuíraimamo ínotiomoi. Cai Ocuíraima cuemo jónega tájinamo tájidicue. Daje izóí Apolos dama íemo jónegamo tájide.

6 Cue bie fueñe ritímie izóidicue. Ie mei Apolos afe rigaji jáinoina riáitatimie izoide. Mei íadi afe rigaji zicótatimie daade Juziñamui.

7 Iemona cue bie fia ritímiedicue. Iemo Apolos fia riáitatimie. Bie coco jabóidimedicoco. Mei íadi Juziñamui jamánomoidimie, mei afémie afe rigaji zairítaiteza.

8 Nana ido ritímie, afeji jáinoina riáitatimie nágaillinoi daje Juziñamui ocuicamie íaillinoi. Mei íadi illa dígamie nano ie tájina dieze Juziñamui íbaite.

9 Coco bie dama Juziñamui jetácamo dájemo tájidicoco. Ie mei omoi Juziñamui riga jacafai izóidiomoi.

Nane jáie raa izóidiomoi. Juziñamui como nicana uiga jofo izóidiomoi.

10 Cue bie jofo níraini ocuicamedicue. Juziñamui cue ocuilla izóí, bico jáillirai riire naidánetimie izóidicue. Iemo jiáimie afe jáillirai acónimo

ticáidimie izoide. Ie jira naga tícaitimie rairuídícue, fieni ie ticáifñeno ñue ie ticáilleza.

¹¹ Mei jii, abi diné jááimie riire naidaide jááilliraina naidánenide. Afe jae riire naidánega jááillirai izóidimie Jesucristo.

¹² Mei naga come bie jááillirai caifófemo ie illínona nírede. Afe bíena daírede mei naga come illafue bie nillico izóideza. Dámie afe jááilliraina mameide Jesucristo caifófemo oro izóidedo ie illínona nírede, jááimie quenírede llojefe izóidedo ie illínona nírede, jááimie ráifide noficiái izóidedo ie illínona nírede, jááimie amena iedo ie illínona nírede, jááimie fia uifizaído ie illínona nírede, jááimie zicicái izóidedo ie illínona nírede.

¹³ Iemo ico jááiruido Cristo comínimo itifue riire jicánuaibilliruimo naga come ie nigano uáfori cíoite. Aféruido Juzíñamui cai táijina fácaite. Irai izóidedo naga come nigánuai Juzíñamui fácaite.

¹⁴ Irai cúaritañega raado nitímie Juzíñamui ie táijina íbaja raana jírídoite.

¹⁵ Mei jááifodo cúarirede raado nitímie minícana jíridoñeite. Nana ie táijina niné táinocaiteza; dama táinori llégüite. Mei íadi dama afémie jilloite. Ua, jofu bóoamona nana raaie uzilla mei, dama come jillona izói, afémie jilloite.

¹⁶ ¿Omoí bie Juzíñamui jofu izóidíomoi nai onóñediomoi? ¿Daje izói Juzíñamui Ñuera Joreño ómoímo íllana onóñediomoi?

¹⁷ Afe bie Juzíñamui ico íaifuenidico. Iemona ómoímona dámie bie Juzíñamui jofu eneno botáadi, afe cómena Juzíñamui jáái niné táinocaitaite. Omoí bie íaifuenidico izóidíomoi.

¹⁸ Nane daa come dama abi jífueiza áfemona abí omoi rairuri. Omoímona dámie “Bínie ráfuena iere baitádimedicue,” daíadi, afémie meine abido íinoñedíno daína izói ráfuena baitáñedimiena jáirede, Juzíñamuimo ite nahí rafue baitállena.

¹⁹ Mei bínie comini baitácafuiái Juzíñamuimona ráifíñede taino uallai. Ie Cuegáuai daide: “Iere baitádinona Juzíñamui daní íaioí bífueinamo írebaimo jilla izói jíitate.”

²⁰ Nane dáanomo daide: “Baitáдино comeci fácafuiái ráifíñenana cai Ocuíraima onode.”

²¹ Ie jira jááimamo jáináillado jaca buna abina íinonide. Afe omoi dáamiemo jáináilla uai jááifodo jóide. Nana omoi canódino ómoímo jainaide.

²² Daa cómemo jáináifñeno nana bimaci ómoímo jainaide: Pedro, Apolos diga ómoímo jainaide, cue jáí Páblodícue ómoímo jáináidícue. Daje izói nana bíniemo ite ráaniai Crístodo ómoíena Juzíñamui mamede. Daje izói Crístodo Juzíñamui ómoína cáatate. Iemo omoi tíadi, Crístodo afe tíllana jáciruíñeitiomoi. Iemo biruíllaido Crístodo caimare írediomoi. Iemo uire jááiruido ómoímo ífcaitífuemo Crístodo jáciruíñeitiomoi. Nana bie ñúefuiái ómoie.

²³ Iemo Cristo íedíomoi, ie mei Cristo Juzíñamui ie.

4

Jesucristo orécano táijinafue

¹ Iemona Cristo canódino omoi caina daírediomoi. Daje izói uáfodo ónoñega Juzíñamui lloga uallai jino comínimo llófuetino omoi caina daírediomoi.

2 Mei jii, táijinana jónegamie ie ocuúdimie ínofirenana afémiemo jino cíotarede; ie ocuúllana ñue ícoimo fuitárede.

3 Mei íadi cúemona, omoi cuemo itifue jicánodoiari járitañedicue. Daje izói dáarie cuemo itifue jicánodoiño cuena dáinana figo náfueñedicue. Afe izói cue itifue dama cue jicánoiadi áferi járitañeiticue.

4 Mei cue começi úrilla náifuena cuemo nitáñede. Mei íadi afe izói cue começi úria, nai ua Juzíñamui erócana ua nífuenidimiedio cuena daiñede. Mei cuemo itifue jicánotimie dama Jesucrístoza.

5 Mei jira, Cristo nai biñena llezica jáiama tájinafuena riire omoi jicánodoiñoeno iri. Daa cai Ocuíraima jicánuaibillirui omoi ocuíriri. Aféruido afémie jítifomo báinino itínona bai úzefomo uáfori cíotaite. Daje izói aféruido cai Ocuíraima naga come começi mamérrillafuiai uáfodo onótaite. Iemona Juzíñamui naga come nano ba íemo dúide dieze ñúefuiai íemo fécaite.

6 Amatai, mei ñue omoi íllena bífuiaido omoi o úriticue. Omoi canódimie Apolos ífue dama cufue diga jae ómoimo lloticue, omoi ñue dájena coméçillifue uáfodo omoi onóllena. Bífue ómoimo lloticue ómoimo coco cíotagafuiaido Juzíñamui Cuegáuai baímo omoi coméçiñeíllena. Afe uai caina daide: Dáamie dibénemo gáíñeno omoi iri. Daje izói jáimiena jámairuíñoeno dájeze nana íaíoimo omoi ínori.

7 ¿Mei nie come jáímaci baímo ómoína ñue fínua? Nana omoi onoiga ñúefuiai Juzíñamui fecácaza. Jaca Juzíñamui fecáñegana íñede. Iemona çnibái mei dáamiedo abina ínofredíomoi? Abina ínofredímie: “Cue começi jítaina izói cuemo fecácaza,” daiífiredede. Mei íeñedeza. Omoi dani fécañegaza. Mei jira áfedo abina ínonidíomoi. Nana caímo ite ráaniaimona dani cai ocuilla izói íñede. Nana Juzíñamui caímo fecaca.

8 Birui ja “Nana Juzíñamui caímo fecáacagafuiai ja cai ógaza,” daií coméçidíomoi. Nana omoi jitaica ráaniai nibai ja omoi oga. Nana omoi onóacaga ífuiaína nibai ja ñue baitadíomoi. Nibai ómoína cai canóñenado ja illáicomínina jáidíomoi. Mei íadi táinodo abi ínotíomoi. Iemo afe llezica cai bie jalléíñedícai. Mei íadi ómoína: “Ua illáicomínina omoi ii,” daidícue. Afe daií cai bie omoi diga dájena illáimaitícai.

9 Cai bie Cristo orécamiái jino írainomo Juzíñamui fiécacai. Cai bie lláviano tíitino izóidícai. Jira cai bie nana énie nairai acárilla raa izóidinona jáidícai. Iemona nana comíni naa Juzíñamui abi ímáçiri caímo éroitiaíoi, mei afémaci abi fáiacaitadínodicaiza.

10 Cristo rafue cai llócaillamona caina jáímaci “Abina onóñedíomoi,” daidíaíoi; mei afe llezica “Cristodo ráfuiaína baitadínodícai,” daidíomoi. Omoi ríiredínona illa llezica, cai bie ríínidínodícai. Caina comíni jámairuilla llezica ómoína ñue jacíruitiaíoi.

11 Mei jaiái nai biruimo júbieri duere zefuídícai. Daje izói cai jirolle jainoi íñenari jái duere zefuídícai. Daje izói figo íncuíronidícai. Daje izói comíni caina fieni finódiaíoi. Uái cai íllino íñede.

12 Aillo cai tájinaimona iere llégidícai. Iemo comíni cairi jainónaitímaci; mei íadi íaíoína Juzíñamui canolle uaido fairíotícai. Caina fieni finóllena racádiaíoi; mei íadi ocuúdícai.

13 Cairi fiénidífuedo úritiaíoi; mei íadi afe comínina começi mánainafuedo fíaicana llófuetícai. Afe llezica oni dotaca íáirede raa dota izói, afe izói caina

ráifñedinona caina mámico náfueñediaioi. Nai biruimo cuidoda oni faiga íairede raana caina mamédiaioi.

¹⁴ Bífuiaina omoi meáidailena cueñédicue, mei jáifodo omoi ñue íllena rairuillano, llotícue, mei cúemona izíruiga jitótiai izóidiomoiza.

¹⁵ Mei cómemona facádonide Cristo ráfueña llófuetino ómoimo ite íadi, nai omoi ínogafue tainédimie daade. Cristo Jesumo omoi ínollena, omoi moo izói omoi comuítatimiedicue, mei cai jílloña uaina ómoimo llotícueza.

¹⁶ Ie jira ómoimo cue cíotaga cai ñue íllífuedo omoi jáillena, izire jicádicue. Daje izói cue llogáfuedo omoi jairi daidícue.

¹⁷ Afedo omoi jáillena, Crísto cue ínotaga Timoteo ómoimo orédicue. Afémie cue izíruiga jitó izóidimie. Afémie, Crísto cue ínuamona cue lloga ñue cai ílláfueña ómoimo úbicaitaite. Afe bie afémie ómoimo llujáillífue izói, afe izói nágagobiaimo ite Juzíñamuimo ínotimacimo, cue jái llófueñedicue.

¹⁸ Omoimona dáarie abina ínuano, daidíaioi: “Pablo caina éroizaibíñeite,” daidíaioi. (Afe izói dánado cue uaina uáitaacadiaioi.)

¹⁹ Mei íadi cai Ocuíraima Jesucristo comeci jítaiadi raire omoi cue meíñuailena ocuídícue. Iemo cue billíruimo afe abina ínotimaci ñie ñúfue jáiimacimo finódiaioiza, afefue cue onóillena fácaiticue. Afedo íaioi ñuera ríno ite, ñibai íñeđeza, ónoíticue. Aillo íaioi úrilla uaina náfueñeiticue.

²⁰ Mei jii, fia cai úrilla uaido, Juzíñamui ílláimana ílláruimo jaináitañegacai. Mei jáifodo Juzíñamui Ñuera Joreño rínodo cai comeci itifue méiduano íe ílláimana ílláruimo jaináitagacai.

²¹ ¿Mei ñie izói óiacadiomoí? ¿Mei ñibai ómoína duere cue fínuaíbillana óiacadiomoí? ¿Ñibai izíruíllafuedo comeci mánainafuedo ómoimo cue éroizaíbillana óiacadiomoí?

5

Pablo fiénide meáifue finódimie duere finóllena llote

¹ Ja birui omoi cígimo ite iere fiénide jiruífueña comíni cue fidítatiaioi. Omoimona dáamie ja íe moo ogango dama íe aina ote. Afefue iere jamánomo meáirede. Afe izoide fiénidífueña Juzíñamuina ónoñedimaci jaca rairuíaioi.

² Mei íadi bie izói ómoimo illa llezica jnai omoi iere abina ínofirediomoí! (Afe izói omoi illa iere figóñede.) Mei jáifodo áferi iere zuure írediomoí. Daje izói áferi meáidairediomoí. Bie izói jiruíredimie omoi cígimona mai oni ore.

³ Náamiena omoi diga dama cue íñédicue, mei íadi afefue dibénemo cue comeci facáoinana ñue onódiomoiza. Ie jira afe bie jiruíredimie íe duere finóllena jae cai Ocuíraima Jesucristo mámeçido ocuídícueza.

⁴ Temona Jesucristo mámeçido dáanomo omoi gairízailla llezica, íemo cue comeci facáoinamo ñue omoi uibóicaila llezica, íemo jái cai Ocuíraima Jesucristo omoi cígiri ríinorena llezica,

⁵ mai afe íimana ómoimona jino dótano Taífena náamataga comínimo íena omoi zóoferi, íe abí fiení jítainafuiai ñiné táinocaitallena. Afemona cai Ocuíraima Jesús billíruimo afémie joreño jíllobicaitaiza.

⁶ Afe íaifue nai ómoimo illa llezica omoi ñue íáñinana illa izói abí ínotiomoí. Afe abí ínuana figóñede. “Mei daa cómemo ite íaifue aillo íe abimo ítimacina íáiretaiteza.” ¿Comíni daína uaina onóñediomoí? Afe uai daide: “Pan finóadi afe aillo fáitate raa tamédiaioi. Due jiza fáitatena jóonega íadi, nana afe

magáfecina aillo fáitate.” Afe izói daa come finoca íaifue aillo ie abimo ítimacina iaire finode.

⁷ Iemona ómoína fieni finode come ómoimona oni jica oreri, mei afémie jácaie pan fáitara izóidimeza. Ie jira afe fiénide méaifue ómoimona ñue muiñori, ñue jáicina íaifuenidimacina omoi íllena. Iemona fáitatena jóoneñega comue pan izóidinona ítíomoi. Ja onódicueza, afe bie izóidino ua itíomoi, mei Cristo nana cai ícoinia fagámiena jáideza. Afémie cai ifomo fatá Juziñamui comue fecaca oveja jiza izóidime, caimo ite íaifue oni dóllena. Afémie pascua rafue illa llezica cai uibíoigame. Ie jira bie íaifue oni omoi fáinocai; mei íaifuemona muiñoanona cai íllena, Cristo tídeza.

⁸ Iemona nágarui cai illáfue mo táinona úriñede comécido mai cai illi. Daje izói ñúefuiairede comécido mai cai illi. Afe izoide comeci fáitate raa jóoneñega comue pan izoide. Mei jáífodo íairede comécido cai íadi, daje izói éoicaide comécido cai íadi, afe izoide comeci jácaie pan fáitate raa izoide. Afe izói mai cai íñeilli.

⁹ Naui ómoimo cue cuezábemo ómoína daidícue: “Bie izói jiruürede comínimo nabáiríñeno iri.”

¹⁰ Bínimo jaca jiruüredino ite, daje izói iere ráanaiacadino ite, íemo merírífiredino ite, íemo jánarai íóbitadino ite. Bimaci diga omoi nabáiríñeilla lloñédícue. Aféfuena rairuídícuena bínimo oni jáiredíomoi. Mei íadi afe izói ocuñédícue. Mei íadi onódiomoiza, afémaci illa izói índíomoi.

¹¹ Mei ómoína cue daííacanafue jáífo jóide. “Cristomo ínote omoi ámadícue” daidímie íadi afémie jiruüreníadi, afémie diga nabáiríñeno iri. Daje izói afémie iere ráanaiacania afémie diga nabáiríñeno iri. Iemo dáamie jánarai íóbitaadi, íemo afémie jáímama fieni úrífíreia, íe jífaireia, íemo íe merírífíreia, afe izoide “Cristomo ínote omoi ámadícue” daidímie diga nabáiríñeno iri. Iemo jáí bie izoide come diga omoi güíñeno iri.

¹²⁻¹³ Bínimo ite íñoñede fiénidinomo ití fue riire cue jicánolle cuemo dúíñede. Mei íaímimo fieni itífuíai dama Juziñamui riire jicánoteza. Mei jáífodo omoi dani ómoimo jaináidinona riire jicánoredíomoi. Ie jira afe bie fiénidífuíairedímie omoi cígimona oni oreri.

6

Juziñamui ínotino júfidogafuíai oni íñoñedinomo lluíjinide

¹ Dani ómoimona dámie jáímamo júfidogafue comuíadi, ¿níbái mei oni jáímacimo afefue záitallena jáidíomoi? mei afémaci cai ínogafuemo jaináíñedímaci. Dani omoi cígiri ite Juziñamui dúidínomo jicáredíomoi, o júfidogana jáicina záitallena.

² ¿Nai onóñediomoí Juziñamui íédino nana bínie comíni itífuena riire jicánoitíai? Mei uire bínie comíni riire jicánoitíomoiza, ¿níbái mei omoi cígiri ite dúefuíaina raire záitanidíomoi?

³ Iemo jáí, ¿nai onóñediomoí Juziñamui abi imaci, ángeles daínámaci, itífuíaina riire jicánoitíai? Mei uafue Juziñamui abi imaci itífuíaina riire jicánoitíomoiza, ómoimo ite bínie ífuíai raire záitallena ómoimona juánide.

4 Bie cai illáfuemona comuide júfidogafuaii ómoimo comuíadi, ¿mei nibái mei Juzíñamuimo gairídino dibénemo inédinomo llujífirediomi, afeue jaícina ómoimo finóllena?

5 Bie izói ómoína daidicue omoi méaicaillena. ¿Mei nibai omoi cigiri amatiamo comuidifuenta jaícina finuana baitádimie inede?

6 Ja birui da ama jáimamo júfidogafue comuíadi, Juzíñamuimo inoñede jaícina finóraima uícomo llujífirediomi. ¿Meita bie izói írede? ¡Nide!

7 Uáfodo onóigaza, nanómona daa júfidollifue omoi cigiri comuíadi, jáie o ñue illáfuena táinomo fáifitaite. (Daje izói o júfidogafue Juzíñamui ífuena jámairutade.) Daa cáimona dámie fiene o finóadi, afe iba o óñeille baímo ñuera. Daje izói daa come cue raa júfuiano bairóadi afe meine cue óñeille iere baímo ñuera.

8 Mei jááfodo fiénidifue fáicanocaiñeno, dani omoi amatiamo fiene finódiomi, íemo jái omoi amatiaína júfuiano raana bairófirediomi.

9-10 ¿Nai onóñediomoiza? nana jáimana fiene finódino Juzíñamui illáimana illíruimo dúciñeitiaoi. Omoi júfueñeno iri, mei naga fiénidino Juzíñamui illáimana illíruimo jáinañeitiaoi. Daje izói aireiñeno jáie ringo jetáidino dúciñeitiaoi, íemo jánaraina íóbitadino, íemo júruífueredino, íemo jáie ima diga fiene itímiai, íemo merírfiredino, íemo iere ráanaiacadino, íemo júfáifiredino, íemo jáimamo fiene úritino, íemo júfueta bairófiredino; nana éniemo ite bie izoide comini Juzíñamui illáimana illíruimo dúciñeitiaoi.

11 Naui ómoimona dáarie bie izoide. Mei íadi ja birui Jesucristo ñue íainino finócaomoi. Daje izói Juzíñamui íeiena ñue mamécaomoi. Afe izói Moo Juzíñamui Ñuera Joréñodo, íemo jái cai Ocuíraima Jesumo omoi inuado Juzíñamui anamo ñue jaícina itábicaidiomoi.

Cai abi Juzíñamui erócana iere ñueraza áfena íaidonidicai

12 Comini daífrediaoi, “Cue bie cue comeci jitailla izói íredicue.” Afe uafue, mei íadi naga íaioi comeci gáinafue íaioína ñue finóñede. Uáfueza daa come dama ie comeci jitailla izói írede, mei íadi afe comeci jitaillafue íena anáfenotánide.

13 Mei uáfueza: cai güille, cai jébegoi ie; daje izói cai jébegoi güille íena finoca. Mei íadi jáíruido Juzíñamui nágaillinoi güille naa jébegoi diga jááfodo méidoite. Mei íadi “Bie cai abina júruífue íena mameca,” daíñide, dáarie daí daífrediaoi íadi ¡mei afe uáfueñede! Bie cai abi cai Ocuíraima ie. Afe íbana cai Ocuíraima cai abimo dúide, cai ñue rairuíoicaillena.

14 Íemo Juzíñamui cai Ocuíraima Jesús cáadimiena jáitate. Afe daí ie finua izói, afémie dama ie ríinodo cáadimacina caina mámeite.

15 ¿Onóñediomoiza ómoimona illa dígamie ie abi dama Cristo abimo dúide? ¿Meita Cristo abimo dúidimie júruíredingomo dájena jóneredicue? ¡Jaca jónenide!

16 ¿Mei nibai jáífue onóñediomoiza, dáamie júruíredingo diga íadi afémie abi daa afengo abi izóicaide? Mei jí Juzíñamui Cuegáuai árenafue dibénemo bie izói daide: “Íima ie ai diga afe íaillinoi dámierna ja mameide.”

17 Afe izói dáamie cai Ocuíraimamo dájena jáinaíadi, afémie dájena joréñoredimiena jáide.

18 Iemona mei jiruífueмона oní omoí iri. Nana jíáie cai finoca fiénidífue cai abina figo íáiñede, mei íadi áreiñeno jíáie ringo diga jiruífue cai finóadi, cai abina bácadícai.

19 ¿Mei onóñediomoiza, omoí abi Juzíñamui caimo iga ie Ñuera Joreño illano? Iemona afe Ñuera Joreño jaca omoí diga íteza. Omoí abi dani ómoieñedeza, Juzíñamui ie.

20 Mei omoí abi Juzíñamui jamánomo ráifidena íbácaza. Mei jira cai abído Juzíñamuina íóbitaredícai, íemo jíái daje izóí caimo ite joréñodo íena íóbitaredícai, mei afe bie cai abi naa cai joreño diga Juzíñamui íeza.

7

Pablo come árenafue llófuete

1 Ja omoí cuemo jicánoga uallai afe íbádiuai llóitícué. Uáfueza dámie áreiacañenia dama illa figora.

2 Mei íadi aillo jiruífue íteza, naga íima árede. Daje izóí naga ringo inírede.

3 Airedímie dama ie ai afémie diga íacana dieze, afémie írena. Iemo daje izóí iníredíngo ie ini afengo diga íacana dieze, afengo írena.

4 Iníredíngo “Cue abi daingo cuemo dúide,” daíñide. Afengo abi ie ini íeza. Daje izóí áredímie “Cue abi bie dama cuemo dúide,” daíñide. Ie aimo jaináideza.

5 Íima ie ai diga íacania ráiruíñeno jíeruiri. Daje izóí ringo ini diga íacania ini ráiruíñeno jíeruiri. Mei íadi níbai jíáiruído da come ie ai diga nano nígarui íere Juzíñamuimo íaillinoí comeci facáacana llezica, aféruillaído dájena íñédiaillinoína ñuera. Afe mei nane raire meine dájena írediaillinoí. Mei are dájena íaillinoí jáicañenia, abi jíitáinafuena ocuíninamona fiéni íllena Taife íaillinona facátaíteza.

6 Bífuiái caimare ómoie íllena llotícué. Ríire lletara uai daína izóí lloñédícué.

7 Cúemona nana comíni cue áninino cue illa izóí itíaióina, ñuera. Mei íadi Juzíñamui illa dígamíaimo jíáifoide ocuilla ríino fecade. Dámie áninino dama illa ocuúde. Jíáimie áninino dama illa ocuínide.

8 Ja birui áninidínomo naa fecínguái diga úritícué. Damádímie dama cue illa izóí itíaióina ñuera.

9 Mei íadi dámie ie abi jíitáinafuena ócuíñenia afémie raire árede. Daa come ie abi jíitáinafue íena anáfenoa fiénide, íemona raire áirena ñuena.

10 Mei íadi áiredino iníredino diga afémacina bie izóí ocuídícué. Iníredíngo ie inina jaca dotánide. Bie ocuilla uai dama cúeieñedeza, cai Ocuíraíma Cristo ie.

11 Mei íadi iníredíngo ie ini dotáadi afengo daingo írede; mei jíáiíodo afengo afe daí íacañenia, afengo meine ie ínimo abído bírede. Daje izóí áiredímie ie aina jaca fáicanocainide.

12 Iemo jíáííufue díbéíodo cai Ocuíraíma úríñedeza, dama cue ñue fibíllafuemona úritícué. Daa Jesumo ínotímíemo nai íñoñede ai íadi, íemo afengo nai afémie diga íacana llezica, afémie afengo diga írede. Afémie afe ie aina dotánide.

13 Daje izóí daa Jesumo ínotíngo ie ini nai Jesumo íñoñede íadi afémie afengo diga íacana llezica afengo afémie diga írede. Afengo afe ie inina dotánide.

14 Mei jíi, Jesumo íñoñede áiredímie Jesumo ínote aimo jaináíllamona Juzíñamui ñue finócamíena jaide. Daje izóí Jesumo íñoñede iníredíngo ie Jesumo ínotímíemo jaináíllamona, Juzíñamui ñue finócaníona jaide. Afe izóí

inñeniadi, omoi jitótiai innoñedino úruiai izói itíai. Mei íadi afe izói jóoiñede. Afémaci Juziñamui ñue finócaiaioi.

¹⁵ Mei íadi Jesumo innoñedimie izire ie aina oni oréacania, dama daiítadeza; orérede. Daje izói Jesumo innoñedingo izire ie ini fáicanocaiacania, dama daiítadeza; fáicanocairede. Aféfuena júfidoñeno iri, mei Juziñamui “Nágarui uái omoi ífireiri,” caina dáideza. Bie izói íficaiai Jesumo innote ama naa innote miringo diga rairuínino afe innoñedimie mo Jaináitanide.

¹⁶ Mei íadi Jesumo innote inredingo cácarei. Nai ónoñegaza nibai odo o ini jilloite. Daje izói Jesumo innotimie cácarei. Nai ónoñegaza nibai odo o ai jilloite.

¹⁷ Iemona illa dígamie dama Juziñamui íemo jóonia izói, afe izói nágaruillai írede. Iemo, fueñe Juziñamuimo cai inua llezica aféruimo cai táijina izói, afe izói nai birui táijiredicai. Bie izói nana Jesumo gairidinona ocuícue.

¹⁸ Dáamie Juziñamuimo inua llezica ie bacano icoi quetátañenia, dama daiítadeza; quetátañeno iri. Daje izói jiáimie Jesumo inua llezica jaiái quetácaza dama daiítadeza; jiáifodo júfidoñeno iri.

¹⁹ Dáamie ie bacano icoi quetaca nibai quetañega áfena náfueñeno iri. Mei jiáifodo Juziñamui comeci jítainafue jeire cai olle iere ráifina.

²⁰ Illa dígamie fueñe Juziñamuimo ie inua llezica aféruimo ie illa izói, afe izói nai birui írede.

²¹ Aféruimo jiáima jeruícamierna o ia, áfemo járitañeno iri. Mei íadi afe ímamona oni o jáillino o báia, áfena maiñori.

²² Mei jii, dáamie como fueñe Juziñamuimo ie inua llezica, aféruimo afémie jiáima ocuífregamie. Ja ie inua mei Juziñamui dibéfomo afémie bu ráiruifregamierna jaide, cai Ocuíraima táijinafue ie finóllena. Mei daje izói jiáimie como fueñe Juziñamuimo ie inua llezica, aféruimo afémie bu ráiruifregamie. Ja ie inua mei Cristo izire ocuífregamierna jaide.

²³ Juziñamui iere ráifidena íbácaomoiza. Iemona jiáima riire ocuífregamierna omoi inno iri.

²⁴ Amatai, omoi cácarei, ómoimona illa dígamie como fueñe Juziñamuimo ie inua llezica, nanómona ie táijina izói, Juziñamui eróicana áfemo táijifireiri.

²⁵ Mei birui nahí áinidino naa ininidingotiai diga afémaci ifue llóiticue. Afémaci cue lletalle uaina cai Ocuíraima cuemo lloñede, mei íadi cue fibíllamona cue onoiga uai llóiticue. Mei Juziñamui cue cánuado cue lloga uaina innoredeza.

²⁶ Mei birui iere jacírediruillaiza, cúemona bifue ñue cioide: daa come birui ie illa izói jiáifodo méidoñeno írede.

²⁷ Mei birui ja áredio, afe mei áinidimierna abina maméñeno iri. Mei daje izói, birui nai ánidioza, mai ringona oñeno iri.

²⁸ Mei íadi o áirenia, afefue fiénidifueñedeza. Daje izói daa jitaingo inírenia, fiénidifueñedeza. Mei íadi biruillaido naga áredimie naa iníredingotiai diga íaiói illafue ánidimaci baímo iere Juáreze. Afe bie Juárezefuíaímona ómoína rairuacadicue.

²⁹ Amatai, ómoína cue daiíacanafue bie izói jóide. Biniemo Juziñamuina cai íobitallirui aréñede. Ja benómona cai illífuena jiáifodo maméedicai. Birui áredimie, ánidimie izói írede, raire jiámaci jacíredifuemona cánuallena.

³⁰ Daje izói come tíllamo zúunaitino birui zúunaiñedino izói írediomoí. Daje izói caimare iráizizaidino ja birui caimátañedino izói írediomoí. Daje izói nana ráaniai íbáritino ja birui íaioi íbaca raana “Cáieñede” daiífrediomoí.

³¹ Iemo bínie ráaniai fecáfiređino, daje izói afe ráaniairi caimátaidino ja birui afe ráaniaimo figo járitainidiomoí. Mei bie cai ciona énie naa ie ráaniairi ja ífúoicaideza.

³² Omoí gágudifuaímona oni ómoína óiacadicue. Dáamie nai áinina llezica, cai Ocuíraíma ífuaímo járitairede, cai Ocuíraíma íóballena.

³³ Mei jáífodo áiredimie ie ai íóballena, bínie ráaniairi járitairede. Iemona afémie mena ocuđimie anamo ite izóidemona, ie finóacagafuaína finónide.

³⁴ Ringóniaimo jái daje izóidífue ite. Nai inínidingo cai Ocuíraíma ífuaímo járitaite. Afengo joreño naa ie abi diga Juzíñamui íena iere íacade. Mei íadi iníredingo ie ini íóballena bie énie ráaniairi járitaide.

³⁵ Ñue omoí íllena bífuaí ómoimo llóiticue. Omoí áreiacanafuena rairuíacañedicue. Mei jáífodo comíni eróicana ñue jaícina omoí illífuena jitáidicue. Iemo jái cai Ocuíraíma Jesús ocuífue jizíñeno jeire omoí óllena, bífuaí ómoimo llóiticue.

³⁶ Mei ómoímona daa come comécido daiía: “Cue jicánogango dibénedo ñue jaícina finóñedicue,” íemo afe llezica afengo are dinó jitáingoñeiteza, afémie comeci ñue faca izói, izire ie áreiacana izói árede. Ie jicánogango ie olle fienidífueñedeza, afe íaillinoí áirena rairuínide.

³⁷ Mei íadi jáímie jáífodo comeci facáadi, mei afe ñuera. Ie jicánogangona ie aina ie óiacañenia daje izói afefue jái ñuera; mei afémie ie jicánogango raíre óñeíllena ie comeci ñue daína izói, jica ía ñue mamédeza. Afe izóidífue íáfueñede.

³⁸ Nana bíuaíllaimona bie izói onódicai. Jicánogango otímie ñúefue finode, íemo jicánogangona onéđimie afe baimo ñúefue finode.

³⁹ Iníredingo, ie ini nai caana llezica, ie inimo cuinaca izói jainaide. Mei íadi ja íe ini tílla mei, afengo bumo jaináiñede. Jesumo ínote afengo gágamiemo iníreirede.

⁴⁰ Mei íadi cue comeci faca izói, afengo meine nane iníreíñedena baimo caimare iite. Bie uai ómoímo cue llua llezica, Juzíñamui Ñuera Joreño cuemo ite izoide daidicue.

8

Jánarai íena mameca rílleniai ífue San Pablo llote

¹ Ja birui omoí jicánoga jáífue llóiticue. Jánarai íóballena ía fecaca rille ífue llóiticue. Iere uáfueza, bífuaímo fibídicaíza. Mei íadi cai onóigafuemona cai abi fieni ínuana aillo comúitate. Mei jáífodo jáíimana cai ízíruíllafue nana comínina náirecaítade.

² “Baitádimiedicue” daidímie Juzíñamui ie onótaacanaze nai onóñede. Nai abina onóñede.

³ Mei dáamie Juzíñamui ízíruia, afe íbana Juzíñamui ñue afémíemo éroite.

⁴ Mei ja birui jánarai íóballena ía fecaca rille ífue llóiticue. Omoímona dáarie bie izói daidíaiói: “Afe rílleniaína ríri” daidíaiói. Jáímaci “Ríñeno iri” daidíaiói. Fueñe bífuaímo omoí cácarei. Mei ñue onóigaza bie jánarai nahí ráañede, ráíñede ía raaza. Daje izói ñue onóigaza jáíe Juzíñamui jaca íñede. Juzíñamui jaca daade.

⁵ Mei comini, monamo aillo ite juziñamuillai daiñadi, daje izói biniemo jiái aillo juziñamuillai ite íaiói daiñadi, íeñede.

⁶ Mei íadi cámona cai Moo Juziñamui jaca daade. Afémie baimo jiái juziñamui íñede. Uáfueza comini juziñamuina mameca taino juziñamuillai aillo ite. Daje izói íaiói mameca Juziñamui jabóidillaini aillo ite. Mei íadi cai onoiga daade Moo Juziñamui naga ráanaí finódimie. Iemo bie cai afémie íena iticai. Iemo jiái cai Ocuídímie daade; afémie Jesucristona. Afémiedo naga raa comuitaga. Cai jiái daje izói afémiedo comuitagacai.

⁷ Mei íadi nana comini nai bífuiaina onóñediaíoi. Dáamierie nai jánaraina íóbitajana fibidiaíoi. Afémacimona taino juziñamuimo fecaca güllena, “Bie güille cai juziñamuillai ie” comeci anado daiñaiíoi. Daiñ íaiói comécilla mei áfena ritíaiói. Iemona afe taino juziñamuillai güilledo íaiói ífoci úrillana báciaíoi, mei íaiói ínogafuena nai figo baitáñediaíoi.

⁸ Mei uáfueza, fia cai güigado Juziñamui caimare caina uáidoñede. Cai güia, níbaí cai güñeniadi áfena Juziñamui lloñede. Cai güíadi, afémie íena caina caimare fínoñeite. Daje izói güñeíticai íadi, caina fienu fínoñeite.

⁹ Iemona ja onódicaiza rairuíño güíredicai. Mei íadi afemona abí omoi rairuíoicairi, mei dáarie íaiói ínogafuena nai figo baitáñediaíoi. Jánaraimo fecaca rille o riana íaiói fidíadi, afémacina fiénidifuego baítatio. Afemona abí omoi rairuíri.

¹⁰ Afe bie güille ráiruíñegaza onódio. Iemona jánaraimo dúide güirácomo güizájidio. Afe llezica ínogafuena nai figo baitáñedímie o güillana cióadi, afémie dáite: “Cue jiái cue güizájiticue,” dáite. Mei íadi afémie dibénemo, taino juziñamuillana jacíruillano afémacimo fecaca güille güite. Daiñ íe íllamona dama íe comeci úrilla bácade.

¹¹ Iemona o ñue onóigafuedo, figo baitáñede o ama fiénidifue diné féiraitadio. Mei íadi Cristo jiái afémie jíllollena tíide. Jira o afémie féiraitalle fiénide.

¹² Afe jira, ínogafuena nai figo baitáñedímie fiénidifuego afémie o ífóadi, áfede Cristo fienu finódio.

¹³ Íe jira rille cue ría ícoínia cue ama fiénidifuego cue baítaiza, ja benómona jaca rillena ríñeíticue. Daiñ cue illa jamánomo ñuera, afémie fiénidifuego cue báítañeíllena.

9

Jesucristo orécamie buna ráiruíñega

¹ Ñue onóigaza, nana jiáie Jesús jiáinomo orécamiaí izói, rairuínidicue. Mei cai Ocuíraíma Jesuna afémaci íena ciona izói, íena jiái ciódicue. Iemo jiái omoi dani Jesumo ínogano cai Ocuíraímamo cue táíjinamona comuide.

² Jiáimaci, “Bie Pablo Jesús oreñegamie” níbaí cuena dáítiaíoi. Mei íadi afe izói cuena daiñidiomoi, ómoína cai Ocuíraímamo ja ínotadicueza. Iemona omoi dani Jesumo ínuamona, cuena bie uáfueza Jesús orécamie daiítaite.

³ Omoimona cue uáitatino uaina bie izói óíticue.

⁴ Juziñamuimo gairíдино cuemo fecaca güille naa jirole diga áfena cue líinolle bu cúemona rairuíñede.

⁵ Daje izói jítaidicuena jiáie Jesús orécamie fínua izói, Jesumo ínotingona cue aina óredicue, cue diga jáicaillena. Iemo afengo jítaille güille daje izói ómoimona líinoredicue. ¿Ero ua? Ua, cai Ocuíraíma Jesús ámatiaí naa

Pedro diga, ringo ua izói, cue jiái afe izói ringona óredicue. Iemona afengo ómoimona ecárede.

⁶ ¿Mei omoi nie izói comeci facádiomoi? ¿Nibai coco dáaillinoi cue nabai Bernabé diga, nanómona coco ónoído táijinafuena fáicanocainidicoco, ñúefue coco llujállena? Mei ñeñedeza.

⁷ Mei daje izói ¿nie fuiríraima dama ie güille diga jáirena? Jáinide. Jaca afénomo ecácaza. ¿Nie come jíricona riádi áfemona afe llizállajina afémie riéñede? Jaca afe izóidimie ñede; jaca afémie aféjiaina riéfirede. ¿Mei nie ovéjaiai úiñotimie ie úiñoga oveja monoi omída afémie jiróñede? Jaca afémie áfeji jirófirede.

⁸ Fia come daina izói bífuiai cue llua daí omoi comécíñeno iri, mei jaiiai Moisés cai ocuilla uai daje izói dáideza.

⁹ Afe ocuilla uai cuiánicomo daide: Arroz izoide trigo, juráreto gájirillena záziza llezica, áfemona íaioi güilleza fue maiñeno iri. Ñue onóigaza, bífuena Juzíñamui dama juráreto jícana daíñedeza,

¹⁰ mei jiáifodo biedo Juzíñamui cai llote. Bie ocuilla uai cai ñue íllena cuela. Mei jií, jacafai tíeraima afénomona llizide raana otá güirede. Daje izói trigo gájirillena juráreto zaizítatimie áfemona otá güirede. Afemona afe íaillinoi güíllena caimare ocuírídiailinoi.

¹¹ Iemo ritímie rífirega izoide Juzíñamui uailai ómoimo fueñe lloticue. Ie mei birui ómoimo ite bínie ráaniai abido cue maiñolle figura. ¿Mei nibai ómoimona bie áillue izói cíoi?

¹² Mei jiáie llófueraíni ómoimona íaioi güíllena ófirediaíoi, ie mei bie cai afémaci baímo fia ecáregacai.

Mei íadi bie daina izói cai güíllena ocuíñedícai. Mei jiáifodo ómoimo ñúefue lluaíbiticue. Nana cue jitaiga ráaniai dama cue íbaca. Ómoimona mínícana fia ónédicue, cue lloga Cristo daina uaina omoi ruiffruiza daii.

¹³ Mei jií, jiáifue ñue onódiomoi, nana Juzíñamui gairíracomo táijifiredino afeco ie güílleno írediaíoi. Bífue bie izói daííacade; nana Juzíñamui íóbitallena fecaca rille jobáiranomo táijifiredino, afénomo fecaca ríllemona come jítáillaze otá rírediaíoi.

¹⁴ Mei birui cai Ocuíraima daje izói ocuide. Nana jíllona uai llócaidino, íaioi llófuega comínimona güíllena otá güírediaíoi.

¹⁵ Mei íadi cue bie daina izói jaca finóñedicue. Daje izói bie cue ciegábedo ómoimona mínícana fia jicáñedicue. Güille ómoimona cue jicáñenamona júbieri tíidicuenta, afe figo cuemo ráifíñede. Raiñóñeno bie ñúefue cue llujáiri íere íóbidicue. Afe bie cue íóbillafue cue tíilla baímo jamánomo ráifide.

¹⁶ Jíllona uai cue llócaillado abina ínonidicue, mei afe llócaillena jónegacueza. Bífue llócaíñedicuena jni duere cue zefuilla!

¹⁷ Ie jira, dama cue comeci jitailla izói bífuena cue llócaíadi, Juzíñamui jiríredicue. Mei íadi afe izóiñedeza. Juzíñamui cue níziona bie ñúefue cue llócaillena cue jónete. Afena cue jaca jámaíruinidicue.

¹⁸ Iemona daí cue llócailla jirídua jiáifodo jóide. Nie afe cue jirídogo daíítana fia cue íóbillafue; mei raiñóñeno bie ñúefue cue llujáillari íere íóbidicueza. Nana cuemo dúide táijinana íbatañedicue. Uai llóraima izói cue táijinamona, cuemo dúide ráaniai ómoimona raiñóñeno fia óñedicue. Aferi íere íóbidicue.

19 Mei comínimona buna ráiruiñegacue, mei íadi nana comíni ocuállimiena abí mamédicue, baimo aillo comínina Crísto mo cue jaináitallena.

20 Judíuai cígimo cue illa llezica, judío ímiena abído jáidicue, afémaci Crísto mo cue jaináitallena. Bie izóí daína, Moisés ocuica uai anamo itónona Crísto mo cue jaináitallena, afe Moisés lloga uai anamo abí jóneticue. Mei íadi uáfueña afe ocuica uaimo dúñedicue.

21 Iemo jáínomo, afe Moisés ocuica uai anamo iñédinona Crísto mo cue jaináitallena, íaioi izóidimiena jáidicue. Mei íadi uáfueña Crísto uai anamo cue íllamona Juzíñamui uai anamo iticue.

22 Juzíñamuimo ínogafueña nai figo baitañedino cígimo cue illa llezica, afémaci izóí abí mamédicue, afémaci Crísto mo íaioi ínogafue cue móonaitallena. Bie izóí daína, nana comínimona illa dígamie íaioi illa izóí íacadicue, mei níbai jáífodo íaiomona dáarie cue jíllotallena.

23 Nana bífuiaína finófidicue cai jíllona uai jica jalléillena. Daje izóí bífuiaí finódicue, ñuera cai jíllotate uai caimo onótaga núefuiaína cue maíñólleza.

24 Ja onódiomozá, jáíamacimona aillo comíni áizia, illa dígamie fia jíridoga raana oñede. Dáamie jíridote. Mai riire omoi aizi, jíridolle raa omoi jíridolleza.

25 Nana jífánuafuemo maméritino, jífánoiacana uícodo abína náinitade raana fímaidiaíoi. Afémaci íere abína fímaidiaíoi, raíre zábifrede raa íaioi jíridollena. (Mei aféruillaído íaioi jíridoga rábiaí fínoína ífo ícuífoí are íñeno raíre etúdeza.) Mei íadi jáímacíri fúrienaila izóí, riire nícidotícai, jaca nínomo zábínide raa cai maíñólleza.

26 Cue díbenemona uínidímie izóí ebena aizíñedicue. Íere níciduano, come jana fatímie izóí táinona fañédicue, mei íadi comíni ñue ínotallena riire nícidotícai.

27 Mei jáífodo abí fímailla izóí cue abína duere finódicue. Daí abí cue ráiruillamona dama cue abína ñue jíruitadicue. Bie izóí finóicaidicue, jáímaci cue llócailla mei, ruífruíllano Juzíñamui jíno cue dótañeillena.

10

Jánaraimo caimátáifredino lleta uai

1 Cue ámatiaí, bífuena ómoína fidítaacadícai. Nana cai jáíaidígima Juzíñamui jónege mona uílliena eroide raa anado jáíoicaidiaíoi. Daje izóí nana afémaci Jáírede Monáíllaina ruica jáitádiaíoi.

2 Daí íaioi jáíllamona afe mona uílliedo, daje izóí monáíllaido dájena Moiséoíri jaináitagaiaíoi.

3 Daje izóí nana afémaci Juzíñamui monámona cocítaga güille güífírediaíoi.

4 Iemo nana afémaci afe Juzíñamui nofícimona totátaga jáinoí jírofírediaíoi. Mei íaioi jáíoicailla llezica afe íaioi nabáíoicaide jamánomo riírede nofíci llócuá jíródiaíoi. Afe nofíci daína Crísto.

5 Mei íadi afémaci nabézie Juzíñamuína íóbítañede. Iemona zaféredízicimo tícoízitiaíoi.

6 Nana bífuiaí cai onóillena daí íficaide, afémaci gaíga fíenidífuiaína cai gaíñeillena.

7 Afémacimona dámerie jánaraimo caimátáilla izóí omoi caimátáíñeno íri. Juzíñamui Cúeguau íaioi finócafueña bie izóí daide: “Afe comíni fia ráinaíllano

güüfirediaioi, jirófrediaioi. Afe mei náidacaillano rafue finoda záifrediaioi.” (Daií íaioi jánaraimo caimátaitiaioi.)

8 Afémacimona dáarie jiruírena izói, mai cai íñeilli. Daií íaioi jiruírenamona afémacimona daje monado veintitrés mil dígamie titácaiaioi.

9 Afémacimona dáarie Juzíñamui afémacimo raire járitañenafuena náfueñeno, fiendi éna facátatiaioi. Afemona díga comini Juzíñamui orecá jaio ainica íaioi tílla. Mei jira, afémaci Juzíñamui fiendi facátaja izói mai éna cai fácatañeilli.

10 Daje izói Juzíñamuimo omoi ríiríñeno iri. Mei afémacimona dáarie Juzíñamuimo ríiríillano úroidino titade Juzíñamui abi ímie titácaiaioi.

11 Nana bífuiaí cai jáiaídígimamo íficaide, áfena cíoilano comini bífuiaimona ñue abi cai rairuúllena. Afe mei, cai onóillena Juzíñamui afe bífuiaí ie Cuegánicomo cuetátate, afe izóidífuiaimona cai bigímaiaí ñue abi cai rairuúllena. Mei ja birui íraíruullaímo itícaíza.

12 Mei áfemona, “Ñue ínoticue” daiídímie daiítadífuemona ñue abí rairuiri, afémaci izói cai báíñíllena.

13 Omoímo comuide facátaina duere zefuúllafuiaí, daje izói nana jáíamaci mo comuide, dani ómoíñedeza. Mei íadi Juzíñamui jaca ínofíregamie. Mei onódicaiza, Juzíñamui caimo ite máirie baímo, rírede facátafuede caina fácatañeite. Mei jáíáfodo facátafue comuilla llezica Juzíñamui áfemona omoi jíllóille iona ómoína onótaita. Afemona afe facátafuena ja ñue ocúredíomoi.

14 Ie jira, cue izíruiga ámatiaí, jánaraimo caimátaiillamona oni omoi jírecari.

15 Ráfueña baítádinomo úrilla izói ómoímo úriticue, íemo ómoína cue daiíllífuemo dani ñue comeci omoi facari.

16 ¡Cácarei! Cai Ocuíraíma tíllamo cai úbicaiillena, ñue finoca comunióñ illácurimona cai jiróadi, Cristo díena dájena caímare mamécacai. Daje izói afe illa dígamie mo fecaca comuniómo jáinaide pan, cai güíadi, Cristo abina dájena caímare mamécacai.

17 Aíllomaci cai íadi, daje pan cai güíllamona daade come abina iticai.

18 Mai Israel nairai finoca ráfuiaímo comeci omoi facari. Juzíñamuimo fecaca rílleniaí ritino, afe fecaca rílle mo dájena mamécaciaioi.

19 Bie cue dánamona jánarai ua raaza dáíacañedicue. Daje izói, afe jánaraimo caimátaiillena fecaca rille, jáíe rille baímo ráífideza dáíacañedicue.

20 Cue daina bie izoide: Juzíñamuina onóñedino fia iga raa afe jánaraimo íaioi feca llezica, afémaci Juzíñamuimo fecáñediaioi; mei fiénide joríaímo fecádiaioíza. Afe fiénide joríaí anamo dájena caímare omoi itábicaíri, daiíñedicue. (Daiítademoná ómoína rairuúcadicue.)

21 Fiénide joríaí íchécoimona omoi jírua llezica cai Ocuíraíma íchécoimona jirónidíomoi. Daje izói fiénide joríaímo mameca rílleniaí omoi ría llezica, cai Ocuíraíma mameca comunióña güñidíomoi.

22 ¿Meita cai Ocuíraímana rícaítaacadíomoi? Jaca daií íacañedicai. ¿Meita cai Ocuíraíma baímo ríredíomoi, afémie duere omoi fínoñellena? Jaca daií rínidicai.

Crístomona comuide conímana cai izíruíllafue cai rairuúñinafue baímo ñuera

23 Uáfueña daina. Dámie ie comeci jítaina izói fínuana rairuúñide. Mei íadi afe izói illa cómena canóñede. Mei uafue, dámie ie comeci jítaina izói írede, mei íadi afe ie comécina máñaitallena ñue canóñede.

24 Dani omoi ñue illíufue jenóñeno, jáíamaci ñue illíufue jenóredíomoi.

25 Fecáriracomo nana fecaca güílleniai jáífodo o ifoci úrillado jicánoñeno uái daíi omoi güiri.

26 Mei nana bínie Juzíñamuimo dúideza naa áfemo ite rílleniairi.

27 Mei jáíruido Juzíñamuimo ínoñedimie ona: “Güizaibi” daííadi, jaillano jáífodo ifoci úrillado jicánoñeno nana o ie écajana uái daíi güiri.

28 Mei íadi dáamie: “Bie líiciai jae jánaraimo fecácaza,” ona daííadi, áfena riñeno iri; daíi daídímie comeci fiēni o fínoiza. Daje izóí afémie ifoci úrilla o úaitañelleza.

29 O ifoci úrillana lloñédicueza, afémie ifoci úrilla o zánoñeillena, daíi daídícue.

Mei nibai dáamie jicánoite: “¿Níbái mei jáíie come ifoci úrillado rairuícacue?”

30 Nana cue güígari Juzíñamuina: Figora cue daíía, nibái mei jáíima cue güíllari fiēni úrite,” daíi afémie dáíte.

31 Iemona bizóidifue ñuera: Omoi güilla llezica, omoi jírúa llezica, nana omoi jetáacaigafue jeta llezica, mai nana afe omoi finóacaigafuíaia Juzíñamui ióbilla finori. Afe daíi aillo ñúefue iemo nítaiti omoi.

32 Ninó jáímána oni nibéfodo fiēnidifue mo o illáfuedo baiítañeno iri. Ua, judíuaina baiítañeno iri, daje izóí judíoñedinona baiítañeno iri. Iemo Juzíñamuimo ínotinona baiítañeno iri.

33 Cue dibénemona, nana comínina nana cue finócafuiaido ióbitaacadícue. Dama cue ñue illifue jenóñedicue, mei jáífodo nana jáíimaci ñue illifue jenódicue, ñue íaioi jíllloillena.

11

1 Cristo cíotaga ñúefuedo cue jailla izóí, ómoimo cue cíotaga ñue illáfuedo omoi jairi.

Juzíñamuimo cai caimátaifirena llezica, ringóniai jaca jáíimacina lletánidiaioi

2 Cue ámatiai, ómoimo ñúefue nítaiticue mei cuemo uibóifirediomoiza. Daje izóí omoi cue llófuiana jeire uano áfedo jáíifredi omoi.

3 Mei íadi ja birui jáíifuena omoi onótaacadícue. Bifue bie izoide. Cristo nana íñíiai íaioi izóí Ocuídímie. Iemo nana ringo ie ini ocuica; afémie afengo ífódímie. Afe izóí Juzíñamui Cristo ífode.

4 Iemona dáamie Juzíñamuimo úrilla llezica, ie ifoci íbaia, afe ie ífócina meaire finode, mei ifoci íbailla jáíie come ocuilla anamo íllana llóteza. Daje izóí Juzíñamuimona onoíga uai afémie llua llezica, ifoci íbailla ie ífócina meaire finode.

5 Mei jáífodo, daa ringo Juzíñamuimo úrilla llezica, íemo Juzíñamuimona onoíga uai llua llezica, afengo ie ifoci íbaíñenia, afe afengo ífócina meaire finode. Afe íbaíñena afengo ífo ítirai nana cuidoca izoide.

6 Daa ringo ifoci íbaíacañeniadi mei dáaruido nácina cuidórede. Mei nácina cúdocana, ifoci íbaíñena daje izóí meáirede. Mei íadi ringo ie ifoci naado cúduana meáiruadi, afengo ifoci íbáirede.

7 Íñíiai íaioi ífócina íbáinidiaioi, mei íima Juzíñamui jánana eróideza. Daje izóí íima Juzíñamui ñue ocuilla ríinona jino cíotatímieza. Mei íadi ringo íima ñue ocuilla ríinona jino cíotaite. Uáfueza, Juzíñamui íñíiai anamo íñena izóí, afe izóí íñíiai ringóniai anamo íñede.

8 Mei íima Juzíñamui fínua llezica, ringómona finóñedeza. Mei jáífodo ringo íimamona finócaza.

9 Íima jitailla jira ringo finoca; mei íadi ringo jitailla jira íima finóñega.

10 Afe jira ringóniai ifócina ibáirede, afengo ie ini ñue ocuícana anamo illa daiíllena. Daií írediaioi mei Juziñamui abi imaci eróicana itíaiioza.

11 Mei íadi Crístimoi cai jainaina dino ima ringónino ínide. Daje izói ringo íimanino ínide.

12 Mei uáfueza ringo ímamana finoca, daje izói uáfueza naga íñiaí ringo jéiciga. Iemo nana Juziñamui comuítacacai.

13 Bíemona ¿nie izói comécidíomoi? conímamo omoi daini. Ringo ifoci íbáiñeno Juziñamui mo úriadi, meita figura, nibai figóñede. Mai daini.

14 Nanómona omoi izóidino griego imaci onóigaza: Ima ífótiirena baiñede; meaire cíoideza.

15 Daje izói afe abina cai onónafue jíáifuena dáanomo cai llote. Ringo ífótiirena ñue baite, mei áfedo aféngomo ñúefue nítaítaiioi. Jaca afe ringo ifoci íbáiñena, ie ífótií áretiina comuítaca.

16 Mei dáamie bizóidífue júfidoacaniadi, bie cue llógamo mai cacai, mei Cristo orécamacai cue diga jíáifoidífuena náfueñediacai. Daje izói Juziñamui mo ínotino bífue baimo jíáífo maméñediaioi.

Cai Ocuíraimamo cai uibíñoga güilla rafue jíáimaci báca

17 Bie izói cue dainado ómoimo ñúefuena nítañeíticue, mei omoi gairíllafuíaímo ñue íñeno, conímama fiendi finódiomoi.

18 Fueñe bífue llóiticue. Dámierie omoi illáfuena cue fíditatíaiioi. Juziñamui cáimacaillena omoi gairilla llezica, jíáimana énenoruidíomoi, daiídiaioi. Afémaci cuemo llógana jabo ínoticue.

19 Afe eneno bozíetaíllafue comuífiredeza, nibézie Crístimoi nahí ínotinona, nibézie íñoñedinona jino uáfodo daiíllena.

20 Conímama omoi énenoruillamona, bie izói zúide. Gairíllano omoi güíllafue omoi bácaza, ja birui áfena cai Ocuíraíma íeñede.

21 Mei güízájillamo dúcina llezica, illa dígamie dama ie atíca güille güízájillena járitáifrede. Iemo dáarie júfíruilla llezica, jíáimaci jífáizaíbitíaiioi.

22 ¿Meita birui omoi jofónidíomoi, afénomo güítá omoi jiróllena? Bie izói omoi íllado Juziñamui mo nahí ínotinona jámairuíomoi. Afe dáaruido güíllenidínona meáiruitadíomoi. ¿Mei nie izói ómoína dáíitíicue? ¿Mei ómoimo ñúefuena nítaíredíicue? ¿Aferi ómoimo ñúefuena nítaíndíicue!

*Cai Ocuíraíma íraicaiño güíllamo cai uíbicaíllafue
(Mt 26.26-29; Mr 14.22-25; Lc 22.14-20)*

23 Uáfueza, cai Ocuíraimamo cai uibíñoga güíllafue fiendi omoi fínuamona, ómoimo ñúefue nítaíndíicue. Mei nauí ómoína cue daina izói, bie omoi cue llófuíafuena dama cai Ocuíraíma llotátacacueza. Afefue be ñie: Cai Ocuíraíma Jesús afe ie Judas fécaja naio, pan llínote.

24 Línuano Juziñamuina: “Iere figura” daide. Daina méifodo fécano daide: “Mai omoi güi. Bie cue abi; omoi ñue íllena dítaica izói ómoimo cue fecácaza. Bífuedo cuemo omoi uíbicaífireiri,” daide.

25 Daje izói íaioi güílla méifomo, jiróracuri llínota daide: “Afe bie jiróracuri eromo ite íji, ómoimo cue comuítalle cómofuena ómoína onótate. Afe bie Juziñamui mo dájena omoi jaináitale cómofuena cue die uáfueña ífcaítate. Diga ícaíño bie íjimonaa omoi jiróadi áféjido cuemo omoi uíbicaífireiri,” daide.

²⁶ Nana bífuiai jira, Jesucristo nai meine ana biñena llezica, nágaruillai bie pan omoi güiadi, íemo bie jiróracuri ero iji omoi jiróadi, áfedo Jesús cai ícoinia tíllana jino uáfodo llóitiomoi.

Afe bie cai Ocuíraimamo cai uibicaillafue jaca ñue coméicillamona finórede

²⁷ Mei jira, nie come bie paana Juziñamuimo ñuefueña nitáñeno güiadi, daje izói afe jirócaji afémie fiñi jiróadi, afémie cai Ocuíraima abi naa ie die diga fiñi finode.

²⁸ Ie jira, illa dígamie nai afe pan güiñena llezica ie ifoci úrillana ñue onórede; daje izói áfeji ie jiróacana llezica áfena onórede.

²⁹ Mei onóigaza afe pan Cristo abina caina onótate. Dáamie aféfuena ñue náfueño ebena güiadi, afe daií ie güillamona dama Juziñamui íena duere fínoite. Daje izói dama Juziñamui ie duere finóllji jírúa izoide.

³⁰ Daií omoi íllamona ómoimona aillo irárediaíoi. Jiáie comini náinidiaíoi. Iemo daje izói dáarie tíidiaíoi.

³¹ Mei jiáifodo dani cai ifoci úrillana ñue cai náfueia Juziñamui caimo riire jícánoñeite.

³² Mei íadi cai Ocuíraima riire caimo jicánoyadi, afe jicánuado afémie izire caina lletade bíniemo ite Juziñamuimo íñoñedino diga cai duere finobiñeillena.

³³ Mei cue ámatiai, bie izóideza: Comunióñ güitállena omoi gairiadi, dámie riire güiñeno dájena omoi güitálleza conima omoi úiñori.

³⁴ Dámie ie jufuruiadi dama ie jofomo güizájirede, fiñi omoi gairíllado Juziñamui duere omoi fínoiza daií. Ico omoi cue eróizaille llezica, omoi jicaca jiáifuiai jaícina jóoneiticue.

12

Juziñamui Ñuera Joreño illa dígamie Juziñamuimo cai tájinana fibíllena caimo fecade

¹ Amatai, Juziñamui Ñuera Joreño illa dígamie fecaca Juziñamuimo tájinana fibíllena ómoína fidítaacadie.

² Ñue onódiomoiza, nai Juziñamuina omoi onóñena llezica, úrinide jánarai anamo íllena cuinada zonóicaigamoi.

³ Iemon: “Bífueña omoi onóiri,” daidie. Jesuna faidódimie jaca Juziñamui Ñuera Joreñodo úrinide. Daje izói Juziñamui Ñuera Joreñodo úriñedimie jaca uáfueña, “Cue Ocuíraima Jesús” daíñide.

⁴ Illa dígamie afe fecaca jiáiforie Juziñamuimo tájinana fibíllena ite. Mei íadi aféfuiai daade Juziñamui Ñuera Joreño fecácaza.

⁵ Illa dígamie jiáiforie conimana canóredicai, Juziñamui ocuícamacina cai íllena. Mei íadi daade cai Ocuíraima anamo iticai, ie cai íóbitallena.

⁶ Illa dígamie omoi illafue ñue jaícina jóoillena, Juziñamui diga jiáiforie caina ocuíoide. Mei íadi daade Juziñamui nana comínina ocuíoide.

⁷ Juziñamui Ñuera Joreño caido jáicanana cai ónoillena facáfírena raana illa dígamie Juziñamui fecade, nana jiáimaci cai canóllena.

⁸ Ie jira Juziñamui Ñuera Joreño dáamie iere baitádimiena jáillena íena fibítate, jiáimaci llófuellena. Iemo jiáimiena daje Ñuera Joreño nimáiraíma úrifírena izói úrillena íena fibítate.

9 Iemo jiáimaci afe daade Ñuera Joreñodo jamánomo Juzíñamuimo ñinotagaiaioi, áfedo jiáie Juzíñamuimo ñinotino ñue canóllena. Ie mei jiáimaci iráredino jilotaraimana fibítagaiaioi.

10 Iemo dáarie uaido dánamona comuide raa finuana fibítagaiaioi. Iemo jiáinona Juzíñamui daina uai uáfodo jino llóllena fibítagaiaioi. Iemo jiáimacina nie ua Ñuera Joreñodo úrillana daje izói nie taino jóriaído úrillana onóillena Juzíñamui fibítate. Iemo jiáimacina nai llófueñega jiáiforiede uáillaído úrillana onóillena fibítagaiaioi. Iemo nai jiáimaci afe daina uallaí ñue jino dobáñuana onóillena fibítagaiaioi.

11 Mei íadi nana bífuiai daade Juzíñamui Ñuera Joreño fecaca. Ua dama ie óiacana izói, illa dígamíemo jiáiforiede fibíllafuiaiina fecade.

Nana cai bie dáamie abímo dúidicai

12 Bífuiai nana bie izói jóide, mei Cristo íemo ñinotino díga, daade abí izóideza. Afe daade abímo jaináidinuiaina aillo ite. Mei aillo ite íadi, nai afe abí daade.

13 Afe izói aillo jiáfoidinona cai illamona, nibai judíodicai, nibai griégodicai afe jaca mámeñega. Mei daade Ñuera Joreñodo nana cai daade abina jaináitagacaiza. Daje izói nibai rairuicanodicai, nibai rairuifeganodicai daje abina iticai. Ua daade Juzíñamui Ñuera Joreño daade abina finócacai. Afe daade Juzíñamui Ñuera Joreño úcaitagacai.

14 Cai abí daje izóifíede, mei díga ráaniai daade abímo jaináinaza.

15 Mei jii, come eiba: “Cue bie ónoñedicueza daje abí íñédicue,” daííadi, daíí dáinado daje abímo ie jaináinana uáitanide.

16 Daje izói come jefo: “Cue bie újñedicueza daje abí íñédicue” daííadi, daíí dáinado daje abímo ie jaináinana uáitanide.

17 Mei cai abí nabáinino daa újji íadi ¿nie izói cácaiticai? Daje izói cai abí nabáinino daa jefo íadi ¿nie izói jálliana cácaiticai?

18 Mei íadi nana cai abímo jaináidinuiaina, afe abímo ñue baitínuiamo, Juzíñamui ie comeci jítaina izói jóonete.

19 Nana cai abí dáadeniadi afe nabáñíiai illino íñede. Ua abí íñede.

20 Mei íadi ja onódiomoiza, dáamíemo jaináidinuiaina aillo ite, íadi jaca ie abí daade.

21 Daje izói nane jiáfue, cai ui ónoína: “Ona jitáíñedicue” daíínide. Daje izói ifoci eíbana: “Ona jitáíñedicue” daíínide.

22 Mei jiáfodo cai abímo ite mairíñedino iere jamánomo jitáirede.

23 Daje izói cai abímo ite figo comécíñegano áfena iere ñue uíñoticai. Iemo cai abímo jino uáfodo cíotanidinona, áfena iníroido ebire finode.

24 Mei íadi cai abímona uáfori cíoidino cíotanidino izói ebire finónidiaioi. Bie izói Juzíñamui cai abímo itínuiaina dájemo jofu ñue zorode, cai figo comécíñegano ñúefuena jamánomo cai nitállena.

25 Juzíñamui daíí zorode, cai abímo itínuiái conímama énenoruiñeillena. Mei íadi jiáfodo illa dígano conímamo comeci úirede.

26 Come abímo itínuiaimona daano izi cácana llezica, nana jiáinuiái daje izói duere zéfuitaioi. Daje izói dáanomo ñúefue nítano caimare íadi, nana jiáinuiái dájena caimare itíai.

27 Mei jira bie izói nana omoi Cristo abídiomoi. Omoimona illa dígamíiai daa ie abímo itínuiái izóidiomoi.

²⁸ Afe jira Juziñamui jiáifodo táijinana dáarie íemo ínotinomo jóonete. Nano fueñe Cristo orécamaci jóonete. (Afémaci jiáifo mameina ie apóstoles.) Afe mei jiáinona Juziñamuimona ogáfuiái uáfodo jino llotino jóonete. Afe mei nane jiáinona ie uai llófueraini jóonete. Iemo uaido dáinamona raana comútatino jóonete. Iemo iráredino jílлотaitino jóonete. Iemo jiáimacina canóñiredino jóonete. Iemo jiáimacina ocuñíreitino jóonete. Iemo nai llófueñega jiáizie uáillaido úritino jóonete.

²⁹ ¿Meita cai nana Cristo orécanodícai? Ieñedícai. ¿Meita nana cai bie Juziñamuimona ogáfuiái uáfodo jino llotínodícai? Ieñede. ¿Meita nana cai ie uaina llófuetínodícai? Ieñede. ¿Meita nana cai bie uaido raana finóñinodícai? Ieñede.

³⁰ ¿Meita cai bie iráredinona jílлотaredícai? Jíllotanidícai. ¿Meita cai bie nana nai llófueñega jiáizie uáillaido úritinodícai? Ieñedícai. ¿Meita cai bie nana aféuai dobáiñuano jino uáfodo llóredícai? Jaca nana llónidícai. Dámierie dobáiñorediaíoi.

³¹ Mei ie jira, nana bie fibíllafuiaiimona baimo ñuera fibíllafuiaiina Juziñamuimona omoi óllena afe omoi nícidori. Mei íadi afe fibíllafuiai baimo, jiáie ññufuena ómoimo llófueitícue.

13

Jiáimana cai izíruillafue

¹ Mei uáfueza, nai llófueñega jiáizie uáillaido úrillana cue fibíadi, íemo afe baimo Juziñamui abí imaci úrilla izóí úrillana daje izóí fibídícue ia, mei íadi jiáimana cue íziruiñeniadi, fia taino ficírede juai izóidícue. Iemo jiáie taia ficírede lloéturu izóidícue.

² Daje izóí Juziñamuimona ogáfuiái jino llúana cue fibíadi, íemo nana nai uáfodo onóñegafuiai llúana cue fibíadi, íemo jamánomo ñimáiraimana cue jáiadi, íemo idu jáinua Juziñamuimo ínogafue cuemo íadi, mei íadi jiáimana cue íziruiñenia, táinomo fáíftícue.

³ Daje izóí, nana cuemo ite ráaniai jiáimaci canóllena fia cue fecáadi, íemo Juziñamui íóbitallena dama cue abí cue jobáitaiadi, mei íadi afe llezica jiáimana cue íziruiñenia, nana cue finócafuiái cuemo ráíñíede.

⁴ Mei jiáifodo, jiáimana izíruitímie jaca jarítaiñede. Afémie dúecaíñede. Daje izóí úradoíñide, íemo afémie uícofíñede, íemo fiení abí íñoñede.

⁵ Daje afe jiáimana izíruíñedímie meáiredífuena jaca lloñede, íemo afémie ie abina jacíre maméñede, íemo afémie jaca rícaíñide. Jiáima fiénidí fue íemo finóadi, fiení comécíñeno raire féitate.

⁶ Afe jiáimana izíruitímie jiáimaci fiénidífuiai fínuari zúureite, mei jiáifodo ua ññufueri íóbíñede.

⁷ Nana íemo comúdífuiaíri caimare ocuide. Raire jarítaiñeno aféfuiaímo ñue úíñooidé. Juziñamuimo izire íñuano aféfuiaíri jacínaiñeno ñue ocuñírede.

⁸ Izíruillafue zíñona jaca záíñeite. Mei íadi Juziñamuimona uícode onoiga ráfuiai záite. Daje izóí jiáimaci uáillaido úrilla llícaite; íemo daje izóí ífócido onóigafuiai záite.

⁹ Mei biruúllaido cai ífócido onóigafuiai ñue ícoimo baitáñedicaíza, jabo onódícai. Daje izóí Juziñamui uícode onoiga ráfuiaíimona due jino llotícai, mei due onódicaíza.

10 Mei íadi uire Juzíñamui nana ráfuiái caimo baitálliruimo afe ícoimo ñue báitañegafuiái fáicanocaille.

11 Nai cue úruena llezica úruiaimo itífuiaido úriticue. Urue comeci fácaja izói, comeci facádícue, íemo úrue ifoci úrilla izói iticue. Mei íadi ja cue móonaila llezica, úrue illa izói cue illáfuiaina fáicanocaidicue.

12 Daje izói birui Juzíñamui dibénemo cai onóigafuiái jaicuíbicaide. Dámie jáiaira acáranimo figo cíoíñena izói afe izói Juzíñamui ífuiaina birui figo baitáñedicaí. Mei íadi ico jáíruido nana ñue báitaiticaí. Birui cue ifoci úrilla figo déíñedeza, jabo onódicue, mei íadi aféruído nana ñue ónoiticue. Jii, Juzíñamui cuena onona izoi ñue jaícina ónoiticue.

13 Mei daí Juzíñamuimo ínogafue, íemo jáí ocuírínafue, íemo jáí izíruillafue jaca zíñona féíñeite. Bie daámanidemon a izíruillafue iere jamánomoide.

14

1 Mei ie jira, afe izíruillafue iere jeire omoi oiri. Afe ua llezica Juzíñamui Ñuera Joreño fecaca jáíforie tájinana fibíllena izire omoi jenori. Omoi jenolle llezica, Juzíñamuimona onoiga uai jino llua baimo izire jcari.

2 Mei íadi dámie nai llófueñega jáízíe uaido úriadi, dama Juzíñamuimo úrite. Comínimo úriñede; mei afémie úrillana buna canóñenaza. Afe ónoñega uaido úritímie Ñuera Joreñodo úrite, mei íadi afémie daína uai uáfodo onóñena báinino jóoide.

3 Mei jáífodo afe Juzíñamuimona onoiga uai llotímie, comínimo úrite íaioi joreño dibéfuemo íaioi ñue móonaitallena; daje izói ñue íaioi náireillena, íemo jáí íaioi caimare fírallena.

4 Afe jáízíe uaido úritímie dama ie joreño dibéfuemo móonaite; mei íadi afe Juzíñamuimona onoiga uai llotímie, Juzíñamuimo jáináidinona ñue móonaitaite.

5 Afe nai llófueñega jáízíe uaido úrillana nana ómoiena jitáidícue. Mei íadi Juzíñamuimona onoiga uai jino omoi llóllena iere baimo jitáidícue, mei afe onoiga uai jino llua, jáízíe uaido úrilla baimo ráífide, Jesucrístomo ínótino aillo móonaitallena. Mei íadi afe jáífoide uaido úritímie úrilla dobáñoraíma íadi, afefue ñuera; mei áfedo nana Juzíñamuimo jáináidino dani íaioi joreño dibéfuemo daje izói ñue móonaitaíoiza.

6 Ie jira ámatiaí cácarei. Uire omoi cue uáiduaíbia omoi cígiri Ñuera Joreño úritate jáízíe uaido cue úriadi, cue úrilla ómoímo due jiza ráííñede. Mei jáífodo Juzíñamui caimo onótagafuiaido cue úriadi afefue ómoímo ráífide. Daje izói omoi ifoci ua uaina cue déitaiadi afefue ráífide. Iemo daje izói Juzíñamuimona onoiga uai ómoímo jino cue lloia afefue jáí ráífide. Daje izói omoi cue llófuia ráífide.

7 Mai nana omoi rúado taiga raamo ñue comécíiri, áfemona ñue onóillena. Afe raa jaca comécínideza. Be totíbacui, íemo arpa, íemo juai diga caimare ficire úrite, mei íadi jáíma fiendi taia, áfena cacáidino afe úrilla uaina ónoñeitiaíoi.

8 Daje izói comini jobáiriacana llezica, uáidua juai táíñeniadi comini figo áfemo mámeríñeitiaíoi.

9 Afe izói ómoímo íficaide: dáamie jáífoide ónonide uaido omoi llófueia ie dáinana bu onóñena. Afémie táinomo úrite.

10 Uáfodo onóigaza; bie éniemo diga jáíe nairai uailai ite. Afe uáíllaina onóidino nana aféuailai ñue baite.

¹¹ Mei íadi cuemo úritimie uaina cue ónoñenia, afémiemona jicánemiedicue. Daje izói afémie cúemona jicánemie.

¹² Ie jira, afe Ñuera Joréñomona fecaca táijinana fibíllena omoi iere gaina llezica, mai Juzíñamuimo jaináidinona ñue móonaitallifuiaina iere izire omoi jicari.

¹³ Afe jira nai llófueñega jíáizie uaido úritimie afe ie daína uaina ñue jino llúana fibíllena Juzíñamuimo jicárede.

¹⁴ Mei jíáizie uaido Juzíñamuimo cue úriadi, ua cue joréñodo úriticue, mei íadi cue ifoci úrilla, táijiñeno oni eneno ite izoide.

¹⁵ Mei íemona ¿ñifue fñoiticue? Cue joréñodo naa cue ifoci úrillado Juzíñamuimo úriredicue. Daje izói cue joréñodo naa cue ifoci úrillado afémiemo róredicue.

¹⁶ Mei jíi, dama o joréñodo Juzíñamuimo o úriadi o áinori ite, afemo fibitañega cacáreidímie, Juzíñamuina figura o daiífirenafue dibénemo ínide. Mei o dáinana onóñedeza.

¹⁷ Mei nibai Juzíñamuina figura o daiífirena Juzíñamuimo ñue cacaide, íadi jíaimana dama ie joreño dibénedo ñue móonaitañede.

¹⁸ Nana omoi baímo jíáizie uaido úriredicue. Aferi iere Juzíñamuina figura daidicue.

¹⁹ Mei íadi Juzíñamuimo jaináidino gairífirena llezica, ónoñega jíáfodo jóide uaillai baímo, jubeba diga ñue onoiiga uai cue dáinana gáidicue, jíaimaci cue llófuellena. Mei íadi diez mil féirede jíáizie uai afémaci cígimo cue úrillana gáñedicue.

²⁰ Amatíai, úruiai comeci faca izói, afe izói comeci omoi facáñeno iri. Mei jíáfodo éicomini izói comeci omoi facari. Mei íadi fiénidífue dibénemo jézinidino izói omoi iri.

²¹ Jaiai cai ocuilla uai cuegánicomo Juzíñamui íemo cacáacañede Israel náiraina bie izói daide:

—Bie náiraina jíáie uaíllaido úritinodo duere fñoiticue; onínemacido íaioi llétaiticue.

Mei íadi afe bie uaido nai cuena náfueñeitíaioi.

Daií cai Ocuíraíma daide, —aquíe izói ie uai llote.

²² Mei daií afe jíáizie uaido úrillana fibíllafue Juzíñamuimo íñoñedinomo dúide, jíáie onótate raa izói íaioina onótallena. Ínotinomo dúíñede. Mei íadi Juzíñamuimona onoiiga uai jino llúana fibíllena Juzíñamuimo ínotinomo dúide, jíáie onótate raa izói íaioina onótallena.

²³ Mei jira nana Juzíñamuimo jaináidino dáanomo gairilla llezica, íemo nana omoi jíáizie uaido omoi úriadi ie mei afemo fibitañega íñoñedinomo omoi cígimo bíadi, nibai “Uáiritaidino izóidíomoi,” dáitíaioi.

²⁴ Mei jíáfodo Juzíñamuimona onoiiga uai jino omoi llua llezica, íemo fibitañega íñoñedímie omoi cígimo bíadi, ie comécimo ite fiénidífueña uáfodo ónoite. Nana omoi dáinana cacáillano afémie dama ie comécina méiñotaite,

²⁵ Afe daií dama ie comeci onóigafuiai jino ciocailamona, cañicido ana dújullano Juzíñamuina cáimadoite. Iemona: “Uáfueña, Juzíñamui omoi cígiri íteza” dáite.

Omoi gairilla llezica nana omo lloífuiiai jaicuíñeno jáicina lloiri

²⁶ Mei jira, amatíai, omoi gairíllifuiiai bie izói írede: Omoi gairilla llezica ómoimona dáarie Juzíñamuimo rollírua jino llóiacade. Iemo jíáimie llófueacade,

íemo jáíamie Juzíñamui íena onótagafue jino llóiacade, íemo jáíamie jáífoide uaido úriacade, íemo jáíamie afe jáízíe uaido úrilla jino dobáñoiacade. Nana bífuiai ñuera. Mai bífuiai daí íteza, Juzíñamuimo jaináidino ñue móonaillena, daje izói íemo nai íñoñedino ínotallena.

²⁷ Jáízíe uaido omoi úriadi mena come dáaruido úrinide. Jáíamie úrilla llícailla méfomo úriri. Daámáni come daí úrrede. Naga come jáífoide uaido úrilla fuillamo ie lloga uai dobáñorede.

²⁸ Mei íadi uai dobáñoitímie íñeniadi, mai nie izói jáífoide uaido daíñeno iri. Dámie úriacania dama ie comécido Juzíñamuimo úriri.

²⁹ Daje izói afe Juzíñamuimona onoiga uai llotínomona damieámani úrrede, íadi daje llezica úrinidiaoi. Llotímie fuilla méfomo íemo cacáreidino fairíorediaoi, ie dánana ja Ñuera Joréñomona comuide, ñibai íeñede daíllena.

³⁰ Mei íadi dámie uai jino llua llezica, Juzíñamui jáíe ana ráidimíemo jáííue íena onótaiadi afémie raire fueñe úritarede. Nano fueñe úritímie ie úrillana fáicanocairede.

³¹ Afe daí nana omoi Juzíñamuimona onoiga uai llotino llórediaoi. Uafue dámierie jino llórediaoi, áfedo nana omoi onócaillena; daje izói áfedo nana omoi comeci náirecaillena.

³² Nana afe Juzíñamuimona onoiga uai llotino dani íaioi joréñona rairuédiaoi, nai jáíamie úrilla fuiñena dino.

³³ Mei Juzíñamui caimare uái illííue comuítatímie; íemo, úrillana féitate gáguana afémie comuítáñede.

Nana jáínomo ite Juzíñamuimo jainaide gairídino fínua izói birui ómoína finótaitíue.

³⁴ Juzíñamui íóbillena omoi gairilla llezica, cígimo ite ringóniai úrilla rairuédre, íñiaina ie llófuellena. Juzíñamui ocuilla uai daina izói, aféngotíai íima anamo caimare írediaoi.

³⁵ Aféngotíai daa rafue onóacania, jino jofomo íaioi ínimo jícanorede. Daa ringo comíni gairilla cígiri úria meaire cioide.

³⁶ Mai cácarei, ¿Meita Juzíñamui uai dani ómoimona comuide, daí comeci facádiomoi? ¡Daíñede! Daje izói aféuaina dani ómoimo llógaza comécíñeno iri; mei diga jáíamaci íena, daje uaina jae llogaíaoiza.

³⁷ Daa come Juzíñamuimona onoiga uai jino llotímiedíue daííadi, bie ómoimo cue cuezáfuiái cai Ocuíraíma Jesucristo cai ocuilla uai afémie daíírede. Daje izói daa come Ñuera Joréñodo úritímiedíue daííadi, afémie cue cuela dibénemo Jesucristodo cai ocuilla uai daíírede.

³⁸ Íemo afe cúegana ailli cue daina bie izói daííacañedimíemo omoi náíueñeno iri.

³⁹ Cue ámatíai, bíemona Juzíñamuimona onoiga uai jino llua jeire omoi oiri. Íemo da come jáízíe uaido úria, rairuñeno iri.

⁴⁰ Mei íadi afe llezica, omoi lollíuaina jaicuíñeno daje fuémoma jáímamo meaire cíotañeno lloiri. Daje izói nana omoi jetaca raana jaicuíñeno ñue jaícina maméfireiri.

1 Cue ámatiaí, ómoimo cue lloga jállona uai ómoína uibíñotaacadícue. Afe uaina jae jeire otíomoi. Iemo bie uaido ñue itíomoi.

2 Daje izói cue lloga uai omoi náfueia bie Juzíñamui uai omoi úado jillotagaomoi. Mei íadi nauí nibai táinona omoi íinoia jae jíllañediomoi.

3 Cue onoiga jamánomoidí fue nauí ómoimo llotícue. Juzíñamui Cuegáuai daina izói, Cristo cai fiénidífuiaí muiñóllena tíllafuena jae omoi llófuetícue.

4 Iemo nane afe Cuegáuai daina izói, Cristo raíga daruíamáni íllamona meine abido cáadimiena jáillana ómoína llófuetícue.

5 Iemo afe Cristo Pédro mo cíocaide; afe mei nana jíáie ie orécamacimo cíocaide.

6 Nane afe mei dáaruido quinientos baimo íemo ínotinomo cíocaide. Afécamimona aillo nai itíaiói, íadi dáarie jae tíidiaíoi.

7 Nane afe mei Santiagomo cíocaide, íemo nane nana ie orécamacimo cíocaide.

8 Nana jíáimacimo cíocailla mei, íraínomo afémie cuemo cíocaide. Iemona úrue jíáifodo jocoina izóidimiedícue, mei Crístomo cue dóbaicaillafue jarire cuemo íficaideza.

9 Mei Jesús orécamacimona jofófenemo ráifidimiedícue. Juzíñamuimo jáináidino fállena cue racáfrenamona, nauí ie orécamie cuena daíñide.

10 Mei íadi Juzíñamui ñue cuemo íllado, bie izói itícue. Afémie cuemo dúecaillano afémie cue cánuana táinomo fáifitañedicue. Mei jíáifodo jíáie ie orécamaci baimo, iere riire táijidícue. Mei íadi afe izói dama táijinidícue. Juzíñamui cuemo dúecaillano cue diga jáicaillado daí táijiredícue.

11 Mei biruí, afe ñúefue nibai cue lloga, nibai afémaci lloga, afe lluáfueña náfueñedicue. Mei íadi bie ñúefue ja ómoimo cai llogafue, daje izói afefue omoi íinogafue.

12 Mei bie ómoimo cai llogafue Cristo tíllamona meine abido cáadimiena jailla. Afe llogafue bie izói ítena, ¿mei nie izói ómoimona dáarie: “Tíidinomona buna meine abido cáadinona íñeite,” daidíaíoi?

13 Meita íaiói daina izói tíidinomona buna cáañenaza, daje izói meita dama Cristo cáañeite.

14 Iemo meita Cristo cáañedeza cai llócaiga uai ráifíñede. Daje izói omoi íinogafue ráifíñede.

15 Iemo afe baimo, cai bie Juzíñamui dibénemo táino llotínodicaí, mei Juzíñamui Cristo meine abido cáatate daidícaiza. Meita tíidino meine cáañenaza, daje izói Juzíñamui Cristo meine cáatañeite.

16 Mei tíidino meine abido cáañeniadi, meita afe Cristo cáañeite.

17 Iemo meita Cristo cáañedeza, omoi íinogafue ómoína ñue finóñede. Nai ómoimo ite fiénidífuiaímo nai jáináicaídiomoi.

18 Meita íaiói daina izói Cristo cáañedeza, Crístomo ínote tíidino táinomo fáifidiaíoi.

19 Meita Crístomo cai ocuírínafue daa biruíllaido bíniemo cai illa llezica caimo dúideza, nana comíni baimo cai duere finócanodicaí.

20 Mei íadi afe izóíñede. Cristo tíllanomona meine abido cáadimiena jailla ñue onóigaza. Amena llizíllajimona jotáiritíji fueñe uailla izói, Cristo nana tíidinomona meine abido caadino ífódime.

21 Mei bie izóí daa cómemona, Adán dainámiemona tíllafue fueñe biniemo comuideza; daje izóí tíidino meine abido cáailifue daa cómemona comuide. Afémie Jesucristo.

22 Afemona nana comini Adamo jaináideza, tíitiaoí; íemo daje izóí nana Crístomo jaináidino meine abido cáaitiaoí.

23 Mei íadi nana nairai daje llezica meine abido cáañeítiaoí. Nágamiiai íaioimo dúide dieze, íaioí cáatalliruido cáaitiaoí: raire uíodo oga llizillaji óina izóí, Cristo fueñe meine abido cáadimiena jaide; afe mei Cristo billíruimo dama Cristo íédino cáaitiaoí.

24 Iemo íirairuimo dúciite. Aféruimo Cristo nana biniemo ite riírede illaini naa monamo ite riínoredinuiari niné táinocaitaite. Afe mei nana ie illáimana illa riino naa ie anamo itínuiari ie Moo Juzíñamui fécate.

25 Mei jíi, Cristo nai illáimana írede, Juzíñamui nana íena éoidino Cristo anamo itábicaítalle dino.

26 Come tíllafue caina anáfenoacade caina éoidimie izoide. Mei íadi afe cai titade riinona Cristo íirainomo niné táinocaitaite. Afe mei jíaie táinocaitallimiena íñeite.

27 Mei Juzíñamui nágaíuaina Cristo anamo jóonete. Cristo ñue afémaci ocuíllena. Juzíñamui Cuegáuai bie izóí daííadi, Juzíñamui Cristo anamo íñenana uáfodo onóigaza, mei Juzíñamui naga raa Cristo anamo jóonetimieza.

28 Iemo nágaíuiai Cristo anamo itábicailliruimo, dama afe Cristo Juzíñamui jitoza ie Moo anamo itábicaiteza. Juzíñamui nágaíuiai Cristo anamo itábicaítitimie. Aféruimo bífuiaido naga ráaniai dibénemo Juzíñamui jamánomoidimiena íite. Naga ráfuiiai naa ie comuítaga ráaniairi ñue jaícina afémio dúite.

29 Nane jíaífue “Tíidinona meine cáañeite” daíífredinona daíitícue. Dáarie tíidino dibénedo báutizatatino ite. Meita tíidino meine cáañeítiaoíza, ¿nibái mei daíí báutizatataioí? Iemo tíidino dibénedo báutizafue ¿minícamo ráifide?

30 Iemo cue, cue nabáñiaí diga, Juzíñamui ñuefue ícoinia, nágaruillaído iere caina titáacade jácifue mo ífredicai. Meita tíidino meine abido cáañeiteza, daíí cai íadi ¿minica caimo ráifilla?

31 Nágarui cue titállena maméíaoíza jácinomo itícue. Uáfueña daíí itícue. Cue ámatiaí, cai Ocuráima Jesucrístomo omoí ínuari uáfueña iere íóbídicue. Afe uáfueña cue íóbilla izóí, daje izóí uáfueña nágarui titáacagacue. Iemona tíidino meine abido caalle uáfodo onóigaza.

32 Iemo meita tíidino meine cáañeiteza, jamai cómena cue illa, Efésomo ite illáirede rille izóidimaci diga nauí cue fuirillamona ¿minica cuemo ráifilla? Mei afe izóí cue illa cuemo ráifíñede. Meita uáfueña tíidino meine cáañeiteza, afe taino llotino ñue jaícina daídiaoí. Afémaci daina bie izóí jóide: “Mai raire cai guílli, guíllano cai jirolli; mei úreitíruimo raire tíiticaíza afe mei nine íñeíticai,” daídiaoí.

33 Jáímamo omoí jífueíñeno iri. Abina ñue onona uai uáfodo jóideza: “Fíenide nabáñiaí ñue illáfuiaina niné táinocaitate.”

34 Mei jíáfodo, ñue abina omoí onoiri. Omoí illafue ñue jaícina jóoneri. Fíenidífuena finóñeno iri. Mei ómoimona dáarie Juzíñamui nai figo onóñedeza. Omoí méaicaíllena bie izóí ómoína daídícue.

Tíidino meine abido cáadinona íllena abí Pablo lloté

³⁵ Nibai birui ja dáarie jicánoite: ¿Mei nie izói tíidino cáaitiaioi? ¿Mei afémaci abi nie izói éroite?

³⁶ Afe izói jicánua abina onóñedimie úrilla izoide. Mei daa rífiregaji cai riadi, afeji tíide izói énie anamo fiébirede, áfemona ie iroci zicóllena.

³⁷ Eniemo riga raa, afénomona zicódirocifñede, mei jiáifodo dama ie iji rína. Iemo diga jiáiforiède íjai rína: bellaji rína, íemo mazácaji rína, íemo arroz iji daje izói rína.

³⁸ Afe rínaji zícua llezica ie ciona izói Juziñamui comúitate. Dani aféjiai dúina izói zicótate. (Bellájimona bellari zócaja, íemo mazácajimona mazácarí zócaja.)

³⁹ Mei afe izói naga cáadinuiai abi jiáiforie eroide. Come abi jiáifoide, íemo rille abi jiáifoide. Daje izói féedino abi jiáifoide, íemo chámuniaí abi jiáifoide. Nana daje izói eróifñede.

⁴⁰ Iemo jiái monamo ille abi ite, íemo jiái éniemo illa abi ite. Biniemo illa abi ebírede, mei íadi monamo ille abi ebire eroína jiáifoide.

⁴¹ Jitoma egáiñua fiui egáiñuana eróifñede; jiáifodo egáiñote. Daje izói ucudu egáiñua izóiñeno, jitoma jiáifodo egáiñote. Iemo jiái daa ucudu jiáie ucúdumona egáiñua jiáifodo cíoide.

⁴² Tíidino meine cáailifue bie izói jóide. Rífaite íeizi éniemo raiga, íemo tíifñeitinona meine abido cáaite.

⁴³ Jámairuiga abi éniemo raiga, ie mei ebire cíoitaga abi meine cáaite. Daje izói nane ríinide abi éniemo raiga ie mei ñue íocirede abi cáaite.

⁴⁴ Biniemo cai jocoina abi éniemo raiga, ie mei mona dibénemo dúide abi cáaite.

⁴⁵ Mei daí Juziñamui Cuegáuai llote: “Nanóidimie Adana cáadimiena íficaide. Iraie Adán daina Cristo ziiñona cáatatená joréñoredimie,” daide.

⁴⁶ Juziñamui dibénemo cai comúitatimie nano fueñe cómuítañega, mei jiáifodo biniemo cai nanóidimie Adán fueñe comúitaina. Afe méifomo Juziñamui dibénemo cai comúitatimie cíocaide.

⁴⁷ Nanóidimie énie ie finóinaza éniemo dúide. Méifoide Adán daina Cristo mona ie. Afémie cai Ocuíraima.

⁴⁸ Afe énie finóinamie izói, nana bínie comíni ie abi izóidiaioi. Daje izói Jesumo ínuamona monamo dúidino afe monámoma bitímie izóidiaioi.

⁴⁹ Iemona énie ie finócamiena cai eroína izói, afe izói mona ímiena éroiticai.

⁵⁰ Amatiai, omoi cacai, ómoína dáitícue, nana bínie dúide cai abi die diga jaca Juziñamui illáimana illánomo jofo jáinide. Daje izói raire táinocaitaitifue ziiñona illínomo dúifñede.

⁵¹ Mei íadi nanómoma ufado onóñega ráfuena ómoína onótaacadícue: nana tíifñeiticai; mei íadi nana jiáifodo méidoficaiticai.

⁵² Uáfuena, Juziñamui íraie vudugoi fúnua llezica, jarire ui bótacailla izói raire jiáifodo méidoficaiticai. Afe vudugoi ficire cáacaillamona tíidino meine abido jaca tíifñellena cáatalliaioi. Afe llezica cáimona cáadimaci jiáifodo méidoficaiticai abido tíifñellena.

⁵³ Mei caimo ite raire féitífue ziiñona féifñeitifuena méidoficairede. Daje izói cai tíite abi ziiñona tíifñede abina méidoficairede.

⁵⁴ Iemo afe bie caimo ite raire féitífue ziiñona féifñeitifuena méidoficailla llezica Juziñamui Cuegáuai daina ñue jaícina zúite. Daje izói cai tíite abi ziiñona tíifñede abina méidoficailla llezica afe Cuegáuai ñue jaícina zúite. Afe Cuegáuai daina bie izói jóide:

Caimo ite táillifue,
caina éoidimie anáfenoina izói, anáfenoga; ja táinocaide.

⁵⁵ Cai tátaitifue caina izi cácatafirena ríino jae iñede.

Caina nie izói níbaiñeite,
mei ie molleroi izoide raa ja birui iñédeza.

⁵⁶ Nana comínimo fiénidifuiái íllamona, tátaitifue caina jacíruidade. Iemo jaiái Juzíñamui cai ocuilla uai llúamona cai fiéni finócafuiái duere finórede. Iemona táillifue cai anáfuenuana jaca jacíruidicai.

⁵⁷ Mei Juzíñamui cai Ocuíraima Jesucristodo áfemo caina anáfenotañenamona iena iere figura daiífiredicai.

⁵⁸ Ie jira, cue izíruiга ámatiai o íinogafuena jíáifodo méidoñeno ñue jeire omoi oiri. Juzíñamui ocuica tájinafuego nágaruillai iere omoi náfuefireiri. Mei ñue onódiomoiza, cai Ocuíraimamo dájena cai tájinafue, jaca táinomo fáifiñeiteza.

16

Dúrede cai ámatiai canóllena úcube eneno ofítafue

¹ Crístopmo íinote ámatiai canóllena úcube omoi jícanoga eneno ofítallifue llóitícue. Galacia éniemo ite Juzíñamuimo jaináidino cue llófuia izói, afe izói omoi ofítari.

² Naga semana táiniaruimo, ómoimona illa dígamie omoi oga úcubemona due jiza Juzíñamui iena oni eneno jóneri. Nano omoi llánuua dieze oni eneno jóneri. Daií úcodo omoi ñue eneno énofireiri, cue billíruimo afe úcube ómoído cue íraíñeillena.

³ Uire cue bille llezica omoi nizeda dani baillímiedo afe úcubena Jerusalémo óreitícue. Afe llezica omoi cuelle útimíai mámece íllábedo íaióina óreitícue. Afe bie izói omoi ofítaga úcubena Jerusalémo ite ámatiaimo óreitícue.

⁴ Onoñegaza, cue jíeruia afémaci díga dane jáitícai.

Pablo jíáinomo jáillena mamérite

⁵ Cue jáiadi Macedonia éniédo jáiacadicue. Afe méifodo daií Coríntomo dúciitícue.

⁶ Mei níbai nano nié dino omoi cígiri íitícue. Níbai ónoñegaza bie rozírediruillaina omoi cígiri záitaitícue. Afe mei oni jíáinomo cue jaille llezica cuena canóredíomoi.

⁷ Mei ómoímo fia jarire érocaillano jáiacañedicueza, cai Ocuíraima comeci jítaia, omoi cígiri are íacadicue.

⁸ Mei íadi Pentecostés rafue dúciille dino, benó Efeso jófuego íitícue.

⁹ Mei iere ñue Juzíñamui uaimo cue tájillíruimo itícueza. Aillo comíni birui aféuaimo jíeruicadiaíoi. Mei íadi afe llezica aillo afe uaina uáitatino ite.

¹⁰ Timoteo ómoímo bíadi, mai omoi cígiri caimare íena omoi itátari. Afémiena omoi áfedeñoeno iri. Mei afémie daa cai Ocuíraima ocuícamo cue izói tájideza.

¹¹ Ie jira ómoimona buna afémiena jámairuíñeno iri. Mei jíáifodo cue ie érozaibilleza caimare afémiena omoi canori. Mei naa jíáie íinote ámatiaíoiri iena ocuírídícue.

¹² Cai ama Apolos dibénemo llóiticue. Naui íemo izire jicádicue, jáie ámatiaioiri omoi érozai'llena. Mei íadi afémie birui jáiacañede. Uire ie jáiacalliruimo jáite.

Jiraicaiño uáidonocaila uai

¹³ Mai abina ñue omoi onoiri. Crísto mo omoi ñnogafue jáífodo méidoñoeno jeire omoi oiri. Jacíruiño ñue lociredimie izói omoi iri.

¹⁴ Nana omoi jetáacagafuai, conímana izíruillafuedo finori.

¹⁵ Amatai, birui onódiomoiza, Estéfanas mámeciredimie comini, nano fueñe Acaya éniemo ñúefuemo dóbaicaidino. Dóbaicailano jáie Crísto mo ñnote ámatiai canóllena ja maméritiaioi.

¹⁶ Jira afémaci, naa jáie afémaci izóidinori anamo omoi caimare itábicaillena iere jitáidicue. Daje izói jáinona canófredino, naa jabo ocuáidinori anamo mai caimare omoi itábicairi.

¹⁷ Ja Estéfanas, Fortunato, Acaico diga bíllari iere ióbidicue, mei cúemona jica itíomoiza cuena canónidiomoiza. Mei íadi afémaci ómoimona féiredifue cuemo finódiaioi.

¹⁸ Afémaci cue comécina iere náiretadiaioi; daje izói ómoína náiretadiaioi. Afe izoide cominimo ñue omoi jíeruiri.

¹⁹ Benó Asia éniemo ite Juzíñamuimo jaináidino ómoimo uailai orédiaioi. Daje izói Aquila ie ai Priscila diga naa íaillinoimo gairídinori, cai Ocuárima mámedido uai ómoimo orédiaioi.

²⁰ Nana benomo ite ámatiai oreca uailai, mai omoi llínori. Daje izói conímana caimare uáidori.

²¹ Cue Páblodícue. Dama bie cue ónoido cuela uai ómoimo orédicue.

²² Ninó dáme cai Ocuárima Jesucrístono izíruiacañedimie Juzíñamui faidólleza. ¡Cai Ocuárima, mai raire biri!

²³ Cai Ocuárima Jesucrísto ómoína ñúefuena éziciiteza.

²⁴ Nana omoi Jesucrísto mo jaináinado, ómoína cue izíruilla uai orédicue. Daiítadeza. Jae ñie.

MÉIFODO SAN PABLO CORINTO IMACIMO ORÉCABE

Segunda Carta del Apóstol San Pablo a los Corintios

Coríntomo ite Juzíñamuimo jaináidinomo Pablo cuete

¹ Páblodicue. Juzíñamui comeci jítaina izóí Jesucristo orécamedicue. Timoteo cue diga illa llezica, Coríntomo ite Juzíñamuimo jainaide ámatiaimo bibe cueticue. Daje izóí Acaya éniemo ite nana Juzíñamuimo dúidinomo bibe cueticue.

² Cai Moo Juzíñamui, cai Ocuíraima Jesucristo diga ómoína ñue éziciteza. Afe llezica ñue uái illano dibénemo Juzíñamui Jesucristo diga ómoína jóoneiteza.

Pablo duere zefuñlafue

³ Cai Moo Juzíñamuina ióbitaredicai, mei afémie caina dúeruite Mooza. Daje izóí afe Juzíñamui iere caimo dúecaifrede. Afémie cai Ocuíraima Jesucristo Moo.

⁴ Nana duere cai zefuilla llezica, afémie caimo dúecaifrede. Afémie caimo dúecaide, afe izóí jíáie duere zefuúidinomo cai dúecaillena. Afemona Juzíñamui caimo lloga dúecaillafue jíáimacimo llóredicai.

⁵ Mei Cristo duere zefuñlafue dibénemo cai nabaia izóí, afe izóí Crístodo caimo iere ie dúecaillafue jeire óitícaí.

⁶ Ie jira, ñibai dama duere cue zefuía, bie ómoína cue canóllena. Iemo ñibai Juzíñamui cuemo dúecaiaí, áfedo daje izóí dúecaillafue, naa jillonafue diga óitíomoi. Iemona daje cuemo comuide duere zefuñlafue ómoimo comuáí, raire jarítaiñeno áfemo fia ocúirirediomoí.

⁷ Omoi dibénemo uáfodo onóigafuemo ñue ñnoticue, mei ñue onódicueza daje zefuñlafue dibénemo omoi illa dieze, afe izóí Juzíñamui fecaca dúecaillafue óitíomoiiza.

⁸ Amataí, Asia éniemo cuemo comuide féiredifuiaina ómoimo fidítaiacadicue. Afénomo cuemo comuide riírede facátáfue iere jamánomoideza, áfena ocuínidicue. “Ñibai bífuemona jilloñeno benó tíitícueza,” daíífredicue.

⁹ Aféruimo méinellena llavécamié aþi izóí cue abi cacaide. Mei íadí tíidino meine abido cáatate Juzíñamuimo cue ñnuana cue onóillena, afe zuufue cuemo comuide. Dama cue abí ññoñeillena cue llófuete.

¹⁰ Aféruimo Juzíñamui afe iere jacírede tíllafuemona cuena jíllotate. Afémie nai birui jaca cuena jíllotaicaide. Daje izóí úreitiruiñlaido afémie aféfuemona cue jíllotallemo ocúiricaidicue.

¹¹ Uáfueña, cuedo Juzíñamuimo omoi jíacíreiaí afémie cuena jíllotaite. Aillo comíni cuedo Juzíñamuimo úriadi, aillo íena ióbitaitiaíoi. Juzíñamui cue ézicia ñuefuiari íena ióbitaitiaíoi.

Pablo Coríntomo jáññenafue llote

¹² Daa cue comécido onóigafueri iere ióbidicue. Afefue bie izóí jóide: cue comeci úrilla uai ñfuenino bíniedo cue mácajana llote. Daje izóí Juzíñamui eróicana jíáimana jífueñeno cue mácaja llote. Omoi cígiri bie izóí riire iticue. Juzíñamui caímare cue cánuado daíí iticue. Dama cue fibíllafuedo daíí iñédicue.

13 Omoimo cue cuegábaiamo báinino lloga uaina iñede. Omoi facádoia onoille raa ja uáfodo cuega.

Nane jiáifuena ñue omoi onóillemo ocuridicue.

14 Aféfuena jabo onódiomoi. Afefue bie izói dáiacade: Cai Ocuíraima Jesús billíruimo ómoiri caimare abi cue ñnua izói, afe izói cueri caimare abi ñnoitiomoi.

15 Nana bífuiai iere cue jíeruillamona, omoi eróizaillena fueñe mamériticue. Daií ménacaiño omoi cue éroizailleri íóbitiomoi.

16 Macedonia éniemo cue jaille llezica omoi jarire cue méiñonocaillena comeci facádicue. Afe mei Macedóniamona abido cue bille llezica nane dánomo omoi cue éroizaillena mamériticue. Afe daií afe méifomo judéamo cue jaille llezica cuena cánoitiomoiza.

17 Bie cue mamérillaфуiai comeci cue faca llezica, ¿cuena nibai jiáfodo raire méidofredimie izoide daiídiomoi? Bie éniemo ite fiénidino mamérilla izói nibai cuena mamérite daiídiomoi. Afémaci “Jii” daidíaioi; íemo méifodo daje llezica “Dama ite” daiífirediaioi.

18 Mei íadi Juziñamui uáfueña daiífiredimie illa izói, afe izói táinona “Jii,” íemo “Dama ite” dáaruído ómoína daiífinidicue.

19 Mei Juziñamui Jitó Cristo Jesús jaca táinona “Jii,” íemo “Dama ite” dáaruído daiífinideza. Iemo Silvano, Timoteo, íemo cue, Cristo daina uaillai omoi cígiri lloticaí. Nana Cristo lloga uai táinoñedeza, ua uai. Ie dánana méidofinide.

20 Mei afémiedo nana Juziñamui uícodo llogáuai ñue jaícina zúdeza. Ie jira Juziñamuina cai íóbitaja llezica, Cristo Jesudo “Daiítadeza” daiífiredicaí.

21 Iemo jíai Juziñamui ómoína naa cairi Crísto riire jaináitate, nana cai ñnogafuemoña oni jiáfodo cai báiiñeillena. Daje izói afémie ie táijnafuemo ñue caina jónete.

22 Juziñamui ie Ñuera Joreño caimo íllado caina dama íeiena mamede. Afe ie Ñuera Joreño caimo íllamona ico jiáiruído Juziñamui caimo fecállifuena cai llinollena uáfodo onódicaí.

23 Mei jiáifuemo omoi coméciiri. Omoína duéruiticueza, ómoína duere cue fínoñeillena, uícodo cue mamérilla izói nai ómoimo biñédicue. Juziñamui afe bie cue uaina nabáillena jicádicue, aféuai uafue daiíllena. Cue daina uai uáfueñenia, Juziñamuina abí fatátaiticue.

24 Omoi ñnogafuena riire ocuácañedicue, mei omoi ñnogafuedo Jesu-crísto ñue riire jaináidiomoiza. Mei jiáfodo conímamo tájina izói, omoi iere aillo íóbillena ómoína canócadicue.

2

1 Ie jira omoi cue zúucaitabiñeillena mamériticue.

2 Mei omoi zúucaitadicuena ¿mei bu cuena íóbitalle? Cue zúucaitadino dani cuena íóbitalle, mei íadi cue dinena ómoína zúucaitacañedicue.

3 Ie jira nauí ómoimo cue cuegábemo cue daina izói cueticue. Omoína zúucaitabiacañedicue. Mei jiáfodo cuena íóbitarediomoi. Mei nauí aféruimo uáfueña onódicueza, cue caimare illarui omoi caimare íitiomoiza.

4 Omoimo nauí cue orécabe cue cuia llezica, iere cue comeci zúurenari édicue. Mei íadi omoi zúucaillena afébuena cueñédicue. Mei jiáfodo ómoína iere cue izíruillana omoi onóillena cueticue.

Fieni fínofredimie ie illafue múiñua mei, meine caimare uáidua

⁵ Mei íadi ómoimo riire úriacañedicueza bie izói dáititue. Dámie fiene illa dama cuena zúunaitañedeza, mei jiáifodo cue baímo nana ómoína zúunaitade. Daií daidicue iere riífueña jáiñeilleza.

⁶ Omoi gairilla llezica afe cómemo omoi mameca duere finóllifue ja figo báiteza.

⁷ Mei benómona afémiemo jiáifodo úrirediomoí. Naui ie finoca fiénidifue omoi féitano caimare íena omoi uáidori. Daje izói íena dúcairediomoí, aillo ie zúunaillamona afémie jamánomo anado fiene jáiñeilleza.

⁸ Ie jira ómoimo izire jicádicue, afémie omoi izíruilla meine abido íemo omoi onóallena.

⁹ Naui úicodo bifue dibénedo ómoimo cueticue. Naui omoi cue llófuiana nibai jeire óitíomoí, nibai jeire óñeitiomoí; afena cue onóillena ómoimo cueticue. Daje izói, omoi comeci ífue onóillena afébedo ómoína facátaticue.

¹⁰ Mei ja benómona, ómoína fiene finódime omoi caimare uáidoia, cue daje izói caimare íena uáidotitue. Meita afémie fiene finuado cúemona nino féitalle fiénidino íadi, aféfuena féitaticue. Uáfueza ñue ómoína canóllena Cristo eróicana aféfuena féitaticue.

¹¹ Mei afe zúunaitagamie raire abido íena caimare uáidoredicaiza, afe zúufuedo Taife raire íena ana úiñeillena. Mei Taife comínina bífueñena uailai ñue onódicaiza.

Pablo Tróasmo uái iñénafue

¹² Jesucristo lloga uai Troas jófue mo jino cue lluaíbillla llezica, cai Ocuíraíma áillomaci cuena jieruitajamona Juziñamui cue ocuilla táijinafuena uáfodo caimare fuitáredicue.

¹³ Mei íadi Coríntomona bíacade cue ama Tito afémie cue cióñenamona cue comeci uái iñede. Mei jira Troas imácina facádonocaillano, oni Macedonia éniemo íena jénuaidicue.

Jesucristo mo cai jaiñáinamona buna anáfenoñegacai

¹⁴ Juziñamuina iere figura daiífiredicai; mei Cristo nana éoidinona anáfenua izói, Juziñamui dáfeodo, Cristo diga, nágaruillaido caina úicaiteza. Afe llezica ziórede raa caimare jállia izói, afe izói Juziñamui Crístona onóillifueña caido nágaboiado jica jalléitate.

¹⁵ Cristo Juziñamuimo fecaca ziórede uguci izóidinodicai. Nana jilloitíno mo jallédicai, daje izói niné féiraitíno mo jallédicai.

¹⁶ Afe niné féiraitíno mo titade jucui izói íaire jállecaide. Mei íadi jilloitíno mo caimare íocire cáatate jállia izói jállecaide. Bie Juziñamui ebire mamérrillafue, ¿bífuena bu mei ñue líinorena? Juziñamui cuena cánua izói canóñenia jaca buna figo líinonide.

¹⁷ Juziñamui uailai jáímacimo fécano úcubena líinoñedicue. Afena jaca raiñoñeno llócaidicue. Jáímaci úcube óllena afe uai jiáifodo méidua izói méidoñedicue. Mei jiáifodo Juziñamui orécamie izói, afémie eróicana jáíma jífueño uáfodo úriticue.

3

Juziñamui comue ñue finóllifue bie izói daide

¹ Bie izói cue úrilla, ¿ómoimona nie izói cacaide? Nibai ¿dama cue abí ñnollena meine dáano mo ñue úriticue? Mei íadi daiíañede. ¿Nibai cue

ñue illánona onótatibiai ómoimo izájirede? Mei ñibai jiáimaci fínua izói, ¿ómoimona cue ñue illánona onótatibiai jicárede?

² Mei ñaítañedeza. Dani omoi cue ñue illánona onótatibe izóidiomoi. Omoi baimo jiáie onótatibena jítañedícue. Cue comécimo joide come ñue illánona onótatibe izóidiomoi. Aféuaina nana comini cúemona onórediaioi.

³ Dama Cristo cuega onótatibe izóidiomoi. Cuedo cuegábai izóidiomoi, mei juáifodo caade Juziñamui Ñuera Joreño do úicaiganodiomoi. Daje izói Moisés noficomo cuegáuai fia comini eróicana jeire oñédiomoi, mei íadi omoi comeci úrillado Juziñamuina ióbitaacadiomoi.

⁴ Nana afe bie ñuera cue dáinana jacíruiño daíredícue, mei Crístodo Juziñamuimo daa uai fiéño inofiredícueza. Uáfueza, nana cue dáinana afémie ómoimo zúitaiteza.

⁵ Mei íadi nana cue jetáacagafuiai finolle ríino dama cúemona comuñedeza; mei juáifodo nana cue finócafuii Juziñamuimona comuide.

⁶ Ie lloga comue finóllifueмо cue táijillena, afémie ñue cuena ríinoretade. Afe Juziñamui comue finóllifue, jaii cuega ocuífue jeire cai úado caimo zuitánide. Mei juáifodo Ñuera Joreño comuítaga cai comeci ziiñona cáatino caimo illado, Juziñamui comue finóllifue caimo zuitárede. Afe cuega cai ocuilla uai cai titállena llote, mei íadi Ñuera Joreño cai comécina cáataite.

⁷ Afe Moisés lloga ocuilla uai nofici finóinabícimo cuega. Aféuai lluaíbilla llezica, iere riire ebíredífuiaido lloga. Aféruído Israel nairai, mei Moisés uiéco juáifodo iere quenire eróideza, afémiemo eróinidiaioi. Mei íadi afe riire ebíredífuie fiaicana dúioicaide. Iemona afe ícoimo cai titalle ocuilla uai lluaíbilla llezica iere ebíreia,

⁸ Ñuera Joreño caimo lluaíbígua uai, ua afe titade uai baimo jamánomo ebírede.

⁹ Bífue bie izói dáiacade: mei cai fiénidífuiaimona cai titállena llote ocuilla uai iere ebíreia, birui aféuai baimo ñifuenino cai illena Juziñamui llogafue jamánomo ebírede.

¹⁰ Afe ocuilla uai nauí iere ebírede, mei íadi Juziñamui como finoca jamánomo ebíredífuie comuillamona, afe nanoide ocuilla uai jae figo ebínide; ja birui ráañede.

¹¹ Iemona nauí lloga are iñeno raire záitífuie ebíredenia, afe ziiñona záíñeitífuie nauí llogáuai baimo jamánomo ebírede.

¹² Ie jira afe bífueмо ocuírillano, jacíruiño caimare úriticue.

¹³ Mei íadi cue bie Moisés fínua izói finóñedícue. Afémie uiéco quenire cioina are iñedeza féibicaide. Ie jira afe quenire cíoide dúillana Israel nairai cíoiñeillena, Moisés ie uiéco iníroina ibaide.

¹⁴ Mei íadi dama Moisés uiéco íbaina llezica afe nairai, uina cíóñedíno izói, íaioi ífoci úrilla figo deíñede. Birui afe jaii llogafue íaioi facádua llezica, afe íbaille iníroi izóidífuie íaioi onóillífuena jánaide; mei afe íbaille iníroi izóidífuie nai oni óñegaza. Afe jizítatífuie dama Cristo oni órede.

¹⁵ Nai biruimo Moisés cuegánicuai íaioi facádoia, afe íbáiraroi íaioi ífoci úrillana féitaoicaide.

¹⁶ Mei íadi dáamie cai Ocuíraimamo inínoia, afe íbáiraroi oni oga.

¹⁷ Cai Ocuíraima afe íaioina ziiñona cáatate Ñuera Joreño. Afe ie Ñuera Joreño mo jíruiñemie fiénidena fínuamona ráiruñegamienna jáite. Daje izói

afe Ñuera Joréñodo cai Ocuíraimamo ñnote come, Moisés ocuica uáimona ráiruiñegamiena jaide.

18 Mei íemona cai uíeco ibáillaroi izóidífue iñédeza, uáfori cóide acáraní izóidinodicai. Afemona, cai Ocuíraima ebíredífueña acáraní egáñua izóí, jíaimamo ja ciótaticai. Afe daíí cai bie Cristo izóioicaidicai, mei nágaruillaido íe ebíredífueña jamánomo náamatafiredicaiza. Bífue cai Ocuíraima finócafue. Afémie Ñuera Joreño.

4

1 Afemona cue bie jaca comécina náinidino izóíñedicue, mei Juzíñamui cuena dúecaillano bie táijinafue cuemo jóoneteza.

2 Báinino jíaima jífueñirenana ruifíruiticue naa jíáie meáiredífuiari. Daje izóí jíaima caimare bífuiá uaido úriñedicue. Afe llezica Juzíñamui uaina méidota jíáfodo lloñedicue. Mei jíáfodo jaca uáfuedo úriticue. Afedo Juzíñamui eróicana nana comíni comeci ñue úrillado afe cue lloga ua uaina íaioina jíeruitadicue.

3 Mei íadi cai llócaiga jíllona uai comínimona nano nígamíemo nai ónonino cacaide. Afefe daíí íte, mei afémaci daíí níne íaiói táinocaillífueño jíáideza.

4 Mei afémaci Juzíñamuimo íinoñenamona bínie naama Taife, ui nirilla izóí, íaiói ífoci úrilla uaina féitate, cue lloga comíni jíllotate ebírede Cristo ñúefueña íaiói óñoñeilla. Afe ñúefue ñue úzere egáñnote raa izoide. Iemo afe Cristo Juzíñamuina jíno uáfodo ñue onótate cáadimie.

5 Jino cue llócaína llezica, dama cue abi íena lloñedicue, mei jíáfodo afe Jesucristo cai Ocuíraima llócaidicue. Iemo cue dibéñedo Jesuna cue izíruillamona ñue omoi íllena canódimiedicue daííredicue.

6 Mei Juzíñamui énie comuítaja llezica, afémie “Mai batí jíitino egáñuairi” daide. Afe daíí daídímie, cue comécimo íe ñúefue egáñua izóí jóonete. Afémie daíí cuemo jóonete, Crístodo cuemo ácataga Juzíñamui ebírede cáimafueña ñue cue onóilla.

Juzíñamuimo ñue cai ñnuado cai illafue

7 Mei íadi afe Juzíñamui ráífide cáimafue cue zííñona íñeite abído onótacue. Bie cue abi are íñeite énie níina íciru izoide; mei íadi afe ñúefueña méidotarede íino bie cue jamai abímo jóonega, afe ríino dama cúemona comuíñenana omoi onóilla; íemo jíáfodo afe ríino Juzíñamuimona comuíllana omoi onóilla.

8 Daíí cue íllamona díga féirede finónidífuiái cuemo comuíadi, jaca Juzíñamui cánuado aféfuíai ñúeite. Daje izóí aillo ónonidífuiái zuure cuemo comuíadi, jaca nai ocuíríñedimie izóí íñedicue.

9 Mei jíaimaci cuena duere finóllena cuemo racáadi, jaca zóofeñegacue. Fáinamona ana dotaca izóí íticue íadi, jaca níne táinocaiñedicue.

10 Náganuíaimo cue jailla llezica, Jesús íaiói fállena mámia izóí maméfiregacue. Nágaruillaido afe titállena mamécamié izóí cue illa llezica, afémie ñue cuena náiretade, birui íe cáananona jíno comínimo cue onótallena.

11 Mei nai cue caana llezica, nágaruillaido Jesús ícoínia jacire titállena mamécacue, Jesús cáanana, are íñeno tíite cue abído ciótáfireilla.

12 Daíí cue zefuillamona cue dibéñedo títaigamiéna jíaiticue, mei íadi omoi dibéñedo dáaruído omoi cáataganona jíaitiomi.

13 Juziñamui Cuegáuaimo dáamie duere ie zefuúbicailla llezica daide: “Juziñamui mo ínoticue ie jira úriticue.” Mei daí cue jíái afémie ínuua izói ínoticue, ie jira Juziñamui ñúefuedo úriticue.

14 Ñue onódicueza, afe tíide Cristo meine abido cáatate Juziñamui, afe cáataga Jesúoiri nane cuena cáataite; íemo daane cue, naa ómoiri, ie illánomo úite.

15 Nana bífuiaí ñue omoi íllena daí íficaide. Iemona nai aillo jíáie comínina Juziñamui ñue éziciite. Aillo ie ézicia izói afe dieze aillo comini jamánomo ñúefue íemo nítaitiaíoi.

16 Mei íemona cue jaca comécina náinidino izói íñédicue. Meita cue abi náinioicaide íadi, cue comeci dinena jaca nágarui náireioicaide.

17 Mei íemona bíniemo cue caana llezica duere cue zefuúllafuiaí figo ráañede. Raire líicaite. Ie méifomo afe zuufue baímo ite aillo ninomo fúíñeite ebírede cáimafuiaí cuemo cómuite.

18 Ie jira uído cue ciónamo ébicaiñédicue; mei íadi cue ciónenafuiaímo ébicaiñédicue, mei afe ciona raana are íñeno raire táinocaíteza. Mei íadi afe ciónena raa jaca zíñona íite.

5

1 Ja ñue onódicueza, cue caana abi are íñeno zabide jofo izoide. Iemo jíái onódicueza, bie cue abi táinocaille llezica, Juziñamui cúeiena monamo zíñona zábíñeítico ja nite; afeco come ónoído níñega.

2 Uáfueza, cue caana abido cue illa llezica, monamo itícomo íere cue jáiacana comécido éfíredicue.

3 Aféno mo jáiánicadicue, mei afeco iniroi come abi jífua izói, cue joréñona ñue jífoíteza. Afemona come abímo íñede joréñona íñeíticue.

4 Bie jofona mameca abímo cue illa llezica íere zúunaillano comue abina izire óiacadicue. Mei, bie cue jácaie abina, iniroi come abímona duíñua izói, cue joréñomona duíñóacañédicueza; jífoñega joreño izói íacañédicueza. Mei jíáfodo iniroi jita izoi, comue cue abi cue joréño mo jítaacadicue. Daí cómuena méidoacadicue, bie cue táinocaite abi, comue cue cáainnodo nine féitallena.

5 Dama Juziñamui bie izói abi cue méidollena cuena mamede. Iemo birui ie Ñuera Joreño afémie cuemo fecade. Afe ie Ñuera Joreño cuemo íllado ñue onódicueza, nana Juziñamui cuemo fecalle ñue llínoíticue.

6 Mei áfemona, comue méidoga abi cue llínollena áfena ñue cue onónamona caimare ocuúridicue. Nai bie abido cue illa llezica, onódicueza, monamo cue illícomona jino iticue. Bie izói daina cue Ocuúraíma díga íñédicue.

7 Afe llezica birui fia cue ciónafuedo ínídicue, mei jíáfodo Juziñamui mo cue íinogafuedo íredicue.

8 Mei jira uáfueña cue llínollena ñue cue onónamona caimare ocuúridicue. Bie cue illa abina fáicanocaiacadicue, monamo jaillano cai Ocuúraíma díga cue íllena.

9 Ie jira bie éniemo afémie díga cue íñena llezica, daje izói afémie díga cue illa llezica, jaca íena cue íóbitallena jamánomo nícidotíicue.

10 Mei comini finócafue Cristo ríire jícánoranomo nana cai aféno mo ácataredicaíza. Aféno mo illa dígamie bíniemo illa abido íaíoi fínua dieze, níbai ñúefue níbai fiénidífue, áfeze jírdítoítiaíoi.

Juziñamui meine caina caimare uáiduafue

11 Ie jira afe naga come Juziñamui riire jicánollemo ñue jacíruiociana comeci facádícue. Afemo cue comécíillamona naga cómena Juziñamui llógamo jiéruitaacadicue. Mei íadi cue illáfúena Juziñamui onode. Afe izói cue ñue illáfúena omoi onóillemo ocuírídícue.

12 Dáanomo dama ñue cue illáfúedo úriñedicue. Mei jiáífodo cuedo caimare omoi úrillena bie izói ómoína daidícue. Afemona jínoidífúedo abí ñnotino uai omoi ollíuai íteza. Afémaci jofó comécimo itífúena náfuéñediaíoi.

13 Mei níbaí comínimona dáarie cuena daina izói, uáiritaidímie izói itícue íadi, Juziñamui íena daíí itícue. Mei jiáífodo uáiritaiñedicueza ñue omoi íllena canódicue.

14 Mei ñue onódicaíza dama Cristo dainámie nana comini meífomo tíide. Afe caina ie izíruillamo comécíillano, nana afémiemo ñnotino íaiói fiénidífuíai tíidena mámiáno áfena fáicanocaidiaíoi. Afemo cue comécíillado Cristo caina izíruilla ñúefúena cuena izire llócaitate, ñue omoi íllena. (Daje izói bie Cristo caina izíruilla, ñue illáfúedo cue jáillena cuena ocuíoídeza.)

15 Uáfúeza, Cristo nana comini meífomo tíide, nana cáadino dani íaiói jitailla izói íñeíllena; mei jiáífodo, afémaci dibénedo tíllano meine cáadímie Cristo comeci jitailla izói íaiói íllena.

16 Ie jira bíníe comini jínoidífúedo comeci faca izói, ñino bumó comeci facáñedicue. Mei nauí uícodo Crístomo bíníe comini comeci faca izói, comeci facádícue, mei íadi ja biruí daíí afémiemo comeci facáñedicue.

17 Mei daíí, Crístomo dájena jaináitagámie comue cómena jaide. Jaíai ie illáfúíai fiénocaillano nágafuíai cómofuíaina méidoga.

18 Nana bífuíai Juziñamui mámiamona Juziñamui dama afémiemona Crístodo meine caimare cuena uáídote, íemo jiáí nana comini afémiemo meine caimare úrítallena cuena ocuíoícaide.

19 Bie izói daííacana: Juziñamui ie Jitó Crístodo nana comínina íena meine caimare uáídotade. Aféruimo, comini finoca fiénidífue féitano caimare íaióina uáídote. Afe dáruido Juziñamui meine comínina caimare uáíduafue oni llúájíllena cuena jóonenocaiide.

20 Afemona Cristo íena uai llotínona ómoímo bitícue. Ie jira biruí ómoína cue daina uai, dama Juziñamui ómoímo cuedo jicaca uai izoide. Mei jira Cristo dibénedo ómoímo izire jicádícue. Maí, meine abído Juziñamui caimare uáídori.

21 Afe Cristo jaca íaífuena finóñede. Mei íadi cai meífomo Juziñamui afémiena fiénidífuíairedímie izói duere finode. Daíí íena finode, Juziñamui anamo ñue jaícina illáfúemo cai íllena; mei ie ñue illa izói cai íllena Juziñamui jitáídeza.

6

1 Afe daíí Juziñamui táijinamo afémiena nabáidícue. Ie jira afémie ómoímo lloga ñuera cáímafuíai táinomo omoi fáíftañeno íri.

2 Mei Juziñamui ie Cuegáuaimo daíde:

Comínimo caimare cue uáídollena cue mamécaruimo ona cacádícue.

Daje izói jíllonaruímo ona canódicue.

Ja biruí Juziñamui caimare o uáíduaruí. Daje izói biruí o jíllonaruí.

3 Iemona Juziñamuimo cue táijina llezica, buna llótaídonidícue, cue táijinafuemo fiéni íaiói úriñeíllena.

4 Mei jiáífodo nana cue jetáacagafuíaido Juziñamuimo táijidímie cue íllana ácataacadicue. Duere zefuídícue íadi comécina raire járidoñeno fia ocuídícue.

Afedo Juziñamui íena cue íllana jino ácataticue. Daje izói cue jitaica raa íñena llezica, íemo llotáiredífuiai cuemo comuilla llezica áferi járidoñeno ocuídícue.

⁵ Daje izói cuena zechénuano llavédiaioi. Cue duere finóllena jacire lléjellejedino cígiri íticue; íemo iere rírede tájinamo íticue. Diga ícaño raire íniana onóñedicue; daje izói jíái jufíruitícue.

⁶ Daje izói íainidimiena cue íllado Juziñamuimo ñue táijidimiena cue íllana ácataticue. Íemo diga jíáifuiaido daíí cue íllana ácatafiredícue. Uafue uaina cue onónado ñue cue ílláfuea cíotaticue. Íemo cue járitañenafuedo naa cue dúecaífirenafuiaido áfena cíotaticue. Íemo jíái Ñuera Joreño cuemo íllado, naa jíáimana jífueñeno cue izíruífirenado Juziñamui íena cue íllana ácatafiredícue.

⁷ Íemo ua uai cue llócaillado, naa Juziñamui ríino cuemo íllado: nana bífuiaido Juziñamuimo ñue táijidimiena cue íllana ácatafiredícue. Afe llezica jáicina joide ílláfuedo jáifiredícue, mei áfedo fiénide uáillaina oni caitáredícueza. Daje izói áfedo cue abina ríidoredícueza.

⁸ Daruírie ñúefuiai cuemo nitádiaioi, mei jíáíruido fiénidí fue cuemo jítdádiaioi. Daje izói jíáíruido cuedo ñue úritiaioi, íemo jíáíruido cuena íáiruitiaioi. Íemo dárie cuena comínina bífuetimiena daídíaioi; mei íadi jaca uáfuea úricaidimie ítícueza.

⁹ Íemo dárie cuena “Bu ónoñegamiedio” daídíaioi; íemo jíáimaci “Ñuera cai cómedio” daídíaioi. Daruírie titácame izói íticue, íadi nai cáaoicaídícue. Íere duere finócacue íadi méineñegacue.

¹⁰ Zuure íticue íadi jíáífodo jaca íóbídícue. Mei ráanidimiedícue íadi, aillo jíáimacina ráaredino izói ráanaitadícue. Dúeredino jofófemo dúeredimie izói cue íadi, nai ráaredimie izói nana ráaniairi íóbídícue.

¹¹ Coríntomo íte cue ámatiai omoi cacai. Omoi diga báinino úriñedicue, jaca uáfodo úrifiredícue. Cue comécimo ítífuea uáfodo jino ómoímo llotícue.

¹² Omoína iere duéruillano rairuíñeno ómoína caimare uáidofiredícue. Mei íadi omoi dinena cuena ñue izíruíllana ráiruitiomoi.

¹³ Urue Moo, íe úruena izire jica izói, afe izói ómoína izire jicádícue. Omoímo uáfodo jino cue llua izói, afe izói omoi comécimo ítífuea jino uáfodo cuemo omoi llóllena izire jicádícue.

Caade Juziñamui illaco izóidícai

¹⁴ Juziñamuimo ínoñedinomo dájena omoi jaináíñeno iri. Omoi jaináíadi, dájena jáicina íñénafue comuídeza; ómoína jíáífodo ítátaite. Mei ¿nie izói jáicinaidí fue fiénidí fue diga dáanomo jaináírede? ¡Jaca jaináínide! ¿Mei úzefo naa jíitífo diga dájena nabáírede? ¡Nabáínide!

¹⁵ ¿Taífe meita Cristo diga dájena caimare írede? ¡Jaca ínide! Juziñamuimo ínotino ínoñedino diga ¿níí fue dájena íaíoímo dúína? Dáanomo dúití fue íñede.

¹⁶ Mei dama Juziñamui daína izói caade Juziñamui illaco izóidíomoi. Afémie daide:

Iaíoímo ítícue; íaíoí cígído macácaítícue.

Cue be íaíoí Juziñamuítícue.

Afe izói cue comínina ítíaíoí, daide.

Íemona Juziñamui illaco jánarai diga ¿níí fue dájena íaíoímo dúína? Dáanomo dúití fue íñede.

¹⁷ Te jira cai Ocuíraíma bie izói daide:

Juzíñamui mo ñnoñedino cígimona oni omoi jai, afénomona oni omoi ii.
Íáiredifuiái dibénemo ññoeno iri.

Iemona ómoína caimare uáidoiticueza.

¹⁸Afe llezica omoi Móoiticue.

Iemo dáaruído omoi cue úruiaína ítiomoi.

Afe bífuena jamánomo rírede cai Ocuide Juzíñamui daí daide.

7

¹Cue izíruiğa ámatiai, Juzíñamui jaiái uícodo lloga cáimafuiái bie izói joide.
Afe daí caimo íllamona nana jíáíforiede cai íaifuiáimona muiñócana izói
oni íredicai. Abi íaifuenta daje izói cai joreño íaifuenta fáicanocairedicai.
Juzíñamuina ñue jacírui llano cai comeci íaininafue ie erócana jaícina
jóneredicai.

Corintio imaci comeci méidua

²¡Mai cuena caimare omoi uáidori! Cue bie jaca buna fienu finóñedicue. Daje
izói buna íaire finóñedicue. Iemo ómoimona jaca buna jífueñedicue.

³Bie izói cue dáinado ómoína íaire finótañedicue. Mei nauí ómoína cue
dáina izói, nai cue caana llezica, nágarui ómoimo cue comeci fáioídícueza.
Uáfuenta dájena cue tílliruimo ómoimo cue comeci fáioídícueza.

⁴Ómoína iere caimare ínoticue; daje izói ómoiri ñue abi ínoticue. Iemona
díga duere zefuúllafue cuemo comuilla llezica cue comeci jaca náirede, íemo
jíái jamánomo caimare iticue.

⁵Mei daí nauí cuemo comuídeza. Nauí Macedonia éniemo cue jailla llezica
afénomona uái cue illirui jaca íñede. Mei jíáfodo náganuaido féiredifuiái cuemo
comuide. Cuena uáitatino nágafene cue ciróidiaoí, íemo díga jíaifuiáiri
comécido jacínaioicaidicue.

⁶Mei íadí comécina nánidinona nácaitaírede Juzíñamui cuemo dúecaide;
cuemo dúecaillano Tito dúcinado ñue cuena nácaitate.

⁷Daa ie dúcinari íóbñedicueza, mei dáanomo omoi méidoga ñue illáfuedo
afémiena omoi nácaitari íóbídícue. Afémie omoi iere cuena cíóacanafue
cuemo lote. Iemo jíái nauí omoi cígimo comuífueri omoi iere zúnaillana
Tito llote. Daje izói cueri omoi comeci lícítaillari, naa cuemo omoi
jíeruicanari íóbídícue. Bífuiaína cue fidínamona jamánomo íóbídícue.

⁸Mei nauí ómoimo cue orécabe ómoína zúucaitate íadí, birui áferi
zúucaíñedicue. Mei nibai nauí áferi zúucaídícue, mei íadí birui Tito cuemo
llua izói afebe are ómoína zúucaitañenana fidídícue.

⁹Iemona birui íóbídícue. Omoi zúucaillari íóbíñedicue, mei jíáfodo afe omoi
zúucaillafuedo omoi comeci ífuenta méiduari íóbídícue. Bie zúucaillafue ñue omoi
ocuíllado Juzíñamuina íóbítade. Iemona ómoimo ríre cue cuegabe ómoína fienu
finóñede.

¹⁰Mei uafue, Juzíñamui íóbilla ñue cai ocuíoiga zúucaillafuiái cai comeci ífue
ñúefuenta méidotade. Iemo afe ñúefuenta méiduado jíllóiticaí. Mei íadí bíniemo
ite ñnoñedino zúucaillafue íaioína ana tíllinomo úite.

¹¹Ómoimo comuide zúucaillafue ñue omoi ocuíllari Juzíñamui íóbide. ¡Iemo
birui omoi cígimo ñue comuífuiáimo omoi éroi! Afe zúucaillafue nauí
ómoimo ite fienuídífue mo ríre ómoína ñue comécítade. Iemo afe zuufue omoi
finoca fienuídífuenta jino uáfodo llotátate. Daje izói afe zuufue daní ómoína
rícaitate; íemo ómoína jacíruidade. Afe méífomo iere cuena cíóacadiomoi.

Afe llezica omoi cígiri ite fieni finódimiena duere finótaiacadiomoi. Nana bifuiaimo omoi nífueninana jino ñue cíotatiomoi.

¹² Mei daií afe orécabe cue cuia llezica afe fieni finódimiemo figo comécíñedicue. Daje izóí duere zefuidimiemo figo comécíñedicue. Mei jáífodo ñue omoi illífuemo comécíidicue, cuemo omoi comeci ñue fáiana, Juzíñamui eróicana, omoi onóillena. Ie jira afebe ómoimo cueticue.

¹³ Iemona bifuiaido cuemo caimare dúecaídiomoi.

Mei íadi omoi cuemo dúecailla baimo Tito iere caimare íllari jamánomo íóbídicue. Mei nana omoi afémie ñue uái íllena íena canódiomoiza.

¹⁴ Naui omoi dibénedo Títomo cue úrilla uai meáiruiñeno jaca ñue cuemo baite. Omoiri abi cue ínuana afémiemo lloticue. Ja birui, nana ómoína cue daina uai uáfuenta jailla izóí, afe izóí ómoiri Títoma cue daina uai uáfuenta jaide. Iemona nauí afémiena cue daina uai táinomo omoi fáíftañenari iere íóbídicue.

¹⁵ Ja birui Tito ómoína iere izíruite, mei nana ómoimo ie dáinado cue ocuífauiai jeire omoi úamo afémie caimare uibíoideza. Daje izóí jacíruiocana caimare ie omoi llínuamo nai comécioide.

¹⁶ Iemona ómoína jaicina ñue cue ínuari íóbídicue.

8

Jeruñeno fecáredicaí

¹ Amatiai, birui Macedonia éniemo ite Juzíñamuimo jaináidinomo afémie dúecáfírenamona íaíoi jeruñeno diga raa fecáfírenafue ómoimo llóiacadicue.

² Mei íaíoiimo comuide féiredífuiai iere íaíoiña jacire facátate íadi, caimare itíaíoi. Daje izóí iere duérediaíoi íadi, ráaredino izóí raana jeruñeno fecáfírediaíoi.

³ Mei dani íaíoi comeci ñue jítaina izóí nana íaíoiimo ite dieze jeruñeno fecádiaíoi, íemo afe íaíoi írede úcube baimo nane fecáfírediaíoi. Aféfuemo uaina nabáidicue.

⁴ Bie Macedonia imaci Judéamo ite ámatiai íaíoi canóllena cuemo izire jicádiaíoi.

⁵ Íaíoiimo comeci cue faca baimo fecáfírediaíoi; mei fueñe Juzíñamui comeci jítaina izóí, “Juzíñamui ocuilla raire fínoíticai,” dainano afémiemo ñue ínotiaíoi. Afe mei daje izóí “O ocuilla raire fínoíticai,” cuena daídiaíoi.

⁶ Afémaci daií daina jira, Títomo izire jicádicue, afémie naui omoi cígiri taineca omoi jeruñeno fecaca úcube iráíafue birui ñue ícoimo fuitállena.

⁷ Mei nágafuiai dibénemo iere ñue finódiomoi; ínogafue dibénemo jamánomoidiomoi. Iemo ñue llófuiana jamánomo baitáidinoidiomoi, naa ífoci úrillafuiai. Daje izóí ráiraíeñeno íocírenafue dibénemo jamánomoidiomoi, naa cuena omoi izíruillafueri. Daií omoi íllamona, mai bie jeruñeno raana fécafue dibénemo daje izóí jamánomoidinona omoi iri.

⁸ Bie fécafuenta ómoína finótañedicue. Daa jáíimaci raire raana fecáfírenafuenta omoi onótaacadicue, áfena omoi fidínamona íaíoi fecaca dieze raire omoi fecállena. Afe daií raire omoi fecácanado omoi izíruillafuenta jáí uáfuenta dáíitiomoi.

⁹ Mei cai Ocuraima Jesucristo caimo dúecaillana ñue onódiomoiza. Afémie fueñe monamo illa llezica bínie comíni ráanailla baimo jamánomo ráaredimie. Mei íadi bíníemo bíllamo caina izíruillano dama abina dúeredimiena finode, ie

dúerenado Juzíñamui dibénemo caina jamánomo cai ráanaitallena. Mei uáfueza, nauí Cristo monamo illa izói, afémie caina itátaiacade.

¹⁰ Bie jiáimacimo fecáfírenafue dibénemo omoi ñue illena, cue comécimo ite cue fácaja ñuera uai llóiticue. Nauí jaide fimónamona nai biruimo afe jeruíño fecáfueña ñue tainédiomoi. Daa due jiza fecaitino izói, tainéñediomoi, mei jiáifodo íocire caimare fecáfírediomoi.

¹¹ Jira benómona mai ñue ícoimo omoi fuitari. Nano fueñe omoi táinia llezica, omoi íocire caimare fecáfírena izói, afe izói áfena ñue ícoimo fuitari. Omoimo ite dieze, jeruíño fecáfíreiri.

¹² Dámie uáfueña Juzíñamuimo fecáacania, afémie Juzíñamuimo fecaca raa Juzíñamui caimare lláinoite. Mei uáfueña comínimo ite dieze Juzíñamui caimare llánofiredeza. Afe baimo cómemo íñédena afémie táinona jicáñede.

¹³ Jiáimaci omoi canófirrenado ómoína dúeredinona finócañedicue.

¹⁴ Mei jiáifodo illa dígazie dájerize omoi ráareri, daidicue. Jiáiziena jamánomo baimo ráareri, daifñedicue. Birui íaioi jitailla raana omoi ñue fecáfírediomoi. Iemo uire omoi jitáilliruimo omoi jitailla raana afémaci ómoimo fecáfírediaioi. Afe bie izóidemona afémaci naa ómoiri jaícina dájerize ráareitiomoi.

¹⁵ Jaiai afe monámoma Juzíñamui oreca maná daina pan izóidena dibéneo Juzíñamui cuezáuai daje izói daí dáideza: “Aillo ofítatimie mo minícana fiébiñede. Iemo figo ofítañedimie mo ie jitaica raana íñede.” Iemona nana dájerize ráareitiomoi.

Tito naa ie nabáifíairi

¹⁶ Ja jiáinodo Juzíñamuina “Figora” daifíredicue. Mei omoi ñue illena ómoimo cue comeci úina izói, afe izói Juzíñamui Tito comécina ómoimo jóonetadeza.

¹⁷ Afémie mo cue jóonenocaigana afémie ñue jieruite. Iemo dama ie comeci ómoimo jaritafírenamona, ja birui dama ie comeci jítainado omoi eróizaide.

¹⁸ Tito diga daa ñue mámecina jica jalléidimie naa orédicue. Nana gairífirede Juzíñamuimo jaináidinodo ie mámece jica jalleide. Jíllona uaimo afémie iere ñue táijinado ie mámece jica jalleide.

¹⁹ Daa bífueñedeza, mei jiáifodo Juzíñamuimo jaináidino afe bie cai ama nizédiaioi cue diga jaíllena. Daje izói cue canóllena afe ñue ínotimie naa nizédiaioi. Afe jiáimacimo omoi dúecaille úcube cue fecálle mo afémie cuena cánoite. Cai Ocuíraimamo ñuera uai nitállena bie izói finódicue. Daje izói íemo jiái omoi íocire comínina canóacanana ácatallena, bie izói mamédicue.

²⁰ Bie úcube cue jráiamo buna fiéni úriñeillena bie izói finódicue.

²¹ Bie izói ñue jaícina uáfodo canóacadicue, Juzíñamui eróicana ñue cue illena. Dama Juzíñamui eróicana daí íñédicueza, daje izói jiái comini eróicana daí iticue.

²² Afe íaillinoído jiáie cai izói ínote ámatiamona dáamie orédicai. Afémie íocire ie mamérellana diga jiáifuaído ácatate. Iemo birui ómoimo iere ñue ie ínuado, ie íocire mamérellana jamánomo jino ácatate.

²³ Daa come “¿Mei bu Títoma?” daíadi, “Jadíe omoi cue cánuamo cue nabáifíredimie,” omoi daíri. Iemo afe Títodo jaide íaillinoímo comini jicánoiadi, “Crístomo jaináidinomona orécaiaillinoí,” omoi daíri. Afe llezica “Bie come íaillinoí ñúefue Crístomo nitáfírediaillinoí,” omoi daíri.

²⁴ Iemona bie oreca íaioimo, uáfueña íaioina omoi izírui firenana ñue íaioimo ácatari, nana Juzíñamuimo jaináidino onóilleza. Afe izói bie orécamaci ñue omoi llinuado, ómoído abí cue inuana, uafue daítaitiomoí.

9

Amatiai íena úcube iráica

¹ Juzíñamuimo inotino, cai amatiai izóidino íaioiena úcube iráia dibenedo, ómoimo uáfueña cunenidicue,

² mei omoi fecállena raire mamérifirenana ñue onódicueza. Omoi Acaya énie imácidiomoí. Nauide fimónamona omoi fecalle raamo raire mamérifirenana Macedonia énie comínimo jaca caimare llófiredicue. Macedonia comínimona nabézie, omoi íocire mamérellana fidíillamona comécido náicaidiaioí.

³ Mei íadi bie úcube iráia dibenedo ómoído cue lloga ñúefue táinomo fáifñeillena, bie cai amatiai ómoimo orédicue. Daí íaioina uícodo orédicue, nauí cue daina izói áfemo ñue omoi finóbillena.

⁴ Macedonia imácimona dárie cuedo jaia, nai omoi finóbiñenana baizájillena gáñedicue. Daí omoi íllana íaioí baizájiadi, afe cuena meáidaitade, mei áfedo nano uícodo omoi ñue cue inuana táinomo fáifítaitiomoiza. Iemo jíai afémaci daí omoi íllana cóicaizaibiadi daje izói dani ómoína meáidaitate.

⁵ Afe bíemona nano uícodo ómoimo bie cai amatiai cue orelle iere jítáiredeza, daí comeci facádicue. Iemo daje izói afémaci nauí uícodo omoi mameca aillo úcube iráiana ñue íoimo fúitana cánoitiaioí. Bimaci omoi cánuamona afe úcube iráiana fúitano, afe úcube caimare omoi fecállemo ñue finóbitiomoí. Iemona afe omoi fecalle cue riire ocuinidicue. Dani omoi comeci ñue jítainana ácataitiomoí.

⁶ Ja cue lollífuemo omoi uibíoiri. Due ritímie jaca due jofo ote. Iemo daje izói aillo ritímie aillo jofo ote.

⁷ Ie jira illa dígamie ie comeci caimare mamérilla izói ie úcube írede. Jeruíllano éoinamona fecánide. Daje izói jíaima ocuíoillamona ínide. Mei Juzíñamui caimare fecáfiredimiena izírui teza.

⁸ Cai Moo Juzíñamuimo nana jíáifoide omoi cáimacaitade ráaniai iere aillo íteza, facádoñeno jamánomo ómoimo fecárede. Daí nana dani omoi jitaica ráaniaina ómoimo nágarui ífireite. Mei íadi dani ómoieñedeza, mei jíáfodo ómoimo aillo ite ráamona, nana jíáiforiede raado jíáimacina jeruíñeno canórediomoi.

⁹ Juzíñamui Cuegáuai bie izói daide: Dúredinomo afémie jeruíñeno aillo fecade. Comínimo afémie ñue finócano jaca are iite.

¹⁰ Iemo afe daade Juzíñamui omoi ríllena jíáie ríamo llizítano ómoimo fecáfiredede. Daje izói afe riga zícuaamona, Juzíñamui áfemona omoi güille raana comuítano ómoimo fecáfiredede. Iemona nana omoi jitailla ríllena afémie ómoimo fécaite; íemo dánomo omoi rigánuiaina jamánomo aítátaite; áillamona jamánomo aillo óitiomoí. Daí omoi jamánomo óllemona jíáimaci canolle raa díga ícaíño ómoimo íteza.

¹¹ Afemona diga jíáiforiedena ráareitiomoí, jíáimacimo jeruíñeno aillo omoi fecáfireillena. Iemo cue uire omoi orelle úcube cue izájillamona jíáie cai amatiaina Juzíñamuina “Tere figora” dáítaite.

¹² Mei jira afe bie cánua Jerusalemo ite cai ámatiaimo cai feca llezica, daa íaioi jitaica ráaniai íaioimo fecañedicaiza, mei íadi afémacina Juzíñamuina “Iere figura” daítaticai.

¹³ Iemona dani afémaci Juzíñamuido ñue úritiaioi, mei bie cánua Cristo ñuera uaina omoi jiéruillana íaioimo jino ácatate. Daje izói afémacimo íemo naa jíáimacimo jeruífeno aillo omoi fécajana íaioi ciónamona, Juzíñamuimo ñuera uaina jóneitiaioi.

¹⁴ Iemona ómoína iere duéruillano, afémaci afe íbana ómoiena Juzíñamuimo jícaitiaioi. Juzíñamui ómoído jino cíotaga aillo dúecaifirenmona afémaci ómoído Juzíñamuimo úrífretiaioi.

¹⁵ Ie jira Juzíñamui afe caimo lloga áillo dúecaifirenana jamánomo ñuénamona, fia iga raa izóideza, áfena jino uaido jaícina llónidicaiza. Afe caimo dúecaifirenari Juzíñamuina “Iere figura” mai cai daíilli.

10

Cristo orécamiēna íllamona Pablo ocuilla ríino ite

¹ Cue Páblodicue. Cristo caimo dúecaifiredeza, íemo jíai afémie iere cáimamieza cue daje izói izire ómoimo jícaíticue. Omoimo riire cue úrizaibiñeíllena ja birui jícadícue. Dáarie cuena uáitatino bie izói cue díbénedo daífirediaioi: “Pablo omoi cígiri illa llezica afémie iere comécina mánaídímie, mei íadi afémie jica jíainomo illa llezica afémie abido riire ocuídímie daíbaicaide,” daídíaioi.

² Mei jíáfodo, omoi cue eróizaibilla llezica, riírede uaina ómoimo cue úrizaibiñeíllena izire jícadícue. Mei ómoimona dáarie cuemo fíénide uai jítdino ite. Afe íaioi jítaca uai bie izói joide: “Nana ie finócana daa bínie comini jítaina izói finoca,” daí daídíaioi. Iemona afémaci cue úritaja, riírede uáillaido íaioimo úriredicue. Mei íadi afe izói cuena úritaño iri.

³ Mei uáfueza, ua cómedicue, mei íadi bínie comini fuirífirēna izói fuiríñedicue.

⁴ Fíénidífuiaí oni cue caitalle raa, bínie comini fuirilla raa izóiñede. Mei jíáfodo cue fuirilla raa Juzíñamui ríinona ríinorede, abi ríidollena riire finócacuai izóidena cue táinocaitallena.

⁵ Mei áfedo cuemo fieni jítcana oni caitadícue; daje izói cuena íaioi cáitajana oni féitadadicue. Nana uáitaiacadino íaioi abi ínuano jíáimaci Juzíñamuina raire onóñeíllena jíztáfirediaioi. Ie jira nana íaioi comeci faca uailai Cristo anamo itátaticue, afe Crístona íaioi comeci jíéruíllena.

⁶ Cue llógana omoi jíéruilla ñue ícoimo dúcille llezica, nana jíaie uáitafiredinona duere fínoíticue, íaioi jíéruíñena ícoína.

⁷ Daa jínofene cioide ráaniaimo eróidíomoi; uáfueza, nánidímie cuē eróinamo eróidíomoi. Ninó dámie “Uáfueza cue bie Cristo íedicue,” daíadi, bífue mo afémie úlbicaitarede: Cristo íena ie illa izói, daje izói cue Cristo íedicue.

⁸ Mei díga icaiño, cuemo ite ríinodo cue llóiaí naí aferi méaídaiñeíticue. Mei cai Ocuíraíma afe ríino cuemo jóonete, áfedo Juzíñamui díbéne mo ñue omoi cue móonaitallena. Omoi niné cue táinocaitallena cuemo íñega.

⁹ Fia rabeledo ómoína jícidotímie izói íacañedicue.

¹⁰ Dárie cue ciegábaiido daídíaioi: “Jamánomo riire ocuífirēde; mei íadi afémie comini eróicana úrilla llezica, afémie ríimieñede. Afe llezica ie úrilla uaina iere jíamairuirede,” daídíaioi.

11 Afe izói úritimie bie izói onótarede: Jicana rabedo riire cue úrilla izói, afe izói omoi cígiri cue ille llezica riire úriticue. Nane afe dáaruído afémacina riire ócuticue.

12 Afémacimona dáarie dani íaioiena ñue caimare úritiaioi. Táinomo abi ínuado úritiaioi. Afémaci illa izói jaca mamériñedicue. Dani táinomo íaioi comécillado conímamo comécidiaioi. Ñuera come daíllena dani conímamo facádiaioi. Daíí fácajamona abina onóñedimacina jáidiaioi.

13 Cuemo dúiñede raado abina íñoñeiticue, uai cue llócaillena mózizaillinona llotimie, Juzíñamui. Afémie ñuera uaillai cue llócaillena omoi illánomo cuena dúcitate. Uáfueza Corinto dinomo cuena jáitate.

14 Ie jira cuemo dúide tájinafue baimo jáíñedicue. Mei navi Cristo ñúefue fueñe ómoimo jino dénuai biticueza. Iemona afe omoi cígiri cue tájille cuemo dúide. Nano fueñe llúaíbiñedicuena afe tájille cuemo dúiñede; mei íadi daíñañede.

15 Jáímaci tájinana cúeiena abimo maiñóñedicue. Afedo abina íñoñedicue. Mei jáífodo Juzíñamuimo omoi ínogafue ñue móonaille dinori, omoi cígiri jamánomo cue tájillemo ocuírídícue. Mei íadi cuemo dúide tájinafuedo tájifireiticue.

16 Iemona afe méifomo omoi illa batífenemo jica itínomo jillona uai llujiredicue. Mei íadi afe llezica jáíima taineca tájinamo tájifñeiticue, ie tájinado abí cue íñoñeillena.

17 Mei jáífodo daa come abí íñoiacania, cai Ocuíraimado abí íñoiteza.

18 Dama ie abido ñue úritimie, ñuera come daíífirenamiena jáíñeite; mei jáífodo daa Juzíñamui ñue úrillamie, ñuera come daínámiena jaílle.

11

Cristo óreñega taino llotino Pablo diga

1 Abina onóñedimie izói due jiza úriticueza. Raire cue uai ofeno fíaicana cue úrillamo ómoína cacáretacadícue. Mai fíaicana abí cue ínuamo omoi cácarei.

2 Ómoína iere uríoifiredicue. Afe omoi cue uríoilla Juzíñamuimona comuide. Dámie ie áireiacania jétañega jitaingo óllena jica ia mámano jicánote. Afe jicánogango daa afémiemo inireirede. Mamécaruimo afengo moo aféngona izájite. Afe izói Crísto mo ómoína cue izájillena ja Crísto mamédicue. Ie jira ómoiri iere uríoídicue.

3 Mei comini nánoidingo Evana jaio bífuiano jífuia izói, afe izói jáímaci ómoína bífuiana jacíruiticue. Afemona figo abí omoi ráiruñenia jífuefitiomoi. Iemona Crísto ñuera comécido omoi comécillana oni jáífodo féitaitiaioi. Daje izói Crístonahí omoi izíruillana féitaitiaioi. Afena jacíruiticue.

4 Cue llócaiga Jesús izóiñedimiena ómoimo llotíaioi. Afemo fíaicana caimare ñue cacáreidiomoi. Afemo ñibai omoi ínollena jacíruiticue. Iemo navi ómoimo cue lloga o maiñoca Ñuera Joreño izóiñedena jáífoide joréñona abimo maiñódiomoi. Iemo jáíí uicodo cúemona omoi cacana ua jillona uai izóiñedena jáífoide uai jeire otíomoi.

5 Birui baie omoi cígido jáíllamaci “Cai bie Cristo orécamací baimo ñúemacídicaí,” daídíaioi. Mei íadi afémaci jofófenemo ráifiñedimiedicue, daíí comécíoidicue. Iemona çñibái mei cuemo cacáreñeitiomoi?

⁶ Mei n̄ibai cue úrilla uai figo j̄inoñeniadi, nai cue onoiga rafue jino ll̄uana dibénedo iere baitádim̄edicue. Nana ómoimo cue llócaillado afe bie cue onóigafuiaīna jaca n̄agarui jino ómoimo ácatafiredicue.

⁷ J̄illona uai ómoimo raiñóñeno cue ll̄uado, omoi anamo cue ab̄ina itátaticue. Daī iticue cue baīmo ñ̄ufuedo omoi jalléllena. Daī cue illa ç̄n̄ibai fiénide? Daītañede.

⁸ Jiáie Juziñamuimo jaináid̄ino omoi cue canolle úcube ib̄adiaioi. Omoi ç̄iḡiri cue illena afe úcube cue ll̄̄nua afémacimona cue bairoca izoide.

⁹ Omoi ç̄iḡiri cue illa llezica, cue jitaica raana ite. Mei iadi áfena jaca ómoimona raiñóñedicue. Aféruillaido Macedóniamona bite caí ámatiai, cuemo iñede raana fecádiaioi. Afe daī cue ab̄ina rairuíd̄icue, omoi ç̄iḡimo nana cue finócafuīai ómoimo juare zúñ̄eillena. Iemo naui cue illa izóí, afe izóí omoi ç̄iḡiri jaca daī íf̄reiticue.

¹⁰ Cristo ñ̄ufue ua cue onona izóí, afe izóí nane jiáifuena ua onódicue. Afefue bie izóí daide: Nana Acaya éñiedo raiñóñeno táij̄if̄reiticue. Afe cue táij̄ina cue raiñóñenari cáimacaiticue. Iemo afe cuemo ite cáimafue buna c̄uemon̄a báiroñeite. Afena uáfodo onódicueza.

¹¹ Ç̄N̄ibái mei daī úriticue? Ç̄N̄ibai ómoina cue gáñ̄enado daī úriticue? ¡leñede! Omoina iere cue gáñ̄ana Juziñamui ñ̄ue onode.

¹² Mei iadi jaca cue finua izóí finócaiticue, cuena uáitatino ab̄í ñ̄notañ̄eillena. Jaca ómoimo raiñóñeno táij̄if̄reiticue, baie ab̄í ñ̄notino íaioi ab̄í ñ̄nua raa cue bairóllena. Afémaci úcubena ómoimona izire jicáñ̄rediaioi Cristo ua orécamīena cue illa izóí íaioi illena. Mei úcube íaioi óñ̄frenamo ñ̄notiaioiza, áfede “Cristo oréc̄anodicaí” daīllena. Ie jira afe íaioi ñ̄noga uai oni caitáac̄ad̄icue. Iemona jaca raiñóñeno ómoina canóñ̄reiticue.

¹³ Baie afémaci Cristo óreñ̄ega iere taino llotino. Daje izóí afémaci jiáimacina j̄ifueñ̄ed̄ino. Iemo jiáí afémaci come jifeia jiáífo eroina izóí, Cristo oréc̄amacina com̄inina íaioimo com̄ecīitaacad̄iaioi.

¹⁴ Afe bie jiáífo do afémaci eróinafue cáimona jánaiñede, mei dama Taife egáñ̄ote Juziñamui ab̄i ímīena eróillena méidoficaideza.

¹⁵ Ie jira, Taifemo táij̄itagano ie méidoficailla izóí méidoficaif̄rediaioi; afe jiáífoide raa izoñ̄ede. Iemona jifeide come eroina izóí bimaci ñ̄ue ite com̄inina eróillena ab̄ina jiáífo do méidotiaioi. Mei iadi íaioi finócaiga fiénid̄ifue dúina dieze afémaci táinocaitiaioi.

Cristo orécamīena ie illamona Pablo duere zefuide

¹⁶ Nane dáanomo ómoina dá̄it̄icue: Bie jabo ab̄i cue ñ̄nuamona cue úrillamona bu cuena “Uáiritaid̄im̄edio” daīñ̄eno iri. Mei iadi daa come daī com̄ec̄ido daīiadi, dama uáiritaid̄im̄ie izóí úriticueza fia omoi eroiri, áfede jabo ab̄i cue ñ̄nollena.

¹⁷ Afe bie ab̄i cue ñ̄nua uaina, caí Ocuíraim̄amo ite r̄inodo cuena daī daītañede. Mei jiáífo do dama uáiritaid̄im̄ie izóí úriticueza.

¹⁸ Mei dan̄i íaioi dāina ñ̄uera uaido ab̄i ñ̄notinuīai aillo íteza; afe íaioi taino ab̄i ñ̄nuana izóí, afe izóí ab̄i ñ̄noiticue.

¹⁹ Omoi zán̄uano dá̄it̄icue, omoi jamánomo baitádinodiomoiza, mai uáiritaid̄im̄ie izóí cue úrillamo caimare f̄iaicana omoi cácarei.

²⁰ Mei ómoina baie riire táij̄itat̄inona caimare f̄iaicana cacáreidiomoi. Iemo jiáí ómoimo ite raana báiruait̄it̄ino uaimo caimare f̄iaicana cacáreidiomoi.

Iemo jiái ómoina náamataibitino uaimo fíaicana caimare cacáreidiomoi. Iemo jiái omoi jámairuitinomo caimare cacáreifirediomoi. Iemo omoi uiécona fatade izóidino, afe nñi ómoina fienu úritinomo fíaicana caimare cacáreidiomoi.

²¹ Bie izói cue daína cuena meáruitade, mei íadi dama cue jámairuillado daíticue, cue bie afémaci fínua izói, cue finóllena figo riinidicue.

Mei íadi alilo jiáie comini jacíruiñeno daífirina izói, cue jiái jacíruiñeno daíticue, mei íadi áfedo uáiritaidimie izói úriticue.

²² ¿Meita afémaci hebreo imaci? Cue jiái daje izóidicue. ¿Meita afémaci Israel nairai iédaioi? Cue jiái daje izóidicue. ¿Meita afémaci Abrahámona comuídino? Cue jiái afémaci izóidicue.

²³ ¿Meita afémaci Cristo táijitagano? Cue bie afémaci baimo Cristo ocuicamedicue. (Bie izói cue dáinado uáiritaidimie izói úriticue.) Cue bie afémaci baimo jamánomo táijidicue. Cue bie afémaci baimo zéchedogacue. Daje izói afémaci baimo llavécacue. Iemo diga ícaíño titáacagacue.

²⁴ Cinco dígacaiño judío nairai duere cue fínua llezica, cuena zechénotadiaoi. Nágari duere cue íaioi fínua dáruido treinta y nueve dígacaiño cuena zechénotiaoi.

²⁵ Iemo dacaiñoámani cuena ragüízido fatíaoi. Iemo dacaiño noficiaína cuena njídiaoi. Iemo dacaiñoámani cue jailla áillue nocáe buide. Iemo dacaiño cai buillamona daa naio daa mona diga afórede monaillai cígimo iticue.

²⁶ Dáanori uái iñeno iere macáfiredicue. Iemo diga imani jacíredinuiaimo iticue, íemo jacírede merírifiredino cígimo iticue, íemo dama cue comíniri jacíredifuiái cígiri iticue naa jicánemaciri. Iemo áillue jofue cígimo ite jacíredifuiái cígimo iticue. Daje izói áillue nairai jinomo ite jacíredifuiái cígimo iticue, íemo jiái monáillaimo jaci cácadicue. Iemo jiái taino ámatiai cígimo jaci cácadicue.

²⁷ Daje izói Juárezde táijinamo iticue naa féiredifuiairi. Diga ícaíño mona naio diga iníñeno tájidicue. Daje izói iere jufi cácadicue, íemo jiái jainoi iñenari duere zefuídicue. Diga ícaíño Juzíñamuimo comeci fácano güiñeno jácadicue. Daje izói rólliemo duere zefuídicue. Daje izói incuiironino jácadicue.

²⁸ Nane bífuiái baimo jiáifuiái cuemo comuide. Nágaruillaido náganuiaimo ite Juzíñamuimo jaináidinomo cue comeci úcaide. Iaioina abíoidicue izói duere zefuídicue.

²⁹ Iemona daa come figo Juzíñamuimo ie íñoñenamona duere zefuíadi, afe cuena duere zefuítate. Daje izói dámie íaifuomo comeci nine féiacaniadi, cue comeci niné féizailla izoide. Iemona afe cuena meáidaitade; daje izói cuena rícaitate.

³⁰ Mei afémaci táinodo cuena abí ínotaadi bie izói daíticue: Cue mairíñenana jino ácatate raado ñue cue úrillena baimo gáidicue.

³¹ Cai Moo Juzíñamui bie cue daína ua uaina onode. Afémie cai Ocuíraima Jesucristo Moo; íemo jiái afémie jaca ninomo íobioitaregaza.

³² Naui Damáscomo cue illa llezica afe nairai jabóidillaíma naga nazemo úñorainina jóonete, llaitada cue llavéllena. Afe nairai nahíllaíma Areta mámeciredimie.

³³ Mei íadi jiáie Juzíñamuimo ínotino, eróirafomona cirígaido cuena ana agüinetiaoi; mei afe jofue onífene cirínua raa caífo jicado íteza. Daí afémacimona botada jíllocicue.

12

Juziñamui Páblomo nicai anado ua ráfuedo úrite

¹ Dáamie dama abido caimare úria minícana oñede. Ie úrilla jiáie raamo ráifiñede. Afefue ñue onódicue ia, cai Ocuíraima nicai anado cuemo ácataga raa jino llóredicue. Afe llezica úcodo nai buna óñoñegafuiái cuemo llote.

² Afe cuemo ácataruimona ja catorce fimona jaide. Aféruimo Crístomo cue jaináinamona caifo tercera monamo Jesucristo illámonamo uigacue. Onóñegaza nibai caana abido uigacue, nibai íeizinino uigacue. Afe dama Juziñamui onoiga.

³ Cue úinaruimo nibai abí diga uigacue, nibai daa cue joreño úina, áfena onóñedicueza; dama Juziñamui onoiga.

⁴ Juziñamuimo ínóte tíidino jáillinomo uigacue. Afénomo Juziñamuimona dama cuemo duide ebírede uáillaina cacádicue; afe uáillaido Juziñamui rairuúdeza birui úrinidicue.

⁵ Afe cuemo ácataga raado abina ínoredicue, mei íadi áfedo abina ínóñeiticue. Dama cue abina ínóñeiticue. Mei jiáifodo cue mairíñenado ñue cue úrillena iere gáidicue.

⁶ Mei dama abido cue úriacaniadi, afe abina onóñeno úrilla izoíñede, mei jaícina uáfena úriticue. Mei íadi áfedo úriñeiticue, mei cue ciona izoí comini cuemo comécillena jitáidicueza. Afe izoí cüemona íaioi cacana izoí áfeze cuemo íaioi comécillena jitáidicue. Afe baimo aillo jiáiforie cuemo íaioi comécillena jitáidicue.

⁷ Afe cuemo jino onótaga raa iere jamánomo ebire cioide. Ie jira áfedo jamánomo abina cue ínóñeillena, duere zefuítacue. Afe duere cue zefuilla come abimo eedo llúina izoide. Afe eedo, Taiíe come izi cácatate raa izoí, cuena duere fínuaíbite.

⁸ Bie duere cue zefuilla raa cai Ocuíraima oni oréllena dacaiñoámami íemo jicádicue.

⁹ Mei íadi cai Ocuíraima cuena daide: Cuemo ite o cue cáimadofirena nana omo comuide duere zefuilla o ocuúllena ñue cánoite. Mei daa come náinina llezica, cuemo ite ñuera riño afémiedo ñue jino ácatarede, daide. Ie jira cuena náinitade raari íobidicue, afe daí Crístomo ite riño cuedo jino ácatallena.

¹⁰ Mei jira cue náininari íobidicue, íemo comini cuena báifuarí íobidicue. Daje izoí raana cue jitáillari íobidicue. Afe izoí cue duere íaioi finóacanari íobidicue. Iemo Cristo ícoinia féiredifuiái cuemo comuillari íobidicue. Mei jamánomo íaioi cuena uáitaacana llezica, afe llezica Juziñamui cue cánuado comécina jamánomo íociredimiena jáidicueza.

Coríntomo ite Juziñamuimo jaináidinomo Pablo comeci úicaiñrede

¹¹ Dama cue abi ífuedo cue úricaiillamona uáiritaidimiena jáidicue; mei íadi daí cue úrillena cuena ocuúoide izoí itíomoi. Mei dani omoi ja birui cuedo ñue úriredíomoi; mei ráifiñedicue ia, omoi cígido jaide Cristo óreñega jamánomoidino jofófenemo ráifiñedicueza.

¹² Naui omoi cígido járitaiñeno fíaicana táijidicue. Afe cue táijicauillaruimo jiáiena onótate raana finódicue naa cíorainina ráaniairi. Afe dáruído ebire cáimacaitate ráaniaina finódicue, nana bifuiáido Cristo ua orécamedicue daíllena.

13 Jiáie Jesumo jaináidino cígiri cue illa llezica, cue jitaica raana raiñódicue; mei íadi omoi cígiri afe izói inédicue. Daa bífuedo jiáie inotino jofófenemo ómoimo comécidicue. Afe ómoimo cue raiñóñena dibénedo ómoimo fieni cacáiadi áfemona meine caimare cue uáidori.

14 Ja birui dacañoámani omoi cue eróizaibillena finóbicue. Iemo omoi cígimo cue íllena ómoimo juare fínoñeiticue; mei ómoimo ite úcubecúeiena máinuabiñeiticueza. Mei jiáifodo dani omoi Juziñamuimo ñue jaináitallena bíiticue. Mei uafue, éicomini úruiai íena úcubena ofítarena. Uruiai íe moo íenafítanide.

15 Omoi comeci ñue íllena dama cuemo ite diga caimare fúitaiticue. Daje izói ómoiri cuemo ite máiriena jeruñeno fúitaiticue. Omoína jamánomo cue izíruiadi ¿afe ibana meita omoi jofófenemo cuena izíruirediomi? Daiñañede mei íadi birui afe izói ómoimona dáarie cuena daí finódiaioi.

16 Nana ómoína cue llótaiduaibiñedicue. Afena ñue fairíotiomoi; mei íadi afe méifomo dámerie jiáifodo daidíaioi: “Irebaimo jiita izói caina bífuiano úcubecue ote,” daidíaioi.

17 Naui ómoimo cue orécamacimona, ¿meita cuemo izájillena dáme ómoína bífuiano úcubecue? ¡Ofñede!

18 Omoi méñuauillena Tito izire jicádicue. Afémiedo daa jiáie ama orédicue. ¿Meita afe Tito úcubecúe óllena ómoína jífue? ¡Daiñañede! Tito, íe nabai, íemo cue, cue macáfírena izói, daje izói nana macádicai, ¿ero ua? Dájena ñue comécillado táijifiredicaiza, ¿ero ua?

19 “Caido abi ríidotio,” nibai caina comécido daidíomoi. Mei íadi afe izói jóiñede. Mei jiáifodo Juziñamui erócana Crístomo jaináitagame izói úriticai. Mei cue izíruiaga ámatiaidíomoi, nana bie izói cue daína omoi comeci Juziñamui dibénedo ñue móonaillena lloticue.

20 Mei omoi diné cue bille llezica cue comeci óiacana izói inédiomoi cue cóizaiBILLena jacíruiticue. Iemo afe ibana omoi comeci óiacana izói inédicue cue omoi baizájillena jacíruiticue. Iemo dájena ñue omoi jaináineno jacíruiticue. Daje izói omoi íradoifírenamo jacíruiticue; íemo jiáimana omoi ícífírenamo jacíruiticue. Iemo afe llezica jiáimana duéruñeno dani abí omoi úcificaiillari jacíruiticue. Iemo jiáima uaita uai omoi llófírenari jacíruiticue. Iemo jiáimaci jánari omoi úrífírenari jacíruiticue. Daje izói fieni abí omoi inofírenari jacíruiticue. Iemo ocuícana náfueñedino izói fieni ebena omoi ífírenari jacíruiticue.

21 Iemo jiái uire omoi cue éroizaiBille llezica omoi daí íllari cue Juziñamui ómido cuena meáidaitalleri jacíruiticue. Iemo afe llezica nibai aillo ómoiri cue éeiri jacíruiticue, mei jaiái ninómona diga fiénidífuiai omoi fínuari éedicueza. Mei ómoimona aillo nai íaioimo ite íaifuiái féitañediaioiza. Daje izói íaioimo ite jírúfuena fáicanocaiñediaioi, íemo íaioi comécina jíríoide fieni finócafuiái oni nine féitañediaioi.

13

Pablo íraicaiño íaioi uáidua uai, íaioimo llonódacaiga uai diga llote

1 Naui ménacaño omoi méñuaidicue. Ja birui nane meine omoi méñuabiñeiticue. Onódiomoi, naga júfidoga rafue mena, nibai daámani uai nabáiraini daje izói úriadi, afe júfidogafue ñue záide.

² Naui méifodo omoi cue méiñuaibilla llezica, nana naui uícodo fienu itínona duere cue finóllena llonódacaidicue. Birui benó jica cue illa llezica dáanomo naui ómoína dama cue dáiñana llóiticue: “Uire nane omoi cue méiñuaibia naui uícodo fienu itínona naa ómoiri dúecaiñeno duere fínoiticue,” daidicue.

³ Iemona omoi jenoca Cristo cuedo úrilla onótafirena raana ñue ónoitiomoi, mei áfena jenófirediomoiza. Omoiri Cristo náinidímie izóifñedeza, afémie ríinorede, Cristo omoi diga jifánoñedeza, ríiredímieza. Omoína ñue rairuíoide. Omoi cigiri íemo ite ríino jino cíotote.

⁴ Uáfueza, Cristo náinidímie izói cruzmo coraica, mei íadi birui afémie Juzíñamui ríinodo caade. Afe daí Cristo náinina izói dájena náinidicue, mei íadi dájena afémiemo cai jaináillado Juzíñamui ríinodo líticue, omoi ñue cue finófireillena.

⁵ Mai dani ñue abina omoi onoiri. Afemo, mai ñue comeci omoi facari, Juzíñamuimo ñue ínoga uai iere jeire omoi úana omoi onóillena. Omoi comeci ifue facada ñue jónefireiri. Jesucristo ómoiri íllamo ¿meita afemo comeciñediomoi? Mei nibai jíáfodo jóide. ¿Meita táinona ínnotiomoi? ¡Afe daí íñeiteza!

⁶ Mei uáfueza, cai bie táinona llotímieñedicue. Afemo ñue omoi coméioicaillemo ocuridicue.

⁷ Iemo afe llezica fiénidífue omoi fínoñeillena Juzíñamuimo jicáfiredicue. Daa ñúefue dibénemo omoi íllena jicádícue. Mei íadi ñue jaícina llófuefiredímie cuena daíllena jicáñedicue. Dámie “Jaícina lloñédío” dáíadi áfena llóñeiticue. Núefuemo omoi ille comíni cueri dáiñana baímo ráifide.

⁸ Jaca ua uai jeire omoi oíadi úaitañeiticue; ómoína lletánidicue. Mei jíáfodo afe uaina nabáiredicue.

⁹ Ie jira ómoína cue lletáninamona náinina cue cíoiadi, áferi caimare íóbídícue, mei afe llezica omoi ñue comécina náirediomoiza. Iemo nífuenino ñue jaícina omoi íllena jaca jicáoifireiticue.

¹⁰ Nai omoi cue méiñuaibiñena llezica, bibe uícodo ómoímo cueticue, uire ómoímo cue bíadi omoi diga riire cue íñeillena. Uáfueza, omoi riire cue lletalle ríino Juzíñamui cuemo iga. Mei íadi omoi cue táinocaitallena cuemo íñega. Mei jíáfodo Juzíñamui dibénemo omoi comeci ñue cue móonaitallena cuemo iga.

¹¹ Cue ámatiaí, ñue ítiomoiza. Dani nífuenino jaícina omoi illínomo omoi coméiiri. Bie ómoímo cue lloga uai náfuiano, conímama omoi náicaitafireiri. Conímamo dájéize caimare omoi coméiifireiri. Daje izói jíá dájena ñue uái illífuemo omoi iri. Iemo cai uái illífue comúitate Juzíñamui omoi diga ífireite, íemo ómoína ie izíruifirenana ónoitiomoi.

¹² Caimare conímama omoi uáidori.

¹³ Nana benó ite dájena Juzíñamuimo ínnote cai ámatiaí ómoímo uai orédiaíoi.

¹⁴ Ja birui cai Ocuíraíma ómoína ñue fínoiteza. Daje izói Juzíñamui ómoína izíruifireiteza. Iemo Ñuera Joreño ómoína nabáioicaiteza. Daítadeza. Jae ñie.

GALACIA ENĒ IMACIMO SAN PABLO ORECABE

La Carta del Apóstol San Pablo a los Gálatas

Pablo, Galacia éniemo ite Juziñamui uaimo ñnofiredinomo cuete

¹ Cue Páblodicue. Juziñamui ñúefue llujjillena orécamedicue. Dani comini cuena jóoniamona llujjñediceza. Daje izói comini cue óriamona llujjitagamiñedicue. Mei íadi dama Jesucristo llujjitagamiedicue. Daje izói afe Jesús tíidinomona meine abido cáatate Moo Juziñamui llujjitagamiedicue.

² Nana Galacia éniemo ite Juziñamuimo gairifiredinacimo bibe cueticue. Daje llezica nana cue diga ite ámatiai uai orédiaioi.

³ Moo Juziñamui fecaca comécina uái illafue dibénemo mai omoi iri. Cai Ocuíraima Jesucristo afe bífuiai daje izói caimo llote. Aféfuiai dibénemo mai omoi iri.

⁴ Mei afémie, cai fiénidifuiái dóllena, titállimiena dama ie abina izájide. Daí cai Moo Juziñamui jitaina izói, afémie ie abina izájide, bie fiénidiruillaimona oni cai jirecaillena.

⁵ Juziñamui daí cai jíllojamona, afémiena “Jamánomo cáimamedio” mai cai daiilli. ¡Afémie jaca daí íteza! ¡Mai!

Abí dine cai jílloille uaina jaca ñede

⁶ Juziñamuina raire omoi zóofailla uai, cuena fáigacaitade. Zóofiano, ja jáie táinomona lloga jáífodo joide fia daina jílloña uaimo íacadiomoi. Aferi fáigacaidicue. Mei Juziñamui, Cristo caina izíruillado omoi jílloillena, jae caimare ómoína uáidoteza.

⁷ Uáfuena dáiticue: abí diné jáie jílloña uai jaca ñede. Mei íadi dáarie ómoína áifedotimaci, cai bie Crísumo ñnuamona cai jílloña uaina, jáífodo feire méidoacadiaioi.

⁸ Mei íadi jáie come afe cai jílloña uaina uáitajano, jáíifoidifue ómoimo llóiaí, mei dama Juziñamui afémiena fáidoiteza. Nibai dama cue daí jáífodo llóiaí, Juziñamui faidólliceza. Daje izói monámona biite Juziñamui abí ímie daí llóiaí, mei Juziñamui íena fáidoiteza.

⁹ Naui ómoimo cue llua izói, birui nane daje izói daidicue: Dinó omoi jáífodo llófueacadino cámona omoi cacana jílloñafuena afémaci uáitaiadi, mei afémaci Juziñamui faidólliaioiza.

¹⁰ Bie riire cue dáinodo ¿mei nibai comini bífueticue cue íaioi cáimadollena? ¡Mei íeñede! Dama Juziñamuina íóbitaacadicue. ¿Mei nibai comini uícori figomiena íacadicue? ¡Daje izói íeñede! Comini uícori figomiena nai cue íacaiadi, mei Cristo táijitagamienna ínidicue.

Pablo Juziñamui ñúefuena llujjitiñmiena jáillafue

¹¹ Mei ámatiaína ja maméidimoiza, ja bífuena nane omoi uíbitaticue: Cue lloga jílloña uai cominimona comuíñede.

¹² Daje izói aféuaina cominimona cacáñedicue. Ua áfena bu llófueñegacue. Mei jáífodo aféuaina dama Jesucristo onótagacue.

¹³ Naui judíuai ñnogafuaimo cue jainaina llezica, cue illáfuena jae onódiomoi. Aféruído Juziñamuimo gairifiredinona iere duere íaioi cue finóllena

riire cue rácajana fidídiomoi. Daje izói nana íaioina niné cue táinocaitallinona onódiomoi.

¹⁴ Afe llezica, cue uzútiai daináuailaimo iere izire cue jaináicanamona, judíuai ínogafuemo baimo baitádimiena jáidicue. Aféfuemo comécina iere fígomiena jáidicue. Ua aillo cai judíuaimona, daane cue comuállagimamona baimo fibídimiena jáidicue.

¹⁵ Mei íadi nai cue jócoñenia, Juzíñamui cuena nizede. Daí níziano, iere cuena ie izíruillamona, cuena uáidote. Cue ie uáidua mei, ie óiacana izói, ie Jitona cue onótate.

¹⁶ Ua, ie Jitona cue onótate, afe Jitó cue onónamona Juzíñamui ñuera jíllona uai judíoñedino cígimo cue llujillena. Daí Juzíñamui cue uáidotemo, bumo nífuena “Mai cue llofue” jicánoñeno, dama oni Arabia éniemo raire jáidicue.

¹⁷ Ua, Jerusalemo ite nano cue uícomo uáidoga Jesús ñúefue llujítinomo úrizaiñeno, raire oni Arábiamo jáidicue. Diga irui dínomo cue illa mei, abido Damáscómo biticue.

¹⁸ Afe llezica Jerusalemo are nai jáiñedicue. Dafimonaámani dínomo cue fuita mei, Jerusalemo jáidicue, Pedro diga cue úrillena. (Afémie jíáifo mameina Cefas.) Aféruimo dama Pédróna ñue onódicue. Quince dígarui ie diga nabáircadicue.

¹⁹ Aféruillaido jíáie Jesús ñúefue llujítimacimona dámie ciódicue; afémie Santiago, cai Ocuíraíma ama.

²⁰ Juzíñamui erócana úriticue: Bie ómoímo cue cuega nahí uáfueza, daidicue.

²¹ Afe méifodo Siria éniemo naa Cilicia énie diga jáidicue.

²² Judea éniemo ite Crístomo gairífredino nai cue uiecona onóñediaioi.

²³ Dáafuena fidídiaioi. Afefue bie izói daide: “Jaiái cai fállena cai racádimie, ja birui cai ínollifue llocana uite. Jaiái jíáiruido aféfuena afémie nine táinocaitaacade.”

²⁴ Iemona cuedo Juzíñamuimo ñúefue jóonetiaioi.

2

Jíáie Jesús orécamaci ja Pablo caimare uáidotiaioi

¹ Catorce fimona fuilla mei, Bernabé diga meine Jerusalemo jáidicue. Afe dáaruido Tito uiticue.

² Juzíñamui cuena daina izói dínomo jáidicue. Díno Jerusalemo Juzíñamuimo ínotino ocuífiredo jalléidino dáarie ite. Íaioiri oni eneno fueñe dáanomó gairídicue. Dínomo judíoñedínomo cue llófirega jíllona uai íaioímo jino lloticue. Bie izói íaioímo llujidicue, nana cue llócaigafue táinomo fáifíñeillena; daje izói birui jino cue llogafue táinomo fáifíñeillena.

³ Aféruído cue nabai Títóna judíuai lloga uai izói, finóñediaioi; afémie judíoñedino íadi, ie bacano ícoi quetáañediaioi.

⁴ Afe llezica dáarie táinona llote ámatiai, báinino cai cígimo dúcidiaioi. Afémaci Tito bacano ícoi quetáacadiaioi. Afémaci cai cígimo uíñodoimaridiaioi, rairuínino cai illana onóillena. Mei ja birui Jesucrístomo cai jaináinamona, Moisés ocuica uáimona uáfodo jirénogacaíza. Afémaci nane abido áfemo caina izire rairuícano izói finócadiaioi.

⁵ Mei íadi íaioi llógana naado jeire oñédicai, mei oni íaioi taino llujífuemo abina uitáañedicaíza. Daí íaioina jíeruiñedicaí, mei ua jíllona uai jaca jeire omoi óllena, iere jítaídicaíza.

⁶ Mei íadi afe Jerusalemo ite ocuífírede jalléidino comue jiáifüena cuemo lloñédiaioi. Afémaci jalléinafüena figo náfüeñedicue, mei onódicueza: Juzíñamui, fia jinofe ífüena riire jicánoñede. Mei jiáifodo afémie naga cómemo dájerize ñue jaícina jicánoite.

⁷ Ua, jiáie cómoüena cuemo lloñeno, dama cue lluájigafue ñue jiéruitiaioi. Ñuera jállona uai, judíoñedinomo cue llócaillena Juzíñamui cuemo jóoniana como fidídiaioi. Afe uícomo daje ñuera jállona uai judíuaimo Pedro jino llócaillena fidídiaioi. Afe táijina Juzíñamui Pédro mo jóonete.

⁸ Mei uáfueza, Pedro ória izóí, cue jiái orécacue. Daje Juzíñamui Pedro judíuai cígimo orea. Ie mei daje Juzíñamui judíoñedino cígimo cuena orede.

⁹ Aféruillaido Santiago, Pedro, Juan diga nanoide ocuídino. Bie ñuera táijinafüe Juzíñamui cuemo jóoniana íaioi fidínamona, cócona Bernabé diga caimare uáidotiaioi. Daií cócona finódiaioi, ja nana dáamacidicai daiíllena. Iemo, afémaci judíuai cígimo táijizailla llezica, coco jiái oni judíoñedino cígimo táijizairedicoco. Daií cócona daiírediaioi.

¹⁰ Daa rafue cócomo jicádiaioi: “Mai jaca féitañeno, duéredinomo comeci ómicoi uíbifíreiri,” daidíaioi. Afefue cue finóllena jaca jarítaifíredicue.

Antioquía jófüemo Pablo Pédróna lletade

¹¹ Mei jiáiruido Pedro Antioquía jófüemo dúcia mei, íemo eróicana íena riire lletádicue, mei rairuíredifue ie finua jira.

¹² Fueñe afémie judíoñedino diga güizájífirede. Mei íadi Jerusalemo ite Santiágo mo jaináidino dúcina llezica, afe Pedro judíoñedino diga dáanomo abido güizáiñede. Iaióimona jirecaillano oni eneno ífirede; mei Jerusalémona bite bacano icoi quétafüe llotínona Pedro jacíruteza.

¹³ Afénomo Jesumo ínote jiáie judíuai ite. Pedro oni eneno jáillana íaioi cíoilano, afémaci daje izóí judíoñedino cígimona oni jirecaidiaioi. Iiranomo jiái Bernabé íaioi fiénide oni jirecaillamona daje izóí jirecaide. Afefue jiáimacina jífueoicaide.

¹⁴ Mei íadi, ñuera jállona uai ua daína izóí íaioi íñénana cue cíoilano, nana dáanomo gairídino eróicana Pédróna daidicue:

—O judíoí, mei íadi benomo judíoñedino illa izóí itio. Benomo judío illa izóí íñéíio. ¿Ñibái mei birui judíoñedinona judíuai illa izóí jóoneacadio? —dino Pédróna lletádicue.

Nana jiáie comini izóí, judíuai Crístomo íaioi íñogafuedo jállorediaioi

¹⁵ Cai bie jaca jocóinanomona judíuaidicai. Juzíñamuimo comécifíredicai. Judíoñedino Juzíñamuimo comécina facañediaioi. Iemona fiénidífuiairedinona ítaioi. Cai afémaci izóíñedicai.

¹⁶ Mei íadi onódicaiza: Moisés ocuica uai iere ñéfinamona, buna Juzíñamui anamo ñue jaícina ínide. Mei dama Jesucrístomo dánirie íaioi íñuado illa dígamie daií jaícina írede. Iemona judíoñedino izóí, cai daje izóí, Jesucrístomo íñoticaí, afe íemo cai íñogafuedo Juzíñamui anamo ñue jaícina cai íllena. Uafue, Moisés ocuilla uai iere ñéfinamona buna ñue jaícina ínide.

¹⁷ Birui cai judíuai cígimona dámie Crístomo ie íñogafuedo Juzíñamui anamo ñue jaícina íacaniadi, bie izóí daiírede: “Judíoñedino izóí fiénidimíena

iticue” daiírede. ¿Meita bífueмона “Cristo fiénidimacina caina itátate” daiírede? ¡Daiñide! Mei Cristo jaca buna fiénidimiена itátañedeza.

18 Mei jiáifodo, nauti niné cue táinocaitaga Moisés ocuícáfue, meine abido jeire cue óiacaiadi, ua cue fiénidena uáfori jino ciótaiticue. (Mei afefue iere cue ñéfinamona Juziñamui anamo ñue jaícina inidicueza.)

19 Afe Moisés ocuícáfue ja cuemo dúñede. Da afe uai jeire cue oñenamona cuena titade izói finode. Afe Moisés uaimo cue dúñenamona, ja Juziñamui dibénemo, tñillanomona meine cáadimie izói iticue.

20 Cristo nauí cruzmo coraica tilla izói, ja birui tiide izói finócamiedicue. Iemona ja birui cue cáanano dama cúeieñede; Cristo cuemo illado cáadicue. Afe bie éniemo ite bie cue cáanano, dama Juziñamui Jitomo cue ñnuado ófiredicue, mei afémie cuena iziruillano, dama ie abina cue meifomo cruzmo tñizaideza.

21 Juziñamui cue jñlloillena caimare cue cánuafuena jaca ruifñruicañedicue. Mei dámie Moisés ocuica uai jeire úamona Juziñamui anamo ñue jaícina ítenia, Cristo tilla ráifiñede.

3

Moisés ocuica uai comini ñnogafue abido joidé

1 Aii, Galicia comini, iere abina onóñedinona itíomoi. ¿Bu aima izói omoi bífuiа, ua uaina omoi jieruiñeillena? Nauí ómoimo cue lluaruido, coraica Jesucristo jino uáfodo ómoimo fidítaticue.

2 Mai bifue cuemo omoi lloiri: ¿Nífuedo afe Ñuera Joreño ómoimo ite? ¿Meita Moisés ocuica uai jeire omoi úado ómoimo ite? ¡ñnega! Mei jiáifodo, ¿omoi cacana uai omoi ñnuado afe Ñuera Joreño nibai ómoimo ite? Jií, áfede ite.

3 ¿Nibái mei iere abina onóñedinona itíomoi? Jesumo omoi ñnuua mei, Juziñamui Ñuera Joreño nanómoma ñue omoi canode. Afémie ómoína canode ñue jaícina omoi illena. ¿Meita ja birui afe cánuana zóofiano dama ómoimo ite rñnodo nibai ñue fuitaitíomoi? ¡Jaca fuitánidíomoi!

4 ¿Nana omoi duere zefuillafue jaca ómoimo nibai ráifiñede? ¿Nibai taino abiri aféfuiai ómoimo daií ificaide? Aféfuiai táinona illamo comécñedicue, mei daiítañedeza.

5 Nauí Juziñamui ie Ñuera Joreño ómoimo fecade. Iemo Juziñamui omoi cigiri uaido finoca ciórainina raana comuítate. ¿Mei nibái bífuiaina Juziñamui ómoimo finode? Ocuica uai jeire omoi úamona, afémie aféfuiaiaina finóñede. Mei jiáifodo dama cúemona omoi cacana uai omoi ñnuamona afémie bie izói finode.

6 Abraham Juziñamuimo ñnote; íemo ie ñnuamona comécina ñue jaícina jóidimiена Juziñamui íena caimare uáidote.

7 Ja bífueмона onóredíomoi: Nahí Abraham erófene igímaiaí Juziñamuimo ñnotino.

8 Juziñamui nana uire ie finóllifuiaina raire uícode onode. Iemona ie Cuegáuaido aféfuiaiaina afémie jino llote. Nana íemo uire ñnotino judíoñedino íadi, Juziñamui anamo ñue jaícina itátaillifuena Juziñamui raire uícode onode. Afena ie onónamona bie ñúefuiai jaiaí uícode Abrahana daide: “Naga náiraiaí ómona ñúefuemo ézicilliaíoi,” daide.

9 Mei daií nana Juziñamuimo ñnotino dájena Juziñamuimo ñnote Abrahámoiri ñúefuemo ézicilliaíoi.

¹⁰ Nana íaioi jílloillena Moisés ocuica uaimo ínotino ja fienu faidócaiaioi. Mei daí Juzíñamui Cuegáuai dáideza: “Nana Cuegánicomo ite ocuica daínáfuenta, nágarui ñue fuitáñedino ua fienu faidócaiaioi.”

¹¹ Bífuemona ñue onódicaiza: Ocuica uai iere ñéfinamona buna Juzíñamui anamo ñue jaícina jóoneñega. Mei jiáifodo Juzíñamui Cuegáuai daide: Juzíñamuimo ie ínogafuedo Juzíñamui anamo ñue jaícina jóonegamiena jáidimie, afe daa ie ínogafuedo are zíñona líte.

¹² Afe Moisés ocuica uai comíni ínogafue abido joide. Bíuailaina ñue ícoimo fuitáacadimie, aféuailaido írede.

¹³ Ocuica uai cai faidóllifuemona Cristo caina oni jírecaitade, mei afémie cai ícokia faidóbideza. Juzíñamui Cuegáuai bie izói daide: “Naga aménamo agúineta fagámie faidócaza.”

¹⁴ Bífue daí íficaideza, judíoñedino ñúefuemo ézicillena. Ua Juzíñamui Abrahamo lloga ñuera ézicirafue daí Jesucristodo judíoñedinomo fecaca. Bífue daje izói íficaideza, Juzíñamui uícodo lloga Ñuera Joreño cai ínogafuedo caimo íllena.

Moisés ocuica uai, Juzíñamui Abrahamana dáinana oni caitánide

¹⁵ Cue ámatiai, naga come onóigafuemona dafue ómoimo llóiticue: Dámie contrato llínoiadi, ie mámece afébemo cuega, íemo afe ja cúegana buna oni caitánide. Daje izói afe cuega baimo buna jiáiuaina zotánide.

¹⁶ Ja onódicaiza: Afe ñuera uícodo lloga uailai Abrahamo Juzíñamui jaijai llote; daje izói Abraham erófene ímiemo lloga. Aillo ie erófene ígímaiaimo Juzíñamui Cuegáuai daíñede, mei jiáifodo “O erófene ímiemo llóiticue” daide. Afe daínámie Cristo.

¹⁷ Cue llogafue bie izói joide: Juzíñamui riírede méidoñega uai Abrahamo llote. Afe llezica afefue féiñeillena Juzíñamui afe uaina riire jóonete. Afe lloga uai contrato izóidíuui; jiáifodo méidonideza. Ie jira cuatrocientos treinta díga fimona záilla méifodo Moisés lloga ocuica uai, uícodo Abrahamo lloga uaina oni caitánide. Daje izói méifodo ocuica uai, uícodo Juzíñamui lloga uaina ráifitanide.

¹⁸ Juzíñamui dáinamo ie ínuamona Abraham jílloide. Afe bie méidonide Abraham jílloillíuaina Juzíñamui raiñóñeno íemo fecade. Iemona afe jílloina uai, Moisés ocuica uaimo jaináíñede. Moisés ocuica uaimo jaináiadi, aféuai ja uícodo lloga jaca raiñóñeno íga raa izóíñede.

¹⁹ Iemona, Moisés ocuica uai ¿niemo ráifide? Afe ocuica uai méifodo bai nabaica, comíni íaioi finoca fiénidíuaina onótallena. Afe nabaica uai are íñede. Núefuena lloga Abraham erófene ímie Cristo bíllamo, afe nabaica uai záide. Afe ocuica uai monámona Juzíñamui abi imácido lloga. Iemo íaioi llua mei, Moisés aféuaina jino comínimo llote.

²⁰ Juzíñamui Abrahamo úrilla llezica jiáimado Abrahamo lloñede. Dámie daí uáfodo úriadi, jiáie llóitimiena jítaiñede. Bie Abrahamo úritimie daade Juzíñamui.

Moisés ocuica uai ¿nié izói comínina canode?

²¹ ¿Mei nibai bífue daíacade Moisés ocuica uai, Juzíñamui lloga ñúefuaina uáitaacade? ¡leñedeza! Uáitaacañede. Mei cáataite ocuilla uai ígadenia, aféuai jeire cai úado Juzíñamui anamo ñue jaícina íredicai.

22 Mei jiáifodo Juziñamui Cuegáuai daina izói, nana fiénidifumo llavécanodicaí. Daií Juziñamui uícodo mamede, nana Jesucristomo ñnotino jíllobicaillena. Uafue, Juziñamui afe bie izói mamede Cristomo ñnotino íaiói ñnogafuedo Juziñamui lloga ñuera jílloñafuena íaiói óllena.

23 Jesumo cai ñnogafuena nai jino déiñena llezica, ocuica uai caina llavécanona finode. Aféruillaido Jesumo cai ñnollifue jino déillemo ocuúridicaí.

24 Iemona Juziñamui afe ocuica uaina caimo mamede, cai ñue rairuillena. Ua úruiaí ñue fibítatimie izói caina rairuide. Daií afe ocuica uai caina úiñoide; nai Cristo bíñeille dinó. Afe daií Cristo bíllemo afémiemo cai ñnuado, Juziñamui anamo ñue jaícina íredicaí.

25 Biruí ja Jesumo cai ñnollifue déideza, ja afe Moisés lloga fibítatuai dibénemo dúiñedicaí.

26 Mei Jesumo omoi ñnogafuedo, ja omoi nana Juziñamui úruiaidiomoi, ja Cristo Jesumo dájena jaináidiomoiza.

27 Omoímona báutiza mei Cristo Jesumo dáena jainaide dieze, nana omoi afémie comeci ífuena ja jeire otíomoi.

28 Ja biruímona cai cígiri bie judíona dainámiena iñede, bie Griego dainámiena iñede. Daje izói llavécamienna iñede. Oni eneno jirénoga dainámiena iñede. Afe izói ringo ima diga oni jiáifodo mámeñega. Ja Cristo Jesumo cai jaináinamona nana cai dáamacidicaí.

29 Ja Cristo íedimoiza, Abraham erófene igima izóidinona jáidiomoi. Iemona Juziñamui Abrahamo uícodo lloga ñuera jílloillifuenta, feci raa máiñua izói, máiñoitiomoi.

4

1 Bie izói cue daiíacanafue: Daa come jitó móonaillano, ie moo tíilla mei, moo raana náamatarede. Mei íadi afémie nai úruena llezica maiñónide, Afémie nai jofo eromo ocuúfíregamie izoide, afémie nana afeco raana maiñóreite íadi.

2 Afémie nai úruena llezica, íena úiñoitino ite, ie moo jiáifodo ie úiñotinomona oni olle dino. Daje izói ie jetállifue ocuúidino ite.

3 Jaca bie izói caimo comuúfírede. Cai jílloilliuai nai déiñena llezica, nai úrué illa izóidicaí. Aféruillaido aillo bínie comini nícidogafuiai anamo, izire ocuúcano izói, iticaí. Dáarie cómemona ocuica uáillaido llavécacaí.

4 Mei íadi nana Juziñamui mamécafuiái ñue zuilla mei, jaiái uícodo ie mámiarui dúciamoi, Juziñamui ie Jitó Jesús orede. Afémie ringómona jococa. Moisés ocuica uai anamo judío izói comuúzaíbite.

5 Afémie daií bite, nana Moisés ocuica uáillaido llavécano aféuaimona oni jirecaitallena. Daií cai jirecaillamona Juziñamui dama ie jítótiaína cai jáillena cai mámiáno, caimare caina uáidoite.

6 Iemona, ie jítótiaí omoi íllana omoi onóillena, Juziñamui ie Jitó Jesucristo Joreño omoi comécimo orede. Afe caimo orecá ie Joreño riire daiífírede: “¡Cue Moo!” daide.

7 Mei daií o ja Juziñamui jítódio. Ja riire ocuúcamieñedio. Ie jítona o íllamona, ie uícodo lloga ñúefuíaína Juziñamui Crístodo omo fécaite.

⁸ Naui Juzíñamuina nai omoi onóñena llezica, taino juzíñamuillaimo izire ocuífreganodiomoi. Afe omoi llaveina juzíñamuillai ua juzíñamuiñede; fia jífuia juzíñamuillai.

⁹ Mei birui ja ua nahí Juzíñamuina onódiomoi. Mei jíáifodo ñue daina, Nahí Juzíñamui ja ómoína onode. Ja íena omoi onónamona, ¿nié izói meine abido afe ríinide jíllonafuiaiina jeire óiacadiomoi? Dáanomo íaioi llavéinanomo ¿meita abido jáirediomoi?

¹⁰ Diga iruillai oni jíáifodo nai coméciifirediomoi. Daje izói diga fiuillai eneno jíáifu coméciifirediomoi, naa diga fimónaiairi.

¹¹ Nibai nana omoi cígiri cue táijiacana táinomo jífánofide izóideza áfena jacíruiticue. (Afe cue comécina lícioide.)

¹² Amatiai, izire jicádicueza: Cue comeci ifue illa izói, mai meine afe izói omoi iri. Mei cue omoi illa izói jae itícueza. Mei omoi cuemo minícana fiénidifuena finóñediomoiza.

¹³ Cue omoi cígiri nano illáfueña onódiomoiza. Aféruillaído, cuemo comuide duícori duere cue zefuillamona afe jíllona uai jino ómoimo lloticue.

¹⁴ Afe cuemo ite duico cue facátaina, mei íadi afe jira cuena jámairuñediomoi. Daje izói cuena ruifiruiñediomoi. Mei jíáifodo Juzíñamui abi ímie izói caimare cuena líinotiomoiza. Ua Jesucristo omoi líinolle izói cuena caimare líinotiomoiz.

¹⁵ ¿Nee mei afe omoi cacana cámafuiái? Afe cue irárenaruimo cuena iere izíruillano, daní omoi uíjina jírénota cuemo fecácadiomoi, íadi fecánide. Afe ñúefue omoi dibénemo nitáredicue.

¹⁶ Ja ua uai ómoimo cue llúamona ¿Meita ja birui omoi bacáuái ímiena jáidicueza? ¡leñedeza!

¹⁷ Afe baie jicana bite comini ómoimo iere caimare coméciidiaioi. Mei íadi comeci ñue jítaillamo coméciñediaioi. Omoi bífuellena caimare úritiaioi. Afémaci cúemona ómoína bairóacadiaioi, uire íaioimo omoi jaináillena.

¹⁸ Jáimacimo ñue íllena caimare coméciillana ñuera. Mei íadi cue illa llezica daje izói cue íñena llezica come comeci ñue jítaillamo daí coméciirede. Daíitadeza. Naui omoi cígimo cue illa llezica, afe onínemacido daí jífuefiñediomoi; mei íadi birui omoi cígimo cue íñena llezica nágarui jaca daí jífuegaomoi.

¹⁹ Cue úruiai, ringo úrue jocóacania duere zefuilla izói, nane ómoiri duere zefuídicue. Ua Cristo comeci ifue nai omoi ñue ónoñeille dino, nai ómoiri duere zefúiticue.

²⁰ Birui izire omoi cígiri íacadicue, jíáifodo ómoimo cue úrillena. Onóñedicueza, nié izói ómoiri coméciitcue.

Abraham ai Sara, ie oga jíáingo Agar íainguai ñúefueña caina onótate

²¹ Ja birui Moisés ocuica uai anamo íacadinomo úriticue. Mai bifue cuemo omoi llone: ¿Afe ocuica uai dánana cacáñediomoi?

²² Afe uai daide: Abraham mena jítórede. Daa jító ie táijitafiregango ie. Jáíe jító ie nahí ai ie. Afengo buna ócuiñegango.

²³ Ocúifiregango jocócato nana bíniemo ite úruiai jócua izói jococa. Mei jíáifodo nahí ai jocócato Juzíñamui uícodo daínauai fuitállena jococa.

24 Bifue cai onoiga ráamona Juziñamui cai fidítafue. Afe mena ringo mena contrátomo táijina izóidiainguai. Iainguaímona daa Sinaí idu ie contrato izoide. Afe ocuífregango jítótiai ocuífreillinona jocócaiaioi. Afe ocuífregango mámecei Agar.

25 Afe Agar Juziñamui Sinaí ídumo lloga uai izoide. Afe Sinaí idu Arabia éniemo ite. Afénomo Juziñamui contrato comínido finode. Biruillaí Jerusalén jofue afe jaiaí Sinaí idu izoide, (mei Moisés dibénemo íacadino afénomo gairífrediaioiza.) Ie ocuica uai anamo llavécana itíaiioi, naa aféfuemo jaináiacadinori. Ocuífregango Agar úruiai izóidiaioi.

26 Mei íadi monamo ite Jerusalén comini lláveñegaiaioi. Afe jofue cai ei izoide, mei cai bie afe Jerusalem jaináidinodicaiza.

27 Juziñamui Cuegáuai bie izói daide:

Oiniño, úruenidio íadi, mai caimare o iri;

Úrue jócua izrenafuena onóñedingo, mai caimare o róiri.

Mei úrue jocóñena jira dotácango, ñue ogángo baimo jítótiaireitio, daide

28 Amatai omoi cácarei, cai bie Sara jító Isaac izóidinodicaí. Juziñamui uícodo lloga jítótiaidicaí.

29 Mei jaiaí aféruillaímo íaillinoi illa izói, birui afe izói iticaí. Aféruimo come comeci jítainamona jocócamie Ismael, afe Juziñamui Joréñodo jocócamie Isaacina fiénidifuena racade. Biruillaí afe izói iticaí.

30 Mei Juziñamui Cuegáuai ¿nie izói daide? Afeuai daide: “Afe jofo ero ocuífregangona ie jító diga oni oreri. Mei ocuífregango jító, afe ócuíñegango jító diga dájena jofo naama feci ráaniaina maiñónideza.”

31 Amatai, bífuemona onódicaiza: Cai bie ocuífregango jító izóíñedicaí, mei jáífodo cai bie buna ócuíñegango jító izóidicaí.

5

Izire ocuíñena dibéfuemo omoi ífireiri

1 Cristo afe ocuica uáimona oni eneno jirénogacai, lláveñeganona cai íllena. Afe dibéfuemo ñue jaícina omoi iri. Meine dáanomo izire ocuilla uai anamo abina maitátaiñeno iri, mei lláveñeganona itíomoiza.

2 Cuemo omoi cácareiri. Omoi llotímie Páblodicue; jira ómoína dáititue, bacano ícoi quétafue jeire omoi íadi, Cristo ómoimo ráifíñeite.

3 Nane ómoína dáanomo daííacadicue: Ómoimona dámie ie bacano ícoi quetátaadi, nana jáíe Moisés ocuica uáillaina ícoimo fuitárede.

4 Moisés ocuica uai jeire omoi úamona Juziñamui anamo ñue jaícina omoi íacaniadi, jae Cristo dibénemo dúíñediomoi. Daje izói Juziñamui caina izíruillafuemona oni eneno itíomoi.

5 Mei cai jáífodo onódicaiza: Juziñamui Ñuera Joréñodo, daje izói ie uai ñue cai íñuado, Juziñamui anamo ñue jaícina cai illífuemo úíñoidicaí.

6 Iemona daíí Jesucrístomo ñue jaináidicaí. Iemo cai jaináidadi, afe quétafue caimo ráifíñeite. Cai quetátaadi, níbai cai quetátañeniadi, daje izói ráifíñeite. Mei jáífodo afémiemo cai íñogafue ua ñue ráifide. Afe bie cai íñogafue jáíe cómena naa Juziñamui diga cai izíruillena canode; áfemona Juziñamuimo cai íñogafue iere ráifide.

7 Fueñe Juziñamuimo ñue íñofirediomoi. Mei íadi birui, ¿bu afe ua uaina ómoína fáicanocaitaga?

⁸ Juziñamui áfena ómoína fáicanocaitañede! Afémie ómoína caimare uáidofiredeza.

⁹ Bífuenta féitañeno iri: Pan finóadi afe aillo fáitate raa tamédiaioi. Due jiza fáitate raa jóonega íadi, nana afe magáfecina aillo fáitate.

¹⁰ Juziñamuimo cue ínuano, afémie ómoína ñue rairuilla onódicue. Ja onódicueza, cue daináfuemona oni jiáifodo comeci fácañeitiomoiza. Bífuemona omoi comécina oni nibéfodo féitaitimiena Juziñamui duere fñoiteza. Afefue llotímiena Juziñamui raa dáíñeite, afémie nibai illaíma, nibai jamámie.

¹¹ Amatíai, cúemona jiáífue llóiticue. Mei bacano quétafuena nai ocuícicuena judíuai nibai cuena fállena rácañeitiaioi. (Mei íadi cue íaioi fállena rácana onódiomoi.) Afe izói cue llóíadi, Cristo cruzmo tília ñuera rafue íaioína ríicaitañeite.

¹² Mei íadi afe onina bite omoi gáguaibitino daní íaioi jiñíjina, comini meróniaie ie ñetaina izói ñétaitiaioiza. (Afémaci méaicaillena Pablo daí daíde.)

¹³ Amatíai, mei jiáífodo uáidogamacíomoi, ráruifeganona omoi illena. Ua ja birui ráruifeganona itíomoiza, mei íadi afe o rairuifenamona, comécimo fieni itífuiaína finóñeno iri. Mei jiáífodo afe ómoimo ite izíruillafuedo ñuera ocuífiriganona omoi iri; daí conímama cánoitiomoiza.

¹⁴ Mei nana jiáie ocuilla uailaí daa bie ocuica uaimo dájena itíaioi. Be ñíuai: Dama o abina o izíruilla izói, afe izói o abí cómena izíruiri.

¹⁵ Mei íadi ómoimona daní conímama fue erodo omoi éoia, daje izói úradoillano conímamo omoi ríicaiadi, ómoína niné táinocaitaiteza; afe izóidemona abí omoi rairuiri.

Come comécimo fieni itífuiaí Juziñamui Ñuera Joréñomona jiáífodo jóide

¹⁶ Omoina cue dainafue bie izói jóide: Juziñamui Ñuera Joreño dibénemo mai áfemo omoi illafue jóonefíreiri. Afedo omoi comeci fieni finóacanafuiai fñoñeitiomoiza.

¹⁷ Mei daní cai comécimo comuide fieni finóacanafuiai Juziñamui Ñuera Joréñona uáitafrede. Nane abido dájena Juziñamui Ñuera Joreño cai comeci fieni finóacanafuiaína uáitafrede. Afe ménafue jaca conímama uáitaoífrede. Iemona omoi comeci jitaina izói figo finónidiomoi.

¹⁸ Mei íadi Juziñamui Ñuera Joreño ífócaomoi íadi, Moisés ocuica uai anamo íñeitiomoi.

¹⁹ Comini comécimo fieni itífuiaí dibénemo jaináidino íaioi finócaigafuiai jino uáfodo onórede. Be ñífue: Afémaci jiruífue íemo íaífue finófirediaioi; jiáie fiénidífue rairuilla uaina náfueñediaioi.

²⁰ Afémaci jánaraimo caimátaífrediaioi. Daje izói fue boréfueña finódiaioi; daje izói jiáimana éoífrediaioi. Dájena caimare íñediaioi; úradoífrediaioi; ráañederi raire iere ríicáífrediaioi. “Fueñe dama cúeiena fñoiticue” daíífrediaioi. Comínina bozletaitatiaioi; jiáimana énenoruidiaioi.

²¹ Afémaci jiáima raari úradoífrediaioi. Daje izói afémaci cómena titáífrediaioi. Jífairediaioi; fieni jéerie íaioi güilla llezica conímamo riire lléjellejediaioi. Bizóidífuaína afémaci jaca finóicaide. Naui uícdodo omoi cue lloga rairuilla izói, nane birui ómoína ráruiticue. Bie izóidífuaí finóidino jaca Juziñamui illáimana illáruimo jáinaíñeitiaioi.

²² Mei jiáífodo Juziñamui Ñuera Joreño cai comécimo bífuaína cómuite. Aféfuiaí bie izói jóide: Izíruillafue, íóbillafue, comeci uái illífue, comeci

mánaicana úrillafue, comeci cáimafue; jeruñeno fecáfiredo. Jiáima dáinana raire jeire ófiredo.

²³ Afémie comeci mánaifiredo; comeci daina izói ie abi járitañeno ñue fáicana ocuífiredo. Bífuiaina rairuide ocuilla uaina ñfede.

²⁴ Nana Crístimo ja jaináidino, íaioi comécimo nanómona itífuiaina, faga izói, féitatiaioi, naa íaioi comeci fieni finócanafuairi.

²⁵ Temona Juzíñamui Ñuera Joreñodo íredicai. Daií cai íllamona, mei nana cai jetáacagafuemo, afe Ñuera Joreño aféfuemo caina ífoiteza.

²⁶ Cai bie abina fieni ínonidicai. Afe izói cai íadi, conímaiai diga ícíticai, mei íadi afe izói mai cai íñeilli. Daje izói jiáimari úradoñeno cai illi.

6

Conímama omoi canófireiri

¹ Amatai, ómoimona dámie fiénidifue mo baiízaidenia omoi cíoadi, ómomona Ñuera Joreño dibénemo izire jaináidino afe baiídmiena omoi canori, meine ñúefue dibénemo ie ílleza. Jaca comeci mánañafuedo íena canori. Naga come afemo báiredeza, ie jira illa dígamie afe baiífirnafuemona abina rairuíredo. Taife cai facátafue naga cómemo comuífiredo.

² Illa dígamiaí conímama canófireiri, áfedo jiáimamo zuufue comuíadi ie comeci náirecalleza. Bie izóidedo Cristo ocuilla uaina ñue ícoimo fúitaitíomoi.

³ Jamáimie illa llezica dámie abi ínota “Jamánomo ímiedicue” daiíadi, afémie dama ie abi jífue.

⁴ Omóimona illa dígamie dama ie abi áadori. Mei aféfuena o jíeruiadi, dama o abi ífuedo íóbitaití; mei o illafue ñuera daiíllena jiáima illafue dibénedo abina fácañeitióza.

⁵ Illa dígamierie dani caimo itífuiamó náfuefireitícaí.

⁶ Juzíñamui uáíllaina llófuegamie nana íemo ite ñuera ráaniaina dieze, meine ibana afe ie llófuetimíemo írede.

⁷ Mai jiáífuere omoi jífueñeno iri; jaca Juzíñamui buna báíñuano jífueñegaza. Naga come ie rífirega raa ríadi, afe llizíllana dama jofo óite.

⁸ Nanómona cai comécimo itífuiái íóbitaitífue cai finóadi, afe cai comécimo itífuiamona cai tíillífue óitícaí. Mei jiáífodo Juzíñamui Ñuera Joreña cai íóbitaadi, afe Joreñomona zíñona cai illífue óitícaí.

⁹ Ie jira ñúefue cai ínuana, mai cai zefuíruñeilli. Mei afemo fáicanocañeno comécina náiredinona cai íadi, uire Juzíñamui mamécaruimo riga ófirena izói, ñúefuena maiñóritícaíza.

¹⁰ Afe jira, ñúefue ínua llezica nana comínimo, nana cai abi ie máriedo ñúefuena finóredicai. Iemo Juzíñamuimo ínote cai ámatíamó, baímo aillo ñúefuena finóredicai.

Abí rairuúllauai, íraícaíño uáíduafue diga

¹¹ Mai ómoímo bie jéerie cue cúegamo omoi eroiri. Afe bie dama cue ónoído cue cuela.

¹² Afe quétafuena omoi ocuídino ñúefuedo lloñédiaioi. Dama comíni uícomo ñue íaioi íllena daií daídíaioi. Daií ómoína ocuídíaioi, Cristo tíilla ícoína jiáímaci afémaci rácaíza daií.

¹³ Mei afe quetácano, nana Moisés ocuica uai ñue ícoimo fuitáñediaioi. Mei íadi ómoina quetátaacadiaioi, omoi íaioi quetátafuedo abi íaioi íinollena. Afe quétano omoi abimo íllado iere abi íinotiaioi.

¹⁴ Mei cúemona dama cai Ocuíraima Jesucristo tíllado abi íinoticue. Abi diné jíáifodo abi cue íinollena íñede. Mei Cristo cruzmo tíllado, nana bíniemo ite fiénidifuiái faga izóí cuemo dúíñede. Afe ibana cue aféfuiaimo faga izóí jaináíñedicue.

¹⁵ Mei Crístomo dájena cai jaináinamona, ja afe quétafue ráííñede. Daje izóí íemo cai jaináinamona quetáñenafue jíái ráííñede. Mei jíáifodo cómuena meine abido jocócamiena cai ílla, iere jamánomo ráífide.

¹⁶ Bie izóí daináuai jeire otínomo comeci caimare uái íllafue íteza. Daje izóí Juzíñamui ómoimo dúecaillafuemo íitiomoiiza. Bie izóí daináuai jeire omoi óiadi, Juzíñamui ua comínina jáitíomoi. Mai mei, Juzíñamui ie ua comínina ñúefuemo éziciíteza.

¹⁷ Ja biruímona buna cuena áífeduaíbiñeno iri, daídicue. Cue abimo ite boáfíai méífuai, cai Ocuíraima Jesús táijitagamiena cue íllana onótate.

¹⁸ Daje Juzíñamuimo íinote cue ámatiaí, cai Ocuíraima Jesucristo nana ómoina ñue éziciíteza. Mai daíítadeza. Jae ñíe.

EFESO IMACIMO SAN PABLO ORECABE

La Carta del Apóstol San Pablo a los Efesios

Pablo Efésomo ite Juziñamuimo ñnotino rabedo uáidote

1 Cue Páblodicue. Juziñamui comeci jitaina izói Jesucristo orécamiedicue. Bie izói daina ñúefue llujillena, ie ocuícamiedicue. Efeso jófuego ite Juziñamuimo jaináidino bie rabedo uáidotícue. Afémaci Jesucristomo ñue ñnotino.

2 Cai Moo Juziñamui ñue éziciga dibéfuemo omoi iri. Daje izói ie caimare illáfuemo omoi iri. Cai Ocuíraima Jesucristo daje izói ómoína bie ñúefuiamo jóoneiteza.

Crístomo cai jaináinamona cai comécina náiretatífuiai Pablo jino llote

3 Cai Ocuíraima Jesucristo Moo Juziñamuina ióbitaiticai, mei Jesucristomo dájena cai jaináinamona, afémie monámona nana cai comécina náiretate ñúefuiaina jae caina éziciteza.

4 Nai énie comuíñena llezica, Juziñamui Jesucristodo caina nizede, ie eróicana nífueningo ñue finócamona cai illena.

5 Jaiái uícodo caina izíruillano ie comeci jítaina izói, Juziñamui caina náamatade Jesucristodo ie jítótiaína cai jáillena.

6 Iemo ie izíruiga jítóoiri dájena cai illamona, afémie caimo dúecaifirede. Afe jira nágarui Juziñamuina ióbitaredicai, caimo ie dúecaillana iere figura cai daiifreillena.

7 Caimo iere dúecaillano, Juziñamui ie Jitó tñillado, ie die tóillado caina jíllotate, mei áfedo Juziñamui cai fiénidífuiaína féitateza.

8 Afémie cai ifoci ñue dénuamona, ie caina iere dúecaillafuena, afémie jamánono ñue caina onótate.

9 Juziñamui jaiái uícodo mameca ónoñega ie comeci óiacanafue caina ja fidítate.

10 Bie Juziñamui uícodo mamécáfue ie fácaruimo dúcia, ñue ícoimo fúitaita. Aféruimo Juziñamui dáanonmo nana éniemo ite náiraiaina ie Jitó Cristo anamo itábicaítate, naa bíniemo ite rílleniai, naa jáie ráaniairi. Daje llezica monamo ite rínoredino Cristo anamo lítiaioi naa afénono ite jáie ráaniairi.

11 Jaiái uícodo Juziñamui caina nizede, Jesucristomo dájena cai jaináinado ie comínina cai illena. Nana bífuiai jica ia Juziñamui mamérilla izói ñue joide. Juziñamui ñue onona dieze, afe izói afémie ñue finófirede.

12 Ja cai bie nanómona Crístomo ñnotinodicaiza. Juziñamui daí caina ñue nizede, aféniemo ite áillue ebiredífuiaido ñúefue íemo cai nitállena.

13 Daje izói uáfueña lloga, omoi jílluille uaina cacádiomoi. Cacáillano afe uaina omoi ñnuamona Jesucristomo jaináitagaomoi. Daje llezica Juziñamui jaiái uícodo llua izói Ñuera Joréñona igáomoi, dama Juziñamui íeiediomoí daiíllena.

14 Afe Ñuera Joreño caimo íllado, íco jíáiruido Juziñamui dáinafue cai maíñóllena, uáfueña onódicai. Afe ie lloga dáinafue cai maíñólliruimo nai dúciñede. Mei íadi nana íemo jaináidinomo, fiénidífuemo jaca due íaioi jáinaíñeíllífué afémie llóite. Daíí ie llua mei nana afémie cáiena lloga dáinafue maíñoitícaí. Ie jira afe Juziñamuimo ite áillue ebiredífuiaido íena ióbitaredicai.

Pablo Juziñamuimo ñinotino ifoci ñue denóllena Juziñamuimo jicade

¹⁵⁻¹⁶ Iemona cai Ocuíraima Jesumo omoi ñinogafuena cue fidinamona, Juziñamuimo ómoiri “Iere figura” fáicaiñeno daiífiredicue. Daje izói nana Juziñamuimo jaináidinona omoi izíruillana cue fidinamona, nane figura daiífiredicue. Afe llezica Juziñamuimo cue jicáfírena dáaruido ómoimo jaca uibíofiredicue.

¹⁷ Juziñamui ómoimo jino llogáuaina ñue comécido omoi baitállena jicáfiredicue. Ua, cai Ocuíraima Jesucristo ebírede Moo Juziñamuimo jicáfiredicue, Juziñamuina ñue omoi onóillena.

¹⁸ Daje izói Juziñamui omoi ifoci ñue denóllena jicádícue. Afemona Juziñamui uáidogano úñoga ñue cómuitífuiaina ñue ónoitiomoi. Daje izói Juziñamui omoi ifoci denóllemona íemo jaináidinomo, Juziñamui fecalle ñuera ebírede cámafuiaina ónoitiomoi.

¹⁹ Iemona bie izói ónoitiomoi: Juziñamui iere ñúefuiaina ríinoredimie. Afe bie íemo ite áillue ríino ja birui nana íemo ñinotinona ñue comécido íaioina canode.

²⁰ Naui Juziñamui, daje bie íemo ite áillue ríinona cai onóillena, Cristo tíllanomona meine abído cáatate. Dai íemo ite áillue ríinona comínimo jino iere uáfori ciótate. Afe daje ríinodo Cristo cáatajanona, monamo ie nabézimo Juziñamui íena rainade.

²¹ Dinomo jamánomo ocuídillaimana Juziñamui íena jóonete. Iemona nana jáie ríinoredinuaii Cristo anamo itíaioi, naa jáie ocuífiredinuaiiri. Daje izói nana illaini Cristo anamo itíaioi naa jabóidillainiari. Daje izói nana mona eromo ite ríinoredinuaii, Juziñamui ie aillo ríinodo Cristo anamo dájena jóonete. Nana jáie mameca ríinoredino cai comeci facáacana dieze, daje izói Cristo anamo itíaioi. Nana biruimo itínuiari ie anamo itíaioi, naa íco jáírullaido íitínuiari.

²² Afe dáaruido Juziñamui nana ráaniaina Cristo anamo jóonete. Daje llezica nana Juziñamuimo dájena jaináidinomo, Juziñamui Cristo ífócina mameide. Iemona ifoci cai abi ocuilla izói afémie íaioina ocuífírede.

²³ Mei jii, Jesucristomo dájena jaináidino ja Cristo abina mamécaiaioi. Afe jira afémaci nana Cristo comeci ífuiaina iere jeire otíaioi. Mei dama Cristo nana ráfuiaina ñue ícoimo fuitátatimieza.

2

Juziñamui caina izíruillado jíllodícai

¹ Omoi fiénidífuiaimona nai tíidino izói omoi illa llezica, Juziñamui Cristo tíllamona meine abído cáatajado afe dáaruido ómoina cáatate.

² Naui afe fiénidí fue dibénemo are itíomoi. Bíníemo ite fiénide nairai illa izói are itíomoi. Afe llezica omoi áinodo lláifoidé fiénide joreño jítáinafue finófiredíomoi, mei afe joreño nana fiénide joríaí nahí ocuíraimaza. (Afe daje fiénide joreño Taife.) Juziñamuimo jíeruíñedinona afémie riire ocuíoide.

³ Naui jáírullaido nana cai afe izói fiení itícai. Cai abi fiení jítáinafuiari jeire ofíredícai. Afe nanómona cai comécido ite cai óiacaiga fiénidífuena fáicanocaiñeno ícoimo finóoicaifíredícai. Daje izói cai comeci fia fácafuiaina jeire otícai. Iemona nana jáímacina duere finóllemo dúina izói, Juziñamui iere duere finóllífuemo dúidícai.

4-5 Mei íadi Juzíñamui iere caina dúecaillano, nai cai fiénidifuaiaimona tíidino izói cai illa llezica, afémie caina izíruillano Cristo cáatajado dáanomo tíillanomona caina cáatate. Mei jii, dama Juzíñamui ómoiri dúecaillano jíllotagaomoi.

6 Uafue, Cristo Jesús cáataja llezica, Juzíñamui afémie diga daane caina cáatate. Afe mei Juzíñamui Cristo abímo monamo caina rainade.

7 Juzíñamui daí finode, nana íco ninomo illáruillaido ítinuiaiaimo afémie iere caina izíruillafuena onótallena. Ua, Juzíñamui daí finode afémie Crístodo caina dúecaillafuena nana uícomo cómuitinomo fidíllena.

8 Mei jii, Juzíñamuimo ite ómoína izíruillafuedo afémie iere ómoína dúecaide. Ie jira, íemo omói ínuado jíllotagaomoi. Afe jíllonafue daní ómoimona comuíñede, mei jíáfodo afefue Juzíñamui ómoímo comuítaga.

9 Nñufuemo are cai ñéfinamona afe jíllonafue caimo fécañega. Ie jira áfedo buna abína ínonide.

10 Mei jii, Juzíñamui nano fueñe comíni fínua izói, afémie ie joréñodo como jéiciganona ja cai finode. Iemo ja birui, jaiái uícodo ie mámia izói, Crístodo Juzíñamui meine caina cáatate, ñúefuiai cai finóllena.

Ñue uái cai illífue Cristo caimo lloga

11 Iemona nauí omói illáfuemo mai omói comeci uibóiri. Judío nairai íeñediomoi. Ie jira judíuai “Bacano ícoi que táñegamacina” ómoína mamédiaíoi. Daní afemácina cai bie “Íeizina quetácandicaí” daidíaiíoi; mei jaiái íaiíoi finófirena izói, íaiíomona nágamíai íaiíoi bacano ícoi quetácaza.

12 Nauí omói ínoñena llezica, Crístonona oni eneno itíomoi. Israel náiraímo Juzíñamui nízécanomo jaináíñediomoi; íemona Juzíñamui íaiíomoi lloga ie ñuera finóllífuaíai fidíñediomoi, naa uícodo ie lloga cáimaduafuaíai diga. Aféruillaido Juzíñamuina onóñeno, bíniemo zuure itíomoi, mei caimare omói ocuírillífue íñédeza.

13 Nauí Juzíñamuimona iere oni jica itíomoi; mei íadi ja birui Cristo cairi tíillamona, ie die tóillamona, Juzíñamuimo ánozitagomoi. Ja Crístono dájena jaináidiomoi.

14 Cristo jíáimana cai ícíñenafue comuítatímie, mei dama afémie judíuai judíoñedino diga dáaziena finode. Iemona íaiíoi bacáuai imáciñediomoi. Nauí ómoína oni eneno itátate éoinafuena ja Cristo níne féítate.

15 Dama ie abi izi cácanado, ua ie tíllado, ocuica uai ñue ícoímo fuitade. Fúitajano, áfena záítate. Afe ocuica uai iere rairuide. Ie mei Cristo mena náiraímona, judíuai judíoñedino diga, dáaziena comue náiraina finode. Afe ménade náiraiíai ja dama Crístono dájena jaináitagaíaiíoi. Afedo afémie cai comíma diga cai ícíríñenafue nana caimo comuítate.

16 Afe bie izói, Cristo cruzmo ie tíllado, bie mena nairai dáamacina fínuaímo, nauí íaiíoi fuírífrenafuena záítate. Afe llezica, Juzíñamui dibénemo ñue uái íaiíoi illífue Cristo afémacimo jino denode. Dénuano, íaiíomona jeire otátate. Afemona comínimo Juzíñamui caimare eroide.

17 Cristo afe ñue uái cai ille uaina nana comínimo lluaíbite. Onínemacimo Cristo afe uaina lluaíbite. Omói afe onínemaci izóidiomoi. Daje izói áinori ite judíuaímo, afe uaina afémie lluaíbite.

18 Iemo Cristo cai jállotajamona, mei nibai judíuaidicai, mei nibai judíuainhedicai íadi, nana cai afe daje Ñuera Joreñodo, Moo Juziñamuimo áinozifiredicai.

19 Afe jira, Juziñamui dibénemo ja onínemaciñediomoi. Daje izói dani íaioi illánomo dúinhedino izóiñediomoi. Mei jáífodo nana Juziñamuimo jaináidino jainaila izói, uafue íemo jaináidiomoi. Dájena Juziñamui náiraidiomoi.

20 Nana omoi ebírede niga jáilliraina dallíraide anáneco izóidiomoi. Cristo oréfiregamaci llófueinafuena iere baitádinona ja jáidiomoi. Ua jáillirai jáicina maíri naidánia izói, aféfuemo ja riire jóonegamosi. Afe bie Cristo orécamaci Juziñamui uai jino llóraini. Dama Jesucristo afeco nahíllirai izóidimie.

21 Bie Nahílliraimo izóidimiemo nana afeco Juziñamui nicana uite. Afe izói áfemo nana jofócaiai ñue jáicina jóonega. Jofócaiai dallíraidemo dúina izói, daade Jesucristomo jaináidiomoi. Afeco nilla fuilla mei, jae Juziñamui ñuera irácona jáidiomoi; ñuera gairíraco izóidiomoi.

22 Daje izói Crístromo dájena omoi jaináinamona, nana jáíie Crístromo ínotinomo dájena jaináidiomoi, daaco náiraina Juziñamui íena, omoi jáillena. Iemo Juziñamui Ñuera Joreño ómoimo íllado Juziñamui ífírenaco izóidiomoi.

3

Jíllona uai judíoñedinomo llujállena Juziñamui Páblomo jóonenocaid

1 Iemona Juziñamuimo ómoiri iere cue comeci facáfiredicue. Omoína izíruite Páblodicue; Cristo Jesús ñúefue ómoimo cue llujállena jira llavécamedicue. Omoi judíoñediomoi, íemo ómoína ñue íllena cue cánua jira llavécacue.

2 Ja nibai Juziñamui cuemo jóonega bie táijinana fidídiomoi. Ji, Juziñamui ie cáimaduafuiai ómoimo cuena llotátate.

3 Juziñamui ie nai jino llóñega nanómona mamérrillafue cuena fidítate. Ie mei cuemo lluanó aféfuemo iere baitádimiena Juziñamui cuena jóonete. Afe ie mamérrillafuedo ja nano ílanori due ómoimo cueticue.

4 Aféfuena omoi facáduamona, afe nai jino llóñega Cristo dibene illáfueemo iere cue báitajana ónoitiomoi.

5 Afe báinino comeci ie fácafue nauí jáíruillaído bumo Juziñamui jino llóñede. Mei íadi birui Juziñamui ie Ñuera Joreñodo, ie eneno nizeca íainide orécamacimo aféfuena jae onótate. Daje izói jáíie ie uai jino llórainimo fidítate.

6 Afe jaiai jino raire llóñegafue bie izói jóide. ¡Cácarei! Jíllona uaina ínuamona, judíoñedino naa judíuairi daje Juziñamui cai cáimaduafuiai dájena máíñoítiaíoi, mei dáamiemo jaináidiaíoiza. Ua Crístromo, dáaziena jaináidiaíoiza. Daje izói Juziñamui lloga Cristo Jesús caína ñue finóllifue judíuaimo dúina izói, birui judíoñedinomo ja dúide.

7 Cue jamáimiedicue, mei íadi Juziñamui dama ie ríinodo, cue canóllena mamérite. Iemona afe bie ñúefue jáíimacimo llujállena jóonegacue.

8 Nana Juziñamuimo jaináidinomona iere erófenemo iticue. Mei íadi Crístromo íte facádonide aillo cáimaduafuiai judíoñedinomo llujáitimiena Juziñamui mamécacue. Afe bie cue llujállene iere cuemo ráífide.

9 Juziñamui jaiai ninómona jino llóñega mamérrillafue nana comínimo jino llóitimiena dama Juziñamui jóonegacue. Afe Juziñamui nana ráaniai finóraima.

10 Juzíñamui nana bífuiaina daí ífcaitade, nana íemo dájena jaináidinodo, nana monamo ite ríinoredino Juzíñamui iere jamánomo naga ráfuiaina báitajana onóillena.

11 Juzíñamui jaiái ninomo uícodo comeci mamérilla izóí, nana bífuiaina cai Ocuíraíma Jesucristodo ñue ícoímo fuitade.

12 Íemo Crístomo dájena cai jaináinamona Juzíñamuimo ja áinoziredicai, mei cai ínuamona afémiemo meáiruiñedinona itácaiza.

13 Íe jira izire ómoímo jicádicueza: Birui omoí abiri duere cue zéfuidicueza, mai náinidimaci izóí omoí íñeno iri; mei jáífodo caimare omoí comécioiri; mei afe ómoíri duere cue zéfuia afe ómoímo ebírede nitaina izóidifueza.

Cristo iere jamánomo caina izíruitimiena íemo ínotino onóillena Pablo Juzíñamuimo jicade

14 Íe jira cai Ocuíraíma Jesucristo Moo anamo caiñícido ana dújullanona nana íe comíni íena íemo izire jicádicue.

15 Nana éniemo ite íe comíni, naa monamo itínuiái díga, afémiemona comúdiaioi.

16 Cai Moo Juzíñamuimo jamánomo ñuera ríino íte. Afe íe ríinomona, íe Ñuera Joréñodo, iere omoí comeci ñue náireillena izire íemo jicádicue.

17 Afe llezica omoí ínogafuemona Cristo omoí comécimo nabáirifireillena Juzíñamuimo jicádicue. Daje izóí Juzíñamuina iere omoí izíruillena jicádicue. Íemo afe izíruillafuemo izire omoí jaináillena jicádicue. Nane dáanomo omoí ínogafuiai jeire oga uaina ñue omoí ífócimo denóllena Juzíñamuimo jicádicue.

18 Daje izóí Cristo caina izíruilla omoí ónoillena jicádicue, naa jíáie íemo jaináidinori. Mei afe íe izíruillafue monáillaji aillona izóideza. Afe monáillaji ruícafene jica íllana bu onóñede. Mei íadi afémiemo caina izíruillafue íere ruica are illa izóinana omoí onóillena jicádicue. Daje izóí áillue imani erai íere fuiri jica illa izóí, afe caimo facádonide Cristo caina íe izíruillafue omoí onóillena jicádicue. Afe izóí Cristo caina izíruilla íere monáillaji ana jica afórena izoide.

19 Mei jíi, afe bie izíruillafue ñue omoí fidíillena jicádicue. Nana cai onórede aillo ráfuiai baimo, bie izíruillafue jamánomo áillue. Afefue omoí fidínamona, nana Juzíñamuimo ite aillo ñúefuiaina ñue jaícina oruíziitomoí. Maí, daí íteza.

20 Ja birui íe aillo ñuera ríino, cai comécimo ífírenamona nana cai comeci fácarenafuiai baimo, afémiemo iere jamánomo ñúefuiai caimo finórede. Daje izóí nana cai jicárenafuiai baimo afémiemo iere finórede.

21 Íe jira aillo ebíredífuiai afe cai Juzíñamuimo mai cai nitalli, mei Cristo Jesumo dájena jaináitagacaiza. Maí mei Jesucristodo jaca ninomo naga cómutigimado aillo ñúefuiaina Juzíñamuimo cai nitalli. Daiítadeza.

4

Juzíñamui Ñuera Joréñodo dáamacina maméidicai

1 Nana bífuiaimona, omoí jaícina ñúefuedo macállena ríire ómoímo llóiticue, mei cai Ocuíraíma Cristo ícoínia llavécamedicueza. Ua Juzíñamui uáidogamací maca izóí, omoí macállena izire ómoímo jicádicue, mei uafue íe uáidogamací itímoíza.

2 Nana omoi, mai jiba abina ñinoñedinona omoi iri; daje izói comécina mánaidimacina omoi iri. Dani conímana izíruillano illa dígamie jiáimamo comeci járitaño omoi iri. Afe izói conímana omoi dúcaifireiri.

3 Afe llezica mai Ñuera Joreño ómoimo comuítaga dájena jaináinafue ñue rairuifireiri. Ua, omoi dáaziena dani conímana comécina jacíruiñenafuedo dáamacina jaináifireiri.

4 Daa cómemo da abi illa izói, daade abi. Afe abi Cristo ie. Afe daade come abi izóidicai. Afe izói Ñuera Joreño daade. Daje izói Juzíñamui nana caina daa uire ñue finóllifueмо úiñotagacai.

5 Cai Ocuíraima daade. Daje cai ñinogafue jeire oticai. Daje izói dáafueмо báutizagacai.

6 Iemo Juzíñamui daade; afémie nana íemo ñinotimaci Moo. Afe izói afémie nana comini Naama. Afémie nana ífcaidifuiái dibénedo ie comeci jitáinafue finode; nágafulaimo jetáfirede.

7 Mei íadi Cristo comeci jitaina izói, cáimona illa dígamieмо jiáiforiede ñúefue finolle ríinona, Cristo caimo fecade.

8 Juzíñamui Cuegáuai daí úicodo daide. Be ñie: Caifo monamo jailla llezica aillo nauí llaveca izóidino afémieoiri uite. Iemo fia iga jiáimaci cánuafuiaina comínimo fecade, daide.

9 Afémie caifo jailla daina uai jiáifue caina onótate. Afedo nauí úicodo fueñe afémie monámona ana bíllana fidídicai. Aféruido bie fiénidifuiairede éniemo afémie monámona iere jica ana bite.

10 Afe ana bitímie, abido nana caifo ite monániaí caifófenemo jáidímie dáamiede. Dinomo jaide, afénomona nana ie finócanuiaimo illáimaillena.

11 Iemo afe bie Cristo illa dígamiena ñue ríinoretade jiáiforiede ñúefuiaina finóllena. Dámierie ie orécamacina afémie jóonete. Jiáimacina Juzíñamuimona oga uaillai jino llóraimana afémie mamede. Iemo jiáimacina cai jillonafue uaina llotátate. Nai jiáimacimo ie comínina ñue úiñollena ocuide, íaioi llófuellena diga.

12 Afe daí cai Ocuíraima nana íeiena ñue fibítate, ie ocuica táijina ñue íaioi jetállena, íemo nana Crísto mo jaináidinona móonaitallena; mei afémaci Cristo abi izóidimaciza.

13 Afemona cai ñinogafue dibénemo ñue dájena maméidimacina jáiticaí. Daje izói Juzíñamui Jitona cai onona dibénemo ñue dáamacina íiticaí. Afe daí ñúefuiaina ñue izire jiéruitinona íiticaí. Uafue, nana ñúefuiaina Cristo izire jiéruilla izói, afe izói ñúefuiaina rairuúñeno iere jiéruiticaí. Jiéruillamona ñue móonaiticaí.

14 Ja úrue izóidinona íñeíticaí. Mei íadi jífueacadino comue llófueinafue llúamona, úrue izoide nai figo baitáñedinona jífueítiaioi. Íaioi comeci ñue fácajana raire jiáifodo méidoítiaioi. Bie jífuetino ebire lloga taino llúáfuedo bie úrue izóidino ñinoga ñúefuiaina ñiné féitatiaioi.

15 Mei íadi conímana izíruillano, íemo uáfueña cai úrilla llezica, mei Cristo dieze cai móonailli. Crísto mo izire jaináillano nana ie comeci itífuiái mai jeire cai ófreilli, mei Cristo afe cai jainaina abi ífoci dainámie.

16 Afémie, ífócina íllamona, nana caina caimare ocuíoide; ñue daa cómena caina jaináitate, mei illa dígamie jiáimieмо ñue dúinaza. Nana afe Cristo dáamiena jaináitagamací caimare dani jiáimaciri táijina llezica, caimare

féitateza. Afémie féitaja izói, afe izói illa dígamie jiáima finoca fiénidifuena omoi féitafireiri.

5

Juzíñamui úruiai izói cai íllena Pablo caimo llote

¹ Juzíñamui izíruiga úruiai omoi íllamona, mai afémie illa izói omoi iri.

² Cristo caina izíruilla izói jiáimana omoi izíruifireiri. Mei jii, caina ie izíruillamona Cristo cai jiáinona fecácámie. Afémie Juzíñamui íóbitallena titada fia fecaca rille izóidímie. Aferi Juzíñamui íóbide. (Afémie dibénemo afefue ñue ziórede uguci izoide.) Mai afe izói conímana omoi izíruillado Juzíñamuina omoi íóbitari.

³ Ja bie omoi Juzíñamuimo jaináidiomoiza, mai ómoimona ninó dáamie áinina llezica jiáie ringona jetáñeno iri. Daje izói nana jiáie íaifuiaina finóñeno iri. Jaca jiáie cómemo ite ráaniaimo úradoiñeno iri.

⁴ Íairede méaifuiaina bumo lloñeno iri. Daje izói táinodo úrillafuiáido úriñeno iri. Iemo jiáimamo fiénide llagüeroilla uaina oréñeno iri. Mei bie izóidífuiai Juzíñamui úruiaimo íeñedeza. Mei jiáifodo Juzíñamuina iere figura omoi daifireri.

⁵ Jae cue lloga iima ringomo finoca fiénidífue bie izói jóide. Daa come nai áinina llezica, ringo jetáadi, fiénide. Daje izói ja ringo ua mei, jiáie ringo jetáiadi, figóñede. Iemo íaifue naa úradoillafue díga finóadi, figóñede. (Afe úradoifredímie jamai jánarai íóbitadímie izoide.) Ja onódiomoiza bie izoide fiénidífuiai fínuana fibídímie, Cristo Juzíñamui díga illáimana illíruimo jaináinide.

⁶ Jiáimana taino uáillaído omoi jífueñeno iri. Mei afe bie fiénidífuiai fínuamona, nana ie uaina cacácañedinona, Juzíñamui iere duere fínoiteza.

⁷ Iemona, bie izói ite comíni díga omoi nabáiríñeno iri.

⁸ Naui nai omoi íñoñena llezica, jítifomo itíomoi; mei íadi birui cai Ocuíraimamo dájena omoi jaináinamona, ja úzefomo macádiomoi. Iemona ñue uáfodo macádino izói mai omoi ífireiri.

⁹ Cai Ocuíraima Jesucristo egáiñote raa izoide. Iemona cai comécina ñúeitae. Iemo ua uaido caina úritade. Daje izói cai jaícina ñue illífue comúitae.

¹⁰ Cai Ocuíraima ñue íóbitallifuena, mai iere omoi onóicairi.

¹¹ Báinino macádino finoca táinofue dibénemo íñeno omoi iri. Mei jiáifodo afe báinino íaiói finócafuenta uáfomo omoi cíotari.

¹² (Mei íadi afémaci báinino finócafuiiai izói cai úriadi, caina meáiruitaite. Ie jira benomo rabedo jino ómoimo llóñeitícue.)

¹³ Mei íadi nana íaiói illafue jino uáfodo cíotamona, afe fiénidífuiai iere íáirenana nana comíni ónoítiaíoi, mei Cristo egáiñua úzefo, nana comínimo ua comécimo itífuiaina jino cíotate.

¹⁴ Ie jira bie izói daína:

Ínídioza, mai cazi.

Tíidinomona mai náidacairi.

Iemona Cristo ie úzefomo ñue mácaitimiena ona jáitaite, daide.

¹⁵ Mei íemona, nágarui omoi illáfueмо izire comeci omoi facáoiri. Naga fiénidífuiaimona abi omoi rairuiri. Abina onóñedino izói omoi íñeno iri, mei jiáifodo ñúefuena baitádinona omoi iri.

16 Biruido aillo fiénidifue íteza, o illafue táinomo fáifitañeno iri; ñúefuiari omoi finófireiri.

17 Táinodo úritino izói iñeno iri. Cai Ocuíraima comeci jítainafuena ñue omoi baitáocairi.

18 Jifáiñeno iri. Mei, afe jifáillafue come comécina aillo íaifuemo ana uitátate. Mei jíáfodo Ñuera Joreño abí omoi úcaitari.

19 Illa dígamie jíámamo Juzíñamui uáillaido caimare omoi úriri, naa Juzíñamui rúairi. Daje izói Juzíñamui Ñuera Joreño lloga rúanai omoi roíri. Daií omoi rúado cai Ocuíraimana iere íóbitaitiomoiza.

20 Illa dígaruillai cai Ocuíraima Jesucristo mámeçido Moo Juzíñamuina naga ráaniairi figura omoi daiífireiri.

Crístomo ínotinona cai íllamona Pablo cai jofo eromo cai illafue llote

21 Illa dígamie jíáima anamo caimare omoi iri, mei Juzíñamui daií cai ocuúdeza.

22 Cai Ocuíraima anamo cai itábicailla izói, naga ringo ie ini anamo itábicairede.

23 Mei naga ringo ie ini ocuífirega, íemo jíái ie ini ñue úiñogaza. Afe izói nana Crístomo ínotino, Cristo ocuicaiaioi; daje izói Cristo ñue úiñogaiaioi. Afémie afémaci illaima. Daje izói afémie íaioi Jíllotaitimie. Afémiemo ínotino íemo dájena jaináinamona, ja ie izóidiaioi; ja dáamiede abí izóidiaioi.

24 Iemona Crístomo dájena jaináidinona afémie anamo illa izói, naga ínrede ringo ie ini anamo írede.

25 Cristo íemo jaináidinona izíruilla izói, mai naga íima ie aina izírui. Crístomo jaináidinomo Cristo ie abina fecade.

26 Afémie daií ie abí fecade ñue íeiena íaioi íllena. Daje llezica afémie íaioimo íte íaifuiaí jainoimo jococa muilla izói, ie uaido íaioina muiñode.

27 Cristo daií caina muiñode ñuera nífunenidnona ie uícomo cai cíocaizaillena. Uafue, nana mallizaí izói abímo comuidena duano ebire eroide, líríñede abí ígoína caina finode. Jaca due jiza fiénidífueña fiéñede. Nana íaioina íeiena iere ñue finode.

28 Afe izói naga íima dama ie abina izíruilla izói, ie aina izírui. Ie aina izírui íimie dama ie abina izírui.

29 Bu jaca dama ie abina éoiñede. Mei jíáfodo cai abina ñue ecádicai, ñue úiñoticaí. Afe izói Cristo íemo dájena jaináidinona ñue rairuide.

30 Mei afémaci dama íeieza; ja daa ie abí izóidiaioi. Cai bie afe abímo jaináidicai.

31 Bífuaímona Juzíñamui daína izói, dámie ie moo, ie ei díga, fáicanocaillano, ie aí díga dájemo jaináicaite. Jáinaicaillano, daade come abí izói itaíllino.

32 Bie daade come abí izói íficaillafue, jaiáimona áillue báinide rafue. Mei íadi afefue Crístomo dúide; daje izói íemo dájena jaináidinomo dúite, daídícue.

33 Mei íadi daje llezica ómoimona illa dígamie omoi abina izíruilla izói omoi aina izírui, daiíacadicue. Iemo naga ínrede ringo ie ínina ñue jacírui. Ie da, daídícue.

6

1 Uruiaí, omoi cacai. Crístomo ínotinodiomoiza, o moo uai jeire omoi olle iere jítaírede, mei afe bifue Juzíñamuimo jaícina jóideza.

² Bie lletara uai llua mei, Juziñamui dáanomo ñue cai illifue llote. Daií nana ie lletara uáimona dama búaido Juziñamui cai ñue illifue llote. Afe llétaja uai bie izói daide: “O moo, o ei diga, ñue jacíruiri,

³ áfede caimare o illena, daje izói bie éniemo are o illena.”

⁴ Ja úruiairedino, mai omoi cácarei. O úruiaína comécina ríicaitañoeno iri. Mei jáifodo riire llétaja uaido ñue íaioina llófuefireiri. Daií íaioina ñue omoi móonaitari, cai Ocuíraima Jesumo ñue íaioi ínollena.

⁵ Ocuífiregano, mai omoi cacai. Biniemo ite omoi ocuídime dáinana ñue jeire omoi oíri. Cristo ocuílamo o táijina izói o táijitatimieo ráairuiñoeno ñue táijiri. Afémie ocuílana ñue jacíruiri. O táijitatimieo uaina nibéfodo oñoeno iri.

⁶ O ocuídime eroille llezica ñue táijiri, daje izói afémie íñena llezica náamonaze ñue táijiri. Dama ocuídime eroille llezica, íocire táijidimieo íñeno iri. Afe izoide táijide come jamai come íóbitade. Afe izói íñeno jáifodo omoi iri. Cristo táijitagano izói, Juziñamui comeci jítáinafuena izire omoi finori, afémie omoi íóbitallena.

⁷ Comeci ñue jítaina izói caimare omoi táijiri. Jamai come íena táijíñoeno, cai monamo ite Ocuíraima íena ñue omoi táijiri.

⁸ Mei ja onódiomoiiza, illa dígamie ie ñue táijifirenado cai monamo ite Ocuíraimamona ñuefuena jirídoite. Rairuícamié, ráiruiñegamié diga dájerize nano íaioi táijinaze jirídoite.

⁹ Ocuífredino, mai daje izói omoi táijitaganomo ñue dúecaifireiri. Afémacina fiéni omoi jácidoñoeno iri. Daade cai Ocuíraima anamo nana dájena íticaiza, omoi úbicairi. O táijitagano monamo ite Ocuíraima anamo illa izói, o jái daje Ocuíraima anamo ítio. Afémie da cómena eneno maméñedeza. Illa dígamie dájerize mamede. Aféfuemo omoi úbicaifireiri.

Jesumo ínotino comeci náiretalle abí ríidua uai Pablo llote

¹⁰ Mei ámatiai, cai Ocuíraima Crístomo ite ríinodo benómona mai riire omoi iri. Cai Ocuíraima Jesumo omoi jáinámomona riire abí omoi mameri. Mei, afémie jamánomo ríredeza.

¹¹ Juziñamui lloga abí ríidua uai, ñue jeire omoi oíri, naa ie ñuera ézicigafuairi. Mei jii, dáarie comini abí ríidollena ñue fuiríllena llojécuiroi jítádiaoi. Afe íaioi jita izói, nana Juziñamui cai ríidua uai, mai jeire omoi oíri. Afe uaido Taife jífua uaina uáitarediomoi.

¹² Jamai abina mairide come diga fuiríñedicaí. Mei jáifodo fiénide jóriaí diga fuirídicaí. Afémaci caífo cai acónimo táifodo macádiaoi. Afe cai diga fuirífrede jóriaí nana biniemo ite jítifodo jaide fiéndimacina fiéni ocuíoide. Bínie comínina “Cáiediomoí” daííoicaidiaoi, mei “Omoi náamadicaí” daíífrediaoi.

¹³ Ie jira Juziñamui lloga abí ríidua uáillaído abí omoi rairuiri. Afe bie uaido jobáirillarumo ñue abina ríidoitíomoi. Daií abina ríidoitíomoiiza are ñue ríinoredinona ítíomoi.

¹⁴ Ie jira riire omoi iri. Fuiríraima ciraigí ífe riire tirínua izói jizíñoeno ñue ie fuiríllena, afe izói Juziñamui lloga ua rafue jeire omoi oíri. Daje izói ñue jáicina omoi íllado nágarui ñue abí omoi ríidofireiri. Afe bie omoi jáicina illafue, fuiríraima jogobe ríidollena jítaca llojeco izoide.

15 Afe fuiríraima fuirízailla llezica ie idai ico riire maiga izói, áfedo riire ie naidáillena, afe izói Juzíñamui comécina jacíruiñeno uai jeire omoi oíri. Afedo abina riire mámano, fiénidifuena ómoína anáfenofeiteza.

16 Temo illa dígaruillaído Juzíñamuimo omoi únogafuena féitañeno iri, mei áfedo Taife caimo mameca fiénidifuina oni caitárediomoi. Omoi únogafue jae fuiríraima abi ríidollena úfifrega llojeco finoina escudo izoide.

17 Iemo Juzíñamui lloga jállona uai jeire omoi oíri, mei aféuai, ifo ríidollena jitáfifrega ifo ico llojeco izoide. Iemo nana Juzíñamui uáillaína mai jeire omoi oíri, mei afe Juzíñamui uai, Ñuera Joreño ómoimo fecaca fuirira llojébici izóideza.

18 Nana bie cue ocuícafuiái, mai Juzíñamuimo jícano finori. Jaca Ñuera Joreñodo izire Juzíñamuimo omoi jicáfifreiri. Bie izói omoi illena, nana bífuiaína fáicanocaiñeno ñue abí omoi rairuíoicairi. Daje llezica nana Juzíñamuimo jaináidinomo Juzíñamuimo omoi jicáfifreiri.

19 Daje izói jíái cuemo jicáfifreiri; náiraímo cue úria, Juzíñamui cue uai nabáilleza. Iemo jacíruiñeno íocire íaioímo cue úrillena, Juzíñamuimo omoi jicari, navi báinino lloga jállona uai jino comínimo cue fidítallena.

20 Bie ñuera uaido comínimo úrillena Juzíñamui orécamedícue. Afe uai ícoína, ja birui llavécamedícue. Iemo, bífuedo ñuera llujítimie izói jacíruiñeno naire cue úrillena, mai Juzíñamuimo omoi jicari.

Iraicaiño uáidua uaillaí

21 Cai izíruiга ama Tíquico, cai Ocuíraima Jesumo táijinana fáicanocaiñeno canófredimie. Afémie nana cuemo itífuiaína ómoimo jino llóite, naa jíáie cue finócafuiái diga.

22 Jira, bímie ómoimo orédícue, cue illafue ómoimo jino llóllena. Iemo jíái áfedo omoi náireficaillena, íena ómoimo orédícue.

23 Moo Juzíñamui, cai Ocuíraima Jesucristo diga, cai ámatiaímo ñue comeci uái illifue ómoína ñue onótaiteza. Daje izói Juzíñamuina ñue omoi izíruiillena jicádícue. Ie jira Juzíñamui omoi únogafuena aillo móonaitaiteza daídícue, afe bífuiaí omoi maiñóllena.

24 Nana cai Ocuíraima Jesucristona féitañeno izíruiñona, Juzíñamui ñue íaioína ézicíteza. Mai; jae ñue. Daíí íteza.

FILIPO COMINIMO SAN PABLO ORÉCABE La Carta del Apóstol San Pablo a los Filipenses

Filípomo ite Jesumo ínotinomo Pablo llavéracomona cuete

¹ Cue Páblodicue. Cue nabai Timoteo diga bibe ómoimo cuetícoco. Jesucristo tájitagamedicoco. Nana Filipino jófuemo ite Juzíñamuimo jainaide ámatiaimo cuetícoco. Daa bibedo omoi cigiri ite ocuídillainimo, naa eneno mameca canódinomo, cuetícoco. Cristo Jesumo nana dáaziena jaináidíomoi.

² Cai Moo Juzíñamui ñue ézicigafuemo omoi iri, naa comeci caimare uái illafue diga. Daje izói cai Ocuraima Jesucristo ézicigafue dibénemo omoi iri, omoi ie lloga comeci caimare uái illafue diga.

Pablo Jesumo ínotinori Juzíñamuimo comécido úrite

³ Naga ómoimo cue úbicaifrenaruido, cai Moo Juzíñamuina: “Iere figura” daíífredicue.

⁴ Juzíñamuimo comécido cue úriadi, jaca nana ómoiri caimare jicáfredicue.

⁵ Mei fueñe tainéinaruimona ua biruimo Juzíñamui ñúefuedo dáafuemo naa ómoiri tájífiredicaiza. Afena figura daíífredicue.

⁶ Juzíñamui nauí omoi comécimo ñúefuena déitáte. Afe ñúefuena déitallifue tainéimie ua Jesucristo billíruimo fáicanocaiñeno déitaoicaite. Afefue taino daííndeza onódicue.

⁷ Mei ómoína iere izíruillano nana ómoiri daíí comeci cue fácafue iere jaícina jóide. Afe izói daje cuemo iga ézicigafue, jeire otíomoi. Llavécamedicue íadi, omoi cúeoiri jeire oga ézicigafue, ñúefue cue llujállena canode. Iemona cai jílloillifueña comínimo uáfuena ñue fidítaticue. Daje izói bífuena iere nahífueza daíítaticue. Afe izói bie ñúefuena uáitaacadino uíecomo daa bífuedo cai jílloillifuedo jaícina ñue úriticue.

⁸ Jesucristo ómoimo dúecaillano izíruilla izói, omoi cigiri iere cue íacanana Juzíñamui ñue onode.

⁹ Juzíñamuimo comécido cue úrillado ómoiena jicádicue. Dani conímana aillo jamánomo izíruillana jicádicue. Daje izói nana ñue fibíllafue abina omoi onóillifue diga, jicáfredicue. Ua daíí ómoiena jicádicue, ñúefuíaí omoi níziana omoi fibíllena.

¹⁰ Afe bifue jeire omoi óiadi, omoi comeci ífue íainite. Daje izói Cristo billíruimo nífuenidinona íitiomoi.

¹¹ Daíí Jesucristo omoi illáfuena mámeite. Ua ria llizilla jofo úaina izói, ómoína mámeite. Ua aillo ñue finócafuaí omoi illáfuemo Jesucristo mámeite. Afedo Juzíñamuimo ñúefue ebíredifue diga nítaítomoi.

Cristo jítainafue cue fñuamona cue comeci ífue ráífide

¹² Amataí, omoi cácarei, cuemo zúidífuaina omoi fidítaticue. Aféfuíaí Juzíñamui cai jílloallíuái jino llúana nahí uáfuena canode.

¹³ Benomo cue llavéinamona, nana nahíllaíma jofo abi úíñorainí, ñúefuedo cue llavéinana onódiaíoi; ua Cristo ñúefue jeire cue úamona ja llavécamedicueza, áfena nana onódiaíoi.

14 Llavécacuenta íaioi cionamona, ja nana ínote ámatiaimona nabémaci iere náicaidiaioi, Juzíñamui uai jino llóllena. Ua meáiruñeno uáfori jino llotíaiioi. Daje izóí cue llavéinamona cai Ocuíraimamo jamánomo ínotiaioi.

15 Uáfuenta dámierie cuemo úradoillano Crístodo úritiaioi. Afémaci énenoruillano cue baimo jamánomoidimiena íacadiaioi; mei íadi jíámíaií comeci ñúefuedo jino llotíaiioi.

16 Dáarie dani íaioi comeci óiacanafuiaido Crístona jíáífo úritiaioi. Cue llavébillafue baimo jamánomo raamo cuena jíiritaiacadiaioi.

17 Mei jíámíaci cuena izíruillano Juzíñamui ñúefue jino llotíaiioi, mei nai benó llavéracomo cue íllana onódiaioi. Ua Juzíñamui jíllloilluái cue uáitañena jira llavécacueza onódiaioiza.

18 Mei íadi ¿cúemona níbai? Dáarie jaícina Crístodo úritiaioi; jíámíaci Crístodo jíízireoicana úritiaioi. Mei daje ábiedo Crístodo íaioi úriadi, cuena jaca íóbitade.

Afe cue íóbillá baimo jamánomo nai íóbioicaiticue.

19 Mei nana bífuiaimona nífuenino záitícueza onódicue. Ua cueri Juzíñamuimo comécido omoi úrillado ñue jíllloitícue. Daje izóí Jesucristo Joreño cue cánuado ñue jino jáitícue.

20 Jesucrístodo meáiruñeno cue úrillena cue comeci jítaillafue. Afe daje bífuemo iere ocúridicue. Birui cue ílláfuedo jíámíaci Crístomo aillo ñúefue nitádiaioi. Afe bie nita baimo, nai jamánomo íaioi nitállena jítaidícue. Níbai cáaiticue, níbai tíitícue dama mei áfena lloñédicue. Dama Jesucrístomo ñúefuiaina nita daidícue.

21 Nai tíñeno cue jáicaíadi, Cristo comeci jítainafue cue fínuaa jamánomo naga raa baimo gáidícue. Iemona nai cue cáanafue ñuera; íemo jíái cue tille jamánomo baimo ñuera.

22 Mei íadi bie cue abido nai cue caana llezica, cai Ocuíraíma comeci jítainafue bíniemo jino denóllena tájíífireitícue. Meita bie mena cuemo íífuemona nífue nízedá óitícueza onóñedicue.

23 Nai feire jánaideza, bie ménafuedemona nífue óitícue. Aféfuena ñue cue onóille féirede. Mei jíáífodo caífo Cristo díne cue jáíllena tíiacadícue; bie izóidífue cúemona jamánomo ñuera.

24 Mei íadi jíáíe izóí omoi cígido bie caana abido cue jáicallena, ómoiena iere jítaírede.

25 Mei daa bífuena jaícina onódicue; omoi díga nai cue ícaíllena ñue onódicue. Omoi díga cue íllena jítaírede, omoi ñue íinogafue nágarui jeire omoi cue otátallena. Ua ómoíri cue ílla jítaírede, jae jeire omoi ua izóí afe baimo jeire omoi óllena. Daje izóí omoi ñue íinogafuedo omoi íóbioicaíllena, omoi cígiri cue ícaíllena nai jítaírede.

26 Mei daí nana omoi cígiri íitícue. Afe uire cue bílledo Jesucrístona jamánomo aillo íóbitaitíomoi.

27 Cristo ñúefuiai úíbicaíllano, afe izóí nágarui omoi íllafue ñue jaícina jóoneri. Níbai omoi cue éroizaiadi bífue jeire omoi úamona, omoi ílla ñúefuena fidíacadicue. Daje izóí ómoimona jica íticue íadi, daje omoi ílla ñúefuena onóíacadicue. Afe bie izoide ñúefuena fidíacadicue: dáaziña caímare omoi jáináíllana onóíacadicue. Daje izóí jíllloilluaimona lloga íinogauaimo izire omoi níciduana fidíacadicue.

28 Daje izóí omoi bacáuai ímíaiina due omoi jáicaiñenana cuemo omoi lloiri, daidícue. Afe omoi jáicaiñenafue, níne íaioi táínocacíllafuena uáfodo jino

lloátate. Mei íadi daje llezica omoi jíllloillifueña uáfodo jino llote. Bie omoi onóitainafue Juzíñamui dibénemona bite.

²⁹ Mena rafue Juzíñamui ómoimo mamede. Nánorafue daide:

Cristo uaina iere jeire órediomoiža.

Nane jíáifue daide:

Cristo ñúefue jeire omoi ua méifomo, afémie ícoiri duere zefuífirediomoi.

³⁰ Cue naa ómoiri daje fuirilla izóidifueño itícaí. Naui cue fuirídimie izóí illana ciódiomoi. Ja birui fuirídimie izóí, nai cue jáicana ráfueña onódiomoiža.

2

Cristo jamánomo uáitagamiña jaide ie méifomo Juzíñamui jamánomo ñue ébifue íemo nitade

¹ Ja birui Cristo ómoína náicaitarede. Afémie ómoína izíruillano, comeci zúrenamona omoi comécina cáimacaitarede. Ie Ñuera Joreño omoi diga ite. Conímana izíruillafue dúecaillafue diga afe dibénemo itíomoi. Nana bífuina omoi onónamona, mai cue omoi ióbitari.

² Ua caimare ñue omoi illífuedo cuena ióbitari. Afe izóí daje izíruillafueño omoi jáinainamona cuena ióbitari. Afe mei dájemo comeci jíitainafue jeire omoi úado cuena omoi ióbitari. Afe emódomo dáafueño omoi comécinado cuena omoi cáimacaitari.

³ Dani omoi comeci jitailla izóí mamériño iri. Fia abí ñnuafuedo nífueña lloñoño iri. Mei íadi comeci mánainafuedo omoi mamérriri. Omoimona illa dígamierie omoi aino cómena o baimo comécina ñuera, omoi daífireri.

⁴ Dani omoi ñue illáfueña jenóñoño iri. Mei íadi nana jíáimaci ñue illáfueña omoi jenori.

⁵ Cristo Jesús comeci mámia izóí, dájemo comeci omoi mameri.

⁶ Nano fueñe ie illa llezica afémie daa Juzíñamui izoide. Juzíñamui izóí ie illa ríino afémiemo ite. Mei íadi ie fiénocaiga ríinona “Raíre meine cue ollí” daíñede.

⁷ Mei íadi afémie Juzíñamui izoína llezica afe íemo ite ríinona oni eneno fiénocaide. Fiénocaillanona jiba iima jécica izóí Cristo jécica. Daí ie jécicainamona fia jamai táijitagamie bie éniemo jáicana izóí jáicade.

⁸ Jamai cómena ie illa llezica jamánomo comécina mánaidimieña abí mamede. Daí mámico ie Moo Juzíñamui daínauai jeire uano dama tízaide. Ua aillo meáire cruzmo tízaide.

⁹ Ie jira Juzíñamui jamánomo aillo ñúefue íemo nitade. Ua áfemona nana jíáie mámeciaí baimo jalléidicina Juzíñamui íemo jíade.

¹⁰ Daí bie mámecina Juzíñamui íemo jíade, nana comini ie anamo dújuillena. Ua afe Jesús daínacina íaíoi cacánamona nana monamo itínuiaí, bie éniemo itínuiaí, daje izóí énie anamo itínuiaí cañícido ie anamo dújuitiaíoi.

¹¹ Daí dújuillano nana comini comécido íena ónuano, Jesucrístoná nahí Ocuíraimana dáitiaíoi. Daí daínado Moo Juzíñamuiño ñúefue nítaítaíoi.

Crístomo jáinádino bínie egáñotino izóidiaíoi

¹² Mei jira, cue izíruiga ámatiaí, naui omoi cígiri cue illa llezica jaca ómoimo cue llogáuina jeire otíomoi. Ja birui ómoimona jica itícuemo, naui omoi úana izóí, afe baimo aillo jeire omoi oíri. Dani omoi jíllonafueño

comécina mánaidimie izói jacíruioicana áfemo omoi comécioiri. Aféfuena nana comínimo ñue jino omoi denóicairi.

13 Mei Juzíñamui afe ñuera comeci óiacanafuiai ómoimo fecádimie. Afémie dama ie comeci ñue jítainafuedo ómoína canófirede, omoi comeci ñue óiacanafuiai jino denóllena.

14 Bífuijai jino omoi denolle llezica nana omoi jetácafuijai fieni úríñeno omoi finori. Daje izói áfena júfidoñeno omoi finori.

15 Iemona bie izói omoi iri ñinena jáímaci ómoimo íaifue jóoneñeillena. Daí nífuenino omoi iri, áfemona íaifuenidinona omoi ílleza. Mei daí omoi íllamona, comécina íaifue mo féitate figóñede comini cígiri, Juzíñamui úruiaína mamélliomoiza. Iaiói cígiri, ucudu caifona bie jítirede énie egáíñua izói, ie izói comini comeci jítirenana egáíñoitio moi.

16 Afe egáíñuado zlíñona cáataite uai íaioimo jino llóitio moi. Daí Cristo billíruimo ómoiri meáldaiñeno caimare abí ínoitícue. Daje izói omoi ñue ílláfuedo nauí ómoiri iere cue tájinafue táinomo jifánofiñenana onódicue.

17 Nauí ñúefuena omoi ínuaruimo dani omoi ílláfueña Juzíñamuimo llotio moi. Birui nai omoi ínogafue ñue jaícina cue jóoniamona, ñibai benó cue tíadi, áferi cáimacaitícue. Afe llezica omoi cánuaibiga íobillafueri íobidicue.

18 Daje izói caimare omoi iri; cue cáimacaila dibéfuemo jeire omoi oíri.

Timoteo Epafrodito diga Filipos comínimo oréillifue

19 Cai Ocuíraima Jesús comeci óiacania, Timotéona omoi eróizaitaitícue. Omoi íllafue afémie abido cuemo lluaíbiadi, iere áferi cáimacaitícue.

20 Cue comeci faca izói, comeci facade jáíe cómena íñede. Dama Timoteo cue izói comeci úrilla. Dama afémie omoi ñue íllífuemo uáfueña comeci facáoífirede.

21 Nana jáímaci dani íaioi comeci jítainafue jenódiaioi. Cristo Jesús dibéfuena lloñédiaioi.

22 Afémie cuemo ráifinafuena náganuiaimo jino cióttagaza onódiomoi. Ñúefue jino cue llócaillado afémie cue diga, jító izói jáicaide. Ua moo ie jító diga tájicana izói cue diga tájicaide.

23 Cuemo ite itífuiai jino déillana ñue cue onóadi, bie Timotéona omoi méíñOtaacadícue.

24 Cai Ocuíraima ñue ínotícue. Iemona ñibai ómoína raire dama eróizaíbitícue.

25 Daje izói cúemona uáfodo jóideza, cue ama Epafrodito omoi cígimo jáirena. Afémie cue tájinana nabáífiredimie. Daje izói fuirilla izói cue llócaigafue nabáífiredimie. Mei íadi nauí cue jitaica raamo tájillena omoi cuemo orécamié, abido ómoimo orédicue.

26 Mei afémie nana ómoína izire cióacade. Ie irárenana omoi fidínamona afémie comeci iere járitaide.

27 Uáfueña iere irárede; tíllanomo figo dúcide. Mei íadi Juzíñamui íemo dúecaillano íena jíllotate. Dama afémiemo dúecaíñedeza; mei jáíi daje izói cuemo dúecaide. Ua Juzíñamui cuemo dúecaide, cuemo ite zúfuiaí baímo jáíe aillo comeci zúfuiaí cuemo bíñeillena.

28 Iemona íena iere oréacadícue, raire afémiemo omoi érocaillano iere omoi íóbicaillena, cue zúucaillafue raire ñiné féilleza.

²⁹ Bie Epafrodítone mai jamánomo caimare omoi uáidori, Juzíñamuimo izire jainaide ámaza. Nana ie illa izóidimíai caimare jacíruiocana íaioimo mai omoi cacáreiri.

³⁰ Ua afémie Crístomo táijinafuedo tíllanomo figo dúcide. Dama ie cáanafue jaciredifueмо afémie jónete cuena canóllena. Ua omoi bíninamona afémie cue cánuaibillena iere jamánomo nícidote.

3

Uáfueña Juzíñamui ióbilla cai ñue jaícina illafue

¹ Cue ámatiai, mai cai Ocuíraima omoi ióbioicairi. Cue cuegafue meine ómoimo cue lolle cuena áifedua izóí íñeite, mei íadi ómoína iere ñue canode.

² Íairuiga jiba jico izóí fiénidifueмо itímacimona abí omoi rairuiri. Omoi bacano icoi quetátáfirediaioi.

³ Cai bie ua quetácamacinaza. Cai bie cai joréñodo Juzíñamui ióbillamacidicai. Fia jínofenemo cioide raana íñoñedicai. Cristo Jesús íeiena cai íllari caimátaidínodicai.

⁴ Bífuiaimo aillo cue ínoregafuiai ite íadi, áfena lloñédicue. Cue baimo buna aféfuiaimo ínonide.

⁵ Cue jocóinamona ocho dígarui íllamona cue bacano icoi quetádiaioi, mei nahí israelita nairai ímiedicueza. Cue bie Benjamín izíemo jaináidimiedicue. Cue jocóinanomona hebreo ímiedicue. Ua hebreo ímie jitódicue. Judíuai ocuífueмо jino cue dobáíñuamona cue bie fariséodicue.

⁶ Jacire ocuíoídimie izóí Crístomo jaináidino fállena íaioína racádicue. Judíuai ocuífueмо lloga ñue jaícina illafue dibéfuemo, jaca nífuenidimiedicue. Bu úaitañegamiedicue.

⁷ Mei íadi nana bie nauí cúemona aillo ráifidifuiaina, ja birui aféfuiaína Cristo ícoínia náfueñedicue. Ua aféfuiaína jamai ráifiñedifuiiai izóí áfemo comécidicue.

⁸ Afe baimo aillo jíáifuemo comécidicue. Cue Ocuíraima Jesucrístone cue onóillifue, nana cuemo itífuiai baimo aillo ráifide. Iemona cuemo itífuiaína féitaticue. Cristo ícoínia naga cuemo itífuiaína cue féitaga. Ua aféfuiaína oni dotáacaiga raa izóí comécidicue, afe íbana Cristo cue náamatallena.

⁹ Daje izóí cue afémiemo jaináiacadicue. Ocuícafuena cue ínuamona ñue illáfueña llínoticue. Mei íadi afe ñue illáfuedo Crístomo jáinaíñeiticue. Jesumo ínotinomo Juzíñamui iga nahí ñue illáfuedo Crístomo jáinaiticue.

¹⁰ Cue comeci jítainafue Cristo cue onóillena. Daje izóí ie tíllanomona meine abido cáatate ríinona, “Cuemo iri,” daidicue. Afémie duere zefuilla izóí duere zefuífueмо cadicue. Afe daí ie tíllaruimo ie illa izóí íiticue.

¹¹ Afemona tíidinuíai meine cáallifueмо ocuífueмо.

Cristo fueñe cue ocuilla izóí cue jáillena, fuirilla izóí izire nícidocana uiticue

¹² Ja nana afe bie mamérillafue oticue daíñedicue. Daje izóí comeci jaícina ñue jóidimiedicue daíñedicue. Mei íadi Cristo fueñe cue ocuilla izóí íacadicue. Ie jira nágarui aféuaimo nícidocana uiticue, afémie cuena dáina izóí cue jáillena.

¹³ Cue ámatiai, bífuiaimo ja dúcidicue dama daiññedicue. Mei cue nahí finóacaigafue jiáifodo jóide. Naui cue illáfueña féitaticue. Afe llezica nahí como cuemo déioicaiticue mo riire coméciiadicue.

¹⁴ Aizidino raire mózizailla izóidinomo dúciacadicue. Juziñamuimona fia jiríddolle raa izoide cue llínuaibillena, Juziñamui monámona cuena uáidote. Crísto mo cue jaináinamona afe jiríddolle raana máññoiticue.

¹⁵ Cáimona nana ñnogafuedo ñue móonaitino, mai bie izóí cai comécioilli. Jiáifodo omoi coméciiadi, Juziñamui áfena ómoína fidítaite.

¹⁶ Mei íadi bifue mai cai náfuelli: cai onóigafue izóí mai ñue cai illi. Daje izóí ñue jaícina mai cai comécioilli.

¹⁷ Cue ámatiai, naui omoi cígiri cue íllana ciódiomoiza, afe izóí omoi iri. Omoimo cue ciótogafue jeire otínomo izire comeci omoi facáoiri.

¹⁸ Ja aillo Cristo tíillafueña uáitaitino íteza. Iemona diga icaiño afémacido ómoimo lloticue. Nane zuure éebicaillano dáanomo ómoimo llóiticue. Afémacimona abí omoi rairuiri.

¹⁹ Bie izóí itino írairuimo niné táinocaitiaioi. Dani íaioi abí jítáinafuaiña daidíaioi:

—Bie cue juziñamui, —daidíaioi. Meáirede raana meáiruññediaioi. Mei íadi áfedo abí ñnotiaioi. Fia bie énie ífue mo coméciiadiaioi.

²⁰ Mei íadi cai nana caífo mona imácidicai. Cai nana, cai jíllotade Ocuíraíma Jesucristo monámona bíllemo úññoticai.

²¹ Cai zíñoñede abina afémie méiduaibite, afémie ie abí ebire cioina izóí cai íllena. Afémiemo ite ríinodo naga raana náamatade. Iemona afe daje íemo ite ríinodo cai abí ífueña méidoite.

4

Jaca cai Ocuíraímamo caimátaioicairi

¹ Cue izíruiga ámatiai, mei ómoína iere cióiacadicue. Omoi cue íóbioinamacidiomoi. Iemo cue jiríddolle raa izóidiomoi. Ua cue izíruigamacidiomoiza; mai cai Ocuíraímamo jaícina riire omoi comécioiri.

² Evódiana mámeçiredingo íemo Síntique diga, izire jicádicue, dáafue mo ómingo coméciiiri. Mei cai Ocuíraímamo jaináinamona ebúñona maméidiomíngoza.

³ Daje izóí jiáimemo úriticue. O, cue táijnado jaca ñue cuena nabáidío. Ua cue ñnoga nabáidío. Jira bie cai miríngotaiña o canótaiticue. Mei afe íainguai cúeoiri afe jíllona uai cue llócinado nícidocaidiainguai. Biainguai, Clemente diga naa jiámieoiri cúeoiri táijicadiaioi. Nana afémaci mámeçi ja Juziñamui zíñona íllino óitino mámeçi cúeinanicomo cueba.

⁴ Nágaruillaido cai Ocuíraímamo mai omoi caimátaioicairi. Nane dáanomo daidicue, mai caimátaioicairi.

⁵ Omoi comeci mánaína naga cómemo, mai ciótaitiomoiza. Cai Ocuíraíma bíllíruimo ánozideza. Cai áinori íteza.

⁶ Omoi comeci nífue mo jaritaitañeno iri, mei jiáifodo naga ómoimo comúidífuaiña Juziñamuimo úrilla llezica, afémiemo mai omoi lloiri. Daje izóí omoi jitailla raana jicari. Afe llezica “Íere figora” mai omoi daiñfreri.

⁷ Ie mei Juziñamui comeci caimare uái íllafue ómoimo íteza. Bie comeci uái íllafue comíni onóiga táinofue baímo ñuera. Afe caimare uái íllafue

omoi comécina ñue ráiruite. Daje izói omoi comeci jarire úrillafuena ñue manánaitaite. Mei Cristo Jesumo daane jáinaitiomoiza.

Ñúefuiaimo comeci omoi facóiri

⁸ Cue ámatiai, íraicaíño omoi llóiticue. Nana nahí uáfuiamo omoi coméciiiri. Daje izói nahí caimare jacíruiogafuiamo omoi comécioiri. Daje izói nana jáicina illáfuiamo omoi coméciiiri. Afe izói nana íainidífuiamo omoi coméciiiri. Daje izói nana ióbillafuiamo omoi coméciiiri. Daje izói nana caimare jalléinafuemo omoi comeci uibíoiri. Nana bie ñúefuiaimo omoi comécioiri. Daje izói nana ñúefuena nitáfíreganomo afémacimo omoi uibíoiri.

⁹ Omoi cue llófuia izói mai omoi iri; ómoimo cue lloga lletárfuiamo mai omoi íinori. Cue dánana omoi cacana izói, cue finócana omoi ciona izói, afe izói mai omoi iri. Iemona comeci caimare uái illafue fecáfírede Juzíñamui omoi diga ífíreite.

Filipo imaci fia fecaca raa Páblomo orédiaioi

¹⁰ Meine nane cuemo omoi coméciiillari cai Ocuíraimado iere ióbidicue. “¿Ñibái mei cuena féitatioi?” ómoina daiíacañedicue. Cue omoi canóacana raa áitíimie íñédeza, onódicue.

¹¹ Cue ráaninari ómoina fiene úacaiñedicue; cuemo ite raari cue ióbillana ja fibídicue.

¹² Duere cue íllana fibídicue. Daje izói aillo cue jitaica ráaniai íllana fibídicue. Nifue cuemo comuíadi, afe izóidifue cue ocuállana ja fibídicue. Nibai jeíredicue, nibai jufíruiticue; afe izói caimare cue íllana fibídicue. Güiga alla cuemo íadi, mei cuemo íñeniadi daje izói ñuera.

¹³ Naga cuemo eróicana comuide raana ocuédicue; mei Cristo cuena ríiduoado ocuédicue.

¹⁴ Mei íadi cue dúerena llezica cuemo omoi dúecaillamona, cue omoi cánua ñuera. Diga icaíño duere cue finóinari omoi zúunaila cuena nácaitate.

¹⁵ Omoi Filipos imácidiomoiza, daje izói bífuena onódiomoi. Nano fueñe jíllona uai cue llócaina llezica, daade cue canófiredinodiomoi. Ua Macedóniamona oni jáinomo cue jailla llezica daade cue canode Jesumo ínotinodiomoi. Fia fecaca ráaniai cuemo oréfirediomoi. Afemona comínimo cue feca izói, íemo íaioimona cue llínua izói, afe dájemo naa ómoiri tájídinodicaí.

¹⁶ Nai Tesalónicomo cue illa llezica, omoi diga ícaíño, fia fecáfíreiga ráaniaina cue jítaicanaiina cuemo orédiomoi.

¹⁷ Fia ráaniaina cue llínoiacanamo coméciiñedicue; mei íadi cue comeci jítaillafue, Juzíñamui uécomo ómoimo aillo íi, daidicue. Iemona daií aillo omoi ofitaga raana uire maiñóritiomoi. Afemo comécidicue.

¹⁸ Mei nana jae cue llínoga. Afena cue jitaica ráaniai baímo ja llínoticue. Epafrodítodo cuemo omoi oreca ráaniai figo baite. Baímo cue jítaíllena íñede; ja aillo íteza. Cuemo fia omoi oreca ráaniai iere Juzíñamuina ióbitade. Daií cuena omoi cánuado, Juzíñamui comeci jíitana finódiomoi. Aferi Juzíñamui ióbaicallano afémie áfena jeire ote.

¹⁹ Cue ínoga Juzíñamui nana omoi jitaica raana ómoimo fécaite, mei nana Cristo Jesús ebire comuítaga ráaniai Juzíñamuimo dúideza. Ie jira íemo aillo íte ráaniai izói, afe izói ómoimo fécaite.

²⁰ Mei ñuera ebíredifue cai Moo Juzíñamuimo jaca íoicaideza. Daiíteza.

Iraicaiño uáidonocailafue

²¹ Cue dibénedo nana Juzíñamuimo jaináidino Jesucristo mámeçido omoi uáidori. Cue diga ite cai ámatiai ómoimo uai orédiaioi.

²² Nana benomo ite Juzíñamuimo jaináidino daje izói uai ómoimo orédiaioi. Romano nahíllaima jofomo itino iere ómoína izire uáidoiacadiaioi.

²³ Cai Ocuíraima Jesucristo nana ómoína ñue éziciiteza. Mai daiítadeza; jae ñie.

COLOSAS IMÁCIMO SAN PABLO ORÉCABE La Carta del Apóstol San Pablo a los Colosenses

Pablo Colósamo ite Juzíñamuimo ñnotinomo cuete

¹ Cue Páblodicue. Iemo cue nabai Timoteo diga ómoína uáidoticoco. Juzíñamui começi jítaina izóí Jesucristo orécamedicue. Afe orécamedicue daiñacana uai, Jesucristo ñúefuena llúájitagamedicue. Cue ama izóí ñmie Timoteo diga,

² Colosas jófuego ite féitañeno ñnofirede ámatiaimo bibe cueticoco. Omoi daje izóí Crísto jaináidíomoi. Cai Moo Juzíñamui ómoimo caimare eróicaiteza. Afe llezica Juzíñamui dibénemo icíríñeno uái illifue Juzíñamui ómoimo fécaiteza.

Pablo Jesumo ñnotinona Juzíñamuimo úrite

³ Omoiena Juzíñamuimo coco úrilla llezica jaca cai Ocuíraima Jesucristo Moo Juzíñamuina “Figora” daiñiredicoco.

⁴ Mei Cristo Jesumo omoi ñnuana cócona ja fidítatiaioiza. Daje izóí Juzíñamuimo jaináidínona omoi izíruillana cócomo llotiaioi.

⁵ Afe bie izóí itíomoi, mei monamo ómoimo éenoga maiñolle raamo ñue ocuiritiomoiza. Afe ómoimo lloga ua uai omoi cacánamona, ñue ocuiritagaomoi. Afe lloga ua uai ñuera jílona uai.

⁶ Afe daje lloga uai náganuiaimo llócaillado oni aillo mónaioicaide. Ua, ríganai llizilla izóí, iere jebuide. Mei daje izóí afe uai omoi cacana mei, omoi cigiri aillo jebuúdeza. Juzíñamui caina izíruillana omoi cacana mei, afe izíruillana ua ráfueza ja omoi onónamona, afe ñúefue ómoimo aillo oni mónaitagaza.

⁷ Cai izíruiga ama Epafras bie ñuera uai ómoimo llófuede. Afémie nauí cai méifomo afe uai llúamo tájide. Ie jira afémie ómoiena Cristo ñue ocuícamié, mei afe llezica afémie Crísto féitañeno iere ñnofiredimieza.

⁸ Afémie Ñuera Joreño ómoimo comuitaga cuena omoi izíruillafue cuemo llúábite.

⁹ Jira áfena cai fidínanuimona biruimo jaca fáicanocaiñeno ómoiena Juzíñamuimo úrifredicoco. Juzíñamui começi jítainana ñue omoi onóillena afémie mo jicáfiredicoco. Daje izóí nana jiáiforie ifoci úrillana omoi onótallena jicádíco, naa Juzíñamui dibéno onóigafuiaiíri.

¹⁰ Afe bíemona cai Ocuíraima Jesumo jaináidíno illa izóí, ñue íredíomoi. Mei afe izóí omoi ille jítáiredeza. Daií omoi íllamona afémiena nágarui íóbítaitíomoi. Afe afémie íóbilla raa be ñue: Riga llizíllajiai aillo illa izóí, omoi finoca ñúefuina aillo omoi jebuítallena; íemo jiái Juzíñamuina jamánomo ñue omoi onóillena.

¹¹ Daje izóí nana cai ebírede Juzíñamuimo ite ñuera rímodo omoi ñue náirellena afémie mo jicáfiredicoco. Daií jicáfiredicoco nana ómoimo cómuítufuina járitaiñeno fáicana omoi ocuóillena. Daje izóí caimare aféfuina omoi ocuóillena ómoiena jicádíco.

¹² Nane daií omoi começi náireillamona caimare cai Moo Juzíñamuina “Iere figora” omoi daiñirellena jicádíco. Mei nana afémie mo dúidíno ie fecalle

zífionna illifue ómoiena batí Juzíñamui illa úzereðinomo omoi maiñóllena, afémie ómoína ñue finódeza.

¹³ Mei uáfueza, Taife ocuífirega jítifomona Juzíñamui caina jíllotate. Jílluano ie izíruiga Jitó illáimana illánomo caina jóonete.

¹⁴ Mei afémie Jitó tíillado, caimo ite íaifuiái féitajano, Juzíñamui caina jíllotateza.

Cristo tíillado Juzíñamui ðiga icíriñeno ðájena uái itícaí

¹⁵ Afe bie cai Moo Juzíñamui jaca cíóñenámie íadi, comíni cíonámie izóí ie Jitodo ana bite; íemona afe Jitó Juzíñamui ñíie ua izóidena caina onótate, naa ie comeci ífuiáiri. Afe Jitó nana comuítaga ráaniai baimo jamánomoidímie.

¹⁶ Juzíñamui ie Jitodo nana monamo itínuiaina finótate, naa éniemo itínuiáiri. Cíoide ráaniai naa cíóñena raa ðiga, nana afémiedo Juzíñamui finoca. Mei uáfueza, daa fiéñeno, nana afe cai cíóñena ríinoreðinona naa ocuídillainiri, íemo jíái Juzíñamui abí imaci ðiga, dáamiedo finócaiaíoi. Nana afe ie Jitodo finoca. Daje izóí afémie íena finoca.

¹⁷ Mei afe Cristo nana ráaniai nai íñenia afémie jaca íteza. Daje izóí dáamiedo nana ie finoca ráaniai oni féiraiñeno ñue jaícina itíaiíoi.

¹⁸ Afe baimo Cristo nana afémiemo jaináidino afe ífo ðainámie. Iemo nane afémiemo ínotino ie abí ðainámaci. Afémie afe bie ie abí ðaina ínotinona zífionna cáatatímie, mei afémie tíidínomona fueñe meine cáadimienaza. Afémie ðaí fueñe meine cáadimienaa jaide, nana itífuiaí baimo jamánomoidímiena íllena.

¹⁹ Nana Juzíñamui zífionna illa izóí, nana afe izóí Cristo íllena Juzíñamui jítaiðe.

²⁰ Nane daje izóí afe Cristo tíillado, Juzíñamui nana afémie comuítaganuiaina icírafuenino ðájena caimare uái illífuemo jóoneacade. Mei uáfueza, nana bíníemo itífuiaí naa comíni ðiga, íemo jíái nana monamo itínuiáiri, Cristo cruzmo tíillado Juzíñamui éoiñeno ðájena caimare uái itátaacade.

²¹ Nauí ðiga íaifuiái omoi fínuamona Juzíñamuiomona íere jicánemaci izóídiomoi. Daje llezica omoi comécido Juzíñamuina éoidinona itíomoi. Mei íadi ja biruí Juzíñamui afémie ðiga ómoína icírafuenino ðájena uái illífuemo jóonete.

²² Cristo tíizailla llezica ie abí izi cácanado, Juzíñamui ðaí ómoína caimare ðájena uái illífuemo jóonete. Afémie bie izóí finode, íaifuenidínona, daje izóí ñífuenidínona afémie uíécomo cai ie jóoneíllena. Uáfueza, afémie bie izóí finode íeiena cai íllena.

²³ Bie izóí uáfueña omoi íllena, fáicanocaiñeno jaca íñoreðiomoi. Afe izóí amena ana jica jainade riire illa izóí, riire íreðiomoi. Daje llezica ñuera jíllona uaina omoi cacánamona omoi maiñoca caimare ocuírillafuena fáinocainidiomoi. Afe bie ñuera jíllona uai ja nágagobiaído llócaiga. Iemo afe izóí afe llócaigamo cue jíái canóðicue, mei afe uai llócaíllena Juzíñamui jóonenocaiacueza.

Pablo Jesumo ínotino cánoitimienaa jóonega

²⁴ Biruí omoi íçoíníaa ðuere cue zefuállari íóbidicue. Mei áfedo Cristo abí ðaina afémiemo ínotínori nana uícodo lloga nai ðuere cue zefuállana ñue ícoimo fuitáreðicue.

²⁵ Mei omoi ñue íllena Juzíñamui cuemo jóonenocaigafuedo nana afémiemo ínotino cánoitimiena jáidicue. Mei uáfueza, Juzíñamui nana comínina llóiacaija uai, afe uai jino cue llúana ícoimo fuitállena jóonenocaigacue.

²⁶ Afe bie ñuera uai jaiai ninómona ua biruimo comini figo onóñediaioi; diga ígímaiai záilla méifomo afe uai nai retáiruiga raa izói joide. Mei íadi ja biruimo íeiedinomo ja jino báifitate.

²⁷ Juzíñamui ja judíoñedinomo afe bie nauí báinino ite uai ñuera áillue cámafuenta jino ómoimo onótaiacade. Bie báinide uai dáina, Cristo ómoimo illa llote. Iemo íco jáíruido ñue caimare omoi illífuemo omoi ocuírillena afémie jino dénoite.

²⁸ Cai bie Crístona jino uáfodo lloticai. Afe llezica nana comínina ñue rairuídicai. Daje izói nana ñúefuiai ñue íaioi onóillena afémacina nana llófiredicai. Afe izói naga come Crístomo dájena jaináillamona afémie dibénedo ñue íaioi móonaillena llófiredicue.

²⁹ Bie cue fuitállena, nana Cristo cuemo iga máriedo fúirienaila izói nágarui Juzíñamuimo izire jicáfiredicue.

2

¹ Mei bífuena ómoína fidítaacadicue. Jaca ómoiena iere fuirilla izói Juzíñamuimo riire jicáfiredicue; daje izói Laodicea jófuemo ítino íena, íemo jái nana cue uíecona cióñedino íena riire jicáfiredicue.

² Afémaci comeci náireillena fuirilla izói Juzíñamuimo riire jicáfiredicue. Iemo afe comeci náireillamona conímána ñue íaioi izíruillena riire níciduano jicáfiredicue. Mei daíí dájena omoi jainaina jira, bie nauí figo báitañega uai Cristo omoi ínua mei, omoi diga íllana ñue jaícina onórediomoiiza. Afe daíí uáfori jaícina afémiena ñue omoi onóillena, riire níciduano nágarui Juzíñamuimo izire jicáfiredicue. Mei jii, nana bie riire nícidotícue, figo ónoñega Juzíñamui ñuera uaina ñue omoi onóillena; mei afe báíñega Juzíñamui uai dáina dama Crístoza.

³ Mei uáfueza, nana comeci jamánomo úrillafuiai naa onóigafuiaiíri afémiemo ite.

⁴ Bu ómoína ebírede uáillaído bífueñeillena, nana bífuiai ómoimo llóiticue.

⁵ Cue abí omoi cígiri íñede íadi, benómona jicana izire ómoimo comécidicue. Iemona daíí cue fídia izói dájena caimare omoi íllari íóbidicue. Daje izói fáicanocaiñeno Crístomo omoi ínuari íóbidicue.

⁶ Jae cai Ocuífirede Jesucrístomo ñue omoi ínuamona ie lloga iodo jáirediomoi.

⁷ Afe bie daííacade, amena riire jáinaja izói, Crístomo riire jaináirediomoi. Iemo jái daje llezica jainónide jáíllirai izói omoi íllena, nágarui Cristo uailai jeire omoi ua baímo jamánomo jeire ófireiri. Mei afe izói llófuegaomoiiza. Iemo afe llezica nágarui Juzíñamuina “íere figora” mai omoi daíífireiri.

Crístomo cai jaináinamona cai comeci cómuena méidoga

⁸ Mei biruí ñue abí omoi rairuiri, baimaci omoi jífueacadeza. Afémaci táinodo ífoci úrillado, daje izói íaioi lloga taino uáillaímo jífuebiñeno íri. Mei afémaci Cristo dibénemo íñediaioiza. Mei jáíífodo jaiai ninomo comini lloga taino uai dibénemo jaináidiaioi. Daje izói dama bínie raa dibénedo comini comécillafuiaiímo jaináidiaioi.

9 Mei íadi nana Juzíñamui zíñona ñue illa dieze, afe izói Crísto nana ñue jaícina ite.

10 Iemona Crísto dájena omoi jaináinamona, Juzíñamuina oruide comini izóidíomoi. Afe Cristo nana monamo ite ocuídillainina, naa cai cióñena ríñoredinona ocuífireda.

11 Iemo nane daje izói Crísto dájena omoi jaináinamona ja bacano ícoi quetácano izóidíomoi. Mei íadi ua quétañegaomoi, mei jáífodo nanómona omoi jocoina llezica ómoimo ite íaífuemona ja jíllo díomoi. Mei ua, bacano ícoi quétaja izói, omoi fiénidífuemona quetaca izói jíllo díomoi. Afe bie quetáfírena Crístomona comuide.

12 Iemo nane jáífue mo cacáreiri. Mei omoi báutizanamona Cristo éñiemo ana raia izói ja raigáomoi. Bie nanómona omoi fiéni finócafuiái titaca izói, ja fáicanocaitíomoi za. Iemo Juzíñamuimo ite áillue ríñonomo omoi íñuamona Cristo izói cómomiena afémie diga ja cáadimacina itíomoi; mei Juzíñamui dama íemo ite ríñodo Cristo tíide meine cáatateza.

13 Naui jáíruido ómoimo ite íaífuiamona comeci díne tíidino izóidíomoi. Daje izói quétáñena judíuáiñedíno omoi illa llezica, omoi fiénide óiacanafue jeire omoi úamona, comeci díne ónonino tíidino izóidíomoi. Mei íadi birui Juzíñamui nana omoi fiénidífuiái féitajano, dájena Cristo diga ómoína abído cáatate.

14 Caímo ite íaífue íballe raa izoide. Afe cai íbañenia tíiredicái. Mei íadi Cristo tíllado Juzíñamui cai íbácana záitate. Afe cai íbácana Juzíñamui fiébiñeno ñue íbaja Cristo cruzmo coráiado ácatate.

15 Mei afe llezica Cristo cruzmo tíllado, monamo ite ocuídillainina, naa cióñena ríñoredinona afémie ríñitade. Afémie uáfori íaíoi illáiena báiruado, nana afémaci baímo íe jamánomoidímie íllana ácatate.

Monamo ite ñúefuiaina omoi jenori

16 Mei bíemona ninó dáamie omoi güille díbenedo omoi jánana júfidoiadi, áfemo maí náfueñeno omoi íri. Daje izói omoi júrua díbenedo ninó dáamie fiéni ómoína úriadi, áfemo náfueñeno maí omoi íri. Iemo jáí dáarie judíuái lloga ráfuiamó eneno omoi comécíñenado, ninó dáamie omoi jánana júfidoiadi, áfemo maí náfueñeno omoi íri.

17 Mei nana bífuiái, úire Cristo bíllíue díbenedo comini ñue onóíllena canódeza. Mei íadi Cristo bíllamona afe cai onótatífuái jítaiñega, mei dama Crísto nana uafue raa báífídeza.

18 Iemona nino dáamie ómoína fiéniruiadi, mei afémie táinona mánaídímiena íllana ómoimo ácatateza, áfemo náfueñeno omoi íri. Daje izói afémaci diga Juzíñamui abí ímacéi ómoína íóbítáíreíadi, áfemo náfueñeno omoi íri. Mei afémaci óñoñega nícaí anado cíóíreña raado úrííredíaióiza. Afémaci jíba come comeci fácafuiáido abí íere íñofíredíaióí.

19 Afémaci Crísto dájena jaináíñeno itíaióí. Mei jáífodo Cristo nana íemo íñotino ífódímie. Afe ífo izói mamécámie nana íe abí écaja izói comécina náíretajamona afe abina móonaitade. Afe izói nana íe abímo jaináídino conímamo dájena jaináítajamona, íe abina móonaitade. Afémie Juzíñamui maméílla izói nana bífuiái ocuífireda.

20 Mei Cristo tíllaruimo afémie diga tíidino izói jáidíomoi; bie daííacade nanómona omoi fiéni finócafuiái titaca izói omoi fáicanocaígaza. Afe llezica bie éñie ocuífireda cai cióñena ríñoredinomona zuitácacái izói jáidíomoi za.

Iemona çnibái mei nai bíníemo dúidino izóí ífiredíomoi? ÇNíbai mei ie ocuífafuemo jeire otíomoi?

²¹ Dáarie bie íaioi ocuica fimairilla uáimona bie izóí daide: “Bie riñeno iri,” íemo jíái “Afeniaina güñíeno iri,” íemo nane jíái “Baie jetáñeno iri,” daide.

²² Nana bie rairuúllafuiai bie éniemo ite jétamona fúioicaite gülleniaimo dúide. Jira aféfuiaimo náfuenidíomoi. Nana afe íaioi ocuica uaillai fia jiba comíni daina uaillai. Daje izóí fia jiba comíni llófuega.

²³ Mei uáfueza, afe bífuiai báitafuiai izóí cacáreide, mei afe ocuídino, “Bie cai daina izóí monamo itínona mai omoi caimátafireiri” daíí daidíaióiza. Daje izóí fia comíni daina comécina mánaidínona ómoína oréacadiáioi. Iemo jíái comíni íaioi abí táinona duere zefuítatíaióí. Mei íadi nana bie íaioi ocuífafuiai cai comécimo ite fiénide óíacanafuiai rairuúllena canóñede.

3

¹ Iemona, Cristo diga meine abido cáatagamaci omoi illa jira, mai mei mona dibénemo ite raa omoi jenori. Mei afénomo Jesucristo Juzíñamui nabézimona illáimana íteza.

² Daje izóí mona dibénemo ite raamo comécíillano afemo omoi járitaireiri. Mei jáífodo bíníemo ite ráfuiaimo izire comeci uitáñeno omoi iri.

³ Mei Cristo tíllaruimo afémie diga jae tíidínona jáidíomoi. Jae omoi jaiai fiéni finóacagafue titaca izóí afe omoi fáicanocaiga. Iemo ja birui Crísto dájena omoi jáináinamona omoi uáfueña cáatagano; íemo jíái Juzíñamui dínomo rairuicaomoi, mei Cristo daje izóí Juzíñamuimo dájena jáináideza.

⁴ Dama Cristo cai uáfueña cáatagano. Iemo afémie cíocaille llezica, afémie diga cíocaitíomoi. Afe llezica afémiemo ite jamánomo ebírede ñúefuiaimona ómoiena máíñoitiomoi.

Cai jaiai illafue méiduano cómfuedo jáiredicai

⁵ Ie jira nauí bie éniemo omoi jáinaina jira, ómoimo diga fiéni óíacanafuiai ite. Aféfuiai titalle izóí mai omoi fáicanocairi. Naga ánidímie ringo diga jaca íñeno o iri. Iemo jíái, áiredímie ie áíñedingo diga jaca íñeno o iri. Iemo daje izóí jíáie cómemo íaifuaíido comécíñeno omoi iri, íemo jíái omoi abímona comuíde jiruífueña omoi finóñeno iri. Daje izóí omoi comeci fiéni óíacanafueña jeire ofeno omoi iri. Iemo nane jíáie cómemo úradoíñeno omoi iri, mei úradoífredímie diga raa óíacanamona jánaraimo caimátaidímie izóideza; Juzíñamui ífuiai baimo jamai bíníe raana izíruíteza.

⁶ Ie jira nana bífuiaimona íemo cacáñedínona Juzíñamui íere duere finófirede.

⁷ Iemo jaiai Crísto omoi íñoñena llezica, nana bie izóidífuiai finófredíomoi.

⁸ Mei íadi ja birui nana bie fáicanocairi: Jáímamo ícíríñeno omoi iri, íemo rírede uaillai bumó lloñeno omoi iri. Daje izóí jíáie fiénidífuiai finóñeno omoi iri. Iemo jíáima jánana úríñeno omoi iri. Daje izóí jíáima zanóllena fiénide uáíllaido íaire úríñeno omoi iri.

⁹ Conímamo táinona lloñeno omoi iri, mei omoi jaiai fiéni illafue jae méidogaza. Daje izóí nano omoi finófirega jae fáicanocaigaza.

¹⁰ Iemo ja birui comue iníroi jita izóí ñue ílláfueña ja méidotíomoi. Iemo afe comue illafue comuítatímie Juzíñamui. Ie jira ie illa izóí afémie caina cómuena finótacana uite. Iemona afémiena ñue ícoímo ónoíticai.

11 Afe jira afe cómomaci judío ímiena ie íllana náfuenediaioi. Iemo jiái judíoñedimiena ie íllana daje izóí náfuenediaioi. Iemo jiái afémaci bacano quetácamienna ie íllana náfuenediaioi; daje izóí quétañegamienna náfuenediaioi. Afe izóí afémaci onínemaci íllana, iemo jiái onóñedino íllana, iemo jiái izire ocuífirregano íllana, iemo jiái ócuifinigano íllana náfuenediaioi. Mei jiáifodo afémacimo Cristo iere jamánomo ráifinamona dama afémiemo náfuefirediaioi. Mei Cristo naga iemo ínotinomo ífiredeza.

12 Iemona bífueмо cácarei: Juziñamui ómoína izíruite. Izíruillano afémie ómoína nizede ie íaifuenide comínina omoi íllena. Mei ie jira bie ñúefuiai izóí omoi ífireiri: Jiáimacimo dúecaiífireiri. Jeruñeno canófiredimiena omoi iri. Comécina mánaidimiena omoi iri, cáimafuiaido úrifireiri, járidoñeno omoi iri.

13 Conímamo jaca járidoñeno íaicana omoi canori. Daa come jiámamo icíriadi afémiemo ñúefuedo omoi jicari, áfedo icírafue záillena. Omoi íaifue ícoinia Cristo oni féitaja izóí, afe izóí jiáimie omo fieni finóadi afe ícoinia oni o féitafireiri.

14 Nana bífuiai emódomo iere omoi izíruiífireiri. Mei afe izíruillafue cómena dájena jáinátateza, jiáimaci diga. Afe daí jiáimacina cai izíruillamona, nana afe ñúefuiai jáicina caina finótate.

15 Iemona Cristo comuítaga caimare uái illafue omoi ifoci úrillana ífoiteza. Mei dáamací izóí iemo cai jáináinamona afe bie izóí cai íllena Juziñamui caina uáidoteza. Afe llezica jaca Juziñamuina “Figora” omoi daíífireiri.

16 Mai mei nana omoi comécido Cristo daináuai jeire órediomoiza. Afe mei aféuai ñue omoi onónamona conímama omoi llófuerei. Iemo daje llezica áfedo conímama ñue onóicana comécina omoi náiretari. Iemo jiái Juziñamui íóbitalliruai omoi rófireiri, jiáie íena caimátalliruai diga. Daí ruano omoi comécido Juziñamuina “Figora” omoi daíífireiri.

17 Mei jií, nana omoi jetáacaga raa, iemo jiái ómoimo ocuica caimánidifue diga, naa omoi daííllifuiari cai Ocuíraima Jesús mámecido omoi finófireiri. Afe llezica Moo Juziñamuina afémiedo “Figora” omoi daíífireiri.

Crístomo ínotinomo dúide comíni diga finófirega uai

18 Daje izóí bie jiái lollífuemo omoi cácarei. Iníredingotiai, mai omoi inítiai anamo ñue ífireiri, mei Crístomo ínotinguaína omoi illa jira, afefue ínoredeza.

19 Daje izóí inítiai omoi áitaiña ñue izírui; afénguaina fiéniruiñeno omoi iri.

20 Uruiai, omoi móotaiña nágafueмо omoi cacáreiri, mei afe daí omoi íllamona cai Ocuíraima íóbide.

21 Móotiai, omoi úruiaína ícidoñeno omoi iri, afémaci jacínaillamona minícana finónide daí íaiói íñeíllena.

22 Ocuífirregano, biniemo ite omoi ocuínina nágafuaimo ñue omoi cacáreiri. Daa afémaci ñue ómoimo comécíillena afémaci ía eroína llezica ñue cacáreíñeno, mei íadi jiái daje izóí afémaci éroiñena llezica ñuera comécido omoi cacáreiri, mei Juziñamuina ñúefuedo jacíruiitacaiza.

23 Daje izóí nana omoi finóacaiga raa, ñúefuedo finori. Comíni dibénedo izóí táijíñeno, Juziñamuimo o táijina izóí omoi finori.

24 Mei ja onódiomoiza, Juziñamui ómoimo lloga omoi jiríddolle zíñona illifue afémie ómoimo fécaiteza. Mei uáfueza Cristo ocuícamacina maméidiomoiza. Afémie omoi ua Ocuíraima.

25 Mei íadi fiendi finódimie afe ibana ie fiendi finua dieze duere finóbite. Mei Juzíñamui jaca dáamie oni énenorie maméñede. Nana daje dieze jaícina duere finoite.

4

1 Ocuíraíni, omoi anamo ite ocuífreganomo ñue jaícina omoi eroiri. Afémaci jitaica raamo uibóicana omoi ocuífireiri. Mei monamo omoi Ocuíraíma ítena onóredíomoíza.

2 Mai fáicaiñeno Juzíñamuimo omoi úrifireiri. Jaca afémiemo cáaoína izóí úriri. Afe llezica “Figora” Juzíñamuina omoi daiífireiri.

3 Daje izóí cáiena Juzíñamuimo omoi jicáfíreiri, cai Ocuíraíma uailai ñue cai llócaillena. Juzíñamui bie izóí caina itátallena omoi jicari. Daje izóí nauí comíni figo ónoñega Cristo dibéñedo uai, uáfori cue llófuellena omoi jicari, mei daií llófueredicueza. Nauí afefue cue llua jira ja birui llavébidicue.

4 Mai omoi Juzíñamuimo jicari, bie ñúfefue cuemo dúina izóí, onóreoicana jino cue llóllena.

5 Crístomo ínoñedíno cígimo jaca ñue onódimie izóí omoi ífíreiri. Nágarui Cristo illafue afémacimo raire omoi ácatafíreiri.

6 Nágarui cáimafuíaido úriredío. Daje izóí jaca ñue oíacáñedo o úriri, illa dígamie uai ñue o óllena.

Iraicaiño uáiduafue

7 Cai izíruíga ama Tíquico, cuemo birui itífue ómoímo llujáite. Afémie fáicanocaiñeno iere cue canófredímie. Daje izóí afémie cai Ocuíraíma cue diga ocuífregamíena ite.

8 Ie jira afémíena ómoímo óreitícue, birui cai illafue ómoína onótallena; íemo jíái omoi comeci náiretallena.

9 Afe llezica jíámie Onésimo mámeciredímie Tíquico diga jáite. Afémie cai izíruíga ama, íemo jíái iere ínofíregamie. Afémie ómoímaci ie. Afe íaillínoí nana benomo ífredífuíai ómoímo llóítaillínoí.

10 Iemo cue llavébilla llezica cue nabai Aristarco, uailai ómoímo orede. Daje izóí Bernabé enaize Marcos uailai ómoímo orede. Marcos dibéñedo jíáie lluáfúiai ja onódiomoíza. Afémie omoi méiñuáiadi, caímare íena omoi uáidori.

11 Iemo jíái Jesús ómoína uáidote. Afémie jíái Jústona mámeciredímie. Juzíñamui illaíma illano dibéñedo cue táijina llezica, daa afe bimaci judíuáimona Crístomo ínotino cue canódino. Afémaci iere daa cue íóbitadino.

12 Iemo jíái Epafraíras uailai ómoímo orede. Afémie ómoímaci ie. Daje izóí Cristo ocuífregamie. Afémie ómoíena jaca izire Juzíñamuimo jicáfírede, fáicanocaiñeno Juzíñamuimo omoi ínnollena. Daje izóí Juzíñamui dibéñedo ñue omoi móñoaillena íemo jíái nana Juzíñamui comeci jítaina izóí jaícina ñue omoi finóllena, afémie Juzíñamuimo jicáfírede.

13 Afémie iere ómoímo comécíllana uaina nabáífredícue. Daje izóí afémie jíái Laodicea jofue comínimo iere comécíífredí, naa Hierápolis jofue comíniri.

14 Iemo jíái izíruíga manóriráíma Lucas uai orede, daje izóí Demas.

15 Iemo jíái Laodicea jófueo ite ámatíai uáidori. Daje izóí Nínfas daínámie omoi uáidori, naa ie jofomo garíífredí ínotino diga.

¹⁶ Bie rabe omoi nana facádua mei, Laodicea Juzíñamuimo gairíracomo facádollena omoi oreri. Daje izói Laodicéamo cue oreca rabe omoi diné dúciadi, nana omoi facátori.

¹⁷ Jiái Arquípomo lloiri: “Mai cacai, Juzíñamui omo jónega ie táijina mai ñue jaícina o fuitari,” daiíri.

¹⁸ Cue Páblodicue. Afena uafue daiíllena, bie uáidua uai dama cue ónoído ómoimo cuetícue. Onóitíomoiza, cue mei llavébidicueza; ie jira Juzíñamuimo cue dibénedo úriri. Juzíñamui ñue ómoído eróiteza. Mai daiítadeza. Jae ñie.

NANOIDE SAN PABLO TESALONICA IMÁCI MO ORÉCABE

Primera Carta del Apóstol San Pablo a los Tesalonicenses

Tesalónicamo ite inotimacimo Pablo ie nabáñiairi rabe cuetiaioi

¹ Cue Páblodicue. Bie rabe Tesalónica jófue mo ite Juziñamuimo gairide ámatiaimo cueticue. Benó cue diga ite cue nabai íaillinoi Silvano Timoteo diga dáabemo cai uai cueticue. Moo Juziñamuimo dájena jaináidiomoi. Daje izói cai Ocuíraima Jesucristomo dájena jaináidiomoi. Cai Moo Juziñamui ézicigafuemo caimare omoi iri. Daje izói Juziñamui fecaca comeci ñue uái illáfuemo omoi iri. Afe izói ie jitó cai Ocuíraima Jesucristo comeci ñue uái illáfuemo omoi iri.

Tesalónica imaci íaioi Jesumo inuafue ñue jino ácatatiaioi

² Nana ómoiri Juziñamuina “Figora” daífiredicai. Daje llezica Juziñamuimo cai úrillamo nana ómoína uibíoidicai.

³ Cai Moo Juziñamui uiécomo ómoína uibíoidicai, jamánomo inuafuedo omoi tájina jira. Afe llezica aillo izíruillafuedo comínina canócana tájifirediomoi. Ie emódomo cai Ocuíraimamo omoi úiñuafue jaca fáicanocaiñediomoi.

⁴ Cai ámatiai, Juziñamui ómoína izíruite. Afe Juziñamui nizécamacidiomoiza onódicai.

⁵ Meita naui jillona fue ómoimo cai lluaíbillaruido aféfuena fia daina uáillaído lloñédicai, mei íadi Ñuera Joreño rínodo lloticai. Daje izói afefue uáfuena ñue cue onóigamona áfena uai jizíñeno jino ómoimo lloticai. Omoi cígido cai ñue illáfuena, áfedo omoi comeci ñue illena onódiomoi.

⁶ Omoimo cai jino ciotaga illafue izói ja dani ñue macádiomoi. Daje izói cai Ocuíraima Jesucristo maca izói macádiomoi. Afe llezica cai llogáuaina ñue jeire otíomoi. Ua Ñuera Joreño fecaca cáimafuedo afe uai jeire otíomoi, afefue ícoína duere finócaomoi íadi.

⁷ Iemona ñuera illafue jino ciotatinona íficaidiomoi. Ua nana Macedonia éniemo ite inotimacina, daje izói Acaya éniemo ite inotinona fidítatiomoi.

⁸ Mei jira Ocuíraima Jesucristo llogáuai ómoimona nana Macedóniamo énie Acaya énie diga jica jalleide. Ie mei afe baimo Juziñamuimo omoi inogafue jae náganíaimo jica jalleide. Ie jira jae cai jáifodo daíllifue iñede.

⁹ Mei afeno imaci omoi ñue caina llínuafue llotiaioi. Ie emódomo jánaraimo omoi inuafue fáicanocai llano caade Juziñamuimo omoi inollena llotiaioi. Afe ua caade Juziñamuimo omoi como fueñe tájinafuedo úritiaioi.

¹⁰ Ie baimo tállanomona Juziñamui cáataga Jitó, monámoma meine bíllena ie omoi úiñuafue llotiaioi. Afe meine abido cáataga Jesús, cai jíllotaraíma; ua uire bíite cai iere duere finóllifue mona, afémie caina jíllotaite.

2

Pablo Tesalónicamo tájinafue

¹ Amatai, naui ómoido cue illafue fia táinomo baíñede, dani áfena ñue onódiomoiza.

2 Afe cue billa úcodo Filipos jofue comini caina báifnota duere caina finódiaioi. Mei íadi Juziñamui cai cánuamona afe ñue jllonafue uáfodo jacíruiñeno ómoimo jino lloticue, jáímaci caina uáitaoidiaioi íadi. Afena onódiomoi.

3 Cai comeci jífueinamona ómoimo cai llogáfuiyai lloñédicai. Daje izói fieni ómoína maméñedicai. Daje izói ómoína jífueacañedicai.

4 Omoimo cai llogafue jáífodo joide. Cai fígomieillena Juziñamui facátagamacidicai. Nue jllonafue uai Juziñamui ómoimo caina llotátate. Mei jira daíí ómoimo jino lloticai. Comini baímo Juziñamuina ióbitadicai, afémeie cai comeci ífuiyai eroille jira.

5 Ebírede uáillaído ómoína fia bífueñedicai. Afena onódiomoiza. Iemo fia úcube cai óllena táinofuiaina lloñédicai. Juziñamui bífueimo uai nabáiraimana afefue uáfuellena.

6 Comínina ñífueuiaina caímo nitátañedicai. Mei íadi omoi onódiomoiza; daje izói jáímaci onode, cai Cristo orécamacidicai. Afemona ocuilla riño caímo ite, omoi cai ocuillena. Aféfuemo ómoína izire cacáreitaredicai. Mei íadi afe izói ómoína ocuñedicai.

7 Jáífodo ómoína icíñeno fíaicana omoi cigímo llófueticai. Ua úrue ei úruiai comuítaja úiñua izói, ómoína dúecaillano izírúiticaí.

8 Omoína jamánomo izírúiticaí. Iemona Juziñamui lloga ñífue ómoimo llóllena ñue ja finóbídicaí. Afe baímo nana cai comeci ífuiyai ómoimo fecáacadicaí, ómoína iere cai izírúillamona.

9 Amatiai, nauí cai jitaica raa cai óllena izire cai táijina, uibídiomoi. Ua daíí riire cai níciduana áfemo uibíoidiomoi. Mona naio diga táijifiredicai ómoimona bu abina jafue fínoñeillena. Mei afe llezica Juziñamui lloga ñuera uai ómoimo jino lloticai. Afe uaina jai ínotimacidiomoi.

10 Jaca omoi uíecomo íaífuenino macádicaí. Daje izói buna jífueñeno macádicaí. Nana omoi Juziñamui diga áfemo uai nabáífirediomoi. Daíí buna caímo nífuena nitánidiaioi.

11 Mei illa dígamie omoi comécina náiretadicai, onódiomoiza. Daje izói úrue moo ie úruemo dúecaillano fíraja izói ómoína fíradicaí.

12 Juziñamui íeiena omoi maméinamona omoi jáícina nágarui ñue macállifue jítáirede. Afefue nauí ómoimo ocuídícue. Juziñamui ie náamataganona jíríte ie illáimana illánomo omoi jáillena, afe llezica Juziñamui ebírenafuena omoi onóllena.

13 Bífuerei iere Juziñamuina “Figora” daíífiredicai. Cáimona omoi cacana Juziñamui uai dibénedo, “Afe uai jiba come uai” daííñediomoi. Mei íadi aféuai illa izói, dama Juziñamui nahí uai jeire otíomoi. Afe Juziñamui uai ja omoi ínotino comécimo ñífueuiaina déjioicaide.

14 Amatiai, cácarei. Omoi comínimona duere omoi finóbiadi, jae judéamo ite Juziñamuimo gairídino izói ífcaidiomoi. Afémaci Jesucristomo daje izói jaináidiaioi; mei íadi íaioi éniemo ite judúaimona daje duere finóinafuemo duere zefuúdiaioi omoi zefuúlla izói.

15 Afe judúuai duere finódino cai Ocuíraima Jesuna fatíaioi. Jaiai ninomo daní íaioi Juziñamui uai jino llórainí fatíaioi. Afe judúuai dáarie jófuemona caina jino jíúdiaioi. Afémaci Juziñamuina ióbitañediaioi. Daje izói nana comínina uáitaoidiaioi.

16 Mei judíoñedinomo bifue cai llóiacaniadi caina rairuíacadiaioi. Daje izói aféfuemona afe judíoñedino jállollena, cai lloi dáii caina rairuíacadiaioi. Afe ícoinia íaioi fiénidífuiai aillo offoicaide. Mei íadi birui ícoimo aféfuiai ícoinia Juzíñamui íaioina jamánomo duere finode.

Pablo meine Tesalónica comini eróizaiacade

17 Amatíai, ómoimona nano nié dino oni jáidicai. Mei conímana cióñedicaí íadi ómoimo comeci facáoidicai. Afe jira izire ómoina cíozaiabiacadicaí.

18 Omoi illánomo cai jáillena mamériticai. Cue dama diga ícaíño iere jáiacadicue. Mei íadi naga cai jáiacanaruillaido Taiife llótaidogacai.

19 Mei ie jira ¿Minica mei cai úiñoigafuena? ¿Minica cai íobillafuena? ¿Minícamona cai caimátaillafue comuide? ¿Minícamona cai comeci zuitáinafue comuide? Mei cue llófuega Juzíñamui uaina ñue ínotiomoiza. Ie jira cai Ocuíraima Jesucristo billíruimo dani omoi, daa bie cai comeci íobillafuena.

20 Uáfueña, omoi cai comeci zuitáinafueña, cai cáimafue diga.

3

1 Mei jira afe baimo are cue úiñoñidicue. Ie jira benó Aténasmo dama cue illífuena mamériticue.

2 Afe llezica cai ama Timoteo ómoina eróizaitadicue. Afémie Juzíñamui ñue táijitagamie. Afémie cai diga Jesucristo ñúefue jino llúamo táijide. Omoi ínogafuemo ómoina ñue riire naire itátaite.

3 Lemona ómoimona buna baie duere omoi finóinamona omoi ínogafuena féitañede. Mei afe bie zúufuíaído duere cai finóbille jítáirede. Afena onódiomoiza.

4 Afe emódomo nauí ómoiri cai illa llezica afe duere cai zefuúllifue ómoimo llotícaí. Afe daíí ómoimo ja íficaide. Ja onódiomoiza.

5 Ie jira áfena ja iere cue ocuñenamona, omoi ínogafuedo mácajana jicánotadicue. Mei Taiife ómoina fiénidífuemo baítate izóinamona cue comeci jacíruioide. Daíí cai táijina táinomoo jifánofide izoide.

6 Mei íadi ja birui Timoteo Tesalónicamona meine dúcide. Afémie ñue omoi ínuafue izíruillafue diga cai lluííbite. Caina izíruillano caimo omoi uibíoinafue Timoteo lluííbite. Ie mei ómoina cai cíocana izói caina iere cíocadiomoi; daíí Timoteo caimo lluííbite.

7 Lemona aillo duere cai finóinafue illa llezica omoi ínogafuedo ñue jaícina omoi mácajana fidídicue. Aferi cai comeci iere ñue fírazite.

8 Cai Ocuíraimamo ja birui ñue jaináidiomoi. Afena cai onónamona caimo cómfueña comuide.

9 Ua ómoiri iere íobidicai. Juzíñamui uíécomo caina iere íobitadiomoi. Afe aillo cáimafueri Juzíñamuina íbana “Iere figura” fáicanocaiñeno daííredicai.

10 Mona naio diga conima uíécomo eróicana ómoimo cai úrillena Juzíñamuimo izire jicádicaí. Afe llezica omoi ínogafuemona nai fiévide uai jaícina cai fuitállena Juzíñamuimo jicádicaí.

11 Omoi cai eróizaillena daa cai Moo Juzíñamui naa cai Ocuíraima Jesucrístorí cai canóllena jítáidicaí.

12 Omoi ínogafue oni móonaillena cai Ocuíraimamo jicádicue. Afe izói conímana omoi izíruillena jicádicue; daje izói naa jíáimaciaíri. Omoina cai izíruilla izói mai nana jíáimacina omoi izíruiri.

13 Omoi comeci jaícina jóonellena jicádícue. Daje izóí cai Moo Juzíñamui uíécomo omoi nífuenillena ñue finócafue jicádícue. Iemona cai Ocuíraíma Jesús billíruimo méairuñeitiomoi. Aféruimo nana íemo jaináidino afémie diga bené biite.

4

Juzíñamui ióbitade illafue

1 Cue ámatiai, omoi cácarei. Birui cai Ocuíraíma Jesús mámeccido izire ómoimo jicádícue. Daje izóí izire ómoína llétaitícue; naui ómoimo cai lloga Juzíñamui ióbilla illafue daíí omoi iri. Aféfuena afe emódomo aillo omoi móonaitaocairi.

2 Cai Ocuíraíma Jesús ríífuedo ómoimo lloga llétafuena onódiomoi.

3 Juzíñamui dama ie nabaina finócamacina omoi jáillena afémie jítaide. Ie jira nana omoi jiruífueño iri. Dama nahí ai diga illa figona.

4 Ua Juzíñamui eróicana áireri. Afengo ua mei íena jámairuífueño íena o izírui.

5 Juzíñamui onóñedino fia íaioi comeci fienu óiacanafuedo áirenaza, mei íadi afe izóí omoi íñeno iri.

6 Daje izóí izire ómoína dáitícue, o abí come ie áina jífueta bairóñeno o iri. Daje izóí o abí come ie ínina jífueta meríñeno o iri. Afe bie izóí itínona cai Ocuíraíma Jesús, afémacina iere duere fínoite, ómoimo cai llua izóí.

7 Juzíñamui íaífuenidíno nágari cai íllena caína ocuide. Afe daíí ie nabaina finócamacina cai íllena ocuide.

8 Ie jira bie llogafue jámairuítimie jiba cómena jámairuífedeza; mei íadi Juzíñamuina jámairuite. Daje Juzíñamui ie Ñuera Joreño caimo fecaca. Afe bie Ñuera Joréñodo Juzíñamui íeiena caína ñue finode. (Afémie íena ñue finódogacai.)

9 Juzíñamui ómoína llófuite conímana omoi izírui llena. Ie jira jíáie ámatiaína omoi izírui llene cue llóllena jítaínide.

10 Mei jíí, afe daíí nana Macedonia éniemo ite ámatiaína ñue izírui tiomoi. Mei íadi omoi izírui llafue aillo móonaioicallena izire jicádícue.

11 Caimare ñue illáfuemo mai riire omoi iri. Daje izóí dani omoi nícidogafuía; izire omoi llínori. Naui omoi cai llua izóí mai ñue izire omoi táijiri.

12 Afemona oníñemaci omoi uáillaimo ñue cacáritiaioi. Afe llezica omoi ñue táijnamona minícana jítaíñeitiomoi.

Cai Ocuíraíma billafue

13 Amatai, tíidino íficaillafuena omoi onóñenana jítaíñedicue. Aféfuena omoi fídíadi zúucaíñeitiomoi. Jáie cáallfuemo comécíñedino zuure jíitiaioi.

14 Afe Jesús tíillano meine abído cáanafuemo cai ínua izóí, afe daje izóí Juzíñamuimo ínotino tíidiaioi íadi, Jesucrístodo Juzíñamui íaioi cáatallífuemo ínoticai.

15 Ie jira cai Ocuíraíma cai llófueinafue ómoimo llóitícue. Afémie billíruimo cáimona cáadimaci tíidimacimona uícoficaiñeíticai.

16 Mei dama cai Ocuíraíma riire ocuille uaido úrica monámona ana biite. Afe llezica Juzíñamui abí imaci illaíma uai cáacaite. Daje llezica Juzíñamui fícirede vudugoi cáacaite. Iemona Jesucrístomo ínotino tíidimaci nano fueñe cáaitaioi.

¹⁷ Afe mei aféruimo caade ínnotino afe cáataga tíidino diga daane úillie cígimo itábicaíticai. Ua dínomo nana dáanomo itábicaíticai, cai Ocuíraíma Jesucristo diga caifo táifomo cai cíozaillena. Afemona cai Ocuíraíma diga jaca ua ninomo zíñona íiticai.

¹⁸ Ie jira bíuaido conímana caímare omoi fírari.

5

¹ Mei íadi afe íirairuillaído cue ómoímo cuelle jítáinide.

² Afe afémie billíruína ñue onódiomoíza. Omoi due jiza úíñoillíruimo cai Ocuíraíma dúciite onódiomoíza. Ua merírizaíbitimie naío billa izóí biite.

³ “Comecí ñue uái illafue nana caímo ite. Cai jacíruillafue íñede,” comíni daína llezica niné íaíoí táinocaíllifue ónonino íaíoímo raire zúite. Ua ringo úrue jocócana llezica ero izírena izóí, afe táinocaíllifue íaíoímo zúite. Afemona jaca buna oni jíllonide.

⁴ Mei íadi, ámatíai, omoi cácarei. Jítifomo íñédiomoíza, cai Ocuíraíma bíllemo jácicaíñeítíomoíza. Ua, meríriraíma jacínailla izóí jácicaíñeítíomoíza.

⁵ Mei nana omoi úzefomo jáináidinodiomoí. Daje izóí monánemacídíomoí. Naío imáciñedicai; daje izóí jítifo imáciñedicai.

⁶ Ie jira jaca ínínidimacídícai jáímaci ínia izóí. Afe jira cai abina ñue onónafuedo cáaoiredícai.

⁷ Ínidino jaca naío índiaíoí. Jífaífredíno jaca naío jífaífrediaíoí.

⁸ Mei íadi monánemacína cai íllamona abína ñue cai onónafuedo cai íllana jítáirede. Jesumo cai ínuaíufuedo abina dani ríidoredícai. Daje izóí jáímána cai izírúillafuedo abina dani ríidoredícai. Ua fuíríraíma íe jogóbemo jítaca llojécodo íe abí ríidua izóí, afe izóí bífuíaido dani cai abina ríidoredícai. Afe jáífue, cai jíllóillemo cai úíñoínafue ua ífomo jítaca ríidua llojeco izoide. Afedo fuíríraíma íe ífona ríidote.

⁹ Mei cai duere finóbillena Juzíñamui caína maméñede. Mei íadi cai Ocuíraíma Jesucristodo jíllonafuemo cai dúcinana Juzíñamui caína mamede.

¹⁰ Jesucristo cairi tíide daane afémie diga cai íllena; ua daje izóí cai caadi cai tíiadi, afémie diga íticai.

¹¹ Ie jira uáillaído conímana omoi náiretari. Afe izóí mai dani omoi comeci ríiretari. Ja birui afe bifue omoi finua izóí, baímo omoi finóoicairi.

Pablo ámatíai cámafuedo lletade

¹² Amatíai, omoi cígimo Juzíñamui uáillaído táíjidino mai uaimo ñue omoi cacáreiri. Daí izire jícadícue. Mei afémaci cai Ocuíraíma Jesucristo uai ómoína jeire otátatiaíoí. Jesucristo mámecido ómoína lletádiaíoí.

¹³ Íaíoí caímo táíjinamona, íaíoí dánana ñue cai cacáreíllena jítáirede. Daje izóí íaíoína cai izírúillena jítáirede. Coníma comécína omoi jacírúíñeno íri.

¹⁴ Daje izóí, ámatíai, ómoímo jáíie uai jóonenocaidícue: Afe uailai daíí bie izóí íte. Táíjiacañedinomo íaíoí táíjílleza ríire omoi lloíri. Comécína náínidínona mai omoi náiretari. Juzíñamui uai como jabo ínnotinona mai omoi canori íere íaíoí ínollena. Naga cómemo o comejí járidoñeno mai omoi úriri.

¹⁵ Dámie fiéní omoi finóadi afe íba úamona abí omoi rairuirí. Mei abído dájeicana jíáífodo ñue omoi finorí. Conímamo ñue omoi finorí. Afe omoi finóllí fue izire omoi jenorí. Daje izóí nana jíáímíaido ñue omoi finorí.

¹⁶ Jaca caímare omoi íri.

17 Fáinocaiñeno Juzíñamuimo úriri.

18 Nágarui ómoimo íficaide raana, mai Juzíñamuina “Figora” omoi daiíri. Mei Jesucrístomo ínotimacina cai íllamona, afe izói cai daiífirenana Juzíñamui óiacade.

19 Juzíñamui Ñuera Joreño cómemo úritallifuena rairuíñeno omoi iri.

20 Juzíñamui úritagamiiai llogáfueña jámairuíñeno omoi iri.

21 Nana daináfuiiai omoi facátari Juzíñamui llogafue iéniadi onóillena. Facátajamona ñúefuena jeire omoi oíri.

22 Nana figóñedifuemona mai oni omoi iri.

23 Ja birui Juzíñamuimo jicádicue. Juzíñamui cai comeci ñue uái illafue caimo fecáfiredé. Daje Juzíñamuimo, nana omoi ñue íeiena maméillena íemo jicádicue. Daje izói benómona cai Ocuíraíma Jesucristo bíllemo, Juzíñamui omoi joreño, omoi comeci, omoi abi diga, nana jaca íaidoñeno ñue úiñollena jicádicue.

24 Omoi Ocuíraíma Jesús dainana jaca oni jáíuaimo únide. Afémie nana bífuiaina dúcitaite.

Iraicaiño uáiduano ézicite

25 Amatiái, mai Juzíñamuido caimo omoi jicáfíreiri.

26 Ñue cáimaduano nana ámatiai omoi uáidori.

27 Cai Ocuíraíma ríífuedo ómoimo uai jónonocaidicue bie ciegabe nana ámatiaimo jino omoi facádollena.

28 Cai Ocuíraíma Jesucristo ómoína ñue ézicíteza. Jae ñie. Mai, daiítadeza.

MÉIFODO SAN PABLO TESALONICA IMÁCIIMO ORÉCABE

Segunda Carta del Apóstol San Pablo a los Tesalonicenses

Tesalónicamo ite Juzíñamuimo ñnotimacimo Pablo ie nabáññiari rabe cuetiaioi

¹ Cue Páblodicue. Bie rabe Tesalónica jófuego ite Juzíñamuimo gairide amatiaimo cueticue. Benó cue diga ite cue nabai ñaillinoi Silvano Timoteo diga dáabemo cai uai cueticue. Cai Moo Juzíñamuimo jaináidiomoi. Daje izói cai Ocuíraima Jesucristomo jaináidiomoi.

² Ñue cai Moo Juzíñamui ézicigafuiaimo omoi iri. Daje izói Juzíñamui fecaca comeci ñue uái illáfuego omoi iri. Cai Ocuíraima Jesucristo fecaca ézicigafuego daje izói caimare omoi iri, ie comeci ñue uái illafue diga.

Jesucristo billa llezica, Juzíñamui éniemo ite fiénidinona duere finoite

³ Amatiai, ómoiri Juzíñamuina “Iere figura” daiñfiredicai. Daiñ ómoina cai daiññifue ñue jaícina jóide, omoi ñnogafue oni aillo móonaioicailla jira. Dani conñmaiaina jamánomo ñue izíruioicaidiomoi. Iemona áferi Juzíñamuina “Aillo figura” daiñfiredicai.

⁴ Ua omoi iere ñnogafue jiáie Juzíñamuimo gairídinomo aféfuerei ióbioicana úriticai. Jiáimaci, Jesumo ñnoñedino, jacire omoi duere finóllena racádiaioi. Mei íadi afe duere omoi zéfuillafue cígiri, ñue comeci jaríreiñenafue jino cíotatiomoi naa ñue omoi ñnogafuiairi.

⁵ Ja duere finótagamacidiomoi, mei íadi Juzíñamui ómoimo ñue coméciide ie illáimana illíruimo ñue ññfuenino omoi dúcillena. Bífuemona Juzíñamui jicánuafe ñue jaícina jóinana jino náiraimo cíotate. Afe Juzíñamui illáimana illíruído duere finócaomoi.

⁶ Mei Juzíñamui ñue jaícina finódime, omoi duere finódino ibana duere íaioina finótallena.

⁷ Ua cai izói duere finócamacidiomoi, mei íadi Juzíñamui cai izói ómoina caimare ocózinaitaite. Ua cai Ocuíraima Jesucristo bíniemo cíocalliruimo, afémie caina caimare ocózinaitaite. Aféruimo afémie ie jamánomo riñrede abi imáciri monámona cíocaitaite; ua réiciai izoide cígido cíocaitaioi.

⁸ Juzíñamuina onócañedino Jesucristo íaioina duere finótaibite. Daje izói cai Ocuíraima Jesucristo ññefuena jeire óiacañedino duere finótaibite.

⁹ Nana afe fiénidimacina jaca ninomo jilloñoeno duere íaioina finótaite. Ua cai Ocuíraima uiecomona jica ninomo dótaite. Afémie ebire illánomona jica ninomo íitiaioi. Ie ríinona ónoñeitiaioi.

¹⁰ Aféruído Jesucristomo jaináidino íena “Iere figomie” dáitiaioi. Daje izói nana ie uaimo ñnotino íena caimare ióbitaite. Ja ómoimo cai llogáfueña ñue ñnotiomoiza.

¹¹ Bífue jira ómoiri Juzíñamuimo comeci úrifiredicai. Omoi ññfuenino illafue Juzíñamuimo jicáfiredicai, Jesucristo jñrigamacina omoi illa jira. Daje izói nana omoi comeci jitaina ñue illifue, ñue ícoimo Juzíñamui ríinodo fuitállena

jićádicaí. Afe izóí Juziñamui uai omoí jeire úamona finócafuiaí fuitállena Moo Juziñamuimo jićádicaí.

¹² Bífuemona cai Ocuíraíma Jesucristo mámecei omoí nícidogafuedo ñue caimare úibicaitaite. Afe íbana cai Moo Juziñamui cai Ocuíraíma Jesucristo diga ómoína izíruillamona ñúefuiaí ómoímo nítaite.

2

Iere fiénidifuiaina oruídímie billífue

¹⁻² Amatíai, birui jae cai Ocuíraíma Jesucristo billífueña ómoína nauí cue fidítagafue emódomo uai nabáiacadicue. Afe izóí afémiemo dáanomo cai gairíllífue emódomo ja ómoímo llóiacadicue. Dáarie taino llotino cai Ocuíraíma billirui ja dúcidez daidíaiói. Afemona omoí comécinafuena raire jiáifodo meidoñellena izire jićádicaí. Daje izóí jiáie taino llogafue ite. Afe taino llotino daífirediaíói:

—Cai llogafue Juziñamui Joréñomona oga. Cristo ja bíteza, —daidíaiói; mei íadí aféfuere jacínaiñeno omoí iri. Afe izóí omoí cacana fia júfidogafueri jacínaiñeno omoí iri. Ie emódomo nie rabe omoí llínoia cai úrilla izóidíbe, aféberi jacínaiñeno omoí iri.

³ Niémona táinofuemo jífuefiñeno abí omoí rairuirí. Ua Jesucristo billa uícodo, Juziñamuina comíni uáitallífue uícodo cómuite. Aféruillaido iere fiénidifuiaina oruídímie cíocaite. Afémie dama nine táinocaille. Daí Juziñamui íena mamede.

⁴ Bímie Juziñamuina bacáuairédímie. Nana Juziñamuido mameca ráaniaína bímie uáitano niné táinocaitabite; daje izóí nana Juziñamuimo caimátainóna anáfenuabite naa jiáie caimátaiilla ráaniairi. Afémie Juziñamuimo gairíracomo, afeco naama Juziñamui izóí, ráinazaibite. Dámie “Cue bie Juziñamuidícue” daílle.

⁵ ¿Nauí omoí diga cue illa llezica bifue ómoímo llotícue, íadí aféfuemo úibicaiñeómoí?

⁶ Afe fiénidifuiairedímie nai bíñeillena jizilla raana onódiómoí. Afémie billirui raire cíocaiñellena Ñuera Joreño nai rairuide.

⁷ Afe jiáínomo lloñega fiene illa maméinafue bie éniemo ja comuide. Aféfuena rairuídímie cai cígimona oni ógana fiénidifuiái jamánomo jebuíoicaite.

⁸ Aféfuena rairuídímie oni ollíruimo afe jamánamo íáibadímie cíocaite. Iemo cai Ocuíraíma Jesús ana billano, ie fuemo ite faidórafuedo afe íáibadímiena títaite. Ua ie billa meáirenado afémiena niné táinocaitaite.

⁹ Afe jamánomo fiénidímie Taife táijinafuedo bite. Aillo íemo ite ríino ácataite. Afedo aillo cíórainina uaido finoca ráaniaído táinona jífueite naa jiáie taino onótate ráaniai diga.

¹⁰ Iemona afe íáiba naga fiénidifuiáido niné táinocaitallimacina jífueite. Jae niné táinocaitallimaci, Juziñamui ua ñúefuena jeire óiacañedino jaca jíllóñeitiaíói.

¹¹ Afe jira Juziñamui íaiói fiénidífue ínuamona íaióina íáibado jífuetaitaite. Daje izóí táinofuiaina íaióina ínotaite.

¹² Mei fiénidifuiái Juziñamuina ñúefue baímo íaiói gáinamona, Juziñamui íaióina duere finótaitaite.

¹³ Mei cai benómona jaca ómoiri Juziñamuina “Iere figura” daiífiredicai. Jae cai Ocuíraima izíruiga daje ámatiaidicai. Jaca jae nanómona Juziñamui jilloillena nizécamacidiomoi. Mei ua ñúefue omoi jeire úamona Juziñamui ómoína nizede. Daje izói caina ñúeitae Joréñodo Juziñamui ómoína nizede.

¹⁴ Afe jira cai ómoimo lloga ñuera jllona uaido Juziñamui ómoína jírrite, cai Ocuíraima Jesucristo illa ebíredifue dibénemo omoi illena.

¹⁵ Amatai, mai bífuemo jaícina omoi coméciri. Omoi cígiri dama cue llogáfuiaina, ie emódomo nana rabedo ómoimo cue cuegáuaina féitañeno omoi iri.

¹⁶⁻¹⁷ Mai birui cai Ocuíraima Jesucristo cai Moo Juziñamui diga omoi comeci caimare náiretari. Mei jira cai Moo Juziñamui ie comeci cáimafuedo caina izíruite. Afe llezica afémie cai comeci zúurenafue cáimafuena méidofirede jaca ñinomo caimare cai illena. Daje izói Juziñamuido ñue cai illifue cai úiñoillena afémie caimo jino llote. Afe izói omoi comeci jaícina Juziñamuimo jóillena jicádicue. Afemona bie nana ñúefuiái daiírediomoi. Daje llezica afe ñúefuiái jino comínimo ácatarediomoi.

3

“Cairi Juziñamuimo omoi jicari”

¹ Amatai, íraifue ómoimo llotícueza. Cairi Juziñamuimo omoi jicari, cai Ocuíraima llogáuái náragobiaido raire dúciiteza. Afe emodo aféuai omoi jeire ua izói, afémaci jeire ólleza.

² Juziñamuimo mai jiáifodo omoi jicari. Bie íairede fiénidino cígimona cai zúitailleza, mai Juziñamuimo omoi jicari. Mei nana comínimona nai nana íinoñediaioiza.

³ Mei íadi cai Ocuíraima jaícina uafue llotímie. Afémie jiáino fiénidifue omoi báiiñeillena ómoína riire jaícina mozóide. Daje izói íaifuiaimona ómoína rairuíoide.

⁴ Cai Ocuíraima ñue ínogamie ícoínia, nauí ómoimo cai ocuífuiái jeire omoi úana ñue onódicai. Iemona daje izói aféfuiaína uire nágaruillaído jeire omoi óllena ñue onódicai.

⁵ Mai cai Ocuíraima ómoína cánoiteza, Juziñamui ómoína izíruillafuena omoi onóillena. Daje izói Cristo comeci járidoñenafue ómoimo íllena jicádicue.

Naga come dani íaioi tájinamo tájirede

⁶ Amatai, birui cai Ocuíraima Jesucristo mámedido ómoína ocuídicai. Naga tájiacañede ámamona oni omoi iri, mei afémie ómoimo cai llogáfuiái afe dibéfuemo íacañedeza,

⁷ Mei nauí omoi cígiri ómoimo cai cíotaga tájina izói, afe izói omoi íllena onódiomoi. Cai omoi cígiri fia tájijíñeno íñédicai.

⁸ Daje izói omoi güíllena íbáñeno fia güíñédicai. Mei jiáifodo mona naio diga ocózinaíñeno tájifiredicai, ómoimona daa cómena cai llégitañeillena.

⁹ Ua afe omoi caina canolle daií cai jicalle riino caimo ite, mei íadi tájifiredicai ñue illáfueña ómoimo fidítallena, bie ómoimo cue cíotagafue izói omoi íllena.

¹⁰ Nauí omoi cígiri cai illa llezica, bie lletara uai ómoimo lloticai: Tájiacañedimie jaca güíñeiteza.

¹¹ Mei jíáimaci caimo llotíaiói ómoimona dáarie táijíñediaíoi. Táijíñeno fia illa llezica jíáie comini illáfuiáimo afémaci gágutajifirediaíoi.

¹² Afe daíí ite comínina cai Ocuíraíma Jesucristo rínodo ocuídicaí. Afe llezica íaíoiina riire daídicaí: Mai ní fue lloñeno omoi táijíiri dani omoi jitaica ráaniaí omoi ólleza, daídicaí.

¹³ Amatiaí, omoi jetaca ñuera raana zefuíruíñeno omoi ñedóicairi.

¹⁴ Ninó dámie bie rabelo cai daínáuaina jeire oñéniadi, bu mei afe uaina íinoñedimienaza mai mei omoi eróiri íena onóillena. Ie mei afe cómemona ifo oni omoi fáinocairi, ie meáidailleza.

¹⁵ Mei íadi afémiena uáiogai ímiena maméñeno omoi iri. Afémie ama izói ñue omoi llófuéri.

Iraicaiño Pablo afémaci caimare uáidonocaillafue

¹⁶ Mai cai comeci ñue uái illafue llófirede Jesús, nágaruillaído, íemo náganuiáído afe comeci ñue uái illáfuena ómoimo llóíteza. Afe izói cai Ocuíraíma ómoína nabáífireíteza.

¹⁷ Mai, cue Páblodicue. Bie uáidua uai dama cue ónoído cueticue; bie cueticue cue mámecí diga. Nana cue cuezábiaímo daíí jónefiredicue. Bie izói cúefiredicue.

¹⁸ Cai Ocuíraíma Jesucristo ézicigafuemo íitiomoíza. Jae níie. Ja daítadeza.

NANOIDE SAN PABLO TIMOTÉOMO ORÉCABE Primera Carta del Apóstol San Pablo a Timoteo

Pablo Timotéomo cuete

¹ Páblodicue. Jesucristo ocuícamedicue. Cai Jíllotaraïma Juzíñamui cai Ocuíraïma Jesucristo diga íaillinoi daina uaido orécacue. Afe Jesucristodo cai ñue illifue abí úíñoticue.

² Juzíñamui uai coco ñnogafuemo nahí cue jitó izóidío. Ie jira bibe omo cueticue. Cai Moo Juzíñamui ñemo ñue cai Ocuíraïma Jesucristo diga o ézicillena iere jitáidicue. Daje izóí afe íaillinoi omo dúecaillena jitáidicue. Iemona afe íaillinoi o comeci ñue uái illena óiacadicue.

Jíáimaci íaioi taino lluáfuiaido o jífueñeillena abí o rairuiri

³ Naui Macedóniamo cue jailla llezica Efeso jófuemo o fiébillena izire jicádicue. Aféruído afénomo o fiénocaidicue, afénomo itínuiamona dáarie taino llófuiana íaioina o rairuíllena.

⁴ Daje llezica íaioi jaiái ninomo lloga ráfuiái naa jagai diga, áfena íaioina júfidotañeitoza. Íaioi jaiáigima lloga fuiñede ráfuiái llúana ráruitioza. Nana bífuiái taino lluáfuiamó cai comécina uite. Mei íadi nana bífuiái Juzíñamui caimo jóonega ñemo cai ñnogafuena ñue ícoimo fuitáñede.

⁵ Juzíñamui caimo jóonega llujáillifue bie izóí joide: Illa dígamie conímana ñue izíruiredicái. Afe bie izíruilla íainide comécimona comuide. Daje izóí afe izíruilla comeci ñue úrillamona comuide; bie izíruilla afe izóí jíáimana jífueñede Juzíñamuimo ñnogafuemona comuide.

⁶ Bie ñue izíruillafue dibénemona dáarie oni táifodo jáidiaioi. Afe taino llua íínota oni jíáfodo féiraitaioi.

⁷ Afémaci Juzíñamui lletara uai llófuetinona jáiacadiaioi, mei íadi dani íaioi daina uaina onóñediaioi. Iocire llófuetiaioi íadi íaioi llócaiga uaina ñue baitáñediaioi.

⁸ Juzíñamui lloga lletara uai ññeraza onódicái. Bíuaido Juzíñamui naga come lletállena mamérite. Dámie Juzíñamui mamérilla izóí afe uaimo comécíadi ññera.

⁹ Afe lletara uai ja ññefuiái finóñiredinomo llóñega. Afena ñue onódicái. Mei jíáfodo fiénide comínimo mameca. Bie izoide comínimo Juzíñamui lletara uai dúide. Afe comíni illaïma lloga uaina uáitafirediaioi. Ocuícana náfueñediaioi. Fiénidífueña finóñediaioi. Daje izóí fiéniruidinona itíaioi. Afe izóí Juzíñamuina jacíruiñediaioi. Daje izóí Juzíñamuimo ñnogafuemo náfueñediaioi. Iemo Juzíñamui lletara uai, moo ei diga fatínomo dúide. Daje izóí comínina titáfiredinomo dúide.

¹⁰ Afémaci naga ringomo fieni comeci fácajano íaire finóñediaioi, afémaci áirediaioi íadi. Daje izóí jíáie ímana íaire finódiaioi. Juzíñamui lletara uai nana bie izoide comínimo dúide. Daje izóí cómena llaítádinomo dúide. Táinona úrifiredinomo dúide. Daje izóí uafue daíllena táinomo Juzíñamui mámece llíñotinomo dúide. Iemo Juzíñamui lletara uai nana jíáfodo jífueñede llófuiafuena uáitafiredinomo dúide.

11 Afe bie jáimacina jífueñede llófueinafue Juzíñamui cuemo llogafue daje izói jóoide. Juzíñamui cuemo lloga uai nana comini ñue jillona uai. Afe uai oni cominimo cue llujillena, iere ñuera Juzíñamui jóonegacue.

Juzíñamui cuena dúecaillari iere figura daidicue

12 Cai Ocuíraima Jesucrístona “Figora” daidicue, mei afémie ie uai jino cue llujille riinona cuemo ígaza. Juzíñamui cuemo comécido facade: O táijinana fáicanocaiñeno ñue fuitáfiredio, daide. Jira bie uai llujille táijillena Juzíñamui cuemo jóonete.

13 Jaiai uiécode Juzíñamuina íaire daífiredicue. Daje izói íemo ínotinona duere finóllena racáfiredicue. Afe llezica cue uaido Juzíñamuina icídicue. Bífuiaido Juzíñamuina duere finódicue íadi, ja birui afe Juzíñamui nana bie ñufuiyai cuemo jóonete. Jaiai aféruillaído ie uaimo cue íinoñena jira Juzíñamui iere cuemo dúecaide. Daje izói cue fínuafue cue onóñena jira cuemo dúecaide.

14 Iemona cai Ocuíraima iere ñue cuena ézicite. Daje llezica Cristo Jesumo dájena cai jaináinado aillo íemo ínogafue naa ie izíruillafue diga caimo comuide.

15 Bie izóidifue iere uafue. Nana afemo ínoredicai. Bífue bie izói daide: Cristo Jesús fiénidino jillotallena ana bíniemo bite. Afe fiénidinomona cue iere jamánomoina.

16 Mei daí íticue íadi Juzíñamui iere cuemo dúecaide. Are íllamona Juzíñamui cuemo dúecaillado náiraimo Jesucristo ie ñue comeci mánaínafue cuedo jino íaioimo cíotate. Iemona cominimo ñufuiyai ja cíotatimíena jáidicue, mei fiénidifuiairede Páblodicuemo Juzíñamui iere dúecaideza. Jesumo cue ínuamona cue comeci ífueña méidotícue. Afena onóíllamona nana zíñona íllifue óiacadino, cue comeci ífue méidua izói, afe izói afémaci afémiemo ínota íaioi comeci ífue ñufueña méidoítiaoi.

17 Ie jira jaca tíñede buna cíóñena Juzíñamuina íóbitaacadicaí. Afémie daade Juzíñamui, daje izói nana ráfuiaina onódímie. Afe zíñona Jamánomoidíllaimamo ñue ebírede uai jaca nágarui íemo jóoneticai. Daí jóoide.

18 Cue jító Timoteo, bifue omo jóoneticue. Riire fuirídímie izói o iri. Naui Juzíñamui mámecido odo úritino, ñue o íllifue llotíaioi. Afémaci daína izói mai birui o íñori. O comeci úrillafue ñue o jóoneri.

19 Dámierie íaioi comeci úrillafueña náfueñenamona nocáe buíllamona táinocaila izói, íaioi ínogafuemona oni táinocaidiaioi.

20 Himenéomo Alejandro diga afe izói comuide. Ie jira afe íaillinoi Taífemo izájidicue, Taife anamo íaillinoi daí zefuíllena. Dinomo Juzíñamui jánana úríñeíllena ónoítiaillinoi.

2

Juzíñamuimo cai úrilla llufue

1 Fueñe ona dáitícue: Mai nana comini íena Juzíñamuimo o jicáfireiri. Afena Juzíñamuimo ínotinona o lloiri. Iemo jái, izire cominimo ie dúecaíllena mai jicari. Daí nana comini íena Juzíñamuimo o úrífereiri. Afe llezica nana comínido afémíena iere figura o daífireiri. Daí féitañeno nana comínido Juzíñamuimo ñue úrífereiri.

² Gobierno oreca omoi úiñotimie íena Juzíñamuimo jicáredio, naa jíáie jaboide illaíni diga. Afémaci íena izire o jicari, áfedo nífunenino caimare cai íllena. Daje izói comeci ñue uái illáfuemo íredicai. Afe daí cai jícamona nana cai illáfuena Juzíñamuimo ñue mámeiticai. Daje izói conima diga comécina ñúeiticai.

³ Bífue iere ñuera, cai jíllotafirede Juzíñamuina ñue íóbitade.

⁴ Mei afémie comeci jítaínafue nana comínina jíllóiri, daide. Daje izói afémacina ua ráfuena onóiri, daide.

⁵ Cai Juzíñamui jaca dáadeza. Daje izói Juzíñamui eróicana caina ñue finódimie caido úritimie daide. Afémie Jesucristo. Afémie íaifuenidimie íadi, cai izóidimie.

⁶ Juzíñamui mamécaruimo dúciamona Jesucristo ie abina éeruíñeno nana cai jíllóillino íbana izájiga.

⁷ Iemona nana judíoñedinomo afe Juzíñamuimo ínnolle ua ñúefue cue llófuiaillena orécacue. Daí jíllona uai llujífiredimiena jónegacue. Crísto mo cue ínuamona tánofue lloñédicueza, uafue lloticue.

⁸ Ie jira nágagobiaido naga cómena: Juzíñamuimo omoi úrifíreiri, daidicue. Ñue nífunenide comécido omoi jicari. Jáímamo ráicaiñeno comécido Juzíñamuimo omoi úriri. Daje izói dani ómoímo júfidoñeno comécido íemo omoi jicáfireiri.

⁹ Daje izói ringóniai iníroi jítaíllifue llóiticue. Jabóidingo ringo jíta izói, naga ringo jítaíteza. Íma jíruídollena jíta abina cóitate iníroina, jítaíñeno íri. Daje izói comíni códollena ífótírai jamánomo ebire finóñeno íri. Jabo ífo jua figona. Daje izói quenírede raana allo jíroñeno íri, naa jamánomo ráífide iníroi diga. Jámaicuro jítaóirena.

¹⁰ Mei jíáífodo comínimo dúecailla ñúefuíaído naga ringo finóbiri, naa jíáie caimare uáiduafuiai diga. Mei nana Juzíñamui íeíena ñue finódogango bie izói íteza.

¹¹ Ringóniai llófueinamo uai oñeno cacáreitiaíoi. Comeci mánainafuedo afe uaina onócaítiaíoi.

¹² Nairai cigiri ringo llófuellena rairuídicue. Ringo ímana anáfenotañedicue. Mei jíáífodo, ringo íma anamo úriñeno uái íri, daidicue.

¹³ Mei Juzíñamui nano fueñe Adán finódeza, afe méifomo Eva finode.

¹⁴ Adán jífueñega, mei íadi ringo Taife jífuega. Íemo jífuefillamona afengo fíenidífue mo baíide.

¹⁵ Mei íadi naga ringo Juzíñamuimo ínogafuemo jeire oíadi, íemo ei ocuífufuiai ñue ícoimo fuitáadi afengo jíllóite. Afe llezica afengo naga cómena izíruirede. Íemo comeci ñue fínuafue díbenemo írede. Daje izói ñue jáicina macállífue mo írede.

3

Ocuídillaímo jítaírede ñue illafue Pablo llote

¹ Ja cue llóllifue iere ua rafue. Dámie ocuídillaímana jáiacade ñuera. Afe izói tájíacanafue ñuera.

² Ie jira afe izoide ócuitillaíma mamécámie jáicina ñue írede. Afémie nífunenino macárede. Afe daí afémie mácafue jáímie lletánide. Afémie daango ótena figura. Ménango ónide. Afémie comínimo lloga uaido jífánodoinide. Daje

izói ráfuenta ñue baitádimiena írede. Naga come afémiena caimare jacíruirede. Daje izói nana afémiemo mácaibitínona afémie jíáfodo comécíñeno ñue caimare uáidorede. Iemo jíáimacina caimare llófuerede.

³ Afémie jaca jífáinide. Daje izói afémie fuirínide. Come jífuiamona oga úcubena, afémie lláinonide. Mei jíáfodo jeruíñeno raana fecáfírede. Iemo comeci ñue uái illafue dibénemo írede. “Aillo úcubena cue olli” daíñide.

⁴ Dama ie jofa ero comíni ñue ocúrede. Dama ie úrue ñue raire cacáfírellena lletárede. Daje izói ie úrue jíáie eicomínina ñue jacíruitarede.

⁵ Dámie ie jofona ocuállana óñoñeniadi, ¿mei nie izói Juzíñamuimo gairíracona ócuite? ¡Ocuñide!

⁶ Ie jira como fueñe Juzíñamuimo ínotímie, Juzíñamui ico ocuídillaímana ínide. Como fueñe Juzíñamuimo jaináitagamie raire illáimana jóoniamona afémie iere abina ínoite. Iemo fienu abí ínuamona, Juzíñamui Taife ana duere finóllífuemo dótaja izói, afe izói bímie daí zéfuite.

⁷ Afe Juzíñamui ico ocuídillaímana ñue jacíruigamiena írede. Afémie daí illamona, Crísto mo nai íñoñedíno ñue íena úritiaíoi; ie jánana fienu úrinidiaíoi. Afémie afe izói írede, meáfue dibénemo ie íñeillena; daje izói Taife uai íena jíitañeillena.

Jabóidillainimo jítaírede ñue illafue

⁸ Daje izói comíni dinena nana jabóidillaini ñue jacíruiganona írediaíoi. Daje izói ie úrilla uai jíáfodo méidonide. Iemo afémie jífáinide. Daje izói come jífuiamona oga úcubena lláinonide.

⁹ Afe izói cai ínollena jino lloga ua ráfuenta afémie fáicanocaiñeno jeire órede. Daje llezica afémie comeci úrilla uai nífuenu írede.

¹⁰ Afémaci ñuera daíllena facátagamacina írediaíoi. Facata mei íaíoi nífuenia jabóidillainina írediaíoi.

¹¹ Daje izói aféllaini finódogango ñue jacíruigangona írediaíoi. Daje izói aféngotiai jíáimamo fiénidífuenta íaíoi mo llónidiaíoi. Iemo lloga uaido jíáimamo jífánodoinidiaíoi. Aféngotiai nana ocuica raana fáicanocaiñeno fuitárediaíoi.

¹² Afe jabóidillaini dáangona áiredena figura. Ménango ónide. Daje izói íaíoi úruiaína ñue ocúrede, naa íaíoi jofa ero comíniri.

¹³ Naga jabóidillaímana íaíoi táijiana ñue fuitádino ñúefuena otíaíoi. Comíni iere ñúefue íaíoi mo jóoneitiaíoi. Daje llezica íaíoi Crísto Jesumo ínogafuena jamánomo meáiruíñeno llórediaíoi.

Cai ínoga jaíai báinino llogafue ja jino uáfodo denode

¹⁴ Raire o érozaillena comécíidícue. Nai cue bíñena llezica, bibe omo cuetícue.

¹⁵ Mei nai are cue bíñena llezica, Juzíñamuimo jaináidímie jítaiga ñue illífuena o onóillena llóitícue. Afe Juzíñamuimo jaináidino caade Juzíñamuimo ínotino. Afémaci Juzíñamui ua ráfuenta ñue riire úíñotiaíoi. Jofa riire mozíoide jíállirai izóidiaíoi. Ie jira afe rafue uaina oni caitánide.

¹⁶ Jaíai báinino lloga cai ínogafue iere jamánomo ebírede; nana comíni ja uáfodo onoiga. Be níuui:

Juziñamui cai cígimo cómena jéiciaibite. Ñuera Joreño afémiedo úrite; daide: Bímie comécina jaícinaidímie, daide. Afémie Juziñamui abi imácimo ácatagamie. Diga náiraiaido ie illafue llócaide. Bíniero aillo comini íemo ñnotiaioi. Afe mei afémie caifo monamo abido uiga.

4

Juziñamuimo ñnogafuena féitaitino ifue

¹ Ñuera Joreño jino caimo uáfodo llote, írairuillaido dámierie íaioi ñnogafuena féitaitaioi. Féitajano cómena jífue je jóríai jítáinafuaia jeire óitiaioi. Daje izói Taifemo jainaide fiénide jóríaimona onóigafuemo ñnotiaioi.

² Afe izói, comeci ífueña jíáifo jóidino llógana cacáreitiaioi, naa táinona úrillafuaiairi. Afe bie jífuefiredino ja íaioi ifoci úrillafuena ja niné féideza. Uzírede llójédamo uzide onoi cacáñena izói, bie comini itíaioi.

³ Bie Juziñamuimo ñnogafuena féitate comini jíáimaci árenana rairuíaiaioi; daje izói ringona: “Ínreiri,” daíñediaioi. Daje izói ñuera cai güillemona dáarie: “Güñeno,” daidiaioi. Mei íadi afe bie güille Juziñamui comuítaga, íemo ñnotino ecállena, naa ññefuena onódinori. Afe güilleri íóbillano Juziñamuina “Íere figura” íemo jaináidino daírediaioi.

⁴ Mei nana Juziñamui finoca güille ñúeraza, bácanide. Iemona afémie caimo fecaca raana oni fáinidicai. Mei jíáfodo Juziñamuina “Íere figura” daínano, nana ñue llñoredicai.

⁵ Juziñamui uai afe güillena ñue finode. Daje izói íena figura cai daífirena afe cai güillena ñue finode.

Jesucristo ñue ocuícamié bie izói írede

⁶ Bífuaia cai ámatiaimo o llófueia Jesucristo ñue Ocuícamiéna íitio. Afe bie llófueinafue jeire o oía bie ñnofirega uai dama ñue ona comécina náretaite. O jeire oga uaido ñue riire íitio.

⁷ Mei íadi bie fiénide énie ie ráfuaia náfueñeno o iri, naa jíáie taino jagai izóidífuaiairi. Juziñamui illa izói o íacanamo áfemo nágarui o comeci líicitairi. Afedo riire íitioza.

⁸ Cai abi cai riireta, daa bínie ífueño caina canode. Mei jíáfodo Juziñamui illa izói íllena cai nícidoia naga ññefuemo caina canode. Daí cai íllemona biruúllaido caina canode, íemo daje izói uire bíitífueño jaca caina cánoite.

⁹ Bífue íere nahí ua ráfueza, nana áfemo ñnorediaioi nana cáioiri.

¹⁰ Afe bífue jira íere comeci fácaitaicai. Iemo áfemo zéfuidicai. Ua zegóruoicana ñéfidicai. Mei ñue cai íllena caade Juziñamuimo ocuírídicaiza. Afe caade Juziñamui nana comini jíllotaibite. Iemo ñnotino ja jíllotaimie.

¹¹ Bífuaiaido nana comini o ocuífieiri. Daje izói aféfuia o llófueiri.

¹² O fia jítócomena jira comini o llófuaifue jíáimana jámairuitañeno iri. Mei jíáfodo ñue Juziñamui izói illafue Juziñamuimo ñnotinomo jino cíotaitimieña íitioza. Ñue o úrillafuedo afémacina onótaitioza. Daje izói comini erócana ñue o mácafuedo íaioina onótaitioza. Iemo naga cómena ñue o izíruillado íaioina ñue cánoitioza. Cristo izói o íllamona ñue íaioina llétaitioza. Daje izói Juziñamuimo izire o ñnogafuedo llófueitioza, naa o comeci íainidífuaiairi.

¹³ Nai cue dúcñena llezica, Juziñamui cuela uailai comínimo o facadófireiri. Daje izói cai ámatiaina o íociretari. Afémacimo ñue o llófuefireiri.

¹⁴ Juzíñamui omo iga o fibíllafuiai fáicanocaiñeno o iri, mei nauí Juzíñamuimo gairífredino ocuídillaini Ñuera Joreño daina izói, íaioi onoi omo bitádiaioiza.

¹⁵ Bífuiaina fáicanocaiñeno o finófireiri, o jamánomo jiáino baimo íaioi onóilleza.

¹⁶ O illafue ñue abí o rairuiri, naa jiáino o llófuiafueri. Fáicanocaiñeno riire abí o mameri. Ñue ímana o comuilleza. Bie cue daina izói o íadi, o jíllotio, naa o uaimo cacáreidinori.

5

Crísto mo ñnotino uiécomo ñue o illifue

¹ Eicomemo lléjecaiñeno o iri. Mei jiáfodo o moomo o llófuia izói fáicana o lloíri. Jiáie jítócominina nahí o ama izói llófueiri.

² Ringóniaina jéengotiaína dama o ei izói llófueri. Daje izói jítáingotiaína nahí o miringo izói o llófueri. Iaióimo ñue comeci o facáfireiri.

³ Uáfueña raana jitaide fecíngotiaína ñue o canori.

⁴ Mei íadi jiáie jítorede daje izói enáizeñorede fecínguai ite. Afe úruiai íaioi éitiaína uzúngotiaína fueñe ñue úiñorediaioi. Daje izói nahí ie enáizeño dani íaioi uzúngona úicairediaioi, mei naga jító enáizeño diga íaioi móotiaína izíruirediaioiza. Afe bie izói illáfue mo Juzíñamui ñue ióbideza.

⁵ Ie mei cómenide ua fecingo, dango Juzíñamuimo ñue ie finóllifue ocúride. Daje izói Juzíñamuimo ie úrillafueña naio mona diga afengo fáicanocaiñede.

⁶ Dango ie comeci gaína izói fecingo ite. Caade íadi Juzíñamui dibénemo tíide izoide.

⁷ Bífuiaina íaioi o ocuiri, lletánidingotiaína íaioi ílleza.

⁸ Dámie ie nahí come úicaillana ráairuia ie ñnogafue táinomo jífánofide. Dama nahí comínimo ite duéredinona úicaiaañedimie, Juzíñamuimo ñnoñedino fiénina baimo, afémie fiénide.

⁹ Fecíngotiai íena mámece illabe finoitio. Bie izói ñuera fecíngotiai mámece afébemo cúerena. Sesenta fimona ite fecingo mámece cúerena. Afe bie fecíngotiai, daje izói dámienna iníredingona írediaioi. Afe ízoidingo mámece cúerena.

¹⁰ Iemo jiái ie illafue ñueinamona jalléidingo afengo mámece cúerena. Iemo jiái úruiai ñue comuitatingo mámece cúerena. Jicana jiáima ie jofomo dúcia caimare uáidofiredingo mámece cúerena. Iemo jiái Juzíñamuimo ñnotinomo rairuíñeno comeci mánainado canófredingo mámece afébemo jónerena. Mei afengo naga jiáima cánuana idai jócua izóidena caimare finófiredeza. Iemo jiái duere zefuide comini canófredingo mámece cúerena. Daje izói nana jiáie úíufuiai finódingo mámece jónerena. Bie izóidífuiai nana daje fecingo finórede; íemona afengo mámece cúerena.

¹¹ Mei íadi sesenta fimona jofófenemo ite fecingo mámece jóneñeno iri. Mei aféngotiaimona dáarie dani íaioi comeci óiacanamona nibai Crístona zóofeítiaioiza. Zóofiano nané meine iníreiacadiaioiza.

¹² Dái íaioi illa dani íaioi ícoinia dái ite. Mei fueñe íaioi Jesucrístodo jáillena mamérillafue ja fáicanocaidiaioiza.

¹³ Afe baimo naga comini jofodo jáicaidiaioi. Jáicaillamona, “Fia táijíñeno dái cue illi,” daidíaioi. Afe llezica jiáimana úridoicana jáidiaioi. Iaióimo dúíñede jiáimacimo itífuiaimo gágutajífírediaioi. Comínimo ñue íñedífuedo úrioífrediaioi.

14 Ie jira nai fecínaite jitáingona daidicue: Abido iníreiri. Iníreillano úruereiri. Daje izói jofo náangona ñue o iri, Taifemo jaináidino ómoína úridoñeilleza, daidicue.

15 Mei fecíngotiaimona dáarie, Juziñamuina féitano Taifedo jáidiaioiza.

16 Crístomo ñnotinomona daa cómemo úcaille fecíngo íadi, afe fecíngona dama afémie úcairede. Afe fecíngona Juziñamuimo gairífiredinona úcaitaño no iri. Mei afe gairífiredino ua cómenide fecíngotiaína úcairediaioiza.

17 Jesúmo gairidino ñue ocuide éicomini, ñue táijidiaioiza ménacaiño ibárediaioi. Daje izói ñue íaioi táijnamona mai caimare íaioina omoi jacírui. Iere comini ñue llófuetino, iere ñue lletádino diga jíáie come iba baimo ibárediaioi.

18 Mei Juziñamui Cuegáuai daide: “Arroz izoide trigo, juráreto gájirillena záiza llezica, áfemona íaioi gülleza fue ibáiño omoi iri.” Iemo jíáinomo jíáfodo daide: “Naga táijitagamie ie táijnado ñue ibárede.”

19 Fia da come ocuide éicomemo fiénidifue jóneiadi, áfena náfueño o iri. Mei íadi mena níbaí daámami uai nabáidimie afe izói afe cómemo llóíadi, áfemo cacáreiri.

20 Ocuide eicomínimona dáarie fiénidifue finóadi, nana comini eróicana afémiena o áadori, nana jíáie comini ñue abi jacínaificaillena.

21 Juziñamui eróicana, daje izói cai Ocuíraima Jesucristo eróicana bifue omo jóneticue. Daje izói Juziñamui nizeca ie abi imaci eróicana omo jóneiticue. Nana bie omo cue lloga lletara uai ñue o náfuere. Nana comínimo dájerize jáicina o lloiri. Dámie oni eneno mámeñeitioza.

22 Dámie ie illafue nai figo onóñena llezica, ocuídillaimana ie o maméllena raire íemo o onoi bitáño o iri. Bie izói o íllado jíámamo ite fiénidifuena raire nábaizaiñeitio. Naga íaifuiaimona oni o iri.

23 Mei o ero izírefireia daa jáinoi jiróño o iri. Iemo due vínona o jirori.

24 Nai íaioimo riire jicáñoñena llezica, comínimona dáarie íaioimo ite fiénidifuiaí uáfori cíoide. Iemo jíámacimo ite fiénidifuiaí íaioi duere finoille mámia méfomo onórede.

25 Daje izói jíáie cómemo ite ñúefuiaí uáfodo cíocaide. Iemo jíámacimo ite ñúefuiaí cíóñena íadi, dinó íaioi diga báinino íñeite.

6

1 Táijitafiregano íaioi ocuídimiaína ñue jacíruiordiaioi, jíáie comini Juziñamui mámeçido fieni úriñeillena. Daje izói cai llófueinafuena fieni íaioi daíñeillena.

2 Afe izói Crístomo ñnote ocuífiredimiaína ñue jacíruiordiaioi. Juziñamuimo ñnogafuemo daje ámana íaioi maméadi, nai ocuídime ocuícamié diga conímama caimare jacíruiordiaioi. Mei jíáfodo afe Juziñamuimo ñnote ámamo, jíámaci baimo, riire táijirediaioi. Afe riire táijina ñnotino, afe ocuídino izíruiga ámatiaí. Afémaci dáamací. Dájena Crístomo ñnotino. Bifue o llófueiri. Daje izói áfodo o lletámairi.

Juziñamuimo cai ñnogana, “Figo baite” cai dáinana canode

3 Afe bie cai Ocuíraima Jesucristo lloga jáicina jóide llófueinafuemo coméçnedimie, oni jíáfodo táinofuiaí llófuete. Daje izói cai ñnoga ñuera uaina afémie figo jeire oñede.

⁴ Daiñtade come nífuena onóñedeza, táinodo abi ñnote. Afémaci fia fiénide uáillaímo júfiduana iere gáidiaioi. Afe júfidogafuemona aillo úradoillafue comuide. Iemo dájena caimare iñénafue comuide, íemo jiáimana éoinafue comuide, íemo jiáimana caimare uáidoñenafue comuide.

⁵ Dáanomona féitañega fuirillafuiai, jiáifodo oni comécina jóidimacimo comuide. Bie comíni ua ráfuena onóñediaioi. “Fia cai ñnogafuedo iere cai ráanailli,” táinona comécidiaioi. Bie izoide comínimona oni o iri.

⁶ Ua onóigaza, cai ñnogafue jamánomo ráifide. Juzíñamui caimo fecaca raana “Figo baite” daidímiemo, ie ñnogafue ñue ráifide.

⁷ Mei jii, bíniemo fueñe cai jocoina llezica minícana atíñedícai. Afe izói uire cai tíia minícana úiñeiticai.

⁸ Mei biruimo cai caana llezica caimo ite gülleri, daje izói caimo ite ññiroiri “Figo baite” daiñredícai.

⁹ Mei jiáifodo aillo ráanaiacadino fieni comeci fácafue dibénemo jáidiaioi. Afémaci aillo fieni comeci óiacanafuiaiimo raamo jíride izói itíaiioi. Bie izoide fieni óiacanafuiai cómena fieni finode. Daje izói íaiioi illafue ñiné táinocaitate; jofu zabilla méino izói ñiné táinocaitate.

¹⁰ Mei jii, úcubena izíruillafue nana fiénidífuiai comuállano aféfuiai jillaci. Dáarie iere izire úcubena óiacanamona, Juzíñamuiimo íaiioi ñnogafuemona oni ñibéfodo jáidiaioi. Afémaci daní íaiioi illáfuena táinona iere duere finódiaioi.

Juzíñamui cai ñnogana, fuirilla izói riire Íredícai

¹¹ Mei íadi o Juzíñamui nizécamiedioza, bie ailli cue lloga izóidífuiaimona oni o iri. Ñue comécina jaícina illáfuemo o mamériri. Juzíñamui illa izói mai o iri. Afémiemo ñue o ññofireiri. Jiáie comínina ñue o izírui. Comeci járidoñeno o iri. Comécina mánaidimíena o iri.

¹² Mai Juzíñamui ñnogafuemona fuirilla izói nágaruillaído riire o iri. Juzíñamui omo iga ziiñona illafue ñue jeire o oíri, mei áfemo Juzíñamui uáidogamiedioza. Afe Crísto o ñnogafuena comíni cóicana jino llotio. Afe bie o llúamo o uai nabáidinona aillo ite.

¹³ Ja birui Juzíñamui eróicana ona ñue ócuíticue. Afe Juzíñamui nana bíniemo itínuiaimo íaiioi cáananona fecade. Daje izói Jesucristo eróicana ona dáitíicue. Afémieme daje izói ññuefue jino uáfodo llote. Poncio Pilato uícomo ie illáfuena jáanoñeno llote. Daií Moo Juzíñamui, Jesucristo díga íaillinoi uícomo ona ócuíticue.

¹⁴ Omo cue ocuícana, jiáifodo méidoñeno, ñue jeire o oíri. Aféfuena ñue jeire o oíri, jiáima ona llétañeiteza. Bífuiai ua Jesucristo billíruimo jeire o óñfireiri.

¹⁵ Juzíñamui jaiái uícomo mamécaruimo dúcia, Jesucristo cócaizaibiteza. Afémieme daade cai iere ññuera rínoñede Juzíñamui. Daje izói afémieme nana illácomíni ie Illáimaza. Daje izói afémieme nana ocuífiredino Ocuidíllaima.

¹⁶ Dama afémieme jaca ziiñozu, tíiñede. Afémieme illano jamánomo meáire egáíñoteza, buna áinozinide. Afémieme jaca bu cóñede. Caade come jaca íena cóñide. ¡Jaca ñinomo ññuefuiai afe Juzíñamui nitácaza! ¡Aillue ññuera ríno jaca ñinomo afémiemo dúideza! Aquíe izói íteza.

¹⁷ Bie éniemo aillo ráaredino abi íaiioi ññoñeilleza ñue o lloiri. Daje izói íaiioimo ite raamo ocuiriñeitiaioiza, mei afe ráaniai are íñeitiaioiza. Mei

jiáifodo: Dama Juzíñamuimo omoi ocuíriri, o daiíri. Mei afe Juzíñamui ua cáadimie. Afémie jeruñño nana cai jitailla raana cai cánuano caimo fecade.

¹⁸ Afe ráanaitino ñue íaioi ílleza íaioimo ocuiri. “Omoi ñue fñoitifuiái ráanaitiomoiza,” íaioina o daiíri. “Omoi ite ráaniaimona jeruñño jitáidinomo jiáifodo coméciiñeno fecari,” daií íaioina o daiífireiri.

¹⁹ Daií íaioi íllamona, ico cómuitifue nahí raana máíñoitiaioi. Afe maiñóllena comécido ñue onódiaioi. Afe dáaruído ziiñona illífuena óitiaioi.

Iraicaiño Timotéomo jóonenocaigafue

²⁰ Timoteo, nana bie omo cue lloga ñúefuiái ñue o rairuiri. Biniemo ite táinona úrioinafuiáiimo cacáreiñeno o iri. Daje izói Juzíñamuina uáitafuemo cacáreiñeno o iri. Mei íaioi: “Iere baitádicue,” daina uai taino uaiza.

²¹ Mei bie izóidifuiái innote comini ja baie Juzíñamuimo inogafuiáiimona oni nibéfodo jáidiaioiza.

Mai, Juzíñamui ona ñue éziciiteza. Jae ñie. Mai daiítadeza.

MÉIFODO SAN PABLO TIMOTÉOMO ORÉCABE Segunda Carta del Apóstol San Pablo a Timoteo

Pablo Timotéomo cuete

¹ Cue Páblodicue. Jesucristo ñúefue llujállena orécamedicue. Juzíñamui comeci jítaina izói orécamedicue. Daje izói uícodo lloga zíñona cai cáailifue llujáitagacue. Cristo Jesumo dájena cai jaináinamona afe cáailifueña óiticaí.

² Cue izíruiga jító Timotéomo bibe cuetícueza, ona Juzíñamui ñue ézicúiteza, daiíacadicue. Daje izói: Juzíñamui omo dúecaiteza daidicue. Iemo: Cai Moo Juzíñamuimona oga comeci ñue uái illáfueño íitioza, daidicue. Nana bie ñúefuiai cai Ocuíraima Jesucristodo óredío.

Pablo Crístomo uai nabáiacade

³ Juzíñamuimo nágarui comécido úrifiredicue. Mona naio diga Juzíñamuimo cue úrilla llezica omo comeci uibífredicue. Omo cue úbicaillano Juzíñamuina: Ìere figora, daidicue. Cue uzútiaí Juzíñamui íóbitallena ie ocuífíregana ñue ñnua izói, afe izói íáinide comeci úrillafuedo ie ocuífíregana ñue ñnofiredicue.

⁴ O comeci zúucaífirenamo uibíoidicue; íemona ona ìere jaca cíoiacadicue, áfemona caimare cue íllena.

⁵ Taino lloñeno ñue Juzíñamuimo o ñnuafueño uibíoidicue. Afe birui Juzíñamuimo o ñnogafue nano fueñe o uzungo Loida ñnoga. Daje izói o ei Eunice ñnoga. Iemo bífueña o jaca ñue ñnofiredioza, ñue onódicue.

⁶ Ie jira bie izóidena o ócuiticue. Naui omo onoi cue bítajamona Juzíñamui omo lloga llófuella ríino féitañeno o iri. Niné ona féiza afefue nágarui meine ríire o uibíocairi. Irai dúizaide meine boota izói o uibíocairi. Afemona jamánomo o llófuella.

⁷ Mei Juzíñamui comeci jacíruillafueña caimo fecáñede. Mei jíáifodo comeci meáruíñenafue Juzíñamui caimo fecade; íemo jíáimana cai izíruillafue, íemo abina ñue cai onónafue diga, caimo fecade.

⁸ Ie jira cai Ocuíraima, Crístomo uai nabáillana meáruíñeno o iri. Daje izói ie uai ícoinia llavécacueza, cuena meáruíñeno o iri. Mei jíáifodo ñuera jíllona uai ícoinia comuide duere zefuíllafueña ruífruíñeno o iri. Omo cómuite duere zefuíllafueña rairuíñeno o llínnori. Mei Juzíñamuimo ite ríinodo cai comécina caimare fíraiteza.

⁹ Juzíñamuimo cai jaináillena afémie ñue caina jíllotate, daje izói caina uáidote, ie íaifuenide comínina cai íllena. Dani ñue cai illáfuedo Juzíñamui íena ínidicaí. Mei jíáifodo dama Juzíñamui jaiai uícodo mamérillado íeiena iticaí. Daje izói Jesucristomo cai jaináillado Juzíñamui caina izíruite. Daií caina ie izíruillado íeiena iticaí. Mei jaiai ninomo nai énie comuíñena llezica, Juzíñamui caina izíruite.

¹⁰ Mei bie caina ie izíruillafue, cai jíllotaraima Jesucristo ana bíniemo bíllado, afefue caimo jino onótate. Afe Cristo cai tíillafueña ja jacínitate. Daje izói jíllona uai llúado, zíñona cai illafue jino uáfomo cíotate. Ua, íemo ñnotino zíñona itátallena afe Juzíñamui uáfodo caimo onótate. Afe bie zíñona cai illafue buna jaca niné táinocaitainide.

11 Bie ñuera uai llujállena Juzíñamui jónegamedicue. Judíoñedino llófuellena, Juzíñamui orécamedicue.

12 Iemo afe biedo nana bífuiái duere zefuídicue. Mei íadi áfena meáiruiñedicue. Cue ñnoga Juzíñamui comeci ífueña ñue cue onónamona, jacíruiñedicue. Mei afémie cuemo jónenocaigafue jaca féiñeiteza. Afe bifue Juzíñamui dama Cristo billíruimo ñue úiñoite, mei afémie iere rínoredeza. Afena onódicue.

13 Naui jaícina joide llófueinafue o cue llófuia izói, áfena o llófueñeirei. Juzíñamuimo cai ñnogafueña jeire o oíri. Daje izói Jesucristomo dájena cai jaináinamona caina ie izíruillafuemo o iri.

14 Cai diga ite Ñuera Joreño canócaza Juzíñamui omo lloga ñuera rafue féitañeno o iri.

15 Ja onódioza: Nana Asia énie comini ja cuena zóofetiaioi. Afémacimona bie mena iima íaillinoi: Figelo, íemo Hermógenes.

16 Mei íadi bie afe jaímie Onesíforo dibénedo nana ie comini diga, mei cai Ocuíraima afémacimo caimare dúcaiteza. Mei afémie diga ícaíño cue jitaica raana atíñrede. Llavécacue íadi jaca meáiruiñeno cuemo atíñrede. Iemona Juzíñamui afémie comécina náicaitaiteza.

17 Uafue, Rómamo afémie illa llezica cuena are jénua ícoinia baite.

18 Cai Ocuíraima cai comeci ífue riire jicánolliruimo afe Onesíforomo dúcairi, Juzíñamuina daidicue. Ja ñue onódioza, Efésomo cai illa llezica, afe Onesíforo diga ícaíño caina canode.

2

Jesucristo dibénemo itímie ñue fuirídimie izoide

1 Cue jító Timoteo, Jesucristomo dájena cai jaináinamona Juzíñamuimo ite ñúfuiaimo iticai. Afedo ñue o náireiri.

2 Cúemona o caçánafuemo cue uai nabáidinona aillo íteza. Iemona afefue mai oni jíáie ñue ñnofredimíaimo o jóneri. Afémaci daje izói oni jíáimacimo llófuiailleza.

3 Duere zefuúllafue omo comuíadi, Jesucristo dibénemo ñuera fuiríraima izói abí riire o mameri.

4 Naga jíaimiena anáfenocade fuiríraima fuiríllena mamérido. Iemona úicodo nana jetáacaigafue fáicanocaite; afémie jae náamatagaza. Fáicanocaillano daa ie ocuídillaima anamo itábicaite, afe ie jírítillaima ióballena.

5 Daje izói naga jífanora raamo jífanotímie ñue jaícina jífanorede. Jífanua ocuide uai daina izói jífanorede. Afémie fieni jífanóa, mínícana jíridoñeite. Táinomo jífanoteza.

6 Jacafai rillamo izire táijidímie afe ie riga llizilla jeia llezica, afe ritímie fueñe ótena figura. Dama íeiena fueñe jofo óite.

7 Omo cue llógamo ñue comeci o facari, íemona cai Ocuíraima ona nana ñue fibítaiteza.

8 Mai túllanomona meine abido caade Jesucristomo o úbicairi. Daje izói afe Cristo cai jaiái illaima David úicoidígimamona comuídimie. Afémieimo ñue o coméciri. Cue lloga ñue jíllona uai aci bie izói joide.

9 Bie ñúfue ícoinia duere zefuútagacue. Jí, fiénidífue finódino izói maíano duere finócaue. Mei íadi Juzíñamui lloga ñuera uai jaca buna llavénide.

10 Ie jira Juziñamui nizécamaci cue cánua ícoinia duere zefuídicue, mei íadi áferi zúucañeno jaca caimare iticue. Afémaci ñue jíllobicaillena duere finócacue. Afe Jesucristomo dájena cai jaináinamona comuide jllonafue iere ebírede. Iemo jaca zíñona fúñeite.

11 Bífue táinoñedeza, iere uafue:

Afe Cristo túilla izói cai tíadi, afémie meine abido cáadimiena jailla izói, afe izói dani cai meine cáaillano afémieoiri líticai.

12 Afémie ícoinia duere cai zefuádi ie illáimana illánomo jánaiticai. Afémiena cai jáanoiadi, afémie jái caina jáanoite.

13 Afémiemo cai ñnoñeniadi, afémie jaca ie daina izói nai finófirede; Mei Juziñamui dama ie abina jáanonideza.

Ñuera daiñllena facaca tájiraima

14 Bífuiamo jáimacina ñue o comécitari. Daje izói bífuiái cai Ocuíraima eróicana íaioimo jóoneri. Íaioi ráifiñede júfidofirega uáillaimo mai afémacina júfidotañeno o iri. Afe bie izoide júfidofirenafue ráifiñedeza, buna canóñede. Afemo cacáreidinona jáífodo oni comécina jóitate. Daje izói íaioi ñnoga ua uaina niné féitateza.

15 Juziñamui uícomo figura daiñllena facaca tájiraima izói o iri. Iemo afe llezica jáífodo lloñeno daje izói o illáfuenta ñue jaícina o jóonefireiri. Daiñ ñue facacámie ie meáicaillafue iñede. Daiñtade come Juziñamui ua ráfuenta jaícina comínimo llófuete.

16 Biniemo ite táinona úrioinafuemonona oni o iri. Daiñ táinona úrifiredino jamánomo fiénidifuiamo baídiaioiza. Anábaitagano izói íficaidiaioi.

17 Fieni íaioi llófuena uai raire jica jalleide. Come abimo comuide fiénide ñozagi jarire oni móonaioicailla izói, bimaci llófuega uai oni jalléicaide. Afe bie izói ja Jimeneo Fileto diga, bimaci izói, fieni llófuetinona jáidiaillinoi.

18 Afe íaillinoi Juziñamui ua uáimona oni nibéfodo jáidiaillinoi. Juziñamui tíidino meine abido cáaillifue dibénedo llotíaillinoi: Ja záide, daidiaillinoi. Daiñ jáíie comíni Juziñamuimo ñnogafuena uáitacana jáidiaillinoi.

19 Mei íadi cai ñnoga uai oni cáitañeillena, Juziñamui áfemo jáíie riírede uaina nabaide. Iemona féitañeno afe Juziñamuimo ñnoicaidicai. Afemona cai bie riíre mozóioiga jáaillirai izóidicai. Juziñamui nabaica uai Juziñamui dama íeiena caina mameide. Afe uai bie izói jóoide: Cai Ocuíraima nana dama ie nahí comínina ñue onode. Iemo afe Juziñamui nabaica uai jáífodo bie izói daide: Nana “Cristomo jaináidicue,” daídino fiénidifuenta féitano, aféfuemona ja oni írediaioi. (Bie ie nabaica uaido, Juziñamuimo cai ñnogafuena afémie riíre finode.)

20 Aillue jofe eromo diga raa ite. Ráifide oro ie finoina raa ite. Daje izói ráifide plata ie finoina raa ite. Iemo jiba ráifiñede amena finoina raa ite, naa nogóramona finoca raa diga. Dáarie bie ñuera rairuica jiróracuaido jicana bitínona jirótafiredicai. Jáíie figo jínoñede jiróracuaido jalleide illáimana ecáñedicai.

21 Afe izói naga jáimacaci canóllena Juziñamui nizécamie, jaca comécina íaifuenino írede. Afémie jaca íaifuemona oni írede. Iemona afe cómena Juziñamui íeiena ñue finóbitade. Ebena ñuera tájijnanomo Juziñamui raire íena óreite. Mei afémie íainide ráifide oro finoina jiróraco izóidimieza.

²² Jitócomena llezica comeci fieni óiacanafuiaimona oni o iri. Mei jiáifodo come ñue jaícina illáfuedo o jairi. Daje izói Juziñamuimo o ñinofireiri, íemo jiáimana o izíruiñireiri, íemo comeci mánainafuedo naga cómena o uáidofireiri. Iemo, nana comeci íaifuenino Juziñamuimo úrifiredino diga o nabáiriri.

²³ Daje izói táinomo comécilla uáillaina náfueñeno o iri. Mei ja onódioza, bie izoide úrillafuaii fúirienailafue comúitate.

²⁴ Juziñamui ocuífregamie jaca jiáima diga icírínide, íemo jiái fuirínide. Mei jiáifodo afémie nana comini diga caimare írede. Daje izói jiáimacina caimare llófuerede. Iemo afémie jiámamo jarire úriñeno, fíaicana úriredo.

²⁵ Daje izói Juziñamui ocuífregamie naga ie llófueinana náfueacañedinona comeci manai ñnuano, íaioina lletárede. Afémie daí íaioina lletárede, íaioi comeci ífue Juziñamui méidotalleza. Iemona daje izói ua ráfuenta Juziñamui íaioina onótaiteza.

²⁶ Bie izoide llógana jámairuitino Taife írebaimo jiilla izói itíaiói. Iemo afe Taife íe comeci óiacana izói afémacina ócuite. Mei íadi ua ráfuenta íaioi onónamona jillorediaioi. Afénomo jízaidinona oni bairórede. Afémaci inídimie como cazilla izói, abina onóitaiói; íemona Taife anámona jillorediaioi.

3

Comini íirairuillaido illífué

¹ Ja bífuaiana o onótaiticueza. Íirairuillaido jacírediruina caimo mónaite.

² Aféruimo comini daní íaioi abina fieni izíruiítiaioi, íemo úcubena íere duéruítiaioi, íemo íere fieni abi ñnoítiaioi. Daje izói “Jamánomoidimíedicue” daínano, cómena canóñede táinofuiaimo comécitíiaioi. Iemo Juziñamuimo fieni úritiaioi, íemo íaioi móotíaiái ocuilla uaina náfueñeítiaioi. Iemo jiáimana “Íere figora” daíñeítiaioi. Daje izói Juziñamuimo ñnogafuena náfueñeítiaioi.

³ Afémaci jiáimana íziruiñeítiaioi, daje izói féítañeno íaioimo duere finódimíemo dúecaíñeítiaioi, íemo jiáimacimo fieni úritiaioi. Iemo íaioi comeci fieni óiacanafuena “Dama íte” daíñeítiaioi. Iemo jiáima íaioi íciadi ññufuedo finóacañediaioi. Daje izói comínina íere izi cácataitiaioi. Nana ññufuiaína bacáuai ífuenta mámeítiaioi.

⁴ Afémaci daní íaioi nahí comínina jiáie comínimo fállena fécajifirediaioi. Iemo “Dama cue íacana izói íredicue,” daíñfirediaioi; íemo táinomo comécillano “Íere jamánomoidimíedicue,” daíítiaioi. Daje izói Juziñamui jenóñeno daní íaioi comeci gáinafuaiána jénoítiaioi.

⁵ Diga jinófene íuaido “Cue bie ñuera Juziñamui uaina ñnotimíedicue,” daíítiaioi. Mei íadi jofona íaioi comeci ráatailla meí, afe ñnogafuemo íte méidolle ríinona jáanotiaioi.

Afe bie izoide comini diga nabáiríñeno o iri.

⁶ Mei bimácimona dáarie, jiámaci jofomo jaillano comécina ríinide ringóniai jífuefirediaioi. Afe ringóniai fiénidífuaiána oruide. Afe ringóniai nana fieni óiacanafuiaína anáfenogaíaiói.

⁷ Diga ráfuai onóiacadiaioi meí íadi Juziñamui ua ráfuenta baitánidiaioi.

⁸ Jaiái Moisés illáruillaido mena aimá Janes, Jambres diga, Moisés daína uai uáitaitiillinoi. Afe íaillinoi uáitaja izói, bie comini íirairuillaido ua uaina uáitaitiaioi. Íaioi ífoci úrillafue oni nibéfodo jóoide. Juziñamuimo ñnogafuena fáicanocaidiaioiza; áfemo índiaioi, táinofue ñnotiaioi.

⁹ Mei íadi bimaci are jíáimacina jífuecana úíñeitiaioi. Mei íanori íllamona nana comini íaioi jífuefirenafuena fídiitiaioi. Jaiái Moisés uáitate íaillinoi táinona úrilla uaina comini fídia izói, nane afe izói bimaci táinona úrilla uaina nana comini fídiitiaioi.

Iraicaíño Pablo Timotéomo jónonocaigafue

¹⁰ Mei íadi o cue llófuiana ñue jeire otio. Cue maca izói jaca ñue macádio. Iemo cue mamérilla izói ñue mamérifredio. Iemo Juziñamui mo cue ínuua izói, afe izói iere ínofiredio. Cue comeci jarire úriñena izói, afe izói fíaicana úritio. Jíáimana cue duéruilla izói duéruitio. Diga juáredífuiaí cuemo comuide, íadi fíaicanoicaíño Juziñamui ñúefue llócadicue. Afe cue ocuilla izói ñue ocuíoideo.

¹¹ Comini duere cue finóllena cuena racádiaioi, mei íadi áferi jacinaíño caimare íticue. Naui Antioquía jófuemo duere cue zefuállana onódio; daje izói Iconio jofue, Lystra diga cuemo íaioi finócafueña onódio. Nana racada duere cue íaioi fínuafuina onódioza. Mei íadi cai Ocuíraíma nana aféfuiaimona ñue cuena jíllotate.

¹² Uafue onóigaza, nana Jesucrístomo jaináinamona ñue jaícina illáfumo íacadino, nai ínoñedimacido duere zéfuitiaioi.

¹³ Temo afe lezica fiénide jíáimana jífuefiredino jamánomo fiénidífuiaímo ana jíitiaioi. Jíáimacina íaioi jífuia lezica, dani jíáimaci íaioina jífueitiaioi.

¹⁴ Mei jíáfodo omo llófuegafuiaímo riire o comécioicairi, mei aféfuiaímo iere ñue ínotioza. Iemo afe bífuiaína o llófuetimíena onódio.

¹⁵ Daje izói o dúemíedíomona Juziñamui ñuera Cuegáuana fueñe onóicaideo. Aféuaimona llófuegao, jíllonafue o maíñóllena. Afe jíllonafue Cristo Jesumo o ínuado o oga.

¹⁶ Nana Juziñamui Cuegáuai, Juziñamui afe cueraini comécimo úrilla izói ñue jaícina cueda. Bie uai iere ráifide comini ífoci déillena. Aféuaido comini llófuerega; íemo afe bíuaido táinomona lloga uaina uáitarede; íemo áfedo jíáimacina lletárede; daje izói aféuaido jaícina comini ñue illífuena íaioímo llórede.

¹⁷ Afe daí Juziñamui Cuegáuaido Juziñamui ocuícamié ñue baitádimíena írede. Iemona afémie ñue finóbide, nana ñúefuiai íe finóllena.

4

¹ Juziñamui eróicana, cai Ocuíraíma Jesucristo diga, Juziñamui uailai o llófireillena iere omo llonódacaidicue. Mei Jesucristo bíniemo illáimana bille lezica, afémie nana caade comínina, naa tíidino diga íaioímo itífuena riire jícanoiteza.

² Afémie riire bíacana jira, riire ona dáitícue: Nágari Juziñamui uailai jino o llófireiri. Afemo riire o mamériori. Comini aféfuena cacáacana llezica, daje izói aféfuena afémaci cacáacañena llezica, nana afémacina jaca daje izói Juziñamui uai riire o llófireiri. Ñue riire llófireiri Juziñamui mo nai ínoñedino aféuaina íaioi jíeruillena. Daje izói afémaci illafue figóñedeza, bíuaido íaioina lletari. Iemo ñúeodo íaioi jíállena, mai riire íaioímo lloiri. Nana bífuiaína, nana comeci járitañenafuedo fíaicana o llófuefireiri.

³ Afe daí llófuefireiri, mei diga irui íllamona, comini ua llófueinafuemo cácañeitiaioíza. Mei jíáfodo dani íaioi fiendi gaina izói dani íaioi cacáacana izói, íaioi llófueitínona aillo jónoitiaioíza.

4 Juziñamui ua ráfuenta fáicanocaillano, nana jagai izoide táinomona llogáfuiamo náfueitiaoi.

5 Mei jiáifodo o iri. Cáadimie izói ñue abina o onoiri. Zúufue omo comuíadi, áferi jacinañeno abi riire o mameri. Iemo jílona uai o llóllema maméiroiri. Juziñamui omo jónega táijina ñue ícoimo o fuitari.

6 Ja íanori íllamona Juziñamui íóbitallena fatá fecaca rille izói, fécajagacue. Cue titáilirui ja áinozide.

7 Ñuera fuiríraima izói, fiénidifue anáfenua izói táijinana jae riire ñue ícoimo fuitádicue. Iemo jifánotimacimona riire aizida goal orédimie izói, afe izói cue táijina fuillánomo dúcidicue. Iemo Juziñamuimo cai ínogafuena fáicanocaiño, ja ñue ícoimo ínoticue.

8 Iemona ja birui cai Ocuíraima cuemo fecalle fia jirídogra raa izóidifue mo ocuridicue. Afe ie billíruimo, Juziñamui anamo ñue náifuenidimacimo dúide zíñona illáfuenta afémie cuemo fécaite; mei afémie comínimo itífuenta ñue jaícina jicánoitimieza. Dama cuemo fécañeiteza, mei íadi daje izói nana ie billíruimo caimare ocuridíno mo jirídozede zíñona illáfuenta afémie fécaite.

Dama Páblomo dúidifuiái Timotéomo llote

9 Timoteo, mai raire cue eróizaibiri; riire afemo o maméiriri.

10 Mei cue nabai Demas, binie ráaniaina jamánomo gáinamona jae cuena zóofeteza. Zóofiana jae Tesalónica jófue mo jaide. Iemo jiáie cue nabai, Crescéntena mámeciredimie, jae Galacia éniemo jaide. Daje izói jiái Tito oni Dalmacia éniemo jae jaide.

11 Dama Lucas cue diga fiébilla. O billíruimo, mai Marcos jénuailano cue diné ómicoi biri, mei afémie benó cue táijina cuena iere cánoiteza.

12 Cue nabai Tíquico, Efeso jófue mo jae cue oreca.

13 O billíruimo cue fieca emódomo jitáraroi o atiri. Naui Troas jófue mo ite Carpona mámeciredimie jofomo cue fieca. Daje izói cue rabéncuai o atiri. Iemo jiáie cuega rábiai féitaño o atiri, mei afébiaina iere jitádicueza.

14 Naui Alejandro aillo fiénidifuiái cuemo nitade. (Afémie lloéfiái fínuamo tájifiredimie.) Nana fieni ie úrillafuiái dieze cai Ocuíraima afémiemo iba óite.

15 Afe Alejándromona abí o rairuíoicairi, mei afémie cai lloga uaina iere uáitaacadeza.

16 Nano fueñe cue abi ríidollifue, ríillaini uícomo cue llua llezica, bu cuena nabáiñede. Nana cuena zóofetiaoi. Juziñamui afefue iba íaióimo óñeilla afémiemo jicádicue.

17 Mei íadi naui abi cue ríiduaruimo cai Ocuíraima cuena canode. Afémie cuena ñue riire finode, jílona uai oni nana judíoñedíno mo cue llujáillena. Afémie afe llujáillafue ñue ícoimo cuena fuitátate. Afe daí cai Ocuíraima iere jacíredifue mo ñue cuena jílolate.

18 Daje izói nana jiáie fiénidifuiái mo, afémie cuena jílotaite, íemo dama íeiena cuena ráiruite, monamo ite ie illámána illánomo cue dúciillena. Ñuera ebíredifue jaca níno mo íemo íteza. Daíitadeza.

Iraicaño uáiduafuiái naa ézicigafuiái diga

19 Mai, Prisca, Aquila diga caimare uáidori, naa Onesíforo comíni diga.

20 Erasto Corinto jófue mo fiébide. Cue nabai Trófimo ie irárenamona, Mileto jófue mo cue fieca.

²¹ Mai raire rozírediruillaí ñaí dúciñena llezica benó o biri. Benómona jíáimaci omo uai orédiaíoi, be níimaci: Eubulo, íemo Pudente, íemo Lino, íemo Claudia. Daje izóí nana Crístomo jainaide ámatiaí o uáidotiaíoi.

²² Cai Ocuíraíma Jesucristo nágarui ómoimo nabáirifireillena Juzíñamuimo jícádícue. Daje izóí Juzíñamui nana omoí ézicillena jícádícue. Mai daíítadeza; jae níie.

SAN PABLO TÍTOMO ORÉCABE La Carta del Apóstol San Pablo a Tito

Pablo Títomo cuete

¹ Páblodicue. Juziñamui táijitagamiedicue. Jesucristo orécamiedicue. Juziñamui nizécanomo ñnotalle uai cue llujállena ie orécamiedicue. Daje izói cai ñnoga ua uai, íaioi onóillena orécacue.

² Afe bie cai ñnoga ua uai, jaca ninomo ñue cai illínomo cai ocuñrinanomo móirede. Nai énie cómuñenia uícodo, Juziñamui afe zíñona cai cáailinona llote. Juziñamui jaca táinona llófnide.

³ Ja birui ie llóiacaga uaina, ie mamécaruimo cuemo jónega llófuecaillado caina onótate. Uafue, cai Jíllotaraíma Juziñamui afe daje uai cue llófuecaillena cue ocuide.

⁴ Tito, daje izói Juziñamuimo ñnoticoco, íemona nahí cue jitó izóidío. Jira bibe omo cueticue. Afe llezica, cai Moo Juziñamui cai Ocuífirede cai Jíllotaraíma Jesucristo diga o ñue ézicillena jitáidicue. Daje izói omo dúecaillena jitáidicue. Afe dáaruído caimare uái ñue o illena jicádicue.

Tito Crétamo llófuete

⁵ Monáillai cigi idu Crétamo o cue fiénocailaruído, nai figo finóbiñede raa ñue daje dne jaícina o finózillena ona fiédicue. Aféruído naga diga jofue illánuiáimo ite Juziñamuimo jainaide gairídínomo íaioi ócutimiena o jóoneri daidicue. Ñue ócuite eicomínina jenoda o jónetadícue. Afe izói naui uícodo omo llonódacaidicue.

⁶ Naga ñue ocuide éicome nífuenino írede. Daje izói afémie daa ringo otímie írena. Daje izói ie úruiai Juziñamuimo ñue ñnorediaioi. Afe úruiai fiénidífueña jóoneñgazana írediaioi. Ocuilla uaina náfueñedino izói ñnidiaioi.

⁷ Iemo naga ócuitillaíma Juziñamui dibénemo ocuícailaioi. Ie jira afémie nífuenino jaícina ñue írede. Daje izói afémie “Cue bie iere ríimiedicue” daíñide. Daje izói afémie comécina éocainide. Daje izói afémie jífaífnide. Daje izói afémie illáiredimiena ínide. Daje izói afémie fia Juziñamuimo táijnado úcube otímiena ínide.

⁸ Mei jíáifodo, afémie ie jofomo mácaibitínona jíáifodo comécíñeno caimare llínofiredimiena írede. Afémie ñue caimare finófredimiena írena. Afe izói dama ie abina ñue ocuídímiena írena. Afe izói afémie comécina jaícina itímiena írena. Afe izói afémie Juziñamuimo ñue jaináidímiena írena. Afe izói afémie dama ie abina lletáidímiena írena.

⁹ Afémie ñue ñnofirega íemo lloga uaimo iere comécírede, jíáimaci comécina náicaitallena. Iemo jíái afémie daí írede, nana uáitatinona uafue daífallena.

¹⁰ Mei uafue, aillo ocuícana náfueñedino ite. Judíuaimo ite nabene. Afémaci táinodo úritiaioi. Afe llezica comínina jífuetiaioi.

¹¹ Afémaci úrilla llúcaitarede, mei dáarie afézie nana íaioi ñue ñnogafue dobáñnotadiaioiza. Afe llezica llófuerainina uaido llófueñrediaioi, meáirede fínuado úcube óllena.

¹² Afe Creta énie imácimona daade uai jino lloraima, ie nabáitaiädo úrite. Daide: “Creta imaci táinofuerdiaioi, íemo jazici ie ríllenai; izóidiaioi, íemo iere güillárediaioi, íemo jaca iere ráiraiediaioi,” daide.

¹³ Afémie uafue daide. Te jira riire íaioina lletari, Juzíñamuimo íaioi ínogafuena féitañeno ñue jeire íaioi óllena.

¹⁴ Iemo daje izói ñue íaioina lletari, judíuai daní uibica uáillaimo íaioi náfueñeillena. Iemo jíái, ua uáimona oni jíicaidino comútaga ocuilla uaimo íaioi cácareiñeillena.

¹⁵ Nana comécina íaifuenidimiemo naga raa íaifuenide. Mei jíáifodo íadi nana Juzíñamuimo íinoñedino íaifuiairedinomo naga raa íaifuiairede. Daje izói íaioi ífoci uibíllafue íairede, nana íaioi comeci úrilla uai diga.

¹⁶ Afémaci “Juzíñamuina onódicaí” daidíai; mei íadi íaioi finócado Juzíñamuina jáanotiaioi. Mei afémaci íaíruigamacina jáidiaioiza. Iemo náfueñedino izói itíai; íemo due jiza ñuera raana finónidiaioi.

2

Ñuera uafue llófueina uai

¹ Tito, o daiille uallai ñue uafue llófueina izói jaca jáicina jóirede.

² Nana éicomini jaca jífáifinidinona írede. Daje izói ñúefuiaido jacíruiregaiaioi. Iemo, abina ñue onódimíaina írediaioi. Daje izói Juzíñamuimo íaioi ínogafuemo íránifinidimie izói írediaioi. Daje izói nágaruillaído ñue izíruicana ífrediaioi, íemo jíái jaca comécina járitaifinidiaioi.

³ Daje izói eiringótiai úrioinide; íemo ñúefuedo jacíruiregaiaioi. Afe izói táinona llófinidiaioi. Iemo jíái jaca jífáirado jífáifinidiaioi.

⁴ Daií ñue íaioi íllana ácatarediaioi, jíaie ringóniai jítaínguai afe izói íllena. Afedo íaioi ínítaiaina izíruillena lllólliaioi. Daje izói jítaíngo íaioi úruiai gáíllena llófueregaiaioi.

⁵ Afe izói íaioi abina ñue onóíllena llófueregaiaioi. Daje izói íaifuiaínidinona íaioi íllena llófueregaiaioi. Afe izói jofo ero finoca raa ñue úiñollena llófueregaiaioi. Daje izói illáinidíngo izói íaioi íllena llófueregaiaioi. Afe izói íaioi ini ocuícana jíéruífíreillena llófueregaiaioi. Be daií írediaioi, buna Juzíñamui lloga fieni úridoñeillena.

⁶ Daje izói jítócomini ñue íaioi íociretari, abina ñue íaioi onóíllena.

⁷ Iemo jíái, naga o jetácaga dibénedo o ñue illa izói íaioi íllena ácatari. Iaioina o llófuelle llezica, taino jífueñeno llófuefireiri. Daje izói jífánodoñeno lloiri.

⁸ Daje llezica táinodo úrinidío, buna o jánari úriñeillena. Afe daií o uáitaacadino meáruitiaioi, mei ja odo fieni úrinideza.

⁹ Iemo jíái, nana ocuícana íaioi ocuídino anamo ñue íllena o llófuefireiri. Daje izói cáimamacina íaioi íllena lloiri. Iemo uai ófíreíñedinona írediaioi.

¹⁰ Afe izói íaioi táijina llezica íaioi ocuídino ráaie meríñedinona írediaioi; mei jíáifodo naga táijinana jetátagamie ñue ínofiregamiena írede. Afe izói írediaioi, cai Jíllotaraima Juzíñamui lloga uai iere ebíredeza, daní afémaci abído onótallena.

¹¹ Mei jíí, Juzíñamui caimo ie dúecaillana caimo cíotate. Afe caimo ie dúecaillado nana éniemo itino jíllorediaioi. Afe jíllorenafue Juzíñamui jae caína onótate.

¹² Afe caimo ie dúecaillamo cai coméciadi fieni illafue cai fáicanocaillena caina onótate. Afe izói bie énie imaci óiacaga cai fáicanocaillena onótagacai. Iemo jáífodo biruúllaído cai illafue ñue úillena caimo llote. Jaca abí ñue cai ocufirena caimo llote, íemo cai illafue ñue jáícina cai jóoneillena cai llote. Afe izói Juzíñamuimo dúide uaina caimare finóredicai.

¹³ Iemo daje izói Juzíñamui uícodo lloga uai, caimare zuíllemo ocuúioiredicai. Mei aferui iere ríñoredimie Juzíñamui, cai Jíllotaraima Jesucristo caimare billíruiza.

¹⁴ Afémie cai ícoinia tíllinomo uigámie, nana fiénidifuiaimona cai jílloillena. Daje izói nana cai íaifuiai muiñóllena uigámie. Afedo afémie íena caina mamede, ñúefue iere íocire cai finóllena.

¹⁵ Be nie o llófuerena uai. Nana náinide comini comécina náicaitari, íemo lletáredino omo ite ocuille ríño dieze íaioina lletáfireiri. Buna ona jámairuitañeno iri.

3

Juzíñamuimo íñotino bie izói írediaioi

¹ Jesucristomo íñotino énie illaíma anamo íaioi írena uibíñotari, naa ocuúinuiairi. Daje izói aféllaímai ocuica uai íaioi jíeruillena uibíñotari. Afe llezica ebena ñúefuiai fínuamo iere jícairediaioi.

² Daje izói jáíima jánana fieni úrinide. Afe izói afémaci comécina caimare uái ítinona írediaioi, íemo illáinidinona írediaioi. Iemo daje izói nana comínina omoí uáidua llezica, comécina mánaidimiena o illa jino íaioímo onótari.

³ Mánaidimiena íredicai. Mei naui uícodo daje izói cai bie jaca abina onóñedinodicaíza. Juzíñamui lloga uaimo cacáreiñedicai. Aféruimo niné féiraitino izói ífiredicai. Daje izói nana cai comeci fieni gáinafuiaímo riire ocuúanodicai; íemo jáíi cai íóbitade raamo riire llavécanodicai; jaca nágarui fieni ífiredicai, íemo jáámamo úradoífiredicai. Iemo comécina éoidicai, daje izói conímana éoicaífiredicai.

⁴ Mei íadi cai Jíllotaraima Juzíñamui íemo ite cáimafue jino caimo cíotate, íemo nana náiraíaina ie izíruífiréna díga.

⁵ Afémie caina jíllotaacade, mei íadi jaca nanómoma cai daina ñúefuena cai fínuamona Juzíñamui caina jíllotañede. Mei jáífodo dama afémie caimo dúecaillado caina jíllotate. Caimo ite íaifuiai dama ie múíñuado caina jíllotate. Afe llezica Juzíñamui Ñuera Joreño afe múíñuado, meine como jáiciganona caina finode. Iemona daje izói afe Ñuera Joreño como comuítaga ñúefuedo caina úicaite.

⁶ Cai Jíllotaraima Jesucristodo, Juzíñamui ie Ñuera Joreño jeruñeno caimo fecade.

⁷ Afe daíi Juzíñamui caina dúecaillano, nífuenidinodicai izói caimo caimare éoide. Afémie daíi caina itátate, cai ocuúrina zííñona cai illino cai maiñóllena.

⁸ Bie uaillai iere uáfueza. Daje izói nana bífuiai jeire íaioi ólleza ona íaioina iere llotátaiticue. Daíi ona llotátaiticue Juzíñamuimo íñotino bie ñúefuiaímo nágarui íaioi jíeruillena. Comini canóllena bífuiai nana ñuera.

⁹ Mei íadi abina onóñedino júfidogafuemona oni o jíicairi. Daje izói jáiáidígima dibénedo lloga íaioi comuilla táinofuiaimona oni o jíicairi. Afe izói jáámmana uáitafrenamona oni o jíicairi. Iemo jáíi, Moisés lloga uaimo

ite féiredifuiái do fuirídinomona oni jíicairi. Nana bie izóidifuiái cómena canóñede. Daje izói bífuiái ifócina úriñedinomona comuide.

¹⁰ Juzíñamuimo dájena jaináidino cígiri dámie eneno bozíetaiacania, íena uáidota ménacaño lletari. Daií lletaca cacáacañeniadi, omoi cígimona íena ruifíruiri.

¹¹ Uáfuenta íena ruifíruiri, mei ja áfemona afémie fiénidimiena onóredeza. Afémie ñúefuemona oni nibéfodo fiénidifuemo baiúdimie. Iemo dama ie finoca fiénidifuedo duere finóbide.

Pablo naa ie nabáiñiari mamérilla uai

¹² Artémana mámeciredimie, nibai Tíquicono mámeciredimie omo cue óreiadi méifomo, Nicópolis jofue illánomo raire cue eróizabiri. Afénomo o jáillena raire mamériri, dinomo dáanomo conímamo dúciiticozoa. Mei afénomo rozírediruillai záitaiacadicueza.

¹³ Iemo nane jáífue, Zénana mámeciredimie Apolos diga nana omo ite dieze íaillinoína canori. Afe Zena jáímado ñue úrifiredimie. Iaillinoí jaille llezica jitaica raana íaillinoimo fecari, minícana íaillinoí jítaiñellena.

¹⁴ Iemo daa cai Juzíñamuimo jaináidino ñue lloíri, ñúefuiáimo íaioí tájifireilleza; daje izói jáíe come jítáiadi, íaioí jitailla raana fecari. Iemona íaioí illafue ñue ráifiteza.

Iraicaiño uáiduano ñue íaioí ñllena Pablo Juzíñamuimo jicade

¹⁵ Nana cue diga itino omo uai orédiaioí. Cai izíruiga nabáiñiai daje Juzíñamuimo ínotino o uáidori. Mei Juzíñamui nana ómoína ñúefue dibénemo itáiteza. Daiitateza. Jae ñie.

SAN PABLO FILEMÓMO ORÉCABE **La Carta del Apóstol San Pablo a Filemón**

Pablo Filemomo cuete

¹ Cue Páblodicue. Cristo Jesús ícoiña llavécamedicue. Cai ama izóidimie Timoteo cue diga illa llezica, Filemomo bibe cueticue. O coco tájinamo izíruiga nabáifiredimedio.

² Afe llezica Juzíñamuimo ínotingo cai miringo izóidingo Apiamo cueticue, íemo jíái Juzíñamui uaimo iere cai nícidogafuemo nabáifiredimie Arquípomo cueticue. Iemo jíái Filemón jofomo gairífiredi Juzíñamuimo jaináidinomo cueticue.

³ Mai birui cai Moo Juzíñamui cai Ocuíraima Jesucristo diga, ñúefue dibénemo ómoina itátaiteza; daje izói caimare uái illifue ñue ómoimo itátaiteza.

Pablo Filemón Jesucristona izíruilla íemo ie ínuana llote

⁴ Juzíñamui diga cue úrilla llezica omo uíbicaidicue. Uíbicaillano, jaca Juzíñamuina “Figora” dáifiredicue.

⁵ Mei o ñue o finócafue fidídicueza. Cai Ocuíraima Jesuna o izíruillana íemo o ínuana diga, fidídicue. Daje izói nana Juzíñamuimo jaináidinona o izíruillana fidídicue.

⁶ Juzíñamuimo o ínuado jíáimaci afémie uai jeire o otátallena Juzíñamuimo izire jicádicue. Afémaci o diga nana Cristo Jesúsmona comútaga cai ñue ínofirenafuiai, ñue onóillena jicádicue.

⁷ Afe daí jicáfiredicue, mei ja o izíruillado ióbidicueza, daje izói áfedo cue comeci íociredeza. Daí ori ióbidicue, mei Crístimo ínotino odo comécina fíraicaioiza.

Riire ocuícamié Onésimomo Filemón dúecaillena Pablo íemo jicade

⁸ Iemona ja birui, Cristo orécamiéna cue íllado omo dúide finolle raana riire ocuiredicue.

⁹ Mei íadi afe izói ócuíñeiticue. Riire ocuilla baímo caimare jícana gáidicue. Iemo conímana coco izíruillamona omo jícaiticue. Ua ja cue éiromadicue, íemo jíái Cristo Jesús llavécamedicue.

¹⁰ Daí cue íllamona, daa cue onóigamiemo o dúecaillena jicádicue. Benó cue llavéjina llezica afémie cue jitó izóidimiena jaide, mei afémie comécina Jesucrístimomo ínuana mei afémie jaináitaticueza. Afémie Onésimo. (Jesucrístimomo íe ráifidimiena omo íllana jaca comécíñedio.)

¹¹ Nauí Onésimo omo ráifíñedimie izoide. Mei íadi birui cue o diga afémie ráifidimie izói tájirede.

¹² Meine abido íena omo orédicue. Afe íe cue ória cue iere izíruiga úrue ória izoide.

¹³ Nai benomo ñúefue ícoiña cue llavébilla llezica, afémiena “Benó cue diga fiebi” uáfuenta daíacadicue, o méifomo afémie cue canóllena.

¹⁴ Mei íadi nai o jii dáifíñenia minícana ocuífacañedicue. Daí daidicue, o cue jícajana ocuilla izói íñeillena. Mei jíáifodo dama o comeci jitailla izói cue jícajana o fínuana jitáidicue.

15 Nibai Onésimo naui fia nígarui fidi oni o abímona jaide, meine billano biruímona o abimo afémie jaca ninomo íllena.

16 Iemona birui riire ocuícamié izóíñeno, mei jiáifodo izíruiga ama izóidimiena afémie o diga írede. Afe jira naui riire ocuícamié baimo ñüemiena o diga írede. Afe bímie iere izíruiticue, mei íadi o cue baimo íena izíruiredio. Birui daa afe ñue táijitallimie izóí íena izíruinidio, mei afe baimo cai Ocuíraimamo jainaide ámana o izíruilla izóí, afe izóí íena izíruiredio.

17 Iemona uáfuena cue nabáidimie o íadi, cue o llínua izóí, afémie o llínori.

18 Nibai nano afémie fiénide raa omo finóadi, íemo jiái nibai minica omo íbañenia, cuemo jica, cue íbállena.

19 Ona uafue cue daiítallena cue ónoído cueticue: Afena íbaiticue. Cue Páblodicue. Mei jiáifodo cue ona uibíñotaredicue, dama o ñue méidoga abí cuemo dúide, mei Juzíñamuimo ona ínotadícueza.

20 Ua mií, cai Ocuíraimamo o ínuamona, afe bímie o llínuado caimare cue itátari. Crístomo dájena jainaide ama izóí cue comeci fírari.

21 Omo cueticue mei o jíeruifirena ñue onódicueza. Jiái onódicue, cue ocuica baimo finóredio.

22 Afe llezica cue iníllico uieécodo raire finori. Mei bie izóí ocuírivicue; Juzíñamuimo omoi jícállemona, Juzíñamui omoi cue eróizaibillena cuena óreite.

Iiraicaiño uáidua, caimare ñúefue dibénemo omoi itátallena

23 Cristo Jesús ícoínia cue diga llavécamié Epafras uai omo orede.

24 Daje izóí jiáie cue táijinamo canódimaci Marcos, Aristarco, Demas, Lucas diga omo uai orédiaioí.

25 Mai mei cai Ocuíraima Jesucristo ñúefue dibénemo ómoína itátaiteza. Daiítadeza. Jae ñie.

HEBREO IMÁCIMO CUEGABE

(Daa bimaci jáífodo mameina Judíuai)

La Carta a los Hebreos

Juzíñamui ie Jitodo ja comínimo úrite

¹ Jaiái ninomo cai judíuai jaiáidigimamo Juzíñamui úrite. Ua, ie uai llórainido diga icaíño, diga jáífodo jóoide uáillaído úrite.

² Mei íadi ja birui írairuillaído Juzíñamui ie Jitodo caimo úrite. Bie Jitó uaido Juzíñamui jaiái bie éniena naa úcuairi finode. Iemo naga raa íeiena náamatallena Juzíñamui íena mamede.

³ Afe Jitó ie Moomo ite ebíredena jino cíotatimie. Daje llezica afémie jino náiraímo cíotaga; ua daje Juzíñamui izóidimie. Nana finoca ráaniaina afémie dájena jaináitano ie ñue rírede uáillaído nágarui ñue jaícina finócana uite. Bímie, cruzmo dama ie die tótajado cai fiénidifuiái ñue múñua mei, caífo monamo ite Juzíñamui nabezi dibénemo ránazaide, dínómona nahí illáimaillena.

Juzíñamui Jitó Juzíñamui abí imácíai baímo figomie

⁴ Afémie afe jamánomo ríredinomo jáillamona, nana Juzíñamui abí imácíai baímo figomiena jaide.

⁵ Juzíñamui ie abí imácimona dáamie jaca “Cue jítódio” daíñede. Ua, “Cue Jitódio, ja birui illáimana o jóoneíticue” jaca daje izóí íaíoína daíñede. Mei íadi ie Jitó Jesucrístona daí daide. Daje izóí ie abí imácimona dáamiena “O moona íticue” daíñede. Dáanomo “Cue jítótio” daíñede. Mei íadi Jesuna daí daide.

⁶ Ua Juzíñamui ie izoide daade Jitona bie éniemo comútajano daide:

Mai, nana Juzíñamui abí imaci, bie cue jítona jacíruioicana ñue omoí íóbitari.

⁷ Mei íadi abí imácina Juzíñamui daide:

Bimaci cue abí canórainina íllamona, íaíoína ocuífiredicue. Iemona jairifo raíre náidacailla izóí, bimaci cue ocuícana raíre jetáfirediaíoi.

Afe izóí nana cue canófirede cue abí imaci jacírede boode irací izóí, íaíoína ocuífiredicue, —daide.

⁸ Mei jáífodo ie Jitona daide:

Juzíñamui o íllamona, o illáimana illíruí jaca ninomo zííñoña íite.

Ñue comécina jaícinaínafuedo jaca illáimaífireítio.

⁹ Ua, comécina jaícinaínafuena izíruitio, mei íadi fiénidifuiáimo éoicana eróidío.

Iemona Juzíñamui, ua o Juzíñamui, jae ona íóbitade.

Nana Juzíñamui uaina jíeruite o nabáíñiaí cáimadua baímo, cáimatagao, —daide.

¹⁰ Jáínomo ie Jitona Juzíñamui daide:

O Ocuíraímadío.

Naga ráaniái o táinia mei, bie énie finódío.

Nana monamo ite naga úcuai o ónoído finócano.

¹¹ Afe énie naa úcuairi niné táinocaitiaíoi, mei íadi o jaca zííñoña íitio.

Aféniaí jácara íniróillai zabilla izóí zábitiaíoi.

¹² Iemo ínícuro dócoiano oni jóonia izóí, oni eneno íaíoína jóoneítio.

Iemona ínirói jáíroína abímo jita izóí, bínie naa ucúduairi méidofcaitiaíoi.

Mei íadi o jaca méidoñellozo, dinó nímieitio.

Omo itifue jaca zíñona íte.

¹³ ¿Ñie mei ie abi ímiemo Juzíñamui llogámie:

O fairíconi o anamo cue anáfenotalle lezica mai benó cue nabézimo illaíma nabai izói ráinazaíbi?

Daí dainámiena íñede. Dama íe Jitó Jesuna daí daíde.

¹⁴ Nana afe Juzíñamui abi imaci Juzíñamui ocuica canóñrede jóriaíai. Ua Juzíñamui orécaíai, afémiedo jíloitino ñue rairuílana.

2

Cristo caímo lluaíbiga jíllona uaimo ñue úñoredicai

¹ Ie jira Juzíñamui Jitó, Jesucristo daí naga illaíma baímo jáidimiena illamona, nana Juzíñamui mona caí cacana uailíai jeire caí olle íere jítaírede; omoi jefóniaí ñue jínoíri. Aféuaimo ñue omoi cacáreiri, oni nibéfodo fiénidífuemo caí baíñeillena.

² Mei Juzíñamui jaíai íe abi imácido llogáuai jaca oni caitánide. Naga aféuaina jeire onédino naa cacáfinidínori raíre íere duere finócaíai. Mei afe fiénidífuemo finuamona Juzíñamui íaíoi mo jaícina íbana ote.

³ Mei íadi birui aféuai baímo jamánomo ñue rírede uaina cacádinodicai. Ie jira bie Crístonona caí cacana uáíllaina jeire caí óñenia, ¿nífuedo jaícina íba uáfue mona jílloticaí? jíllonidicaí! Afe baímo ñue rírede uai nano fueñe Ocuíraíma Jesucristo caímo llogáuai. Ie mei íe daínana cacádinodo aféuai jae caí uafue daííllena llotátaga.

⁴ Afe íaíoi daína uaimo onótate raado Juzíñamui ñue uai nabáitate. Iemo jíai jacírede raado, aillo cíorainina raa díga afémie ñue uai nabáitate, íaíoi daínauaimo ñue caí ínollena. Afe lezica Juzíñamui íe jítaínafue izói, íe Ñuera Joreño ñuefuíai finolle ríno, illa dígamíerie íaíoi mo fecade, daje izói caímo.

Jesucristo Juzíñamui Jitó íadi afémie caí illa izói, ía cómena ífcaíde

⁵ Caí úrífrena ñuera úreíríruíllaido nímie illáímaíllena, Juzíñamui íe abi imácina: “Ílláínina jáítíomoi” daíñede.

⁶ Mei jíáfodo comínina illáímaitaacade. Jaíai Juzíñamui Cuegáuaimo David Juzíñamuina daíde:

¿Ñí naga come Juzíñamui díbénedo jamáímíaiaina!

¿Ñibái mei íaíoi mo comécídío?

¿Ñibái mei íaíoi jítótaímo járitaitío?

⁷ Mei uáfue na due jíza o abi imaci jófófenemo comínina comútatío.

Íllaíma ebírenano naa ñúefue díga íaíoi mo níadáio.

⁸ Naga raa íaíoi anamo o itátatío.

Daí naga raa íma anamo itábicaíllamona, jae mínica íe anamo itábicaíñedena íñede. Mei íadi ja bíruí íma díbénedo naga raana náamatañega. Afe izóíñedeza; afémie nahí náamañede.

⁹ Mei íadi jíáfodo bíruí Jesuna caí onónamona íemo comécídicaí. Afémie nana íanori due jíza Juzíñamui abi imaci jófófemo jónegamie. Aféruído afe Jesús nano caí jíáínona, tílla onóíllena facade; mei afe lezica nana comíní fiénidífuemo ícoínia Juzíñamui zóofegamíeza. Ie mei tíide meíne abído cáanamona jamánomoidímíena jaíde. Afe mei afémie, illaíma izói, ñuefuena nítcámie, jae ebíre finócamie, mei nauí íe tíllaruímo íere duere íe zefuíllamona. Juzíñamui

cairi dúecaillano, nana comini niné táinocaitañellena cai ícoinia Jesuna daif zefuítate.

¹⁰ Juzíñamui daif ie Jitó duere finoille caimare íemo jóbide. Ie jira Juzíñamui íaioina jillotaite ífódímie duere zefuillafuedo nana cai jillonafuena ñue fuitade. Mei jii, naga raa Juzíñamui íeiena ie ínuamona ja birui itíaiói. Afémie nana comínimona aillo jitótíai jilloacade ie caimare ebírenanomo dáanomo íaioi dúcizaillena.

¹¹ Mei Juzíñamui dibénemo oni jóonetímie Jesús, nana Juzíñamui dibénemo oni jóonegamaci diga daje Juzíñamuina móorediaioi. Iemona, cai baimo jamánomoidímie íadi, Jesús “Cue ámatiaidíomoi” daif dánana meáruíñede.

¹² Afémie Juzíñamuina daide:
O mámeçi cue ámatiaimo jino llóitícue.

Nana omo gairídino cígiri rocana ñúefue omo nítaitícue.

¹³ Jáíinomo Cuegáuaimo daide:

Cue Juzíñamuído. Omo ínoítícue.

Ie mei jáíinomo daide:

Be, benó itícue, Juzíñamui cuemo iga naa úruiairi.

¹⁴ Onódiomoiza, nana cai jae cómena comuítagacai. Daif cai íllamona, daje izói Jesús dama cómena comuíbicaide. (Ua, fia come izói jéiciga.) Afe mei come abí íemo íllamona, ie tíllado cai títaite Taifena ríinitade.

¹⁵ Jáíáimona nana tílle jágiedo Taífemo rairuícagicacai. Mei íadi Jesús jae cai jacíruiñeillena nane ñue cai finode. Ja ráiruíñeganona afémie daif cai ñue orede, nana nauí cai caana llezica tíllena jacíruiticai íadi.

¹⁶ Mei uáfodo onóigaza: Jesús ie bíllado Juzíñamui abí imácina cánuaibíñedeza, mei íadi cómena íficaillano nana Abrahámona comuídigimona cánuaibite naa jáíie Juzíñamuimo ínotinori.

¹⁷ Afémie cai cánuaibillemona ie ámatiai nana íaioi illa izói afémie íficaillana íere jitáiredeza, mei dúecaífirede nahí comínimona Juzíñamuimo comínido úritíllaimana jáideza. Ua ínofirega Juzíñamuimo úriraimana jáiacade, afe daif ie tíllado comínimo íte fiénidífuiai oni muiñóllena.

¹⁸ Mei Jesucristo íaifue fiéni facátafuíaímona duere zefuide, aféíuemo baííñede íadi; íemona ja birui fiéni Taife facátagamacina cánua ríino Crístromo íteza, ja caina ñue canórede.

3

Jesús Moisés baimo jamánomoidímie

¹ Ie jira, cue ñue ámatiai, Juzíñamui uáidogamací dibénemo jáináidíomoiiza, Jesumo izire comeci omoi facari; ua cai jeire oga ñúefue lluaíbitagamíemo ñue comeci omoi facari. Iemo nane Juzíñamui dibénemo caido ñue úritímíemo, mai íemo comeci omoi facari.

² Bie Jesús íena daif mamédímie ocuica uaina jaca nágaruillai ínofirede; ua, jáíáidímie Moisés nana íemo llogáuaina jeire ófírena izói, afe izói bímie nana íemo ocuica uaina jeire ófírede.

³⁻⁴ Jae onódiomoiza naga jofo come niga; dama abina niñédeza. Mei íadi naga ráaniai finódimie Juzíñamui. Iemo daje izói ja onódiomoiza, naga jofo niraíma afe nigaco baimo ñúemieza. Afémíemo jamánomo ñúefue jóonerede. Ie izói afe bie Jesús Moisés baimo ñúefuena nitáregamie, mei naga raa afémie comuítagaza; íemo jáíi daje izói Juzíñamuimo cai jáináinana Jesús comuítateza.

⁵ Ua, afe Moisés nana Juzíñamui íemo llogáuai, Juzíñamui dibénemo táijiacadímie izói, aféuaina ñue jaícina Juzíñamui eneno nizeca Israel náiraimo llotátate. Afe daíí afémie ie méifodo bite llófuellifue mo uai nabáitate.

⁶ Mei íadi Cristo, jofona náamataga Jitó izói, nana ie anamo itinona ñue jaícina ocuíoide. (Afe daíí Cristo Moisés báifene ímienaza onódicai, mei naga jitó, jofe ero táijiraima baímo itímenaza.) Iemona Cristo dáinana, cai ínuafue ñue riire itífuedo are illa ícoímo jeire cai oíadi, Juzíñamui comínidicai. Afe llezica afémiemo caimare cai úíñuana jitáirede.

Juzíñamui comini comeci caimare uái illafue

⁷ Ie jira Juzíñamui Ñuera Joreño jaiái Cuegáuaido daíde:

Birui Juzíñamui dáináuai omoi cacana llezica omoi coméciai ríiretañeno iri.

⁸ Jaiái énie zaféredinodo Israel comini facátaruimo afémaci íaiói comeci riire ínuano Juzíñamuina uáitataíoi.

Jíi, afe izói omoi íñeno iri, daíde.

⁹ Iemo nane Juzíñamui daíde:

Aféruillaído jaiái omoi uzútiai Judíuai cuemo íñoñeno fiene facátafuedo cuena facátataíoi.

Cuarenta diga fimónado nana íaióimo cue finócafuaiaina ciódiaíoi íadi, cuemo fiene comécidíaioi.

¹⁰ Ie jira afe bigima cuena ríicaitade.

Afémacido daídícue: “Íaiói comeci cuemo figo jaináíñenamona, cue lloga io onóñeno oni nibéfodo jáidinona itíaiói.”

¹¹ Iemona áferi icírillano ríirede uaido daídícue: “Jaca cue lloga caimare comécina uái ocózinaillana óñeítaiói,” daídícue.

¹² Amatiai, daje izói figóñede, ñúefuena íáiruiga íñoñede comécimona mai abí omoi rairuiri, afe izói omoi íñeilla. Mei afe izóidímie cai caade Juzíñamuimona oni eneno jica íteza.

¹³ Mei íadi nágaruillaído, Juzíñamui ómoína nai uáidua llezica, Juzíñamui dibénemo ñue riire jainairi. Iemo dani ómoimona ñue lletari. Daíí ñue omoi llóiri, fiénidífue ie abi jífuiafuedo buna ómoimona dáamie comécina ríireíñellena.

¹⁴ Mei nanóidemona caimo ite izire ínogafue, riire fáicanocaiñeno uáfueña cai onóíadi, jae Cristo dibénemo jaináidinodícaí. Aféfuemo rairuíñeno ñue omoi jíeruiri.

¹⁵ Juzíñamui Cuegáuai daíí daíde:

Birui Juzíñamui dáináuaina omoi cacana llezica, jaiái Israel Juzíñamuina uáitajaruimo comeci ríirena izói, omoi comeci ríiretaneño iri.

¹⁶ ¿Bu mei afe Juzíñamui uai cacáidino íadi, nane dánomo íena uáitate? Mei nana Egíptomona Moisés bairócamaci Juzíñamuina uáitate.

¹⁷ ¿Mei níimaci cuarenta diga fimona Juzíñamuina icírítate? Mei nana afe Juzíñamui uai íñoñeno fiene finódino; níí afémaci ícuruai énie zaféredinomo fiénocaiga.

¹⁸ ¿Níí náiraina ríirede uaido Juzíñamui daíde: “Jaca cue lloga caimare comécina uái ocózinaillanomo dúciñeítioí?” Mei nana afe ie uaina cacáidinona íadi aféuaina jeire óñédinona daíí daíde.

¹⁹ Daíí íaióina dáinana íaiói íñoñenado jofe cáimanomo dúcinidiaíoi. Ua daíí íñuenomo íaiói dúciñenana onódicai.

4

¹ Ja birui Juziñamui uafue caimo lloga caimare comécina uái ocózinailana cai olle uai caimo ite. Aféuai nai caimo illa llezica mai ómoimona dáamie aféuai comécimo óeillena daítadifuemona mai abí omoi rairuiri.

² Mei uafue cai bie ñúefuena llogámacidicai. Ua afe jaiái Egíptomona bairócano ñúefuena llóina izóí ñúefuena llogámacidicai. Mei íadi íaioi cacana uai figo íaioina canóñede; mei íinoñediaioiza fia táinona cacádiaioiza.

³⁻⁴ Mei íadi Juziñamui lloga caimare comécina uái ocózinailinomo nahí jofo jáidinodicai, mei ie uaina ñue cai ínofirenado. Birui Jesumo cai ínuamona, caimare comeci jacíruiñenafue dibénemo jónegacai. Jira ocózinairanomo táijíñeno cai illa izóí, jae caimare uái iticai. Ie mei uire Juziñamui illánomo ñue afémie diga caimare uái íiticai. Jaiái ínoñedinona Juziñamui daide:

Iaioimo cue riicaillano ñue riírede uaido daidicue, “Afe cue lloga caimare comécina uái ocózinailinomo jaca dúciñeítiaioi,” daidicue.

Daíí Juziñamui íaioina daide. Mei íadi ua íaioi caimare illíue Juziñamui are uícomo mamécaza; mei jae are énie ie comuítajaruimona, nana Juziñamui ie finócafuiái, naa caimare cai illífuiaíri, jae fuitádeza. Mei Juziñamui jáinomo ie Cuegáuaimo afe ie ocózinailaruído úrite; daide:

Juziñamui seis dígarui táijide; ie táijina mei siete iruimo nana ie finócafuiáimona caimare uái ocózinaide.

⁵ Afe mei jáíruido ie Cuegáuaimo Juziñamui daide:

Cue lloga caimare comécina uái ocózinailinomo dúciñeítiaioi.

⁶ Iemo ñúefuena nanoide cacáдино ínoñenamona afénomo jofo íaioi jáinina méifomo, áfeo nai jáíimaci jáillena túide.

⁷ Ie jira Juziñamui diga fimona jailla mei, David roránicuaído comini uáiduano meíne jáíie billirui íaioimo llote. Afécuaimo, due jiza illamona cue lloga izóí, Juziñamui daide:

Birui Juziñamui daínáuaina cacádiomoiiza omoi comécina riíretañeno iri, daide.

⁸ Mei íadi Josué afe jáiáidinona nahí caimare come comeci jacíruiñenanomo uíñede. Ie jira diga fimona illa mei Juziñamui meíne abído comini caimare illíruina úrite.

⁹ Iemona afe nahí caimare come comécina uái ocózinailafue nai ite, Juziñamuimo jáináidimacina dani íaioiena maiñóllena. Afe ñue caimare cai illíue ocózinailaruimo cai ocózinaila izoide.

¹⁰ Mei naga afe Juziñamuimona oga caimare illífuena maiñódimie, dama ie jilloille naa ie nícidogano fáicanocailano, caimare uái ite. Ua Juziñamui naga ráaniai ie finua fuilla mei, ocózinailano caimare uái ite. Afémie uái illa izóí caimare uái iticai.

¹¹ Ie jira afe caimare cai illífuena mai ñue omoi maiñori. Mai benómona daíí omoi ífireiri, ómoimona buna jáíairagima bífuena íaioi ínoñenado íaífuemo baíílla izóí omoi báííñeillena.

¹² Nana Juziñamui lloga uai, jaca íocire cáadimie izoide. Afe uai jaca ninomo riíredeza, buna oni caitánide uai. Aféuai comini ífóciaimo déifrede; ua íaioi comécina zuitáírede. Mei jíí, jáíre jicaica lloéfaído abí ñieta iere jofo ícurumo raíre dúcizailla izóí, afe izóí Juziñamui uai nana cai comeci ífuiaí onótate. Uáfuenta cai comeci facáduana naa cai comeci jítaillafuiaíri fídiáno ñue uáfodo jáicina jino caimo onótate.

13 Nana Juziñamui finócafuiai íemona oni retáidonide. Ua, daa Juziñamui ciónenamiena iñede. Nana cai comécillafuiai cai finócafuiai diga, uáfori cai nahí Jicánoraima ui anamo ite.

Jesús Juziñamui dibénemo caido ñue úrifredillaíma

14 Jae Juziñamui Jitó, Jesús, mona úillie illano iere caifófenemo jaillano, Juziñamui illánomo dúcide. Dúciillano Juziñamuimo dibénemo caido ñue raire úriraimana jaide; ua afémie caido úrifredillaímana jónega. Afe bie úriraima caímo íllaza, mai nana afémiemo cai comécilli; afémiedo cai ínogafuiai fáicanocaiñeno jáicina riire ñue íemo cai ínoilli.

15 Afe caido Juziñamuimo úrifredillaímana nana cai abi ríidolle ríino iñénana onode. Ua afe cai ríino iñénamona cai féiraírenana afémie onode. Ie onónamona caímo dúcaífirede; mei afémie cai izoide cómena ífcaillamona, nana fiéni facátafuiaiina cai cacana izóí cacade íadi afe fiénidífuiaímo baííñede. Iemona Juziñamui dínená jáiredícai.

16 Ie jira Juziñamui illáímana illánomo cai úrizaiilli; mai omoi jacíruiñeno afe caido úrifredillaímodo Juziñamuimo raire úrifreiri. Daí íemo úriredícai caína ie dúcaíllano cai fiéni finócafuiai íba caímo óñeíllena; daje izóí afémie cai jitáíllíruído cai canóllena, afémiemo úriredícai.

5

1 Naga come dibéfodo Juziñamuimo úritillaíma comínimona nízedá oga. Uano Juziñamuimo comínido úrillena mamécámie. Daje izóí afémie comíni dibéfodo Juziñamui íóbitalle ráfuiai finófireíllena mamécámie. Íaíoi Juziñamuimo íia íga ráaniái afémie izájite. Daje izóí íaíoi fiénidífuie íba otátáñelle íia fállena fecaca tóica rílleniái afémie Juziñamuimo izájite.

2 Afémie ríinide cómena íllamona, íaíoi ílla izóí abina onóñedímacina fáicana comeci járitañeno caímare fíraízitaite. Daje izóí oni níbéfomo baíídínona comeci járitañeno létaite.

3 Mei afe nízécamie cai izóí ríinidímie. Iemona dama íe íaífuiai muiñolle tóica rille jáíimaci fécajilla izóí, afémie jáíí fécajirede. Ua nana comíni dibéfodo izábilla izóí, dama íeíena afémie izábirede.

4 Afe íere ñuera Juziñamuimo úriraimana íllena, buna dama íe comeci jítaina izóí ínide; dama Juziñamui jónegamie daíí írena. Afémie caímare jacíruígámie. Jáíáídíruímo daíí Juziñamui Aarona uáídote. Uáíduano, Juziñamui íena nízedá úritillaímana jóonete.

5 Afe izóí Jesucristo Juziñamuimo comínido úriraimana íllena raire dama úíofcaíñede. Mei íadi Juziñamui daíí úritillaímana íe jóoniacana llezica íena daíde:

Cue jítódio; ja birui illáímana o jóoneíticue, daíde.

6 Ie mei daíí daínámiena Juziñamui jáínomo nane daíde:

Jaca nínomo Juziñamuimo comíni dibéfodo úriraimadio. Ua jáíai nínomo Juziñamuimo úriraima Melquisedec izóí jaca nínomo Juziñamuimo comíni dibéfodo zííñona úriraimana íitio. Aquíe izóí Juziñamui íe Jitó Jesuna daíde.

7 Cristo cai come izóí bie éniédo jáícaíllaruílláido, izire écana Juziñamuimo comeci facade. Iemo dáaruído Juziñamuimo izire jícade. Afémie daíí íena jíllotaredímie mo comécido úrite; daíde: “Bie cue tíiacanafuemona maí cue

jíllota” daide. Iemo Moo Juziñamui anamo afémie ñue itábicaillamona comécido Juziñamuimo ie jícajana Juziñamui cacade.

⁸ Daií Jesucristo Juziñamui Jitó íadi, ie duere zefuillafuiaido ocuilla uai anamo itábicaillana fibide.

⁹ Afemona afémie daií nana cai jíllouillifue ñue fuitállena jamánomo jaícina fibítagamiena jaide. Ie jira nana íemo ñnotimaci dibénemo Jesús ziiñona Jíllotaraímana jaide. Ua ziiñona jíllonafue tainédimienna jaide.

¹⁰ Mei jira Melquisedec izóidimie Juziñamuimo comini dibéfodo ziiño úrifreitimiena, Jesús jae Juziñamui mamécamie.

Cai ñnogafue meine abido cai jáanolle iere jacírede

¹¹ Bífuiuido aillo úriacadicue, mei íadi iere cacáacañediomoi. Iemona nai figo baitañedino izóí itíomoi. Daií omoi íllamona, bífuiái ómoimo jino cue lolle iere féirede.

¹² Naui nano Crísto omoi ñnuaruimona jae diga fimona jaide. Iemona jae oni jáímacimo omoi llófuerizaille iere jitárede. Mei jáífodo ja birui meine abido Juziñamui llogáuai tainéinafuaiena ómoimo jáíma llófuelle jitárede. Nai monoi jirode úrue izóí meine abido úruetaidíomoi; nai figo baitañedino izóí itíomoi. Ua llíciaina nai rínide izóidinona abido jáidiomoi.

¹³ Mei jii, naga monoi jirófredino, móonaiñena llezica nai dúetiru. Daje izóí naga Juziñamui anamo ñue jaícina caina móonaitade llófueinafue dibénemo baitañedimie nai úrue izoide. Mei afémaci nai móonaiñeno úruiai izóí baitañediaoiza.

¹⁴ Mei jáífodo dama móonaita écomini llíciaina rírena. Afe izóí juárede llófueinafue ñue onona dama comécina ñue jéedimacimo dúide; mei afémaci aillo facáfirenamona ñúefue fiénidifue baimo ñue onónana fibídiaoiza.

6

¹ Ie jira afe nánoide Cristo dibéfodo llogáfuiái ómoimo llúana ja moziñocadicue, jáíe cómfue ómoimo jino cue llóllena. Omoimo cue lolle bie cómfue, Juziñamui llogáuailaído ómoína ñue jaícina móonaitaite. Aféfuiai mai jeire cai olli. Nano úcodo lloga ñúefue jillácina meine abido diga icaíño ómoína llófueñeiticue. Afe nanóidifuiái bie izóí daide: “Ómoína jíllotañeite omoi nícidogafuiái fáicanocaillano ñúefuena méidori. Méiduanu, mai Juziñamuimo omoi ñnori,” daide.

² Temo afe nanóidifuiái báutizaafuedo úrite. Iemo dáanomo onoi cómemo bitafuedo úrite. Daje izóí come tulle mei, afe tíidinomona meine abido cáaillifue lloite. Afe emódomo, íirairuimo Juziñamui nana comínimo jícanolle mei ziiñona duere finóttallifuedo úrite.

³ Nana bie nanoide llogáfuiaina meine abido llófueñeiticue. Mei íadi, Juziñamui comeci jítaina izóí, afémie cue canólledo, ñue móonaitdifuiaina omoi llófueiticue.

⁴⁻⁶ Daií birui ómoimo llófueacadicueza, mei nanóidifuiaina uáitajano oni jáífodo féiraitimíai íaioi illafue nano ñue ñnogafuena jaca méidonide; mei afe ñúefuena nai náfueñediaoiza. ¡Mai, abi omoi rairuirí! Afe daiítadimaci nauí dáaruina Juziñamui llófuegamaci izóidiaioi; ua Juziñamui dibénedo ífcina déitaganona itíai. Daje izóí, monamo ite Juziñamui daina caimátallifuena facádiaioi. Iemo daje izóí afémaci Juziñamui Ñuera Joreño úicaillana jae facádiaioi. Afe llezica Juziñamui ebírede daínauai cómena ñúetatifuena afe íaioi

fácamona, ñúerana onódiaioi. Afe emódomo, Juzíñamui Jitó uire illáimana illirui llezica, íemo ite comini cáimadolle ríinodo jae bimaci canócaiaioi. Jae nana bie núefuiaina fibídiaioi. Mei íadi afe mei Juzíñamui ífuiaina móonaitaoíñeno, aféfuiaiana íaioi uáitaiaí ñúefuena méidofinidinona jáidiaioi; mei daíí afémaci íllamona Juzíñamui Jítóna cruzmo fatátatimaci illa izóí afémaci dani itíaióiza. Ua nairai uíecori íena jifánodoia izóí íena meáidaitadiaioi.

⁷ Bie izoide comini comue jacafai aiñena izoide. Juzíñamui búitaga noci naga éniemo diga ícaíño bíide. Iemona afe éniemo ñue ria aite, afe éniemo táijidíno güíllena. Aféniena Juzíñamui ézicite.

⁸ Iadi jáínomo noci bíilla mei, daa figóñede éegiai ailla, naa zaie diga. Afe izóidinie ráifíñedeza; nibai íanori íllamona Juzíñamui fáidoite. Iirainomo afénie jobáíllamo dúide, naa afénomo zicódinuairi mei figóñedeza.

Cai úíñoigafue caina riire nabaide cai ínogafue féíñellena

⁹ Mei íadi cue izíruiga ámatiaidíomoi. Jae cue lloga faidórafue baimo jamánomo ñúefuiaí dibénemo jáináidíomoi. Ua omoi jíllonafuemona comuide cáimaduafuiaí maíñóíredíomoi. Aféfuena ñue onódicue.

¹⁰ Juzíñamui comécina jáicina jóidímie. Iemona nana íena omoi izíruíllamona omoi finoca Juzíñamui comini cánua ráaniaina, afémie féítañede. Daje izóí aféfuiaímo nai birui jíeruitíomoi. Ua Juzíñamui jáináidínona izíruíllano, ñue afémacina riire canóíredíomoi.

¹¹ Ie mei birui afe izire omoi nícidua izóí, daje izóí ómóimona illa dígamieriena Juzíñamui ocuíriri daidícue. Iemona omoi ínogafuiaí jeire ómóina otátaacadícue, omoi úíñoigafue táinomo fáifíñeíllena, mei jáífodo ñue jáicina omoi fuitáíllena. Afemo ómóina nágarui izire comécíiri daidícue.

¹² Daíí izire omoi comécíiíllamona ráiraiedíno illa izóí íñeítíomoi. Mei omoi ñue comécíiíllamona, jáíífodo daade Juzíñamui lloga ua caimare íllafue dibénemo itino illa izóí ítíomoi. Afémaci íaioi ínogafuedo íaioi abina ñue finóinafuena Juzíñamui omotaí. Ua comeci járitaiñeno are illa ícoímo Juzíñamui uícodo íaioímo lloga ñúefuena maíñóíroidiaioi. Íaioi ílláfue mo ñue omoi comécíiri, íaioi illa izóí omoi íllena.

¹³ Mei jíí, Juzíñamui íere ínofíregamie. Jáiaí Abraham ílláruimo Juzíñamui uafue uai Abrahamo llote. “Aillo comini jebuítaitío” jáiaí uícodo íemo llote. Llua llezica uafue daííllena Juzíñamui dama íe mámecina llínote, aféfuena Abraham ñue íñollena. Ua Juzíñamui dama íe mámecina llínote, mei jáíe baimo jamánomoidímiena íñedeza.

¹⁴ Daíí Juzíñamui Abrahamo daide: “Uafue íere ona ñue caimátaitaitícue. Jae cue o jítóretallemona, o erófene ígímana jamánomo íere jebuítaitícue,” daide.

¹⁵ Iemona Abraham comeci raire járitaiñeno, diga fimona áfemo úíñoíide. Daíí íe ocuírina mei, afe Juzíñamui lloga caimare íe nairai jebuíllífuena Abraham ñue maíñódeza.

¹⁶ Bíníe comini cígímona dáamie uáfue daííacana llezica, afémie baimo rííredímie mámedico uafue daíítate. Daíí lloga uaina buna oni caítáíñede. Nana dani íaioi júfidogana Záítate.

¹⁷ Daje izóí Juzíñamui íe lloga finóllííue, jáíe ñue ríírede uaido, aféfuena íere uafue daide. Afémie daíí dáideza, mei íe uícodo lloga ñúefuena maíñóitínomo, afefue ua jáíífodo méidonidena jíno íaioímo uáfodo llóiacadeza.

¹⁸ Daií Juzíñamui mena caitánide uáillaido íaioimo llote. Afe ménacaiño ie daina dibénemo Juzíñamui táinona llónide. Afémie daií daide, áfemona cai comécina ñue íociretallena. Iemona caimo ie lloga ñue cai jillonafuemo fáicanocaiñoeno íinofiredicai. Mei jii, cai Jíllotaraima Jesucrístomo jarire jailano caina ie úiñotaga comeci íaifue dóllena raire íemo jicádicaí, caimo ite ííenidifue iba óñeillena.

¹⁹ Afémie cai jíllotallena caimare úiñooidicaí. Iemona afémie caina daináuai cai comeci nífuenina ñue mozóitade. Ua cai úiñoigafue caina riire nabaide cai íinogafuiaí féiñellena. Daií comeci docáiñoeno ñue riire nabáitaga jacíruiñedinodicaí. Mei cai jíllotaite cai úiñoгамie Jesús, caifo monamo Juzíñamui nahí ie iránomo íteza.

²⁰ Afe Jesús, cai jáillio ífódimiena afénomo jae jaide. Daií íllamona afémie jae comínido Juzíñamuimo ziiñona úritillaimana jaide. Ua, jaiái Juzíñamuimo úriraima Melquisedec izóinado, Jesús jaca ninomo caido úrite.

7

Jesús, jaiái Melquisedec illa izóí comínido Juzíñamuimo úriraima

¹ Afe Melquisedec Salem jofue illaíma. Afe llezica afémie comíni dibéfodo jamánomoide daade Juzíñamuimo úrifredimie. Jaiái íllaruimo Abraham jíaie aféniemo ite ílláinina anáfenuaide. Íaioina anáfenuano Abraham meine bítemo, afe Melquisedec io anamo Abrahamo dúcizaide. Dúciillano Melquisedec, Abraham abi ñue finóllena Juzíñamuimo jicade.

² Afe llezica Abraham nana ie bairoca ñuera ráaniaimona, Juzíñamui íena eneno mameca ráaniaina, Melquisedécimo raíñoñoeno fia fecade. Melquisedec nanoide daina mámecei “Comécina jaicinaidillaíma” fueñe daiíacade. Ie mei afémie nane jíaici ote: “Salem Illaíma.” Afeci “Comíni comécina caimare uái itátatillaíma,” daiíacade.

³ Afe Melquisedec moo mámecei jaca onónide, naa ie ei mámecei diga. Daje izóí ie emódoidigima jíai ónoñega. Daje izóí afémie jocóinarui ónoñega, ie túllarui diga. Iemona afémiena comíni “Ziiñona ítímie” daide. Afe Melquisedec comíni cigiri ílláfuedo Juzíñamui Jitó ziiñona cai dibéfodo úriraimana ílláfuenta caina fidítate.

⁴⁻⁵ Mai bífuemo ñue omoi coméciri, Melquisedécimo ite jamánomoidifuenta omoi onóillena. Ua Melquisedec, cai nanoide jáiairagima Abraham baímo jamánomoidimie. Mei Abraham ie bairoca ráamona Melquisedécimo fecádeza.

Abraham enaize Jacob doce dígade jitórede. Iemo afe jítóniaí cigimona Leví comuídeza. Afémie comíni dibéfodo Juzíñamuimo úrillena Juzíñamui nízedá ogámie. Ie jira nana judíuai Juzíñamuimo úriraini Leví úicoidigimamona comuítagaiaioi. Afe Juzíñamui nízedca Leví náiraina, Juzíñamui Moisés ocuica uaido daide: “Nana jíaie judíuai nairai ímácimona Juzíñamuimo dúide ráaniaina órediomoí,” daide. Ua Leví náiraimo íbarede, nana jíaie Israel nairai daa Abrahámona comuídino íadi. Ie jira Leví comíni nana afe Juzíñamuimo dúide ráaniaina ílíinofirediaioi.

⁶ Mei íadi afe Melquisedec, Leví nairai izíe íeñede. Mei íadi afémie áfena ílíinoñeniadi afe Melquisedec, Leví emódoidigima Abrahámona Juzíñamuimo dúide ráaniaina uáfuenta ílíinote. Iemona Melquisedec Leví baímo jamánomoidimieza onóidicaí.

Afe ráaniai ie llínua llezica, Melquisedec Abrahamo úrite. Abraham Juziñamui íemo ñue finóllifue, uieçodo fidítagamie. Iemo ja birui Melquisedec afémie ñue éziciano daide: “Juziñamui ona ñue cánoiteza,” daide.

7 ¿Ñibémie mei jamánomoidimiena? ¿Ezicitimie mei nibai ézicigamie? Ua, ézicitimie baimo jamánomoina. Afefue buna jáanoñega.

8 Nane jáifue llóiticue. Cai cigimona eneno nizeca Leví comini, Juziñamui íena nano mameca ráaniaina llínofiredino. Mei íadi afémaci fia comíniza tíffirediaioi. Mei jáífodo afe jáie llínnotimie Melquisedécina mámeciredimie Juziñamui Cuegáuai daina izói, tíñeno caade izóidimie. Ie jira Melquisedec jamánomo báimoidimie. Leví imaci nai Melquisedec jofófeneidino.

9 Iemo jáifue Levido daírede. Leví Abraham erófene igima. Mei íadi afe Juziñamui íena eneno mameca raana llínofiredimie jaiiai uíçodo Melquisedécimo ie uzuma Abrahamdo Juziñamuimo dúide raana ibade. Daí Leví comini, jaiiai uieçodo Juziñamuimo dúide raana Melquisedécimo ibádiaioi.

10 Mei Leví nai jocóñena llezica ie comuillino nai Abrahamo íteza. Ua Melquisedec ja Abrahamo dúcinaruimo, Leví jocóillino nai jaca ie nanoide uzúmamo íte.

11 Israel náiraïmona eneno nizécazie Leví comini. Aféziemona nizeca nanoide Juziñamuimo úriraima Aarón. Afémie naa ie erófene igimairi comínido Juziñamuimo úriraini. Ie jira afe úrirainido Israel nairai Juziñamui ocuilla uáillaina llogáiaioi. Mei íadi nana afe Juziñamuimo úriraini finócafuiai comini ua ziiñona jilloillena figo jinoñede. Comini comécina Juziñamui jítaina izói nahí jaïcina jóoitañede. Aarón naa ie erófene igimairi finócafuiai figo jinoñena jira, jáie afémie izóíñede baimo jamánomoidimiena jítaidicai, afémaci méifomo jóonellena. Ua Melquisedec ziiñona illa izóidimiena jítaidicai. (Ie jira afe Aarón comini meifo méidoitimiena Juziñamui jae jino náiraïmo ciotate. Afémie mámeçi Jesucristo. Ua Aarón comini méifomo jóonegamie Melquisedec izóidimie Jesús; afémie Aarón dibéfomo jaináíñede.)

12 Jae afe jaiiai uíçomo íte Juziñamuimo úriraini nana dáanomo jáiiena íaioi méidua llezica, afe Moisés íaioïmo ocuica uaillai daje izói jáífodo méidorede.

13 Juziñamui Cuegáuai daí dainámie cai Ocuíraïma Jesucristo. Afe como jóonega Juziñamuimo caido úriraima Jesús, Leví nairai ímieñede. Jáiziemona comuïdimie. Ie nairai ímiïaina jaca nizéñega, Juziñamuimo comínido úrillena. Ua comini fia fecaca tóica rílleniai naa ráaniai diga Juziñamuimo izájillena, nízeñegaiaioi.

14 Ñue onóigaza cai Ocuíraïma Jesús Judá náiraïmona comuïdimie. Moisés afe náiraïmo Juziñamuimo úrirainina íllena, jaca lloñede.

15 Afe jáie como jóonega comínido Juziñamuimo úriraima Jesús, jino cióïllamona, bífuïaina jino uáfodo baimo onódicai; mei dama afémie Melquisedec izóinaza.

16 Bímie dama ie ñue ziiñona ífírenamona comínido Juziñamuimo úriraimana jaide. Mei jáífodo Leví náiraïmona jaiiai nizeca Juziñamuimo úriraini ocuica uai dainado úrirainina jáidiaioi. Afe uai ñue náiraïmona nizéllena llote.

17 Mei íadi como jóonegamie Jesuna Juziñamui ñue rírede nabáitaja uaido daide:

“Melquisedec izói jaca ninomo Juziñamuimo comínido ziiñona úriraimana ja birui itioza,” daide.

18 Iemona afe uícodo ite ocuica uai jae oni caitaca, mei afe uai riñideza. Iemo jiái, aféuai comini comeci nahí duáfueña figo jínotanideza.

19 Afe Moisés ocuica uai buna comécina nahí jaícina finóñede. Mei jiáifodo jiáie aféuai baimo, ñuera cai jílloitaite úiñoigamie Jesucristo jae caimo ciotaga. Afémiedo Juziñamuimo ánozifiredicai, uáfodo Juziñamuimo cai úrillaena.

20 Afe Jesucristo Juziñamui riire nabáirede uaido jóonega.

21 Ie uícodo Juziñamuimo úrirainina jáidino, riirede uaido jóoneñegaiaioi. Mei íadi Jesús comínido Juziñamuimo úriraimana jáillarui, Juziñamui riire nabaica uaido ja daí mameca. Mei Juziñamui ie Cuegáuaimo Jesudo úrite, daide:

“Cue Juziñamuidicue. Bifue riire cue nabaica uaido daidicue. Cue comeci faca uai jaca jiáiuaina méidoñeiticue.

O zíñona comínido Juziñamuimo úriraimana itio;

Ua Melquisedec izóidimedio,” daide.

22 Ie jira Jesucristo, Juziñamui jamánomo ñuera caimo comue finóllifue caina ñue onótate. Ua Jesucristo aféuemo iere uafue daide. Afe finóllifue Moisés lloga nanoide finóllifue baimo ñuera.

23 Jesucristo uícoidiruillaimo ite Leví náiraimona nizeca Juziñamuimo úriraini ua aillo ite; mei íaioi ticoizifirenaimona jaca jiáimiena méidofiregaiaioi.

24 Mei íadi Jesús cai dibéfodo Juziñamuimo úrillaena, jaca jiáimiena méidonide; mei afémie jaca ninomo zíñona itimieza.

25 Iemona Jesús nana íedo Juziñamuimo úrizabitinona, jaca ninomo jaícina ñue jílloitarede, mei afe Jesús, íaioiri Juziñamuimo zíñona úriraimana íllaza.

26 Ua, afémie izoide Juziñamuimo comínido úritillaimana jaiái ninónona jitáidicai. Ñue cai jílloillifue afémie caimo ñue zúitaitimie, mei afémie nahí ñuera nífuenidimieza. Afe llezica afémie nana fiénidimaci íaifuemona oni enero rairuícamié. Ie mei afémie mona ero úcuai illa caifomo, Juziñamui nahí illánomo uigámie.

27 Jaiái uícómo ite Juziñamuimo úritillaini nágaruillaído tóica rílleniaina fatá Juziñamuimo izájifirediaioi. Nano fueñe daní íaioimo ite íaifue ícoinia áfeniaina izájidiaioi. Afe mei comínimo ite íaifue ícoinia áfeniaina izájifirediaioi. Mei íadi Jesús afe izóí finuana jitáíñede. Afémie dácaíño nana comini íaifue ícoinia dama ie abi Juziñamuimo fecade. Ua cruzmo ie duere zefuida tíllado abi fecade.

28 Afe Cristo uicécodo lloga ocuillafuedo llotino, jiáie jamai figo nahí jaícina finótañede comínimona Juziñamuimo úritillainina mamédiaioi. Mei jiáifodo, afémaci méifomo jóonega úritillaima Jesucristo, Juziñamui ñue riire nabaica uaido jóonega. Afémie jaca ninomo nahí jaícinaítaga Juziñamui Jitó.

8

Juziñamui caimo cómuena finóllifue, Jesús caimo jino denódimie

1 Nana cai daináfuiamona llógana bie ñue nahífueña ómoimo llóiticue: Como lloga caimo ñue jóobide caido Juziñamuimo úriraima birui ja caimo ite. Afémie caifo monamo ite Juziñamui nabézimo ráinazaide.

2 Dinomo Juziñamui nahí illánomo Jesús íllamona, jamánomo ñuera Juziñamui uicécómo Jesús caido úricabite, cai jílloillifue ñue caimo zúillena. Afe

Juziñamuimo cai nahí ánoziranno comini ñinoñega. Jaiai biniemo ite Juziñamuimo ánoziraco comini niga.

³ Naga Juziñamuimo úritillaíma, fia iga ráaniai, tóica rílleniai diga Juziñamuimo fecáfireitimiena mameca. Ie jira cai dibéfodo Juziñamuimo úriraiíma Jesús, daje izói dama ie fécajille raa jítárede.

⁴ Biniemo afémie nibai abido ie bia, afémie caido Juziñamuimo due jiza úriraiímañeite, mei Moisés ocuicauai daina izói Juziñamuimo caido úriraini biniemo nai íteza. Daje izói bimaci nai benó Juziñamuimo fia fecaca raana íemo izájifrediaioíza. (Ie jira caido ziiño úriraiíma Jesús, caífo monamo Juziñamuimo cai ie canólledo úricabite.)

⁵ Biniemo ite Juziñamuimo úriraini aillo ráfuiáido nícidotiaioi. Nana íaioi nícidogafuiái jánana mameide. Iaioi finócafuíai caífo monamo ite Juziñamui nahífuíaina caina fidítate. Daje izói biniemo ite jaiai Juziñamuimo ánoziraco, Juziñamui nahífuena cai fidítaraco. Afena onódicaíza, mei Moisés afeco nitátaacanaruimo, Juziñamui íena daide:

“Caifónedumo o illa llezica omo cue ácataga afécona o ciona izói, afe izói jaícina mai o niiri,” daide.

⁶ Mei íadi biniemo ite Juziñamuimo úriraini nícidogafue iere afe baimo, cai caífo monamo ite úritillaíma Jesús caido jamánomo ñúefuena nícidote. Mei jii, afe Jesucristo caímo zuitaca Juziñamui ñuera caíri comue finóllifue, jaiai Moisés lloga finóllifue baimo ñuera. Mei Moisés ocuica uai baimo, Juziñamui uícodo lloga cómfue jamánomo ñuera uáimona comuídeza.

⁷ Afe Moisés lloga nanoide finóllifue, comini jilloillena ñue jínoiadi, jíáie uire iite ñue finolle uai jítaiñeítiaioi. Mei íadi afe naonide uai íaioi jilloillena figo jínoñede.

⁸ Afe nano ocuica uai jeire otino nahí jaícinaidífue mo figo dúciñediaioi. Dúciñediaioimona, Juziñamui ie Cuegáuaimo íaioína daide:

“Uire jíáiruído nana Israel náiraimo comue ñue cue finóllifue ócuiticue, naa Judá náirairi.

⁹ Jaiai íaioi uzútiaino cue daina ocuica uai izói, ócuiñeíticue.

Jaiai aféruillaído Egipto éniemona afémaci billa llezica íaioína ífódicue:

Ua afémacina izire úcaidicue.

Mei íadi cue lloga ocuica uaina nano íanori fáicanocaillano, áfena figo náfueñediaioi.

Afe jira íaioína zóofeticue,” Juziñamui daide.

¹⁰ Nai nane íaioína lluno Juziñamui daide:

“Úireitruillaído Israel imácimo bie izói cue ñue comue finóllifue ócuiticue.

Aféruillaído cue ocuica uáillaina íaioi ífócimo jaícina déitaiticue.

Ua aféuaina íaioi comécido jeire íaioína otátaiticue.

Iemona afémacina dama cúeiéna nane meine abido máíñoititicue.

Afe llezica íaioi nahí Juziñamuina íititicue.

Iemo cue náiraina íitíai.

¹¹ Aféruillaído nana afémaci uáfodo ñue cuena ónodiaioíza, cuena íaioi onóillena abi diné jíáima llónide.

Iemona ie abi ímiíaimo buna Juziñamuina onótanide. Daje izói dámie ie ámamo Juziñamuina onóillena llóñeite; mei nana cuena ónodiaioíza.

Naga jamáimie, íemo jíái naga jamánomoide ríredillaíma, nana daje izói cuena ónoítiaioi.

¹² Nana íaioimo cue dúecaillamona íaioi fienu finócafuiai íbana óñeiticue.

Nana íaioi comeci íaifuiaina jaca ninomo féitaiticue.

Aféuiaina úibiñoñeiticue,” dinó Juzíñamui daide.

¹³ Bie méifodo lloga Juzíñamui finóllifue, cómfuena méiduamona, afe uécodo Moisés lloga finóllifue jae jaiáza feide. Afena Juzíñamui daií uáfodo llote. Iemo naga jaiái raa zabízaiillamona raire oni dotánocaiga; oni dotánocailleza cíonelle.

9

Bñiemo ite Juzíñamuimo áinozirano, jana izói jíáie monamo ite Juzíñamuimo áinozirano cai fídítate

¹ Afe nauí nano lloga finóllifue llua llezica, Juzíñamui íemo áinoziraco nitátate. Afe nitátaja dáaruido, comíni Juzíñamuina íóbitalle uailái afémacimo daje izói lloga.

² Afe lloga Juzíñamuimo áinoziraco Moisés nitátaga. Afeco ere niñeno jédaciede iníroina íbáicaco. Afe áreco ero ménaco titaca. Jinóidico Juzíñamui Ñúeco daína. Afeco eromo áillue mechera izoide egáñora ite. Siete díga dájemona boode raa ite. Dáanomo Juzíñamui díbénemo oni enénorie rairuica pan jóonerabani ite, naa afe páaniairi.

³ Afe áinoziraco jofóidico Jamánomo Ñuera Rairuícaco daína. Afe jofóidico daje izói jédaciede iníroina ruica diné eróicana nacona íbaica. Jédaciede jígaroi izóidena fetaca.

⁴ Afe fetaca jédaciroi abímo uguci jobáirabani ite. Bibani líiaide órona jinófene aífítaga. Bie jofóidico eromo daa áillue ráaniai éenora ite. Cajona eroide. Afe éenoraco nana jinófene órona aífítaga. Afe éenoraco eromo Juzíñamui nofici íbícimo cuega ocuica uailái ite. Ie jira afeco nofíbícimo cuega Juzíñamui cai ocuilla éenuacona mameína. Iemo afénomo daa oro finoina nogó ite. Afégomo ite Juzíñamui monámoma cocítaga güille. Afe güille mámece maná. Daa afe éenoracomo Aarón jigüida izoide radozi ite. Afe idozi jamai jazici radozi óinaza dúididozi. (Zícorede juzítófe izóíñede.) Mei íadi Juzíñamui afe idózina éniemo riñeno, fia táinomona zicótano raire ñue llízítate.

⁵ Afe éenoraco íbáirabici emódomo mena oro finoina Juzíñamui abi ímácina eroide jana naidáide. Mei íadi afe íaillinoi íaicorede. (Afe íaillinoi mámece ríaimona “Querubines.”) Afe íaillinoi conima uíecomo eróidiaillinoi. Íaillinoi naidaina cígímo Juzíñamui cíocafirede. Afe Juzíñamuina cíóñenaza; dama íe abi egáñuana cíóñirena. Afénomo faga tóiníai díena recuífirediaíoi. Daií recuífirediaíoi, Juzíñamui meine abído comínimo dúecaillano, íaioimo ite fiénidífue íba íaioimo óñeillena, ua afe ícoínia íaioína duere fínoñeillena. Nana afe díbénemo ite duera nícidogafuiaina ja birui benomo llónide.

⁶ Afe ocuica áinoziraco nilla mei, íemo naa íe jofo ero ráaniairi fínua mei, comínido Juzíñamuimo úriraini jinóidicomo jáifirediaíoi. Afénomo íaioimo ocuica comínido Juzíñamui íóbitalle ráaniai finóñefirediaíoi.

⁷ Mei íadi afe jofóidicomo, dama Juzíñamuimo úritillaíma jáifirena. Aféllaíma naga fimónaíaido dácaíño afeco jofo eromo jáirede. Faga tóiníai díena jaca jofo úífirede. Dama íemo ite onóñeno finoca fiénidífue ícoínia daií díena

Juziñamuimo izájide. Ie mei nane nana comini íaifue ícoinia jiáie díena Juziñamuimo izájide.

⁸ Bífuiaido Juziñamui Ñuera Joreño daa jiáifuenta cai fidítaiacade. Afefue daide: “Baie jinóidico nai illa llezica, jofóidicomo jiba comini jaille nai rairuírede. Ua aféruillaido jofu dama Juziñamui illánomo jáinidiaioi.

⁹ Nana bie Moisés illágimado nícidogafuiaí birui cai onóillena canode. Ua comínimo ácatafírega raa izoide, aféruído Juziñamuimo ánozillena nigaco, naa afe eromo íaioi nícidogafuiaíri, ñue jaícina caína onótate. Biruillaido judúai aillo faga tóiníai jiáie fia fecaca raa díga, Juziñamuimo nai izájífrediaioi. Mei íadi afe bíedo íaioi comeci Juziñamuimo ñue jaícina jóitanide, mei íaioi comécimo ite fiénidífuiaí nai féítañegaza, fia íbaica izóí íteza.

¹⁰ Nana afe íaioi nícidogafuiaí fia jinófene ífuiaí. Nñie izóí íítiaioi daide. Dárie íaioi güille, jiroille díga fimairillafuedo úrite. Afe izóí fia emódoide múñuafuedo úrite. Nana bífuiái fia nano nié díno comínimo ocuica, mei Juziñamui jiáifuenta méidolliruimo nai dúciñedeza. Ie jira aféfuiaí daa aféruillai íena ráifide.

¹¹ Mei íadi caído Juziñamuimo úrifreitillaímo Jesucristo, jae caímo dúcide. Afémiedo ñuera cámafuaí caímo zúide, mei ua nahí Juziñamuimo ánoziracomo afémie jáináideza. Afe jaiái bíníemo ite comini niga Juziñamuimo ánoziraco jaboide. Afécomona cai íóbillafue baímo, Jesucristo jamánomo ñuera jíllonafue, caífo monámona ana caímo zúitáibite. Afémie afe nahí Juziñamuimo ánoziracomo dúide; afeco bíníe comini níñega. Dama íe nahico monamo ite.

¹² Nana comini íena, dácaíño afeco eromo ite jofóidicomo afémie jaide. Ie jaiílla llezica chivo díe, juráreto jiza díe díga uíñede; mei jiáifodo dama íe díe úite. Mei jíi, afémie íaífuenidímíena íllamona, cruzmo cai ífomo tóillano, íe díe tótado zúíñona cai jíllonafue ote.

¹³ Jaiái Moisés dáina izóí, íaicaíllamíe íemo ite íaífue bie izóí múiñórede. Múíñoñegamíe Juziñamuimo dúide comini cígido macánide. Daje izóí afémie Juziñamuimo nabáirínide. Ie jira faga tóiníai díe atírede. Iemo jiáie Juziñamuimo mameca juráreto jiza jobaílla afe jízechoma atírede. Ie mei afe íaicaíllamíemo aféchoma júdaírede. Iemona afémie íaicaíñegamíena jaide. Mei jínofena múiñócaza. Ja Juziñamui comínimo meíne abído caímare úrrede.

¹⁴ Mei jíi, Juziñamui dáinamona afe tóiníai díe ríírede, come jinóidífuemo múiñóllena. Afefue daítania, ua onódicaíza. Mei Jesucristo díe jamánomo ríírede. Ua dama afémie ñue nífuenidímíenado Juziñamuimo íe abí dama izáibite. Afe zúíño Ñuera Joreño íe cánuado Jesucristo dama íe abí Juziñamuimo izájide. Iemona íe díe tótamona nana cai comécimo ite íaífuaína múiñótate. Ua nana cai jaiái comona nícidogafuiaí caína zúíñona cáatañede. Mei íadi Jesucristo díedo cai comeci múiñua mei, ua zúíñona cáatagacái, afe jaca nahí caade Juziñamui ocuícano ráruíñeno cai jetállena.

¹⁵ Ie jira Jesucristo jae Juziñamui comue finóllífuie caímo jino zúitaitímíe. Afémiedo nana Juziñamui nízcáno uafue uícomo lloga zúíñona cáimaduafuena maíñóritiaioi. Juziñamui daíí nana comini jíllóillífuie uícodo mamede, mei dama Cristo tóíllado comini fiénidífuiaí Juziñamui dote. Ua jaiái uícodo lloga nanoide finóllífuie illa llezica, nana aféruimo afémaci fiéní finócafuiaí ja birui

Cristo tilla jirari, Juziñamui dote; duano, nana íemo ñnotinona jillotate. Daiñ Juziñamuimo ziiñona caimare nabáirillafue maiñódiaioi.

16-17 Afe maiñórrillafue, come tilla méifomo íitífue izoide. Dámie tíadi ie fiévide feci raa jáimie oni llíinoga. Afémie nai tíñenia, feci raa oni llíinoitimie minica raana nai llíinonide. Ie jira oni llíinoitimie íemo dúide raa maiñóllena, afe raa naama tilla jitárede. Daje izói Juziñamuimo caimare nabáirillafue cai maiñóllena, Cristo tilla jitárede.

18 Afe jira jaiái uícodo lloga Juziñamui ñue finóllífue táiniaruimo díena recuíñorediaioi.

19 Moisés nana afe ocuica uaillai nana comínimo jino llua mei, afe uaillai cuiábicimo faga tóiníai díena cuirínote. Daje izói afe mei nana comínimo cuirínote. Ua llua mei, Moisés duera “hisopo” daina rarocí llíinote. Llínuano, afécimo jáirede oveja itírainna maite. Iemo jáinoína jaicuica díedo afe rarócina riátate. Riáitano, ocuilla uai cuiábici naa comíniri díena cuirínote.

20 Cuirínua llezica Moisés daide: “Juziñamui ómoiena ocuica ie finóllífue bie die uafue daiítate,” daide.

21 Daje izói aféruillaido Moisés íaioi iniroi finoína Juziñamuimo ánoziracomo díena cuirínote. Daje izói nana afeco eromo ite Juziñamui íóbifirena raamo díena cuirínote.

22 Ua, Moisés ocuica uai daina izói jamánomo diga raa, díedo Juziñamui dibénemo dua izói ñue finoica. Iemona die tótañegana comíni comeci íaifuiaí íba jaca órede.

Cristo dama ie abí Juziñamuimo izájille comíni fiénidífuiaína muiñode

23 Afe comíni niga Juziñamuimo ánoziraco Juziñamui ocuide, naa afeco eromo ite ráaniairi. Iemona nana afeco eromo ite ráaniairi Juziñamui dibénemo ite nahífuiaína jánana cai ciona izói caina onótate. Nana biniemo ite afeco ero ráaniai Juziñamui illánomo nahí itífuiaí jana. Ie jira biniemo ite ráaniai dibénemo figura Juziñamui daiíllena, bie die recuille jitárede. Mei íadi Juziñamui nahí illánomo jáifireitino dibénemo, bie die baímo ñuera Juziñamuimo fia izájifireille raa jitárede, afémacina Juziñamui iere figura daiíllena. Ua tóiníai die baímo Jesucristo jamánomo ñuera die jitárede.

24 Iemona Cristo tilla llezica, afe Cristo biniemo ite comíni niga Juziñamuimo ánoziracomo eromo jofo jáíñede. Afe bico fia nahico jana. Mei jáífodo Cristo, Juziñamui nahí illánomo caido úrillena jae cíocaizaide.

25 Afénomo Cristo dama ie abína, diga icaiño meine nane izájíñede. Mei íadi biniemo ite Juziñamuimo comínido úritillaíma, naga fimónado faga tóiníai die uillano, afe Juziñamuimo jáiraco jofoide iere ñuera rairuíredicomo jaide.

26 Afémaci jáifirena izói Cristo jáifiredena figóñede. Mei níbai afémie daií diga icaiño jáíadi, íemo énie ñnuaruimona afémie afe izói diga icaiño meine abido tírede; mei íadi afe izóiñedeza. Afémie cai illáruillaido jaiái lloga Juziñamui finóllífue fuilla llezica, dácaiño fia cómena ífcaillano caimo cíocaizaibite. Ua afémie biniemo cai jáínona ie tíizaibillado, nana caímo ite fiénidífuiaí niné féillena oni dote.

27 Ja onóigaza, naga come biniemo dácaiño tíide. Tíilla mei, íaioi illafue Juziñamui jaicína jicánoite. Aféfuena daje izói ñue onódicai.

²⁸ Daje izói Jesucristo, comini fiénidifuiái oni dóllena dácaifño tízaibite. Ie mei uire jáíruido afémie fiénidifuiaina duáibiñeite; mei jaiaí ie dógaza. Mei íadi afémie uafue meine dáanomo cíocaizaibite, nana íena izire úiñoidinona jílloano monamo ie illánomo úillena.

10

¹ Mei jaiaí Moisés ocuica uai naa ie lloga níciduairi, íco nirui bite caimare illífuiaí jana. Afe ie lloga jáiaí fue nahífueñede. Moisés bie íco zúití fue cai onóillena jana uícodo llote. Iemona naga fimónaiaido faga tóiniaína íaioí úifirena, íaioí comécina figo jaícina jóitañede. Mei uáfueña, afe faga tóiniaí íaioí úifirena Juzíñamuimo ánozidino nahí íaífuenidínona jáitañedeza.

² Mei daíí uafue íaífuenidínona íaioí jáiaí, nibai afe tóiniaína izájifirenana fáicanocaidiaioí; mei jáífodo fáicanocañediaioí, nai comécina jaícina jóoneñegaiaioiza. Daje izói áfede Juzíñamuimo ánozidino comécina íaífueña nahí nífuenidínona jáiaí, nibai jae íaioí fiénidí fue izire íaioímo iñede. Mei íadi íaioí fiénidí fue jaca izire íaioímo ite. Iemona onódicaí, tóiniaí fecáfirena íaífueña figo doñede.

³ Mei íadi afe fatá Juzíñamuimo izájitaga tóiniaína cíonamona, comini íaioí fiénidí fue naga fimónaiaido úibacitagaiaioí.

⁴ Mei jü, juráretuai, chívuai die diga, jaca come fiénidí fuiaí dónide. Mei áfemo ua dollé ríino iñedeza.

⁵ Ie jira Jesucristo bíniemo bícana llezica ie Moo Juzíñamuina daide:

Omo fia fecaca faga tóiniaína gáñedioza, comínina iere figura o daíllena. Mei jáífodo énie cómena ja cuena jáicítaitio.

Afemona cue tílledo íaioína óiena nífuenidínona jáitaití fue.

⁶ Ua comini íaífue ícoína jobaica tóiniaí ja birui ona íóbitañede.

⁷ Ie jira ciegánico cuedo úrilla izói birui ona daidí fue:

“Moo Juzíñamui benó bíniemo o comeci jítáillafue fínuaibití fue,” daide.

⁸ Nano fueñe afémie daide, nana afe Juzíñamuimo fia fecaca tóiniaí, íaífue ícoína jobaica tóiniaí diga Juzíñamui comécina zuitáñede. Ua íena íóbitañede, nana afe nícidogafue jaiaí ocuilla uai daína íadi.

⁹ Afe emódomo Jesús daide: “Moo Juzíñamui, ja o comeci jítáillafue birui benomo fínuaibití fue.” Daíí Juzíñamui nana afe jaiaí ocuica nícidogafuiaina zóofete. Zóofiano, afe méifomo Cristo dama ie abi cruzmo izájillafue Juzíñamui jeire ote, ñue comínimo caimare érocaillena.

¹⁰ Daíí Jesucristo, ie Moo Juzíñamui comeci jítainafue izói finode. Daíí ie fínua mona jae dama Juzíñamui nabaina ñue finócamacina jáidicaí. Mei jü, Jesucristo dácaifño jaícina nana cai fiénidí fue oni eneno féitate. Mei ninomo féifeiteña cruzmo dama ie abi Juzíñamuimo izájideza.

¹¹ Naga judío Juzíñamuimo comínido úriraima nágaruillaído naidáillano daje izói faga tóiniaína Juzíñamuimo izájifirede; mei íadi afe ríllado comini íaífuiái dónide.

¹² Mei jáífodo Jesucristo dácaifño comini fiénidí fue ícoína duere zefuida, tízaibite, afe izói dáanomo íñeillena. Ie tílla mei meine abído cáaillano caífo monamo Juzíñamui nabézimo ráinazaide, nana comini íaífue múiñuana fuilla jira.

¹³ Dīnomo, nana ie fairíconi ie anamo íaioi itábicaillena afémie úiñoide.

¹⁴ Mei jii, Jesucristo, dácaiño ie Moo Juziñamuimo ie abina izájide. Afe izájillafuedo, nii cruzmo ie tiillamona, nana caina ie nabaina ñue finode. Jae nana cai comeci íaifuenta ñue múiñuano jaca ninomo caimo caimare érocaide.

¹⁵ Aféuemo Juziñamui Ñuera Joreño uaina nabáide, iere uafue cai daiillena. Ñuera Joreño Cuegáuaimo daide:

¹⁶ Juziñamui daide: “Uire jíairuillaido cue comínimo bie izói jíáie como cue finóllifue llóiticue, naa jíáie cuemo ñnotinori.

Aféruillaido cue ocuica uáillaina íaioi comécimo jaícina onótaiticue.

Ua afe uallai íaioi ífócimo ñue jino denótaiticue,” daide.

¹⁷ Ie mei nane emódomo daide:

“Nana íaioi fiendi finócafuiái ibana otátañeiticue.

Daií oñena llezica, íaioi comécimo ite íaifuiaina jaca niné féitaredicue.”

Dīnori Juziñamui daide.

¹⁸ Nana comini fiénidifuiái daií dua mei, jíá íaifue ícoinia dóllena fatá fecaca tóinai jae jítaiñega.

Juziñamuimo cai áinozillena jítaírede

¹⁹ Iemona, ámatiai, cácarei. Jae Juziñamuimo cai jáillio uáfodo túide. Ua ie nahí illánamo, afe iere ñuera rairuícacomo caimare jacíruiñeno íemo úrizairedicai; mei Jesús cairi tíizaibillano caina Juziñamuina éoitadifue oni múiñócaza.

²⁰ Afémie tuiñoca io ñuera rairuiredico jédaciede íbáiraroido joide. Jira Juziñamui illánomo cómena cáataite comue io Jesús tuiñuano, afe iodo afémie caina ífode. Afe io tuiñóllena dama ie abi izi cácatate, íemo cruzmo duere zefuírede.

²¹ Iemona Jesús nana Juziñamuimo ñnotinodo Juziñamuimo Uritillaimana jae jaide.

²² Afémie ja cairi úrioinamona, mai Juziñamuimo jacíruiñeno omoi ánoziri, mei íemo ñue cai ñnuamona jae meáiruiñedinona mamécacaiza. Ie jira jífuenide comécido, mai omoi ánoziri. Ánozillano, mai íemo caimare cai úrilli. Ua táinona lloñeno mai íemo comeci cai facalli. Mei nana cai íáirede comeci ícoinia afémie jae jaícina oni féitagaza; ua come abi ñue jánoido jocoína izói comécina múiñócaai.

²³ Afe uáfodo jino comínimo cai lloga Juziñamuimo caimare cai úrillafuena, mai fáicanocaiñeno áfemo izire cai ñnofireilli, mei afefue caimo llotímie Jesús jaca ñnofiregamieza.

²⁴ Daje llezica illa dígamierie, mai conímamo ñue cai comécilli, conímama cai izíruillino cai jenóllena. Daje izói jíáimana ñuefuiaina rairuñeno jíeruillinona jenóredicai.

²⁵ Daje izói omoi Juziñamuimo gairífirenafuena mai féitañeno iri. Dáarie aféfuena féitafirediaíoi. Daií illa fiénide. Mei jíáfodo, Jesucristo meine billrui raire dúciacanana omoi onónamona, mai conímama ñue úrillauaido comécina caimare cai náireitalli, nana cai ñnogafue féiñellena.

²⁶ Juziñamui llogafue daide: Jaca dama Jesús tíillamo cai ñnuamona jílloredicai. Aféfuena cai ie onótaja mei, mei íadi afe uaina nai cai ruiíruioiadi jae abi dine jíáie cai íaifue múiñoitena íñede.

27 Daií ruifruoidimacimo jamánomo izire jácifue zúite, mei Juzíñamui duere íaioi finóllifue mo jae áinozideza. Afémie iere íaioimo rúicaillano iere boode jáífodo joide iraimo íaioina duere zefuítate. Ua nana Juzíñamuina bacáuairedinona írai amena cuarita izóidemo, Juzíñamui íaioina dinomo zúíñona duere zefuítate.

28 Moisés ocuica uaina ruifruitimiena raire titádiaioi. Ua, mena nibai daámami uai nabáiraini daina uáimona, íemo dúecaiñeno íena titádiaioi.

29 Mei Moisés ocuica uaina ruifruitimiena daií duere finóbiteza, Juzíñamui Jitona ruifruitimemo jamánomo izire duere finóllifue, afémiemo zúiteza. Afémie Jesús díena jámairutimie. Afe tállamo totaca díedo, afémie nauí dácaíño Juzíñamuimo oni eneno nizécamienna jaide. Mei íadi Jesuna ruifruitimie caimo dúecaiñede Ñuera Joréñona íaire daiífiredimiena jaide. Daií ítimiena iere Juzíñamui duere finórede.

30 Ja birui daií ítimie fiénidifue iba ófiredimiena onódicai, nímie cai Moo Juzíñamuina. Afémie daide: “Afe iba ófiredimedicue. Ua nana íaifuiái íbana duere finótáiredimedicue,” dáideza. Jáínomo Juzíñamui Cuegáuai daide: “Juzíñamui ie comini comeci ífueña jáicina jicánoite. Jicánuano íaioimo dúide duere finóllifue ócuite,” daide.

31 Daií ie úrillana cai onónamona, caade Juzíñamuimo duere finóllena izájina jamánomo jacírede.

32 Mei íadi nauí íanori omoi ílláfuemo uibóiori. Aférujimo ñúefuena omoi onona mei, aillo duere zefuídíomoi, mei íadi aféruimo omoi ínogafue fáicanocaiñeno ñue ocuídíomoi.

33 Dáruillaído uáfori comini eróicana báíñuano duere finócaomoi. Jáíruillaído daií finócamacimo omoi nabáillamona duere zefuítagaomoi.

34 Afe llezica llaveca ámatiaímo dúecaiñediomoi. Afe baímo, ómoímo ite ráaniaina jáímaci báiruana caimare rairuíñediomoi, mei onódiomoiiza, bíniemo ite raa baímo, jamánomo ñuera jaca bairónide raa ómoiena monamo íteza.

35 Ie jira nauí izire omoi ínoga uaina mai birui omoi féitaíño iri. Aféuaina ñue omoi ínofireiri, mei ícoímo iere ñuera jirídogá ízoide raa máíñoítíomoiiza.

36 Juzíñamui jítainafuena omoi jíeruilla llezica raire comeci járidoñeno írediomoi. Ua, omoi ínoga ñúefue, omoi are jáicina llocana uille mei, Juzíñamui ufcodo lloga caimare jillonafuena máíñoítíomoiiza.

37 Mei jíi Juzíñamui Cuegáuaimo daide:

“Ja íanori íllamona, ufcodo lloga bíitimie Jesucristo, jizíñeno raire dúcizaíbite.

38 Afémie nai bíñena llezica, nífuenidena cue mamécamié, cuemo ie ínuado nágaruillaído caimare ie íllano, cuena íóbiteite.

Mei íadi afémie afe ie ínoga uaina meine abído féitaiadi, afémieri íobíñeíticue,” díno Juzíñamui daide.

39 Mei íadi meine abído féitatino díbénemo jáináíñedicai. Afémaci daií íaioi íñoñenamona jíllóñeítiaioi. Mei jáífodo cai bie Jesucrístomo ínotinodicai, daií dani cai jíllotagacai.

11

1 Mei çminica ñnuafuena? ñnuafue Juziñamui daína uaina jeire cai uafue. ñnuamona cai úñoga cáimafue jeire cai ollínona onódicai. Daje izói Juziñamuimo ñnuamona, ie lloga cáiena mameca ñuera raa cióñena íadi, afefue ua íllana comécido ua onódicai.

2 Ua, ñnuafuedo judiúi jaiáidigimamona Juziñamuimo jaináidimíai, Juziñamui comeci jítailamacina jáidiaoi.

3 Juziñamuimo cai ñnuamona, Juziñamui ie úrilla uaido bínie ñnuana onódicai. Daí ie ñnuado nana bie cai ciona énie, táinomona Juziñamui comuitate. Ua, minícana íñédeza cióñena ráamona naga ráaniai comuibicaide.

4 Juziñamuimo ñnuano Abel, Caín fecaca baimo, ñuera Juziñamui íóbitalle raa fécaibite. Iemona Abel Juziñamui dibénemo jaícina itímiena jaide. Juziñamui jieruigamiena jaide. Mei Juziñamui Abel fécaibiga raa llínuamona, Juziñamui comeci Abelná jítainana onódicai. Daí Juziñamui íena jieruillafuedo Abel jaícinaidifuedo Juziñamui uai nabaide. Afe Abel, jaiai uícodo Juziñamuimo ie ñnuado ñue ílláfuedo jaide. Aféfuena cai fídiamona, afémie titácamié íadi, ie ñnogafue, úrillauai izói caimo úrite. “Juziñamuimo ñue cai ñnolli,” caina daide.

5 Iemo Enoc Juziñamuimo ie ñnuado tíñeno caifo monamo uiga. Daí tíllana ie óñoñellena, cáanori monamo Juziñamui uiga. Afe mei afémie bíníemo cióñenamié, mei afémie Juziñamui úigaza. Afémie nai úñéga Juziñamui íóbitadimie daínámie.

6 Mei jii, Juziñamuimo cai ññoñenia jaca íena íóbitanidicai. Dámie Juziñamuimo áinoziacania, Juziñamui nahí íllánona uícodo ie ínolle jítárede. Nane íemo nana izire íena onóiacadino, ñue íbana dama ie abí ífuena íaioina onótaita. Aféfuemo uícodo daje izói ñnorediaioi.

7 Daje izói Noé, Juziñamui lloga raire biite nai cióñena duere finóllifuenta fídiano Juziñamuimo ñue ñnote. ñnuano áillue jofóredicae finode, áfedo nana dama ie comíni daí jilloíllena. Noé daí dama Juziñamuimo ñnuado, nana jáie íñoñede comínimo duere finótatíuai jino íaioimo llote. Afe izói Juziñamuimo ñnuado Juziñamui comeci jítaina nífuenidimíena jaide.

8 Afe mei jaiáidíruimo Juziñamui Abrahana jíríte, jíáie éniemo jaiánillena, áfeniena íco jíáiruido íeiena maíñóllena. Abraham Juziñamuimo ñnuamona afe jírilla uaina cacáíllano, raire ie íllániemona oní jíáíonomo jáizaide, ie dúcillino nai óñoñega íadi.

9 Abraham nai Juziñamuimo ñnuamona, Juziñamui íemo fecáacaiga éniemo fia jíacánemiéna díga fimona fia íte. Ua, ñiroi níina úcaíáfrega jofomo aféniemo are íoide. Daje izói Abraham comuítaga jító Isaac, dínomona Jacob díga afénomo daje izoide ñiroi nillácuaimo are itíáíllinoi naa íe comíniri. Juziñamui daje éniéna fecalle uaina Abrahamo llua izói, afe íaíllinoimo uícodo llote.

10 Ua Abraham afe jamai íllácuaimo dama íeíeñede éniemo caímare íoide. Afémie caímare íte, mei Juziñamui dibénemo íte caímare táinocaitanide íllínomo dúcillena afémie úíñoideza. Afe caímare íllíco Juziñamui maméíllano dama íe uaido níga.

11 Daje izói Abraham ai, Sara, Juziñamuimo ñnuamona, jamánomo jíonaite íadi, fueñe úruerena ríino ote. Iemona daa jító jocode, mei Juziñamui aféngona

aféfuena uícodo daina uai, afengo iere ñue ñnoteza. Afengo bie izóí daide: Bímie ie daina uaina jáifo méidofinidímie.

12 Iemona Abraham iere jónaite íadi, iere aillo erófene igímaiaina jebuítate. Ua jamánomo diga nairai jebuide; ñii ja lloga monamo ite facádonide úcuai izóí itiaíoi. Nane monáillai fuédamo ite facádonide guamai izóí jebuídiaíoi.

13 Nana cai lloga comini Juziñamuimo nai íaíoi ñnoina llezica tídiaíoi; nana Juziñamui uícodo lloga ññeufuíaína nai llínoñediaíoi, tílla. Mei íadi afe lloga ññeufuiai ico jáíruimo zúillena jicana fidídiaíoi. Fídiano caimare aféfuemo ñnuano comécidiaíoi, mei biniemo ónoñega jicánemacina íaíoi illa raire méaicaiñeno llotíaíoi. Uáfueña biniemo jaiánicana jáidiaíoi.

14 Nana daíí llotino, dani íaíoi nahí illíno mo íaíoi jáiacanana llotíaíoi. Ua jáíe éniemo jáillana íaíoi úñnoinana caina fidítate.

15 Daíí íaíoi dainamona, mei ñibai jaiai íaíoi illániemo comécidiaíoi. Daíí íaíoi coméciaídi diga icaíño meine abido afénomo jáirediaíoi. Mei íadi abido afénomo jáiñediaíoi.

16 Mei jáíinomo comécidiaíoi. Jáíe jamánomo ñuera illánomo, monamo ite Juziñamuimo nabáirizaillinomo izire úíñoidiaíoi. Daíí Juziñamuimo íaíoi ñnuamona, Juziñamui iere íóbite. Bie jaiánicana jáidino Juziñamuina daííadi: “O cue Juziñamuidio,” daíí íaíoi dainari Juziñamui méaicaiñede. Mei íaíoi jofue izoide ñuera illino, dinomo Juziñamui diga zíñona nabáirizaillena, Juziñamui jae finócaza.

17-18 Naui Isaac jocoina llezica Juziñamui Abrahamana daide:

“O úicoitígima bie jitó Isácimona aillo jébuitiaíoi,” daide. Diga iruillai íllamona Juziñamui dáaruimo Abrahamana ñnuafue facátate. Iemo Juziñamui ocuilla izóí, Abraham nai Juziñamuimo izire ñnuano, ie jitó oni uite, titada Juziñamuimo fecállena.

19 Mei Abraham Juziñamuimo ñue ñnuano comeci facade: “Juziñamui jamánomo ñue ríinoredímie; tíide come meine cáataite ríino íemo ite. Cue jitó tíidena Juziñamui meine íena cáatarede,” daíí Abraham comeci anado daide. Iemo, Abraham ie jítóna fáiacana llezica Juziñamui afémiemo raire úrillano, ie daade jítóna jíllotate. Abraham ie jítóna fañede. Ie jira jáíífodo daíírede, tíllanomona Abraham ie jítóna meine abido ote.

20 Daje izóí Juziñamuimo ñnuamona Isaac ie jitó íaillino; Jacóbomo Esaú diga uire Juziñamui orelle caimátaíllifue ua llote.

21 Daje izóí Juziñamuimo ñnuamona Jacob, ie tíizaílliruimo José jitó íaillinoímo úrite. Urillano ie enaize íaillinoímo uire Juziñamui orelle caimátaíllifue jino llote. Afe llezica ie macara jigüida llínota ie abi moziñuano caimare Juziñamuimo úrite, ie íóbitallena.

22 Daje izóí Juziñamuimo ñnuamona José ie tíizaílliruimo ánozillano, Israel comini Egipto éniemona uire oni dani íaíoi éniemo jáíllifue llote. Afe llezica ie ícuruai aféniemo fiéñeno oni úillena, uícodo uai íaíoi mo jónete.

23 Diga fimona jailla mei, Egipto ríillaima nana Israel como jéciga jítótiaína fazítate. Mei íadi Moisés jocoina mei, ie moo íaillino; Juziñamuimo ñnuamona, illáimana jacíruiñeno Moisenana retáidotiaíllinoí. Dauíamani íena retáidotiaíllinoí, afeza iere ññezana jira.

24 Aféllaíma jiza Moisená náamataja mei, Moisés móonaila llezica Moisés aféngomo dúillana ruifíruite; mei afémie Juzíñamui dibénemo jaináideza. Ie jira Juzíñamuimo ínuamona Moisés afe mámeçi oni faite.

25 Mei jáífodo Juzíñamuimo jaináidino cígiri íllana, afémie jamánomo gaide, nana duere zefuídiaioi íadi. Daje izói ie comínina fiendi ie zóofiamona raire féite jabo íóbillafue dibénemo íllana afémie gáíñede. Moisés Juzíñamuimo ínuano ñue coméçide.

26 Biedo afémie coméçide: “Nana Egipto énie ebírede ráaniai baímo, Juzíñamui dibénemo ie dámie illa jamánomo ráífide, duere afémie zefuide íadi.” Afémie daíi comeci facade. Ua Moisés, Cristo ícoínia zefuíllano, féitañeno daíi coméçioifirede; mei Juzíñamuimo ínuamona baímo ñuera féinide raa ítóidífue afe ie jírídollena afémie onódeza.

27 Iemona Moisés Juzíñamuimo ínuamona, afe Egipto illáímamo ite ríinona jacíruiñeno Egíptomona botade. Ua jacíruiñeno afe Moisés oni jaide, mei buna cíóñena Juzíñamuimo fáicanocaiñeno ñue nágarui coméçifiredeza. Daíi ie coméçinamona, uído cíónamiemo ínuua izói, Moisés Juzíñamuimo iere ínote.

28 Daje izói Moisés Juzíñamuimo ínuamona, Juzíñamui lloga pascua rafue como fueñe finode. Ua Juzíñamui llua izói, Moisés íaioi jófóniai naze fuédamo oveja díena jíritate. Daíi ínuamona, Juzíñamui oreca títaite abi ímie nana Israel nano fueñe jococa jítóíaiamona buna títañede, alilo Egipto imaci jítóitai tícoizítiaioi íadi.

29 Daje izói Juzíñamuimo ínuamona nana Israel aillo comíni “Jáirede” daina monáillai ñue zaférede iodo ruícafenemo jaitádiaioi, mei afe monáillai jainoi Juzíñamui oni gaitácaza, íaioi ruica jáillio tuiñóllena. Mei íadi Egíptomona racáidino afémaci jailla izói jáidiaioimo, meine io jáinoína íbáibicaillari coróbaitiaioi.

30 Iemo Israel comíni Jericó jofue anáfenoacadiaioi. Afe jofue riire naídároga nofíbanina cirínoga. Iemo Juzíñamuimo ínuamona ie daina izói, siete dígarui afe riire íbaica jofue jinófenedo ífoína macáoidiaioi. Iemona ícoi iruimo afe caífo nitaca nofici finoína jofue jinófene cirínuabani, Juzíñamui ana éniemo caitade.

31 Daje izói Juzíñamuimo ínuamona nauí uícodo fiénidíngo, Rahab fañega, nana jíaie afe jófueimo ite íñoñedino fazícaicíoí íadi; mei Juzíñamui comínimona oreca éniena ñue onóillena méiñoitínona afengo caímare cánuano jofu uáidoteza.

32 Nai jino lloñega aillo ite jíaie jaiai Juzíñamuimo ínofiredino. Bibedo íaioi illáfuiaina cue llóllena cue abi juánideza, nana llónidícue. Fia íaioi mámeçiai jino llóitícue, íaioimo omoí ñue coméçioillena. Afémaci Gedeón, Barac, Sansón, Jefeé, David, Samuel; daje izói Juzíñamui uai jino llóraíni ite.

33 Bimácimona dámerie Juzíñamuimo ínuamona jíaie náiraina anáfenodiaioi. Jáímaci Juzíñamuimo ínuano Juzíñamui jaícina jóidífueña comínimo ocuide. Dáerie Juzíñamuimo ínuamona ie uícodo llua izói, Juzíñamui canócaiaioi. Dáerie Juzíñamuimo ínuamona riirede jánallarillai fueña íbaica izói finode, íena íaioi ríñeillena.

34 Jáímaci uzírede iraimo dotácaiaioi ía, nai Juzíñamuimo íaioi ínuado afe iráimona uzíñeno jino bitíai. Dáerie Juzíñamuimo ínuamona

fuiríllafuiai mona otábiñeno jino ñue jíllodiaioi. Iemo jóbairo illa llezica Juzíñamuimo ñnuamona dáarie mairíñedimíai ñue máirimíaina jaide. Daí Juzíñamuimo ñnuamona onina bite fuirírainina abido rainódiaioi.

³⁵ Daje izói Juzíñamuimo ñnuamona dáarie ringóniaimona íaioi úruiai tíde íadi, meine abido íaioimo cáataga.

Mei íadi jíamaci nai Juzíñamuimo ñnua llezica, íbátarede tíde jíllotafuena lloñediaioi, mei aféfuedo Juzíñamuina jáanotaiticai, daidiaioi, íadi Juzíñamuina jáanotanidiaioi. Ie jira iere duere zefuítano titácaiaioi. Daítadena lloñediaioi; mei afémaci meine abido caana mei, jamánomo ñuera zíiñona illáfueña méaicaiñeno maiñóacadiaioiza.

³⁶ Nai jíamaci Juzíñamuimo ñnua llezica, fiénide zánonafuiai mona duere finóbidiaioi. Jíamaci riire zechénogaiiaioi. Ua dáarie Juzíñamuimo íaioi ñnuamona cúinajano llavécaiaioi.

³⁷ Daje izói jíaie Juzíñamuimo ñnotino noficiaina nójicaiaioi; jíamaci dáafemíai do amena dera izóidedo ñtétacaiiaioi; jíamaci caimare taino uáillaido bífuegaiaioi, íaioi ñnuafue facátallena, íemo lloéfai do fagáiaioi. Jíaie Juzíñamuimo ñnotino, íaioi ñnóirina jira, tóica rille igórainina jítaíodiaioi. Daí fia macáodiaioi, mei jofónidiaioiza. Ua iere ráanidiaioiza. Ie emódomo duere zefuítano iere fiéni finócaiaioi.

³⁸ Daí finócaiaioi íadi, Juzíñamuimo íaioi ñnogafuena fáicanocaiñediaioi. Iemona bimaci Juzíñamui dibénemo iere izíruigano; mei íadi bíniemo íte ñnoñedino afe Juzíñamui uaina jeire otínona jámairuitiaioi. Ie jira ñnotino afe ñnoñedimaci cígiri íllena, ñnoñedimacimo figo dúiñede, mei ñnoñedimaci comeci iere íairedeza. ñnotinona jámairuillano, íaioina oni jíúfirediaioi. Iemona ñnotinomona dáamerie zaféredizicimo jáidiaioi. Jíamaci caifóneduai íllánomo botádiaioi. Íaioi jaíllánomo íte ífuaimo ífirediaioi, naa íduai ana ífuari.

³⁹ Nana bimaci Juzíñamuimo ñnuamona, ñue “figora” daínamacina jáidiaioi. Mei íadi nana Juzíñamui uícodo lloga caimare ñue íllífuiaina figo maiñóñediaioi; jabo maiñódiaioi.

⁴⁰ Mei Juzíñamui jae uícodo cai canolle jamánomo ñuera cáimaduafue mamédeza. Afe jamánomo ñuera cáimaduafue Jesucristodo cai nahí cai jíllóillífué. Daí jaiai ua Juzíñamuimo ñnotino naa cai díga, birui dáanomo jaiai Juzíñamui mameca nahí jíllóillífuemo dúciiticaí. Ua afémaci naa cai díga, Juzíñamuimo caimare nabáiríllafuena jeire óiticaí.

12

Jesumo ñue jaícina omoi comécioiri

¹ Ie jira, cue ámatiaí, comécido ñue omoi facari. Ua aillo jamánomo Juzíñamuimo izire ñnotino bíniemo cai uícodo macáodiaioi. Afémaci Juzíñamui cai íóbitallífuena caína ífode. Afémaci cai ñnogafuemo jaícina ífoite uai nabáiraini. Cai abido ífoina ítiaioi. Afémacimo cai comécíillamona, nana cai jíztacana uite fiénidífuiaí mai oni cai féitalli. Ua, caimo íte fiénidífué, abí llótaidote ñiroi izói caimo jíide. Jíinamona jaca caína aruire ítátate. Afena fáicanocaillano, Juzíñamui íóbitallífuemo zefuíruiñeno mai izire cai nícidolli.

² Afe llezica duere cai zefuíllano féitano, mai Jesumo comeci cai facalli; mei afémie Juzíñamui íóbitallíodo, ñnuafuedo cai jáíllena cai ífódimieza. Mei

afémie ie Moo Juziñamuina féitañeno ie fáainaruimo nai íemo izire íinoide. Daíe ie ínuua, afémie izói jaícina cai ínollena, afémie cai ifode. Iemona afémie cai ínogafue ñue ícoimo fuitádimie. Ua, Jesús duere zefuide, íadi afe duere zéfuilla méifomo íite cáimafuemo, afémie ñue comécide. Afemo comécioillano uái daíi cruzmo túzaide; mei áfedo nana íemo ínotino caimare jíllobicaitiaioiza, afémie onode. Iemo afe meáirede túillana náfuéñeno, abido meine cáadimiena jaide. Afe daíi jaillano caifo Juziñamui nabézimo Jesús ráinazaide.

³ Ie jira, cai jaínona duere zefuítagamie Jesumo mai ñue omoi comécioiri, omoi duere finóbicaillamona omoi zéfuiruiñeillena. Daje izói Jesumo ñue omoi uibóiri omoi comeci ñue náireillena. Mei afémie fáicanocaiñeno Juziñamuimo ínoicaide, fiénidino íena uáitajano duere ie finódiaioi íadi.

⁴ Fiénidifue omoi comécina jírriode, íadi nágarui áfemona abi ráiruifrediomoi. Afemona abi ráiruillano iere Juáreze. Iemona jabo duere finócaomoi. Mei íadi fiénidifuená omoi anáfenoacanamona nai túñediomoi. Dama Jesús ícoinia jabo duere zefuídiomoi.

⁵ Afe llezica Juziñamui caimare llogáuaina nibai jae féitatiomoi. Aféuaido Juziñamui ie úruiai izói, ómoína llófuete; ona riire daide:

“Cue jitó, o Ocuíraima Juziñamui omo oreca duere zefuítajafuena jámairuiñeno iri, mei áfedo afémie ñue ona ráiruillano lletádeza.

Daje izói fiéni o fínuamona afémie duere o finóadi, comécina ríinidimie izói íñeno iri.

Mei jaífodo, abi máimiano, ie llétafuena ñue jeire oíri, ñúemiena o jáilleza.

⁶ Mei Ocuíraima Juziñamui nana ie izíruiganona fáicana lletáfiredeza, íaifuenidinona íaioi jáillena.

Afe izói nana ie ua onoiga jitótiaína llorebai mailla izói due ízitate, mei afémaci dama íeieza,” daide.

⁷ Omoína izíruillamona Juziñamui afe daíi ómoína duere zefuítate, ómoimo llófuellena, baimo ñuera ie jitótiaína omoi jáillena. Ie jira duere zefuítagaomoi. Mei onódiomoiza, bíniemo ite moo llétañega jitó ñue móonaiñeiteza. Iemona afe moo nana ie jitótiaína llorebai mailla izói ízitate.

⁸ Ie jira Juziñamui ízitañegamie nibai ie nahí jitóñedeza, móonidiza; mei nana nahí ie jitótiai izi cácatagaiaioiza.

⁹⁻¹⁰ Afe emódomo cai bíniemo ite móotiai nauí ñue cai móonaillena, ñue comeci íaioi fácamona, izire caina lletádiaioi. Ua nano íanori illáruillaído caina duere fínuafuedo lletádiaioi. Ua izi cácatagacai. Afe llezica nai cai moona caimare jacíruiticai; jacíruióillano ñue íaioi anamo itábicaidicai. Daje izói cai monamo ite Moo anamo jamánomo caimare itábicairedicai; mei afémiemo cai ínuano, nahí ie jitótiaína comuítagacaiza. Nana afémie duere cai fínuafue cai díbenemo aillo ráifide, afémie ebire ñuera illa izói, daje izói cai íllena.

¹¹ Ua, ja onódiomoiza nana izi cácatafuemo illa llezica, áfena gáíñedicai. Mei íadi afe izi cácatafue záilla mei, áfedo lletácano, Juziñamui anamo ñue jaícina íficaillano, comécina jacíruiñedinona caimare jáiticai.

Juziñamui uaina ruiñruilla iere jacírede

¹² Juziñamui daíi omoi llétajana omoi onónamona, mai abí omoi mame. Ja abina náinidino izói omoi íñeno iri. Omoi zúurede comeci náiretari.

13 Afe llezica omoi duere zefuillafuemo, mai bífuemo jaícina comeci facádori. Aféfuendo daiíri “Juziñamui ióbillie jítótiaína móonaitagacai.” Daií o dáinamona, jiaíe ómoimona Jesumo ínogana féitaacadino, comécina caimare náiretaitio. Daií ie náireillamona afémie meine abído Jesús uaina izire ínocana jeire óite.

14 Afe emódomo nana comíni cígiri, mai comeci ríicaitañeno cáimafuemo omoi iri. Daje llezica, Juziñamui ebire ñue illa izói, afe dibénemo mai omoi abí ífuiái nágarui méidocana uiri. Bie izóidífuemo omoi nai íñeniadi jaca buna Juziñamuina cíóñeille. Mei íadi comeci íaininafuemo cai íadi, íena cíóiticaí.

15 Juziñamui caimo fecaca cai ie cánuafue aillo íte. Bifue nana jeire omoi ófireilleza izire omoi comécíiri. Daií íllamona buna fiénidífuemo oni níbéfodo báííñeíteza. Daa daií oni fiénidífué dibénemo baíídímie nana jiaímaci comécina fiéni finode. Mei jii, duere zefuillamona Cristo dibénemo figo jaináicañedímie, jucúrede juia izoide. Mei afe juia illemo totáa, nana áfeji jucúredijina jaide. Daiítade come nana ie aino comínina daje izói figóruiñede. Afemona abí omoi rairuiri.

16 Daje izói nana jiruírenafuíaímona abí omoi rairuiri. Afe llezica ómoimona dámie Esaú illa izói íñeno iri, mei afe Esaú jaca Juziñamui jítainafuemo figo comécííñedeza. Aféfuena jámairuillano, afémie nánoramie íadi, íemo íte maiñórrille ríino, íia due jiza güille íbana fecade.

17 Afe Esaú illáfuenta ñue onódiomoiíza; mai aféfuemo omoi comécíioiri. Ico íirairuimo íe moo ézicirafuena Esaú maiñóacade, íadi íe moo ja íena ruifíruite. Afémie comeci ífue méiduano éecana íe moomo izire jicade; íadi “Jii” daííñede. Afe nauí Esaú jámairuillafue jaca méidonide.

18 Ja birui Juziñamuimo caimare nabáirillanomo dúcidiomoi. Jaiái Juziñamui comíni áillue caifónedumo ánozidiaíoi, Juziñamui dáina uaina cacáíllena. Afedu mámeceí Sinaí. Afedu náaduna írai izói boode, aillo úíllie diga. Afe llezica íere jacire nairíbicaide. Nairíbicaillano, jairifo ríire jaiñode.

19 Aféruimo bainada izoide ícire cácacaiide. Afe llezica áillue come úrilla uai íaíoimo ícire cácacaiide. Afe uai íere jacírede cacaiide. Afemona, áfena cacáidino jiaíe emódomo lletara uaina llóñellena izire jicádiaíoi.

20 Afe íaíoi cacana íaíoimo lloga lletara uai jamánomo íere juáredeza. Aféuai daíde:

“Bie óde íduna omoi jetáíñeno iri. Ninena daa rille bídumo bíadi, raire noñciaído fáiri. Daje izói ninena bídumo bite come fáiri,” daíde.

21 Uafue, afe cacánafue naa cíocaidífué diga íere jacírenamona, dama Moisés uai ua: “Aferi íere jacínaitícué. Jacíruillano cuidíritícué,” daíde.

22 Mei íadi, jae jiaífodo Jesucrístomo omoi ínuaamona, ja birui Juziñamuimo íte jacínide caimare nabáirillafue dibénemo dúcidiomoi. Íe mei ícoimo monamo íte jaca caade Juziñamui uícomo úrizaitíomoi. Juziñamui illa jofue, “mona ero íe Jerusalén” mámeceírede. Íemo jiaífodo “Sión Caifónedu” dáina. Afémíemo ja omoi caimare nabáirillamona diga íeza facádonide Juziñamui abí ímaci Juziñamuina íóbioicana íráízitiaíoi.

23 Ua, omoi ínuaamona Juziñamui ómoína daíde: “Ja cue daade Jitó Jesucrísto izóidínodíomoi. Cuemo íe dúina izói, afe izói ja cuemo jaináidíomoi,” daíde. Afemona nana Juziñamui íena comuítagamacimo jae jaináidíomoi. Nana afe íemo jaináidíno mámeceíai jae monamo cuega. Íe jira nana Moo Juziñamui íe comuítaganona, ñue jicánuana fibídímie izói, ñue íaíoína ríidoite, mei afémie nana nairái Mooza. Jaiái íe anamo ñue ítino, jae tídiaíoi, mei íadi

íaiói ñuera joreño nai figo caimare iñédiaioi. Ja biruillaido Cristo cairi tíllano caina jíllotate. Daií nana íemo íínotinona jíllotano, afe tíidino ñuera joréñuai ñue jaícina caimare itátagaiaioi.

²⁴ Uafue, Juziñamui comue caimare caimo fecállifue caimo llóiacade. Afefue caimo lluaíbitimie Jesús, mei ie cruzmo ie die tótajado caimare íaifuenidínona finócacaiza. Ie jira ie die, úrilla uai izói jamánomo ñúefue cai ífócimo denode. Mei jíáifodo Abel die tóilla afe izói caimare ñúefuiai caimo lloñede.

²⁵ Nana bie caimare Juziñamui caimo llotátagafuiai nae onódiomoi. Afena omoi onónamona, afefue ómomi llotímie mai omoi ruifíruiniño iri. Afe íena ruifíruillamona abí omoi rairuiri. Mei jiaíi biniemo Juziñamui jónega lletárama dáinana ruifíruitino, duere íaiói finónamona jaca jíllañediaioi. Afe baimo birui monámona caimo llotímie dáinana cai ruifíruiaí, daje izói ua jíllañeiticai.

²⁶ Jiaíi aféruimo ie úrilla uai éniena diga icaíño riire docáitate. Mei íadi birui afémie uafue llote: “Nane afe emódomo dáacaíño éniena riire docáitaiticue, naa caífo ite monáñairi,” daíde.

²⁷ Afémie dáina “Nane afe emódomo éniena dáacaíño docáitaiticue” Juziñamui íirairuillaido finóllifue caina daíde. Aféruimo nana ie finoca raa, ranitado izírilla izói níraidoite. Afe níraíduado nana nírairede ráaniaina, afémie oni niné táinocaitaite. Mei íadi nírainide ráaniai jaca méidonide; fíébillano zíiñona íitiaioi.

²⁸ Ja birui Juziñamui méidonide illáimana illánomo jaináitagacai. Iemona íena “Íere figora” cai daíífreilli. Afe llezica caimare úrillafuedo mai íemo cai íóbilli. Ua, ñue jacíruioicana ie uáillaímo mai ñue cai cacáreilli.

²⁹ Mei jíi, cai Juziñamui, irai amena cuarilla izói, nana íaífueredínona jaca zíiñona íaioina duere fínoite.

13

¿Nie izói Juziñamuina íóbitaredicai?

¹ Amatiai, mai conímana omoi izíruifíreiri.

² Daje izói onina bitínona mai dúecaillano ñue caimare uáidori, mei daíí dárie jíáimana íaiói caimare uáídoífirenamona ónonino Juziñamui abí ímíiaina jofe llínotiaioi.

³ Iemo Jesumo ínuamona llavécamacimo ñue omoi úbicairi. Ua dájena llavécano izói, mai íaioímo comeci omoi facari, íaioina omoi canóllena. Daje izói duere finoca Jesumo jaináídimacimo, mai omoi ñue comécíiri, mei dani omoi abina jíáimaci duere zefuítarede; íemo bimaci diga daíí zéfuitiomoiza. (Dámacidiomoiza.)

⁴ Daa come daje ringona áireia ñuera. Afémie dama ie ai abina onona ñuera. Íima dama ie ai jeta ñuera. Mai bifue íaíniño ñue omoi fímaíri. Mei Juziñamui nana jíruíredínona zíire jícánuano íaioina duere fínoiteza, naa dama áireíniño ringo diga ítinori.

⁵ Daje izói omoi comeci ífueña ñue onoiri. Ucubena aillo jitailla fíénide. Afemona abí omoi rairuiri. Mei jíáifodo ómoímo due jiza ite ráaniaíri júfidoñeno caimare uái iri, mei Juziñamui uafue dáídeza: “Ona fáicanocaiñeiticue. Daje izói jaca ona zófeñeiticue,” daíde.

⁶ Iemona minícana jízíreñeno daííredicai:

“Juzíñamui cuena canófredimie; íemona fieni cue finóacadimiena jácíruiñeiticue.”

7 Iemo mai Juzíñamui uai ómoimo nano fueñe jino llófuetinomo ñue omoí uibóiri, mei ñúeodo ómoína ífódiaioiza. Iaióimona comuide ñúefuiaimo, féitañeno mai ñue omoí comécioiri. Afémaci Jesús ícoínia titácaiaioi, mei íadi afémaci fáicanocaiñeno Jesumo ínua izói, afe izói féitañeno mai omoí ínofireiri.

8 Mei jii, Jesucristo nanómona ie illa izói, ja birui jáífodo méidoñeno dáamieoicaide. Ua afémie jaca ziiñona dáamieite.

9 Ja birui diga jáífodo cacaide onina bite ónoñega fieni llófueinafuiaí ite. Aféfuiaí ñúeomona oni nibéfodo omoí baiítaiacadeza; áfemona abí omoí rairuiri. Juzíñamui cairi dúecaillano cai cánuano cai comeci náirecaitate. Afe ie cai comeci náiretaja ñuera. Mei íadi afe jicana lluaíbiga güille rairuínafuiaiina jeire cai óiadi, caina ñue cánoñeite. Daje izói afe uai jeire otínona canóñede.

10 Jesucristo cai ifomo fécafue Juzíñamuimo caimare cai nabáirillena dani caimo dúide. Nana Judíuaido Juzíñamuimo úriraini, ie jaiái gairíracomo aillo Juzíñamuimo ánozille nícidogafuiaí finódiaioi. Mei íadi afémaci Jesús dibénemo ite cámafuiaina llínonidiaioi.

11 Judíuaimona comínido Juzíñamuimo úritillaima dáacaiño naga fimona afe faga rille die Juzíñamui icomo uite. Afe Juzíñamui icomo ite jofoidie ñue rairuícacomo comíni íaifue ícoínia díena uite. Mei íadi afe faga rille, comíni illácuai jinomo jobáífrediaioi.

12 Afe izói Jesús Jerusalén jinomo duere zefuide, dama ie die tóillado nana comíni fiéndifue oni dóllena. Daí duano íaioína Juzíñamui íena mamede.

13 Ie jira nana Judíuái Juzíñamuimo ánozille nícidogafuiaina féitajano, mai dama Jesumo jaca cai íinollí. Ua, daí íemo caimare cai jaináinamona jíllóiticaí. Ie meáire duere zéfuilla izói, duere cai zefuíaí, áfena náfueñeno nai caimare íemo jáinaiticaí.

14 Ja bíniemo ñuera méidoñega illano caimo íñede; mei íadi Juzíñamui finoca monamo ite méidonide cai illínono izire úíñoidicaí, caimare ziiñona ie diga cai nabáirizaillena.

15 Iemo, Jesús caido Juzíñamuimo nahí úriraimana íllamona, mai Jesudo nágaruillai Juzíñamuimo ñúefue cai nitali. Ua, cai fuemo ite uaido Juzíñamuina caimátaitaredicaí. Cai Ocuíraima Jesús mámedido cai úriadi, jaca Juzíñamuina ebire íóbitaredicaí.

16 Daje izói nágarui jáíima canolle ñúefue jeire o úana, mai féitañeno iri. Aféruído jítáidinomo ómoimo ite raana jeruíñeno fecari; mei aféfuiaína Juzíñamui iere íóbideza.

17 Omoí illaini llogáuaimo ñue omoí cacáreiri. Aféuai anamo ñue omoí itábicaíri; mei omoí comeci ñue íllena aféllaini nágarui ómoína rairuífrediaioiza. Ua aféllaini ómoína rairuilla nie izói íadi, afémaci Juzíñamuimo jino llórediaioi. Ie jira íaioi táijinana omoí daidóñeno iri; mei jáífodo ñue íaioi anamo omoí itábicaíri. Afedo aféllaini Juzíñamui ocuica táijinana caimare fínoite. Mei íadi afémaci afe táijinana zúurecana finóadi, figo cánoñegaomoi.

¹⁸ Mai birui caido Juzíñamuimo omoi úriri, afe Juzíñamui cai canólleza, mei cai comeci ifue íáinideza. Mei jii, nágaruillai náganuiáimo illa dígamie íaioi eróicana ñue jaícina fígomiena íacadícaí.

¹⁹ Ua, cuedo Juzíñamuimo comécido omoi úrillena izire jicádícue, raíre meine abido omoi cígimo Juzíñamui cue oréллеza.

Tiraícaíño uáidota ñue ézicínocaillafue

²⁰ Ja birui Juzíñamui ñue omoi ézicillena jicádícue; Moo Juzíñamui, comécina uái illafue comínimo fécaitimie. Iemona cai Ocuíraíma Jesuna tíllanomona Juzíñamui meine abido cáatate, mei Jesús ie die tóillado nana caimo ite fíénidífuaína muiñódeza. Múíñuano ziiñona Juzíñamuimo cai nabáirillafue cáiena mamede. Ua, Jesús jamánomo ñuera ovejai úiñoráima izoide. Afémie ovejai rairuilla izóí, caina úiñofirede, comécina uái cai íllena.

²¹ Afe bie Juzíñamuimo omoi comeci náireillena jicádícue. Ua nana ie ñuera ríinodo omoi coméciaína ñue jaícina caímare náireillena jicádícue. Afe bie cue jicácado ie jítáinafueña ñue comini eróicana fínoítíomoi. Afe llezica Juzíñamui comeci óiacana izóí dani caimo zúillena izire íemo jicádícue. Mei daí jamánomo ebírenafue Jesucrístomo, ninomo fúíñeítina nitáredícaíza. Mai, daí íteza.

²² Amataí, nana bie ómoímo cue cuega lletárafuaímo járitaño fia omoi comécíiri. Afena izire ómoíena jicádícue, mei bie ómoímo cue cuegáuai íanorideza.

²³ Iemo jáífuena ómoímo fidítaacadícue. Jae cai ama Timoteo llavéinanomona jae jino zuitaca. Omoi dine nai jáíñeítícuemo, afémie cue illánomo raíre dúciadi, nibai daane omoi éroizabítíco.

²⁴ Nana omoi llófuete illáinina cuedo ñue uáidori, naa afénomo ite Jesumo íínotínori. Itáliamona benomo cai bite ámatiaí ómoímo uaillai orédiaíoi.

²⁵ Juzíñamui nana ñue omoi íllena ñue ézicíteza. Mai.

Daítadeza. Jae ñie.

SANTIAGO CUEGABE La Carta de Santiago

Ráidozitinomo Santiago cuete

1 Cue Santiágodicue. Juzíñamui táijitagamiedicue. Daje izóí cai Ocuíraima Jesucristo táijitagamiedicue. Israel náiraímona doce dígazie nana éniedo ráidozitinona uáidotícue.

Juzíñamuimona oga onónafue

2 Cue ámatiai cácarei, ñie facátafuiai ómoimo jíriadi iere caimare omoi iri.

3 Mei jii omoi ínuafue facátaficaíadi áfedo baimo comécina járidoñenafuena onótalliomoi. Mei áfena onódiomoi.

4 Afe comécina járidoñenafue ñue jeire omoi móonaitari. Afedo jáicina jéetagamacina ítíomoi; omoi jitáillífueña íñeite.

5 Omoimona dáamie figo onóñenia, Juzíñamuimona onónafue mai o jicari. Iemona Juzíñamui áfena afémiemo fécaite, mei jii Juzíñamui jeruíño nágamiiaimo onóillífueña fecáfírede. Afémie icíríño comínimo fecáfírede.

6 Mei íadi ínuafuedo o jicari. Daií jitáírede; minícana o comeci anado ígicaiño jicari. Naga uaina ígiciredimie jorai bagua izóí jairífodo dóbaidobaicaide.

7 Daiítadimie Ocuíraimamona minícana óllena comécimo facáño iri.

8 Aféfuena onóigaza. Ñimie birui bie raa óiacade, uire jáíena óiacade, ñue jáicina macánide.

9 ¡Ráanide ama, caimare o iri! Juzíñamui caifófenemo ona jóonelle jira.

10 Ráaredimie, o anáfeficaíadi, áfena náfueño caimare o iri. Mei ráaredino ráitie záfia izóideza. Afe záfia are íñeite.

11 Jitoma bíllamona íena iere llirítaite. Caigáíllamona afe záfia ana júide. Daií ie ebírenano fuite. Daje izóí ráaredimie ie nícidocaíafuiai cígiri táinocaite.

Facátafuiai fiénidemo baítafuiai díga

12 Dáamie facátafuiai járitaño lliñoíadi afémie caimare ite. Facátafuimona ñue oni jaillano ícoínia fia iga raa jírídoite, ñue facátaoicailla jira. Afe ícoínia fia iga raa ñuicirai izóidífue. Afe iga raa ua Juzíñamui ie illa ziiño cáataitinona. Ua Juzíñamuina izírúitínomo uícodo lloga ziiño cáataitinona íaióimo fécaite.

13 Dámie íaífue mo baítafuena cacáadi, afe Juzíñamui orécaza comécina facáño o iri, mei jira afe daiítadífue Juzíñamui jaca jitáíñede. Daje izóí Juzíñamui bumo afe íaífue mo baítafuena comuítañede.

14 Mei afefue jáífodo bite. Dáamie dama ie comeci fienu jítainafuíaído comeci óíadi, áfedo íaífue mo báíite. Afe izóí dáamie ie fienu jítainafuíaído jífueficailla; íemo afe jífúiafuedo afémie meine íaífue mo báíite.

15 Afe bie comeci fiénino jítainafuíaímona íaífue comuide. Ie mei afe íaífue jae oruúbicaillamona tílláfue comuide.

16 Cue izírúiga ámatiai jífuefizaiño iri.

17 Nana ñuera caimo iga raa, nana caimo jáicina jóobidífúiai díga, caifona Juzíñamuimona bite. Afémie nana monamo ite egáíñotinona finode. Juzíñamui jaca dáamie; afémiemo jáífodo meídogafuena íñede.

¹⁸ Afémie uáfueña úrilla uaido cáatatinona caína comúitate. Afena finode ie finócafuiaimona como fueñe oga llizie izóí cai illena; mei ie comeci jítaina izóí finode.

Uáfueña Juziñamuimo cai comécinafue

¹⁹ Ie jira izíruiga ámatiai cacai. Omoimona nágamiai jaca jefo jinéoiri, mei íadi fíaicana o úriri, daje izóí fíaicana ríicairi.

²⁰ Mei jii, ríicaidimie Juziñamuina íóbítañede.

²¹ Mei daí nana íáiredífuiaí omoi fáicanocairi, jamánomo móonaioicaide fiénidífuiaí diga. Omoi comécimo lloga uai Juziñamui úrilla uaina comeci mánaínafuedo jeire omoi oíri. Mei jii afe úrillauai ríinorede omoi joreño jíllloillena.

²² Jira úrillauai ómoimo lloga ráfueña fino. Fia aféfuemo táinona cacáreiñeno. Fia táinona omoi cacáadi daní abí jífueitíomoi.

²³ Afe úrillafue fia táinona cacádimie aféfuena iere cácañenia, afémie acáranimo uíeco ciona izóidimie.

²⁴ Afémie ie izóidena ciode, mei íadi raíre jailla llezica, ie izóidena féitate.

²⁵ Cacánafueña féitañedimie jamánomo ñuera ocuífueña jeire ófírede. Afe jamánomo ñuera ocuífueño caimo rairuíñenafueña itátaga. Aféfuemo méidoñeno afémie íoide. Afe ocuífueño afémie ínota finode. Daí finódimie nana ie finócafuiaido caimare ite.

²⁶ Dámie Juziñamuimo comécidimie comeci facáoiadi, mei íadi fueña rairuíñeno úriadi, afémie dama abí jífueite. Afémie comécinafue táinobicaide.

²⁷ Nífuénide comécinafue, Moo Juziñamuimo eróicana íáinidífuie bie izóí ite; ñue Juziñamuimo comécidimie móonidizaíai íemo éinidizaíai diga, íaíoiña duéruillano canófírede. Daje izóí fecínguaina íaíoi duéruillano canófírede. Afe llezica éniemo ite Juziñamuina éoidimaci íaífuiaido ñúemie abína íaidoñede.

2

Conímana énenoruiñeno iri

¹ Cue ámatiai, cai ebíruigamie Ocuíraima Jesucrístomo ínotimacídíomoi. Daí omoi ínua llezica comínimona dáarie énénotañeno iri.

²⁻³ Acatagafuedo dáitícue: Omoi gairíllanomo queníredena onoi icuíforedimie, ráifide ínícuro jítaoidimie bíadi, afémiena daífíredíomoi: “Bie ñúenomo ráii.” Mei íadi afe llezica dúeredimie tíbazarodo bíadi, afémiena jíáfodo llínota níbai dáitío: “Batí naidai,” o níbai dáitío: “Ana benó éniemo ráii.” Daí ráanaitimiena raíre ñue llínotíomoi, mei íadi dúeredimie buna náfueñega.

⁴ Ie jira daí daní ómoimona dáarie énenoruidíomoi. Daí cómemo jícanotimiena daní omoi abí mamédíomoi, mei íadi fiénidemo comécinafuedo abí mamédíomoi.

⁵ Cue izíruiga ámatiai, bíemo omoi cácarei. Bie éniemo úcubenedínona Juziñamui nízedo, íaíoi ínuafue jamánomo jebuíllena. Daa afe izóí íaíoiña Juziñamui nízedo, feci raa izóí ie illáimana illáruina maiñóllena. Juziñamui ie uíodo lloga uai daina izóí afe illáimainanona íena izíruitimacimo fécaite.

⁶ Mei íadi dúeredimacina meáidaitadíomoi. ¿Uáfueñede, ráaredimaci ómoína llégítáfírediaíoi? Jii, uafue. ¿Ríiredimaci uícomo ómoína gugúrioicana uítíaiíoi? Jii, uítíaiíoi.

7 ¿Ñie afe ráanaitimaci Crístona íairuioidino? Jii, níimaci. Mei íadi afémie ñue izíruiga mámedido Cristo iédiomoi.

8 Cuegáuaimona lloga jamánomo ocuícáfue omoi jíeruiadi ñue finódiomoi. Afefue daide: “O aino cómena izíruiri, dama o abina o izíruilla izói.”

9 Mei íadi conímána dámie omoi énenoruia, íaifue mo baíidiomoi. Juzíñamui ocuícáfue omoi ícoínia jae daí ite.

10 Dámie naga ocuícáfue iere cacáadi, mei íadi dáallegoi ocuícallegoi nai fuitáñeniadi dama afémie ícoínia daí ite. Uafue nana ocuícáfuaí fuitáñedimie zefuille izói dáallegoi fuitáñedimie daí daje izói zéfuite.

11 Mei daje Juzíñamui daide: “Jíruireño iri,” afémie dáanomo daide: “Cóména titáñeno iri.” Daa come jíruireñenia mei íadi cómena fáiaí, jae ocuícáfue iere cacáñede.

12 Jira ñue o úriri; o íllafue jaícina o jóoneri. Caimo rairuíñenafue itátaite ocuícáfuedo jícanollícaí, ie jira ñue caí íllana jítaírede.

13 Mei jii, nana jíáimacina duéruíñedino, afe íbana duéruíñeno, jícanollícaí. Mei íadi jíáimacina duéruítino nie izói níbaíñegaza ñue jáite, duéruíllafue jícanollífué baímo ñue ílla jíraí.

Ínuafue níciduafue díga jítaírede

14 Cue ámatiaí cacai. Dámie ñúefuena finóñeniadi, mei íadi “ínoticue” daííadi ¿ñífuena ñuera? ¿Afe ñúeñeite! ¿Afe dána ínuafue jíllotaite? Jíllotañeite.

15 Acatagafuedo dáíiticue. Íncuironide güíllenide ama miríngo izóidino omoi cígimo íadi,

16 mei íadi ómoimona dámie fia uaido daííadi: “Ñue o iri. Rólliemona jíforiri. Maí güiri,” mei íadi aféruimo ie abímo jítaícaí raa o fecáñeniadi, ¿nie izói ñue ite? ¿Ñúeñeite!

17 Caí ínuafue mo daje izói ite. Dámie ie ínuafue mo níciduafuedo ácatañenia afe ínuafue jae nine táinocaide, afe ie ínuafue nabáinina jíraí.

18 Mei níbaí, dámie cuena dáíite: “Ínuafue omo ite mei íadi cue nícidofiredicue.” Mei jíra cue uai óiticue: ¿o ñue níciduafue eneno o ínuafuena cuemo ácatari! Afe llezica cue ínuafuena cue ñue níciduafuedo omo cíotaiticue.

19 Daade Juzíñamui íllana ínotio. Afe díonomo o ínuafue ñue baite. Mei íadi aféfuena fiénide janábaiaí daje izói ínotiaí. Iemona afe jácíeri cuidíridiaí.

20 Abina onóñedimedio. ¿Jaícina jáidífuena onóacañedio? Dáanomo dáíiticue: Ñue níciduafuedo cíotañega ínuafue jaca nine táinocaide.

21 Caí jáiaígima ímie Abrahana íe íaífuenidimie izóinadmo Juzíñamui ñue íena jíeruite. Ua Juzíñamui íaífuenidimie íena ñue llínote. Mei íe jíto Isaac tílada Juzíñamui fecaca raana izói fecáacana jíra, daí íena llínote.

22 Jira Abraham ínuafuafue mo uáfue mo cíodio. Abraham íe níciduafuedo íe ínuafuena ñue jino cíotate. Daje llezica afe bie níciduafuedo íe ínuafue ñue jaícina móonaioicaide.

23 Daí Cuegáuaí dáinana ñue fuitade. Aféuaí daide: “Abraham Juzíñamui mo ínote. Ie jíra Juzíñamui íemo comeci facade: Afémie cuemo ínuafue ñue baite íena íaífuenidimie cue llínollena, —daide.” Mei Abraham Juzíñamui nabaina mamécámie.

24 Mei áfemona come níciduafuedo Juzíñamui íena íáifuenidimiena llínuafuena ónoitiomoi; dama ie ínuafuemona llínoñedeza.

25 Afe bifue izói Rahábamo daí íficaide. Afengo jiruiredingo. Mei íadi énie fidítaraini caimare llínuamona, íaioina canode oni jáigodo ñue íaioi jáillena. Afe íaioimo nícidua jira Juzíñamui aféngona íáifuenidingona izói ñue llínote.

26 Mei daí omoi ónoigafuemona llóiticue. Naga joréñonide abi tíde, afe izói níciduafuedo nabáinide ínuafue nine táinocaide.

3

Cai fue rafue

1 Cue ámatiai cacai. Omoimona aillo llófueraimana íacadino izói íñeno omoi iri. Mei jii, nana llófuereidino, cue izóidino baimo izire jicánollicai. Afena onódiomoi.

2 Nana cai aillo fiénidillegoi finódicai. Dáamie minícana fiénidillegoi ie daínafuemo íñeniadi, afémie ñue comécina figomie, ñue jáicnaidimie. Afémie nana ie abi rairuillana onode.

3 Moziñoragai caballo fuemo cai jóoneadi caina iere íaioi ínnollena, ie ifo oni datállena finóredicai. Afemona nana ie abi diga dájade.

4 Daje izói áillue jofóredicaemo comeci omoi faca. Afecae jamánomo áillue íadi, afe llezica riírede jairífodo ñuitáicaide. Mei íadi datárima duera jiza datárabeñodo ie jáiacana diné datáicaide.

5 Afe izói cai fue ite. Cai abi aillona mei íadi fue duera. Mei íadi afe fuedo jamánomo áillue ráfuiái finórede. Uafue duera jiza réicimona áillue icáiena bóotate.

6 Jae come fue irai izoide. Afe fuemo jamánomo facádonide íaifuiái ite. Afe bie fue Juzíñamui cai abimo finoca; mei íadi afe fue nana cai abina íaire finode. Fieni comini duere finóllirai ite; afe iráimona uneca izói cai fuemo fieni úrioidino ite. Iemona nana cai caana llezica finótagafuiái bóobicaide.

7 Ímado nana riire rílleníai tóirede, féedino, jáióníari, naa buináizari. Nana áfeníai fibítagaiaioi.

8 Mei íadi fuena buna fibítanide. Cai fuedo bite íairede raana jaca buna llícaitanide. Aillo fieni úritadino, titade juia izói cai fuemo ite.

9 Afe daje fuedo cai Moo Juzíñamuimo caimátaioidicai; ie llezica Juzíñamui finoca cómena faidódicai. Uafue Juzíñamui dama ie eroille izói cómena finode.

10 Daje fuedo caimátailafue jino bite faidórrillafuiái diga. Cue ámatiai, cacai. Bifue izói omoi íñeno iri.

11 ¿Daje jáinoi ífómona toráfomona ñúeji erírediji diga jino tórede? ¡Tónide!

12 Cue ámatiai, cacai. ¿Noménamona comáijina órede? ¡Onide! ¿Jíriconamo cineci llizírede, meita áfena? ¡Lízínide! Afe daje izói cúerediji naimérediji diga daje jáinoi ífómona toráfomona jaca jino tónide. (Ie jira omoi fue rairuiri, fieni úrillafue o fuedo jino bíñeillena. Mei jira Juzíñamui ímáciadiomoi.)

Uáfuenta ñue onónafue

13 Omoimo dáamie onódimie, ñue baitádimie íadi, afe ie onóigafue nágarui ñue ie illáfuedo ácatari. Ua ie fibíllafuedo fecaca comeci mánainafuemo ie finócafuiái ciotari.

14 Mei íadi omoi comécimo izire úradoillafue íadi, afe llezica omoi finoca ráfuiaina járidotiomoi; bie omoi fibilla abi ínuafuemo comécíñeno omoi iri. Afe izóidífuíai táinofuiái, uáfuenta jáanote.

15 Afe izoide fibíllafue Juzíñamuimona biñede, mei íadi afe fibíllafue bínie comíni comeci úrillafue; Juzíñamuina éoidimaci onóigafue; dama Taife ifue.

16 Aillo úradoillafue, jarire uícodo máíñuafue diga illánomo, afénomo aillo júdaizitifue ite naa fiéndifuiari.

17 Mei íadi Juzíñamuimona fibíllafue otímaci nano fueñe nífuenino macádiaioi. Ie mei afémaci mánaidimaci; ríifuedo ocuñediaioi; jíáimíemo uícodo comécitadiaioi. Afémaci dúecaillafuena oruídino; ñúefuena finófrediaioi. Afémaci uáfodo úritimaci; jífueriñediaioi.

18 Comeci ñue uái illáfue mo comútatino afefue rigájiai izói comínido fecádiaioi. Afemona ria llizilla izoide comeci jaícina ñúeitaitino llínotiaioi.

4

Eniemo ite Juzíñamuina éoidimacimo nabáirillafue

1 Omoimo ite fuírillafuaii zinena bite, júfiduafuaii diga? Omoi fieni comeci óiacanafuiaiimona bite. Aféfuiai omoi comécina jaca éoitade.

2 Omoi daa raana jitáiaidi, áfena ómoimo llínonina jira fatíomoi. Jíáie raamo omoi úradoiadi áfena ónidíomoi, jira fuírillano jóbairitíomoi. Omoi jitaiga raa onédiomoi, Juzíñamuimo jícáñena jira.

3 Afémiemo omoi jícáadi llínoñediomoi, iaire jica ícoinia. Mei jíí áfena óiacadiomoi fia omoi caimare íacanafuiaiimo dotállena.

4 Jíáfodo fiéndimacidiomoi. Bniemo ite Juzíñamuina éoidimacimo nabáiriacadino Juzíñamui fairícomina jáite. ¿Omoi meita bífuena onóñediomoi? Níimie éoidimacimo nabaina maméidimie Juzíñamui fairícomana dóbaicaide.

5 Cuegáuai taino lloñede. Aféuai daide: “Juzíñamui ie Ñuera Joreño caimo fecade cai diga illena. Afe Joreño uríoina izói caina izíruite,” daide.

6 Mei íadi Juzíñamui caina ríiduafuedo baimo caina cánuaibite. Mei jíí Cuegáuai daide: “Juzíñamui afe abi ínotinona rairuide; mei íadi comécina mánaidimacina íaioina ríiduafuedo íaioina cánuaibite.”

7 Juzíñamui anamo mai omoi itábicaire. Taifemo omoi mameri, íemona ómoimona oni bótaiteza.

8 Mai Juzíñamuimo áinozillano caimare omoi úriri; afe íbana afémie ómoimo caimare úrite. Íáifueredino, mai omoi comeci íaifuiái doíri. Juzíñamuina izíruiacadino íemo dáanomo íena éoidimacina izíruitino, mai omoi comeci íáinitari.

9 Omoi zúureficaire; omoi cáillicaili eeri. Omoi zadáilla jeme; jíáfodo meídocaire. Afe izói omoi cáimafue zúucaillano méidori.

10 Cai Ocuíraima Jesucristo uíécomo omoi manánari, íemona afémie ómoina caifo naidáneiteza.

Cai ama finócafue fieni jícánuafe

11 Amatiai, jíáimana fieni omoi úriñeno iri. Amana fieni úritimie daje izói ocuífue mo fieni úrite. Afe izói ámana fieni jícánotimie, daíí ocuífue mo fieni fairíote. Mei jira ocuífue mo fieni o fairíoadi, jira ocuífue na íere cacáñedimedio. Jae jícánoraimana íitio.

12 Mei íadi daade ocuífue llotímie; afe llezica afémie jícánoitimie. Dama afémie cai jíllotaraima, jíáie izói afémie cai táinocaitaraima. Mei, o, ziníimedio jíáimamo íífuiai o jícánodoillena?

Ufretirui mona monáillirui onónide

13 Mai bíemo omoi cacai, omoi úrilla uaina daidino. Bie izói daiífirediomoí: “Birui nibai uire jítiramo jáie jófuego jáiticaí. Dinomo daa fimona fecárizaiticaí, úcube cai óllena,” daidíomoí.

14 Mei íadi due onóñediomoí uire jiti caimo íitifuenta. Mei jii çminica mei cai cáatatinona? Cai cáatatio daallu cíocaizábite úillie izói. Iemona afe úillie nine táinoacide.

15 Bifue izói omoi daiífede: “Juzíñamui jítaiadi íiticaí. Iemona aféfuena nibai jáífuenta fñoiticaí.”

16 Mei íadi afe íbana, o dáiána meidoiacaño nai abi ínocana úritiomoí. Nana afe abi ínuafue fiénide.

17 Núfuenta fínuana onódimie afefue finóñenia afémie fiénidifuego báide.

5*Ráaredimaci llétafue*

1 *Ráaredimaci*, bífuego omoi cácareí! Cáillicaiilli eeri, aillo duere finóbillifuiái ómoímo íteza. Aféfuedo duere zéfuitiomoí.

2 Omoi ebírede ráaie jae rifaide. Omoi ñuera iníroillai ícuai güiga.

3 Omoi úcube quenírede ráaniai diga jae éezite. Afe éeíafue fiénidifue ómoímo nítaite, ie mei bie éeíafue omoi comeci duere fñoite; irai amena cuarítaoina izói ómoína fñoite. Afe birui íirairuimo omoi ráaienai jae ofítatiomoí.

4 Omoi güillena ónaruillaido táijitagamací úcube jeruídiomoí. Afe jeruica úcube ómoímo riire jáífodo dájecana úrite. Nana nairai illaíma Juzíñamui bie táijitagamací éecana dáiána cacade.

5 Bie éniemo jamánomo ñue ebírede ráaniai ómoímo ífiredo. Dani nana omoi comeci jitailla izói ífirediomoí. Fia güillárenamona mero izói farédíomoí. Afe llezica fazílliruimo dúcizaide.

6 Nano fueñe nífuenidímacina titátatiomoí, ie mei afémacina fatíomoí. Afe nífuenidíno ómoímo abi zóofetiaíoi, mei íadi íaíoi mo dúecaíño fatíomoí.

Comeci járidoñenafue

7 Ie jira, ámatiai, cai Ocuíraíma Jesucristo billíruimo comeci járidoño omoi iri. Jacáfaimo táijidímie ráifide llizíllaniaina járidoño úiñote. Ua nano fueñeide uáici mei nai úiñoide. Iiraie uáici mei afe llizíllaniaina óite.

8 Daje izói omoi járidoño. Omoi comeci mame; cai Ocuíraíma billírui jae áinozideza.

9 Amatai, conímamo ríiríñe omoi iri, jicánollímacina omoi íñeilla. Mei jii, Juzíñamui dama jicánoraíma; afémie cai finócafuiái jicánollírui jae áinozide.

10 Cue ámatiai, uai llórainimo comeci uibíoiri. Iaiíoi nágarui ñue illafue caimo ácataiteza. Juzíñamui mámecido íaíoi úrillamona iere duere zefuídiaíoi, mei íadi jaca járidoñediaíoi.

11 Duere zefuillafuemono zefui cácañedíno caimare itíaiíoi daiífiredicaí. Jáiaígima Job íe járidoñenafuena cacádiomoí. Afe llezica Juzíñamui íemo írainomo finócafue onódiomoí. Mei jii, Juzíñamui cai Ocuíraíma caimo dúecaífiredo, fiénidifuiái íba are níno mo caimo óñeite.

12 Cue ámatiai cacai. Jamánomoidifue llóiticue. Juzíñamui mámecí uafue daiíllena táinomo llíñoño iri; afe daií mona mámecí énie mámecí diga táinomo llíñoño iri, ñue jáie raana táinomo llínuano uafue daiíllena

daiñeno iri. “Ji” o daiña nie izói íteza. “Ieñede” o daiña íeñeiteza. Afe izói mai omoi úriri Juziñamui duere omoi ñinoñeilleza.

¹³ Omoimona dáamie duere zéfuia afémie dama Juziñamuimo úriri. Dáamie caimare íadi afémie ñúefue nitada róiri.

¹⁴ Dáamie iráreia, gairáaco imácimona eicomínina jírízairi, afémieri Juziñamuimo íaiói úrillena. Afe llezica afémiemo Juziñamui mámedido cáiredijina jóoneitiaíoi.

¹⁵ Inuafuedo Juziñamuimo íaiói úriadi iráredimie jíllobicaite, ie mei Moo Juziñamui íena náidacaitaite. Íáiredifuiamo nauí ie baiíadi, afe íaifuiái oni dófinamona, ñue nífuenidimiena Juziñamui íena llíinoite.

¹⁶ Ie jira omoi íaifuiái jofo conímamo omoi lloiri. Afena jáanoñeno iri. Afe mei conímamo Juziñamuimo omoi jicari, íemona ñue omoi jíllolleza. Fígomie izire Juziñamuimo úrillafue iere rínorede.

¹⁷ Uai lloraima Elías jiba cai izóidimie. Juziñamuimo ie úrillado noci bíñeillena Juziñamuimo jicade. Jícamona jae dafimonaámani átuedo éniemo nocina bíñede.

¹⁸ Ie mei dáanomo Juziñamuimo jícamona meine bízaide; áfemona énie naa llízieri zicode.

¹⁹ Cue ámatiaí, ómoimona dámie ua uáimona oni fieni nibéfodo jáiadi, jíáimie íena meine abido atídena ñuera.

²⁰ Bífuena omoi onóilleza. Fiénidimie ie íáirede íomona, meine atídime afe fiénidime joreño tíllanomona jíllotaite. Afe llezica aillo íaifuiái oni dóficaite. Jae níie.

SAN PEDRO NANOIDE CUEGABE Primera Carta del Apóstol San Pedro

Jesumo ñnote ráidozitinomo Pedro cuete

¹ Cue Pédrodicue; Jesucristo orécamiedicue. Bibe Jesumo ñnote ráidozinaitinomo cueticue. Ua omoi éniemona oni Ponto éniemo, Galicia éniemo, Capadocia éniemo, Asia éniemo, Bitinia éniemo jae áfeniaido júdaizitagaomoi.

² Mei ñadi Moo Juziñamui nizécamacidiomoi. Jaiai ie mamérilla izói, ja ie nizécánodiomoi. Ie Ñuera Joreño jae íeiena mamécaomoi, Jesucristo uaimo iere ñue omoi cacáreillena; afe emódomo Jesucristo díedo íaifuenidimacina Juziñamui eróicana omoi jáillena, jae mamécaomoi. Mei Juziñamui ómoína aillo éziciíteza, íemo comeci caimare uái illafue ómoímo llóíteza.

Juziñamui ñaina ñue uáfueña zúitifuemo caimare comeciñiredicai

³ Cai Ocuíraíma Jesucristo Moo Juziñamuina mai cai íóbioitallí. Mei nano fueñe aféñie jamánomo caimo dúecaide. Dúecaillano como meine nane caina jéicitaacade. Ie jira Juziñamui Jesucristona tídinuiaimona meine abído cáatate. Afe Jesús meine cáanamona Juziñamui ua como meine jéicigacai. Afe bie cai comue dáanomo jéiciñafue ñue Juziñamui caimo fecáñifuemo caina nágarui úiñotate. (Afeñue cai zíñona illíñue.)

⁴ Afeñue amena záfia izóíñede. Amena záfia jaca lliríñirede, mei ñadi afeñue zíñona jaca ñinomo lliríñede. Ua, Juziñamui ómoína ñainafue, monamo ite ñuera feci raa izóidena ómoína onótate. Afena Juziñamui ómoíena jóoneoide, omoi como meine jéiciamona íco jaíruido omoi maíñóllena. Afe feci raa izóidena, jaca ñiné táinocaitanide. Daje izói afe raa jaca íaidonide.

⁵ Juziñamuimo omoi ñnuado íemo ite ñuera ríinodo ómoína ríidote. Ua ómoína ríidote, íemo ite jíllonafue dibénemo omoi dúciillena. Afe omoi zíñona jíllonafue aféñie ñue finode, íirairuillaido jino ñue onótallena.

⁶ Bífuaído omoi jamánomo caimare itíomoi. Mei ñadi dáaruiríe jíáifodoríe duere zefuérédiomoi. Afeñue ñibai jabo jítaírede.

⁷ Omoímo ite Juziñamuimo ñnogafue, oro izoide. Naga oro iraimo facaca, bie ua oro ñaíillena. Afe izói ómoímo ite Juziñamuimo ñnogafue facárede. Caimo ífícaíñirede facátafuiai oro zia irai izoide. Nana bie facátafuiaimona ñibáñino ñue jino bite Juziñamuimo ñnogafue, aillo ráíñide. Ua afe ñue ñnogafue oro baímo jamánomo ráíñide, mei afe oro fúíteza. Mei jira ja ñaí facátagamíe íemo ite ie ñnogafue ñuera. Ie ñnogafue ja ñibáñino ñue jino jailla, áfemona ja figura. Jesucristo cíocaizai billiriuimo aféñie ñue facátagamíena jáite. Dáaruina Juziñamuimo ite ebírenafue llíñoite. Daje llezica aféruimo ññéfueña Juziñamui íemo ñitárede.

⁸ Jesucristona cíóññediomoi íadi, íena izírúitiomoi. Aféñiema cíóññediomoi íadi íemo ñnotiomoi. Afe omoi ñnuamona jamánomo caimare itíomoi. Afe cáimafue ñue omoi comécina zuitade. Ua afe aillo cáimafueri omoi ñaíñíuiai íñede.

⁹ Omoi ñnogafue ícoínia omoi comeci jíllona maíñóitiomoi.

10 Jaiáidigima illáruillaido Juzíñamui uai jino lloraini afe bie jílloñafue riire jicánotiaioi. Afe dáaruído bie jílloñafuena uáfodo onóillena jicájicanodiaioi. Afe uai lloraini Juzíñamui ómoimo finóllifue uícodo lloite. Ua uire Juzíñamui ómoimo dúecaillano ómoimo fecállifuiái raire uícodo llotíaioi.

11 Cristo Joreño afe uai lórainimo Cristo uire duere finóbillifue raire uícodo fidítate. Afe dáaruído Crísto ebiñe nitállifueña íaioimo daje izói fidítaibite. Afe íaioimo ite Joreño íaioimo lluaíbifagufuai ñue onóillena, comécido jenódiaioi. “Bie lluaíbifagufue ¿bumo dúide?” daidíaioi. Afe emódomo: “¿Ñiruido bie llogáfuiái zúite?” daidíaioi.

12 Iemona Juzíñamui jiáifueña íaioimo fidítate. Afefue daide: “Íaioi uícodo llogáuaido aféruido itínuiaina figo canóñediaioi. Mei íadi nana caina ñue cánoítiaioi.” Daí Juzíñamui íaioimo lloite. Jae biruillaido ómoimo llogáfuiái afe bie jaiái llogáuái izói jóide. Birui ñue omoí jílloilluaina llotino, Ñuera Joreño ríñodo úritiaioi. Afe Ñuera Joreño monámona ana oreca. Afe bífuiaina Juzíñamui abi imaci dani comécido onóacadiaioi.

Juzíñamui íaifuenino cai íllena ocuide

13 Mei jira nana omoí jetáacaga raamo ñue comeci facari. Omoí comeci ñúefuedo omoí úrifreiri, mei Juzíñamui íco ñáruí íeiena ómoína uáidoiteza. Ua Jesucristo cíocailliruido Juzíñamui ómoimo dúecailluaimo daa áfemo izire omoí comécíiri.

14 Ocuíllana jéruite úruíái izói omoí iri. Jaiái Juzíñamuina omoí óñoñena llezica ómoimo ite comeci jítáillafue izói, omoí íñeno iri.

15 Mei birui jiáfodo ñue omoí iri. Nana omoí jetáacagafuíaímo, jamánomo ñue íaifuenino mai omoí iri, mei ómoína uáidote Juzíñamui íaifuenidímieza.

16 Mei Juzíñamui Cuegáuái daí daide: “Cue íaifuenidímiedícueza, cue izói íaifuenino omoí iri,” daí Juzíñamui daide.

17 Juzíñamui illa dígamie íaioi illáfuiái riire jicánoite. Ua illáicomínimo, jamáicomínimo dámie fiéñeno daje izói nana riire jicánoite. Ja birui afe bie Juzíñamuina “Cai Moo” daidíomoi. Afemona afémiena mai caimare omoí jacíruri. Ua bie éñemo omoí ille díno bie izói omoí iri.

18 Mei Juzíñamui omoí illa táñofuíaímona ja ómoína jílloñateza. Afe ómoimo ite táñofuíaí omoí jaiáidigimamona otíomoi. Afe jílloñafue ráifinana ñue onódiomoi. Bie ráifina órodo íbánide. Daje izói plátado íbánide, naa jiáie úcubetunido.

19 Afe jílloñafue dama Cristo ráifide díedo íbátarede. Mei Jesucristo cruzmo, íainide boáfenide ovéjatiru izóidímie, Juzíñamuimo fállena fecaca.

20 Jaiái ninomo bie éñie nai cómuítañenia Cristo daí mameca, mei íadi are illa ícoimo, benó cai illa llezica, afémie cíocaizaibite ñue omoí íllena.

21 Afe bie Crísto Juzíñamuimo íñotíomoi. Tíidímacimona Juzíñamui bie Crístona meine cáatate. Afe méifodo Juzíñamui ñúefue íemo nitade. Afemona afémiedo Juzíñamuimo íñotíomoi. Afe izói ja Juzíñamuimo izire comécíidíomoi.

22 Ja birui ua llogáuaina Ñuera Joréñodo omoí jéruíllamona omoí comeci íaifuiái muiñódiomoi. Afe omoí comeci íaifue múííuamona omoí ámatiaína uáfueña nahí izíruredíomoi. Afe daí conímana mai omoí comécido, naa omoí ríñodo izíruri.

²³ Mei jii, como meine jéicigaomoi. Come móomona meine jéiciñegaomoi mei títiaioiza. Mei íadi Juziñamui uaido meine jéicigaomoi. Afémie uai jaca ninomo féiñeno ziiñona íte.

²⁴ Jaiaí Juziñamui Cuegáuai daje izói llote. Aféuai daide:

Nana bíniemo ite náiraimona illa dígamié jaca ráitiai izoide.

Iaioi jamánomo jalléinafue ráitiai záfia izoide.

Afe ráitiai dúifirede; dúillamona ie záfia uaide.

²⁵ Mei íadi cai Ocuídímie uai féiñeno jaca ziiñona íte.

Afe bie uai, ua ómoimo lloga ñue jíllona uai.

2

¹ Mei jira nana ómoimo ite éoicana finócafuiai fáicanocairi. Daje izói jiáimana o jífueacanafue abido oñeno fáicanocairi. Comeci iáirena mei, emodo ífuedo comínina ñue úritimie izóidífue omoi féitari. Daje izói jiámamo omoi úradoñeno iri. Afe mei naga jiámmana ebena úcaillafuiai mai omoi féitaziri.

² Mei afe méifodo como jococa úrue izói comeci náiretaite jirolle jenori. Ua, monoí ii jírua izói Juziñamui lloga iáinino, juánide uailai mai izire omoi jenori, nágarui áfemo omoi comécillena. Afedo ñue riire móonaitiomoiza. Daje izói aféuaido nanómona omoi ínoia, jíllotiomoí.

³ Ua daí omoi jenori, mei cai Ocuíraima comécina ñuénana onódiomoiza.

Jesucristo cómena ziiñona cáatate nofici izóidímie

⁴ Ie jira cai Ocuíraimamo mai omoi ánoziri; afémie cómena cáatate nofici izóidímieza. Afémie comínimona fiénide nofici ruifruillano oni dotaca izóidímie. Mei íadi Juziñamui dibénedo afémie iere ráifide nizeca nofici izóidímie.

⁵ Afe izói omoi cáatate nofici izóidímacidiomoi. Iemona Juziñamui ómoína óiacade, ie cióñena ua ífírenaco níllena. Afemona abina omoi rairuíñeno iri. Daje izói Juziñamui íeiena mameca, Juziñamuimo comínido úrirainina dáaziena ómoína jóneacade. Daí omoi jáillemona, uaido Juziñamui íóbillena fecácafue íemo Jesucristodo fécaitiomoi. Afena Juziñamui jeire óiteza.

⁶ Cai Ocuíraima Jesucristo bie nofici izóidímie. Ie jira Juziñamui Cuegáuai uícodó daje izói llote; aféuaido Juziñamui daide:

Afe cue irácomo, ñi Slón dainácomo, dámie jóneticue.

Afémie iere ráifide nizeca ñue riire mozíoide nofici izóidímie.

Nana afémiemo ínotino meáidaiñeno táinomo fáifiñeitaiói, daide.

⁷⁻⁸ Ja birui afémiemo ñue ínotímacidiomoi. Omoiri bie nofici izóidímie jamánomo ráifide. Mei íadi afémiemo ínoñeite comini, éicitaila izói, afémiemo baíidiaioi. Ua Cuegáuai benomo daína izói ja íaioimo zuide. Aféuai daide:

Afémie éicitaitate nofici izói íte.

Ua áillue nofici écitaide bailla izói afémie íemo ínoñedinona baítate.

Mei afe llogáuai jeire oñenamona, éicitaidímie izói baíidiaioi. Afe íaioi baíille jaiaí ninomo daí mamécamaci. Daje izói afe ñue riire nofici izóidímie mo íaioi ínoñenamona nane jáie daináuai íaioimo zuide. Iaioi ínoñegamié dibénedo aféuai daide:

Jofo níraini oni dotaca nofici jae ua riire mozíoide nofici izói jaide.

Juziñamuimo jáináidímacidiomoi

⁹ Mei íadi nizécaziediomoí. Afe izóí Jamánomoidillaíma Juzíñamui iédiomoí. Juzíñamui ocuífírega afémiemo comínido úrirainidiomoí. Afe emódomo Juzíñamui ñue finoca ie ocuífírega náiraidiomoí. Daje izóí dama Juzíñamuimo jainaide comínidiomoí. Bífuiái bie izóí jóide, Juzíñamui cai jilloillena uaido jamánomo ebire finócafuíai jino comínimo omoí llóllena. Afe bíedo Juzíñamui, omoí jítifomona jino ie jamánomo ebírede úzefomo, ómoína jíríte.

¹⁰ Jaiái illáruido Juzíñamui ómoína daide: “Cue comíñíñediomoí,” mei íadi ja biruí Juzíñamuimo jainaide náiraidiomoí. Jaiái ómoimo buna dúecañede, mei íadi biruí Juzíñamui duéruigamacidiomoí.

Afe jaináidino Juzíñamui táijitaganaona itíaiói

¹¹ Izíruíga ámatíai, Juzíñamuimo íñoñedíno cígiri itíomoíza, jicánemaci izóidiomoí. Ie jira izire jicádícue, bie éniemo ite táinomo come abí jitailla fiénidífuíaimona mai abí omoí rairuíri, mei afe abí jítáinafuíai omoí comécimo bacáuaina íoideza.

¹² Juzíñamuimo íñoñedíno cígiri omoí illa dínó ñue illa dibénedo mai omoí iri. Mei biruí afémaci fiénidímacidiomoí izóí, ómoína uáitaoidíaiói. Mei íadi afe ómoína uáitaoidíno, omoí ñue illáfuena íaiói ciónamona, níbai íaiói comécimo ite fiénidífuíai ñúefuina méidoítaiói. Iemona Juzíñamui íaióina dúecaizaíbillíruímo afémaci daje izóí Juzíñamui íóboítaitaiói.

¹³ Cai Ocuíraímana ícoína, nana comíni jónega ríimaci anamo, mai omoí itábicaíri. Daje izóí jabóidíllaíma nahíllaíma anamo omoí itábicaíri. Afe nahíllaíma jamánomo ocuídímie.

¹⁴ Afe nahíllaíma oreca jabóidíllaíni, fiénidínona duere fínoítaiói, mei íadi ñúefue dibénemo itínona ébitaitaiói. Iemona íaiói anamo ífíreíri.

¹⁵ Mei jira Juzíñamui ñue illáfuemo omoí illana jítaide, áfedo abina onóñedímací, comécínino úritímací díga íaiói táinodo úrillauai omoí fáinocaitallena.

¹⁶ Ráíruiñegamací izóí ñue omoí macarí. Mei íadi afe omoí rairuíñenafuedo fiénicana abina omoí íñoñeno íri. Dáarie afe rairuíñenafuedo abí ínuamona fiénidífué finócadíaiói. Afe izóí omoí íñeno íri. Mei íadi Juzíñamui izire rairuíca táijitagano izóí omoí macarí. Dáií omoí íadi íere ñuera.

¹⁷ Dáamíe jámairuíñeno nana íaiói íllaze ñue caímare jacíruióiri. Nana ámatíaina daje izóí omoí izíruíri. Juzíñamuimo ñue izire omoí jacíruióiri. Daje izóí nahíllaímana uáitañeno ñue omoí jacíruióiri.

Cristo nauí duere zefuúllafue afe izóí cai íllena caímo cíotote

¹⁸ Táijitagamací, omoí ocuídímííaina ñue jacíruióicana íaiói anamo mai omoí itábicaíri. Omoímo dúecaífrede caímare ocuídímííai, mai íaiói anamo itábicaíri. Daje izóí jíaíe ríire táijítate ocuídímííai anamo mai omoí itábicaíri.

¹⁹ Nágamííai táino abíri duere zefuútaadí, mei íadi afe llezica Juzíñamuimo comécínamona afémaci nai caímare ía, afe Juzíñamuina íóbitade. Juzíñamui ñue facátainafue afémacimo jóoneite.

²⁰ Mei jíáfíodo fiénidífué omoí finóadí, íemona ómoína duere íaiói finolle llezica nai járidoñeno omoí ía, onógaza afefue figo jínoñeite. Mei íadi ñúefue omoí fínuamona ómoína duere íaiói zefuútaadí nai járidoñeno omoí ía, ja omoí illafue Juzíñamui eróicana figura.

²¹ Ua afe daií omoi íllena Juzíñamui mamécamacidiomoi. Mei jii omoi ícoinia Cristo iere duere finócaza. Afe ie duere zefuillafue omoi fidítate, afémie illa izói omoi íllena.

²² Afémie jaca due fiénidifue finóñede. Daje izói jaca buna jífueñede.

²³ Fiénidíuailai Jesumo íaiói nita llezica, iba olle fiénidíuailaina afémie lloñede. Izire íena zefuítatiaíoimo, Jesús riire ibana otátañede; mei íadi dama afémie Juzíñamuimo dama ie uai jóonete, mei Juzíñamui ñue jaícina jóonefirede riire jicánoraimanaza.

²⁴ Daje Cristo cruzmo illa llezica, dama ie abído cai fiénidífuiaina abíocaiga izói uite. Ua afémie cai fiénidífuiaí uiga, aféfuiaí dibénemo tídinuiaí izói cai íllena. (Daií aféfuiaina fínoñeiticaí.) Mei afe méifodo, nífuenino Moo Juzíñamui io dibénemo ñue jaícina íredicaí. Afémie aillo bofécamienna jaide ñue jíllotagamacina omoi jáillena.

²⁵ Nauí úiñoñega júdaizite ovejai izói ebena macádiomoi; mei íadi birui Crísumo ja meine abído dúcidiomoi. Ovejai úiñoraíma izói afémie ómoína úiñoñefrede. Afe izói afémie omoi comeci rairuítagamie.

3

Airedino iníredino diga íaiói ñue íllena llétafue

¹ Nana ríimaci anamo cai itábicailla izói, nana ómoimona iníredingotiai dani omoi inítiai anamo ñue omoi itábicaíri. Mei omoi inítiaimona níbai dárie Juzíñamui llogáuaina nai íñoñediaíoi; mei íadi omoi ñue illáfuenta íaiói ciónamona, íaiói comeci ífue níbai ñúefuena méidotaite, jíáie uáíllaina nai omoi llóñeniadi.

² Ua omoi íaiói anamo ñue íáinino itábicaíllafue áfena íaiói ciónamona, daje izói Jesumo íñoítiaíoi.

³ Jamáingotiai fiérilla izói mai omoi fiériri. Mei aillo jino abímo jíaca raa izóidedo fiériñediaíoi. Mei jira fia abi fiédua ráifide oro finoina raana jítañeno omoi íri. Afe izói jamánomo féirede ífóti níllado fiériñeno íri. Daje izói aillo ráifide iníroina jítañeno íri.

⁴ Mei íadi omoi comécina ebire fiérilla izói ñue omoi finori. Afe omoi comécina mánainafuena járidoñenafue diga omoi fiéríta afe iere ñuera. Afe bie féíñede ebíredifue Juzíñamui eróicana jamánomo aillo ráifide.

⁵ Afe daií jaiáidinomo ite Juzíñamuimo ínofirede íáfuenidingotiai comécina ñue fiéritadiaíoi. Afe llezica íaiói inítiai anamo ñue itábicaídiaíoi.

⁶ Ua daií Sara Abraham dáináfuenta jeire ote. Afe daií íamona afengo íena: “Cue ocuáímadío,” uáidofirede. Ja birui nífuego omoi jacínaiñeno, ñúefue omoi jeire oía, Sara izóidingotiaína jáítiomoi.

⁷ Afe dáanomo nana ómoimona áiredímiaí cácarei. Caímare omoi áítiaímo comécíllano, dani íaíoímo dúide ñúefuena íaíoímo nitari. Mei ringóniaí íima jofófemo jabóicana maírídeza. Daje izói Juzíñamui ómoímo dúecaíllano fecaca zíiñoña íllífue, dájeze ringóniaímo fecaca. Afemona cámafuedo íaíoímo úrirediomoi. Afe izói omoi íri, omoi Juzíñamuimo úrilla uai jíziñeílleza.

Ñue omoi illa ícoinia duere zefuítagaomoi

⁸ Nana bífuiaimona daa ráifidíuaido nana ómoímo úriticue. Mai dáafuemo comeci fácano, conímána caímare omoi canori. Daje izói conímána omoi

duéruiri. Ua nahí ámatiai izóí conímana omoi izíruiri. Come dúceallano comécina mánaidimacina omoi iri.

⁹ Daje izóí fiénidifue comuía afe ibana oñeno iri. Afe izóí báíñuafue comuía, ibana báíñoñeno iri. Mei jiáífo dájecana ñúefue iba íaioimo oíri; Juzíñamui omoína ie ñúefue llínollena mamédeza.

¹⁰ Mei jii; Juzíñamui Cuegáuai bie izóí daide:

Biruillaido ñue illáfuea izíruitimie, caimare are íacadimie diga, fieni úrillafuemona mai ie fue ráiruíteza.

Afe izóí dámie caimare illado are íacade ie fue rairuíredeza.

Iemo daje izóí táinofuiaina mai afémie llóñeíteza.

¹¹ Fiénidifuiái afémie fáicanocaillano mai ñúefuemo comécíteza;

Iemo conímana comeci caimare uái illafue jenórede.

Afe mei afémie nágarui áfeodo jáiredeza.

¹² Mei cai Ocuíraíma comécina jáicina jóidimacina rairuillano ñue úíñoteza.

Daje izóí afémiemo íaioi úriadi, íaioimo cacáreide.

Mei íadi fiénidifue finódinomona ie uíeco oni jíicaide.

¹³ Jiáimamo ñue finóllino jaca izire omoi jenóadi, jraamo omoi jíritaitimiena íñeitel!

¹⁴ Mei íadi omoi jáicina ñue illáfuedo omoi duere zefui daí, caimare íitiomoi.

Buna jacíruiñeno iri; daje izóí áfedo comeci llícitaiñeno omoi iri.

¹⁵ Mei íadi Cristo omoi comécido nahí Ocuídillaímana mai omoi mameri.

Mai uicomo ñue omoi finóbiri, omoimo ite úíñogafue jicánotimaci uai omoi ólleza. Mei íadi jacíruiocana comeci mánaínafuedo afe fairíoína uai omoi oíri.

¹⁶ Omoi illafue ñue jáicina mameri, omoi comeci úrillafue nífuenino uái illena. Ja Crístomo omoi ínuamona, omoi illafue ñuera. Afe omoi ñue illáfuedo fieni úritino ite. Ie jira ua omoi abí illafue ñue jáicina jóonefireiri, omoimo fieni úritino dani íaioi fieni úrilla uáilláiri meáidailena.

¹⁷ Juzíñamui jítaíadi ñúefue ícoínia duere omoi zefuádi afefue ñuera. Juzíñamuina íóbitade. Mei íadi omoi fieni finócafue ícoínia duere omoi zefuádi afefue figo jinoñede. Afefue Juzíñamuina íóbitañede.

¹⁸ Mei dama Cristo cai fiénidifue ícoínia, dama abido tíñellinomo, dácaíño duere zefuállano tíide. Afémie iere fígomie, mei íadi cai fiénina ícoínia cáiconi duere zefuázaibite, Juzíñamui illánomo cai jáillena. Ie abí íeizi dibénedo titácamié, mei íadi Juzíñamui Joréñodo meine abido cáadimie.

¹⁹ Ie mei Cristo ie joréñodo, nai meine caífo náidañena llezica, jiáinomo íbaicoga tíidino joréñuai afémie llétajide.

²⁰ Bimaci jaiái ninomo Noé illáruido llogáuaina jíeruñedino. Aféruillaido áillue nocáe Noé fínua llezica, fiénidino duere finólliruimo Juzíñamui comeci raíre járidoñeno, fáicana áfemo úíñoide. Afe áillue nocaedo nana dane ocho dígamie jíllodiaíoi. Ua Juzíñamui izire comíni duere fínuaamona, afe aillo jainoi cígimona jíllodiaíoi.

²¹ Afe jáinoimo cai uibíllano, íaioi jílluafue caina onótate. Ie jira afe jainoi báutiza jainoi izoide; mei báutiza jáinoido fiénidifue mona cai jílluana onótagacaíza. Bautismo ráifinafue fia abí íaí fue duáfueñede. Mei íadi ñue íainide comeci úrillafue Juzíñamuimo cai jícafue dibénemo bautismo ráifinafue comuide. Afe íainide comeci úrillafue afémiemo jícadicaí, mei Jesucristo tíide meine cáanafuedo jíllotagacaíza.

22 Afémie meine cáaillano monamo jaide. Jaillano Juzíñamui nabézimo ite. Nana Juzíñamui abi imaci, jae Jesús anamo itíaiói, naa jíáie ríimaciri. Ua nana máirimaci baimo afémie ríinorede.

4

Juzíñamui caimo fecaca erócana, come máirie illa dieze, íemo táijredicai

1 Mei jira, Cristo dama ie abido duere zefuilla izói, dani omoi abina Crístodo duere zefuillena daí finóbirediomoí. Afena rairuíñeno omoi iri. Mei Cristo ícoínia abina izi cácatagamie abido fiénidifuiaina finóacañede.

2 Iemona nana ie cáanaruillaído Juzíñamui comeci jítainafue izói iite. Afémie bie éniemo jaináidino comeci jítaíoinafuiaina fuitállena jénoñeite.

3 Afe Juzíñamuina onóñedino gáinafuiái izói jamánomo jaiai ninomo are omoi illa ja daí itíomoíza; meine daje izói iñeno omoi iri. Naui aféruillaído fiénidifue diné jaináidiomoí. Omoi comeci fiéni jítainafuiaimo íoidiomoí. Daje izói jamánomo fiénidíji omoi jíruamona jífaíirediomoí. Omoi dánamo aillo guílláruillaído fiénidifuiáiri faíllíñafirediomoí. Daje izói jánaramo gairíirediomoí, afe jánarai íóbitallena. Daí gairíllano aillo bie izoide íaifuiái finófirediomoí.

4 Ja birui bie Juzíñamuina onóñedino, ja aillo jamánomo íaifue dibénemo itíaiói. Iemona íaiói omoi fiéni nabáíñenari, fáigacaidiaíói. Iemona ómoímo fiéni úritiaíói.

5 Mei íadi afe fiénidimaci íaiói comeci ifue jino Juzíñamuimo llórediaíói naa íaiói finócafuiáiri. Ua cáadino tíidino diga afémie íanori íllamona iere riire jícanoite.

6 Mei jíi, Juzíñamui daina jíllona uai tíidimacimo uícodo llotátaga, afe tíidino joreño dibénedo Juzíñamui illa izói íaiói íllena. Jíái íemo baimaci, nana bínie comíni tíilla izói túitaiói íadi, ja Juzíñamui illa izói cáaitimacina írediaíói.

7 Ja naga ráfuiái fuizáíllinomo ánozide. Mei jira ñúefuemo comécíidimacina omoi iri. Afe izói Juzíñamuimo ñue úrillafuemo jífanodoíñeno izire omoi facáoiri.

8 Omoi finoca naga jíáie raa baimo, conímána iere omoi izíruiiri; mei izíruiillafue aillo íaifuiaina enáitaga izói niné féitateza.

9 Conímaíaina ómoímo mácaíbitinona diga, omoi jofomo comécido ruífruíñeño caimare llánofireiri.

10 Illa dígamaci Juzíñamui ómoímo iga táijina ríino daina izói jíáimana canóredimoí. Afe izói omoi íllamona Juzíñamui ómoímo fecaca jíáfodo onógafuiaina ñue dájerize fecáramacina íitiomoí.

11 Dámie uaíllai jino llóiacania, comíni llófuellena, Juzíñamui daina uaíllai jino llórede. Dámie jíáimana canóadi, Juzíñamui fecaca ríinodo canórede. Nana omoi táijinafuedo ñúefue Juzíñamuimo nitáredimoí. Jesucristo caí diga íllamona daí Juzíñamuina íóbitaredicai. Mei afe Crístomo nana ebirede ñúefue, daje izói ríino diga jaca afémiemo zííñona dúideza. Aquíe izói jóideza.

Jesucristomo cai jainaina ícoínia duere fnócanodicai mei íadi medíruiñedicai

12 Izíruiiga ámatiai, ómoímo cómuite izire facátainafueri fáigacaiñeno iri. Aféfuíaina jánaídifue daíñeno iri.

13 Mei jíáfodo aféfuemo omoi caimátaíoiri; ja Cristo duere zefuíllafuiái dibénomo dúirediomoíza. Afe izói omoi íadi, Jesucristo ebire bíllana omoi cíollemona jamánomo íóbicaítiomoí.

14 Cristo ícoinia omoi íaioi báifnoia, cáimafue dibénemo íitiomoi; mei Juzíñamui ebírede Joreño úicaigaomoiza. Omoi báifnotino Crístori fieni úritiaioi, mei íadi omoi dibénomona ñúefuedo íemo úritiomoi.

15 Omoimona dámie duere zefuádi, come fáfiredimie, mei ñibai merírifredimie dibéfuemo duere zefuñeno iri. Daje izói íáibadimie, jíáie come ífuemo gágutajidimie dibénemo duere zefuñeno iri.

16 Mei jíáfodo, Crístomo ínotinona omoi mameina ícoinia, duere omoi zefuádi, áfena meáiruiñeno iri. Ua meáiruiñeno aféfuerei Juzíñamuina omoi íóbioitari.

17 Mei ja Juzíñamui cai lletálliruimo dúcizaide. Ua dani Juzíñamuimo jaináidinomo jaícina llétafue fueñe táiniaide. Mei afe jaícina llétafue daí caimo tainéiadi, ¿nie izói Juzíñamui llogáuaina jeire oñédino, írairuimo dúcille llezica, íitiaioi? Afémaci lletállifue jamánomo riire zúite.

18 Figomaci dibénemo jíllloillifue juare ia, Juzíñamui ñue jacíruiñedino jíllloillino iere féirede. ¿Nie izói ñibáilliaioi? ¡Ñibaiñeitiaioi!

19 Ie jira Juzíñamui comeci jítailla izói duere zefuáidino, naga ñúefuiaina finóicairediaioi. Afe llezica íaioi coméciai Juzíñamuina rairuítarediaioi. Mei Juzíñamui méidoñeno ínofiredimieza, íaioi comuítatimieza.

5

Crístomo ínotino llóina uai

1 Omoi gairífréna cigimo ite ocuide eicomínimo cue llóina uai llóiticue; cue ja afémaci izói eicómedicueza. Daje izói Cristo duere zefuilla uai nabáidimiedicue. Íco ñírui Cristo bille llezica ie ebíredifue cíocailliruimo, afe ie ebi omoi cácaille izói, afe izói ie ebi cácaiticue.

2 Nana omoi uai anamo itínuaí ñue íaioina omoi úiñori, oveja úiñoraíma ie ovejaíai úiñua ízoi. Ráairuiñeno, Juzíñamui jítailla izói, omoi comeci figónamona íaioina omoi úiñori. Jáíma izire ocuilla izói íaioina omoi úiñofeno iri. Dama úcube óllena úiñua izói íaioina omoi úiñofeno iri. Dama omoi comeci óiacana izói caímare omoi táijiri.

3 Omoi uai anamo itínona riirerie comécina éoide comini úiñotimie úiñua izói omoi úiñofeno iri. Mei jíáfodo omoi illafue ñue jaícina omoi mameri, omoi illa izói íaioi ílleza. Mei daí ñue illafue fueñe íaioimo jino llotímiediomoiza.

4 Afe jira Nahí Uíñoraíma Cristo cíocailliruimo ebírede ñúefue ómoimo nítaite. Afefue jaca ñinomo féiñeite. (Comini dibénemona cómemo fecaca raa, jamánomoidimie daíllena, ía rábiai finoina ífo icuifoí. Afécuifoí etuda ñiné táinocaite, mei íadi omoi maíñóredifue jaca ñiné táinocaiñeite.)

5 Afe daje izói, jítócomini, maí omoi ocuide éinamaci ñuera ríiuai anamo itábicaíri. Ua nana omoi conímana comeci mánainafuedo daje anamo dájena itábicairediomoi. Mei jaíai Juzíñamui Cuegáuai daide:

Juzíñamui, nana fieni abí ínotinona uáitaoidé; ua íaioimona ie uíeco oni jíicaide.

Mei íadi nana comécina mánaidinona afémie dúecaífirede.

6 Mei jira Juzíñamui ñue riírede uai anamo riíriñeno comécina mánaidimiena omoi iri. Afemona ie comeci daílliruimo afémie ómoína jamánomoidimiena jóoneite.

⁷ Nana omoi izire comeci lícidifuiaí Juzíñamuimo uáfodo lloíri; mei afémie ómoína iere rairuídeza.

⁸ Nue cáadimie izói abi omoi rairuíoiri; mei cai bacáuai ímie Taiife caina jenódeza. Ua jufíruite jánallari rille jénua izói afémie caina jenódeza. Ua jenode caina fiénidifueмо ifóllena.

⁹ Afémiemo omoi ñnogafuedo izire uáitaocana abí omoi mameri. Mei náragobiaimo ite omoi ámatiai dáafueri duere zefuídiaioiza onódiomoiza.

¹⁰ Mei íadi nano íanori duere omoi zefuilla mei, Juzíñamui meine abido caimare duere zefuíñena dibénomo ómoína itátaité. Afe llezica íaifueмо comécina féitanide cómena ómoína mámeite. Ua dáaruido ómoína riire nibáinino nabéfuena náiretataite. Afe daje Juzíñamui fiénidifueмона abi rairuíllafuena cai ite, naa jáie canóinafuaiari. Dáamie íemo ite ziiño ebírenafueмо ebi cai cácaillena, afémie áfemo caina mamede; mei Jesucrístomo cai jaináillamona, áfemo ebi cácaiticaí.

¹¹ Uafue, afe Crístomo nana ebirede ñúefue, ríino diga jaca ziiñona dúide. Aquíe izói íteza.

Iraífuena facádua uai

¹² Bie íanori cue cuegabe Silvánodo ómoimo orédicue. Afémie ñue ñinofirede ámaza comécido onódicue. Afe bibedo ñúefueмо omoi íllena omoi llófueticue. Ja aillo Juzíñamui ézicigafuina jeire otiomoi. Iemona afémie ómoína iere izíruiteza ua onódiomoi. Aféfuedo riire nibáinino ómoína mamédicue, uáfodo omoi onóillena. Bifue nágarui jáicina jeire omoi oíri.

¹³ Babilonia jófueмо ite Juzíñamuimo gairídino, Juzíñamui omoi izói eneno nizécano, ómoimo uailai orédiaioi. Daje izói cuedo jáicadimie Marcos ómoína uáidote.

¹⁴ Nahí ámana izíruilla izói caimare conímana omoi uáidori. Nana omoi Jesucrístomo jaináidinodiomoiza, maí caimare uái omoi iri. Maí; jae ñie.

SAN PEDRO MÉIFODO CUEGABE Segunda Carta del Apóstol San Pedro

Jesumo ñnotinomo Pedro cuete

¹ Cue Simón Pédrodicue. Jesucristo ocuífirgamiedicue. Daje izói ie oréfirgamiedicue. Fere ráifide ñnuafue jeire otínomo bibe cueticue. Omoi ñnogafue daa cai ñnogafue izói ráifide. Aféfuena ja fairiotiomoí, mei cai Jíllotatimie Jesucristo Juzíñamui diga comécina ñue jaícina jóidimieza.

² Cai Ocuíraima Jesús, Juzíñamui diga, omoi onónamona diga éziciafuiai, daje izói comeci caimare uái illáfuiai dibénomo omoi iri.

Crístomo jaináidinomo ite nie izóidifuiai

³ Nana cai comeci jitaica raa, Juzíñamui iodo caimare cai jáillena Juzíñamuimo ite ríinodo caimo fecaca. Afémie cai ie fidítamona bífuiaina caimo ite. Ua dama íemo ite ñúefuiaido afémie caina íemo ñnotade. Daje izói ie fáigacailla ebire finócafuaído íemo caina ñnotade.

⁴ Iemona ie jífueñeno fecalle uai caimo llote. Bie caimo llogáuai iere aillo ráifide uai. Afe uáillaido Juzíñamui illa izói íitiomoiza. Nana comini íaifue dibénemo fieni comeci jítainafuaído uigámaci; mei íadi Juzíñamui ómoimo llogáuaido afe íaifuemona jae jíllodiomoí. Iemona Juzíñamui ñue illafue dibénemo íitiomoí.

⁵ Mei ie jira omoi ñnogafuemo, nágarui Cristo ñue illáfuedo omoi íocire jáillafuena aillo nabáicana uiri; afe omoi ñue jáillafuemo caimare fibíllafue daje izói nabáicana omoi uiri;

⁶ afe caimare fibíllafuemo, dama abina rairuíllifue omoi nabáicana uiri; afe dama abina rairuíllafuemo comeci járidoñenafue omoi nabáicana uiri; afe comeci járidoñenafuemo Juzíñamuimo caimare comécillifue dájemo nabáicana uiri;

⁷ afe Juzíñamuimo caimare comécillafuemo ámatiaina duéruillafue dájemo nabáicana uiri; afe ámatiaina duéruillafuemo nahí izíruillafue mai izire dájemo nabáicana uiri.

⁸ Nana bie izói daináfuaí jeire omoi óiadi, afe llezica aféfuiai ñue omoi móonaitaiadi, omoi illafue táinomo báíñeite. Daje izói cai Ocuíraima Jesucristona omoi onónafue táinoñeite.

⁹ Mei íadi bifuaína jeire oñédino uínidimie illa izói ite; jica cióñeno áinori ciódimie izói ite. Jaiái ie finoca fiénidifuiai dóinamo ja comécíñede.

¹⁰ Mei jira, ámatiaí, Juzíñamui uáidota eneno nizécamacidiomoiza onódiomoiza. Iemona jíéredimaci izói omoi iri, aféfuiai omoi comécimo riire amena jáinao izói íllena. Afe izói omoi íadi, jaca Cristo íómona oni nibéfodo jáíñeitiomoí.

¹¹ Bifue daina izói omoi íadi, cai ocuide Jíllotaraima Jesucristo zíñona illáimana illánomo, rairuíñeno caimare jofo uáidolliomoí.

¹² Mei íemona bífuiaímo omoi comécioitaiticue; aféfuiai onódiomoí íadi. Daje izói afe ómoimo birui ite ua uai jeire otíomoí íadi, nai jaca jaícina comécioitaiticue.

13 Bie ñue llóinafue uáfodo ómoimo cue lletalle nai cue jáicana llezica, cúemona ñue jáicina cíoide.

14 Mei jii, navi cai Ocuíraima Jesucristo benó illa llezica, raire cue tíllano bie éniemo cue íñeillena cuena daide. Afémie cuemo llua izói ja raire ífcaite.

15 Ie jira birui nana cue ríinodo llófueritícue, cue tailla méifomo bífuiaimo jaca ñue omoi comécíllena.

Pedro Cristo jamánomo ñuera ébifuenta cionana jino lloste

16 Navi cue nabáñiaí cue diga cai Ocuíraima Jesucristomo ite ñuera ríino ífuena omoi llófuetícaí, ie meine abído billífué diga. Nana afe llófueinafuiaí dani cai comécimo comúdifueñede. Táinofuena lloñédícaí, mei íadí dani cai uído ie jamánomo ñuera ébifuenta cíodínodícaí. Iemona uafue llotícaí.

17 Ie Moo Juzíñamui íemo ñúefue nitana, jáíe ebíredífué íemo fécana dani cai uído cíodícaí. Juzíñamui ebire ie uaido daide: “Bie cue izíruiga jító. Afémieri iere íobíoidícue,” daide.

18 Aqué izói monámoma Moo dáinana dani cai jefodo cacádícaí; mei afe ñue eneno nízecca ídumo afe cai Ocuíraimaíorí jáídícaíza.

19 Bie como cai llogafue baímo, jáíe nahí ua llogafue ite. Bie nahí uafue jaíai uícodo uai jino llóraíni lloga cuegáuai. Afe cuegáuai cai llogáuaina nabaide. Bíníe nai jíitífo illa llezica bíuaina ráiruíñeno iere jeire óredíomoi. Aféuai mechera naio bóua jíitífo egáíñua izoide. Ua aféuai nai mona mónaíñenia, jíitífo egáíñua izói omoi comécina egáíñote. Afe mona monailla llezica monáíracudu izóidímie billano, omoi comécina ñue jáicina déitaita.

20 Mei fueñe bífuemo omoi comécíri: Cuegáuailaímo ite uícodo jino lloga daínáfuiaí dama afe uai lloráimamona llóñega.

21 Mei onódicai, uai llóraíni jaca dani íaíoi comeci jíitinafuiaído úríñediaíoi. Mei jáíífo afe Juzíñamui íeiena maíñócamaci afémie dibéfodo úritiaíoi; mei Ñuera Joreño ífócaiaíoi.

2

Táinofuiaína llófueíredíno (Jud 4-13)

1 Mei íadí afe dáaruillaido Israel comíni cígiri táinofuiaí jino llóraíni ite. Afe izói omoi cígiri táinofuiaído llófueritíno íite. Afémaci dani fiéni finode ífoci úrillafuena báinino omoi llófueítiaíoi, comíni Juzíñamuimo íaíoi íinogafue féitallena. Daí aféuaido íaíoi na jíllotaite Ocuíraíma na jáanoítiaíoi. Afemona íaíoi niné raire táinocallífue dani íaíoi mo zúite.

2 Íaíoi mo ite fiénidífué dibéne do aillo comíni jáítiaíoi. Dani afémaci ícoínia cai ua ñue jaille íori fiéni úritiaíoi. Bie ñue ua cai jaille ío Juzíñamui ñúefue.

3 Íaíoi aillo úcube llínoíacanamona, táinofuiaído omoi íaíoi jífuíado úcubena llínoítiaíoi. Mei íadí íaíoi niné táinocaitaitímie, íaíoi finócafuaína cíoillano daí íaíoi táinocallífuena fáicanocáñeno maméoi. Mei jaíai ninomo íaíoi duere finóllena mamécaiaíoi.

4 Juzíñamui abí ímácimona dáarie fiénidífuemo baíídiaíoi. Afémaci íaífuena Juzíñamui doñede. Doñeno duere zefuille iraimo íaíoi na orede. Jítífo íaíoi na fiénocai. Dínomo íco ízire jícánollíruimo baí óllena cuinácaiaíoi.

5 Daje izói Noé íllágima llezica fiénide comíni íaífuena Juzíñamui doñede. Mei íadí jamánomo áillue jáínoido afe fiénidínona Juzíñamui nana fiéñeno

fuitade. Afe fiénide náiraimona dama Noéna naa siete diga ie comíniri Juziñamui jllotate. Afe Noé jaícina ñúefuedo íaioina lletade íadi jamáiena faitíaiói.

⁶ Bífue mei, daje izói Juziñamui Sodoma jofue, Gomorra jofue imaci diga niné táinocaitate. Ua nana íaioi jofue bóua mei, daa imuíciai fiébilla. Ua daií izire niné táinocaitate, ie méifodo fieni íitino, bífuena cíoilano, Juziñamui fiénidino izire duere finófirede daiíllena.

⁷ Afeno bóocuamona Lot dainámie comeci ñúenado íena jllotate. Lot afe íairede comini fieni illáfuenta ie cíonamona ie comeci jamánomo zúucaide.

⁸ Bie comécina ñúemie Lot, nágarui fiénide comini cígiri ie íllari, íaioi fieni finócafuaiaina ciode; íaioi fieni úrillafuiaiaina cacade. Aféfuiai ie ñuera comécina zuure finode.

⁹ Daií cai Ocuíraima nana íena ñue jacírunitino íaioi comeci fieni facátafuaiamona íaioi jíllloillena ñue onode. Daje izói afémie nana fiénidino ico íraicaíño iere jicánolliruiumo duere finóllena oni eneno jóoniana ñue onode.

¹⁰ Nana íaire comeci jítainafue jeire óiacadinona Juziñamui iere duere fínoite. Cai Ocuíraima ríinona jámairuitinona daje izói duere zéfuítaitiaioi. Afémaci llétana cacáacaiñedino. Illáimana jacíruiñedino. Daje izói monamo ite jóriai izoide ríinoredinona báíñuana jacíruiñediaioi.

¹¹ Juziñamui abi imaci afe fiénidino baimo ríinorediaioi. Daií íaioi illa íadi, afémaci afe jóriai izoide ríinoredinona fieni daiíñediaioi. Ua cai Ocuíraima uíecori afémacina báíñuafuedo “Duere zéfuítiomoi,” daiíñediaioi.

¹² Afe fiénidino ríllenai izói abina onóñediaioi. Afe ríllenai da ebena illáfue mo itíaiói. Ñúefue dine coméciñediaioi. Fia llaitada fállena jocócaiaioi. Bie izói ítmíai onóñegafuedo fieni úritiaioi. Mei íadi afémaci jiba rille izói títiaioi.

¹³ Jáie comini duere íaioi zefuítado duere finóbitaioi. Ianori caimátailifuedo jáie iere íóbitadinodicaí, daiíñediaioi. Afémaci meáidaitadimaci. Comeci fieni finode raa izói omoi cígiri itiaioi. Daje llezica omoi finoca ráfuaiado nabáiriacadiaioi ómoína íaire finóllena. Táinona jífujete caimátaila raado jífanotiaioi.

¹⁴ Afémaci nana ciona ringomo fia érocáñeno llaitada jiruífue finócadiaioi. Afémaci fiénidifue fínuana iere gáidiaioi. Afena fáicanocaiacañediaioi. Comécina nánidinona bífueta íaífue mo uítiaioi. Naga raana izire máíñuana iere fibidiaioi. Afe izoide comini íaire faidócano.

¹⁵ Afémaci Moo Juziñamui ñuera íómona oni fiénidíodo jáidiaioi. Jaiai uai llóraima Balaam ífuedo jáidiaioi. Afe Balaam Beor jító. Afe Balaam fiénidífuiai ie fínuado aillo úcubena llínoiacade.

¹⁶ Mei jíáfodo afemona uáinide burra Balaam fiénidífuiai diné íena lletade. Afe burra come izói úrillano, Balaana uáiritaidímie úrilla izói rairuillano íena úritañede.

¹⁷ Nana bie táinofuena llófuéridino jainoi íñeno jainoi orano zafénailla izóidiaioi. Jairífo do oni niné ñaitaca mona úillie izóidiaioi. Jamánomo jítrede jítinomo zíñona íllena ríire faidócaiaioi.

¹⁸ Mei aillo abi íñua uáillaido naa taino uailai diga, ñúemacina jífuecana uítiaioi. Íaioi íaífuaíado, comini abi jítainafuiai diga jíámacina bífuetiaioi.

Ua íaifue dibénemo itínomona uáfueña jíllo dinona meine íaifue mo nane bífuiaidíai.

¹⁹ Uicodo raire llotíai: “Uafue ráiruifuega comini izói ítiomoi,” daífiredíai. Mei íadi afe daina llezica, dani afémaci íaifue dibénemo izire jaináitaganona itíai. Iemona afémaci fiénidífué fínuana fáicanocainidíai. Illa dígamie íena anáfenode raa íena náamatade. Iemo afemo izire jaináitagamiena jaide.

²⁰ Mei cai jíllo tate Ocuíraíma Jesucrístona onódímaci, éniemo ite íaifuiamona oni jíllo díai. Bimácimona dáarie íaii jíllo meí nauí íaii anáfenogafue mo abido íaii baíadi, nano íaii illa baimo, jamánomo fígoñeite.

²¹ Juzíñamui ñuera iona íaii onóñenia afefue afémacimona figóñede. Mei íadi ja Juzíñamui iona onona meí, íaiimo iga ñuera lletárafuiaina féitaadi, afefue jamánomo fiénide.

²² Jaíai daina ua uai como afémacimo zúilla. Aféuai daide: “Jico ie cicúecana abido güízajide. Daje izói mero abina ñue jococa nane dama ie íaíbimo nane jabíjabízaide,” daide.

3

Cai Ocuíraíma billífué

¹ Cue izíruiga ámatiai, omoi cácarei. Bie méifoidíbe ómoimo cueticue. Ménacaíño ómoimo cue orécabedo ómoína abí jífuéñeno bífue mo comécíitaacadícué. Ñue llófueinafuedo ómoína comécíitadícué.

² Afe jira jaíai ñuera uai lloraini caímo llogáfue mo omoi uibíoiri. Daje izói Cristo orécamaci ómoimo lloga jíllo tate Ocuíraíma lletara uaimo féitañeno afemo omoi comécíiri.

³ Nano fueñe bífue mo omoi uibíoiri: íco íraíruillaído Juzíñamui lloga ñúefuiaina zanófredino bítiáiiza. Afémaci dani íaii comeci fiéni óiacanafuiái do itíai.

⁴ Afémaci ómoimo zanoda jicánoítai: “¿Ninomo ite ómoimo lloga meine bite Cristo? ¿Némei afe? Cai jáiaigima tilla méifomo naga raa daje izói ite. Ua énie comuillaruímona naga rafue daje izói jáioicaide.”

⁵ Daí lloítai, meí jaíai ninomo mona Juzíñamui ie uaido fínuafue mo comécíitacañediaíza. Afe izói Juzíñamui uaido ocuíllo mona, zocade raa zocai ízoi, bínie jáinoimona comuide. Iemo jainoi cígido bínie Juzíñamui ie uaido riire itábicaítate. Aféfuena náfuéñeno bie zanófredino onóacañediaí.

⁶ Afe meí daje izói énie anábaitade áillue noci aféruillaído bie éniemo ite cáadinuíaina niné táinocaitabite.

⁷ Mei íadi biruí ite mona énie díga daje Juzíñamui daina uaido táinocaitalle írai íena oni jóoneoiga. Afe írai fiénidínuiái niné táinocailríruimo íco íraícaíño íere jicánollríruimo afe bíniéna naa mona díga cuarítaite.

⁸ Izíruiga ámatiai, bie emódomo ífuena omoi féitañeno íri. Cai Ocuíraímamona daa mona mil fimona izóideza. Daje izói afémiemona mil fimona daa mona izóideza.

⁹ Cai Ocuíraíma ie daináfuiái fuitállríruimo dúcia bai jáíruimo dúñoñeite. Dámierie afémiéna jáíruimo dúñoite daífiredíai. Mei íadi afémié cairi járitañede. Afémié buna oni fáíacañede, meí jáífodo caímo ite fiénidífuái ñúefuena méidollena afémié íere jitaide. Afémié aféruina bai jáíruimo dúñoñeite. Féitañeno ie mamécaruímo zúite.

10 Cai Ocuíraima billirui meríriraíma naio billa izói, nai due ócúiriñeitiaioímo déizaibiteza. Afe billírui mo naa íemo íte ráaniaíri jacire niné táinoficaite; áfena iere ficire cácaite. Nana afe mona finua ráaniaí naa úcuairi iraimo niné táinocaite. Afe llezica bínie naa íemo íte ítinuiaíri cúarite.

11 Ja nana daí táinocallifuenta omoí fidínamona, nana íaífuemona abí omoí rairuúllifue iere jitáirede; benómona afémiena caimare íóbitaredícaí. Ua Juzíñamui íeiena omoí illífue iere jitáirede.

12 Mai Juzíñamui íe nahí illáimana cíocaizaíbilliruimo omoí úíñori. Uíñua llezica, omoí onóíagafuedo aféruina raire mai omoí járidori. Aféruillaído mona ero iraido niné táinocaite. Nana énie finua ráaniaí iraimo niné íbina jáitiaioí.

13 Mei íadi Juzíñamui uícodo caimo lloga comue monamo comue éniemo ocúridícaí. Afe comue éniemo mona díga, nana raa ñue jaícina jóite. Naga raa náífuente.

14 Izíruiaga ámatiai, mei benómona nai bífuemo omoí úíñoina llezica, nana ómoímo íte ríinodo omoí illafue jaícina jóoneri. Daí omoí comeci caimare uái illafue dibénemo illamona Juzíñamui ómoímo eróicaizaíbilleza. Afe izói omoí comeci íaícaíñeno nífueno Juzíñamui ómoímo cíoizaíbilleza.

15 Nane jáífuemo omoí comécioíri. Afefue daíde: Cai Ocuíraima comínimo járitaiñenafue, ua cai jíllóillifue. Daa bíuai cai izíruiaga ama Pablo ómoímo cuete. Juzíñamui íemo lloga comeci jaícina fibíllafuedo cúefirede.

16 Nana afémie orécabaiamo daa bífuiái llote. Mei íadi dáarie íe uaillaí ñue onóillena iere féirede. Abina onóñedino afe féirediuaína jáífodo mamédiaioí. Afe izói jabo ínotino aféuaina jáífodo dobáíñotiaioí. Daje izói jáíie Juzíñamui Cuegáuai lloga uáillaina oni jáífodo áífedotiaioí. Afemona afémaci daní abí niné táinocaitaitiaioí.

17 Izíruiaga ámatiai, nana bífuiaina ja uícodo onódiomoíza, mai fiénidinomona abí omoí rairuiri, afémaci jífuerrillafuedo meine abido íaífuemo omoí báiza; omoí jeire oga ñúefuena niné féiza.

18 Mei jáífodo, cai jíllotate Ocuíraima Jesucrístona, mai jamánomo ñue abina omoí onoiri. Caina íe duéruillafuemo, omoí comeci ífue aillo oni móonaitaocairi. Iere ebire ñúefue dama Jesucrístomo mai birui omoí nitari. Daje izói zíñona ebíredífue afémiemo mai omoí nitáíreiri. Mai. Jae ñie.

NANOIDE SAN JUAN CUEGABE

Primera Carta del Apóstol San Juan

Cáatate úrilla uai

¹ Nana raa nano taineina llezica itímiedo ómoimo cueticai. Afémie Jesucristo. Afémiemona cai cacánana lloticai. Dani cai uído cai ciónana lloticai. Afémiemo eróidicai. Afémiena dani cai ónoído jetádicai. Afémie Juziñamuimona uailai lluaíbitimie. Afémie uai caina cáatate.

² Afe cáatata itímie cai onóillena caimo cíocaide. Afémiena cíoillanona íemo uai faiticai. Afémie fecalle ziiñona cáananona ómoimo jino lloticai. Nanómona afémie Moo Juziñamui diga ite, ie mei caimo cíocaide.

³ Jira cai cacánafue cai ciónafue diga uáfueña jino lloticai, daaco comínina omoi cai diga íllena. Ua afe izói uáfueña Moo Juziñamuimo dájena jaináidicai. Daje izói ie Jitó Jesucristo jaináidicai.

⁴ Jira aféfuiaia ómoimo cueticai aféuaido jamánomo caimare ñue omoi íllena.

Juziñamui nairai comecei egáioidimie

⁵ Bie úrillauai Jesucristo caimo llogáuai. Afena jino ómoimo lloticai: Juziñamui comécina egáioidimie. Afémiemo jaca jítinona íñede.

⁶ Dájena afémiemo jaináidicai cai daiíadi, íadi afe llezica jítifodo cai macáadi, taino lloticai. Daje izói táinona finódicai.

⁷ Mei íadi Juziñamui úzefomo illa izói, daje izói úzefomo cai macáadi, ua dájena conímamo jaináidicai. Iemo ie Jitó Jesucristo ie cruzmo tiillamona, ie die tótajamona nana cai fiénidifuiái dote.

⁸ Cai fiénidifue íñede cai daiíadi, cai abi jífueticai. Táinofuefiredimacídicaí.

⁹ Mei íadi Juziñamui ñue jaícina finóllifueño afemo ínnoredicai cai fiénidifuiái jino cai llóadi, uáfueña afe fiénidifuiaina afémie dóite. Nana íemo fiéni cai finócafue ibana caimo óñeite.

¹⁰ Cai fiénidifuiái finóñedicai cai daiíadi, Juziñamui táinofueredena cíotataiticaí. Ie úrilla uaina uáfueña jeire onéidicai.

2

Cristo cáiconi ñue úriraima

¹ Cue jítótiai, bifuiái ómoimo cueticue, íáiredifuiaimo omoi báiiñellena. Mei íadi dámie íáiredifuiái finóadi, Moo uécomo cáiconi ñue úritimie ite. Afémie Jesucristo. Ñue jaícina itímie.

² Jesucristo cai fiénidifuiái ícoinia fagámie. Dama cai ícoiniañedeza, mei íadi nana énie comini fiénidifuiái ícoinia.

³ Juziñamui ocuífuiái iere cai cacáreadi íena onódicaiza fidiiticaí.

⁴ Mei íadi dámie “Iena onódicue” daiíadi ie ocuífuiái iere cácareñeniadi, afémie taino lloraima, ua táinofuefiredimie.

⁵ Mei ie ibana Juziñamui ocuífueña finódimie, jae Juziñamuina nabéfueña izíruite. Daií áfedo íemo cai jainánana fidídicaí.

⁶ “Juziñamuimo jaináidicue” dámie daiíadi Cristo maca izói ie macállino jítáirede.

Comue ocuícafue

⁷ Cue izíruigamací, comue ocuícafue ómoimo cueñédicue. Afefue nanómona ómoimo itífue. Afe jaiái rafue daje omoi cacana úrillafue.

⁸ Mei íadí ómoimo cue ciegafue comue ocuícafue izóí ómoimo íficaizáibite. Bie ocuícafue Crístono nahí ua ráfueña ite. Afe izóí bie ocuícafue ómoimo nahí ua ráfueña íte. Afefue ua nahífue, jítino oni jáioicaideza. Jae ua comécina egáíhollena ñue egáioinaza.

⁹ Dámie “úzefomo iticue” daiíadí, íadí jáíamana nai éoia, afemie nai jítifomo ite.

¹⁰ Ie ámana izíruitimie úzefomo ite. Afémiemo minícana fiénidifuiáimo baiítaitena ññede.

¹¹ Mei íadí ie ámana éoicaidimie nai jítifomo ite; ua jítifodo macade. Niné jáideza onóñede, jítino uina cíoitañena jira.

¹² Jitótiai, ¡omoi cacai! Juzíñamui Jesucristo titáinanomo omoi fiénidifuiái ibana ote. Ie jira bifue ómoimo cueticue.

¹³ Móotiai, ómoimo cueticue, nano tainéinanomo itímiena jae omoi onona jira. Jitócomini, ómoimo cueticue, Taífena omoi anáfenua jira.

Jitótiai, ómoimo cueticue, ja Moona omoi onóicailla jira.

¹⁴ Móotiai, ómoimo cueticue, nano tainéinanomo itímie omoi onóicailla jira. Jitócomini, daje izóí ómoimo cueticue omoi riñredimacina jira; omoi comécimo Juzíñamui úrilla uai jeire omoi ua jira; Taífena omoi anáfenua jira.

¹⁵ Biniemo ite Juzíñamuina bacáuairédino finócafuiaina izíruiñeno omoi iri. Daje izóí íaioimo itífuiaina cacáreiñeno omoi iri. Dámie afémaci finócafuiaina izíruiadi, afe llezica Moo Juzíñamuina íziruiñeite.

¹⁶ Nana íaioimona lloga ráfuiái minícana Juzíñamuimona biñede. Fia dani íaioi cigimona comuide. Comécina íáiredemona fieni óiacanafue bite. Cai ui íóibicailla jítaillamona jáie fieni óiacanafue bite. Caimo ite ráaniaimona fieni abi ínuafue bite. Nana afe billáfuiái biniemo ite Juzíñamuina bacáuairédino llóolloga.

¹⁷ Afena bacáuairédino fúioicaide, naa íaioimo ite fieni óiacanafuiái diga. Mei íadí Juzíñamui jítinafue finódimie jaca ninomo ziiñona ite.

Uafue táinofue diga dájemo jaináñede

¹⁸ Jitótiai, jae írairuimo dúcideza. Cristo uáitaoidimie bíllana cacádiomoi. Ja birui aillo Cristo uáitaoidino cíocaide. Ie jira birui írairuina onóicaí.

¹⁹ Afémaci cáimona jino jáidiaioi. Mei íadí uáfueña cáieñediaioi. Uáfueña cáiena íaioi íadí, cairi fiébite. Ua afémaci cáimona jino jáidiaioi nana cáieñeitiaioiza uáfodo daií áfedo onóillena.

²⁰ Mei íadí Cristo Ñuera Joréñona igáomoi; íemona afémiedo onótagaomoi.

²¹ Omoimo cueticue mei, uáfueña omoi onona jira. Uáfueña omoi onóñenamona cueñédicue. Uáfueña jáie daa táinofueña comúnide. Jae onódiemoiza.

²² ¿Bu táinofueredimie? Jesuna Crístonede daiídimie, afemie dama táinofueredimiena. Niimie Crístona uáitaoidimie. Afemie Moo Juzíñamuina jáanote. Afe izóí ie Jitona jáanote.

²³ Jitona jáanotimie afémiemo daje izóí Moona ññede. Mei íadí Crístona jieruitimie daje izóí Moona onode.

24 Ie jira, nanómona omoi cacana úrillafue omoi comécimo ñue omoi jóoneoiri. Jira nanómona omoi cacánafue ñue omoi comécia Juziñamui Jitomo dájena ítiomoi. Afe llezica cai Moori dájena ítiomoi.

25 Jesús uáfueña úcodo llote, zííñona cáananona caimo fecállena.

26 Omoi jífueiacadinodo bifue ómoimo cueticue.

27 Mei íadi Jesucristo ómoimo fecaca Ñuera Joreño ómoimo ite. Ie jira daí buna ómoimo llófuenidiaioi.

Daje Ñuera Joreño nana ráfuiaina ómoína llófullofuede. Afémie llogafue uafue; táinofueñede. Jira daí Crísto dájena omoi iri, Ñuera Joreño ómoimo llua izói.

28 Jitótiai, mai birui Crísto dájena jaináicairi, afémie cíocairuimo ie daínana ñue cai ínollena. Daí ie bíllemo ie uíeona méairuñeíticai.

29 Ja onódiomoiza Jesucristo ñue jaícina finódimie. Afemona daje izói nana jaícina finódino Juziñamui jitótiaiza ónoitiomoi.

3

Juziñamui jitótiai

1 Mai ¡comécimo faca! Nii jamánomo Juziñamui caina izíruilla. Iemona ie jitótiaína maméidicai. Jae áfedicai. Ie jira éniemo ite Juziñamuina éoidino cai izói comécíñediaioi, mei Juziñamuina íaioi onóñena jira.

2 Izíruiga ámatiai, jae Juziñamui jitódicai. Iirairuimo cai íficailifuena nai caimo ácatañega. Mei íadi onódicaiza, Jesucristo cíocai afémie izói íticai, ie illa izói námiena cai ciona jira.

3 Nana afémiemo daí comécídimaci dani dáamací nana íaífuiaimona ñue dófícaítadiaioi, mei Jesucristo íáífuénidimie illa izói íticai.

4 Mei íadi nana fiénidífue finódimaci Juziñamui ocuífue uáitajano jámairuite. Mei jira fiénidífue ocuina ráfueña uáitaína.

5 Jae Jesucristo bie éniemo cai fiénidífue oni duáibillana onódiomoi. Daje izói afémiemo nífue íñénana onódiomoi.

6 Mei jira nana afémiemo dájena jaináioicádimaci fiéni macánidiaioi; mei íadi nana fiéni macáíredimaci afémiena jaca cíóñediaioi; íena onóñediaioi.

7 Cue jitótiai cacai. Buna ómoína jífueñellena nane dáitícue; ñúefue finóíredimie ñúemie, Jesucristo ñúemiena illa izói.

8 Mei íadi fiéni macáíredimie Taífemo jaináidimie, mei nanómona Taífe fiénidífuiaíredimiena ite. Uafue Juziñamui Jitó Taífe finócafuiái táinocaitabite.

9 Juziñamui jitótiaimona jaca buna figóíñeno macáocaiñede, Juziñamui íemo iga cáanano íemo illa jira. Afémie fiénidífuena finófnide, Juziñamui jitoza.

10 Afedo bu mei Juziñamui úruiaínaza, bu mei Taífe úruiaínaza onódiomoiza. Uafue nímmierie ñúefueña finóñenia, ie ama íziruiñenia, afémie Juziñamui díbenemo ítímiñede.

Conímana cai izíruillafue jitárede

11 Mei jii nanómona omoi cacana úrilla uai, be nie uai: conímana cai izíruillafue jitárede.

12 Caín izói omoi íñeno iri. Afémie Taífe díbene ímie, íemona ie ama títrade. ¿Níbaí mei íena títrade? Caín úradoillano ie ama títrade, Caín finócafuiái figóñena jira; mei íadi ie ama finócafuiái ñuera.

13 Cue ámatiai, Juziñamuina bacáuairédino ómoína éoinamona fáigacaiñeno iri.

14 Jae tüzaille íomona zíñona cáalliomo dóbaicaidicai. Afena onódicai, Jesuna ñnotinona cai izíruilla jira. Mei íadi izíruiñedimie tüzaiillodo jaide.

15 Nágamie ie abi cómena éoidimie cómena titádímie izóí ite. Iemo come titádímie comécimo zíñona cáanano iñénana onódiomoí.

16 Jesucristo ie cáanano cáiconi iga; áfedo nana izíruillafuíaína onódicai. Afe izóí cai cáananona lloñeno Jesuna ñnotinori daí abína zóoferedicai.

17 Dámie ie illínomo jítáirede raa ítemo, ie aino come jitaica raa iñénana cióillano, mei íadi íemona jeruide, ¿ñie izóí Juzíñamuimo izíruillafue ie comécimo íteza? ¡ñede!

18 Cue jítótiai, ¡fia fuena daína uaido mai cai izíruiñeno iri! ¡Mei íadi ñue finóllifuiáido uafue izíruillafuedo mai conímána cai izírui!

Juzíñamui uíécomo ñue íena ñnofirenafue

19 Jira daí uáfue mo jaináidimacídicaí onódicaíza; nane aféfuemona Juzíñamui uíécomo ñue íena ñnofiredinodicaí.

20 Cai comeci cai ícoínia lloíadi, Juzíñamui cai comeci baimo aillo ñúemienaza onódicai. Afémie nágaíuíaí onode. Iemona afe ícoínia caimo íbana óite.

21 Mei jira, izíruiiga ámatiai, cai comeci cai ícoínia lloñeniadi Juzíñamui uíécomo ñue íena ñnofiredinodicaí.

22 Nana íemo cai jicaca raana fécaite, ie ocuícáfuiáína jeire cai úamona; ua íena cai íóbitamona áfeniáína caimo fécaite.

23 Afémie ocuícáfue daíde: “Ie Jitó Jesucristomo cai ñnori. Afe emódomo cai conímána cai izíruií afémie cai ocuilla izóí,” daí daíñocaide.

24 Ie ocuícáfuiáína iere cacáreidimaci afémieoírí itíai. Daje izóí afémie nágarui íaióiri ite. Afémie jaca caimo íllana onódicai. Ua áfena afémie caimo iga Ñuera Joréñodo onódicai.

4

Ñuera Joreño Crístona uáitafírede joríaína anáfenoacade

1 Bie énie tánofuíaí llotínona oruízaideza. Afémaci “Juzíñamuido úriticai,” daídíaioí. Izíruiiga ámatiai, jomoi cácareí! Naga “Juzíñamui dibéfodo úriticai” daídímiena ñnoñeno iri. Mei íadi íaióina facátari, ñie joreño íaióimo íllana onóíllena, Juzíñamui ie, níbai íeñede.

2 Juzíñamui Joréñona ítímie omoi onóíllifue lloíticue. Nágamie Jesucristo ua cómena bíníemo bite jino onótatímie, afe cómemo Juzíñamui Joreño ite.

3 Mei íadi daí jino onótañedímie Juzíñamui Joréñoñedímie. Afémíemo Crístona uáitafírede joríaí ite. Afe izóidena fiénide joríaí bíllena ja cacádiomoí. Mei afe jae bie éniemo ite.

4 Jitótiai, omoi Juzíñamui íédiomoí. Omoíri ítímie baimo ríinorenamona, afe tánofiredinona jae anáfenodiomoí, mei íaióí daínáfuiái omoi ñnoñena jira. Bíníemo ite tánofiredinori ítímie jabóidímie.

5 Afémaci Juzíñamuína bacáuairedínomo jaináidíno, ie jira Juzíñamuína bacáuaido úritiaioí. Iemona bíníemo ite Juzíñamuína ñnoñedíno afémacimo cacáreidiaioí.

6 Mei íadi cai Juzíñamui íédicai. Juzíñamuína onódimie caimo cacáreide. Mei íadi Juzíñamui íeñedímie caimo cacáreíñede. Afedo uafue uaina llófueinafuena onódicai; daje izóí jífuetena llófueinafuena onódicai.

Juziñamui izíruitimie

⁷ Izíruiga ámatiai, conímana cai izíruilla jitáirede; izíruillafue Juziñamuimona bíteza. Nana izíruillafuiairedino Juziñamui jitótiai. Afe llezica Juziñamuina onódiaioi.

⁸ Juziñamui jamánomo izíruillafuiaiina oruídímie, ie jira izíruillafuenidímie Juziñamuina onóñede.

⁹ Juziñamui daade ie Jitó ana éniemo orede afémiedo cáananona caimo íllena. Afedo ie caina izíruillafue caimo ácatate.

¹⁰ Afe óriado uáfuenta izíruillafuena cai fidítate. Juziñamuina cai duéruia nahí izíruillafueñede. Mei íadi afémie caina dúecaillano cáiconi ie Jitó ória, afe nahí izíruillafue. Ua Juziñamui cai fiénidífuiai ícoinia cai jáinona duere finóllimiena ie Jitó orede.

¹¹ Izíruiga ámatiai, Juziñamui daí caina izíruillamona, afe izói conímana cai izíruillafue jitáirede.

¹² Juziñamuina jaca buna cióñena; mei íadi conímana cai izíruia Juziñamui cai comécimo ite. Afe illa dáaruído Juziñamui izíruillafue caimo ñue riire comuíoicaide.

¹³ Juziñamui dibénemo cai íllana, cai comécimo Juziñamui íllana ónorede. Afena ie Ñuera Joreño caimo fecáinado onódicai.

¹⁴ Moo Juziñamui ie Jitó orede afémiedo comini jilloillena. Iena dani ciódicai. Afena jino uáfodo lloticai.

¹⁵ Nágamierie Jesús Juziñamui Jitona onótatímie, jaca Juziñamui diga ite. Daje izói Juziñamui afémie comécimo ite.

¹⁶ Daí Juziñamui caina izíruillana fidítagacai. Aféfuena ínoticai. Juziñamui jamánomo izíruillafuiaiina oruídímie. Izíruillafuemo itímie Juziñamuimo ite. Afe izói Juziñamui afémie comécimo ite.

¹⁷ Daí jamánomo ñuera izíruillafue caimo comuíoicaide. Iemona írairuimo facátalliruido ñue íena ínofiredinona íticai. Mei Jesucristo bie éniemo ñue cáimamiena illa izói afe izói iticai.

¹⁸ Izíruinafuemo jacíruillafue íñede. Mei jira ñue jáicina izíruillafue jácifuenta jino orede. Mei jácifuemo duere finótajano ite. Ie jira jacínaitímie ñue jáicina izíruioicaíñede.

¹⁹ Cai Juziñamuina izíruiticai, nano fueñe caina ie izíruilla jira.

²⁰ Dámie daíadi “Juziñamuina izíruiticue” mei íadi afe llezica ie daano cómena éoia, afémie táinofueredímie. Uafue dámie ie ciona daano cómena izíruíñede, afe llezica cióñena Juziñamuina izíruinide.

²¹ Juziñamui caimo iga daa ocuícáfue. Afe bie ocuícáfue daide: “Juziñamuina izíruitímie daje izói ie aino cómena izíruiri,” daide.

5

Cai dinena bíniemo ite fiénidífuiaiina anáfenoitcái

¹ Nágamie Jesús Crístona ínotímie Juziñamui jitó. Dámie come moona izíruitímie afe izói afe moo jitótiaiina izíruite.

² Moo Juziñamuina cai izíruia, afe llezica ie ocuícáfuenta cai finóadi, Juziñamui jitótiaiina cai izíruillana ja ónoitcái.

³ ¿Mínica Juziñamuina izíruillafuena? Mei ie ocuícáfuiaina jeire cai ua. Ie ocuícáfuiái llégienide;

4 mei naga Juziñamui jító éniemo ite fiénidifuiaina anáfenorede. Ua cai ínuafuedo éniemo ite fiénidifuiaina anáfenodicaí.

5 Dama Jesús Juziñamui Jitona ínotimie éniemo ite fiénidifuiaina anáfenorede.

Juziñamui Jitomo uai nabáillafue

6 Jesucristo jainoi die diga ciócaizaibitimie. Ie báutizallarui mo Juziñamui Jitona comini fidítagaiaioi. Afe izói ie tíizallarui mo, dama ie abi zóofiano, ie die tóillamona áfedo comini onótagaiaioi. Fia jáinoiñedeza, íadi jainoi die diga bite. Jesús Juziñamui Jitónafuemo Ñuera Joreño uai nabáiraíma. Ñuera Joreño llogafue uafue.

7 Afe Jesús Juziñamui Jitónafuemo damieámani uai nabáiraíma monamo ite: Moo Juziñamui, Juziñamuimona Uailai Lluáibitimie, Ñuera Joreño diga. Bie daámani come daináuai dáamiemo jainaide.

8 Eniemo daje izói daámani uai nabáiraíma ite: Ñuera Joreño, íemo Jesús báutizaja jainoi, íemo ie tíllaruimo totaca die diga. Bie daámanide dane dáamiede.

9 Comini uai nabáillafue líinofiredicaí, mei íadi Juziñamui uai nabáillafue jamánomoide, ie jira ie Jitori uai nabáillafuena cai ínolle iere jítáirede.

10 Juziñamui Jitona ínotimie bie uai nabáillafue dama ie comécido úcade. Juziñamuimo ínoñedimie Juziñamui táinofueredena ciótate, Juziñamui ie Jitori uai nabáillafue dánana ie ínoñena jira.

11 Afe daináfuedo Juziñamui daide: ziiñona cáanano afémie caimo iga. Afe cáanano ie Jitodo bite.

12 Juziñamui Jitona comécido líinotimiemo afe ziiñona cáanano ite. Mei íadi Juziñamui Jitó comécido líinoñedimiemo afe cáanano íñede.

Juan íraicaiño lluífuiái fuizáillafue diga úrite

13 Ja Juziñamui Jitona ínotiomoí. Jira bifue ómoímo cueticue ziiñona cáanano ómoímo íllana omói onóillena.

14 Juziñamui uáfue caimo cacáfírenana ínofiredicaí. Daa minícana cai jicáadi ie comeci jítaina izói, afémie cai daina cacana onódicaí.

15 Mei jira afémiemo cai úrillana Juziñamui cacáfírenana onódicaí. Afena onónamona cai jicácana afémie caimo fécana daje izói onódicaí.

16 Cómena títañeite fiénidifue ite. Dámie ie aino come afe fiénidifue ínuana cióadi, Juziñamuimo afémieri jicari. Iemona Juziñamui cáananona íemo fécaite. Títade fiénidifue ite. Afemo Juziñamuimo omói jicari daiñedicue.

17 Nana fiénidifuiái íaifue; come comécina titade. Mei íadi jíaíe íaifue ite; afefue cómena títañeite.

18 Juziñamuina Móoredimie íaifuedo macáñedeza onódicaí; mei Juziñamui jító íena úiñoteza. Ie jira Taiíe íena ocuínide.

19 Juziñamui íedicaíza onódicaí. Afe izói nana bínie comini Taiíe ocuícufue anamo itíaióiza onódicaí.

20 Juziñamui Jitó jaiái bíllana onódicaí. Afémiedo ua nahí Juziñamuina onótagaí. Afe Uámiemo jaináicana iticaí. Afefue daiíacade Juziñamui Jitó Jesucristo dibénemo iticaí. Afémie nahí Juziñamui. Afémiemo jaináicana cai íadi ziiñona cáina cáataite.

²¹ Jitótiai, mai jánaraimo camátaiño omoi iri; daje izói nana jíáie jífujete jóriaimona abi omoi rairuíri. Jae níe.

MÉIFOIDIBE SAN JUAN CUEGABE

Segunda Carta de San Juan

Uafue íemo izíruillafue diga llóiticue

¹ Ja éicomedicue; ocuiraimadicue. Jae Juzíñamui nizeca cue miringo izóidingodio. Bie rabe ómoimo cueticue naa o úruiairi. (Bimaci iglesia daina Juzíñamuimo gairífiredino.) Naa o diga afémacina uáfuea izíruiticue, mei dama cúeñedeza. Nana uáfuea onódino daje izóí afémacina naa ori izíruitiaioi.

² Ñue uafue ícoinia ómoina izíruiticue. Afe uafue cai comécimo ite; ie mei afefue jaca ninomo cairi iite.

³ Moo Juzíñamui ie Jitó cai Ocuíraima Jesucristo diga, ómoina cáimacaitaite. Afémie dúecaillano jamánomo izíruillafuea ómoimo llóite, naa comeci caimare uái illafue diga. Izíruillafuemoná uáfuea nana aféfuaiaina cai onótate.

⁴ O jítótaiamona dáarie uafue daina izóí mácana fidídicue. Afefue cuena íóbitade, mei Moo Juzíñamui daíí cai ocuúdeza.

⁵ Miringo izóidingo cacai. Ja birui omo izire jicádicue conímána cai izíruillena. Bie omo cuegafue comue ocuúcafueñede. Mei íadi afefue nanómona caimo ite.

⁶ Bie izíruillafue daíacade Juzíñamui ocuilla izóí cai finóllena. Ja nanómona omoí cacana izóí afe ocuúcafue daide: “Izíruillafuedo omoí macari.”

Jífuerrairai ifue

⁷ Mei jii, aillo jífuerridino bie éniado macádiaioi. Afémaci Jesucristo ua come izóí bíllana uáitatiaioi. Daítadimie jífuerriraima. Afémie Crístona uáitaoide.

⁸ Afémiemona abi omoí rairuíoiri o táijinamona oga comeci ñúefue táinocaiñeillena. Iemo jíái afémiemona abí omoí rairuiri nana o táijina iba ñue Crístomona jaícina óllena.

⁹ Níimie Cristo llogáfuemo comécíñeno nibéfodo jáidimie, afémie comécimo Juzíñamui íñede. Mei íadi Cristo llogáuaimo comécidimie comécimo Moo Juzíñamui ite, ie Jitó diga.

¹⁰ Dámie ómoína llófuiaibiadi, íemo bie Cristo llogáfuea atíñeniadi, íena uáidoñeno, jofo eromo llíinoñeno omoí iri.

¹¹ Iena uáidotimie, afémie lloga íaifue dáafuea llíinoiteza.

Fuizájidíuui

¹² Omoína aillo daíacadicue, mei íadi rabedo cúeiacañedicue. Omoí dani conima uiécomo cue úrizaillena úíñoiticue. Afe daíí cai cáimafue jaícina íficaite.

¹³ Omoí ebuño izoide benomo ite iglesia daina Juzíñamuimo jaináidino daje izóí Juzíñamui nizécamaci. Afémaci omo uai orédiaioi. Jae nñe.

IIRAIBE SAN JUAN CUEGABE

Tercera Carta de San Juan

Gáyodo ñuefuena úritimaci

¹ Ja éicomedicue, ocuiraímadicue. Cue izíruiga nabaimo bibe cueticue. Bímie mámece Gayo. Afémiena uáfuena izíruiticue.

² Cue izíruiga ama, ori Juzíñamuimo jicáfiredicue áfedo nana o finócafuiai ñue mónoaillena. O abi caimare náireillena jicádícue, o joreño ñue nífuena izói.

³ O ñúefuedo macáfirenafue dáarie ámatiaimona cue fídiamona, afe cuena iere ióbitade; mei ua onódicueza o jaca ñúefuedo macáfiredio.

⁴ Ua ie baímo cue ióbillena íñede. Afe cue cacana cue jitótiai uáfuemo comécidiaoí; áferi jamánomo ióbídícue.

⁵ Izíruiga ama, o illánomo ite ámatiaína o canóllena figura. Ie mei oni jáinomona bite ámatiaína o canóllena jamánomo ñuera.

⁶ Juzíñamui mámeceido gairídímaci uícomo íaíoína o izíruillafue jino llotíaoí. Izire daídícue: Mai íaíoí cano; íaíoí jáillíruimo jitaica raana íaíoimo ine; áfedo caimare íaíoí jáilleza. Ua Juzíñamuimo ióbilla izói íaíoí cano.

⁷ Mei jira afémaci Jesucristo táijnafuedo jáizaidiaoí. Afe cánuana Juzíñamuina ónoñegamacimona llínoñediaoí.

⁸ Ie jira íaíoí jitaica raana cai finóredicai, afémacina cai canóredicai. Afedo íaíoí uáfuena llúana canódicai.

Diótfrefes fiénino mácafue

⁹ Juzíñamui mámeceido gairífiredinomo cuegafue lluaabe nauí orédicue, mei íadi Diótfrefes cai ocuilla ríinona óiacañede, íaíoí cígímo úicofiacadímie illa jira.

¹⁰ Ie jira cue jáiadi ie fiéni mácafue jino uáfodo onótaiticue, nana ie fiéni úrioinafue, ie táinofuerena caina uáitaoinafue diga. Ie mei afe baímo bitíno ámatiaína afémie llínoñede. Afe llezica afe bitíno llínoacadimacina rairuillano, afémie gairídímacimona íaíoína jino jiude.

¹¹ Izíruiga ámatiai, fiéni onótarafuiaiido jáíñeno iri. Ñúefue finori. Ñúefuena finódimie Juzíñamui ímie, mei íadi íaifuiai finódimie Juzíñamuina jaca onóñede.

Demetrio ñuera onótafue

¹² Nana comíni Demétriori ñue úritiaoí, mei afémie ñue mácafue uáfori ciódeza. Daní cai nane aféfuemo ñue uai nabáiraímacidicai. Iemona uáfuena cai daífírenana onódiomoi.

Uai Fuizájillauai

¹³ Ona aillo daííacadícue, mei íadi rabedo cúeiacañedicue.

¹⁴ Ona raire cíoiillena úiñoticue. Aféruído conima uícomo eróicana úritícoco.

¹⁵ Comece caimare uái illáfuemo o iri. Benomo ite nabáíñiai omo uai orédiaoí. Izire daídícue nágamíerie coco nabáíñiaímo conima uícomo o uáidori. Jae níie.

SAN JUDAS CUEGABE

La Carta del Apóstol San Judas Judas Juziñamui uáidoganomo cuete

1 Jesucristo táijitagamie Júdadícue. Santiago ámadícue. Bibe Juziñamui mamécánomo cueticue. Ua cai Moo Juziñamui uáidoganodiomoi, íeiena ñue finoda maiñócanomo omoi íllena. Jesucristomo omoi jaináinamona ñue eneno rairuícánodiomoi.

2 Mei Juziñamui jamánomo aillo caimo ie dúecailafue, íemo jiái ñue uái omoi illifue, íemo jiái ñue izíruillafue, dígafue ómoímo llóiteza.

Táinofuiaina llófueñiredino (2 Pe 2.1-7)

3 Izíruiga ámatiai, cai comeci jílloillifuedo izire ómoímo cúeiacadícue; mei afe jílloillena Juziñamuimo cue ínnua izói, afe izói iere ínotíomoiiza. Mei íadi ómoína jiáífuedo rabedo llóredícue. Táinofuiái lluáíbitino omoi jeire ogáfueña féitaicadiaioiza; ie jira izire ómoína daidícue: Ríire abí omoi mameri. Íaiói diga fuirilla izói omoi iri, omoi ínogafue íaiói féitañeilleza. Afefue nauí nana Juziñamuimo jaináidinomo dácaíño iga.

4 Mei omoi cígimo ninena dámerie táinofue lluáíbitiaioi. Afémacina Juziñamui Cuegáuailai jaiái uícodo íaiói olle duere finóllífueña llote. Afémaci íáibaníai. Afe íñíai daide: “Juziñamui ñúefueña jeire óitícai;” mei íadi afe dánado rairuñeno fiénidífueña iere nícdotiaioi. Afémaci daade cai Naama Juziñamuina ruíffruítiaioi. Daje izói cai Ocuíraima Jesucristo llogáuaina uáitatiaioi.

5 Mei ja onódiomoi íadi, como cue daííacanafueмо ómoína uibóitaacadícue. Juziñamui Israel comínina Egipto éñiemona oni orede. Oni uano daí nana íaioína ñue jílloitate. Mei íadi, íaiói cígimona dáarie íñoñena jírari, Juziñamui afe íñoñedinona jiáíruido niné táinocaitate.

6 Afe izói Juziñamui abí imácimona dáarie Juziñamui anamo ñue íaiói illáfueña fáicanocaiacadiaioi. Afe mei daní íaiói illánona fáicanocaillano oni jiáinomo jáidiaioi. Ie jira Juziñamui íaioína ico izire íraicaiño iere jicánolliruímo íaioína maitá jae ibaica. Afémaci jae jítinomo iere zábiñede llójeina maigáiaioi.

7 Daje izói Juziñamui Sodoma jofue íemo Gomorra jofue diga bóotate, naa afe ánorí ite jófuenáiri. Mei afécaí comíni Juziñamui abí imácimona fiénina jira dáarie llavécamací izóidiaioi. Afe bimaci jamánomo daní jofo conímari ébecotaíírediaioi. Naga Juziñamui comínimo mameca ñue illáfueña jiruíreillena uáitafirediaioi. Daí íaiói íllamona ziiño iraimo duere finócaiaioi. Afe bifue, afémaci izói cai íñeíllena, caimo cíotaga.

8 Afe emódomo bie taino lluáíbitino íaiói táinomó coméíillafuiáido daní íaiói abina bácadiaioi. Daje llezica cai Ocuíraima ríinona uáitatiaioi. Caifo monamo ite jóriaí izoide ríinoredinona íáire dáíírediaioi.

9 Mei íadi Juziñamui abí imácimona illaíma Miguel, Taífe diga fuirízailla llezica ñúefodo úrite. Tíide Moisés abina júfidotiaillinoi. “¿Buna náamareite?”

daidiáillinoi. Aféruimo Miguel íairede uaido íena faidóñede, mei íadi fia íena daide: “Ocuíraima Juziñamui ona izire llétaiteza,” daide.

¹⁰ Mei bie táinodo llotínuiái íaioi ónoñega ráfuedo fieni úritiaioi. Mei íadi comécina onóñede rílleníai izóí itíaioi. Fia íaioi abí jítaina ráfueo comécioidiaioi. Daí comécillano áfeodo jáillamona daní íaioi niné táinocaitliaioi.

¹¹ ¡Níí íaioina dúerena! Caín dibéfuedo jáidiaioi. Aillo úcube óiacanamona Balaam izóí oni íaifuemo baízaidiaioi. Daje izóí jaiai ite Corena mámeciredimie, Moisés dotáacanamona niné táinocaite naa íemo jaináidinori. Afe izóí birui omoi cígiri ite fiénidifuiái llotino llícaitiaioi.

¹² Omoi finoca conímana izíruilla ráfuiái cígiri meáire finódinona itíaioi. Juziñamuina jacíruiñeno omoi cígiri caimare güillano jífáizaibitiaioi. Jiáimacina ñue úiñoñeno daní íaioi abí úiñoitiaioi. Jairifo oni niné ñaitaca mona úillie izóidiaioi. Ríaniaimona daana llizíllaruimo dúcide íadi llizíñede zena izóidiaioi. Afe izóí bie comíni itíaioi. Afe amena are llizíñenia dúilla llezaca aífoda dotácaza. (Daje izóí bimaci ráifíñenamona táinocaitiaioi.)

¹³ Monáillai jacire bagua izóí itíaioi. Íaioimo ite meáire fiénidifuiái bagua mulle izóí, comíni eróicana jino ciotafirediaioi. Daje izóí úcuai íaioi íomona oni jiáíomo féiraila izóí itíaioi. Jamánomo jítirede jítinomo zíñona íllena riire mamécaiaioi, dinomo duere zefuillena.

¹⁴ Ua bimáciri jaiáidigima Enoc úrite. Adán jító dinómona ie jító, dinómona nane ie jító, siete dígafue daíí illa emódomo, bie Enoc mámeciredimie jocoína. Afémie bie táino llófuetinodo úicodo úrite. Juziñamui Joreñoodo úrillano daide: “Cai Ocuíraima jamánomo aillo ie abí náirairi bíllana ciódicue.

¹⁵ Afémie nana fiénide comínimo ite fiénidifuiái iere riire jicánuaibite. Daje izóí nana íaioi íaire illáfuiái iere jicánuano duere íaioina finótaite. Fiénidino riire daínauaido cai Ocuíramana uáitaidiaioi; bífueomona daje izóí duere zefuítalliaioi.” Daíí Enoc bie fiénidimacido úrite.

¹⁶ Afémaci iere fieni cáillirediaioi; ñue caimátaiñediaioi. Daní íaioi comeci fieni jítáinafuiái jino denóllodo úritiaioi. Urillano aféfuiaina uáfuea finódiaioi. Daní abí íaioi ínua uáillaido ficire úritiaioi, “Aillo jácimacídicaí,” daííllena. Daje izóí caimare comínimo úritiaioi, íaioina bífuellena.

Crístomo ínotino ñue lleta uailai

¹⁷ Cue izíruiga ámatiaí, cai Ocuíraima Jesucristo orécamaci ómoína daínáfueo omoi coméciri.

¹⁸ Afémaci ómoína daide: “Íco íirairuillaido ñúefuiaina zánoitina íiteza. Íaioi comeci íaire óiacanafuiáido íitiaioiza.”

¹⁹ Bimaci dáanomo ñue ítinomona oni eneno bózietaidiaioi. Daní íaioi abí óiacanafue jeire otíaioi. Mei afémaci Juziñamui Joreño úicaiñegaiaioiza.

²⁰ Mei íadi izíruiga ámatiaí, omoi jeire Juziñamuimona ogáfueo riire omoi jaináicairi. Daje izóí Ñuera Joreñoo rímodo Juziñamuimo omoi úrifireiri.

²¹ Juziñamui omoi izíruillafue dibéfueo omoi iri. Cai Ocuíraima Jesucristo caimo dúecaillano zíñona cai illíruimo omoi úiñoiri.

²² Nai jabóicana jizire ínotinona jaícina llóiri, ñúefuea jeire íaioi ólleza.

²³ Iráimona bairoca izóí íaioina jíllotari. Jiáimacimo omoi dúecairi; mei íadi íaioimo ite íaifuemo jíricaiñeno omoi iri. Afe fiénidifue íairede iniroi izoide. Íaioi abímo jíideza; áfemona iere abí omoi rairuiri.

Juzíñamuimo íraicaiño cai caimátaillafue

²⁴⁻²⁵ Cai daade Juzíñamui jamánomo nágafuiái baitádimie. Afémie Jesucristodo cai Jíllotaraima. Iemona cai fiénidifuemo báiiñelle rairuilla ríino íemo ite. Daje izói afémie caina íaifuenino caimare dama ie ebírede uíécomo caina izájirede. Afe Juzíñamuimo ebire ñúefuiái íteza. Jamánomo ñuera ébifue íemo íteza. Daje izói nana ñuera ríino íemo íteza. Daje izói nana riire ocuúllafuiái íemo íteza. Nana bífuiaina cai Ocuíraima Jesucristodo nauí, íemo biruí, íemo jíái uire daí jaca ninomo, Juzíñamuimo dúicaiteza. Mai. Jae ñie.

IIRAI RUIILLAIDO IITIFUIAI JINO CIOTAINA

Juziñamui San Juaamo Jino Ciotagafue

EL APOCALIPSIS

O Revelación a San Juan

Jesucristo jino onóitagafue

¹ Bifue uire íitifuiai jino ciotainafue. Juziñamui bifuiaina Jesucristomo ciotate, afémie ie ocuífireganomo ácatallena. Daií Cristo uáfueña raire ífcaitifueña jino íaioimo ácatate. Jesucristo ie ángel daina abi ímiedo bie jino ciotagana ie ocuífiregamie Juaamo onótate.

² Afe Juan nana ie ciónana uáfueña jino llote. Daje izói afémie Juziñamui lloga uaina nabáfirede. Afe Juziñamui lloga uai Jesucristodo ñue jaícina llócaiga.

³ Bie Juziñamuimona oga uaina jíáimacimo facáduana cacádino caimare itáioi. Daje izói bie rabénicomo cueba uaina cacáillano ñue náfuetino caimare íobitiaoí. Mei bie rabénicomo llogáfuiái zúitirui ja ánozideza.

Siete dígade iglésiai daina Juziñamuimo gáirifiredinomo Juan cuete

⁴ Asia éniemo ite siete dígade iglésiai daina Juziñamuimo gáirifiredinomo cueticue. Cue Juáadicue. Mai Juziñamui ñúefuiái dibénemo, naa ie caimare uái illafue dibénemo omoi iri. Mei afe Juziñamui birui itímieza, íemo jaca nanómona jaiái itímieza, íemo uire jaca ninomo íitímieza. Daje izói ie ráirano uícomo siete dígade ñuera jóriai ite. Afe jóriai Juziñamui Ñuera Joreño jana. Afémie ñúefue dibénemo omoi iri.

⁵ Iemo daje izói Jesucristo lloga ñúefuiái jeire omoi oíri. Afémie jíáifo méidofinide uai nabáiraima. Daje izói afémie nano tíllanomoná abido meine tíñellena cáatagamie. Iemo jíái afémiemo bínie illáicomíni ocuilla ríino ite. Afe Cristo caína íziruillano ie totaca díedo cai fíenidífuiaína oni dote.

⁶ Iemo nane illáicomínina caína itátate ie Moo Juziñamuimo cai jaináillena. Daje izói comínido Juziñamuimo úrifiredinona caína jóonete. Afe Juziñamui íena jóonegacái. Ie jira jaca ninomo áillue ébifue naa ocuilla ríino diga afémie íena íteza. Aquíe izóideza.

⁷ Ero, Cristo mona uílliedo bite! Nana comíni íena cíoitiaoí. Daje izói ie fatino íena cíoitiaoí. Iemo nana bínie nairái afémie bíllana cíoilano éenaitiaoí. Jíi, uafue daítadeza.

⁸ Cai jamánomo riire Ocuídímie bie izói daide: “Nana ráfuiai nai cómuíñenia uíodo itímiedicue. Daje izói fuizájillanomo itímiedicue. Abecedario A-do táinia izói nánoramiedicue. Daje izói abecedario Z-mo fuizaila izói íiraimiedicue,” daide. Afémie birui itímie, íemo jaca nanómona itímie, íemo uire jaca ninomo íitímieza.

Ebúde Cristo nicáirilla izói ciona

⁹ Omoi ama Juáadicue. Omoi duere zefuilla izói daane duere zefuídícue. Daa omoi izói Juziñamui illáimana illánomo jaináidícue. Iemo Jesucristo omoi úíñotaja izói daa omoi diga úíñotagacue. Jesucristodo fairíotaga Juziñamui ñuera

uai jino cue llócailla jira llavécacue. Pátmosmo mámeçirede monaillai cigi idumo llavécamedicue.

¹⁰ Iemo afénomo cai Ocuíraima cai ocózinaitaruimo Juzíñamui Ñuera Joreño náamatagacue. Afe llezica vudugoi fúunua izoide ficírede uaina cue méifomo cacádicue.

¹¹ Afe uai cuena daide:

—Naga ráfuiái uécodo itímiedicue. Daje izói fuizájillanomo itímiedicue. Abecedario A-do taineca, íemo Z-mo fuilla izóidimiedicue. Mai nana o ciona diga daa rabénicomo cúeiri. Cuiano, Asia éniemo ite siete dígade iglésiai daína Juzíñamuimo gairífiredinomo o oreri. Afe jófueniai mámeçiai: Efeso, íemo Esmirna, íemo Pérgamo, íemo Tiatira, íemo Sardis, íemo Filadelfia, íemo Laodicea, —daide.

¹² Bu cuemo úrilla daiyllena abido gírecaidicue. Gírecaillano, siete dígade oro finoña mechérana ciódicue.

¹³ Afe cigimo cómemona comuidimiena eróidena ciódicue. Afémie jitáoi garoi éiba ícoimo dúcide. Ie jogóbemo lláiidife oro finoña.

¹⁴ Afémie ifótirai iere úzere, jaillici úzere izói úzere. Iemo jiái nieve izói úzere. Ie ui irai bóua izói cíoide.

¹⁵ Afémie éiba ñue queníretaga bronce izói quenírede. Ua bronce iraimo ruílla llezica jamánomo quenírena izói, ie idai quenírede. Iemo aillo imánillai nofíco tua ficírena izói ie uai ficírede.

¹⁶ Afémie onoi nabézimo siete diga ucudu lláide. Ie fuémoma iere jáirede llojéfaí izoide raa jino billa; afefai nágafe jáirede. Ie uieco jitoma iere riire egáíñua izói riire egáíñote.

¹⁷ Afémiena cíoillano, ie anamo tíidimie izói baídicue. Mei íadi afémie ie nabezi cuemo bitano cuena daide:

—Jacíruíñeno o iri. Cue bie nanóidimiedicue; dáamedicue fuizájillanomo íitímiedicue.

¹⁸ Birui cáadimiedicue. Mei nauí tíidicue, mei íadi birui jaca ninomo cáaiticue. Tíilla zuitara llave izoide raa cuemo ite; daje izói tíidino illano lláveniai cuemo ite.

¹⁹ O ciona diga mai cúeiri; birui itífuiái cúeiri, íemo uire cómutifuiái cúeiri.

²⁰ Cue nabézimo o ciona siete dígade ucúduai rafue nauí báinino ite. Ja birui jino uáfodo llórede; daje izói siete dígade mechera rafue llórede. Afe siete dígade ucúduai siete dígaze Juzíñamuimo gairídino uai llócaítino jana. Iemo afe siete dígade mechera siete dígaze Juzíñamuimo gairífiredino jana, —daí afémie cuena daide.

2

Siete dígade iglésiai daína Juzíñamuimo gairífiredinomo llollúuai: Efésomo ite ínotinomo llogáuai

¹ Cue cíonamie dánomo cuena daide:

Efésomo ite Juzíñamuimo gairídino úiñoraimamo bíuai cúeiri: “Afe nabézido siete dígade ucúduai lláidimie daje izói siete dígade oro finoña mechera cigido macáfiredo. (Afémie mechera cigido macáfirena izói, comini ñue úiñolle jana.) Afémie afe úiñoraimana bie izói daide:

² Nana o finócafuaiaina onódicue. O riíredemo tájjidíoa onódicue, naa o começi járitaiñedeza. Daje izói fiénidino fiéni illáfuiaina iere izire o rairuíllana

onódicue. Iemo jiái táinona “Jesucristo orécanodicai” daidínona facátatioza onódicue. Afemona afémaci taino llúana baitioza.

³ Jaca o comeci járidoñedio, iemo iere cuedo o táijina llezica cue ícoinia iere duere zefuúdioza. Afe llezica zefuúruñeno ñue táijidio.

⁴ Mei íadi daa figóñedifuena omo ite. Nano fueñe cue o iziruilla izói birui cuena izíruñedio.

⁵ Ie jira ninómona oni nibéfodo baiúdioza comeci uibi. Mai omo itifue méidori. Fueñe o illa izói o iri. Bífuena o méidoñenia omo raire bíticue, omo ite egáñote raa oni óllena.

⁶ Mei jiáifodo, daa ñúefuena nai omo ite. Afe nicolaítas fiени finócafuaiamo naa íaioi fiени jiáifodo llógamo éoicana eróidio. Cue daje izói áfena éoídicue.

⁷ Ñuera Joreño Juzíñamuimo jaináidinona dáinamo cacáacadimie áfemo cacai. Afe Ñuera Joreño bie izói daífacade: “Fiénidena anáfenodinona jáidimacina Juzíñamui nífueninanomo ite cáatate amena llizíllana güitátaiticue,” daide.

Esmírnamo ite ñnotinomo llogáuai

⁸ Daje izói Esmírnamo ite Juzíñamuimo gairídino úiñoraimamo bíuai cúeiri: “Nanóidimie dáamie íraimiena ómoimo úrite. Naui bíniemo tíidimie, iemo meine abido nane cáadimiena jaide. Afémie ona daide:

⁹ Nana o finócana onódicue. Daje izói o duere zefuúllana onódicue, naa o ráanina diga. Mei íadi uáfueza Cristo dibénedo iere ráaredio. Jiáimaci fiени omo úrillana onódicue. Afémaci, “Juzíñamui nizeca Judíodicai” daidíaioi, mei íadi íeñediaoi. Afémaci dani Taife dibénemo jaináidino.

¹⁰ Duere o zefuúllamo jacínaiñeno o iri. Mei ómoimona dámerie Taife llavéramo llavériteza, nana omoi facátallena. Daí omoi comeci ifue onóillena facátallomoiza. Diez dígarui duere zefuúrediomoi. Mei íadi o tíillinomo zóofeñeno ñnofireiri. Daí o íadi zúñona cáallena o jirídotaiticue.

¹¹ Ñuera Joreño Juzíñamuimo jaináidinona dáinamo cacáacadimie mai áfemo cacai. Afe Ñuera Joreño bie izói daífacade: “Fiénidena anáfenodinona jáidimaci nane méifodo tíillamo raamo jiríñeitiaoi,” daide.

Pérgamomo ite ñnotinomo llogáuai

¹² Daje izói Pérgamomo ite Juzíñamuimo jaináidino úiñoraimamo bíuai cúeiri: “Afe nágafene jáirede lloefai llíidimie bie izói ona daide:

¹³ Nana o finócana onódicue. Afe izói Taife ocuícano cígimo itioza onódicue. Afénomo itio íadi zóofeñeno cuemo ñue o ñnuana onódicue. Daje izói cuemo o ñnuana fáicanocaiñedio. Afe izói Antipas mámeçiredimie cue ñue jaícina cue uai nabáifiredimie. Afémie omoi cígiri fatíaioi. Ie fáinaruido, cuemo omoi ñnuana zóofeñediomoi, Taife illánomo itiomoi íadi.

¹⁴ Mei íadi cue lletárafuaina ómoimo ite. Omoimona dáarie jadí Pérgamomo Balaam llófuiana fáicanocaiacañediaoi. Afe Balaam jaiái Balacna llófuete Israel comini fiени fínuaillena. Afe Balac Balaam llófuiamona Israel comínina jánaraimo fecaca rílleniaina ritátate. Afe dáaruido afémacina iere jiruúretade.

¹⁵ Nane jiáie cue lletárafuena ómoimo ite. Omoi cígimo dáarie afe nicolaítas lloga uaina féitaiacañedio ite. Afémacina éoídicue.

¹⁶ Ie jira mai omoi comeci ifue méidori; mei íadi omoi méidoñenia, raire omoi diga fuirízaibiticue. Uáfueza cue fuémona bite jáirede lloéfaido omoi fiени finódinona fáziaibiticue.

17 Ñuera Joreño Juzíñamuimo jaináidinona dáinamo cacácadimie, áfemo cacai. Afe Ñuera Joreño bie izói daiíacade, “Fiénidena anáfenodimiena jáitimie afe báinino ite maná daina monámona cocide güllena güitátaiticue. (Bie maná Juzíñamui íaiói comécina náiretaillena jana.) Iemo afémiemo úzere de nofítofena fécaiticue. Afe nofítofemo buna óñoñega comue mámecei cuelle. Dama afe nofítofe lláinoitimie áfena onuille.” Aquie izói daide.

Tiatíramo ite ñnotinomo llogáuai

18 Daje izói Tiatíramo ite Juzíñamuimo jaináidino úiñoraímamo bíuai cúeiri. “Juzíñamui Jító ómoímo úrite. Afémie ui irai bóua izoide, íemo ie éiba ñue queníretaga bronce izói quenírede. Afémie bie izói ómoína daide.

19 Nana omoi finócana onódicue. Cuena omoi izíruillana onódicue, naa cuemo omoi ñnua diga. Daje izói cue dibéneo ñue omoi táijicaillana onódicue, naa omoi comeci járitaiñena diga. Fueñe omoi táinia baimo birui jamánomo finócaidíomoi.

20 Mei íadi ómoímo daa cue lletárafuena nai ite. Afe Jezabel mámeceiringo llógana rairuíñediomoi. Afengo, “Juzíñamui dibéneo úriticue,” daiífireda, mei íadi fiene ie llócaigafuedo cue ocuífíreganona jífuete. Afe jífuia uaido íaioina iere jiruúretade. Daje izói jánaraimo fecaca rílleniaina íaioina ritátate áfemo camátaillena.

21 Aféngomo are úiñoidicue afengo comeci ífue méidollena. Mei íadi afengo áfena méidoacañede. Afengo ie jiruífueña fáicanocaiacañede.

22 Mei jira birui afémaci afengo finócafuena fáicanocaiñenia, aféngona iere izire iráretaiticue. Daje llezica nana afengo diga jiruúredinona duere ze-fúitaiticue.

23 Afengo úruiaina titaiticue. (Afe úruiai daina afengo llógamo jíruitino.) Afemona naga come ífoci úrillana, ie comeci ífue diga ñue ícoímo cue onónana, nana Juzíñamuimo gairídino fidiítiaíoi. Iemo ómoímona illa dígamie fiene omoi ñnuaze ómoína duere ñnoiticue.

24 Mei íadi ómoímona Tiatíramo ite jíáimaci afe Jezabel omoi llófuia fiénide uaina náfueñediomoi. Afe Jezabélmo jaináidino íaíoi llófueinana daidíaiói, “Cai llófueina uai Taife ie, iere báinide nai uáfodo ónonidífuiai,” daidíaiói. Afe llófueinana onótañegaomoi. Iemo ómoímo ite nai cue lloga baimo jíaiena ómoína ocuífíeiticue.

25 Daa bie llóiticue: Ómoímo ite ñúefuiai ñue rairuñi, nai cue bíñeille dino.

26 Fiénidena anáfenodinona jáitinona náiraiai ócuitimacina jóoneiticue. Afémaci cue jítainana ñue ícoímo fuitáidino. Ocuille ríino íaioimo jóoneiticue,

27 mei daií cue Moo cue ocuille ríinona cuemo jóoneteza. Iemona náiraiaina rírede lloébici izóidedo ríre ócuitiaíoi. Íaioimo cacáreacañedinona ícíruai lláia jéenino llairúngotailla izói, afe izói íaioína duere ñnoitíaiói.

28 Daje izói monáiracudu iere ebire egáíña izói, afémacina ebire ñnoiticue.

29 Ñuera Joreño Juzíñamuimo jaináidinona dáinamo cacácadimie mai áfemo cacai.” Aquie izói daide.

3

Sárdismo ite ñnotinomo llogáuai

1 Daje izói Sárdismo ite Juzíñamuimo jaináidino úiñoraímamo bíuai cúeiri: “Afe siete dígade Juzíñamui jóriaredimie, ñi afe Juzíñamui Ñuera

Joréñoredimie Cristo, íemo afe siete dígade ucúduai llíidimie dáamie. Afémie bie izóí ona daide: Nana o finócana onódicue. Crístomo o jainaina izóinado jica jalleide, íadi onódicueza tíidimie izóí itio.

² Come cazilla izóí mai abina onoiri. Nai omo due jiza fiébide ñnogafuiaina meine rirre finori, mei aféfuiai jae táinocaiacadeza. Eródicuemo o finócafuiai cue Juzíñamui eróicana ñue jaícina jóiñedeza.

³ O fueñe ñnoga íaioi llófuiamo uibóicairi. Afena jeire o oíri. Afe llezica o comécimo itífue ññefuena méidori. O abina ñue onóñenia, merírífiredimie ónonino billa izóí, duere omo fínuaibitícueza. Cue billíruina óñoñeítio.

⁴ Mei íadi ómoimona jadí Sárdismo dáarie comécina ññemacina ite. Afémaci íñroina íaíñedino izoide. Afémaci úzecuiruai jitada cue diga jáitíaiói, mei afe daí íaioimo dúideza.

⁵ Fiénidena anáfenodinona jáidino úzecuirona jítaítíaiói. Iemo zíñona cáaitino mámecei cuiánicomona íaioi mámecei dónéitícue. Iemo daje izóí cue Moo Juzíñamui uícomo “Bie cúemaci” dáitícue; daje izóí ie abi imaci ángeles daínámaci uícomo “Bie cúemaci” dáitícue.

⁶ Ñuera Joreño Juzíñamuimo jaináidinona dáinamo cacáacadimie mai áfemo cacai.” Aquíe izóí daide.

Filadélfiamo ite ñnotinomo llogáuai

⁷ Daje izóí Filadélfiamo ite Juzíñamuimo jaináidino úññoraímamo bíuai cúeiri: “Afe ññfuenidimie omo úrite. Afémie uáfueña úrífiredimie. Afémie mo jaiái illáima David naze tuiñora llave ite. Afémie Juzíñamui illáimana illano tuiñóadi buna íbáinide. Daje izóí afémie íbáia, buna zuitánide.

⁸ Bímie bie izóí ona daide: Nana o finócana onódicue. Buna íbáinide túide naze o uíecori jónetícue. Mei figo mairíñedio, íadi cue uaina náfuetio; cuena jaca jáanofinidio.

⁹ Iemona Taifemo jaináidinona o anamo caíñícido ana íaioi dújutano óreitícue. Afémaci táinona úrillano bie izóí daíñfiredíaiói: “Cai bie Juzíñamui ñizeca judíuaidícaí” daidíaiói, mei íadi íeñediaíói. Nana baimaci o anamo dújutaitícue, íemona ona cue izíruillana fídíitíaiói.

¹⁰ Cue ocuica uai jeire o úamona aféuai daina izóí comécina járidoñedio. Ie jira nana bíniemo bite facátalliruimona ona ñue ráiruitícue. Aféruido nana bíniemo ite comíni facátallíaiói.

¹¹ Raire bitícue. Omo ite ññefuiai ñue rairuiri, o jirídolle raa bu báiroñeilleza.

¹² Fiénidena anáfenodinona jáitínona cúeiena máíñoitícue. Máíñuano cue Juzíñamui gairíracomo ite mairide jáillirai izóí íaioina óreitícue. Iemona Juzíñamui illánomona jaca jino jáíñeítíaiói. Íaioimo cue Juzíñamui mámecei cúeitícue. Daje izóí cue Juzíñamui jofue mámecei íaioimo cúeitícue. Afe jofue mámecei “Comue Jerusalén.” Afe jofue cue Juzíñamuimona caífo monámona ana bite. Daje izóí afe fiénidena anáfenodinomo cue comue mámecei cúeitícue.

¹³ Ñuera Joreño Juzíñamuimo jaináidinona dáinamo cacáacadimie mai áfemo cacai.” Aquíe izóí daide.

Laodicéamo ite ñnotinomo llogáuai

¹⁴ Daje izóí Laodicéamo ite Juzíñamuimo jaináidino úññoraímamo bíuai cúeiri: “Uáfueña llotímie omo úrite. Afémie jaícina uai nabáíñfiredimie; daje izóí jaca méidoñeno uáfueña úrífiredimie. Afémie nana Juzíñamui finócana táinéraima.

15 Afémie bie izói ona daide: Nana o finócafuiaina onódicue. Ráairuillano figo o ñnoñenana onódicue. O ñnoga ñue uzírediji izóíñede. Daje izói o ñnoga caimare mánaidiji izóíñede. Ñue o uzírenana jitáidicue, ñibai jiáifodo o mánaínana jitáidicue.

16 Mei íadi jabo uzírediji izóidío. Iemona jabo uzírediji jino tua izói ona jino dótaiticue.

17 Bie izói daiífiredio: “Ráaredimiedicue,” daidío. Iemo “Nana cue illafue ñue jóide. Cue jitaica raana ñede,” daiífiredio. Mei íadi jiáifodo o íllana onóñedio. Juzíñamui eróicana bu cáimadoñegamiedio. Iemo daje izói iere duere zefuítagao, íemo iere dúeredimiedio, íemo uina cíoiñedimie izóidío. Iemo jiái inícuironino emuíromade izóidío. Afe bie izói o íllana jaca onóñedio.

18 Mei jira omo llóiticue, “Traimo ñue finoca órona cúemona íba, uáfuenta ráaredimiena o jáillena. Daje izói cúemona úzerede inícuirona íba, o meáire emuíromana íbáillena. Daje izói ui manórajina cúemona íba, o uimo jóoniamona ñue o cíoillena.

19 Nana cue izíruiganona lletáidicue; daje izói íaioina duere finódicue ñue íaioi íllena. Mei íemona Jesucrístomo izire o jaináicaillano, iere o ñnofireiri. O comeci ífuiái méidori, ona duere cue fínoiza.

20 Ero cacai, come comeci naze ízoinamo iticue. Dinómona jíiriticue. Cue uaimo cacáreitimie ie naze tuiñóadi cue llánollena, afémie illánomo jofó jáiticue. Jaillano dájena afémie diga nabáiriticue. Daje izói conima diga caimare úriticoco.

21 Fíénidena anáfenodinona jáitinona, illáimana cue ráiiranomo afémiena cue diga ráiitaiticue. Mei daií fíénidena cue anáfenuamona cue Moo illáimana ráiiranomo ráinazaidicueza.

22 Ñuera Joreño Juzíñamuimo jaináidinona dáinamo cacácadimie, mai afemo cacai.” Aquie izói daide.

4

Monamo Crístomo lloga cáimafuiái

1 Bie méifomo éroidicuemo, monamo ite naze túinana ciódicue. Fueñe cue cacana uaina meine nane cacáidicue. Afe uai vudugoi ficírena izói cacaide. Afe uai cuena daide:

—Caifo benomo bi. Bífuiái méifomo raíre cómutifuiaina omo ácataiticue, — daide.

2 Afe llezica Ñuera Joreño anamo itábicaidicue. Iemona monamo ite illaíma ráiiranona ciódicue. Afénomo dáamie ráiínana ciódicue.

3 Afémie iere quérede ‘jaspe’ daína ráifide nofíji izói éroide. Aféjina jiáífo daína ‘cornalina.’ Afe ráiirano abido rózígüeo nágafene ífoina ite. Afe rózígüeo ‘esmeralda’ daína ráifide nofíji quenírena izói quenírede.

4 Iemo afe ráiirano abido veinticuatro diga jiáie illaíma ráiiranuaina nágafene ífoina íllana ciódicue. Afénuaimo veinticuatro diga mona ero ocuide éicomini ráiidiaioi. Afémaci úzerede iníroillai jitádiaioi. Íaioi ífomo oro finoina illaíma jitáfiregacuífoi jíiena.

5 Afe áillue ráiiranomona aillo boride. Afe llezica afénomona iere ficire mona giria cácaide. Iemo afe ráiirano uícomo siete dígade áillue bobáieniai bóoide. Afe siete diga bóoide bobáieniai Juzíñamui Ñuera Joreño jana.

⁶ Dáanomo afe ráiirano uícomo, daa monáillaina eroide illa. Afe monáillai anáfenemo ñue cíoide vidrio izoide.

Afe ráiirano abido cuatro diga cáadimiái ífoina itíai. Afémaci erófene dibénemo aillo uíjiaí ite. Daje izóí emodo dibénemo ite.

⁷ Bimácimona daa jánallarina eroide. Iemo jíáie juráreto ífona eroide. Iemo jíáie uíeco, come uíecon a eroide. Iemo jíáie feede máajaiñona eroide.

⁸ Afe cuatro diga cáadimiáiimo illa dígamíemo seis diga íaicuai ite. Afe íaicuai erófenemo uíjiaína oruide; daje izóí emódo dibénemo ite. Afémaci mona naio diga llícaíñeno úritiaí; Juzíñamuina daiíoidiaí:

¡tere íaifuenidio! ¡tere íaifuenidio! ¡tere íaifuenidio!

¡ere ñuera cai Ocuíraimadio.

Jamánomo ríinorede Juzíñamuidio.

Jaca nanómona itímiedio,

Iemo nai birui itímiedioza,

Iemo uire jaca ninomo zííñona íitimiedioza, —daií daiíofirediaí.

⁹ Illa dígcacíño afe cáadimaci, ráiiranomo ráiide Moo Juzíñamuimo ebíredifue nitáadi, íemo ñúefue jóoneadi, íemo jíái figura íena dáíadi,

¹⁰ afe llezica afe veinticuatro diga ocuide éicomini áillue ráiiranomo ite Juzíñamui anamo dújufirediaí. Iemo afe jaca ninomo zííñona íímiéna caimátaidiaí. Afe llezica íaií oro finoina illaímo ífo icuífuai ráiirano uícomo jóonefirediaí. Jóneta daiífirediaí:

¹¹ Cai Ocuíraíma Juzíñamui,

¡ere ebíredifue omo nitáregaza,

Daje izóí ñúefuiai omo jóonefíregaza.

O jamánomo ríinorenana omo nitáregaza.

Nana aféfuiai ona náamaredeza.

Mei naga ráaniaí o comuítaga.

Iemo o comeci jítaina izóí itíaióiza.

Daje izóí o comeci óiacanamona finócaiaí.

Aquíe izóí daiífirediaí.

5

Ráidímie llíga rabénicon a cíodicue naa Cordero daínámie Cristo diga

¹ Afe méifomo illaíma ráiiranomo ráidímie nabézimo ite rabénicon a cíodicue. Afénico ferínoga rabe. Erófenemo cuega, daje izóí jinófenemo jíái cuega. Afénico siete diga sello daína ñue íbaira raado íbaica.

² Iemo ríirede ángel daína Juzíñamui abí ímiéna cíodicue. Afémie fíírede uaido jícánofire; daide:

—¿Bie sello mei cuatállea bu ñuena? ¿Bumo ñue dúide binico tuiñóllena? — daide.

³ Mei íadi afénico tuiñoitimíena íñede. Caífo monamo íñede. Bíníemo íñede, íemo bíníe anamo tíidino illánomo jíái daje izóí íñede. Daje izóí afénícomo buna eróinide afe facádollena.

⁴ Afénico tuiñoite comécina ñúemiéna baiñénamona íere éedicue. Daje izóí afénico facádoitimíe íñénamona, íemo jíái afénícomo eróillano ónoitimíe íñénamona, íere éedicue.

⁵ Iemona veinticuatro diga eicomínimona dámie cuena daide:

—Mai benómona éeñeno o iri, mei Judá nairai illaíma Jánallarina mamécamié, fiénidena jae ñue anáfenotateza. Afémie jaiái illaíma David erófene igímamona comuídimie. Afe ie anáfenuamona afémie binico tuiñolle ríino ote. Daje izói afe siete dígade sello cuatalle ríino íemo ite, —daide.

⁶ Iemona afe ráirano cígimo, íemo afe cuatro diga cáadimíai cígiri, íemo afe veinticuatro diga éicomini cígimo, Cordérona mameca Crístona ciódicue. Afémie táide, mei íadi Juzíñamuimo fia fecállena ie íaiói fáina meifo cíoide. Afe Cordero siete diga zícairede, íemo ie ui siete dígade. Afe siete dígade uíjiai naga éniáimo orecá Juzíñamui Ñuera Joreño jana.

⁷ Afe Cordero illaíma ráirano ríidimie nabézimo ite rabéniconá llínuaide.

⁸ Afémie afénico llínua llezica afe cuatro dígade cáadimíai, íemo afe veinticuatro dígade ocuide éicomini afe Cordero anamo dújudiaíoi. Afe eicomínimona illa dígamie ‘arpa’ daina rua roia taiga raa llíediaíoi. Daje llezica afémaci oro finoina ugúciaina oruide ichecoí llíidiaíoi. Afeníai Juzíñamuimo jaináidino afémiemo jicara uailai jana.

⁹ Afe éicomini bie comue rua rotíaiói: O iere comécina ñúemienamona bie rabénico llínnota tuiñolle omo dúide. Mei nauí Juzíñamuimo fatá fecácamedioza. Caina o die tóillado Juzíñamui íena ibádioza.

Uáfueña nágaziemona,
Iemo nana jíáífo úritinomona,
Iemo naga comini jófuiáimona,
Iemo nana náiraiáimona Juzíñamui íena caina ibádioza.

¹⁰ Cai Juzíñamui ie illáinina caina jáitatio;
Daje izói comínido Juzíñamuimo úrifireitinona caina jóonetio;
Iemona énie náiraiaina ócuticai.
Aguíe izói rotíaiói.

¹¹ Afe mei eródicue. Iemo aillo afe illaíma ráirano ífoina ite ángeles daina Juzíñamui abi imaci úrilla uaina cacádicue. Daje llezica afe cuatro diga cáadimíai uaina cacádicue. Iemo dáaruido éicomini uaina cacádicue. Afe Juzíñamui abi imaci iere jamánomo aillo itíaiói. Ua millones y millones dáinaze itíaiói.

¹² Afémaci ficirerie úritiaíoi; daidíaiói:
Fatá Juzíñamuimo fecaca Cordero comécina iere ñúenamona ñuera ríino maiñolle afémiemo dúide.
Daje izói aillo ráifide ráaniaí daámieemo dúide.
Iemo ífoci déillafuai daámieemo dúide.
Iemo nana ñuera máirie daámieemo dúide.
Iemo nitárega ñúefue daámieemo dúide.
Iemo ñuera ébifue daámieemo dúide.
Iemo aillo afémiemo caimátaille uai afe Cordéromo dúide.

¹³ Afe llezica nana Juzíñamui comútaganuai úrilla uaina cacádicue: nana monamo itínuiai, daje izói éniemo itínuiai, daje izói énie anamo itínuiai, daje izói monáillaimo itínuiai, naa afénuaiamo itínuiai úrilla uaina cacádicue. Daidíaiói:
Nana caimátaille uailai illaíma ráirano ráide Moo Juzíñamuimo íredeza,
Daje izói jíai Cordéromo íredeza.

Afe izóí ñúefue afe íaillinoimo nitáredeza, naa ñuera ébifue diga,

Iemo ñuera riño íaillinoimo íredeza.

Nana aféfuiai íaillinoimo nana fimónaiaido, jaca ninomo zííñona daí daírenaza.

¹⁴ Iemo afe cuatro diga cáadimíai aiáirilla izóí daidíaiói:

—¡Daíítadeza! —daííoifiredíaiói.

Iemo afe veinticuatro dígade éicomini ana dújuillano, jaca ninomo zííñona cáadimiemo caimátaioifiredíaiói.

6

Siete dígade sello daina rabénico ibaira rafue

¹ Cordero afe siete dígade séllomona nánora tuíñuana ciódicue. Daje llezica cuatro dígade cáadimíaimona dáamie dánana cacádicue. Ie úrilla uai, mona gíria ficirena izóí ficírede. Daide:

—Mai eróizaibi, —daide.

² Cue eroilla llezica úzerede cabállona ciódicue. Afe emódomo ráiicaidimie zicaira llícaide. Iemo illaíma ífo icuífoina íe jítdáíaiói. Jita mei afémie naga náiraina anáfenocana jaide. Ie mei nágaruillaído afémie íaioina anáfenofírede.

³ Méifoide séllona Cordero cuata llezica, tórona éroide cáadimie úrillana cacádicue. Afémie:

—Mai eróizaibi, —daide.

⁴ Afe llezica jáirede caballo jino bíllana ciódicue. Afe emódomo ráiicaidimiemo féitalle riño afémiemo iga. Afémie nana nairai caimare uái illa féitaite, comini conímána fazítallena. Afe llezica áillue lloébicina afémiemo iga.

⁵ Iemo Cordero nane jáíe tercer daina sello cuata llezica, jáíe cáadimie úrillana cacádicue. Afémie:

—Mai eróizaibi, —daide.

Jira eródicue. Eródicuemo daa jítirede cabállona ciódicue. Afe emódomo ráiicaidimie mérenana onóillena facara raa llícaide.

⁶ Iemo cáadimíai cigimona dáamie úrilla uai cacádicue. Aféuai daide:

—Daa kilo trigo daa mona táijina fidi. Iemo daámáni kilo cebada daa mona táijina fidi. Iemo aceite vino diga jaca jeruíredeza, mei afe íballe úcube íñédeza, —daide.

⁷ Afe mei Cordero jáíe ‘cuarto’ daina sello cuata llezica, cáadimíaimona íraimie úrillana cacádicue. Afémie:

—Mai, eróizaibi, —daide.

⁸ Eródicuemo borárede cabállona ciódicue. Afe emódomo ráiicaidimie titáfíredimie dainámie. Afémie ódana tíidino illano jana maméidimie bite. Enie cuatro diga fecácamona dáanie íemo iga, afénomo riire ocuállena. Afénomo comínina fuiríllado íaioina tícoizitaite. Iemo daje izóí júbiedo íaioina tícoizitaite. Iemo dúicuaído íaioina tícoizitaite. Iemo éniemo ite illárede rílleníai íaioina tícoizitaite.

⁹ Afe mei Cordero jáíe ‘quinto’ daina sello cuata llezica, ‘altar’ daina Juzíñamui caimátaitarano anamo ite, titaca comini comécíaina ciódicue. Afémaci Juzíñamui uai llócailla ícoínia titácaiaíoi.

¹⁰ Afe bimaci ficire úritiaíoi; daidíaiói:

—Iaifuenide cai Ocuídime, uícodo o llógana méidoñeno ñue fuitáfiredio. Eniemo ite cai titádino iere jicánota duere o finóllena, ¿nié dinó nai moziñoitio? Cai fatino iba o ollirui, ¿nígarui nai bai dúiñoitio? —daiíaiioi.

11 Mei jira afe altar anamo itímaci úzecuiruaina igáiaioi. Afe llezica nai nano íanori ocózinaitagaiaioi. Mei nana íaioi tilla izói uire titállino, Juziñamui mámanomo nai dúciñede. Afe titállino, nauí íaioi titaca ámatiaí izói, Cristo uaimo táijifrediaioi.

12 Cordero nane jáie 'sexto' daina sello cuata llezica, eródicuemo, énie iere jacire docaide. Iemo jitoma zúunaillana, jitaca jítiroi izói éroide. Afe llezica fiui náauina jáirede die izói méidoficaide.

13 Afe dáaruído mona ero ucúduai cocídiaioi. Ua, higuera daina amena llizilla, jairifo riire begúñuamona cócia izói, afe izói ucúduai ana bíñiemo cocídiaioi.

14 Afe llezica, rabe jofe ferírioicailla izói, mona ferírioicaide. Iemona cióbicañena. Iemo dáaruído nana caifóneduai naa monáillai cigi íduai íaioi illánomona oni jírecaide.

15 Iemona nairai illaini caifóneduai anamo ite ífuaimo, naa jéerie noficiaí cigiedo retáiritiaioi. Afénomo jamánomoidino daje izói retáiritiaioi. Iemo aillo ráanaitino, íemo fuíriraíni illáicomini, íemo iere riíredinuiaí, íemo nana jacire rairuícano, daje izói buna ráiruñegano, nana afénomo retáiritiaioi.

16 Afémaci caifóneduaina jéerie noficiaína daiífrediaioi:

—¡Mai caimo baii! Mai caina jiita, baie illaíma ráiiranomo ráiide Juziñamuimona caina rétaido. Cordero finolle jacire cai duere finóllifuemona caina rétaido, —daiífrediaioi.

17 Mei jii, iere jacire comini duere finóllirui jae dúcidez. ¿Bu mei áfena moziñorena?

7

Israel náiraímona náamana onóillena cuezámaciaí

1 Bie méifomo bínie fuédaiaímo cuatro dígade ángeles daina Juziñamui abi ímíai, naidáienana ciódicue. Afémaci nágafeniamona jairifo jáiñuana moziñotiaioi. Afe éniemo jairífona jaiñótañediaioi, daje izói monáillaimo jaiñótañediaioi, íemo jái aménaímo jaiñótañediaioi.

2 Iemo jáie Juziñamui abi ímiena mona móimona billana ciódicue. Afémie caade Juziñamui íeie daiíllena sello daina jóonelle raa llícabite. Afémie ficire úrite. Enie fuédaiaímo cuatro díga naidáidimíaimo úrite. Afémaci bínie fienu íaioi finolle, naa monáillai díga rímona igámaci. Afémacina bímie daide:

3 —Cai Juziñamui ocuífiréganomo, íaioi ozócimo náamana onóillena mámeceí nai jóoneña llezica, nai bínienu duere finóñeno iri. Daje izói monáillai naa aménaiaí raire duere finóñeno iri.

4 Jónia meí, nígamaci náamana onóillena mámeceína jóonegano íaioi número na cacádicue. Nana Israel náiraímo itíziaimona afe cuezano ciento cuarenta y cuatro mil dígade.

5 Judá izíemona doce mil díga cúefide.
Iemo Rubén izíemona doce mil díga cúefide.
Iemo Gad izíemona doce mil díga cúefide.

6 Iemo Aser izíemona doce mil díga cúefide.

Iemo Neftalí izíemona doce mil diga cúefide.

Iemo Manasés izíemona doce mil diga cúefide.

⁷ Iemo Simeón izíemona doce mil diga cúefide.

Iemo Leví izíemona doce mil diga cúefide.

Iemo Isacar izíemona doce mil diga cúefide.

⁸ Iemo Zabulón izíemona doce mil diga cúefide.

Iemo José izíemona doce mil diga cúefide.

Iemo Benjamín izíemona doce mil diga cúefide.

Aillo dáanomo úzecuiruai jitada gairídino

⁹ Afe méifomo eróillano jamánomo aillo comínina ciódicue. Nana náiraiaimona dáanomo bitíaiói. Daje izói nágaziemona bitíaiói. Iemo daje izói jíáifo úritinuiamona bitíaiói. Iemo daje izói naga jófuiamona bitíaiói. Nana bimaci illaíma ráirano uícomo naidáidiaíói. Daje izói Cordero uícomo naidáidiaíói. Afénomo aillo itíaióiiza buna facádonide. Nana afémaci úzecuiruai jitáoidiaíói. Daje llezica afémaci rafóruai llíediaíói.

¹⁰ Nana fícererie daidiaíói:

Cai jíllonano, illaíma ráirranomo ráiide cai Juzíñamuimona comuide.

Daje izói cai jíllonano Cordéromona comuide, daidiaíói.

¹¹ Afe llezica nana Juzíñamui abí imáciaí, illaíma ráirranono onido ífoina naidáidiaíói. Daje izói veinticuatro dígade éicomini onido ífoina naidáidiaíói. Iemo jíái cuatro diga cáadimiái onido ífoina naidáidiaíói. Afémaci afe ráirranomo ráiidímie anamo éniemo fueco diné bíjicaidiaíói. Bíjicaillano Juzíñamuimo caimátaidiaíói.

¹² Daidíaíói:

¡Bie izóideza! Nñefuiái nitalle cai Juzíñamuimo dúide, ñue ebíredifuiái diga.

Daje izói nana ñue onóigafue íemo dúide, naa figora daífírena diga.

Daje izói afémiemo nitárede ñúefue dáamiemo dúide, naa áillue máirie diga.

Nana bífuiái cai Juzíñamuina jaca ninomo zíiñona daí daírenaza.

Aquíe izóideza, —daidiaíói.

¹³ Afe mei afe eicomínimona dáamie cuemo jicánote:

—¿Baie buoi úzecuiruai jitáoina? ¿Afémaci mei ninena bitíaiói? —daide.

¹⁴ Jira íena daidicue:

—Afena onóñedicue. O ñue onódio, —daidicue.

Iemo afémie cuena daide:

—Bimaci aillo duere zefuilla ícoimo jino bitino. Afémaci comécina iere íaífuenino íaiói íllena ja Cordero díedo muiñócaza. Afémaci iere úzecuiro íncuíro illa izói itíaiói.

¹⁵ Ie jira Juzíñamui ráirranono uícomo itíaiói. Afe llezica nágaruillai, mona náio diga, Juzíñamui gairíraco ero ie ocuállana finófrédiaíói. Iemo afe ráirranomo ráiide Moo Juzíñamui, íaiói diga íllado jácifuemona íaióina ráiruíte.

¹⁶ Afémaci jaca júbiemona duere finóbiñeítiaíói. Daje izói jíróacanari duere zéfuiñeítiaíói. Iemo jítoima íaióina jíái úzitañeíte. Daje izói uzíredíruimo mona uzírena íaióimo uzíre cácañeíte.

¹⁷ Mei illaíma ráirranono abimo ite Cordero, ovejai uíñua izói íaióina uíñóiteza. Afe llezica ñuera jainoi jino toránuaido íaióina ífóicaíte. Afe jainoi zíiñona cáatatií. Iemo afémaci éeadi Juzíñamui íaiói ui jeme nana oni dóíte.

8

Iraie sello cúatajana cioide, oro finoina uguci uillítara diga

1 Iemo Cordero llíiga rabénicomo ite iráie sello daina ibáioide raa cuata llezica, daa hora átuedo mona tii daiñiocaide.

2 Afe mei siete dígade Juzíñamui abi imaci Juzíñamui uícomo naidáienana ciódicue. Afémaci siete diga vudugoí izoide raana igáiaioi.

3 Afe mei jáie ángel dainámie Juzíñamui abi ímie oro finoina uguci uillítara llíicabillana ciódicue. Afémie altar daina Juzíñamui caimátairano uícomo naidaide. Iemo aillo ugúciai afémiemo fecácaza, áfena Juzíñamuimo uillítallena. Mei nana Juzíñamuimo jaináidino afémiemo íaioi jicáfírena uaillai llua llezica, bímie dáanomo afe ugúciai Juzíñamuimo uillítaiteza.

Afe Juzíñamui ráirano uícomo ite oro finoina ie caimátairanomo, bímie afe ugúciai jutade; iemo afe llezica afe Juzíñamuimo jaináidino jicáfírena uaillai llócaigaza.

4 Afe uguci uillie, Juzíñamui abi ímie áfena altarmo juta mei, Juzíñamui uícomo caifo uillíioicaide, nana Juzíñamuimo jaináidino jicáfírena uaillai diga.

5 Afe mei Juzíñamui abi ímie uguci uillítara raa llínote. Llínuano altármona oga caade iráiciaina áfena oruítate. Daií finuano ana éniemo dotade. Afe dota llezica mona jacire giride naa ficíriede raari. Iemo aillo améuaí llairide. Iemo énie jacire docaide.

Siete dígade vudúgoína eroide raa

6 Iemo afe siete dígade vudúgoína eroide llíide Juzíñamui abi imáciai afe vudugoí fúunollena maméritiaioi.

7 Nanóidímie fúunua llezica, jéerie nocíjiaí éniemo cocítate. Afe dáaruido réici diga die taméricaide éniemo cocítate. Afe cóciamona éniemona jarífenie boode. Daje izóí nana aménaiaimona jarífenaiaí boode. Daje izóí nana caade ráitiaimona jarífene boode.

8 Afe meifo Juzíñamui abi ímie ie vudugoí fúunua llezica, boode áillue íduna éroide raa monáillajimo dotaina. Iemona monáillajimona jarífeido díena jaide.

9 Afemona nana afénomo ite caade chámuniaimona jarífenaiaí aillo tícoizitiaioi. Daje izóí afénomo ite jéerie bárconiaimona jarífenedo aillo niné táinocaidiaioi.

10 Iemo jáie Juzíñamui abi ímie ie vudugoí fúunua llezica, áillue ucudu monámona éniemo baíide. Afe ucudu bobaie izóí boode. Afe bóodicudu nana imánillaimona jarífemanimo baíide. Daje izóí éniemona jainoi jino toránuiamo baíilla.

11 Afe ucudu mámece Eríredicudu. Iemona nana imánillaimona jarífemanillai eríriede. Iemona afe jainoi erire jáillamona aillo comíni tídiaioi.

12 Te mei nane jáie Juzíñamui abi ímie ie vudugoí fúunua llezica, jítómamona jarífetomado jítirecaide. Daje izóí fiuímona jarífeuido jítirecaide. Iemo jáí ucúduaimona jarífecududo daje izóí jítirecaide. Ie jira nana afémacimona jarífenedo jítirecaide. Naga mona naio diga jarífemonana egáíñoñediaioi.

13 Afe méifomo caifo monamo éroidicue. Afe mona erodo feede Juzíñamui abi ímie na cacádicue. Afémie ficire úrioicaide. Daide:

—Aii. Eniemo ite comini nã dúerena; mei Juzíñamui abi imácimona daámani nai fiévide vudugoí fúunollena. Afémaci fúunua llezica énie imaci, ¡Nii duere zéfuitiaioi! —daide.

9

¹ Iemo nane jiáie Juzíñamui abi ímie ie vudugoí fúunua llezica, daa ucudu monámona éniemo baiillana ciódicue. Iemo fiénide joríaí ibáirafo zuitara llave afe ucúdumo iga.

² Afemona afédu aféfona tuiñode. Tuiñuamona aféfomona jacafai bóua uillia izói caifo uillide. Aféfomona caifo uillide uillie jitómana dúitate. Afe llezica mona erona jítire finode.

³ Afe uílliemona bímedio feede fiuai comuide. Afémaci, éniemo ite acáiduai izói molléroirediaioi.

⁴ Afémaci ráitie güíllena rairuícaiaioi. Daje izói nana amena rábiaina guitátañegaiaioi, naa jiáie mócore zicode ráaniai diga. Daa comini duere finóllena orécaiaioi. Mei íadi dani Juzíñamui ie daítate mámece ozócimo cúeñeganona, afe fiuai duere fínoitiaioi.

⁵ Mei íadi afe fiuai comínina títatañegaiaioi. Mei jiáfodo afémaci cinco diga fiui comínina izi cácataitiaioi. Afe fiuai mailla, acaido come mailla izói izíreite.

⁶ Iemona aféruillaido comini, “Raire cue tílli” dáitiaioi, mei íadi tíñeitiaioi. Iere tíicaitiaioi íadi, tíáfírede raa afémacimona oni jica jáite.

⁷ Afe fiuai jóbairzaillena mamérilla cabállona eróidiaioi. Iaiói ifócimo oro finoina illaíma ifo icuífoina éroide jíina. Iemo íaiói uieco come uiecona éroide.

⁸ Iaiói ifóti ringo ifótiina éroide. Iaiói ízie ‘león’ daina jánallari íziena éroide.

⁹ Iemo llojécuiroi izoide abi rúidote icogi íaiói jogóbemo jíide. Iaiói féeoína jamánomo fícrede. Uafue, jóbairzaila caballo zonóicaiga ‘cárroniai’ fícrena izói fícrede.

¹⁰ Iemo afémacimo ite ooda açaido ooda izói molléroirede. Afe óodamo cinco diga fiui comini duere finolle ríno ite.

¹¹ Afe fiuai illaíma ite. Afémie fiénide joríaí ibáirafo úiñotimie. Afémie mámece hebreo uaido Abadón; íemo griego uaido Apolión. Afeci daííacade “Niné táinocaitimie.”

¹² Nanoide jacire izi cacánafue jae záaide. Mei íadi nai mena fiévide.

¹³ Iemo nane jiáie Juzíñamui abi ímie ie vudugoí fúunua llezica, Juzíñamui uícomo ite oro finoina altar daina afémiemo caimátairanomona úrilla uaina cacádicue. Afe uai afe caimátairanomo ite cuatro dígade caifo fáide zicai cígimona cácaide.

¹⁴ Afe uai jae vudugoí fúunote Juzíñamui abi ímiena daide:

—Afe cuatro dígade Eufrates imani abimo cuinaca ángeles izóidino mai zuitari, —daide.

¹⁵ Jira zuitácaiaioi, nana comini jarífenairaído tíállena. Mei aféruimo dúcinamona bai óllena eneno mamécaiaioi. Daje izói biruimo dúcinamona mamécaiaioi. Daje izói bie fiui íena mamécaiaioi. Iemo daje izói bie fimona íena mamécaiaioi.

¹⁶ Afe cuatro diga ángeles ocuúllino aillo ite. Nana afémaci cabálloniai emódomo ráiiediaioi. Iemo afémaci dígadiaoí daínana cacádicue. Afémaci doscientos millones dígadiaoí.

17 Bie izóí éroide cabálluai nicaído ciona izóí ciódicue. Afe cabálluai emódomo ráuidino jogóbiaimo llojeco jitáoidiaíoi. Afe llojécuromo jáiare, mócore, borare cueda. Iaiói cabálluai ifo 'leon' daina jánallari ifona éroide. Afémaci fuémona irai izóí jino bite, íemo uíllie bite, íemo daje fuémona nairai iere uzire cóonaitalle raa jino bite.

18 Afe cabálluai fuémona bite daámami jacire táinocaitate ráamona aillo nairai fuite. Uafue, nana comínimona jarífenairai tíidiaíoi.

19 Daje izóí afe cabálluai óodamo jacire títaite ríino ite, mei afe ooda jaiona eróideza; ifóredeza. Afedo comínina ainízicana uite.

20 Mei íadi tíidinomona fiébidino, baie daámami jaciredemona tíñedino, íaiói finófireiga fiénidifuiái féitaacañediaíoi. Daje izóí fiénide jóriaímo caimátaitajana fáicanocaiñediaíoi, naa jáíforie finoca jánaraíana. Dáarie afe jánaraíai oro finoina, jáíie plata finoina, jáíie bronce finoina; íemo jáíie nofici finoina, íemo jáíie amena finoina. Nana bie jánaraíai jaca cióñede; daje izóí minícana cacáñede, íemo daje izóí macáñede.

21 Afe fiébidino jáíimaci méiniana fáicanocaiñediaíoi. Daje izóí jáíima fue gáiana fáicanocaiñediaíoi. Daje izóí íaiói jiruúrenana féitañediaíoi. Daje izóí íaiói merírifirenana féitañediaíoi.

10

Daa ángel dainámie Juziñamui abi ímie duera rabénico llíide

1 Afe méifodo riírede Juziñamui abi ímie monámona ana bíllana ciódicue. Afémie uíllie cígido bite; íemo afémie ifomo rózigüeo izoide jüina. Ie uíeco jitoma egáíñua izóí quenírede. Iemo ie ídai boode jáállirai izóí éroide.

2 Afémie daa duera rabénico tuiñoda llíide. Ie ídai nabezi monáillaimo bitade, íemo ie jarífezi éniemo bitade.

3 Iemo jánallari ficire írilla izóí ficire úrite. Afémie úrilla mei, mona siete dígacaiño giride; ie giría come úrilla izóí cácacaiide.

4 Afe siete dígacaiño mona giría llícailla mei, íaiói daina uailalai cúeiacadicue. Mei íadi cúeiacadicuemo monámona daa uai cuemo úrillana cacádicue; daide:
—Afe siete dígacaiño mona giría uailalai rabemo cueñeno iri; báiino comécimo o jóoneri, —daide.

5 Afe mei afe monáillaimo naidaide, éniemo naidaide Juziñamui abi ímie, ie onoi nabezi monamo zitáoide.

6 Afe llezica ziiñona íte Juziñamui mámezi llíinuano riire úrite. Afe dáaruido énie comútatímie mámezi, daje izóí monáillai comútatímie mámezi, íemo nana afénomo íte cáadinuiai comútatímie mámezi llíinota riire daide:
—Benómona jaca ja móziñoñelleza.

7 Jabe siete dígademoná firáimie Juziñamui abi ímie íe vudugoi fúunolliruímo dúcille llezica, Juziñamui jica ía comécido báiino mamécáfue, ñue ícoímo zaite. Daí Juziñamui íe uai jino llóraínimo jaíai uícodo llote. Afémaci daní íe ocúfirégano, —aquíe izóí daide.

8 Nauí monámona cue cacana uai nane meine cuemo úrite. Cuena daide:
—Afe éniemo monáillaimo naidáidímie ónoímo íte túide duera rabénico maí llíinuai, —daide.

9 Jira afe Juziñamui abi ímiemo afe duera rabénico jíacajidícué. Jicádicuemo afémie cuena daide:

—Llínota mai güi. Afe duera rabénico o fue mo cíiji naimérena izóí cácaite, mei íadi o jébemo erire cácaite, —daide.

¹⁰ Mei jira Juziñamui abi ímie ónoimona afe duera rabénico llínota güiticue. Güíticue mo cue fue mo cíiji izóí naimere cácaide. Mei íadi afe ja cue güilla méifodo cue jébemo erire cácaide.

¹¹ Afe mei cuena daidíaioi:

—Juziñamui daina aillo comini jófuiamo cómuítifuiái, meine daáno mo llóredioza. Daje izóí aillo náiraiaina Juziñamui daínana llóredioza. Iemo daje izóí jíáiforie úritinona Juziñamui daínana llóredioza. Iemo jíái aillo illáinina Juziñamui daínana llóredioza, —aquí izóí daidíaioi.

11

Uai nabáifrede íaillinoi

¹ Afe mei árrera rázina cuemo itíaioi. Afezi jofo facáradozina eroide. Afezi cuemo fécano cuena daidíaioi:

—Mai náidacaillano dama Juziñamui gairáco nie dinóride fácaji. Daje izóí Juziñamuimo caimátairano o fácaji nie dinóride. Afe llezica afénomo nieze afémiemo caimátáidimacina ite mai fácado.

² Mei íadi afeco jinófebiri facáñeno o iri; mei afeno jicánemacimo dúideza. Afémaci Jerusalén daina íaifuenide jófuenta cuarenta y dos diga fuído fieni anáfenoitíaioi.

³ Iemo cue dibénedo úrilla uai nabáifrede íaillinoína óreiticue; come zuure ia jitaca jítcuiro, jítaítaillinoi. Afe íaillinoi mil doscientos sesenta dígaruillaí cuedo úritíaiillinoi. (Afe mil doscientos sesenta dígarui, cuarenta y dos diga fiui.)

⁴ Bie cue uai nabáifrede íaillinoi ménade olivo amena izóidiaillinoi. Daje izóí afe íaillinoi bínie comúitate Juziñamui uícomo jóonega mena boode áillue lámpara izóidiaillinoi.

⁵ Dáamie íaillinoína fieni finóacaniadi, afe íaillinoi fuémona irai oréidiaillinoi, afe íaillinoi fáiacadínona náamiena cuaritallena. Nana íaillinoína fieni finóacadínona daí títaiteza.

⁶ Bie cue uai nabáifrede íaillinoimo monámo noçi bítañede ríino ite. Afe íaillinoi Juziñamui dibénedo úricaille dinó, nocina bítañeítaillinoi. Daje izóí jainoi díena ória ríino íaillinoimo ite. Iemo jíái comini duere fínoite nana jacírede duico comúitaja ríino afe íaillinoimo ite. Afe íaillinoi comeci óiacana dínoiri comínina duere finórediaillinoi.

⁷ Mei íadi afe íaillinoi táijina fuilla mei, iere jacire éroide caade rille afe fiénide jóriaí íbáirafomona jino bite. Jino billano afe íaillinoi diga fúirite. Fuirillano íaillinoína anáfenote. Anáfenua mei íaillinoína títaite.

⁸ Íaillinoi túlle mei, cai Ocuíraíma coráinanomo, níí afe Jerusalemo, afe áillue jofue cígi iomo, íaillinoi túide abi fiénocaigaiaillinoi. Afe jofue mámeçi, fieni íllana onótate uaido Sodoma daína. Daje izóí jíái Egipto daína.

⁹ Iemo daruíamani átuédo diga jófuiái nairai afe íaillinoi abi túillamo acáritíaioi. Iemo íaillinoi abina raitátañeítíaioi. Daje izóí dígazie íaillinoi abi bínamo acáritíaioi, naa jíáfodo úritínuaíri.

¹⁰ Bíniemo ite comini afe íaillinoi túllari iere íóbidiaíoi. Daje izóí caimare ítíaioi. Afe caimare íaioi íllamona conímamo ráaniaína raíñóñeno fécaítíaioi.

Mei afe íaillinoi Juziñamui dibénedo úricailla llezica, bimácina iere duere zefutatiailinoiza.

11 Mei íadi daruíamani átuedo jailla méifomo Juziñamui afe íaillinoina meine abido cáatate. Iemo meine abido íaillinoina macátate. Iemona íaillinoimo acáritino jamánomo jacínaitiaioi.

12 Afe mei afe uai nabáifirede íaillinoi monámona ficírede uaina cacade. Aféuai íaillinoina daide:

—Caifo bené bi, —daide.

Jira íaillinoina éoidino éroidemo, caifo mona uúlliedo monamo jáidiaillinoi.

13 Afe íaillinoi jailla llezica énie iere riire docaide. Afe riire docáillamona afe áillue jofue diez díganodemona dáagobe nana jáicoizite. Afemona siete mil comini tícoizitiaioi. Afemona fiébidino iere jacínaitiaioi. Jacínailllano monamo ite Juziñamuina caimátadiaioi.

14 Méifoide iere jácifue ja záide, mei íadi íraie bille ja rairedede.

Siete dígade vudugoi fúunotinomona ja íraimie fúunote

15 Siete dígade ángeles daínamaci Juziñamui abi ímiaimona íraimie ie vudugoi fúunote. Fúunua llezica, monámona diga ficire úrilla uail্লাi cácailla; daidiaioi:

—Nana bínie illaini illámaillano naa íaioi ocuicanuiairi ja dájena cai Juziñamuimo, íemo íe Crístomo jáináitaga.

Iemo afe Cristo jaca ninomo zíñona ócuifireite, —daidiaioi.

16 Iemona Juziñamui uícomo ráide veinticuatro dígade éicomini íaioi illaíma ráíiranomona ana bíjicaidiaioi. Uáfueza, afe úrilla llezica éniemo fueco diné bíjicaillano, Juziñamuina caimátaitadiaioi.

17 Iena daidiaioi:

Ona figura daídicaí.

Jamánomo ocuide Juziñamuidioza.

Birui ítimiedioza, íemo jaiái nanómona ítimiedioza, íemo jáí jaca ninomo zíñona íitimiedioza.

Figura ona daídicaí, mei o áillue ríino maíñódioza.

Máíñuano ja nane como ocuízaidioza.

18 Náiraiaí ícírinaizitiaioi, mei íadi íaioi duere o finólliruimo ja dúcizaide.

Daje izói tíidino iere riire o jicánolliruimo ja dúcizaide.

O dibénedo úrite o ocuífiriganomo íaioiena o mameca ñúfuiaina íaioimo fécaíto.

Daje izói o uaina ñue ínofirede ñue finócanomo íaioimo dúide ñúfuiaina fécaíto;

íemo daje izói o mámecina jífanodoíñeno ñue llínotinomomo íitio.

Uáfueza, jamánomoidimiemo,

daje izói jamáimiemo íaioimo dúide raana íaioimo ífiredio.

Daje izói bínie ñúemacina fiéniruitadino o táinocaitalliruimo ja dúcizaide.

Aquíe izói afe éicomini daidiaioi.

19 Iemona monamo ite Juziñamui gaíríraco tújicaide. Afénomo Juziñamui comini diga caímare úrira raa uáfori cíocaide. Afe úrira raa emodo órona ibaica caja. Afe eromo Juziñamui lloga uail্লাi éenotiaioi. Afe gaíríraco tújicailla llezica améuai riire llairide, íemo ficíriede ráaniaí cacaide; íemo mona ficire giride; íemo énie iere riire docaide; íemo iere maírde nocíjiaí cocide.

12

Ringo íemo jacírede zicínaimana eróidimie diga monamo cíocaide

¹ Afe mei monámona jacírede onótate raa cíocaide. Afénomo iníroido ferínua izói, jitómado ferínoga ringo cíoina. Afengo idai anamo fiui cíoina, íemo afengo ífomo doce dígade ucudu illácuífoi, illaíma jitáfíregacuífoi izoide jitáoi.

² Afe ringo úrue jocóacade izínaila. Afe iere izírenari caillícade; mei afengo úrue jéciaicana llezica iere duere zefuídeza.

³ Afe méifodo jíáie jacírede onótate raa monamo cíocaide. Afénomo áillue jíairede jacírede zicínaimana eróidimie cíocaila. Afémie siete diga ífórede. Iemo afémie diez diga zícáirede. Afe ífóciaímo illa dígacimo illaíma jitáracuífoi jíina. Daa ie mámeçi Taife.

⁴ Ie óodado monamo ite úcuaimona jarífecuduna aillo dánomo jainánote. Jainánuano afécuduaina ana éniemo dotade. Afe 'dragón' daina zicínaimana éroidimie, afe úrue jocóacade ringo uíecomo jóoneoide, afe ie jocóacaga úrue jócua llezica raíre ríllena.

⁵ Iemo afe ringo íza jocode. Afémie uire móonaia nana náiraiaina llojbíci izóidedo ríire ócuífreite. Afe úrue jócua méifodo Juzíñamui bairoca. Bairoda ie illáimana ráiiranomo uiga.

⁶ Afe llezica afe ringo táizicimo botade. Afe dinomo afengo retáirillino uícodo Juzíñamui finoca. Afénomo mil doscientos sesenta diga mona afengo ecáecaille.

⁷ Afe méifodo áillue fuiríacana caífo mona eromo comuide. Afénomo Juzíñamui abi imaci illaíma Miguel naa jíáie Juzíñamui abi imáciaíri afe dragón diga fuirídiaíoi. Daje izói afe dragón naa ie abi imáciaíri fuirídiaíoi,

⁸ mei íadi afémaci Miguel náiraina anáfenonidiaíoi. Iemona dragón imaci illino monamo íñede.

⁹ Afe ie illino íñena jira afe ríirede dragón monámona ja jino dotaca. Afe jaiái ninomo ite jaíao dainámie jíáífodo mameina Taife, íemo Satanás, íemo dáamie nana náiraina jífuefiredimie. Afémie naa ie abi imáçiri ana éniemo dotácaiaíoi.

¹⁰ Afe méifomo monámona ficírede uaina cacádícue. Afe uai daide:

—Cai Juzíñamui bínie comíni jíllóillena mámiaruímo ja dúcide. Daje izói íemo ite ríino facálliruímo ja dúcide. Iemo daje izói illáimana ie illíruímo ja dúcide. Daje izói ie jíto Cristo ríire ocuillíruímo ja dúcide. Mei cai ámatiaímo fiénidífue nitáfíredimie ja jino dotácaza. Afémie nágaruillai, mona naío diga cai Juzíñamui uíecori afémacimo fiénidífue nitáfírede.

¹¹ Cai ámatiaí Cordero díedo fiénidífueana anáfenodiaíoi. Daje izói íaíoi jino meáruíñeno lloga Juzíñamui uáillaído caífófecaídiaíoi, mei jaca tíllana jacíruíñediaíoi; mei jíáífodo jaca tíllemo ñue finóbídiaíoi.

¹² Iemona, mona naa afénomo ite cáadinuaíri mai omói íóbiri. Mei íadi éniemo itino níi dúerena, naa monáillaimo itínuaíri, mei Taife ómoímo ana iere icírrillano jáideza. Afémie nano íanori ie íllena onódeza.

¹³ Afe dragón ana éniemo ie dótajana onóillano, nauí íza jocódingo racade.

¹⁴ Mei íadi afe ringo mena áillue máajaiño íáicono iga, áfedo afe jaío dainámie dragómona jica táizicimo afengo féllena. Afénomo daámani fimona átuado afengo ecáecaiga.

15 Iemo jaio dainámie áillue jainoi ie fuémona orede, imánina comuállena, mei afe imánido afe ringo coróbaitallena.

16 Mei íadi énie ringona ríidote, mei afe dáaruido énie bóccaillano, afe dragón fuémona oreca imánina naitateza.

17-18 Afe bíemona afe dragón ringomo iere ríicaide. Ríicaillano aféngomona fiévide ie erófene ígímaiai diga fuirízaide. Afémaci Juzíñamui ocuica uaillai jeire otíaiói. Daje izói afémaci Jesucristo lloga ua ráfuenta fáicanocaiñeno nágarui jeire ófirediaíoi.

13

Mena áillue jacire eroide rille cíocaide

1 Monáillai fuédamo cue naidáillano monáillaimona iere jacire eroide rille caifo bíllana cíodicue. Afémie ifo siete dígade, daje izói afémie diez diga zícairede. Afe illa diga zícaimo illaíma jítaracuifoí jíina. Afémie ifóciaimo Juzíñamuina fieni dáina mámecei cúeina.

2 Afe cue ciona jacírede rille jánallarina eroide. Ie ídaiai oso ídáina eroína, íemo ie fue león fuena eroide. Bímiemo dragón íemo ite ríino naa ie illáimaillano diga afémiemo fecade. Afe llezica riire ocuífirenafue afémiemo lloga.

3 Afe jacírede rille ifóciaimona daaci titade áillue boáfena eroide illa. Mei íadi afe titáacade áillue boafe raire jacaide. Iemona nana énie náiraiai áferi iere jacínaitiaíoi. Jacínaitiaillano afémiemo ínotiaíoi.

4 Afémaci dragón uícomo éniemo fueco diné bíjicaillano íemo caimátaidiaíoi, mei dragón riire ocuille ríino afe jacírede ríllemo ígaza. Iemo daje llezica jacírede ríllemo caimátaidiaíoi. Caimátaillano daidíaíoi:

—¿Bu mei bie jacírede rille izoina? ¿Bu mei afémie diga fuirírena? ¡Afémie anáfenonide! —daidíaíoi.

5 Afe llezica afe jacírede rille afémie úrilla bu llétañega. Iemona Juzíñamuina íaire dáina uaina llote, naa fieni abi ínuafuiaíri. Afe izói cuarenta y dos diga fiui, daíi ie ocuilla buna ráiruifíega.

6 Iemona afémie bie izói finode; Juzíñamuina uáitano, ie mámeceina íaire daífoide. Daje izói Juzíñamuimo úriranona íaire daífoide. Iemo monamo ítínuaína daje izói íaire daífoide.

7 Iemo jíai daje izói Juzíñamuimo jaináidino diga ie fuirilla buna ráiruifíega. Daje izói afémaci ie anáfenolle buna ráiruifíega. Iemo nágazie ocuille ríino afémiemo fecaca. Daje izói nana comíni jófuiái ócuífireite, íemo daje izói nana jíáfodo úritinuiái ócuífireite, íemo daje izói nana náiraiaína ócuite.

8 Nana bíniemo ítino afe jacírede ríllemo caimátaidiaíoi. Afémaci mámeceiai zííñona ítino rabénicomo cúeñega. Ua énie taineina llezica baimaci mámeceiai afénicomo cúeñega, mei afémaci ínoñena jira. Afénico nauí titaca Cordero ie.

9 Bífueмо cacácadímie mai bíemo cácarei.

10 Jíaimacina maitá uitino méifodo nane maitá uille. Iemo jíai lloéfaido jíaimacina titáidino méifodo afémie daje izói lloéfaido titalle. Mei jira Juzíñamuimo jaináidino comécina járidonidiaíoi; daje izói jíai ñue ínorediaíoi.

¹¹ Afe méifodo jiáie jacire eroide rille éniemona caifo bíllana ciódicue. Afémiemo mena zicai ite; cordero zicaina eroide. Mei íadi afémie dragón úrilla izóí úrite.

¹² Nauí monáillaimona bite nanoide jacire éroide ríllemo ite riire ocuille ríino, daje izóí bie méifoidimiemo ite. Iemo nanoide jacírede rille uícori, bímie íemo ite ríino ácatate. Ie ríino ácata llezica afémie nana éniemo itínuiaí, nanoide jacírede rillemo caimátaillena ocuide. Afe nanóidimie ífomo ite áillue boafe raire jacáidimie.

¹³ Iemo afe méifoidimie daje izóí iere jácimie daiítate raana ciótate. Mei uafue, afémie nana comini eróicana monámona iraiici ana éniemo cocítate.

¹⁴ Iemo afe nanoide jacírede rille uícomo buna ráiruiféga ie finócaigado nana bíniemo itínuiaina jífuete. Afémacina jífuiano afe aillo bofédaite jacírede ríllena eroide jánaraina afémacina finótate. Afe bofédaite jacírede rille lloéfaido aillo bofeca, mei íadi nai caade.

¹⁵ Iemo afe méifoide jacírede ríllemo, afe jánarai cáatalle ríino íemo iga. Iemona afe jánaraina cáatano, afémie afe jánaraina úritade. Daje izóí nana afe jánaraimo camátaiñedinona afe jacírede rille jánarai íaiioina fatátate.

¹⁶ Nana afe baímo, nana náiraiaina bie izóí itátate; nana jabóidimaci naa jamánomoidimíai díga, nana ráaredino naa dúredino díga, nana ráiruifégano naa ráiruícano díga, íaioi onoi nabézimo daa onótate número jóonetade. Afe onótate número nabézimo jóoneñenia íaioi ozócimo jóonerede.

¹⁷ Naga afe onótate número na cúeñegamie jaca íbárinide, daje izóí raana fecánide. Afe número nanoide jacírede rille ie. Afe número afémiemo dúide mámece daiíacade.

¹⁸ Bífue onóillena iere báitajamo dúide. Afena onóidimie, mai afe jacire eroide rille número faca. Afémie número iima ie. Afe número seiscentos sesenta y seis.

14

144,000 dígado roga rua

¹ Afe méifomo Cordero Sión mameina idu emódomo naidáinana ciódicue. Afénomo afémie díga ciento cuarenta y cuatro mil comini naidáiede. Afémaci ozócimo Cordero mámece naa ie Moo mámece díga cúeina.

² Iemo monámona ficírede raana cacádicue. Afe ficirena aillo imánillai nofíco tua ficirena izoide. Jiáí riire mona giria ficirena izoide. Iemo jiáí aillo arpa dáina, rua roia taiga ráaniai ficirena izoide.

³ Afe llezica illaima ráirano uícomo afémaci comue rua rotíaioi. Daje izóí cuatro díga cáadimíai, íemo éicomini uícomo rotíaioi. Afe rúana jaca buna ónide. Dani afe ciento cuarenta y cuatro mil díga éniemona jíllode comini afe rúana onona.

⁴ Afe bimaci ringomo jíriñedino, mei afémaci jaca íaífuenidino; dani íaioi abi ráiruídíaioi. Daje izóí afémaci Cordéromo jaináitagamaci. Afémaci cominimona jíllotagamaci, Juzíñamuimo nanóidino ie dúidimacina íaioi íllena. Daje izóí Cordéromo nanoide dúidino itíaioi.

⁵ Afémaci jaca táinona úriñediaoi, mei afémaci Juzíñamui illáimana ráirano uícori íaífuenino itínoza.

Daámani ángeles daínámaci Juzíñamui abi ímitai llócaiga uai

⁶ Afe mei jáiae Juziñamui abi ímie mona dáafenedo féiana ciódicue. Afémiemo ziiñona jállolluui illa, bíniemo itinomo llóllena. Nana énie náiraiaimo llórede, íemo nana jáiaziemo. Daje izói nana jáífodo úritinomo llórede, íemo daje izói nana comini jófuiaido.

⁷ Afémie ficírede uaido daide:

—Juziñamuina ñue omoi jacírui; ñúefuiaina afémiemo omoi nitari, mei afémie iere riire jicánolliruiamo ja dúcidez. Mai mona finódimie, daje izói énie finódimie, íemo monáillai finódimie, íemo éniemona jainoi jino torano finódimie; afémiemo omoi caimátaifireiri, —daide.

⁸ Iemo nane jáiae Juziñamui abi ímie méifodo cíocaide; afémie daide:

—Ja jáicoizite, ja jáicoizite. Afe áillue Babilonia jofue jáicoizite. Mei aillo fiénide jiruífuiái izoide íaifuiái omoi finofirenado, nana náirai jífáidino izói itátatiomoiza, —daide.

⁹ Afe méifodo íiraie Juziñamui abi ímie ficire daíloicaide:

—Dáamie jacírede rillemo caimátaiaidi, íemo jái afe jánaraimo caimátaiaidi, íemo daje izói afe rille mámecei ozócimo ninena ónoimo cuetátaiaidi,

¹⁰ afe izóidino Juziñamui lloga jamánomo duere finóllinomo orélliaioi. Mei afe izóidinomo afémie iere ríicaide; ríicaillano afémie duere íaioi finolle, féiñellena riire íaioimo mamécaza. Iemo Juziñamui abi imaci uícomo, daje izói Cordero uícomo, iraido íaioina iere izi cácatalliaioi. Iemo daje izói náirai iere uzire cóonaitalle raado afe izóidinona iere izi cácatalliaioi.

¹¹ Duere íaioi zefuítate irai uíllie jaca ninomo llíicaiñeno caifo uíllíoide. Afe jacírede rillemo caimátaينو mona naio diga afe duere finóinamona jaca ócozinaiñeitiaioi. Afémaci naa afe ríllena eroide jánaraimo caimátaidinori, íemo jái ie mámeceina onótate número otino diga nana jaca ócozinaiñeitiaioi.

¹² Mei jira Juziñamuimo jainaide ie ocuica uaimo jíéruitino, naa Jesudo fáicanocaiñede jáidino diga, coméceina járidonidiaioi.

¹³ Nane afe méifomo monámona daa uai cuemo úrillana cacádícue; daide:

—Bie cúeiri: “Benómona cai Ocuíraimamo ínote títino caimare íitiaioi.” Afena Juziñamui Nuera Joreño “Jii” dáidez, mei afémaci íaioi tájinamona ocózinaitaioiza. Daje izói íaioi finócana, jáima diga nabáirilla izói féitañegaza, —daí daide.

Ria llizilla óina izói, énie comini jofu ollíruimo dúcide, Juziñamui duere íaioi finóllena

¹⁴ Afe mei eróillano úzerede mona ero uílliena ciódicue. Afe uíllie emódomo Nanoide íima Jitona Jesuna éroidimie ráiina. Ie ífomo oro finoina illaíma jítaracuífoi jíina. Daje izói hozna mámeceirede arroz izoide llízíe ñetara llíide. (Afe raa jofu icuífoina néfide jáirede lloefai izoide.)

¹⁵ Iemo nane jáiae Juziñamui abi ímie ie gairíracomona jino billa. Afémie ficírede uaido uíllie emódomo ráiidimiena daide:

—O llíiga llízíe ñetara raado táijiri. Ja jeede diga mai jofu ono. Ja jofu ollíruimo dúcidez. Enie comini finócafuiái ja jeede ríaniai izói fiénidífuenta iere oruídeza, —daide.

¹⁶ Afe mei uíllie emódomo ráiidimie ie llíiga llízíe ñetara raado énie comínimo táijizaide. Afedo fiénidífuenta oruídino jofu ote.

¹⁷ Afe mei jáiae Juziñamui abi ímie monamo íte Juziñamui gairíracomona jino bite. Daje izói afémie jáirede llízíe ñetara raa llíicabite.

18 Afe llezica jiáie Juziñamui abi ímie Juziñamuimo caimátairanomona jino bite. Afémiemo jobáitalle rínona ite. Iemo afémie, jáirede ñetara raa líidimiena ficire jírillano daide:

—Mai omo ite jáirede ñetara raado táijiri; éniemo ite jíricoillai ollíruimo ja dúcideza. (Afe jíricoillai fiénide comíni jana.) Mai jofo ono, mei afe jíricoillai ja iere jiduúdeza, —daide.

19 Iemo afe jiáie Juziñamui abi ímie, ie jáirede ñetara raado énie comínimo táijizaide. Afedo éniemo ite jeede jíricoillai izoide fiénidino jofo ote. Uano áillue iduíraco izóidino jofo dite, afénomo riire iduúllena. Bie iduilla Juziñamui bie izói duere afémacina finolle jana.

20 Afe jíricoillai izoide fiénidino áillue comíni jofue jinomo iduica. Afe iduíracomona aillo díena tote. Afórede imani izoide; áfeji caballo táia ie fue illa dinori afórede. Daje izói áfeji trescientos kilómetros dinó tote.

15

Íraie siete dígade jacírede duere finóllifuiái Juziñamui abi imaci mameca

1 Iemo monámoma jiáie jacínaitade áillue raa jánana ciódicue. Siete dígade Juziñamui abi imaci íraie siete dígade jacírede duere finóllifuiái lluáibitiaíoi. Afedo Juziñamui ríicaillana záaite.

2 Daje izói, vídriona finóinana eroide monáillajina ciódicue. Afeji réici diga taméricaide; daí eroide. Jacírede ríllena anáfenodino afe fuédamo naidáiediaíoi; daje izói ie jánaraina anáfenodino; íemo jiái afe ie número mámecina ozócimo cúeñegano diga. Nana dáanomo afe vídriona eroide monáillai fuédamo naidáiediaíoi. Nana bimaci Juziñamui íaíoi mo fecaca ‘arpa’ daina rua roia taiga raa líiediaíoi.

3 Afémaci Juziñamui jaiái ocuífregamie Moisés rua rotíaíoi. Daje izói jiái Cordero rua rotíaíoi. Aférua bie izói daide: Ocuíraíma, nana o finócanuiai iere ebriede. Jamánomo ríinorede Juziñamuídío.

Náiraiái Illaíma, nana o jáifirena io uáfueña jaícina jóide.

4 Ocuíraíma, ona ñue jáciruíñeitimiena íñede.

Daje izói omo ñúefueña jóoneñeitimiena íñede.

Mei dama o íaifuenidimienaza.

Naga náiraiái omo caimátazaíbitiaíoi, mei o jaícina finófiregafuiaína ciódiaíoi za.

Aquíe izói rotíaíoi.

5 Bie méfodo, monamo ite Juziñamui gairíraco tújicaillana ciódicue. Afeco nofíbicimo cueba Juziñamui ocuica uaillai éenorano.

6 Afécomona Juziñamui siete dígade abi imaci jino bite. Afémaci siete dígade jacírede duere finóllifuiái uite. Afémaci ráifide íáinide queníredicuiruai jítáoidiaíoi. Íaíoi llaitáoi ga oro finoína ciraigi ífe jogóbemo dúcide.

7 Ie mei cuatro dígade cáadimíaimona dáamie afe siete dígade Juziñamui abi imácimona illa dígamíemo oro finoína ichecoi fecade. Aféhecoi jaca ninomo zíiñona ite Juziñamui ocuica duere finóllifueña oruide.

8 Iemo afe Juziñamui gairíraco uúlliena oruide. Afe uúllie Juziñamui jamánomoidimiena illamona, daje izói ie iere ríinorenamona comuide. Afe

llezica afécomo buna jofo jáinide. Nai afe siete dígade Juzíñamui abi imaci siete dígade jacírede duere finóllifuiái záiñena llezica buna jofo afécomo jáinide.

16

Juzíñamui duere finóllifuena oruide ichécuai

¹ Afe mei Juzíñamui gairíracomona jino bite ficírede uaina cacádícue. Afe uai siete dígade Juzíñamui abi imácina daide:

—Juzíñamuimona bite siete dígade duere finuana oruídichecuai ana éniemo tótaji, —daide.

² Nanoide Juzíñamui abi ímie jaillano, afémiemo ite ichecoí ana éniemo totade. Afemona nana jacírede rille mámecina ciegánomo jacírede duico comuide. Afémacimo izírede jílotañede ñozagi izoide duico comuide, daje izóí afe rille jánaraimo caimátáifredinomo.

³ Iemo méifoide Juzíñamui abi ímie afémiemo itíchechoí monáillaimo totade. Tótamona afe monaillai jainoí tíidímie die izóí jaide. Iemona nana monáillaimo ite cáadinuiai tícoizite.

⁴ Iemo nane jáíie Juzíñamui abi ímie afémiemo itíchechoí imánillaímo, daje izóí éniemona jainoí jino toránuaímo totade. Iemona afeno jáinoillai díena jaide.

⁵ Afe mei jainoí fieni finótate Juzíñamui abi ímie dánana cacádícue; daide:

—Ocuíraíma, íaífuénide Juzíñamuidio. Bie izóí comini duere o finóllena iere comécina jaícina jóidímiedio.

⁶ Mei omo jaináidinona títano íaioí díena nauí totádiaoíza. Daje izóí o dibénedo úritino díena totádiaoíza. Iemo biruí afe íbana o afémacina díena jirótatio, mei daíí afémacimo dúideza.

⁷ Afe mei nane Juzíñamuimo caimátairanomona dámie dánana cacádícue; daide:

—Jíí, uáfueza, cai Ocuíraíma, o jamánomo riírede Juzíñamuidio. Uáfueña ñue jaícina iere riíre jicánotio, —daide.

⁸ Ie mei nane jáíie Juzíñamui abi ímie afémiemo itíchechoí jítómamo totade. Afemona afe jítoma comini cóonaitalle ríino iga.

⁹ Iemona nana comini jamánomo cóonaizítiaioí. Mei íadi íaioí comeci itífuaiña méidoñediaioí. Daje izóí Juzíñamuimo caimátáñediaioí. Mei jáífodo afe jacírede duere finóllifuiái ocudímiena faidófrediaioí.

¹⁰ Iemo nane jáíie Juzíñamui abi ímie afémiemo itíchechoí jacire eroide rille illáimana ráíranomo totade. Afe llezica afémie náamataga illano jítirecaide. Iemona nana comini afe uícodo íaioímo comuide dúícuai izírenari daní abi aínízítiaioí.

¹¹ Mei daíí itíaioí íadi, íaioí finoca fiénidífuai; fáicanocaiñediaioí. Mei jáífodo, izi íaioí cácana ícoínia, daje izóí jacire íaioí ñozánillaímona, monamo ite Juzíñamuina íaire daidíaioí.

¹² Iemo nane jáíie Juzíñamui abi ímie afémiemo itíchechoí áillue Eufrates mámecírede imánimo totade. Afemona afe imani zafénaite, áfedo illaini raire ruica bille io tuiñóllena. Aféllaini naa íaioí fuírírainíri jítoma caífo biránomona bitíaioí.

¹³ Afe mei dragón dainámie fuémoma, daje izói jacire eroide rille fuémoma, daje izói taino uai jino llófredimie fuémoma daámanide cúuraicina eroide fiénide jóriai jino bíllana ciódicue.

¹⁴ Afe daámanidino Taife jóriai. Afémaci ciórainina raana cíotafiredino. Bie damieámanidino nana énie illaini naa íaiói fuirírairi daánomo gairítaite, jamánomo ríinorede Juzíñamui diga fuiríllena. Aferui Juzíñamui aillo íba ollirui.

¹⁵ Aféruido monámona Cristo úrillana cacádicue; daide:

—Ero, cacai. Merízaibitímie billa izói, comini nai cuemo comécíñediaoimo déizaibitícué. Cue bille llezica iníñeno cuemo comeci facáoidimie camare íite. Daje izói emufroma mácañeillena iníroina ñue úiñotímie izói, íaifuemona abina ráiruitímie méairuíñeite, —daide.

¹⁶ Iemo afe daámanide fiénide jóriai, nana illáinina daánomo gairítate. Afeno mámeçi hebreo uaido daina Armagedón.

¹⁷ Iemo siete dígademona íraie Juzíñamui abi ímie afémie mo itíchecoçi caifo táifomo totade. Tota llezica monamo ite gairíracomona ficírede uai cácaçaide. Afe uai illaíma ráíranomona jino bite; daide:

—Ja fuite, —daide.

¹⁸ Afe méifodo, améuai llairilla. Mona gíría naa ficíriede ráaniai diga cácaçaide. Afe llezica énie iere riire docaide. Nanómona bíníemo comini ía docáífirena baímo, jamánomo riire docaide.

¹⁹ Iemona afe áillue comini jofue daámami dieze bójicaide. Jáíie bíníemo ite jofue jáicoízite. Afe llezica Juzíñamui áillue Babilonia jófue mo úibacaide, duere íaioina finóllena. Afe duere finóllí fue comini títaite rííjji jírúa izói íite. Afémie ríícaillano daí íaioina fínoite.

²⁰ Afe dáaruído nana monáillaji cigi íduai naa jáíie caifóneduairi niné táinocaide.

²¹ Afe llezica aillo jéerie nocíjiaína monámona comínimo cocide. Aféjiaimona dáarie cuarenta kilos méere de. Iemona afénomo ite comini afe áillue nocíjiaí cóciari Juzíñamuina íáire daídíaoi, mei afe bimaci duere fínua iere jamánomoídeza.

17

Jamánomo jirúredíngo duere finóinafue

¹ Afe méifomo siete dígachecoçi llíide Juzíñamui abi imácimona dáamie cuemo úrizaibite. Cuená daide:

—Erózaíbi. Jamánomo jirúrede izoide íaífuere dínngo duere finóinana omo ácatatícué. Afengo monáíllajillaímo ite. Afe bie izói daííacade aillo nairai afatengo anamo itíaoi.

² Bínie illaini afengo íaífuere namona jfáífredino izói íáire jáídíaoi, —daide.

³ Afe mei Juzíñamui Ñuera Joreño nicáirilla izói cuemo ácataja llezica, daa Juzíñamui abi ímie táizicimo cue uite. Afénomo daa ringo jáiare de jacire eroide rille emódomo ráiinana ciódicue. Afe rílle mo diga Juzíñamui íáire daina uallai cúeina. Afe rille siete diga ífócírede, daje izói afémie zicai diez dígade.

⁴ Afe ringo jítaoígacuiro jáiare de, íemo morádoma eroide. Afengo oro finoina íena ebire finóbide, íemo ráífide ñue finoca nofíciaina, íemo 'perla' daina zíriona

finóbide. Iemo afengo oro finoína ichecoí llíide. Aféchechoí íáirede raana oruide, íemo jíái afengo jiruírena llezica finoíca íaífuiaína oruide.

⁵ Afengo ozócimo cuetá jónega ónonide mámece illa. Afeci bie izóí daide: “Aillue Babilonia jofue, nana fiénidífuiaí jillaci, aféfuiaí ei dáina izóí mameide. Iemo nana bíniemo ite éoígafuiaí ei dáina izóí mameide.”

⁶ Iemo díga Juzíñamuimo jaináidino afe ringo ícoína fazícaiaíoi. Afémaci Jesús uai llócaína jira afengo titácaiaíoi. Iaiíoi fazícanori afengo, come jífaífirena izóí, iere íóbide. Afena cíoillano iere jacire fáigacaidíue.

⁷ Ie jira Juzíñamui abí ímie cuena daide:

—¿Mínícarí jacínaitío? Afe ringo ónonino daííacanafue jino omo onótaitíue. Daje izóí afengo uífirede jacírede rille maméinafuena omo onótaitíue. Afe rille ífo siete dígade, íemo diez díga zícairede.

⁸ Afe o ciona jacírede rille jaiái nino ítmíe, mei íadi ie tílla mei jae íñede. Mei íadi afémie íraicaíño ie tílle uícodo meine abído fiénide jóriai íbáiraíomona caífo bíite. Mei íadi billano zííñoa ie duere finóllinomo orele. Eníemo ite comínimona zííñoa ille rabéniçomo énie taineína llezica mámeceína cúeñegano, afe rillena cíoillano iere jacinaícaítaíoi, mei afémie jaiái íteza, íemo biruí jae íñedeza, íemo meine abído uire bíiteza.

⁹ Biruí cai uaina féiruíñedinomo nai benó jíáie lollífuena ite: Cácareí. Afe siete dígade ífóciaí baie ringo ráina siete dígade caífoneduai jana.

¹⁰ Iemo afe llezica afe siete dígade ífoci daje izóí siete dígade illainí jana. Afe siete dígade illáinimona cinco díga ja dotácaiaíoi. Afe mena fiébidemona daa nai illáimana ite. Iemo jíáimie nai illáimaizaíbíñede. Afémacimona íraíllaíma bíadi are íño tainocaite.

¹¹ Nauí caade íocírede rille, tíide íadi, nane biruí caade illaíma. Afémie siete dígademona afémaci emódoidillaíma. Mei íadi afémie siete dígademona dáamie. Afe mei afémie íraicaíño ie tíllinomo jáite.

¹² Afe o ciona diez dígade zícai, diez dígade nai illáina jáíñedino jana. Mei íadi jacírede rille díga dáaruído afémaci nano íanori dieze illainí ocuífirena ríino llínoítiaíoi.

¹³ Bie diez dígade illainí conímamo daje izóí coméciidiaíoi. Iemo íaíoimo ite ocuille ríno jacírede ríllemo fécaítaíoi.

¹⁴ Temona Cordero dáina Jesucristo díga fúirtiaíoi; mei íadi Cordero íaíoína anáfenoite. Mei afémie nana ocuídinomona Jamánomo Ocuídímieza. Daje izóí afémie nana illáinimona Jamánomoidillaímaza. Afémie díga jáicadino Juzíñamui nízedá jírigano. Daje izóí afémaci fáicanocaiñeno Juzíñamuimo ñue íinofiredino, —daíí afémie cuena daide.

¹⁵ Juzíñamui abí ímie nane dáanomó cuena daide:

—O ciona monáíllajíllai, níí afe íaífueredíngo illano, afe monáíllajíllai aillo jófuenai jana. Daje izóí aillo comíni jana, íemo jíáíforíe úritino jana, íemo aillo náiraíai jana.

¹⁶ Jacire eroide ríllemo o ciona zícaíniaí jíáie illáimaíai jana. Afémaci bie jiruíredíngona éoítiaíoi. Eoillano aféngona zóofeítiaíoi, íemo jíái aféngona emuírogi óreitíaiíoi. Afe mei afengo íeizina rítiaíoi. Iemo jíái aféngona iraimo cóonaitiaíoi.

¹⁷ Juziñamui comeci jítaina izói afe ringona duere íaioi finóllena ónonino íaioi comécimo úrite. Ie jira dájena comécidiaoí íaioimo ite jacire ocuille ríino jacírede ríllemo fecállena. Iemona afémie jamánomo ríirede. Daií Juziñamui daina uáillaina fuillíruimo dúcia llezica finófirediaoí. Iemona afémie daina uaina ñue ícoímo záitatiaoí.

¹⁸ Afe nauí o ciona jiruúredingo, nana énie jamánomo ocuífiredillaima illágohe jana, —aquíe izói daide.

18

Babilonia jofue táinoicailla

¹ Bie méifodo monámona jíaie ángel dainámie, Juziñamui abi ímie ana bíllana ciódicue. Afémie aillo ríino diga bite. Afe llezica ie quenire bóodedo bínie egáñote.

² Afe llezica afémie ficire úrite; daide:

—Aillue Babilonia jofue ja jáicoizite, ja táinoicaide. Taife ocuífirregano illánona jaide. Daje izói nana jíáiforiede íáirede joríaí uññoracona jaide. Afe izói nana íáire féedino jilláillinona jaide, naa jíaí cai éoiga féedinuiaíri.

³ Mei aillo fiénide íaifuaí afengo finófirenado, nana nairaí jifáidino izói itíaoíza. Iemo naga énie illaini afengo diga aillo jiruífue izoide íaifuaína finófirediaoí. Biniemo ráaniaí fecáfiredino iere úcubereditona jáidiaí. Mei uafue, afe áillue jofue comíni izire jicaca táinomo faitátate ráaniaí íaioi jicáfirenmona bimaci aillo úcubenaídiaí.

⁴ Afe mei monámona jíaie uaina cacádicue; daide:

—Omoí cúeiediomoiíza bie jófuemona oní omoí jai; íaioi finoca fiénidífue afémaci finua izói omoí finoñelleza. Daje izói íaioimo zúite jacíredífuaí ómoímo jíiriñelleza.

⁵ Mei afémacimo ite fiénidífuaí ofilla ja monamo dúcidez. Iaioi finoca fiénidífuaímo Juziñamui ja uibicaideza.

⁶ Iemo Juziñamuina daide:

—Jíaimacimo íaioi feca izói, afe izói íaioímo fecari. Iaioí fienu finua izói, afe baímo ménacaiño afémacimo finori. Afémaci ññuemacimo eríredena jóoneta jirota izói duere íaioína finódiaoí. Afe íaioí finua izói, afe íbana ménacaiño afémacimo ríire duere íaioína finori.

⁷ Aillo táinodo abi íaioí ínuua dieze, íemo cómena canóñedemo fáífífirrena dieze, áfeze afémacina duere finori; afe izói íaioína duere zefuítari. Mei bie ringo izoide jofue comíni afengo ie comécido daiífirrediza: “Benomo illáingona ráiidicue. Jaca fécinaiñeíticue; jaca dúeníticue,” —afengo daide.

⁸ Ie jira bie izói úrillamona, dáaruído omo dúide jacíredífuaí cómuíte: tília íemo duere zefuilla, íemo júbie. Iemo iraimo cóonaitío. Mei o duere finótate Juziñamui jamánomo rínoredeza. Afémie jaca cai Ocuíraíma.

⁹ Afengo diga jiruúrede bínie illáicomíni, daje izói afengo diga cómena canóñedemo fáífidino aféngori iere éenaitiaoí. Mei uafue, afengo cóonaila uílliena cióillamona aféngori cáillicaiíli éeítiaoí.

¹⁰ Afengo iere duere finóinari jacínaillamona oní jica íítiaoí. Afemona dáítiaoí:

—¡Aíí, ñí o dúerena! Jamánomo ríirede Babilonia jófuedio, ¡ñí duere o zefuilla! ¡Mei raíre dáaruído o duere finoína comuíbicaide! —dáítiaoí.

11 Bínie ráaniai fecáfiredino aféngori cáillicailli éenaitiaioi, mei ja íaioi atica ráaie íbaitino íñede.

12 Íaioi atífirrega ráaniai, be ñíe: Oro, plata, ráifide nofciaí, ‘perla’ daina ráifide zírío, ráifide úzecuiro, íemo jáirede ‘sédacuiro,’ morádoná eroide seda díga, íemo jáí díga jáífodo zióriede aménaiaí, íemo ebírede ‘marfil’ daina elefante zicaí finoína ráifide raana, íemo ráifide amena finoína raa, íemo ‘bronce’ daina borárede lloébici finoína raa, íemo jámai lloébici finoína raa, íemo ‘marmol’ daina nofici finoína raa,

13 daje izóí ‘canela’ daina güíllemo faíga raa, íemo jáíforie ráifide ziórede raa, íemo ziórede uguci, íemo ‘mira’ daina ziórede raa, íemo come abí jilláiraniaí, íemo ‘vino’ daina jirórají, íemo cáiredíjí, íemo ñuera pan finófiréna harína, íemo trigo, íemo daje izóí abífiredé cáadino, íemo ovéjaiaí, íemo cabálluaí, íemo ‘carros’ daina arínellaiaí, daje izóí jacire rairuica comínina fecádiaioi. Bie izóí daina cáadino íima ringo díga jáímacimo fecádiaioi riire íaioi ocuüllena.

14 Afe jofue comínina dáíitiaioi:

—¡Baie omoi gaíga caímárede amena llizillaniaí izoide ráaie jae íñede. Nana omoi ofítağa ebíriede ráaniaí ja táinocaide! —dáíitiaioi.

15 Afe ráaniaí fécağano íba úcube ófiredino bie áíllue jofue comínimona otíaioi. Uano aillo úcuberediaioi. Mei íadi aféruído afe jofue iere duere finóinari jacínaíllamona oní jica ítiaioi. Afénomona aféngori cáillicailli éeítiaioi.

16 Íemo dáíitiaioi:

—¡Aíí. Aíllue jófuedío ñí dúerena! Nauí ñuera ráifide úzecuiro jítađingo izóidío. Daje izóí o comíní jáirede ráifide íniroi, íemo morádoná eroide ráifide íniroi jítafirediaioi. Afe ílezağa oro íena finóritiaioi; daje izóí ráifide nofici finoína raana finóritiaioi, íemo jáí ‘perla’ daina zíriona jítafirediaioi.

17 Íemo dáaruido naado aillo ráaniaí ñiné táinocaide.

Daje izóí nana ‘barco’ daina áíllue nocáe ocuídíllainí, naa afécaedo jáidino díga, afena jacíruíllano oní jícarie ítiaioi; daje izóí afécaedo tájídínori naa jáífodo monáíllajimo tájide comíniri oní jícarie ítiaioi.

18 Íemo afe jofue bóua úílliana cíóíllano caíllídiaioi:

—Bie izoide nauí áíllue jófuena, ¿Ñinomo cíoiticaí? Bie izoide jofue jaca íñeíte, —daídíaioi.

19 Íere zúucaíllano íaioi ífomo énie júdaídiaioi. Daíí ñiano cáillicailli éediaioi. Daídíaioi:

—¡Aíí! ¡Aíllue jofue ñí dúerena! Nana monáíllajido ráaniaí fecáfiredino afe ráaniaí o comíní úamona afémaci aillo úcuberediaioi. ¡Mei íadi dáaruido afe áíllue comíní jofue ja ñiné táinocaílla! —daídíaioi.

20 Afe mei afena cíóđímie daide:

—Monamo ítínuiaí, mai afe áíllue jofue táinocaíllari omoi íóbiri. Uáfueza, Je-sucristo orécano, naa Juzíñamuí díbénedo úritínori mai íóbiri, naa Juzíñamuimo jáináidino díga. Mei Juzíñamuí afengo ñiné táinocaitajado, omoi duere zefultaja ñue jácina íba ote, —daide.

21 Afe mei rírede Juzíñamuí abí ímie áíllue nofici caífo raiñode. Afeci áíllue ‘molina’ daina trigo llaira mérede nofici finoína eroide. Caífo ráíñuano afécina monáíllajimo dotade. Dótajano daide:

—Afe bie izóí áíllue Babilonia jofue ana cáicoizíte, íemona jaca ñinomo meine cíóñeílle.

²² Benómona jaca o cigido joide iomo ‘arpa’ daina rua roia taiga raa rúaniaina meine cácaiñeille. Daje izói totúbacui uai naa bainada uai diga ja meine cácaiñeille. Afe izói nana jáiforie táijiana baitádinomona buna fíebiñena. Iemo daje izói dobérilla ficirena izói ‘molina’ daina nofici uaina cácaiñeille.

²³ Afe daje llezica o jófuiái eromo bóofirede mechera izói boode ráaniai abido bóofeite. Iemo aféruimo áirena llezica iráizie caimare ficirerie íaioi úrilla uáillaina meine jaca cácaiñeille. Mei nauí omo ite ráaniai fecáfiredino bínie comínimona jamánomoidiaioi íadi, ja birui afe caimárede uaillai cácaiñeille. Nauí aféruimo aima bífuefirena uai izóidedo náiraiaina jífuefiredio; mei íadi afe jífuefirena ona nabáñede.

²⁴ Mei uafue, afe o jofue cigimo Juzíñamui dibénedo úrifiredino díena ciona. Daje izói Juzíñamuimo jaináidino naa jáie bíniemo fagano díena aféno ciona. Afe ciona die, afe jofue comini jáíimaci títaja ícoinia daí illa jana, — daide.

19

¹ Afe bie méifomo monamo ite aillo comini ficirede uáillaina cacádicue. Daidíaioi:

¡Aleluya! Cai jíllonano cai Juzíñamuimo dúide.

Daje izói iere ebíredifue afémiemo mamérede, íemo naa ñuera ríino diga.

² Mei afémie ñue jáicina ua uaido iere riire jícanofiredeza.

Afe iere jiruíredingona afémie riire duere finótateza.

Afengo iere ie jiruínado énie comínina íáire finode.

Juzíñamuimo táijitagano tilla iba aféngomo oga, daidíaioi.

³ Nane dáanomo daidíaioi:

—¡Aleluya! mei afengo jobailla uillie jaca ninomo llícañeno uillíoite, — daidíaioi.

⁴ Afe llezica veinticuatro dígade écomini, íemo jáí cuatro diga cáadimiiai diga, ana éniemo bíjicaillano, Juzíñamuimo caimátaidiaioi. Illaíma ráirranomo ráiide Juzíñamuimo caimátaillano daidíaioi:

—¡Daiítadezal ¡Aleluya! —daidíaioi.

⁵ Nane afe mei illaíma ráirranomona jáie uaina cacádicue; aféuai daide:

—Cai Juzíñamuimo nana afémie ocuícano afémiemo ñúfuiái omoi mameri.

Daje izói íena caimare jacíruintino, illáicomini naa jiba comíniri, ñúfuiái afémiemo jónefireiri.

Cordero daina Cristo áirena rafue

⁶ Nane daje izói aillo comini uaillai izóidena cacádicue. Afe uaillai aillo imánillai ficirena izói ficirede, íemo jáí afe uaillai ficire mona gría ficirena izói ficirede. Afe uaillai daide:

¡Aleluya! Jamánomo riirede cai ocuide Juzíñamui nane meine como ócuite.

⁷ Mai cai íobilli; daje izói iere caimare cai illi.

Afémiemo ebíredifue cai mamelli.

Mei Cordero áirena izóidiruimo ja dúcidez.

Afémie ai izóidinona jáitino ja ñue finóbidaioi. Afémaci Crístomo ua ínotimaci.

⁸ Ráífide úzecuirona jítarediaioi.

Mei uafue, íáinino quenérediroi Juzíñamui afémacina jíátaga.

Mei afe ñuera ráifide úzecuiro Juziñamuimo jaináidino comécina jaícina jóoina jánaza.

⁹ Iemo Juziñamui abi ímie cuena daide:

—Mai cúeiri: Cordero áirena ráfuemo uáidogano ja caimare itíai, —daide.

Nane cuena daide:

—Bíuai Juziñamui lloga ua uai, —daide.

¹⁰ Temona afe Juziñamui abi ímiemo cue caimátailena ie anamo dújudicue. Mei íadi afémie cuena daide:

—Cuemo daí íñeno, mei o izói cue Juziñamui ocuícamiedicueza. Jíi, Jesús llócaiga ua uaimo féitañeno íinote o ámatiai izóidicue. ¡Cuemo caimátañeno; Juziñamuimo cáimatai! —daide.

Mei afe Jesús llócaiga ua uai, Juziñamui dibénedo lloga uailai jino llotino comeci úritade.

Uzerede cabállomo ráicaidimie

¹¹ Nane afe méfomo mona tuñuana ciódicue. Afénomo úzerede caballo cíocaide. Afe emódomo ráicaidimie mámecei “Fiel” íemo jíai “Verdadero” dainámie. Mei afémie ñue jaícina illáfuedo ocuúdeza; daje izói áfedo fiénidino díga fuirítateza.

¹² Te ui irai bóua izói quiere cíoide. Ie ífócimo díga illaíma jítaracuífoi jítáoide. Daje izói afénomo dama ie onoga mámecei cúeina.

¹³ Afémie jítacacuíro díemo mutácaroi. Afémie mámecei Juziñamui Uai.

¹⁴ Afe llezica nana monamo ite Juziñamui ocuica fuirídino afémie óodana jáidíai. Afémaci ráifide úzecuiro jítáoidíai. Aferoi jaca íáinide. Baie nana afémiedo jáidino úzerede cabállomo ráicaidíai.

¹⁵ Afémaci ífódimie fuémoma jáirede lloefai jino bite, áfedo nana nairai boféllena. Afe llezica afémie lloébici izóidedo náiraíaina ócuite. Vino finócanomo úvaii iduúllena riire záizia izói, afe izói afémie afémacimo iere riire jicánoite. Iemo jamánomo ríinorede Juziñamui ráicaillamona cómuite iere duere finóillífue, vino jirótaja izói afémacina duere finótaiteza.

¹⁶ Te ínucuíro emódomo jítacacuíromomo cuela mámecei illa. Daje izói ie riázimomo cuela. Afeci daide: “Nana illáinimona Jamánomoidillaíma,” íemo jíai “Nana Ocuídinomona Jamánomo Ocuídímie.” Afémie níi cai Ocuíraíma Cristo.

¹⁷ Afe mei Juziñamui abi ímie jítoma riire egáíñuanomomo naidáinana ciódicue. Afémie nana mona erodo féedinuiai ficire jíríte; daide:

—Juziñamui finoca áillue güille nana dáanomomo omói riáibi,

¹⁸ mei benomomo illáini íeizi ríitiomoi, naa fuiríraíni illáicomíni íeizi díga. Dáanomomo íocirede fuirífredino íeizi ríitiomoi, naa caballo íeizi díga. Daje izói afe emódodo ráicaidino íeizi ríitiomoi. Iemo nana fiébidino íeizi ríitiomoi. Buna ráiruñegano, daje izói jacire ráiruícano, íemo jíai jamáimaci íeizi, naa jamánomoidímaci díga daje izói ríitiomoi, —daide.

¹⁹ Afe mei afe jacire eroide ríllena ciódicue naa bínie illáicomíni naa íai. Daje fuiríraíni díga. Nana bimaci fuiríllena dáanomomo ofidíai. Afémaci afe úzerede cabállomo ráicaidímie díga fuirízaíbitíai. Afémie “Juziñamui Uai” dainámie. Daje izói afémie canode fuiríraíni díga fuiríllena maméritíai.

²⁰ Afe mei afe jacirede rílle, táino uai jino llócaidímie díga ja llaveca. Afe táino uai jino llotímie, jacirede rílle eróicana, jacínaitade cíórainina raa cíótate. Aféfuaiido afe táino uai jino llotímie, nana afe jacirede rílle mámeceina

cuetátaganona jífuate. Daje izói afe jacírede rille jánaraimo caimátaidinona afémie jífuate. Iemona ‘monstruo’ daina jacire eroide rille, daje izói taino uai jino llotímie, cáanori dáanomo duere finolle jorai izoide bóodiimo dotácaiaillinoi. Afe jorai izoide duere finóllino iere uzire boode.

²¹ Nana afemona fiébidino úzerede cabállomo ráicaidímie fuémona bite lloéfaido titácaiaioi. Iemona nana féedinuia; bie titácano riáibillano íaioi; íeiziri jéirediaioi.

20

Mil diga fimona dino comini caimare itiaioi

¹ Bifue méifomo ángel dainámie Juzíñamui abi ímie monámona ana bíllana ciódicue. Afémie afe fiénide jóríai íbáirafo zuitara llave naa áillue llójeo diga llíicabite.

² Afe bie Juzíñamui abi ímie ‘dragón’ daina jáaira áillue jaio lláitano anáfenode. Afe jaio jááfodo mameina Taife, dáamie Satanás. Anáfenuano afémiena mil diga fimona llaveca.

³ Ana fiénide jóríai íbáirafo mo óriano íena llavede. Lláviano afe nazemo ‘sello’ daina “buna zuitánide” daide raa jóonete. Daií finoca náiraiaina mil diga fimona dinori jífueñeilla. Afe mil diga fimona jaille méifomo, afémie nano íanori zuitalle.

⁴ Afe mei illaini ráiiranuaina ciódicue. Afénomo ráiiedino iere riire jicánolle ríinona igáiaioi. Afe dáaruido ífóciaina jáicoicano coméciaina ciódicue. Afémaci Jesús jáicina lloga Juzíñamui uai íaioi llócailla ícoina ífócina jaitácaiaioi. Afémaci afe jacire eroide ríllemo caimátaíñediaioi; daje izói afe jánaraimo caimátaíñediaioi. Daje izói afémaci ozócimo ie mámece cuetátaíñediaioi, íemo daje izói íaioi ónoimo. Afémaci abi meine abido cáaillano mil fimona dino Cristo diga illáimaitiaioi.

⁵ Afe bie meine abido cáadino, nanóidino meine cáailliruimo abido cáaitiaioi, jae cai daina Cristo diga illáimailla. (Mei íadi jíáie tíidino mil diga fimona záíñena dino meine abido cáaiñeitiaioi.)

⁶ Nana afe nanoide cáailliruimo meine abido cáaitino caimare itiaioi. Daje izói afémaci Juzíñamui ñue finócano. Afe meífoide tiille afémacimo jaca jíriñeite. Mei íadi afémaci comíndo Juzíñamuimo úrifireitina itiaioi; daje izói Cristo íeiena zíñona itiaioi. Iemona mil fimona dino afe Cristo diga illáimaitiaioi.

⁷ Afe mil diga fimona záilla méifomo, Taife ie llavéinafomona zuitalle.

⁸ Jáillano nana énie náiraiaina jífueite. Aféruído “Gogna” mámeceirede náiraia jífuaite, “Magog” daina náiraia diga. Afe náiraiaí fúiritinuiaina Taife dáanomo jofu óite, íraicaíño fuiríllena. Afémaci monáillajimo ite guamai dígadeza facádonidiaioi.

⁹ Afemona énie nániena afémaci iere orúbicaite. Iemona Juzíñamuimo jaináidino illánona nágafene fállena cirínotiaioi. Afe illano Juzíñamui izíruiga Jerusalén daina jofue; áfena cirínotiaioi. Mei íadi Juzíñamui monámona irai afémacimo orede. Afe íraido fiébiñeno cóonaitiaioi.

¹⁰ Afe llezica afémaci jífueoicaide Taife boode jóraimo dotaca. Afe jorai iere uzire boode. Afe dáanomo jacire eroide rille, íemo jíái taino uai jino llócaidímie nau dotaca. Afénomo mona naio diga jaca ninomo zíñona iere duere finócaiaioi.

Allue úzerede ráiirano illaíma ie, íemo afe uícomo iere riire jicánollino cioina

¹¹ Afe méifodo áillue úzerede ráiirano illaíma íena ciódicue. Iemo afénomo ráiidimiena ciódicue. Afémie uícomona nana énie mona diga niné cióbicaíñena. Afe mona énie diga illino jae íñede; jae niné táinocaidiaíoi.

¹² Daje llezica Juziñamui uícomo nauí Juziñamuimo íñoñeno tíidino naidáienana ciódicue. Afeno jamánomoidinori naa jamáimaciri dáanomo naidáiediaíoi. Afe llezica comini finócafuiái cuiánicuai túide. Daje izóí afénomo jíáie zíiñona íitino mámecei cuiánico túide. Bie tíidino íaíoi finócafuiái íllaze riire jicánogaiaíoi, mei afe íaíoi finócafuiái cuiánicomo cúeina dieze riire jicánogaiaíoi.

¹³ Afe llezica monáillajimo báíide tíidino meine abido Juziñamui uícomo caífo náidacaitagaiaíoi. Daje izóí nana jíáíforie tíidinuaí íaíoi tíillanomona meine abido Juziñamui uícomo caífo náidacaitagaiaíoi. Afe nana náidacaitagano íaíoi finócafuiái íllaze afémacimo riire jicánogaiaíoi.

¹⁴ Afe mei 'muerte' daina comini tíillafue boode jóraimo dotaca, ie mei niné táinocaide. Daje izóí dáanomo nauí tíidino íbáinaco afénomo dotaca. Dotaca mei niné táinocaide. Afe bie boode jorai, íiraie tíillana mameide.

¹⁵ Iemo afe zíiñona íitino mámecei cuiánicomo mámeceina cúeñegano afe boode jóraimo dotácaiaíoi.

21

Comue mona comue énie diga

¹ Afe méifodo comue mona, comue énie diga ciódicue. Mei nanoide mona nanoide énie diga ja niné cióbicaíñenaza. Daje llezica monaíllai jae íñede.

² Afe llezica comue Jerusalén daina íaífuenide jofue, Juziñamui uícomona monámona ana bíllana ciódicue. Afena ciódimiedicue, Júaadícue. Afe jofue, óllena jicánoga ringo ebire finóbina izóí ebire cíoide.

³ Iemo monámona ficire dánana cacádicue. Afe uai daide:

—Ero, comini cigiri birui Juziñamui illa. Afémaci diga ífireite, íemo afémaci afémie comínina íitiaíoi. Ja birui dama afémie afémaci cigiri íite, afémaci Juziñamuina íe íllena.

⁴ Juziñamui afémaci ui jémene zafénaitaite. Aféruimo tíille íñeite. Daje izóí eia íñeite, íemo jíáí duere zefuállamona eia íñeite. Daje izóí comini abi izíirena íñeite, mei jaiái íitífuiaí jae záaideza.

⁵ Iemo illaíma ráiiranomo ráiidimie cuena daide:

—Ero. Nana cómuena méidotícue.

Iemo nane daide:

—Bie uai íere ua uaiza, mai cúeiri. Daje izóí bie uai íere ínofiregaza, —daide.

⁶ Nane afe mei cuena daide:

—Ja ñue ícoímo finócaza. Cue bie naga ráfuiaína nai cómuíñenia uícodo íitímiedicue. Daje izóí dáamiedicue fuíllínomo íitímiedicue. Abecedario A-mona táinia izóidimiedicue. Daje izóí abecedario Z-mo fuizajilla izóidimiedicue. Jáinoína jiróacadimie ñúejina jirótaja izóí, afe izóí ñúefuiaí díbéne mo íacadimíemo raíñoñeno afémíemo zíiñona ílláfueña ífireíticue.

⁷ Fiénidena anáfenodimie nana bíena feci raa ía máííua izóí, máííoiite. Afe llezica afémie Juziñamuitícue, íemo daje llezica afémie cue jíitóite.

⁸ Mei íadí nana íñoñedino díbéfodo duere zefuille afémacimo dúide. Uáfueza, ñúefueña jacírúitino daje izóí íñoñedino, íemo jíáimana éoidino, íemo jíáimana

titádino, íemo jiái jiruífuenta finófredino, íemo jiáima fue gáiana fibídino, íemo jiái jánaraimo caimáaidino, íemo nana táinona úritino; nana bie izóidino boode jóraimo dotárediaioi. Afe jorai iere uzire boode. Afe bie boode jorai íiraie tíllana mameide, mei afénomo dotácano jaca ninomo Juzíñamuimona oni eneno duere finócanona íitiaioiza.

Comue Jerusalén

⁹ Afe mei siete dígade ángeles dainámaci Juzíñamui abi imácimona daa cuemo úrizaibite. Afémie nauí Juzíñamui ocuica siete dígade íiraie jacírede duere finuana oruide ichecoí uitímie. Afémie cuena daide:

—Ero, Cordero ai izóidena jáitinona o ácataticue, —daide.

¹⁰ Iemo Juzíñamui Ñuera Joreño bie izóidena nicaí anado cuena cíotote. Afe Juzíñamui abi ímie áillue caifónedumo cue uite. Afénomo monámoma Juzíñamui uícomona ana bite jamánomo ñuera Jerusalén jofue cuemo ácatate.

¹¹ Juzíñamui abi ebire quenírena izóí afe jofue quenírie cíoide. Daje izóí iere ráifide nofící quenírena izóí queníriede. ‘Jaspe’ daina nofící vidrio enéfecomo cíoina izóí cíoide.

¹² Afe jofue jinófenedo nágafene áillue cirínuaibairo raa ite. Afe cirínogamo doce dígaze naze ite. Iemo illa díga nazemo Juzíñamui abi ímie naidaina. Iemo afe náziaimo doce dígade Israel nairai mámeciai cúeina.

¹³ Afe jofue náziaimona, fuirífenemo dazeámani ite. Iemo jiáie dazeámani onífenemo ite; íemo jiáie dazeámani féifenemo ite; íemo jiáie dazeámani afáifenemo ite.

¹⁴ Afe jofue jinófene cirínua anamo nofící finoina mozíoidibani doce dígade. Illa dígabanimó Cordero nágagobiaimo orécano ‘apóstoles’ dainámaci mámeciai cúeina.

¹⁵ Afe cue díga úrite Juzíñamui abi ímie, oro finoina facáradozi llíide, afe jofue facállena. Daje izóí ie náziai facállena, íemo jiái afe jinófene cirínua facállena.

¹⁶ Afe jofue fueda nagaámariede; nágafene daje dinóriede. Ie árrera díbene daje dinóriede; íemo ie ruica díbene daje dinóriede. Afe Juzíñamui abi ímie ie llíiga radózido jofue facade. Facádemo dos mil doscientos kilómetros árrera. Daje izóí ruica diné eróicana dos mil doscientos kilómetros. Iemo caifo diné eróicana jiái daje izóí dos mil doscientos kilómetros. Nágafeniai daje dinóriede.

¹⁷ Afe mei jinófene cirínuaibani facade. Facádemo sesenta y cuatro metros caifo ite. Afena Juzíñamui abi ímie come facáfírena izóí facade.

¹⁸ Afe jinófene cirínuaibani ‘jaspe’ daina nofící finoina. Afe jofue íáinide oro niina. Ñue enéfecomo cíoide vídriona eroide.

¹⁹ Jinófene cirínua anamo mozíoidibanillai nana jiáiforiede ráifide nofíciaido ebire ñue finoca. Nanóidibani ‘jaspe’ daina nofícído ebire ñue finoca, íemo jiáibani ‘zafiro’ daina nofícído ebire ñue finoca, íemo jiáibani ‘ágata’ daina nofícído ebire ñue finoca, íemo jiáibani ‘esmeralda’ daina nofícído ebire ñue finoca,

²⁰ íemo jiáibani ‘ónice’ daina nofícído ebire ñue finoca, íemo jiáibani ‘cornalina’ daina nofícído ebire ñue finoca, íemo jiáibani ‘crisólito’ daina nofícído ebire ñue finoca, íemo jiáibani ‘berilo’ daina nofícído ebire ñue finoca, íemo jiáibani ‘topacio’ daina nofícído ebire ñue finoca, íemo jiáibani ‘crisoprasa’

daina nofícido ebire ñue finoca, íemo jiáibani 'jacinto' daina nofícido ebire ñue finoca, íemo jiáibani 'amatista' daina nofícido ebire ñue finoca.

²¹ Afe doce dígade naze ibáirabici áillue perla. Illa dígaze daa perla ie finoina. Afe jofue cígido joide áillue macárao íainide oro finoina. Afe macárao enéfeomo ñue cioide vídriona eroide.

²² Afe jofue eromo Juzíñamuimo gairíraco jaca ninó daa cíofnedicue; mei jamánomo riinorede Juzíñamuimo ebena nágafenaiño caimátaidiaioiza. Afémiena jiáfodo daina cai Ocuíraima. (Afe jofue gairíraco Juzíñamui abiza. Daje izói jiái Cordero abiza.)

²³ Afe jofue jítomado egáñuamo dúñede; daje izói fiuido egáñonide. Mei afe jofue Juzíñamui abimo ite ebírede quenírededo egáñogaza. Daje izói jiái Juzíñamui Cordero afe jofue egáñogaza.

²⁴ Nana jíllotaga nairai afe jofue egáñuado mácaitiaioi. Bínie nairai illaini afe jófuego íaioimo ite aillo ebíriede illaíma daiíllena ráaniaina átíitiaioi. Atiano Juzíñamuimo, íemo jiái Crísto mo izájitiaioi. Daje llezica afe jofue ocuídímie íaillinoímo aillo ñúefuena mámeitiaioi.

²⁵ Afe jofue naze jaca monari íbaiñelle. Iemo afénomo jaca mona náuiñeite. Jira náziai íbáíllirui íñeite.

²⁶ Enie náiraiaí íaioimo ite ebíriede ráaniaina afénomo átíitiaioi. Daje izói afénomo aillo ñúefuaí mámeitiaioi.

²⁷ Mei íadi comécina íáiredino jaca afénomo jofu jáinide. Daje izói comécina éoidino dinomo jofu jáinide, naa taino llotínori. Dama zíñona ítino mámece cueránicomo mámeceña cuezámaci dani afénomo jofu jaille. Afénico Cordero daina Jesucrístomo ite.

22

¹ Afe mei Juzíñamui abi ímie íainide imánina cue ácatate. Afémami jainoi cómena zíñona cáatate. Afeji vidrio enéfenemo uáfóri cioina izói cíoide. Afe imani Juzíñamui illáimana ráiranomona tote. Afe ráirano daje izói Cordero ie.

² Afe jofue cígido áillue macárao illa. Afe macárao dáafenedo comínina zíñona cáatate aménaiaí riina. Daje izói afénomo ite imani fuédado nágafene daje ie aménaiaí riina. Afe aménaiaí illa diga fiui llizífrede. Iemo jiái afe aménaiaí íbiai nairai ñue manóllena ite.

³ Aféruillaído afénomo faidórafuena jae íñeite. Juzíñamui illáimana ráirano afe jófuego ite; daje izói Cordero ráirano afénomo ite. Ie ocuífregano daa afémie mo caimátaitiaioi.

⁴ Afe llezica afémaci Juzíñamuimo, meáiruíñeno jofu conímamo éroitiaioi. Afémaci ozócimo afémie mámece cúeina.

⁵ Afénomo mona jaca náuiñeite. Afénomo itino mechera izoide egáñuana jítaiñeitiaioi. Daje izói jítoma egáñuana jítaiñeitiaioi, mei cai Ocuide Juzíñamui íaioina egáioite. Iemo afémaci jaca ninomo zíñona illámaitiaioi.

Jesucristo billirui ja ánozide

⁶ Afe méifomo Juzíñamui abi ímie nane cuena daide:

—Bie uai iere ua uaiza. Daje izói bie uai iere ínofiregaza. Afe cai Ocuíraima nauí Juzíñamui uai jino llóraini comécimo úritímie. Afémie birui ie abi ímie orede, ie ocuícamacimo raire cómutifuaína onófallena, —daide.

⁷ Iemo Jesucristo daide:

—¡Raire biticue! Binícomo cuega Juzíñamui uáillaina jírruitimie caimare ite, —daide.

⁸ Cue Juáadicue. Bífuiaina cacádicue, daje izói bífuiaina ciódicue. Bífuiaina cacáillano, íemo daje izói cue ciona méifomo, cuemo ácatate Juzíñamui abi ímie anamo dújudicue afémiemo caimátaillena.

⁹ Mei íadi afémie cuena daide:

—Jadíe izói cuemo íñeno. O izói Juzíñamui ocuícamedicue. Daje izói Juzíñamui dibénedo úrifirede o ámatiai izóidicue. Iemo jíái binícomo cuega uáillaina náfuetino izóidicue. Cuemo caimátaíñeno; dama Juzíñamuimo caimátaifreiri, —daide.

¹⁰ Nane dáanomo cuena daide:

—Binícomo cuega Juzíñamui uaina báinino o comécimo jóoneñeno o iri. Mei bífuiái ícoimo ñue fuizájillirui ja áinozideza.

¹¹ Nai bie fuiñena llezica, fiénidimaci íaiói finófirega fiénidifuenta dama íaiói finócaza. Fia eroi, mei afe izói íaiói íllado jamánomo duere finólliaioiza. Daje izói comécina íáiredino dama comécina íáireoicaideza. Fia eroi, mei áfedo duere finólliaioiza. Mei íadi ñue itino íaiói illa baimo ñue iri. Daje izói Juzíñamui íena ñue finócamie fáicanocaiñeno afémie íena ífreiri, —daide.

¹² Iemo Jesucristo daide:

—Jíi, raire biticue. Illa dígamíemo cue fecalle fia jírídoga izoide raa atídicue. Illa dígamíemo afémie finoca dieze fécaiticue.

¹³ Nanódimiedicue. Iemo jíái líraimiedicue. Daje izói naga ráfuiái uícodo itímiedicue. Daje izói fuizájillanomo itímiedicue. Iemo jíái abecedario A-mona táinia izóidimiedicue. Daje izói abecedario Z-mo fuizájilla izóidimiedicue.

¹⁴ Íaiói iníroina jocófirefino izói, comeci ífue ñuérana méidotino caimare itíaiói. Íemona cáatate amena llizíllana gürediaioi. Afe bie izói daiíacade zíñona íaiói íllena. Daje izói íaiói iniroi ñue jócuamona, afe jofue nazedo Juzíñamui illánomo jofu jáirediaioi.

¹⁵ Mei íadi comécina íáiredino afénomo jofu jáinidiaioi. Iemo daje izói jíáima fue gáiana fibídino, íemo daje izói nana jíáiforiede jiruífue finódino, daje izói cómena méinetino, daje izói jánaraimo caimátaidino, daje izói jíáie comínina íere jífuefirefino, naa afe izoide fibídnori; nana bie izoide comíni afe jófuemo jofu jáinidiaioi; jáíñeno jino fiébitiaioi.

¹⁶ Cue Jesúdicue. Juzíñamuimo ua jáináidinomo nana bífuiái jino llóllena cue abi ímie ja cue orea. Jáiai illaíma David comuilla moi ímiedicue; daje izói afémiemona jebuídino comuítagamiedicue. Iemo íere egáíñote monáiracudu izóidimiedicue, —daide.

¹⁷ Iemona Juzíñamui Ñuera Joreño daide:

—Mai bi, —daide.

Daje izói Cordero ai daina afémiemo ua jáináidino íena daide:

—Mai bi, —daide.

Daje izói búuáillaina cacáidino afémiena:

—Mai bi, —omoi daiíri.

Iemo Cristo daide:

—Jíróacaitimie zíñona cáataite jáinoina íbáñeno mai fia jírúabiri. Afe bie izói daiíacade zíñona illáfuenta óiacadimie mai cuemo bi; raiñóñeno omo fécaiticueza.

¹⁸ Nana binícomo cueda Juzíñamui uaimo cacáreidínona bie izói llétaiticueza, cacai: Dáamie bie ráfueña baimo zotáadi, Juzíñamui binícomo cueda jacírede duere fínuaniana afémiemo jóoneite.

¹⁹ Daje izói binícomo cueda Juzíñamui uáimona dáamie daa uai oni óiadi, Juzíñamui afe zíñona cáaitino mámeçi cuiánícomo cueda afémieme mámeçina oni óite. Daje izói binícomo lloga nífuenide jófuemo Juzíñamui afémiena jofo jáitañeite.

²⁰ Bifue jino llotímie nane dáanomote:

—Jíi, raíre biticue, —daíde.

Afemona Juan daíde:

—Aquíe izóideza. ¡Caí Ocuíraíma Jesús, maí bí!

²¹ Caí Ocuíraíma Jesucristo nana ómoína ñue fínóiteza. Daíítadeza. Jae níie.